


Xela wezria cube nen
salmo ca'



New Testament and Psalms in Zapotec, Tabaa (MX:zat:Zapotec,
Tabaa)

Xela wezria cube nen salmo ca' **New Testament and Psalms in Zapotec, Tabaa** **(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

80626b72-93df-58ae-9f5e-9d86733fab46

Contents

San Mateo	1
San Marcos	78
San Lucas	126
San Juan	204
Los Hechos	262
Romanos	332
1 Corintios	362
2 Corintios	391
Gálatas	410
Efesios	421
Filipenses	431
Colosenses	438
1 Tesalonicenses	445
2 Tesalonicenses	451
1 Timoteo	455
2 Timoteo	464
Tito	470
Filemón	474
Hebreos	476
Santiago	498
1 San Pedro	506
2 San Pedro	514
1 Juan	519
2 Juan	527
2 Juan	528
Judas	530
Apocalipsis	533

DIZRA' CHAWE' CA NACA CHEE JESUCRISTO DA BZUAJ SAN MATËO

*La benne' ca' gulaque' xra gula chee Cristo
(Lc. 3.23-38)*

¹ Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

² Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

³ Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

⁴ Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

⁵ Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isaí.

⁶ Isaí nigá guque' xra David, benne' wenná bea.

Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.

⁷ Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

⁸ Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

⁹ Uzías nigá guque' xra Jotam.

Jotam nigá guque' xra Acáz.

Acáz nigá guque' xra Ezequías.

¹⁰ Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

¹¹ Josías nigá guque' xra Jeconías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

¹² Jeconías nigá guque' xra Salatiel.

Salatiel nigá guque' xra Zorobabel.

¹³ Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

¹⁴ Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

¹⁵ Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

¹⁶ Jacob nigá guque' xra José, benne' chee María, xrna Jesús, Bénnea' naque' Cristo.

¹⁷ Caní naca, gulaca chidá' cue' bénneache gate guzú lau zua Abraham, ca bzrinte zra zua David, na' gulaca xechidá' cue' bénneache ca' gate guzú lau zua David, ca bzrinte zra gate na' benne' Babilonia ca' guleché'e benne' Israel ca' lu xezr la xu chee', na' gulaca xechidá' cue' bénneache ca' gate guzú lau zra na', ca bzrinte zra gulaj Cristo.

Ca guca gate gulaj Cristo

(Lc. 2.1-7)

¹⁸ Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'ine chee xel-la' waca chee Be' Lá'azxa chee Dios.

¹⁹ José, benne' chee María nigá, naque' benne' xrlátaje. Quebe guca lazre' gul'éne' ca ba naca chee María lau benne' xezre ca'. Guca lazre' gusané' le' bagácheze. ²⁰ Dxácaté dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. ²¹ Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bénneache lu dul-la da zaj nabague'.

²² Xúguté da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. ²³ Caní gunné':

Tu nú'uladau' gúadaube' sanbe' tu bidu biu cheebe', na' xelu'e labe' Emanuel.

Emanuel zéaje na: Dios zúalene' dxi'u.

²⁴ Ca bebán José, na' bene' cáteze gunná gubáz chee Xránadxu, na' guzú' lu ne'e María chee gácabe' zru'ule'. ²⁵ Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

2

Dxelezn'inne' sina ca' lu xezre Jerusalén

¹ Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa

belezrín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. ² Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj chee'be', na' bla'ntu' nigá chee gúe lá'ana gúe szrentu'-be'.

³ Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute' benne' zaj zre'e Jerusalén. ⁴ Nadxa Herodes, wenná bea na', btupe' xúgute' benne' xíchaj chee bxruze ca', ne benne' dxuluxuzájle'e da nadxixruj bea Dios, na' gunábené' benne' ca':

—¿Gazra na' galaj Cristo?

⁵ Benne' caní gulé'e le':

—Lu xezre Belén da nababa xezr la xu Judea, lawe' da bzuaaj caní tu benne' bchálajé' waláz chee Dios, gate na' gunné':

⁶ Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa ládujla benne' ca' dxelenná be'ene' xezr la xu Judá nigá, lawe' da ládujla bèneache chiu' dxuaj tu benne' nna be'e, na' guxúequeze' bèneache chia', benne' Israel.

⁷ Nadxa Herodes, wenná bea na', bláwizre' bagácheze benne' sina gula ca', na' gunábené' le' bátala ble'e lau belaj na' belelé'ene'. ⁸ Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

⁹ Ca bexuzre belén benne' sina gula ca da gunná Herodes, wenná bea, nadxa besía'que', na' belaj da belelé'ene' gate zaj zre'e chalá'a naga dxalaj gubizra zeaj na lau le', na' bzrinte' na, ne guzúa na naga zua bidu na'. ¹⁰ Gate benne' sina gula ca' belelé'ene' belaj na', nadxa gulebéle'ene'. ¹¹ Ca gulu'e lu xu'u, belelé'ene' bidu na', ne xrnabe' María. Nadxa buluzú zribé' dxelúe lá'ana dxelúe szrene' bidu na'. Nadxa gulesálajé' xua chee' ca', ne bulunézruje'-be' oro, ne xalaj zixre, ne mirra da naca na zichaj. ¹² Ca gudé na', Dios guzre' benne' ca' lu bchigala québedxa xelexedéé' naga zua Herodes. Chee le' na belexequé'e neza xula, belexezrine' lazrié'.

Ca guca beleché'e Jesús lu xezr la xu Egipto

¹³ Ca gudé besí'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xezr la xu Egipto, na' xegá'anu' ga na' ca zrindxa zra xapa' lue' xetú.

Caní dxal-la' gunu' lawe' da wexilaj Herodes bidu nigá chee gutie'-be'.

¹⁴ Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. ¹⁵ Gulezré'e na' ca bzirindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné': "Xuláwizra' bi biu chia' chee xedxúajbe' lu xezr la xu Egipto."

Dxenná be'e Herodes benne' ca' xelútie' bidu biu ca'

¹⁶ Gate gúquebe'e Herodes gulezí xé benne' sina ca' le', na' bzrá'alé'e, ne gunná bé'ene' benne' ca' xelútie' xúgute bi biu dxé'enedau', ca zrinte bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'. ¹⁷ Ca'an guca ca da bzuj Jeremías, bénnea' bchálaje' waláz chee Dios ba guca zan' iza, gunné':

¹⁸ Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e chee bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

¹⁹ Ca gudé gute Herodes, na' tu gubáz chee xabáa, gubáz chee Xránadxu ble'e lawe' José lu bchigala naga zue' Egipto, na' guzre' le':

²⁰ —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelútie' bidu nigá.

²¹ Nadxa guxasa José, na' beche'e bidu na', ne xrnabe', na' belexezrine' lu xezr la xu Israel. ²² Ca guneze José dxenná bea Arquelao naga nababa Judea waláz chee xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee xabáa le' lu bchigala. ²³ Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

3

Juan dxegu'e lban le'e xixre' lawe' lataj

(Mr. 1.1-8; Lc. 3.1-9, 15-17; Jn. 1.19-28)

¹ Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea. ² Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

³ Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní:

Dxene chi'i benne' dxebezre xē'ē lē'ē xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Lē' naga téé'.

⁴ Zra lana Juan nigá nune na xicha zra camello, ne bazxu dxu'a lē'ē chee' naca na xide, na' dxawē' biche xuaj, ne bzrína'dau' chee' bézudau'. ⁵ Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' chee' xúgute xezre ca' zaj nababa Judea, ne benne' zá'aque' xézredu ca' zaj nnita gáguze xegu Jordán. ⁶ Ca gulexrúalepe' dul-la chee', Juan nigá bchue' benne' ca' nisa lu xegu Jordán.

⁷ Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnajle da ba xa' da za'? ⁸ Le gun da xrlátaje da xelunna bea na ba bebí'i lázrele. ⁹ Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexunē' xiaj caní zri'ine xrtia Abraham. ¹⁰ Le'e nácale ca xaga ca'. Xia waga bache nalá na chee' chugu na xaga ca', na' xúgute xaga ca' quebe dxelebía na da zixre chawe' welechugue na, na' xelezxe na lu xi'. ¹¹ Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'ē ca te chia' neda', Lē' gunē' ca da zéaje xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácadxe' blau ca neda', na' quebe zaca' cuéajza' zrele' xu'u ni'ē. ¹² Cá'anqueze nácale ca zrua' xtila. Benne' nigá ba nu'ē da dxun be', cuéaje' xrte zrua' xtila na', na' xebéaje' chalá'ala xizre chee' na, na' xuzrá chawē' zrua' xtila na' lu da'a chee' na, san guzezxe' xizre na' lu xi' da quebe xexula na.

Da guca gate gudxúa Jesús nisa

(Mr. 1.9-11; Lc. 3.21-22)

¹³ Nadxa Jesús bezé'ē naga nababa Galilea, na' bezrine' dxu'a xegu Jordán naga zua Juan chee' guchúe' Lē' nisa.

¹⁴ Nédxute Juan quebe guca lazre', na' dxē'ē Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

¹⁵ Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'. ¹⁶ Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zeajsúaba' lawe' Jesús. ¹⁷ Nadxa ben tu chí'i lu be', gunné':

—Benne' nigá naque' Zrí'inequeza' nazrí'ite' lazra'. Dxezaca ba lázreḽena' Le'.

4

Dxaca lazre' da xriwe' gun na бага Jesús zria
(Mr. 1.12-13; Lc. 4.1-13)

¹ Nadxa Be' Lá'azxa chee Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'. ² Quebe bi gudagu Jesús chua zra chua xela, na' ca gudé na' gudune'. ³ Nadxa da xriwe' bzrin na naga zua Jesús chee gun zréaje na Le', na' dxe na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

⁴ Jesús bechebe':

—Lu xiche chee Dios dxenné': "Quebe gaca ban nu benne' gawe' xétaze, san nen xúgute' dizra' chee Dios gaca bane'."

⁵ Nadxa da xriwe' guché na Jesús lu xezre lá'azxa Jerusalén, na' bzua na Le' xíchajte' xudau', ⁶ na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios:

Dios nna bé'ene' gubáz chee xabáa chee' ca'

chee xelácalene' Lue'.

Welexechise' Lue' nen ne'e

chee quebe gunu' zi' ni'u lu xiaj ca'.

⁷ Na' gunná Jesús:

—Cá'aqueze dxenná lu xiche chee Dios, dxe'e bénneache: "Quebe guchínenu' Xranu' Dios cáteze dxaca lazru'."

⁸ Nadxa da xriwe' guché na Le' tu lu xi'a sibe, na' ble'e na Le' ca naca xúgute' cue' xezr la xu zaj nnita lu xezr la xu, ne ca naca xel-la' guni'a chee na. ⁹ Na' gunná da xriwe', dxe na Le':

—Xúgute' da caní gunna' chiu' che guzú zribu' gucá'ana szrenu' neda'.

¹⁰ Nadxa Jesús guzre' na:

—Bexíaj, da xriwe', lawe' da dxenná Dios lu xiche chee', dxe'e bénneache: "Bca'ana szren Xranu' Dios, ne be lá'ana tuze Le'."

¹¹ Nadxa da xriwe' becuasa na lau Jesús, na' belezrín gubáz chee xabáa chee Dios, ne bulunézruje' da dxechine Jesús.

Dxuzú lau Jesús dxuchálaje' xrtizra' Dios naga nababa Galilea

(Mr. 1.14-15; Lc. 4.14-15)

¹² Gate ben Jesús xu'u Juan lizre xia, na' bezé'e zexíaje' naga nababa Galilea. ¹³ Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. ¹⁴ Caní guca ca da bzuaj Isaias, benne' bchálaje' waláz chee Dios, gunné':

15 Lu xęzr la xu cheę Zabulón, ne cheę Neftalí,
naga zrua neza da zeaj na dxu'a nísadau',
chalá'a naga dxalaj gubizra xechalá'a xęgu Jordán.
Naga nababa Galilea,

naga zaj zra' benne' quebe zaj naque' judío.

16 Bénneache zaj zra' lu da chul-la belelé'ene' tu da dxusaníle'e
na,

na' benne' zaj zra' naga xu'u zrul-la cheę xel-la' gute
ba bsaní' tu xi' naga zaj zře'e.

17 Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios
lu xęzr la xu nigá.

Jesús dxuláwizre' tapa benne' wezén bela

(Mr. 1.16-20; Lc. 5.1-11)

18 Gate na' zeaj Jesús dxu'a nísadau' ga nababa Galilea, na'
blé'ene' chupa benne'. Tue' le' Simón, ne zua xetú le' Pedro,
na' xetúe' le' Andrés, biche Simón na'. Benne' caní zaj naque'
benne' wezén bela, na' dxuluzale' xixruj bela cheę' lu nisa.

19 Nadxa Jesús dxę'e benne' caní:

—Le gun neda' tuze, na' guna' le'e benne' gutúpale chia'
bénneache ca dxunle dxezenle bela.

20 La bulucá'anate' xixruj cheę' ca', na' zjácálene' Jesús.

21 Xelátedauze gusá'aque', na' ble'e Jesús xechupa benne'.
Tue' le' Jacobo, ne xetúe' le' Juan, biche Jacobo nigá. Zaj
naque' zri'ine Zebedeo, ne zaj xu'e tu lu da dxedá lawe'
nísadau' nen xre', dxelexún chawe' xixruj cheę'. Jesús bláwizre'
le', 22 na' la bulucá'anate' da dxedá lawe' nísadau' na', ne xre',
na' zjácálene' Jesús.

Jesús dxusédene' bénneache naga nababa Galilea

(Lc. 6.17-19)

23 Zeaj Jesús xúgute xęzre zaj nababa Galilea, na' tu tu xęzre
ca' dxuzéajni'ine' bénneache lu xu'u ca' naga dxulucá'ana szren
benne' judío ca' Dios. Na' dxegu'e lban ca nna bea Dios, ne
dxexune' xúgute benne' ca' ca zaj naca xízrawe' cha cheę'.

24 Ca'an guca, xúgute benne' cheę xęzr la xu Siria belenne' ca
da dxun Jesús, na' belezrine' lau Jesús, zaj naché'e benne' we'
ca', benne' zaj xu'e xízrawe', ne benne' zaj zue' lu xel-la' dxudía,
ne benne' zaj xu'e be' xriwe', ne benne' zaj xu'e chuna', ne
benne' zaj naxrú'unie' bine, na' bexún Jesús xúgute benne'
caní. 25 Zjácále benne' zan Le', benne' zaj nababe' xęzre ca'
zaj nababa Galilea, ne benne' zá'aque' xęzre Decápolis ca', ne
benne' Jerusalén, ne benne' zaj nababe' xęzre ca' zaj nababa
Judea, ne benne' zá'aque' xechalá'ala xęgu Jordán naga dxalaj
gubizra.

5

Lban da bchalaj Jesús tu lu xi'a

¹ Gate ble'e Jesús xúgute benne' zan ca' zá'aque' naga zué', nadxa guluéne' tu lu xi'a, ne gudxé'ē na'. Nadxa benne' ca' dxusede Jesús beledube' cuité'. ² Nadxa guzú lau Jesús dxusedene' benne' ca'.

*Nu benne' naca chee' tu da ba neza**(Lc. 6.20-23)*³ Gunná Jesús:

—Da ba neza zrente naca na chee benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'ē naga dxenná bea Dios xabáa.

⁴ 'Da ba neza zrente naca na chee benne' ca' dxelelé'elē' zaj zué' lu da baxache' lawe' da zaj nabague' dul-la. Dios dxexúe zrene' benne' caní.

⁵ 'Da ba neza zrente naca na chee benne' zaj naque' zren lazre'. Benne' caní xelezí'ē chee' xēzr la xu da nachēbe lazre' Dios gunézruje' benne' caní.

⁶ 'Da ba neza zrente naca na chee benne' du lazre' dxelaca lazre' xelune' da naca xrlátaje lau Dios. Dios gácalēne' benne' caní.

⁷ 'Da ba neza zrente naca na chee benne' dxelexexache lazre' benne' xula. Dios wexache lazre' benne' caní.

⁸ 'Da ba neza zrente naca na chee benne' ca' zaj xu'u xichaj lázrdawē' da xrlátaje. Benne' caní welelé'ene' Dios.

⁹ 'Da ba neza zrente naca na chee benne' dxelebeza zri lazre' nen bēnneache. Dios guzúē' le' ca' bi cheéqueze'.

¹⁰ 'Da ba neza zrente naca na chee benne' dxeledéē' xel-la' zi' lu na' benne' ca' dxelune' chee' da calēla cate' dxelune' da xrlátaje. Benne' caní zaj naca chee' xelexú'ē naga dxenná bea Dios xabáa.

¹¹ 'Da ba neza zrente naca na chee le'e che benne' dxelenné' schanni' chee, ne dxelune' chee da calēla, ne dxelenné' chee xúgute dizra' wēn lazre' lawe' da nácale chia' neda'. ¹² Le be, ne le xezaca ba lázrele lawe' da wazile tu da zrente da gunna Dios le'e xabáa. Caní gaca na lawe' da cá'aqueze caní guláu zi' xuzre' benne' ca' buluchálaje' waláz chee Dios, benne' ca' gulezré'ē nédxudxa ca le'e.

*Nácale ca zede', ne ca tu xi' lu xēzr la xu**(Mr. 9.50; Lc. 14.34-35)*¹³ Na' gunná Jesús:

—Le'e nácale ca zede' chee bēnneache lu xēzr la xu nigá. Che zede' nigá xenite xel-la' sna'a chee na, ¿ájazra gácalēle bēnneache ca'? Québedxa gaca guchínedxu zede' caní. ¡Chú'unadxu na, na' xululéaj bēnneache le na!

14 'Le'e nácale ca tu xi' chee b́enneache zaj zre'e xezr la xu. Tu xezre da zua na tu lu xi'a, quebe gáchequeze na. 15 Gate guzálajdxu tu xi', quebe gudúsedxu na. Guzúadxu na sibe naga gusení na chee xeledé'e xúgute benne' zaj zre'e lu xu'u. 16 Cá'anqueze le gun le'e. Le güe lataj gusení xi' da nácale lau b́enneache ca' chee xeledé'ene' ca da xrlátaje da dxunle. Nadxa xelúe lá'ane' Xrale Dios zué' xabáa.

Da bchalaj Jesús ca naca chee da nadxiruj bea Dios

17 Gunná Jesús:

—Quebe dxal-la' guéquele le'e za'a neda' chee cua' ca naca da bdxiruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gulé'eda' cáteze zéaje na. 18 Da li dxapa' le'e. Dxácaté zaj zua xabáa, ne xezr la xu nigá, quebe dúaqueze tu dizra', ne tu da da' lu da nadxiruj bea na nigá ca zrindxa zra gaca xúgute ca da dxal-la' gaca na. 19 Chee le' na', che tu benne' guzúe' chalá'ala bítetezla da nigá da bdxiruj bea Dios, láqueze naca na tu da dauze, ne che guzéajni'ine' b́enneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bénnea' guzúe' dizra' da nadxiruj bea nigá, ne gulé'ene' b́enneache chee xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. 20 Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxiruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

Da bchalaj Jesús ca naca chee xel-la' dxezra'a

(Lc. 12.57-59)

21 Na' gunná Jesús:

—Le'e ba bénele ca gulenná xrtíale gula ca': “Quebe gútele benne',” na’ “Nútezeze benne' gutie' benne' waxíaje' chee cuía xi'e.” 22 Neda' dxapa' le'e, nútezeze benne' dxezré'e le sa' ljwezre' waxíaje' chee cuía xi'e. Na' bénnea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludé' le' chee cuía xi'e. Bénnea' dxenné' chee le sa' ljwezre' tu dizra' sban, benne' nigá nácaqueze chee' chéaje' lu lataj ba xa'.

23 'Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru', 24 bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

25 'Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudé'e lue' lau bénnea' dxuchi'e da dxaca. Che quebe

gunu' caní, nadxa benne' dxuchi'e da dxaca na' gudé'e lue' lu na' benne' dxusézxuje' bēnne' ca' lizre xia, na' xelegú'e lue' lizre xia na'. ²⁶ Da li dxapa' lue'. Quebe xedxúaju' na' che quebe quízruju' xúgutē da dxebagu' chee benne' na'.

Da bchalaj Jesús ca naca chee benne' dxíchaj'e xrba chee xel-la' nuchaga na'

²⁷ Na' gunná Jesús:

—Le'e bache bēnquezle ca gulenné' nédxutē: “Quebe gunu' dul-la da dxichaj na xrba chee xel-la' nuchaga na'.” ²⁸ Neda' dxapa' le'e, nútetēze benne' ne'e tu nu'ula, ne sa lazre' le', báchequeze bēne' dul-la nen nu'ula na' lu xichaj lázrdawē'.

²⁹ Che xiaj lau' da zua xabēla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bēl-la' dxen chiu' quézcala chu'u lataj ba xa' dutē bēl-la' dxen chiu'. ³⁰ Che na'u da zua xabēla chiu' dxuzúa na lue' lu dul-la, guchugu na, ne gudxú'una na zítu'. Nácadxa chawe' nite late' da naca na chee bēl-la' dxen chiu', quézcala chu'u lataj ba xa' dutē bēl-la' dxen chiu'.

Jesús dxusédenē' ca naca chee benne' dxexelē'e nen zru'ulē' (Mt. 19.9; Mr. 10.11-12; Lc. 16.18)

³¹ Na' gunná Jesús:

—Cá'anqueze gulenné' nédxutē: “Nútetēze benne' dxexelē'e nen zru'ulē', dxal-la' gunézruje' nu'ula na' tu xiche da dxulé'e na belexelē'e.” ³² Neda' dxapa' le'e, che tu benne' dxexelē'e nen zru'ulē', na' nu'ula nigá quebe guzúalēne' benne' xula, benne' chee nu'ula nigá dxuzú'e le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee le'. Cá'anqueze le' dxunē' dul-la nen nu'ula na'.

Jesús dxusédenē' ca naca chee benne' dxucá'ana liē' xrtizre'

³³ Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios.” ³⁴ Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios, ³⁵ ne quebe guzétjale xēzr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xēzre chee Benne' Blau naque' Wenná Bea. ³⁶ Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle. ³⁷ Le nnaze: “Awe',” u le nnaze: “Cabí,” lawe' da gate tu benne' dxudadxē' chee' chee da nigá, naca na chee da xriwē'.

Dxul'é Jesús ca naca chee nu benne' dxexebéaj lazre'
(Lc. 6.29-30)

³⁸ Na' gunná Jesús:

—Le'e ba bénele ca da gulenné' nédxute: “Che tu benne' cuéaje' xiaj lau', cá'anqueze gunu' chee', ne che cuéaje' lazxu', cá'anqueze gunu' chee'.” ³⁹ Neda' dxapa' le'e, quebe tíl-lalele nu benne', san che tu benne' gu'e chala'a xragu', be' lataj gu'e xechalá'a xragu'. ⁴⁰ Che tu benne' gaca xúzre'lene' lue', ne dxaca lazre' cué' zrau', be' lataj xúate' xicha chiu'. ⁴¹ Che dxulusebágué' lue' gu'u xua chee' tu cuéndau', bia na chupa cuenla. ⁴² Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.

Jesús dxusédené' ca dxal-la' zri'idxu benne' ca' dxeledábague' dxi'u
(Lc. 6.27-28, 32-36)

⁴³ Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábague' lue'.” ⁴⁴ Neda' dxapa' le'e, le zri'i benne' ca' dxeledábague' le'e. Le naba gaca chawe' chee benne' dxelenné' chee. Le gun da chawe' chee benne' dxelecuídené' le'e. Le naba lau Dios gaca chawe' chee benne' dxelenné' schanni' chee ne dxeluné' chee da calela. ⁴⁵ Che gunle caní gácale bi cheéqueze Xrale zue' xabáa, lawe' da dxun Le' dxusaní gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxeluné' da calela. ⁴⁶ Che nazrí'ile tuze benne' zaj nazrí'ine' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. ⁴⁷ Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. ⁴⁸ Le gaca benne' xrlátaje cáteze naca Xrale zue' xabáa, naque' xrlátaje.

6

Dxul'é Jesús ca naca da xrlátaje da dxelún bénneache

¹ Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee lau bénneache chee xeelé'ene' na. Che ca'an dxunle, na' Xrale Dios zue' xabáa québequeze bi gunné' le'e. ² Chee le na', gate lue' dxácalenu' benne' dxelaxázejene', quebe guzennu' xúgute' bénneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné'

da caní cheē xelenné bēneache xrlátaje cheē'. Da li dxapa' le'e, ba déqueze lazruj cheē'. ³ Gate lue' gunézruju' late' cheē benne' dxelexázrjenē', ben na luéze cheē quebe neze le sa' ljwezru'. ⁴ Ben da caní bagácheze, na' Xrau' Dios, Bēnea' dxelé'enē' ca da dxunu' bagácheze, Le' gunnē' lazruj chiu'.

Jesús dxusédené' ca dxal-la' gundxu xel-la' dxuláwizra Dios (Lc. 11.2-4)

⁵ Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxelunē' xrlátaje cúzreze. Dxeledánenē' dxelunē' xel-la' dxuláwizra Dios zaj zezē' lu xu'u naga dxulucá'ana szren benne' judío ca' Dios, ne la neza, cheē xeledé'e bēneache da dxelunē'. Da li dxapa' le'e, ba déqueze lazruj cheē'. ⁶ Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalenē' lue' naga zu' tuzu'. Nadxa Xrau' Dios, Bēnea' dxelé'enē' ca da dxunu' bagácheze, Le' xuzri'ē chiu'.

⁷ Gate dxuláwizru' Dios dxuchálajlenu' Le', quebe tuz ca da nneu' zánetē lasa ca dxelún benne' ca' quebe zaj núnbe'ē Dios. Dxeléquenē' wen Dios cheē' lawe' da dxelennéle'ē. ⁸ Quebe gunle ca dxelún benne' ca', lawe' da Xrale Dios ba nézqueznē' ca da dxechínnele le'e nédxula ca za nábele na. ⁹ Cheē lē na', le guláwizra Dios nnale caní:

Xrantu' Dios, zu' xabáa,
gaca lá'azxaqueze Lau'.

¹⁰ Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',
cáteze dxaca xabáa.

¹¹ Bēna netu' da gáguntu' na'a.

¹² Bnité lau cheentu' ca naca da calela da bentu',
ca netu' ba bnité launtu' cheē benne' belunē' cheentu'
da calela.

¹³ Quebe gu'u lataj nu gun zréaje netu',

2 san bselá netu' lu na' da xriwē'.

Naca chiu' gápaquezu' xel-la' dxenná bea,
ne xel-la' waca,

ne da xabáa chadía chacanna. ¡Ca'an gaca na!

¹⁴ Che le'e gunité laule cheē benne' belunē' cheēle da calela,
na' Xrale Dios zue' xabáa gunité lawē' cheēle le'e. ¹⁵ Che
le'e quebe gunité laule cheē benne' ca', na' Xrale Dios quebe
gunité láuqueze' cheēle le'e ca naca dul-la da nabágale.

Jesús dxusédené' ca dxal-la' gundxu gubasa

¹⁶ Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelunē' xrlátaje cúzreze. Benne' caní dxelunē'

ca' chee xelelé'e bēnneache le' dxelunē' gubasa. Da li dxapa' le'e, ba dēqueze lazruj chee benne' ca'. ¹⁷ Lue', gate dxunu' gubasa, bza xíchaju' chawe', ne gudibe lau', ¹⁸ chee quebe xelēquebe'e bēnneache dxunu' gubasa. Tuze Xrau' Dios na', Bēnea' zúalēnē' lue' naga zu' tuzu', Le' dxennátequeze', na' gunnē' da naca na chiu'.

Jesús dxusédenē' chee da gunní'a chee xabáa
(Lc. 12.33-34)

¹⁹ Na' gunná Jesús:

—Quebe gutúpale da gunní'a lu xēzr la xu nigá, naga guteba' na, ne da ca' dxelebía xi na, na' xelú'u gubán ne xelebanē' na. ²⁰ Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelequē'ē na. ²¹ Naga nuzrale da gunní'a chee, na' zúaqueze lázrdaule.

Jesús dxusédenē' chee tu xi' da xú'udxu
(Lc. 11.34-36)

²² Na' gunná Jesús:

—Xiaj laule zaj naca na ca tu xi' chee bēl-la' dxen chee. Che xiaj laule zaj naca na chawe', dutē ca naca bēl-la' dxen chee naxaní'. ²³ Che xiaj laule quebe zaj naca na chawe', dutē ca naca bēl-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalē'ēdxa súaquezle.

Jesús dxusédenē' chee Dios, ne chee da gunní'a
(Lc. 16.13)

²⁴ Na' gunná Jesús:

—Netú benne' quebe séquene' guzúa cuine' lu na' chupa xranē', lawe' da wazré'ē tu xranē' ne wazrí'ine' xetúē', u wéquene' ba lá'ana tu xranē' na' xetúē' guzúē' chalá'ala. Quebe séquele guzúa cuinle lu na' Dios, ne lu na' da gunní'a.

Jesús dxusédenē' ca dxun Dios, dxuxúē' xúgutē bi chee' ca'
(Lc. 12.22-31)

²⁵ Na' gunná Jesús:

—Chee le' na' dxapa' le'e, quebe cue'le gunne xue ga sa' da gágule da xí'ajle chee gaca banle, ne ga sa' zra lánale da gácule. Zácadxa xel-la' nabán chee ca da dxágule, ne zácadxa bēl-la' dxen chee ca zra lánale. ²⁶ Le nna'xque bxínnedu ca' dxeled-aba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínnedu ca'. ²⁷ ¿Nuzra benne' ládujla le'e gaca gusetunna cuine' xate' lawe' da dxe'ē gunne xue?

²⁸ ¿Bizr chee na' dxe'le le'e gunne xue chee zra lánale? Le nna'xque ca dxelegula xiaj ca' zaj zē le'ē xixre'. Quebe dxelún

na zrin, ne quebe dxelache na du. ²⁹ Dxapa' le'e, Salomón benne' wenná bea na' quebe gucue' ca da xrtan chee xiaj caní, na' le' gúta'le'e chee' da gunní'a. ³⁰ Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelezxe na lu xi', quegá gundxe' da chawe' chee le'e, benne' québetē ca dxeajlí lazre'. ³¹ Chee le na', quebe cué'tecale gunne xue, nnale: "¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?" ³² Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgutē da dxechínnele. ³³ Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' sile xúgutē da ca' dxechínnele. ³⁴ Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

7

Jesús dxusédenē' chee benne' dxuchi'e da dxun le sa' ljwezre' (Lc. 6.37-38, 41-42)

¹ Na' gunná Jesús:

—Quebe guchí'ale da dxelún le sa' ljwézrele chee quebe guchi'a Dios caní chee le'e. ² Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. ³ ¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrentē da xu'u na xiaj láuquezu' lue'? ⁴ ¿Ájazra gunu' xu'u le sa' ljwezru': "Benna lataj xebéaja' bébedau' da xu'u xiaj lau", che da zrendxa xu'u xiaj láuquezu' lue'? ⁵ Lue', benne' dxun xrlátaje cúzreze. Bebéaj nedxu da zrentē da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

⁶ 'Quebe gunézrujle da naca lá'azxa chee benne' dxelunē' ca dxelún becu' snia, checa xelexéchaje', ne xuluzúzruē' le'e. Quebe guzúale da zaca chee lau benne' dxelunē' ca dxelún cuche, dxuluchuchuj dxululéajba' da dxugágule-ba'.

Dxuchalaj Jesús ca dxal-la' nábadxu, ne xexíajdxu, ne nnēdxu dxu'a dxa xu'u (Lc. 11.9-13; 6.31)

⁷ Na' gunná Jesús:

—Le naba, na' Dios gunne' na chee. Le xilaj na, na' xezrélele na. Le nne dxu'a dxa xu'u, na' sáluje' chee. ⁸ Le gun caní lawe' da benne' bi dxenabē', dxezi'e na. Benne' bi dxexilaje', dxeajxraque' na, na' benne' dxennē' dxu'a dxa xu'u, zua nu benne' sáluje' chee'.

⁹ 'Netule le'e quebe gunézrujle zrí'inele tu xiaj che lebe' dxenábabe' le'e tu xeta. ¹⁰ Quebe gunézrujle zrí'inele tu bela' snia che lebe' dxenábabe' le'e tu bela. ¹¹ Che le'e, benne' wen da calēla, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

¹² 'Le gun chee le sa' ljwézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

Jesús dxusédenē' chee dxa xu'u lechide'

(Lc. 13.24)

¹³ Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. ¹⁴ Dxa xu'u lechide', ne neza lase zaj naca naga zjaca benne' xelezí'e xel-la' nabán da zeajlí canna, na' bábaze benne' dxelexezrelne' na.

Naca bea tu xaga ne chee da zixre dxebía na

(Lc. 6.43-44)

¹⁵ Na' gunná Jesús:

—Le guxúe cuínale chee benne' wen lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. ¹⁶ Le'e xúnbeale le' ne chee da dxelune'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. ¹⁷ Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. ¹⁸ Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. ¹⁹ Xúgute xaga zrinnaj welechugue na, na' xelezxe na lu xi'. ²⁰ Ca'an naca, le'e xúnbeale benne' ca' ne chee da ca' dxelune'.

Quegá xúgute benne' xelu'e naga dxenná bea Dios xabáa

(Lc. 13.25-27)

²¹ Na' gunná Jesús:

—Quebe xelu'e naga dxenná bea Dios xabáa xugute benne' ca' dxelé'e neda': "Xrana', Xrana'." Welú'u tuze benne' ca' dxelune' ca da dxaca lazre' Dios zuē' xabáa. ²² Ca zrin zra na', benne' zante xelé'e neda': "Xránantu', Xránantu', netu' bchálajntu' ne chee Lau' Lue', ne bchínentu' Lau' bebéajntu' be' xriwe' ca', ne nen Lau' Lue' bēnle'entu' xel-la' waca ca' chee

xabáa.” ²³ Nadxa neda' xápaqueza' benne' ca': “Quebe núnbe'a le'e. Le cuasa cuita' neda', le'e, ba benle da calēla.”

Jesús dxusédenē' cheē chupa lane xu'u

(Lc. 6.47-49; Mr. 1.22)

²⁴ Na' gunná Jesús:

—Bénnea' dxenne' chia', ne dxunē' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre.

²⁵ Guca xiuj, na' bdxuaj guba'u, ne guxasa be' bdunu' chee xuluzría xi na xu'u na', san quebe guzré'e na lawe' da xu'u lane na lu xiaj xre. ²⁶ Bénnea' quebe dxuzé nague' chia', ne quebe dxunē' ca da dxennía', naque' ca tu benne' xala, benne' bene' tu lizre' lu xu dxeze. ²⁷ Guca xiuj, na' bdxuaj guba'u ne guxasa be' bdunu' chee xuluzría xi na xu'u na', na' chadite guzré'e na, ne guzría xite na.

²⁸ Ca bexuzre bchalaj Jesús, na' belexebanne benne' ca' ca naca da bsédenē', ²⁹ lawe' da dxusédenē' benne' ca' ca tu benne' napē' xel-la' dxenná bea, ne quegá ca dxelún benne' ca' dxuluxuzájle'e da nadxixruj bea Dios.

8

Dxexún Jesús tu benne' dxuzru lu xpele'

(Mr. 1.40-45; Lc. 5.12-16)

¹ Gate bexetaj Jesús lu xi'a na', benne' zante zjácaleñe' Le'.

² Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

³ Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' we' na' bexácate' ca naca xízrawe' chee'. ⁴ Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xelelé'e benne' ca' ba bexacu' na'a.

Dxexún Jesús bi wen zrin chee tu benne' dxenná be'e lu wedil-la

(Lc. 7.1-10)

⁵ Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuene' Le', ⁶ dxe'e Le':

—Xran, bi wen zrin chia' debe' lizra'. Naxrú'unebe' bine, ne dxezácale'ebe'.

⁷ Jesús dxe'e le':

—Wazá'a xexuna'-be'.

⁸ Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'. ⁹ Caní waca gunu' lawe' da zua benne' dxenná bé'ene' neda', ne cá'anqueze neda' dxenná be'eda' benne' ca' dxjaque' wedil-la. Gate dxapa' tube': “Guxíaj”, na' dxéajbe'. Na' gate dxapa' bi xula: “Gudá”, na' dxídabe'. Na' gate dxuchíneda' bi wen zrin chia' chee bi da gunbe', na' dxunbe' na.

¹⁰ Gate bene Jesús da nigá, bebánene', na' guzre' benne' ca' zjácálene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá. ¹¹ Neda' dxapa' le'e, zá'aca benne' zante' chala'a naga dxalaj gubizra, ne xechalá'ala naga dxebía gubizra, na' xelebé'e tu zren xelawe' nen Abraham, ne Isaac, ne Jacob naga dxenná bea Dios xabáa. ¹² Benne' ca' gucá'a zga'ale Dios chee xelu'e naga dxenná bea Le', guzale' benne' ca' lataj chul-la naga xelebezre', ne xeláguxa'ate' lazxe'.

¹³ Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácaté bi wen zrin chee'.

Dxexún Jesús xrna zru'ule Pedro

(Mr. 1.29-31; Lc. 4.38-39)

¹⁴ Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. ¹⁵ Xeajté' ne'e, na' bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne' ca'.

Dxexún Jesús benne' zante' benne' we'

(Mr. 1.32-34; Lc. 4.40-41)

¹⁶ Ca guzría gubizra, na' belezrín benne' zante' lau Jesús, zaj naché'e benne' zaj xu'e be' xriwe' ca'. Nen dízra'ze da gunná Jesús, bebéaje' be' xriwe' ca', ne bexune' xúgute' benne' we' ca'. ¹⁷ Da nigá guca na ca da gunná Isaías, benne' bchálaje' waláz chee Dios, gunné': “Le' bequé'e xízrawe' ca' da nápadxu, ne gubague' ca da dxezácadxu.”

Dxelaca lazre' benne' chjácálene' Jesús

(Lc. 9.57-62)

¹⁸ Gate na' ble'e Jesús benne' zante' zaj naxéchaje' Le', na' guzre' benne' ca' dxusédené' gulelague' xechalá'a nísadau' tu lu da dxedá lawe' nisa. ¹⁹ Na' bzrin lau Jesús tu benne' dxuxuzájle'e da bdxixruj be'e Dios, na' dxé'e Le':

—Benne' Wesede, dxaca lazra' sále'na' Lue' gáteteze chéaju'.

²⁰ Na' Jesús guzre' le':

—Beza' zaj zua bluaj cheeba', na' bxinne zaj zria xrú'uneba', san neda', Benne' Gulje' Bénneache, ne naga xrúa xíchaja' quebe ga zua.

²¹ Bzrin xetú benne' naque' benne' ba bsédequeze Jesús, na' guzre' Le':

—Xran, benna neda' lataj xexá'a nedxu chee' cheajxecacha' xra'.

²² Nadxa Jesús guzre' le':

—Gudálen neda'. Be' lataj benne' gate ca' xulucache ljweze'.

Dxebeque zri Jesús be' bdunu', ne xeajxruza chee' nísadau' (Mr. 4.35-41; Lc. 8.22-25)

²³ Nadxa guxú'u Jesús lu da dxedá lawe' nísadau', na' benne' ca' dxusédenē' belunē' Le' tu zren. ²⁴ Na' guzú lau dxaca tu be' bdunu' lawe' nísadau', na' xeajxruza chee' nísadau' guxú'u na lu da dxedá lawe' nísadau' na', dxácatē dxase Jesús. ²⁵ Nadxa benne' ca' dxusédenē' bulusebanē' Le', na' dxelē'e Le':

—Xránantu'. Bselá netu'. Ba dxázentu' lu nisa.

²⁶ Jesús guzre' le':

—¿Bizr chee' na' dxezrébele'e? Nácale benne' látega dxelea-jlí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite' na. ²⁷ Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' chee'.

Benne' Gadara zaj xu'e be' xriwe' (Mr. 5.1-20; Lc. 8.26-39)

²⁸ Gate bezrín Jesús xechalá'a nísadau' na' lu xezr la xu chee' benne' Gadara, na' chupa benne' biu belexedxúaje' lu bluaj chee' benne' gate, na' belezrine' lau Jesús. Dxúpatē benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedē'e la neza na'. ²⁹ Na' gulezú lawe' dxelebézrexe'e. Dxelenné':

—¿Bizr chee' na' za'u naga zúantu', Jesús, Zri'ine Dios? ¿Za'u nigá chee' gusaca zi'u netu', ne quebe ne zrin zra?

³⁰ Tu chi na' zra tu cue' cuche dxeláguba'. ³¹ Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj cheajchú'untu' lu cuche ca'.

³² Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute' cuche ca' belelázruba' tu dxu'a xi'a zren, na' xeajlecházeba' lu nísadau' naga gulázeba' nisa, na' guláteba'.

³³ Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute' da caní, ne ca guca chee' benne' ca', belexedxúaj be' xriwe' zaj xu'e.

³⁴ Nadxa xúgute benne' zaj zre'e lu xezre na' beledxúaje, ne belezrine' naga zua Jesús. Na' ca belelé'ene' Le', gulata' xuene' Le' xezé'e lu xezr la xu chee'.

9

Dxexún Jesús tu benne' zaj zua zri ni'a ne'e

(Mr. 2.1-12; Lc. 5.17-26)

¹ Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. ² Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxe'e benne' we':

—Ben dipa lazru', zrí'ina'dau'. Dul-la chiu' dxunite lawa'.

³ Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítaje' Dios nen xrtizre'." ⁴ Lawe' da neze Jesús ca gulenné' lu xichaj lázrdawe', na' dxe'e benne' ca', gunné':

—¿Bizr chee na' dxennale caní lu xichaj lázrdau'e? ⁵ ¿Bízrala da quebe nácadxa stebe guna? ¿Nnia': "Dul-la chiu' ba bnite lawa'", u che nnia': "Bexasa, guzá'?" ⁶ Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunité lawa' dul-la.

Nadxa dxe'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

⁷ Bénnea' zaj zua zri ni'a ne'e bexase', na' zexíajte' lizre'.

⁸ Gate belelé'e bénneache da nigá, na' belezrebe', ne belúe lá'ané' Dios lawe' ba bnézruje' xel-la' waca caní chee bénneache.

Jesús dxuláwizre' Mateo

(Mr. 2.13-17; Lc. 5.27-32)

⁹ Ca bezá Jesús na', na' blé'ene' tu benne' biu le' Mateo, dxe'e lataj naga dxuchízruje' waláz chee xezre Roma, na' dxe'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

¹⁰ Gate na' dxe' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuita Jesús, ne benne' ca' dxusédene'. ¹¹ Benne' xudau' fariseo ca', gate belelé'ene' da nigá, dxelé'e benne' ca' dxuséde Jesús, gulenné':

—¿Bizr chee na' Benne' dxusédene' le'e dxágulene' benne' wechizruj ca', ne benne' wen da zrinnaj ca'?

¹² Jesús benne' da nigá, na' dxe'e benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechínene' le'. ¹³ Le chjaca, le cheajséde ca da dxenná da naxúaj na lu xiche chee Dios,

dxenné': "Neda' dxaca lazra' xexache lázrele le sa' ljuwézrele, quegá gútele be xíxre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

Jesús dxusédene' ca naca chee gubasa

(Mr. 2.18-22; Lc. 5.33-39)

¹⁴ Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábene' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

¹⁵ Na' Jesús dxé'e benne' ca', gunné':

—¿Ájala chee na' xelezúa ba xácheze benne' zaj zué' laní chee wechaga na' dxácaté zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

¹⁶ 'Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. ¹⁷ Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chi'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpaté na.

Bchalaj Jesús da caní ca naca chee benne' ca' dxelezi' lu ne'e xrtizre'.

Dxexún Jesús bi nu'ula chee Jairo, ne nu'ula', xeajté'e zra lana Jesús

(Mr. 5.21-43; Lc. 8.40-56)

¹⁸ Dxácaté na' dxuchalaj Jesús da nigá, na' bzrin tu benne' xíchaje chee benne' judío ca', na' bzu zribe' lau Jesús, dxenné':

—Bi nu'ula chia' za gútetebe'. Che Lue' xidu' ne guzé na'u lebe', wexaca banbe'.

¹⁹ Na' guxasa Jesús, guxíajlene' le' nen benne' ca' dxusédene'. ²⁰ Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajté'e zra lana Jesús. ²¹ Dxenné' lu xichaj lázrdawe': "Che cheajtaza' zra lane', na' xexaca'."

²² Jesús guxéchaje', guné'e nu'ula', na' dxé'e le':

—Ben dipa lazru', zrí'ina'dau'. Bache bexacu' lawe' da dxéajle'u chia'.

La bexácaté nu'ula na'.

²³ Gate na' bzrin Jesús lizre benne' xíchaje chee benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zré'e dxelune' zralaj. ²⁴ Gunná Jesús, dxé'e benne' ca':

—Le xedxúaj nigá. Quegá nate bi nú'uladau' nigá. Dxásezebe'. Na' buluzrizre' chee'. ²⁵ Gudé bebéaje' benne' ca', na' guxú'u Jesús, ne b́xruē' na' bi nu'ula na', na' guxásabe'. ²⁶ Du ca naca xezre ca' bzriluj dizra' chee da ben Jesús.

Dxexún Jesús chupa benne' la chul-la

²⁷ Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

²⁸ Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

²⁹ Nadxa Jesús gudanē' xiaj lau benne' ca', dxenné':

—Gaca chee le ca dxéajlele.

³⁰ Belexaca xiaj lawē'. Nadxa Jesús gunné' xuene' benne' ca', gunné':

—Le guxúe xanne' chee quebe nu neze da nigá.

³¹ Gate beledxúaje', na' buluchálaje' du ca naca xezre ca' ca da ben Jesús chee'.

Dxexún Jesús tu benne' quebe dxaca nniē'

³² Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nniē', benne' xu'e be' xriwē'. ³³ Cáteze bebéaj Jesús be' xriwē' nigá, na' benne' quebe dxaca nniē' bezú lawē' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

³⁴ Benne' xudau' fariseo ca' gulenné':

—Benne' nigá dxebéaje' be' xriwē', dxuchínene' xel-la' waca chee da xriwē', da na' dxenná be'e na be' xriwē' ca'.

Dxexache lazre' Jesús b́enneache ca'

³⁵ Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' b́enneache zaj nape' tu tu cue' xízrawē' ca da dxelezaque'. ³⁶ Gate ble'e Jesús b́enneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'. ³⁷ Nadxa guzre' benne' ca' dxusédene':

—Da li, da zrente de da lápadxu, na' bábaze benne' wen zrin zaj zre'e. ³⁸ Chee le na' le naba lau Xrana lina nigá, sel-le' benne' wen zrin xe le lape' lina chee'.

10

Dxecá'a Jesús chazrinnu benne' xelaque' gubáz chee'
(Mr. 3.13-19; Lc. 6.12-16)

¹ Nadxa Jesús bláwizre' chazrinnu benne' ca' dxusédené', na' bnézruje' le' xel-la' dxenná bea chee' xelexebéaje' be' xriwe' ca', ne chee' xelexexune' bénneache zaj xu'ē tu tu cue' xízrawe' ca da dxelezaque'.

² Caní zaj le' chazrinnu benne' gubáz ca' chee' Jesús: Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

³ Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechizruj chee' xezre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

⁴ Xetúe' le' Simón, benne' dxe'e' gunne xue chee' xezr la xu Israel.

Xetúe' le' Judas Iscariote, bénnea' gudée' Jesús lu na' benne' dxeledábage' Le'.

Dxesel-la Jesús benne' gubáz chee' ca' cheajlezenne' bénneache xrtizre'e

(Mr. 6.7-13; Lc. 9.1-6)

⁵ Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xezre ca' zaj nababa Samaria. ⁶ Le chjaca naga zaj zra' benne' Israel zaj naque' ca zri'ine zaj naníteba'.

⁷ Le chjaca cu'ule lban, xe'le bénneache ba bzrin gáguze zra nna bea Dios lu xezr la xu nigá. ⁸ Le xexún benne' zaj xu'ē we' guzru', ne benne' bila xízrawe' dxel'é'eng'. Le gusebán benne' gate. Le xebéaj be' xriwe' da zaj xu'u bénneache. Cá'aze guzile xel-la' dxenná bea nigá, na' cá'aze le guchine na, quebe bi sile.

⁹ 'Quebe gúale dumí oro, ne dumí plata, ne dumí lase.

¹⁰ Quebe gúale xixruj xeta da gágule la neza. Quebe gúale xetú cue' zra lánale, ne zré'ale, ne xaga da gúxrúle. Benne' wen zrin wazrúequeze' da gawe'.

¹¹ 'Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'.

¹² Gate na' chu'ule lu xu'u na', le xe' bénnea' naca lizre' na': "Xela dxebeza zri lazre' suale na le'e." ¹³ Che benne' ca' zaj naca chee' xezezi'e xel-la' ba lá'ana caní, le gucá'ana cá'aze na. Che quebe zaj naca chee' xezezi'e da nigá, na' quebe gata' chee'.

¹⁴ Che quebe lataj dxelune' le'e, ne quebe dxelenne' chee'le, le xedxúaj lu xu'u na' u lu xezre na', na' le xebibe bxrtedu na' zria ní'ale. ¹⁵ Da li dxapa' le'e, ca zrin zra

guchi'a Dios, Dios gundxe' da ba xa' chee benne' xezre na' quez ca da gune' chee benne' Sodoma, ne benne' Gomorra, xezre ca' guzría xi'e.

Xelebé nawe' bi ca' chee Jesús

¹⁶ Na' gunná Jesús:

—Le na' xque nigá. Neda' dxesel-la' le'e, gácale ca zrila' zaj zra'ba' ládujla becu' xi'a ca'. Chee le na', le gaca sina ca zaj naca bela', san le gaca dxexruj lazre' ca zaj naca bgúgudu ca'. ¹⁷ Le guxúe cuínale. Zaj zra' benne' xuludé' le'e lu na' benne' xu'u lawe', ne xuluzálaje' le'e lu xu'u naga dxulucá'ana szrene' Dios. ¹⁸ Cá'anqueze weleché'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. ¹⁹ Gate na' xuludé' le'e lu na' benne' dxuchi'a da dxaca, quebe gunne xue cue'le ca da nna'le u ájala guchálajle, lawe' da gate zrin zra guchálajle, Dios gunne' ca da guchálajle. ²⁰ Quegá le'eze guchálajle, lawe' da Be' Lá'azxa chee Dios guchálaje' lu dxú'ale.

²¹ 'Xuludé bènneache benne' bíchequeze' lu na' benne' xelúti'e le'. Cá'anqueze xra xrna xuludé' zrí'ine', na' zrí'ine' ca' xeledábagabe' xra xrnáquezebe' chee xeláti'e. ²² Xúgute bènneache xelezré'e le'e lawe' da nácale chia' neda', san bènnea' guxru chache' dizra' chee Dios ca zrin zra cheajsé chee', la bènnea'. ²³ Gate xelebé nawe' le'e tu xezre, le xuzrunnuj xetú xezre. Da li neda', Benne' Gulje' Bènneache, dxapa' le'e, xida' nédxula ca quebe ne tache tale xúgute xezre chee benne' Israel.

²⁴ 'Netú benne' quebe naque' szrendxa ca benne' dxusédene' le'. Cá'anqueze netú benne' wen zrin quebe naque' szrendxa ca xrane'. ²⁵ Tu benne' dxuséde dxal-la' gun zi' lazre' gaque' ca naca benne' dxusédene' le', na' benne' wen zrin dxal-la' gun zi' lazre' gaque' ca naca xrane'. Che benne' naque' xrane xu'u dxelé'e le' Beelzebú, da xriwe', chezradxa xelenné' chee bi chee' ca'.

¿Núzraqueze dxal-la' zrédexu?

(Lc. 12.2-9)

²⁶ Na' gunná Jesús:

—Chee le na', quebe zrébele bènneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na. ²⁷ Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. ²⁸ Quebe zrébele benne' xelúti'e be'la' dxen chee. Quebe xelezéquene' xelúti'e bènne'du xu'ule. Le zrebe Dios. Le' dxezéquene' guzría xi'e be'la' dxen chee, ne bènne'du xu'ule lu lataj ba xa'.

²⁹ 'Dxelúti'e chupa bxínnedu ca' nen tu dumídau'. Netuba' quebe gáteba' chee quebe ne güe lataj Xrale. ³⁰ Cá'anqueze xicha xíchajle, xúgute na zaj nababa na. ³¹ Chee le na', quebe zrébele. Zácadxale le'e quézcala be zan bxínnedu ca'.

Dxal-la' xechébedxu nácadxu chee Jesucristo

(Lc. 12.8-9)

³² Na' gunná Jesús:

—Xúgute benne' ca' dxelexechebe' zaj naque' chia' neda' lau bénneache, cá'anqueze neda' wechébequeza' zaj naque' chia' neda' lau Xra' zue' xabáa. ³³ Benne' ca' quebe dxelexechebe' zaj naque' chia' lau bénneache, néda'queza' québequeze xechéba' zaj naque' chia' lau Xra' zue' xabáa.

Da naca Jesús naca na tu da dxun na chupa la'a bénneache

(Lc. 12.51-53; 14.26-27)

³⁴ Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla bénneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. ³⁵ Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zrí'ine'. ³⁶ Ca'an gaca, tu tu benne' tíl-lale xrtía ljwezre' le'.

³⁷ 'Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee' ca' quezca neda', quebe naca chee' gaque' chia'. ³⁸ Che tu benne' quebe gun cuine' ca tu benne' zéajte'e le'e xaga béguaj, ne gune' neda' tuze, quebe naca chee' gaque' chia'. ³⁹ Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudée' xel-la' nabán chee' ne chia' neda', guselé' xel-la' nabán chee'.

Da gunna Dios dxi'u

(Mr. 9.41)

⁴⁰ Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'. ⁴¹ Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bénnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. ⁴² Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazi'e da gunezruj Dios le'.

11

Dxelezhín benne' ca' gusel-la Juan lau Jesús
(Lc. 7.18-35)

¹ Gate bexuzre Jesús bchálajlęne' bęneache, na' bchálajlęne' chazrinnu benne' ca' dxusędene'. Bezę'e na' cheę chea-
sędene', ne cheajchálaje' lban xųgute xęzre ca' lu xęzr la xu na'.

² Juan, bęneae' bchue' bęneache nisa, xu'e lizre xia, na' benne' ca' naca da dxun Cristo. Nadxa gusel-le' chupa benne' ca' dxeledálene' le' lau Jesús. ³ Benne' chupe' caní buluchebe' Jesús:

—¿Nacu' Lue' Cristo, Bęneae' dxal-la' xide', u che dxal-la' cuęzantu' xelá' xetú benne'?

⁴ Na' bechebe Jesús:

—Le chjaca cheajęzrele Juan da caní dxelé'ele, ne da dxenle.

⁵ Le xę'e ca' dxaca, dxelexelé'e benne' gulaque' la chul-la. Dxelexedá benne' gulezúa zri ni'a ne'e. Belexexaca benne' gulezaque' we' guzru', ne belexexaca ban benne' ca' gulatię'. Benne' xache' ca' dxellenę' dizra' chawe' cheę Dios. ⁶ Ba neza zrentę naca na' cheę bęneae' quebe xucuán lazre' sálene' neda'.

⁷ Ca besí'aca benne' chupa ca', na' guzú lau Jesús dxuchálajlęne' benne' zaj zre'e na' ca' naca cheę Juan. Dxennę':

—¿Bizra xeajinna'le le'e le'e xixre' na'? ¿Xeajinna'le tu xia da dxuxrize be'? ⁸ Che cabí, ¿bizra xeajinna'le na'? ¿Xeajinna'le tu benne' nacue' zra lanę' da zaca? Nézquezle benne' ca' zaj nácuę' ladxe' zaca, lizre benne' dxelenná be'e zaj zra' benne' caní. ⁹ ¿Bizraqueze xeajinna'le? ¿Xeajinna'le tu benne' dxuchálaje' waláz cheę Dios? Awe'. Ca'an guca. Bęneae' ble'ele na' nácadxe' blau ca' tu benne' dxuchálaje' waláz cheę Dios.

¹⁰ Lu xiche cheę Dios naxúaj na' ca' naca cheę Juan na'. Dxenná na: Neda' dxesel-la' benne' gubáz chia' nédxula ca' Lue', cheę gucueze' neza naga teu'. ¹¹ Da li dxapa' le'e, ládujla xųgute bęneache quebe nu chilá' benne' nácadxe' blau ca' naca Juan, bęneae' bchue' bęneache nisa. Naga dxenná bea Dios, bęneae' nácadxe' benne' dxexruj lazre' nácadxe' blau ca' naca Juan na'.

¹² Ca lu zra bla' Juan, bęneae' bchue' bęneache nisa, bzrintę na'a zra, zaj zra' benne' dxelunę' zi' lazre' xelu'e naga dxenná bea Dios xabáa, na' benne' dxelunę' zi' lazre' dxelezhrué'eng' na. ¹³ Ca da bzuaj Moisés lu xiche cheę da nadxixruj bea na, ne ca' gulenná xųgute benne' buluchálaje' waláz cheę Dios, dxuchalaj na' ca' naca cheę xel-la' dxenná bea cheę Dios, bzrintę ca' bla' Juan na'. ¹⁴ Che le'e dxaca lázrele chęajlele da nigá, Juan na' naque' Elías, bęneae' bchálaje' waláz cheę Dios gate nate, na' dxal-la' xelé'e cheę guchálaje' waláz cheę Dios. ¹⁵ Che zua nágale, le xen da nigá.

16 '¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxellennebe' zizraj, dxelé ljwézrebe' ca': 17 "Bcuézrentu' bchiuj san quebe bxá'ale le'e. Bil-la xáchentu' san quebe gudxézrele." 18 Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'. 19 Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bènnea'.

Ca gaca chee bénneache quebe dxuluzúe' xrtizra' Dios
(Lc. 10.13-15)

20 Nadxa guzú lau Jesús dxedil-le' bénneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

21 —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulácu'e' zra lan'e' tuzruj, ne gulegú'e' de xíchaje' da zaj naca bea na belexebí'i lazre'. 22 Neda' dxapa' le'e, lu zra guchi'a Dios, gundxe' da ba xa' chee quez ca da ba xa' gun'e' chee benne' Tiro, ne benne' Sidón. 23 Le'e zrale xezre Capernaum, ¿dxéquele Dios wechise' le'e xabáa? Dios gudé'e' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra. 24 Neda' dxapa' le'e, lu zra guchi'a Dios, gundxe' da ba xa' chee quez ca gun'e' da ba xa' chee benne' Sodoma ca'.

Dxenná Jesús: "Le da naga zua' xezí' lázrele"
(Lc. 10.21-22)

25 Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní. 26 Ca'an naca, Xrae, lawe' da naca na ca dxaca lazru' Lue'.

27 'Xra' ba bdee' lu na'a xúgute da caní. Quegá nu benne' núnbe'e' neda', Zri'ine Dios, san Xra' Dios núnbe'e' neda'. Quegá nu benne' núnbe'e' Xra', san neda', Zri'ine Dios, núnbe'a' Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'. 28 Le da naga zua', xúgutele le'e dxeajxréquele lu zrin dxunle chee xudau', ne ca naca xua da núale, na' neda' guna' xezí' lázrele. 29 Le gunna lataj xrua' le'e ca nu benne' xru'e' bezre xugu' cheeba', ne le gusede chia' lawe' da naca'

dxexruj lazre', ne dxe'ene lazre', na' wazrué'ele xezí' lázrele lu Bénne'du xu'ule. ³⁰ Da na' naca na ca xugu' chee' bezre da xrua' le'e québetē ca naca na stebe chee' gúale na, na' xua da xrua' le'e naca na zraze.

12

Bi ca' dxusede Jesús dxelequ'e'ē dau zrua' xtila gate naca zra dxulupá'ana judío

(Mr. 2.23-28; Lc. 6.1-5)

¹ Ca lu zra na' xu'u Jesús neza zéajē' ládujla naga de xel-la' zrua' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú lawē' dxelálajē' dau naga zria zrua' xtila, ne dxelawē' na. ² Gate belelé'e benne' xudau' fariseo ca' da caní, na' gulé'ē Jesús:

—Guná' xque ca dxelún benne' ca' dxusedenu', dxelunē' zrin da quebe naca chee' xelunē' lu zra dxupá'anadxu.

³ Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledunē'? ⁴ Guxú'ē lu xu'u chee' Dios, ne gulawē' xeta xtila lá'azxa, da quebe zaj naca chee' xelawē', le', ne benne' ljwezre' ca', san tuze bxruze ca' zaj naca chee' xelawē' na. ⁵ ¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelunē' zrin chee' xudau' lu zra dxupá'anadxu, ne quebe zaj nabague' zria? ⁶ Neda' dxapa' le'e, de tu da naca blaudxa ca xudau' nigá. ⁷ ¿Quebe ne chéajni'ile ca zéajē da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xíxre'du ca' lu cugu chia'. La ba guxéajni'ile da nigá, quebe ne guzría xile bēnneache quebe zaj nabague' dul-la. ⁸ Chee le na', neda', Benne' Gulje' Bēnneache, napa' xel-la' dxenná bea dxuna' zrin chia' lu zra dxupá'anadxu.

Dxexún Jesús tu benne' zua zri ne'e

(Mr. 3.1-6; Lc. 6.6-11)

⁹ Nadxa Jesús bezé'ē na', na' guxú'ē tu lu xu'u naga dxelúe lá'ane' Dios. ¹⁰ Zua tu benne' zua zri ne'e ga na'. Benne' judío ca' gulaca lazre' xelezrelne' ájala xelunē' chee' gaca xelagu zrie' chee' Jesús. Chee le na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

¹¹ Jesús guzre' benne' ca':

—Núteteze benne' zuē' ládujla le'e, che zua tu zri-la' chee', ne che bíxreba' tu xēdxu situj lu zra dxupá'anadxu, ¿quebe chéajē' cheajxeléajē'-ba' xca'? ¹² Da zrendxa zaca tu benne' quez ca tu zri-la'. Ca'an naca dxunna Dios lataj gundxu tu da xrlátaje lu zra dxupá'anadxu.

13 Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. 14 Nadxa beledxúaj benne' xudau' fariseo ca', ne gulezú lawe' dxelíajé' ájala xelune' xelútié' Jesús.

Da gunná tu benne' bchálajé' waláz chee Dios ca dxal-la' gaca chee Jesús

15 Gate gúquebe'e Jesús da nigá, na' bezé'e na', na' benne' zante zjácalene' Le'. Bexún Jesús xúgute benne' we' zaj zre'e ládujla benne' ca'. 16 Jesús gunné xúene' benne' ca' quebe nu xululé'ene' nu naca Le'. 17 Caní guca ca da gunná Isaías, benne' bchálajé' waláz chee Dios, gunné':

18 Benne' nigá naque' wen zrin chia', benne' ba gucá'a.

Benne' nigá nazrí'ida', ne dxezaca ba lázrelena' Le'.

Guzúaqueza' xichaj lázrdawe' Be' Lá'azxa chia'.

Guzenne' bénneache xúgute xezr la xu ca dxuchi'a da dxaca.

19 Quebe tíl-lalequeze' bénneache, ne quebe cuézrexe'e.

Netú benne' quebe xenne' chi'e la neza.

20 Quebe quichje' tu xia da ba nachaj,

ne quebe xusul-le' xi' da ba dxaca wexul-la na,

ca zrindxa zra xuzúe' xel-la' dxenná bea chawe' chee'.

21 Bénneache xúgute xezr la xu xuluxrén lázrequeze' Le'.

Dxelenné' napa Jesús xel-la' dxenná bea chee da xriwe'

(Mr. 3.19-30; Lc. 11.14-23; 12.10)

22 Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' belé'ene', ne bennie'. 23 Xúgute benne' ca' belexebánene', gulenné':

—¿Naca benne' nigá Zri'ine David zra?

24 Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

25 Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezícadxe', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'. 26 Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ájazra gácaqueze nna bea na? 27 Le'e dxennale chia' dxebéaja' be' xriwe' ca', dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e

tuze chee xelebéaje' be' xriwe' ca'? Chee le na' léqueze' dxululé'etene' nanéguete le'e. ²⁸ Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

²⁹ ¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bènea'? Che gune' caní, na' wazéqueñe' que'e da de chee bènea'.

³⁰ 'Nu benne' quebe dxácalene' neda', dxedábague' neda', na' benne' quebe dxexezígalene' neda', dxexúsié' na.

³¹ 'Chee le na' dxapa' le'e, gunite lau Dios chee bèneache xúgute dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunite lau Dios chee'. ³² Núteteze benne', che bi nnie' schanni' chia' neda', Benne' Gulje' Bèneache, Dios gunite lawe' chee', san che tu benne' nnie' schanni' chee Be' Lá'azxa, québequeze gunite lau Dios chee' lu xezr la xu nigá ne cá'anqueze lu xezr la xu da za za'.

Da dxun tu benne' dxule'e na ca naque'

(Lc. 6.43-45)

³³ Na' gunná Jesús:

—Che naca chawe' tu xaga, dxebíá na da zixre chawe', na' che naca tu xaga bize, dxebíá na da zixre bize. Ca'an naca, tu xaga naca bea na ne chee da zixre da dxebíá na. ³⁴ Le'e, be snia ca'. ¿Ájazra gunle le'e nnele da xrlátaje che le'e nácaquezle benne' wen da calela xca'? Ca da dxedxuaj dxú'adxu naca na ca da zua na lu xichaj lázrdaudxu. ³⁵ Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. ³⁶ Neda' dxapa' le'e, lu zra guchi'a Dios, xúgute bèneache xuludé' ca da gulenné', tu tu dizra' xala da gulenné'. ³⁷ Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

Bèneache wen da calela ca' dxelenábene' Jesús gune' tu xel-la' waca chee xabáa

(Mr. 8.12; Lc. 11.29-32)

³⁸ Nadxa bal-la benne' xudau' fariseo, ne benne' dxulux-uzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

³⁹ Na' guzre Jesús benne' ca':

—Bèneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xeledé'equezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. ⁴⁰ Ca guca chee Jonás, guxú'e lu le'e bela zren chunna zra chunna

xēla, cá'anqueze gaca chia' neda', Benne' Gulje' Bénneache, waxú'unqueza' lu xēdxu ba chunna zra chunna xēla. ⁴¹ Benne' gulezré'ē xēzre Nínive welexásaqueze' lu zra guchi'a Dios gate guchi'ē cheē bēnneache zaj zré'ē na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' cheē Dios lau benne' ca', na' blaudxa ca Jonás na' naca Benne' zuē' nigá. ⁴² Cá'anqueze nu'ula na' gunná be'ē chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'ē cheē bēnneache zaj zré'ē na'a, na' nu'ula na' gulé'ene' zaj nabaga zria benne' caní lawe' da bezé'ē naga naca zítu'tē cheē xēzr la xu nigá cheē xenne' dizra' sina da bchalaj Salomón, na' blaudxa ca Salomón na' naca Benne' zuē' nigá.

Ca naca cheē be' xriwē' da bexú'u na tu benne' (Lc. 11.24-26)

⁴³ Na' gunná Jesús:

—Gate tu be' xriwē' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: ⁴⁴ “Webi'a xexá'a lizra' naga bedxúaja.” Ca xezrín na, le'e na benne' na', naque' ca tu xu'u da naxíajlbe lu'ule na, ne nalúa na, ne nagá'ana chawe na. ⁴⁵ Nadxa cheaj na cheajxezrí na xegazre be' xriwē' da zaj naca na xríwēdxu ca le' na, na' xúgute na dxelú'u na lu bēnnea', na' naca cheē benne' na' da caléladxa ca guca cheē' nedxu. Cá'anqueze gaca cheē bēnneache wēn da calēla caní.

Benne' zaj naque' ca xrna Jesús, ne ca benne' biche' ca' (Mr. 3.31-35; Lc. 8.19-21)

⁴⁶ Jesús ne zuē' dxuchálajlēne' benne' caní gate belezrín xrne'ē ne benne' biche' ca' ga na'. Gulezré'ē chalé'ajla, ne dxelaca lazre' xuluchálajlēne' Jesús. ⁴⁷ Nadxa tu benne' guzre' Jesús:

—Xrna'u, ne bi bichu' ca' zaj zré'ē chalé'ajla. Dxelaca lazre' xuluchálajlēne' Lue'.

⁴⁸ Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

⁴⁹ Nadxa ble'e Jesús benne' ca' dxusédenē', dxenné':

—Benne' caní zaj naque' xrna'a, ne bi bícha'dau' ca'. ⁵⁰ Caní naca na lawe' da núteteze benne' dxune' ca da dxaca lazre' Xra' zuē' xabáa, benne' nigá naque' benne' bicha', ne benne' zana', ne xrna'a.

13

Da bsēde Jesús ca da ben benne' dxaza (Mr. 4.1-9; Lc. 8.4-8)

¹ Lu zra na' bdxuaj Jesús xu'u, na' xeajdxé'ē dxu'a nísadau'.
² Na' lawe' da belezraga benne' zantē naga zua Jesús, guxú'ē tu lu da dxedá lawe' nísadau', ne gudxé'ē na'. Xúgute benne' ca' belexegá'anē' dxu'a nísadau' na'.
³ Nadxa bsede Jesús benne' ca' da zantē da bchálaje', dxenné':

—Tu benne' dxaza guzé'ē zíaje' guza. ⁴ Dxácatē dxaze', bal-la binnedu ca' xeajlechaze na dxu'a neza. Na' belelá' bxinnedu ca', guláguba' binnedu ca'.
⁵ Bal-la binnedu ca' xeajlechaze na lu xiaj naga quebe dxé'teca xu. Binnedu caní chadí gulezría na lawe' da quebe dxé'teca xu.
⁶ Gate bla' gubizra, na' gulecuade na. Lawe' da quebe dxé'teca xu, na' gulebizre na.
⁷ Bal-la binnedu ca' xeajlechaze na naga bezríalē'ē lba xeche', na' lba xeche' ca' belegula na, ne blule na da du ca' naze'.
⁸ Bal-la binnedu ca' xeajlechaze na lu xu bebe, na' belúnnalē'ē na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na.
⁹ Che zua nágale, le xene.

Dxenná Jesús bizr chee na' dxuchálaje' da dxululé'e na
(Mr. 4.10-12; Lc. 8.9-10)

¹⁰ Nadxa benne' ca' dxusede Jesús gulebigue' naga zue' Le', ne buluchebe' Le':

—¿Bizr chee na' dxuchálajlenu' benne' ca' da dxululé'e na?

¹¹ Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'ē lataj.
¹² Benne' nape' late', Dios gunézrujdxé' le', na' gápale'ē, san benne' quebe bi nape', Dios wequé'ē ca da du nape'.
¹³ Chee le na' dxuchálajlena' benne' caní da dxululé'e na, lawe' da cate' dxelenné'ē quebe dxelelé'ene'. Cate' dxelenne' quebe dxeléajni'ine'.
¹⁴ Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':
 Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

¹⁵ Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácue' xiaj lawe' chee quebe xelelé'ene'.

Quebe dxelenne', na' quebe dxeléajni'ine'.

Quebe dxelexílaje' neda' chee xexuna' le'.

¹⁶ 'Ba neza zrente naca na chee le'e lawe' da dxelé'ele nen xiaj laule, ne dxenle nen nágale.
¹⁷ Da li dxapa' le'e, benne' zantē, benne' ca' buluchálaje' waláz chee Dios, ne benne' xrlátaje ca' gulaca lazre' xelelé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

Jesús dxuzéajni'ine' benne' ca' ca naca chee benne' dxaza
(Mr. 4.13-20; Lc. 8.11-15)

¹⁸ Na' gunná Jesús:

—Le xenne ca zéaję da naca chee benne' dxaza nigá.
¹⁹ Benne' dxellenę' ca naca chee Bénnea' dxenná be'e xabáa, ne quebe dxeléajni'ine' zaj naque' ca binnedu ca' xeajlechaze na dxu'a neza. Za da xriwe' ne dxugúa na ca naca dizra' da ba gulezi'e lu xichaj lázrdawe'. ²⁰ Ca naca chee binnedu ca' xeajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'. ²¹ Ca na' guca chee binnedu ca', quebe guca xuludé lue na, ne quebe guzi bea na, ca'an dxaca chee benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'e dizra' nigá, na' dxelexebigue'. ²² Binnedu ca' xeajlechaze na ládujla xече' dxululé'e na ca naca chee benne' dxellenę' dizra' nigá, san dxelebé'le'e gunne xue da naca chee xęzr la xu nigá, na' ca naca xel-la' gunní'a dxezi xę na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. ²³ Ca naca chee binnedu ca' da xeajlechaze na lu xu bebe, da caní dxululé'e na ca naca chee benne' ca' dxellenę' dizra' nigá, ne dxeléajni'ine' na, na' zaj naque' ca binnedu ca' belúnnale'e na. Bal-la benne' zaj naque' ca binnedu ca' belunna na tu gaxúa tu tu na, na' xebal-le' zaj naque' ca binnedu ca' belunna na ga xun tu tu na, na' xebal-le' zaj naque' ca binnedu ca' belunna na chi dxua tu tu na.

Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila

²⁴ Nadxa bchalaj Jesús xetú da dxululé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xęzr la xu chee'. ²⁵ Gate dxelase xúgute', na' bzin tu benne' dxezre'e le', ne xeajaze' binne xixre' zrinnaj lówela zrua' xtila, na' bezé'e. ²⁶ Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. ²⁷ Nadxa benne' węn zrin ca' xeajleguezre' xrane na, dxelé'e le': "Xran, guzu' binne cháwe'dau' lu xęzr la xu chiu'. ¿Gazra guzá xixre' zrinnaj caní?" ²⁸ Gunná xránabe': "Tu benne' dxezre'e neda' bene' da nigá." Nadxa benne' węn zrin ca' buluchębe' le': "¿Dxaca lazru' chéajntu' cheajlépentu' xixre' zrinnaj ca'?" ²⁹ Le' guzre' węn zrin ca': "Quebe gaca na. Gate na' lázrule xixre' zrinnaj ca', walázrutele xel-la' zrua' xtila. ³⁰ Xelegúladxa na cháwe'la tu zren ca xecá'adxadxu zrua' xtila. Nadxa nna be'eda' benne' węn zrin ca' xelequé'e nedxu xixre' zrinnaj ca', na' xuluchéaje' xelune' tu xrúnjdu weaj chee guzédxedu na. Nadxa xelelape' zrua' xtila na', ne xezrá chawe' na lizra'."

*Da bchalaj Jesús ca naca chee binne mostaza**(Mr. 4.30-32; Lc. 13.18-19)*³¹ Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. ³² Da li binne mostaza nigá naca na da bízrujdxa lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezria bxinnedu ca' xrú'neba' lu zruze na.

*Da bchalaj Jesús ca naca chee cua zichaj chee xeta xtila**(Lc. 13.20-21)*³³ Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dutę na guxasa na bliche.

*Ca bchine Jesús da dxulé'e na caní**(Mr. 4.33-34)*

³⁴ Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. ³⁵ Caní guca ca da gunná benne' bchálaje' waláz chee Dios, gunné': Guchálaja' ca naca da dxulé'e na da guchálaja'. Gul'éda' ca naca da nagache gate guzrete xezr la xu.

Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila

³⁶ Nadxa Jesús bze' benne' ca' dizra', na' guxú'e lu xu'u. Benne' ca' dxusede Jesús gulebigue' lau Le', na' gul'é'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

³⁷ Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache. ³⁸ Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. ³⁹ Bénnea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. ⁴⁰ Ca belexequé'e xixre' zrinnaj ca', ne buluzré'e na lu xi' chee xelezxe na, ca'an gácaqueze lu zra bzebe na'. ⁴¹ Neda', Benne' Gulje' Bénneache, sel-la' gubáz chee xabáa chia' ca' chee xulucuase' naga nna be'a xúgute benne' ca' dxuluxrinnajte' benne' xula, ne benne' ca' dxelunge' da calela. ⁴² Nadxa gubáz

chee xabáa ca' xuluzré'e benne' ca' dxeluné' da calēla lu xi' gabila naga xelebezre', ne xeláguxa'atē lazxe'. ⁴³ Nadxa benne' ca' dxeluné' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

Da dxulé'e na ca naca chee tu xel-la' gunní'a da nagache

⁴⁴ Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucache' na. Ne zúalē'e xel-la' dxebé zexíaje' xeajxétie' xúgute da nape', na' bezi'e xezr la xu na'.

Da dxulé'e na ca naca tu bga da zácale'e na

⁴⁵ Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexílaje' bga ca' da zaj zaca na. ⁴⁶ Gate dxezrélene' tu da zácale'e, na' zexíaje' zeajxétie' xúgute da nape', na' si'e bga na'.

Da dxulé'e na ca naca tu xixruj bela

⁴⁷ Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzalē' lu nísadau', na' dxelezeñe' zane' cue' bela. ⁴⁸ Gate dxezrá xixruj na', na' benne' ca' dxelezeñe' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluzuré'e-ba' lu xcuite, na' bela xala ca' dxeledxú'une'-ba'. ⁴⁹ Ca'an gaca lu zra bzēbe na'. Xeledxúaj gubáz chee xabáa ca', xelexebéaje' benne' ca' dxeluné' da calēla ládujla benne' xrlátaje ca'. ⁵⁰ Xuluzré'e benne' ca' dxeluné' da calēla lu xi' gabila, naga xelebezre', ne xeláguxa'atē lazxe'.

Da zaca ca da zaj naca na da cube, ne da zaj naca na da gula

⁵¹ Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

⁵² Nadxa guzre' benne' ca':

—Gate tu benne' dxusédenē' da nadxixruj bea Dios, ne nazédenē' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawē'.

Jesús dxexezrine' Nazaret

(Mr. 6.1-6; Lc. 4.16-30)

⁵³ Gate bexuzre bchalaj Jesús da dxulé'e na caní, na' bezé'e na'. ⁵⁴ Bezrine' naga naca lazrie'. Na' guzú lawē' dxusédenē'

benne' ca' zaj zre'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? ⁵⁵ Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. ⁵⁶ Bi zane' zaj zue' nigá nen dxi'u. ¿Ájazra na' dxaca dxune' da caní?

⁵⁷ Chee le na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lá'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

⁵⁸ Jesús quebe benteque' na' xel-la' waca ca' lawe' da quebe guléajle'e chee'.

14

Ca gute Juan, bènea' bchue' bèneache nisa

(Mr. 6.14-29; Lc. 9.7-9)

¹ Lu zra na' Herodes, benne' dxenná be'e xezre ca' zaj nababa na Galilea, benne' ca' naca da dxun Jesús. ² Na' guzre' bi wen zrin chee' ca':

—Benne' nigá naque' Juan, bènea' bchue' bèneache nisa. Ba bebane' ládujla benne' gate. Chee le na' nape' xel-la' waca zren nigá.

³ Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bene' caní ne chee Herodías, zru'ula Felipe, biche Herodes na'. ⁴ Caní bene' lawe' da guzre Juan le':

—Quebe naca chiu' súalenu' nu'ula nigá.

⁵ Herodes guca lazre' gutie' le', san dxezrebe' da xelún bèneache ca' lawe' da dxeléquene' naca Juan benne' dxuchálaje' waláz chee Dios. ⁶ Gate bzin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'. ⁷ Chee le na' Herodes guchebe lazre' lau benne' ca' gunézruje' ca da naba bi nú'uladu na'. ⁸ Lawe' da ba guzre xrnabe' lebe', na' gunabe':

—Benna nigá xichaj Juan, bènea' bchue' bèneache nisa. Gulú'u na tu lu xé'ena.

⁹ Nadxa guzúa stebe Herodes, bènea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le na' guzre' tu benne' wen zrin chee' gunézruje' na lebe'. ¹⁰ Gunná bé'ene' nu benne' guchugue' xichaj Juan naga xu'e lizre xia. ¹¹ Nadxa xeajlexrí'e xíchaje' tu

lu xé'ena, ne bulunézruje' na bi nú'uladu na', na' lēbe' bnézrujbe' na xrnabe'.

¹² Nadxa belezrín benne' ca' bsede Juan, na' belexú'ē lē', ne xeajlecachē' lē'. Nadxa xjaque' xeajleguezre' Jesús.

Dxugagu Jesús chi xun gaxúa benne' biu
(Mr. 6.30-44; Lc. 9.10-17; Jn. 6.1-14)

¹³ Gate ben Jesús da na', na' bezé'ē na', bexu'ē tu lu da dxedá lawe' nísadau', na' bzrine' tu naga quebe nu zra' benne'. Gate belén bēneache, na' gusiá'que' ni'ē, na' belezrine' naga zua Jesús. ¹⁴ Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' lē', na' bexune' benne' ca' quebe chawe' zaj zue'. ¹⁵ Gate ba za xrinne, benne' ca' dxusede Jesús gulebigue' lau Lē', dxelenné':

—Lataj nigá quebe bi dē, ne ba dxedé zra. Bze benne' caní dizra' chee chjaque' xézredu ca', ne xelezí'ē da xelawe'.

¹⁶ Jesús guzre' lē':

—Quebe dxun na ba xen chjaque'. Le gunezruj le'e da xelawe'.

¹⁷ Benne' ca' gulé'ē Lē':

—Gázxuze xeta xtila dē cheedxu nigá, ne chúpaze bela.

¹⁸ Jesús guzre' benne' ca':

—Le gunna na nigá.

¹⁹ Nadxa gunná bé'ene' gulebé' benne' zan ca' lawe' zriē. Guqué'ē xeta xtila, ne bela ca', na' gunné'ē xabaala, ne guzre' Dios: “Xcalenu'.” Nadxa bzúzruje' xeta xtila, ne bnézruje' na benne' ca' dxusedene', na' benne' ca' gulisiē' na lówela benne' zan ca'. ²⁰ Xúgute' gulawe', ne gulélajene'. Ca gudé na' bulusuzré'ē chazrinnu ga' da bízrujdu ca' zaj nagá'ana. ²¹ Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

Jesús dxedé' lawe' nisa
(Mr. 6.45-52; Jn. 6.16-21)

²² Nadxa gunná be'e Jesús benne' ca' dxusedene' xelu'ē lu da dxedá lawe' nísadau' chee xelague' nísadau' nédxudxa ca Lē' chee xelezezrine' xéchalala nísadau' na', dxácatē Lē' dxuzé benne' zan ca' dizra'. ²³ Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zue' tuzē'. Gate guxinne zua Jesús tuzē' na'. ²⁴ Dxácatē na' ba zeaj da na' dxedá lawe' nísadau' gachaj lówe'tē nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácalē'ē be', ne quebe dxue na lataj sa na. ²⁵ Gate gudé dxela gubiga Jesús naga zaj zre'ē, zéaje' lawe' nisa. ²⁶ Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'ē, gulenné':

—Da dxedá dxela na'.

²⁷ Jesús guzre' benne' ca':

—Le gun dipa lázrele. Neda' nigá. Quebe zrébele.

²⁸ Na' gunná Pedro, dxé'e Jesús:

—Xran, che Lue' na', gunná be'e xida' lawe' nisa naga zu' na'te.

²⁹ Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús. ³⁰ Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, becá'a neda'.

³¹ Nadxa becá'a Jesús ne'e, ne guzre' le':

—Látega dxejlí lazru' neda'. ¿Bizr chee na' ben chupa lazru'?

³² Gate belexegüene' lu da dxedá lawe' nísadau', na' bebé' zri be' na'. ³³ Nadxa benne' ca' zaj zré'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

Jesús dxexune' benne' we' ca', benne' zaj zré'e lu xezre Genesaret

(Mr: 6.53-56)

³⁴ Guledé'e xecha la'a nísadau', na' belezrine' lu xezr la xu chee benne' Genesaret ca'. ³⁵ Gate benne' ca' zaj zré'e xezre na' belexexúnbe'e Jesús, na' buludé'e dizra' xezícala xézredu ca', na' guleché'e xúgute benne' we' naga zua Jesús. ³⁶ Gulata' xuene' Jesús gu'e lataj xulutá benne' ca' zra lane' naze. Xúgute benne' buluté' zra lane' belexexaque'.

15

Da dxuxrinnaj na bénneache

(Mr: 7.1-23)

¹ Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxelenné':

² —¿Bizr chee na' benne' ca' dxusédenu' quebe dxuluzúe' dizra' ca naca da gulún xra xrtaudxu? Quebe dxelíbequeze ne'e ca naca da zéajlentu' gate dxelawe'.

³ Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele. ⁴ Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' chee xra xrne'e, le gute bénnea'." ⁵ Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúgute da de chia'." ⁶ Dxennale

che tu benne' dxunę' caní québedxa dxun na ba xen gácalęne' xra xrnę'e. Caní dxunle le'e, dxuzuale chala'ala da bdxixruj be'e Dios, cheę gunle ca naca da zéajlele. ⁷ Le'e, láweze dxunle da xrlátaje. Da lí naca da gunná Isaías, bėnnea' bchálaje' waláz cheę Dios, ca naca cheęle le'e, gunné':

⁸ Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana dutę lázrdawe'.

⁹ Dácheze naca dxelúe lá'ane' neda'.

Da gulenná be'ene' bėnneache naca na da ca' dxulusėdene'.

¹⁰ Nadxa Jesús gunné' benne' ca', dxenné':

—Le xene, ne le chėjni'i. ¹¹ Da dxu'u na dxu'a bėnneache quegá le na guxrinnaj na bėnneache. Da dxedxuaj na dxu'a bėnneache naca na da dxuxrinnaj na bėnneache.

¹² Nadxa benne' ca' dxusęde Jesús gulebigue' lau Le'. Dxelę'e Le':

—¿Nėzenu' gulaca tula benne' xudau' fariseo ca' gate be-benne' da gunnáu'?

¹³ Jesús guzre' benne' ca':

—Bíteteze xágadau' da quebe guza Xra' zuę' xabáa, welępeda'. ¹⁴ Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpatę' xelebixre' tu lu xędxu.

¹⁵ Nadxa Pedro guzre' Jesús:

—Bzėjni'i netu' ca naca cheę da dxulė'e nigá.

¹⁶ Gunná Jesús:

—¿Cá'ancheze le'e quebe dxėjni'ile? ¹⁷ ¿Quebe nězele xúgute da dxu'u na dxú'adxu zeaj na le'ędxu, na' te na' xędxuaj na? ¹⁸ Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bėnneache. ¹⁹ Lu xichaj lázrdau bėnneache dxeledxuaj da dxezá lazre' da calęla, ca naca xel-la' węte benne', ne ca naca xel-la' zuale zru'ula benne' xula, ne ca naca da sban da dxelún bėnneache, ne ca naca xel-la' gubán, ne xel-la' węn lazre', ne xel-la' wetupa dizra' bizruj. ²⁰ Da caní dxuluxrinnaj na bėnneache. Che tu benne' quebe dxexibe ne'e ca da zéajlele gate dxawe' xeta, da nigá quebe dxuxrinnaj na le'.

Tu nu'ula zitu' dxėjle'e cheę Jesús

(Mr. 7.24-30)

²¹ Nadxa bedxuaj Jesús na', zexájje' chala'a naga zaj nababa xęzre Tiro, ne xęzre Sidón. ²² Tu nu'ula Canaán zuę' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cátitega dxezácabe'.

²³ Quebe bi bechebe Jesús. Nadxa belezrín benne' ca' dxusėdene', ne gulata' xuene' Le', gulę'e Le':

—Bsel-la nu'ula nigá lawe' da ze'e dxebezre xe'e cúzrudxu.

²⁴ Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zrí'adu ca' zaj naníteba'.

²⁵ Gubiga nu'ula na' naga zua Jesús, ne bzu zribe' lau Le', ne dxe'e Le':

—Xran, gúcale neda'.

²⁶ Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

²⁷ Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

²⁸ Nadxa Jesús guzre' le':

—Nú'uladu, da zrente naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

Jesús dxexune' benne' zante benne' we'

²⁹ Jesús guzé'e na', gudée' dxu'a nísadau' chee Galilea. Gu-luéne' tu lu xi'a, ne gudxé'e na'. ³⁰ Benne' zan belezrine' naga zua Jesús, zaj naché'e benne' zrinnaj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca' lau Jesús, na' Le' bexune' le'. ³¹ Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne' ca' gulaque' benne' la chul-la. Gulezú lawe' dxelúe lá'ane' Dios chee benne' Israel ca'.

Jesús dxugawe' tapa cue' tu gaxúa benne' biu

(Mr: 8.1-10)

³² Nadxa Jesús gunné' benne' ca' dxusédene'. Dxe'e le':

—Dxexache lazra' chee benne' caní lawe' da ba zeaj chunna zra zrálene' neda' nigá, ne quebe bi de da xelawe'. Quebe dxaca lazra' xesel-la' le' chee cheajxaque' lizre' quebe ne xelawe' chee quebe xelate ni'a ne'e la neza.

³³ Nadxa benne' ca' dxuséde Jesús gulé'e Le':

—¿Ájazra guntu' zrélentu' da xelagu cátitę benne' zan caní? Lataj nigá quebe nu chilá' benne' zua lizre' nigá.

³⁴ Jesús bchebe' benne' ca', dxenné':

—¿Bal-la xeta xtila ná'pale?

Benne' ca' belexechebe':

—Gazre na, ne xetú chupa béladau'.

³⁵ Nadxa Jesús gunná bé'ene' benne' zan ca' xelebé'e lu xu.

³⁶ Guqué'e da gazre xeta xtila, ne béladu ca', na' guzre' Dios:

“Xcalenu.” Nadxa bzúzruje' na, ne bnézruje' na benne' ca' dxusédené', na' benne' ca' gulísię' na cheę benne' zan ca'.³⁷ Xúgute' gulawe', ne belélajtene'. Gudé na' bulusuzrate' gazre ga' da bízrujdu ca' zaj nagá'ana. ³⁸ Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. ³⁹ Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexiáje' naga nababa xezre Magdala.

16

Dxelenabe' Jesús gunę' tu xel-la' waca cheę xabáa
(Mr. 8.11-13; Lc. 12.54-56)

¹ Benne' xudau' fariseo ca', ne benne' xudau' saduceo ca' xjaque' naga zua Jesús cheę xuluxunéguene' Le'. Cheę le na' gulenabe' Jesús gunę' tu xel-la' waca zrente da za xabáa. ² Jesús bechebe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.” ³ Che zílala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e dxul'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. ⁴ Benne' wen da calęla caní, benne' zaj nabéaj xíchaje' Dios, dxelenabe' guna' tu xel-la' waca zrente. Quebe xeledé'eng' xetú xel-la' waca. Weledé'eng' tuze da gaca na ca da guca cheę Jonás.

Nadxa bulucá'ana Jesús benne' ca', zjá'aque'.

Da dxelún benne' xudau' ca' da naca na ca cua zichaj cheę xeta xtila
(Mr. 8.14-21)

⁵ Gate benne' ca' dxuséde Jesús guladéę' xechalá'a nísadau', na' gulal-la lazre' xelu'e chizre'. ⁶ Jesús guzre' le':

—Le nna'xque. Le guxúe cuínale ca naca cheę cua zichaj cheę xeta xtila cheę benne' fariseo ca', ne cheę benne' saduceo ca'.

⁷ Benne' ca' dxuséde Jesús gulezú lawe' dxelé' ljwezre':

—Caní dxenné' lawe' da quebe núadxu xeta xtila.

⁸ Jesús dxeque be'ene', na' guzre' le':

—¿Bizr cheę na' dxennale naca na lawe' da quebe núale xeta xtila? Láteze dxéajle chia'. ⁹ ¿Quebe ne chéajni'ile, ne quebe dxeajsá lázrele cheę da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale? ¹⁰ ¿Quebe dxeajsá lázrele cheę da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale? ¹¹ ¿Ájazra na' quebe dxeque be'ele quegá bchálaja' cheę xeta xtila gate gunnía' le

guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'?

12 Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

Pedro dxenné' Jesús naque' Cristo

(Mr. 8.27-30; Lc. 9.18-21)

13 Gate bzrin Jesús naga nababa xezre Cesarea da ben Filipo, na' bchebe' benne' ca' dxusédené':

—¿Nuzra na' dxelenná bèneache naca' neda', Benne' Gulje' Bèneache?

14 Na' benne' ca' gulenné':

—Bal-la benne' dxelenné' nacu' Juan, bènea' bchue' bèneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

15 Nadxa guzre Jesús benne' ca':

—¿Gazra le'e? ¿Nuzra na' dxennale naca'?

16 Gunná Simón Pedro:

—Lue' nacu' Cristo, Zri'ine Dios ban.

17 Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. 18 Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xriwe' quebe seque na gucu'uj na benne' ca'. 19 Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

20 Nadxa Jesús gunná bé'ene' benne' ca' dxusédené' chee quebe nu xelé'e naca Le' Cristo.

Jesús dxuchálaje' ca gaca gate gatie'

(Mr. 8.31—9.1; Lc. 9.22-27)

21 Lu zra ná'queze guzú lau Jesús dxuzéajni'ine' benne' ca' dxusédené' dxal-la' xexíaje' xezre Jerusalén, na' benne' gula ca', ne benne' xíchaje ca' chee bxruze ca', ne benne' dxulux-uzájle'e da nadxixruj bea Dios wulusaca zi'e Le'. Na' guzre' benne' ca' dxusédené' welute benne' Jerusalén ca' Le'. Nadxa gate gaca chunna zra xebane'.

22 Nadxa Pedro guléaje' Jesús chalá'ala, ne guzú lawe' dxedille' Le', dxenné':

—Dios quebe gu'e lataj, Xran. Cabata' gaca chiu' da caní.

23 Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bénneache dxulaba lazru'.

²⁴ Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee' gatie', na' nadxa gaca xídalene' neda'. ²⁵ Bénnea' dxaca lazre' gapa chi'e xel-la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá zru'é'ene' xel-la' nabán du lazre'. ²⁶ ¿Bízraqueze ba neza naca na chee' tu benne' che gata' chee' xúgute' xel-la' gunní'a da de' lu xezr la xu nigá, na' cuía xi'e lau Dios? Quebe bi gaca quizruj tu benne' chee' la bénne' du xu'e lau Dios. ²⁷ Neda', Benne' Gulje' Bénneache wida' xecha lasa nen xel-la' szren chee' Xra', ne nen gubáz chee' xabáa ca'. Nadxa xuzría chee' tu tu benne' ca' naca da zaj nun tu tu'e'. ²⁸ Da li dxapa' le'e, bal-la benne' zaj zre'e' nigá quebe xelatie' cadxa xeledé'ene' neda', Benne' Gulje' Bénneache, xida' xedajnná be'a.

17

Dios dxuché'e ca dxenná' lau Jesús

(Mr. 9.2-13; Lc. 9.28-36)

¹ Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácálene' Le' tu lau xi'a sibe. ² Na' Dios bche'e ca dxenná' lau Jesús lávela benne' ca'. Lawe' guca tite na ca gubizra, na' zra lane' guca na da chiche ca xel-la' naxaní'. ³ Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús. ⁴ Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee' Moisés, ne tu chee' Elías.

⁵ Dxácaté dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chi'i Dios, dxenné':

—Benne' nigá naque' Zri'ina' nazrí'ite' lazra', ne chee' Le' dxezaca ba lazra'. Chee' Le' le xene.

⁶ Gate belenne' da nigá, na' gulate' sudxú'ala lu xu. Dxelezebele'e. ⁷ Nadxa Jesús gubigue' naga zaj zre'e', na' bte' benne' ca', ne guzre' le':

—Le chasa. Quebe zrébele.

⁸ Gate na' belenné'e, québedxa nu belelé'ene'. Tuze Jesús zue'.

⁹ Nadxa gate dxelexexétaje' lu xi'a na', Jesús gunná bé'ene' benne' ca', dxenné':

—Quebe nu guchálajle ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

¹⁰ Nadxa benne' ca' dxuseḡde Jesús bulucheḡbe' Le':

—¿Bizr cheḡ na' dxelenná benne' ca' dxuluxuzájle'ḡ da nadx-ixruj bea Dios dxun na ba xen xelá' Elías nédxudxa ca xelá' Cristo?

¹¹ Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. ¹² Neda' dxapa' le'e, ba bla' Elías, na' benne' ca' quebe belexúnbe'ḡ le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bénneache.

¹³ Nadxa benne' ca' dxuseḡde Jesús guléque be'ene' dxuchalaj Jesús ca naca cheḡ Juan, bénnea' bchue' bénneache nisa.

Jesús dxexune' tu bi biu dxe'ebe' chuna'

(Mr. 9.14-29; Lc. 9.37-43)

¹⁴ Gate belezrine' naga zaj zra' benne' zante, na' tu benne' gubigüe' naga zua Jesús, ne bzu zribe' lau Le', dxenné':

¹⁵ —Xran, bexache lazre' zri'ina', dxe'ebe' chuna', ne da zrente da dxezácabe'. Záneteḡ lasa ba xeajcházebe' lu xi', ne lu nisa. ¹⁶ Ba bedajgu'a-be' lau benne' caní dxusédenu', na' quebe guca xelexune'-be'.

¹⁷ Jesús becheḡbe':

—Le'e, benne' wen chupa lazre', ne benne' lázrdau zide'. ¿Bátateḡ zúalena' le'e? ¿Bátateḡ naca' zren lazre' nen le'e? Le cheajxri' bi cuide' na' nigá.

¹⁸ Nadxa Jesús gudil-le' be' xriwe' na', na' bebéaje' na lu bel-la' dxen cheḡ bi cuide' na', na' zra ná'queze bexácatebe'.

¹⁹ Gudé na' benne' ca' dxuseḡde Jesús gulenné' Le' chalá'ala, na' bulucheḡbe' Le':

—¿Bizr cheḡ na' quebe guca netu' xebéajntu' be' xriwe' na'?

²⁰ Jesús guzre' benne' ca':

—Lawe' da naca láteze ca dxéajleḡ chia'. Da li dxapa' le'e, che la nápaḡle xel-la' dxeajlí lazre', lácala naca na láteze ca naca tu binnedau' cheḡ mostaza, waca xeḡe xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi deḡ da quebe gaca gunle che nápaḡle xel-la' dxeajlí lazre'. ²¹ Ca naca be' xriwe' caní, dxun na ba xen guchálajleḡ Dios, ne gunle gubasa cheḡ séquele xebéajle be' xriwe' caní.

Jesús dxuchálaje' xecha lasa ca gaca gate gatié'

(Mr. 9.30-32; Lc. 9.43-45)

²² Dxácateḡ na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache.

²³ Xelútié' neda', na' gate gaca chunna zra, xebana'.

Gate belenne' dizra' nigá, na' bewi'ine lázreḡe'ne'.

Da dxuluchízruje' bénneache cheḡ xudau'

24 Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

25 Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláZR chee', u benne' zitu' ca'?

26 Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláZR chee' quebe xelízruje'. 27 Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu queļu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

18

Nu benne' nácadxa blau xabáa
(Mr. 9.33-37; Lc. 9.46-48)

1 Tu lasa gulebiga benne' ca' dxuséde Jesús naga zue', na' buluchebe' Le':

—¿Nuzra benne' nácadxe' blau naga dxenná bea Dios?

2 Nadxa Jesús gunné' tu bidau', na' bze'-be' lau benne' ca' dxusédene'. 3 Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. 4 Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá.

5 Benne' gape' ba lá'ana tu bidau' caní lu La' neda', néda'queza' gape' ba lá'ana.

Ca naca da dxun na gundxu dul-la
(Mr. 9.42-48; Lc. 17.1-2)

6 Na' gunná Jesús:

—Núteteze benne' guné' gun tu bidu caní dul-la, bi dx-eajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. 7 Edxugúa bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxelune' xelún bénneache dul-la. 8 Chee le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u.

⁹ Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpatē xiaj lau'.

Da dxulé'e na ca naca chee zrila' naníteba'
(Lc. 15.3-7)

¹⁰ Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee xabáa chee bidu caní lau Xra' xabáa. ¹¹ Neda', Benne' Gulje' Bénneache, bla'a bedajselá' benne' zaj nanitie'.

¹² ¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' bē tápalalaj chēnu na' le'e xixre', na' cheajdilje' zrila' na' naníteba'? ¹³ Gate ba bezrelne'-ba', wabéle'edxene' chee bē tu na' quézcala chee bē tápalalaj chēnu ca' quebe guleníteba'. ¹⁴ Cá'anqueze Xrale le'e, zue' xabáa, quebe dxaca lazre' nite netú bidu caní.

Ca dxal-la' gunite laudxu chee le sa' ljwézredxu
(Lc. 17.3)

¹⁵ Na' gunná Jesús:

—Che bi bichu' dxunbe' chiu' da calela, bchálajle tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. ¹⁶ Che quebe xenbe' da dxu'u-be', guché' tu chupa benne' chee gaca chupa u chunna benne' xelexechēbe' ca naca da dxu'u-be'. ¹⁷ Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

¹⁸ Da li dxapa' le'e, da guchéajle lu xēzr la xu nigá, naca na da ba nadxéajqueze na xabáa, ne da xesézrele lu xēzr la xu nigá naca na da ba nazézrequeze na xabáa.

¹⁹ Cá'anqueze dxapa' le'e, che chúpale le'e gácale tuze ca da nábale Dios, na' Xra' zua xabáa gunne' na. ²⁰ Naga zaj zra' chúpabe', u chúnna' zaj nazrágabe' lu La' neda', na' zúaqueza' neda' laduj lebe'.

²¹ Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

²² Bechebe Jesús:

—Dxapa' lue', quegá gazre lasa, san ga xun chi da gazre lasa.

Benne' wen zrin quebe guca lazre' gunite lawe' chee le sa' ljwezre'

²³ Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe'

da dxelal-la benne' wən zrin chee'. ²⁴ Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. ²⁵ Lawe' da quebe de chee' benne' wən zrin na' da quízruje' xrane', na' gunná be'e xrane' ta'u benne' wən zrin na', ne zru'ule', ne zrí'ine' ca', ne ca nácaqueze da nape', chee' gazruj da na' dxebague'. ²⁶ Nadxa bzu zribe benne' wən zrin na' lau xrane', na' guta' xuene' le', dxenné': "Xran, bən zren lazre' neda', na' quízrujqueza' ca naca na." ²⁷ Na' xrane' bexache lazre' le', ne bnite lawe' da na' dxebague' chee', ne bsane' le'. ²⁸ Gate benne' wən zrin na' bedxúaje', na' bezrague' xetú benne' wən zrin ljwezre', benne' dxebague' chee' látedau'. Na' gudəle' lba bəneea', ne guzú lawe' dxusézxuje' chi'i bəneea', dxə'e le': "Gudzruj neda' da dxal-lu' chia'." ²⁹ Nadxa benne' wən zrin ljwezre' na' bzu zribe' lau le', ne guta' xuene' le', dxenné': "Bən zren lazre' neda', na' quízrujqueza' ca naca na." ³⁰ Bəneea' quebe guca lazre', na' guxiáje' xeajlu'e wən zrin ljwezre' na' lizre xia dxácate quízruje' da na' dxebague'. ³¹ Gate benne' wən zrin ca' xezícala guleque bé'ene' da nigá, na' belewí'ine lázrele'ene', na' xjaque' xeajleguezre' xrane' xúgute da ba guca. ³² Nadxa xrane' na' gunná bé'ene' xeajlenné' benne' wən zrin na', na' guzre' le': "Bi wən zrin caləla. Neda' bnite lawa' chiu' ca naca da na' dxebagu' chia' lawe' da guta' xúenu' neda'. ³³ Cá'anqueze lue' dxal-la' xexache lazru' le sa' ljwezru' na' ca bəna' neda' bexache lazra' lue'." ³⁴ Xrane' na' bzrá'alə'e bəneea', na' bdee' le' xel-la' zi' dxácate na' quízruje' ca naca da na' dxal-le' chee'.

³⁵ Nadxa gunná Jesús:

—Cá'anqueze gun Xra' zua xabáa chee'le le'e che quebe gunita laule dute lázrdaule chee' le sa' ljwézrele.

19

Da bchalaj Jesús ca naca chee' benne' dxulusán ljwezre' (Mr. 10.1-12; Lc. 16.18)

¹ Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra. ² Benne' zan zjácəne' Le', na' bexune' benne' zante, benne' we'.

³ Nadxa bal-la benne' xudau' fariseo gulebigue' naga zua Jesús chee' xelebéaje' Le' dizra' chee' gaca xelagu zrie' Jesús, na' buluchebe' Le':

—¿Waca nu benne' gusane' zru'ule' ne chee' bíteteze da gunə'?

⁴ Bechebe Jesús:

—¿Quebe ne gulábale le'e lu xiche lá'azxa da na' dxenná na: "Bennea' bəne' benne' ca' nédxudaute bəne' le' benne' biu, ne

nu'ula"? ⁵ Cá'anqueze gunné': "Chee le na' benne' biu gusané' xra xrne'e chee gaque' tuze nen zru'ule', na' dxupe' xelaque' ca tuze benne'." ⁶ Caní naca na, québedxa zaj naque' chupe', san tuze benne' zaj naque'. Chee le na' quebe dxal-la' xelá'a bènneache da na' ba nuchaga Dios.

⁷ Nadxa buluchebe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belexelé'e, na' gusané' le'?

⁸ Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zru'ulale, san nédxudaute quebe guca na ca'. ⁹ Neda' dxapa' le'e, che tu benne' gusané' zru'ule', ne quebe dxedalene' benne' biu xula, na' che xezúalene' nu'ula xula, benne' nigá gune' dul-la súalene' nu'ula quebe naque' zru'ule', na' che nu benne' biu xeque'e tu nu'ula nusán benne' chee', cá'anqueze gun dul-la bènnea' súalene' nu'ula quebe naque' zru'ule'.

¹⁰ Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

¹¹ Jesús guzre' benne' ca':

—Quegá xúgute benne' gaca xelezí'e dizra' nigá, san tuze benne' ca' ba nun Dios chee' xelezí'e na. ¹² Zaj zra' benne' quebe dxelezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bènneache naca caní. Na' zaj zra' benne' dxexegá'ane' cá'aze, quebe nu dxelezúalene' chee gaca xelune' zrin chee Dios, Bènnea' dxenná be'e xabáa. Benne' gaca si'e dizra' nigá dxal-la' si'e na.

Jesús dxenabe' gaca chawe' chee bidu ca'

(Mr. 10.13-16; Lc. 18.15-17)

¹³ Nadxa belezrín benne' lau Jesús zaj naché'e bal-la bidau' chee guzé ne'e bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. ¹⁴ Jesús guzre' le':

—Le güe bidu ca' lataj xelela'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

¹⁵ Nadxa bze Jesús ne'e lawe' bidu ca', na' gudé na' bezé'e lataj na'.

Tu benne' cuide' nape' xel-la' gunní'a

(Mr. 10.17-31; Lc. 18.18-30)

¹⁶ Tu benne' cuide' guxíaje' naga zua Jesús, na' bchebe' Le':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

¹⁷ Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

¹⁸ Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súale'nu' zru'ula benne' xula. Quebe cuanu'. Quebe nneu' da wen lazre' chee benne'.

¹⁹ Gudapa ba lá'ana xra xrna'u. Bzri'i le sa' ljwezru' ca nazrí'i cuinu'.

²⁰ Benne' cuide' na' gunné':

—Xúgute da caní dxuna' nácatea' bídau'te. ¿Bíradxa quebe ne guna'?

²¹ Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

²² Gate benne' cuide' na' benne' da nigá, bezé'e dxexíaje lazre' lawe' da nápalé'e xel-la' gunní'a.

²³ Nadxa gunná Jesús, dxé'e benne' ca' dxusédené':

—Da li dxapa' le'e, stébele'e naca chu'u tu benne' gunní'a naga dxenná bea Dios xabáa. ²⁴ Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunní'a naga dxenná bea Dios.

²⁵ Gate belenne' benne' ca' dxusede Jesús da nigá, na' belexebánele'ene', na' buluchebe ljwezre':

—¿Nuzra la xca'?

²⁶ Jesús guné'e benne' ca', ne guzre' le':

—Da nigá quebe gaca xelún bénneache, san Dios waca gune' ca naca.

²⁷ Nadxa gunná Pedro:

—Xran, netu' ba bcá'anantu' ca naca da nápantu', ne zéajentu' Lue'. ¿Bizra gápantu' xca'?

²⁸ Bechebe Jesús:

—Da li dxapa' le'e, ca lu zra na' gate na' xúgute xelexaca na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. ²⁹ Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xezezí'queze' tu gaxúala na, ne xezezí'queze'

xel-la' nabán zeajlí canna. ³⁰ Benne' zantē zaj naca blau na'a xelaquē' benne' bzēbe, na' benne' zantē zaj naca benne' bzēbe na'a xelaquē' benne' blau.

20

Da dxulé'e na ca naca cheē benne' wən zrin ca'

¹ Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánetē cue' xēzr la xu guzé'ē lizre' che zílala, zéaje' zeajtilaje' benne' wən zrin ca' cheē cheajlechibe' uva chee'. ² Bca'ana cháwelenē' benne' wən zrin ca' quízruje' tu dumí lazruj cheē tu zra, na' gusel-le' benne' ca' zeajleguene' zrin lu xēzr la xu chee'. ³ Ca gudé na' guzé'ē lizre' ca dxedá na, na' blé'ene' benne' zaj zre'ē lawe' xi'a zaj nalátajze'. ⁴ Na' guzre' benne' ca': “Cá'anqueze le'e, le chjaca wən zrin lu xēzr la xu chia', na' gunna' le'e da naca chawe'.” Na' benne' ca' xjaque'. ⁵ Xrane na' guzé'ē da xula wa gubizra, ne cá'anqueze dxexedá' chunna, ne tuze ca bēne'. ⁶ Xetú du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': “¿Bizr cheē na' zrale le'e nigá bedú zra quebe bi zrin dxunle?”

⁷ Gulenné': “Quebe nu ne xē netu' guntu' zrin chee'.”

'Na' guzre' benne' ca': “Cá'anqueze le'e, le cheajén zrin lu lina chia', na' gunna' le'e da naca chawe'.” ⁸ Gate gul-la' chizrela, xrane na' guzre' benne' xu'u lu ne'ē zrin na': “Gunné benne' wən zrin ca', ne gudízruje', su lau' quízruju' benne' ca' belelá' bzébedxa, na' bzébetē quízruju' benne' ca' belelá' nédxute'.” ⁹ Nadxa belezrín benne' ca' belú'ē lu zrin na' gate dxexedadxa gazxu', na' tu tu benne' ca' belezi'ē lazruj chee' du naxá' lazruj tu zra wən zrin. ¹⁰ Gudé na' gate belezrín benne' ca' gulu'ē nédxutē lu zrin na', guléquene' xezezi'ē da zrendxa, san cá'anqueze gulezí' tu tu benne' ca' lazruj tu zra wən zrin weaj.

¹¹ 'Gate gulezí'ē na, na' gulezú lawe' dxelawe' zria lau xrane zrin na', ¹² dxelenné': “Benne' caní belelá' bzébedxa, tu chí'idau'ze ga belune' zrin, na' gudízrujquezu' benne' caní ca gudízruju' netu', na' netu' bedú zra bēntu' zrin, ne ca naca da la cheē zra nigá bchaga launtu'.”

¹³ 'Bechēbē xrane na', dxē'ē tu benne' ca': “Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelenā' lue' quízruja' lue' lazruj tu zra wən zrin? ¹⁴ Guzí' lazruj chiu', ne bexíaj. Neda' dxaca lazra' gunézruja' cheē benne' ca' belú'ē bzébedxa ca da gudízrujqueza' lue'. ¹⁵ ¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje'?”

¹⁶ Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnia' benne' zan, san bábaze benne' ca' xelaque' blau.

Xecha lasa dxuchalaj Jesús ca gaca gate gatie'

(Mr. 10.32-34; Lc. 18.31-34)

¹⁷ Gate xu'u Jesús neza, zexiáje' Jerusalén, guléaje' cheeze benne' chazrinu ca' dxusédene', ne guzre' le':

¹⁸ —Dxelé'ele le'e ba zexiájdxi Jerusalén naga neda', Benne' Gulje' Bénneache, xuludé benne' ca' neda' lau benne' xíchaje ca' chee bxruze ca', ne lau benne' ca' dxuluxuzájlé' da bdxixruj be'e Dios, na' xelechugue' chia' gatia'. ¹⁹ Xuludé' neda' lu na' benne' zitu' ca' chee xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

Da gunaba xrna Jacobo ne Juan

(Mr. 10.35-45)

²⁰ Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén. ²¹ Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabēla chiu', ne xetube' xéglala.

²² Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

²³ Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabēla chia', ne chalá'a xéglala chia' quebe naca na chia' gunna' na le'e. Xra' gunézruje' na chee bi ca' ca da ba nucueze'.

²⁴ Gate xechí benne' ca' dxuséde Jesús belenne' ca', na' belezré'e dxupa bi chee nu'ula na'. ²⁵ Jesús gunné' benne' ca', ne guzre' le':

—Ba nézele le'e ca dxelún benne' xíchaje chee xezr la xu ca', dxelenná bé'ene' benne' ca', na' benne' nácadxé' blau ládujla benne' ca' dxelenná be'e, dxuchínene' xel-la' dxenná bea chee'. ²⁶ Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' guné' zrin chee xezícadxale le'e, ²⁷ na' bénnea' dxaca lazre' gaque' xíchaje chee'le, dxal-la' gaque' wen zrin chee xúgutele le'e. ²⁸ Dxal-la' guné' ca bēna' neda', Benne' Gulje' Bénneache, quebe bida' chee nu gun zrin chia'

neda', san bla'a chee guna' zrin chee bēnneache, ne chee guzúa' xel-la' nabán chia' ca da quízruja' chee guselá' benne' zante.

Jesús dxexune' chupa benne' la chul-la

(Mr. 10.46-52; Lc. 18.35-43)

²⁹ Gate dxelexedxúaje' xezre Jericó, na' benne' zante zjácáleṅe' Jesús. ³⁰ Naga dxeledéé' zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xē'e, dxelenné':

—Xran, Zri'ine David, bexache lazre' netu'.

³¹ Benne' zan ca' guledil-le' dxúpatē' na' chee xelezúe' zrize, san le' gulebezre xē'e zízrajdxá, dxelenné':

—Xran, Zri'ine David, bexache lazre' netu'.

³² Nadxa Jesús guleze', na' gunné' benne' la chul-la ca', na' bcheḃe' le':

—¿Bi dxaca lázrele guna' cheeḃe?

³³ Belexecheḃe benne' ca':

—Xran, dxaca lázrentu' xelé'entu'.

³⁴ Jesús bexache lazre' benne' ca', ne bte' xiaj lawe'. Na' belexelé'eteḃe benne' la chul-la ca', na' xjácáleṅe' Jesús.

21

Ca da guca gate bexú'u Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Gate belezrín Jesús, ne benne' ca' dxusédene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'. ² Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' leba'. Le seze-ba', ne le che'e dxúpatēba' nigá. ³ Che nu benne' bi xē'e le'e, le xē'e: “Xránadxu nachinne' leba', na' la xesél-la'tequeze'-ba'.”

⁴ Da nigá guca na chee guxá ca da gunná benne' bchálaje' waláz chee Dios, gunné':

⁵ Le xē benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Dute xel-la' dxexruj lazre' zrie' tu burro bzrise'.

Zrie' tu búrrodau', zri'ine tu be dxua xua.”

⁶ Nadxa dxupa benne' ca' dxusede Jesús besia'que', ne belune' ca da ba gunná be'e Jesús le'. ⁷ Xejlexrí'e burro bzrise', ne zrí'ineba', na' belezrúe' zra lane' cúzruba', na' guzría Jesús leba'. ⁸ Benne' zan ca' gulechílaje' zra lane' la neza na', na' xebal-le' buluchibe' zina' da buluzale' la neza. ⁹ Benne' zjaque' lávela, ne benne' zá'aque' bzeḃe gulezú lawe' dxelebezre xē'e, dxelenné':

—¡Gaca ba lá'azxa Zri'ine wenná bea David! ¡Ba neza zrente naca na chee bēneea' ze'e waláz chee Xránadxu Dios! ¡Gaca ba lá'azxa Dios!

¹⁰ Gate guxú'u Jesús xezre Jerusalén, ca naca bēneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

¹¹ Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

Jesús dxuchi'e lu xudau'

(Mr. 11.15-19; Lc. 19.45-48; Jn. 2.13-22)

¹² Ca gudé na' guxú'u Jesús dxale'aj xudau' chee Dios, na' bebéaje' xúgutē benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelútiē' bgúgudu ca'. ¹³ Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bēneache lawa' neda”, san le'e ba nunle na ca tu lizre gubán.

¹⁴ Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexunē' benne' ca'.

¹⁵ Belezrá' benne' xíchaje ca' chee bxruze ca', ne benne' ca' dxuluxuzájlē'e da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': “¡Gaca ba lá'azxa zri'ine wenná bea David!” ¹⁶ Gulé'e Jesús:

—¿Dxennu' ca' dxelenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lá'azxa naga naxúaj na chee da dxaca nigá? Dxenná na caní:

Ba benu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

¹⁷ Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejgá'ane' xela na'.

Jesús dxugu'e de' xaga higo

(Mr. 11.12-14, 20-26)

¹⁸ Che zílala ca zexíaj Jesús xezre na', na' gudunē'. ¹⁹ Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete' xaga higo na'. ²⁰ Ca belelé'e benne' ca' dxusede Jesús da nigá, na' belexebánene', ne buluchebe' Jesús:

—¿Ájazra na' chadite' gubizre xaga higo nigá?

²¹ Bechebe Jesús:

—Da li dxapa' le'e, che nápaie xel-la' dxeajlí lazre', ne quebe gun chupa lázrele, quegaze da nigá gaca gunle ca da bena' neda' chee xaga higo nigá, san waca xeie xi'a nigá: Gucuasa nigá, xeajsúa lu nísadau', na' gaca na. ²² Che dxeajlí lázrele, na' xezi'le bíteteze da nábaie Dios.

Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

²³ Nadxa guxú'u Jesús lu chila xudau', na' dxácatē na' dxusédene' benne' zaj zre'e na', gulebiga naga zua Jesús benne' xíchaje ca' chee bxruze ca', ne benne' gula chee judío ca', na' buluchebe' le':

—¿Bi xel-la' dxenná bea napu' dxunu' da caní? ¿Núzraqueze benna lue' xel-la' dxenná bea nigá?

²⁴ Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. ²⁵ ¿Nu benne' gusel-le' Juan dxuchúe' bēneache nisa? ¿Dios, che bēneacheze?

Gulezú lawe' dxuluchálajle ljwezre', dxelenné':

—Che nnadxu Dios gusel-le' le', na' xe'e dxi'u: “¿Bizr chee na' quebe guxéajlele chee'?” ²⁶ Che nnadxu bēneache gusel-le' le', dxal-la' zrébedxu bi xelún benne' zan ca' cheedxu dxi'u, lawe' da dxeleque xúgutē bēneache bchalaj Juan na' waláz chee Dios.

²⁷ Chee le' na' gulé'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

Da dxulé'e na ca naca chee chupa bi biu chee tu benne'

²⁸ Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zri'ine' bi biu, na' guzre' tube': “Zri'ina', guxiáj xeajén zrin lu lina chee uva chia.” ²⁹ Zri'ine' na' bechébebe': “Quebe dxaca lazra'.” Ca gudé na' bexíaje lázrebe', na' guxiájbe' xeajénquezbe' zrin. ³⁰ Cá'anqueze xrabe' na' guxiájbe' xeajné'e xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxiájbe'. ³¹ ¿Núlabe' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zantē xelexú'e naga dxenná bea Dios nédxudxa ca le'e ³² lawe' da bla' Juan, bedajlé'ene' le'e da naca xrlátaje, na'

le'e quebe guxéajle chee'. Benne' wechizruj ca', ne nu'ula ca' dxeledále benne' biu zante guléajle'e chee'. Le'e, gate ble'ele da nigá, quebe bexíaje lázrele chee chéajle chee'.

Da dxulé'e na ca naca chee benne' wen zrin calela ca'
(Mr. 12.1-12; Lc. 20.9-19)

³³ Nadxa gunná Jesús:

—Le xene ca naca da nadxixruj bea nigá. Tu benne' xrane tu xezr la xu guze' lba uva ca', ne bene' le'aj chee na. Bene' tu xedxu naga xelesíe' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guze'e zéaje' zitu'. ³⁴ Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. ³⁵ Benne' wen zrin ca' gulequ'e bi wen zrin chee' ca'. Belúele'e tube', ne belutie' xetube', na' xetube' buluzríe'-be' xiaj. ³⁶ Nadxa xrane na' gusel-ladxe' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. ³⁷ Naga xeajché'tequeze na gusel-le' zrí'inequeze' lawe' da dxéquene': Welape' ba lá'ana zri'ina'. ³⁸ Gate belelé'ene' zrí'ine', na' benne' wen zrin ca' gulé ljwezre': "Bi nigá xezí' lu na'be' ca naca da caní. Du gute-be' chee xegá'ana cheedxu da caní." ³⁹ Chee le' na' gulele'-be', ne belexebáje'-be' lu xezr la xu na', na' belutie'-be'.

⁴⁰ Nadxa Jesús bchebe' benne' ca':

—Gate xida xrane xezr la xu na', ¿ájazra guné' chee benne' wen zrin ca'?

⁴¹ Gulé'e Le':

—Gutie' benne' ca' dxelune' da calela ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

⁴² Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na: Xiaj na' da buluzúa benne' wen xu'u ca' chalá'ala, le' na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

⁴³ Chee le' na' dxapa' le'e, Dios wequ'e da naca cheele le'e naga dxenná be'e, na' gunézruje' na benne' xelune' da naca chee xel-la' dxenná bea chee Dios. ⁴⁴ Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

⁴⁵ Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'ene' chee léqueze' bchalaj Jesús da caní. ⁴⁶ Gate gulaca lazre' xelele' Le',

belezrebe' benne' xęzre ca' lawe' da dxelęajle' benne' ca' naca
Jesús benne' dxuchálaje' waláz cheę Dios.

22

Da dxulé'e na ca naca cheę laní wechaga na'

¹ Guzú lau Jesús dxuchájlęne' benne' ca' xecha lasa tu da dxulé'e na, dxę'e le':

² —Ca da gaca xabáa naga dxenná bea Dios naca na ca da guca gate tu benne' wenná bea beęe' tu laní wechaga na' cheę bi biu cheę'. ³ Gusel-le' benne' węn zrin cheę' ca' cheajletupe' benne' ca'an gunné' lizre', san benne' ca' quebe gulaca lazre' xędajgaque'. ⁴ Nadxa gusel-ladxę' benne' węn zrin cheę' ca', benne' xula. Dxe'e le': "Le xę benne' ca' gunniá', ba nucueza' xel-la' wagu. Ba gunná be'eda' xelútię' bezure ca', ne be dxelanne, na' ca naca na bache de. Dxa-la' xelelé'e nigá naga zra' wechaga na'." ⁵ Benne' ca' gunné' quebe gulaca lazre' xędajgaque'. Tu benne' ca' guxiąje' lu xęzr la xu cheę', ne xetú benne' guxiąje' wete. ⁶ Xebal-la benne' ca' gulele' bi węn zrin ca' cheę wenná bea na', na' bulucháchalęne'-be', ne belútete'-be'. ⁷ Nadxa wenná bea na' bzrá'ale'e, na' gusel-le' benne' cheę' ca', benne' zjaca wedil-la xęajleguętię' benne' wete benne' ca', ne xęajlezęxe'te' lazre' benne' ca'. ⁸ Nadxa guzre' bi węn zrin cheę' ca': "Bal-la bi de ba de cheę wechaga na', na' benne' ca' gunniá' quebe zaj naca cheę' xelelé'e. ⁹ Le chjaca neza zri'a ca', ne le nne xúgute benne' lé'ele, cheę xelelé'e laní cheę wechaga na'." ¹⁰ Benne' węn zrin ca' xjaque' la neza ca', na' xęajletupe' xúgute bęnneache, benne' belelé'ęne' zaj naque' benne' calela, ne benne' xrlátaje. Ca'an guca guzrate xu'u na' bęnneache. ¹¹ Nadxa wenná bea na' guxú'e xęajné'e benne' ca' gunné', na' blé'ęne' tu benne' dxę'e na', quebe nazi'e zra lanę' cheę laní cheę wechaga na'. ¹² Guzre' le': "Lue', benne', ¿ájazra guca guxú'u nigá, ne quebe nazi'u zra lanu' cheę laní wechaga na'?" Bęnnea' gudxé'e zrize. ¹³ Nadxa wenná bea na' guzre' bi zaj zúabe' ga na', "Le guchęaj ni'a ne'e, ne le guzale' chalé'ajla naga naca chul-la, naga cuezre', ne xáguxa'ate lazxe'." ¹⁴ Benne' zante gunniá', na' bábaze' zaj naca cheę' xelu'e nigá.

Ca naca cheę dumí da dxuluchízruje'

(Mr. 12.13-17; Lc. 20.20-26)

¹⁵ Nadxa benne' fariseo ca' besiá'que', ne belune' tuze dizra' xelebéaje' Jesús dizra' cheę xelezéquene' xelawe' zriá cheę'. ¹⁶ Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, cheę zęajleguęzre' Jesús:

—Benne' wesede, nézentu' dxenníu' da li, ne dxusédenu' da li da zaj naca chee Dios, ne quebe dxezrebu' bi xelenná bènneache, ne quebe dxenná'u ca da zaj napa bènneache. ¹⁷Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nase-la César, benne' zitu', che cabí?

¹⁸Jesús ba nézene' ca da dxelaca lazre' xelune' chee', na' guzre' benne' ca':

—Le'e, láweze dxunle da xrlátaje. ¿Bizr chee na' dxuzúale da guzrí xi na neda'? ¹⁹Le gulé'e neda' dumí na' da dxízrujle chee wechizruj.

Nadxa bulunézruje' Le' tu dumí chee xezre Roma. ²⁰Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

²¹Belexechebe':

—Chee César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

²²Gate belenne' da nigá, na' belexebánene', ne besiá'que' naga zua Jesús.

Da buluchebe' Jesús chee benne' xelexebane' ládujla benne' gate

(Mr. 12.18-27; Lc. 20.27-40)

²³Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

²⁴—Benne' wesede, Moisés gunné' che tu benne' nuchaga ne'e gatié', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee sua tu bi chee benne' ba gutié'. ²⁵Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'. ²⁶Cá'anqueze gúcaqueze na chee bi gudxupe', na' gudé na' chee bi guxunne', na' cá'anqueze guca chee xúguté bi gazre ca'. ²⁷Ca gudé na', na' gute nu'ula na'. ²⁸Gate xelexebán benne' gate, ¿nula bi gazre caní gácabe' benne' chee nu'ula na' lawe' da tu tu bi gazre ca' bchaga na'abe' nen nu'ula na'?

²⁹Jesús bechebe':

—Le'e dxeque zrėjae lawe' da quebe núnbeale da naxúaj na lu xiche lá'azxa, ne ca naca xel-la' waca chee Dios. ³⁰Gate zrin zra xelexebán benne' gate, québedxa xuluchaga na' bènneache, ne québedxa xelútié' bi nu'ula chee xuluchaga na'abe'. Xelaque' ca zaj naca gubáz chee xabáa chee Dios. ³¹Ca naca na

che dxal-la' xelexebán benne' gate, ¿quebe ne gulábale le'e ca gunná Dios? Gunné': ³² “Neda' naca' Dios chee Abraham, ne Dios chee Isaac, ne Dios chee Jacob.” Dios quebe naque' Dios chee benne' gate, san naque' Dios chee benne' ban, benne' ca' ba gultatíe' lu xezr la xu nigá.

³³ Gate belenne' da nigá, na' belexebane benne' ca' ca naca da dxusede Jesús.

Da gunná be'e Dios da naca blau

(Mr. 12.28-34)

³⁴ Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. ³⁵ Tu benne' ca', benne' naque' benne' dxuxuzájle'e da nadxixruj bea na, guca lazre' guxúe' ájala nne Jesús. Bchebe' Le':

³⁶ —Benne' wesede, ¿bizrla da gunná be'e Dios naca blau?

³⁷ Bechébe Jesús:

—Dxal-la' zri'inu' Xranu' Dios dute xichaj lázrda'u, ne dute bénne'du xu'u, ne dute xel-la' dxéajni'i chiu'. ³⁸ Da nigá naca da nadxixruj bea da blaudxa, ne da dxundxa na ba xen. ³⁹ Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'. ⁴⁰ Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzua'j Moisés, ne ca naca xúgute da bulusede benne' ca' buluchálaje' waláz chee Dios.

¿Nuzra zri'ine naca Cristo?

(Mr. 12.35-37; Lc. 20.41-44)

⁴¹ Dxácatē ne zaj nazraga benne' fariseo ca' na', ⁴² Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

⁴³ Nadxa guzre Jesús benne' ca':

—¿Ájazra na' David gate bchálaje' chee Cristo dxé'e Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

⁴⁴ Xrana' Dios guzre' Xrana':

“Gudxé'e chalá'a xabe'la chia'

cadxa guzúa' zran ni'u benne' ca' quebe chawe' dxelelé'ene' Lue'.”

⁴⁵ ¿Ájazra naca na naca Cristo zri'ine David, che David ná'queze dxé'e Le': “Xrana”?

⁴⁶ Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

23

Jesús dxedil-le' benne' xudau' ca'

(Mr. 12.38-40; Lc. 11.37-54; 20.45-47)

¹ Nadxa Jesús guzre' benne' ca' zaj zre'e na', ne benne' ca' dxusédene', ² dxenné':

—Benne' ca' dxuluxuzájle'e da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e da nadxixruj bea Moisés. ³ Chee le na' le guzúa dizra' chee benne' caní, ne le gun xúgutę da xelenné'. Quebe gunle ca da dxelún benne' ca', lawe' da dxelenné' da ca' dxalla' gunle, na' quebe dxelúnqueze' na. ⁴ Dxelunę' xua zí'ile'e da quebe dxelezeque xelezúe bėnneache, ne dxelenná bé'ene' bėnneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla. ⁵ Xúgutę da dxelún benne' ca' naca na chee xelélé'e bėnneache. Dxedédannene' dxelu'e luzxgue', ne ne'e ladxe' laga naga naxúaj dizra' chee Dios, ne dxelácuę' zra lanę' da zeajzé luzre na tunna. ⁶ Dxelaca lazre' xelebé'e naga zę láweze naga dxelawe', ne naga naca blau lu xu'u ca' naga dxeledubę'. ⁷ Dxelaca lazre' xelapa bėnneache le' ba lá'ana la neza ca', ne xelé'e le': "Benne' wesede." ⁸ Na'a le'e, quebe güele lataj nu xę le'e, "Benne' wesede", lawe' da xúgutęle nácale bi bíchele tule xetule, ne tuze Benne' dxusédene' le'e, neda', Cristo. ⁹ Quebe nu xęle le'e: Xrae, lu xęzr la xu nigá, lawe' da zua tuze Xrale, Dios na' zuę' xabáa. ¹⁰ Quebe güele lataj nu xę le'e: Xran, lawe' da zua tuze Xránale, neda', Cristo. ¹¹ Bėnnea' dxunę' zrin chee xezícadxale le'e nácadxę' blau ládujla le'e. ¹² Bėnnea' dxucá'ana szren cuinę' wexéxrujla bėnnea', na' bėnnea' dxaque' dxexruj lazre' wegá'ane' szren.

¹³ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxsézxujle neza chee xabáa chee quebe nu chu'u na. Lé'equeze quebe dxú'ule, ne quebe dxuele lataj benne' dxelaca lazre' xelu'e.

¹⁴ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxegúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee le na' da zrentę da guzríá xi na le'e.

¹⁵ 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xęzr la xu nigá ne ca naca nísadau' chee si' tu benne' ca naca da zéajle chee Dios, na' gate bache dxunle na, na' dxugápadxale bėnnea' dul-la ca da nabágale le'e chee cuía xi'e lu lataj ba xa'.

16 'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaję' xudau', quebe dxun na le' ba xen, na' che dxuzétaję' oro cheę xudau', da na' dxun na le' ba xen. 17 Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'? 18 Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaję' guna' da zria na lawe' cugu lá'azxa, da na' dxun na le' ba xen. 19 Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? 20 Che nu benne' dxuzétaję' cugu lá'azxa, quegaze cugu lá'azxa dxuzétaję', san cá'anqueze dxuzétaję' ca naca da zria lawe na. 21 Bénnea' dxuzétaję' xudau', quegaze xudau' na' dxuzétaję'. Cá'anqueze dxuzétaję' Dios zue' lataj na'. 22 Cá'anqueze benne' dxuzétaję' xabáa, dxuzétaję' lataj naga zria Dios, ne Diósqueze, Bénnea' zrie' lataj na' dxuzétaję'.

23 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle cheę xudau' tu cue' cheę da chi cue' cheę xixruj weaj, ne cheę bínnedu ca' cheę anís, ne cheę cumín. Quebe dxunle da zaj naca na blaudxa da zaj zua na lu da nadxixruj bea na, ca naca cheę gácale xrlátaje, ne cheę xexache lázrele le sa' ljwézrele, ne cheę chéajlele cheę Dios. Da caní zaj naca na da dxun na ba xen gunle, ne quebe gusanle da ca' ba dxunle. 24 La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxi'ajle, na' quebe dxeque be'ele dxi'ajle da naca ca tu camello, be dxelaga benneache.

25 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucude. 26 Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

27 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtantę cúzrela, na' lu'ule na nazratę na zrita cheę benne' gate', ne xúgutę da sgute. 28 Ca'an nácale le'e. Cúzrela nala'le ca benne' xlátaje, na' lu lázrdaule nazratę na da węn lazre', ne da calęla da dxunle.

29 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaję' waláz cheę Dios, ne dxuele lechítaję lu'a cheę benne' xrlátaje ca'. 30 Dxennale: "Chela netu' ba zúantu' gate na' gulezrá' xra xrtauntu' ca', quebe gúcalęntu' benne' ca' belutię' benne' ca'

buluchálajē' waláz cheē Dios." ³¹ Gate dxennale ca', le'e dxexúnbeaquezle nácale zri'ine zre sua benne' ca' belutiē' benne' ca' buluchálajē' waláz cheē Dios. ³² Dxusexúzrele dxunle ca da gulezú lau belún xra xrtáule ca'.

³³ Bē snia nácale, ne xrtia bē snia. ¿Ájazra gunle cheē gáchele lu da zi' da xa' cheē lataj ba xa'? ³⁴ Cheē lē na' neda' sella' cheēle benne' ca' xuluchálajē' waláz cheē Dios, ne benne' sina ca', ne benne' ca' xulusédene' le'e. Lé'equeze gútele, ne gudá'le xaga béguaj bal-la benne' ca', na' xebal-lē' gunle lē' zi' lu xudau' ca', na' gau zi' xúzrele lē' tu xezre xetú xezre. ³⁵ Ca'an gaca, le'e bágale zria cheē xel-la' gute cheē xúgute benne' xrlátaje ca' belute xra xrtáule ca', gate guzú lau na nu bēte Abel, benne' xrlátaje, ne naga bzrintē bētele Zacarías ládujla naga zua lataj lá'azxa cheē xudau' ne lataj naga dxuluzezxē' bē xíxre'du ca', bē dxelegú'ē lu cugu cheē Dios. ³⁶ Da li dxapa' le'e, bēnneache zaj zre'ē na'a xelebague' zria cheē xúgute da caní.

Jesús dxebezre' cheē xezre Jerusalén
(Lc. 13.34-35)

³⁷ Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálajē' waláz cheē Dios, ne dxuzríale xiaj benne' gubáz ca' dxesel-la Dios naga zúale. Zane' lásate guca lazra' gutupa' zrí'inele chia' ca dxun bedxuj, dxutúpaba' be dxé'enedau' zran xrláaba', san quebe guca lázrele. ³⁸ Le nna'xque na'a, lízrele xelexegá'ana na dácheze, ³⁹ lawe' da dxapa' le'e, québedxa lé'ele neda' cadxa zrin zra nnale: La'azxa naca bēnnea' zē'ē waláz cheē Xránadxu.

24

Jesús dxenné' wabía xi' xudau'
(Mr. 13.1-2; Lc. 21.5-6)

¹ Nadxa bedxúaj Jesús xudau', na' dxácatē dxexedxúajē' na', gulebiga benne' ca' dxusédene' lau Jesús, ne gulezú lawe' dxuluchálajlēne' Lē' ca naca cheē xudau' na'. ² Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzríá cuzru ljwezre na. Ca naca na cuía xi na.

Ca naca da xelunna bea na ba za zra bzebe
(Mr. 13.3-23; Lc. 21.7-24; 17.22-24)

³ Nadxa xjaque' lu xi'a naga zaj zē xaga olivo, na' gate dxe' Jesús na', benne' ca' dxusédene' belezrine' lau Lē', ne bagácheze buluchebe' Lē':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé cheē xezr la xu nigá?

⁴ Nadxa Jesús guzre' benne' ca':

—Le guxúe cuínale chee quebe nu si xę le'e. ⁵ Benne' zan xelexé'e. Xelún lazre' xelenné' zaj naque' Cristo, na' xelexi xe'e benne' zan. ⁶ Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe. ⁷ Tu cue' xęzr la xu tıl-lale na xetú cue' xęzr la xu, ne tu xęzre tıl-lale na xetú xęzre. Wata' gubina', ne welata' xızrawe' ca', ne wazrú' gáteteze na'. ⁸ Xúgute da caní zaj naca na naga dxezú lau ca da xelezaca bėnneache.

⁹ Nadxa xuludé' le'e naga si sácale, na' bál-lale welútequeze'. Ca naca bėnneache xelexúdenę' le'e lawe' da dxunle da naca chia'. ¹⁰ Lu zra na' benne' zan québedxa xelėjle'e chia', na' xelexúdenę' le sa' ljwezre', ne xuludé' le sa' ljwezre' lu na' benne' guledábague' le'. ¹¹ Welelá' benne' zan benne' wen lazre'. Xelenné' dxuluchálaje' waláz chee Dios, na' xelexi xe'e benne' zante. ¹² Lawe' da gáta'le'e da calela, benne' zan québedxa xelexrí'ine' le sa' ljwezre'. ¹³ Bėnnea' zua chache' ca zrintę zra bzebe, la bėnnea'. ¹⁴ Ca naca dizra' chawe' nigá ca nna bea Dios, zralaj na du gabí'i xęzr la xu chee xelén ca naca benne' chee xúgute cue' xęzr la xu, na' te na' cheajse' chee xęzr la xu nigá.

¹⁵ Benne' gulabe' da nigá dxal-la' chėjni'ine'. Daniel, benne' bchálaje' waláz chee Dios, bzuaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau', ¹⁶ nadxa benne' zaj zre'e xęzre ca' zaj nababa Judea dxal-la' xuluzrúnnuje', ne chjaque' lu xi'a zren. ¹⁷ Che tu benne' ze' chju'u chee', quebe dxal-la' xexétaje' bi cheajxelėjaje' lu xu'u. Dخال-la' guzrúnnujte'. ¹⁸ Benne' zue' le'e xixre' quebe dxal-la' xezrine' lizre' cheajxezri'e xicha chee' da gácie'. ¹⁹ Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. ²⁰ Le naba Dios quebe gun na ba xen guzrúnnujle beu' zaga, ne quegá lu zra dxupá'anale, ²¹ lawe' da che ca' gaca na, na' da zrentędxa da xelexi saca bėnneache ca da quebe ne xelexaque' ca guzú laute zua xęzr la xu nigá, ne québedxa bi xelexaque' caní ca te chee da nigá. ²² Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabėjaje' chee'.

²³ Chee le na', quebe chėjlele che nu xę le'e: "Le nna'xque, nigá zua Cristo", u che nu xę le'e: "Le nna' xque, na'la zue'." ²⁴ Caní dxapa' le'e lawe' da xelexi' benne' zan, benne' guzrí xe'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrentę xululé'ene', ne xelune' xel-la' waca zren ca' chee xelexi xe'e benne' ca' ba nabėj Dios. Caní xelune' che xelexé'quene'. ²⁵ Ba bchálajlena' le'e caníqueze na'a quebe ne gaca na. ²⁶ Chee le na', che nu

xē le'e: "Le nna'xque, na' zuē lē'ē xixre'", quebe chéajle na', u che nu xē le'e: "Le nna'xque, lu xu'u nigá zuē'", quebe chéajlele. ²⁷ Ca dxun tu xesa guziu', dxēpe na naga dxalaj gubizra, na' dxelédxu na naga dxebía gubizra, ca'an gaca gate xida' neda', Benne' Guljē' Bénneache. ²⁸ Gáteteze de tu da nate, na' dxelexezraga laba ca'.

Ca da gaca gate ba zua xelá' Benne' Guljē' Bénneache
(Mr. 13.24-37; Lc. 21.25-33; 17.26-30, 34-36)

²⁹ Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelezrízequeze ca naca da zaj naca na szren da dxeledá' lu be'. ³⁰ Nadxa lé'ele zran xabáa da gulé'e na ba zua xelá'a neda', Benne' Guljē' Bénneache, na' ca naca bénneache zaj zré'ē xēzr la xu xelebézrequeze'. Nadxa xeledé'engē' neda', Benne' Guljē' Bénneache, zezá'a lu beuj zran xabáa, zúalē neda' dute xel-la' dxenná bea, ne da xabáa. ³¹ Nadxa sél-laqueza' gubáz cheē xabáa chia' ca', na' xulucuézre' zizraj lúzuba' cheē xuluxutupe' benne' ca' ba nabéaja' chia' dapa saca cheē xēzr la xu nigá, ne du ca naca xēzr la xu nigá.

³² 'Le gusede ca naca da dxulé'e xaga higo. Gate dxelaxedxé'ene zruze na, ne dxezría na laga' dxe'ene, ba nézele ba za xaca beu' la. ³³ Cá'anqueze gate lé'ele dxelaca xúgutē da caní, dxal-la' nézele gágutē ba zua cheajsé cheē xēzr la xu, ne ba zua gaca na. ³⁴ Da li dxapa' le'e, xúgutē da caní xelaca na nédxula gate quebe ne xelate bénneache zaj zré'ē lu zra na'. ³⁵ Xabáa ne xēzr la xu weledé cheē na. Dizra' chia' quebe te cheē na.

³⁶ 'Gate za zra na', ne bila zra na', quebe nu neze, quegá gubáz cheē xabáa zaj zré'ē xabáa, ne neda', Zri'ine Dios. Tuze Xradxu Dios nézene' gate zrin zra na'.

³⁷ 'Ca guca lu zra ca' gate zua Noé, cá'anqueze gaca na gate xelá'a neda', Benne' Guljē' Bénneache. ³⁸ Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxelé'aj dxelawe', ne dxuluchaga ne'ē, ne dxulunézrujē' zrí'ine' ca' cheē xuluchaga na'be', cadxa bzin zra guxú'u Noé lu da zren na' dxedá lawe' nísadau' da nazí le na arca. ³⁹ Quebe guleque bé'engē' ca da dxal-la' gaca na, cadxa bzin zra guca xiuj na', ne bēte na ca naca benne' ca'. Cá'anqueze gaca gate xelá'a neda', Benne' Guljē' Bénneache. ⁴⁰ Ca lu zra ca' xelezrá' chupa benne' biu lē'ē xixre'. Tuē' xeché'ē, na' xetúe' xegá'angē'. ⁴¹ Xelezrá' chupa nu'ula dxelútue'. Tuē' xeché'ē, na' xetúe' xegá'angē'.

⁴² 'Le sua le'e ban lazre' lawe' da quebe nézele bi zra xelá'a neda', Xránale. ⁴³ Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. ⁴⁴ Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

Benne' wən zrin li lazre', ne benne' wən zrin quebe naque' li lazre'

(Lc. 12.41-48)

⁴⁵ Na' gunná Jesús:

—¿Nuzra na' benne' wən zrin li lazre' ne dxéajni'ine', bènnea' xrane' dxucá'analene' le' benne' zaj zre'e lizre' chee gunézruje' da xelawe' gate zrin zra chee na? ⁴⁶ Ba neza naca na chee benne' wən zrin na', gate xezrín xrane', lé'ene' le' dxune' ca naca da nabague'. ⁴⁷ Da li dxapa' le'e, xrane' gucá'analene' le' ca naca da nape'. ⁴⁸ Che benne' wən zrin na' gaque' benne' wən da calela, ne guéquene' quebe xelá' ze xrane', ⁴⁹ ne che su lawe' gusaca zi'e xezícala benne' wən zrin ca', ne xi'aj gágulene' benne' dxelezuzre', ⁵⁰ nadxa xrane' xezrine' zra gate québela dxebeze'. Gaca na zra quebe nézene', ⁵¹ na' gusaca zi'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate' lazxe'.

25

Da dxulé'e na ca naca chee chi nu'ula cuide'

¹ Gunná Jesús:

—Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'é xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. ² Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'. ³ Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegué'e lu xi' chee' ca'. ⁴ Nu'ula ban lazre' ca' belú'e xi' chee' ca', ne da za zxezxe na da xelegué'e na. ⁵ Lawe' da guzré benne' wechaga na', na' gulaca wase ca zaj naque', na' xúgute' gulasie'. ⁶ Dxela ben tu chi'i benne' dxebezre xe'e, dxenné': "Ba za' wechaga na'. Le dxuaj si' lu na'le le'." ⁷ Xúgute' nu'ula cuide' caní gulasé', na' gulezú lawe' bulugale' xi' chee' ca'. ⁸ Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelexula xi' cheentu'." ⁹ Nu'ula ban lazre' ca' belexechebe': "Quebe gaca, lawe' da che gúnnantu' late' chee, quebe gaca na da dxechínmentu' netu', ne da dxechínnele le'e. Le chjácala naga dxutié' na, ne le cheajxri chee." ¹⁰ Dxácaté zjaca

nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee wechaga na', na' bsezxuj dxa xu'u na'. ¹¹ Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." ¹² Le' bechebe': "Cabata'. Da líqueze quebe núnbe'a le'e."

¹³ Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

Da dxulé'e na ca naca chee benne' gulezí'e dumí

¹⁴ Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wən zrin chee' ca', ne bcá'analene' bi wən zrin ca' dumí chee'.

¹⁵ "Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xelezéquebe' xuluchínebe' na. Nadxa guzé'e zéaje' zitu'. ¹⁶ Bi wən zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. ¹⁷ Cá'anqueze bi wən zrin na' guzi'be' chupa cue' dumí, bezi'be' xechupa cue' dumí. ¹⁸ Bi wən zrin na' guzi'be' tu cue' dumí na' guxíajbe', ne bcáchebe' dumí chee xránabe' tu lu xedxu da benbe' lu xu.

¹⁹ "Zane' iza ba guca gate bezrín xrane bi wən zrin ca', na' guzú lawe' dxezi'e da bdee' lu na' bi wən zrin ca'. ²⁰ Nedxu bzrin bi wən zrin na' guzi'be' gazxu' cue' dumí, na' bnézrujbe' xránabe' xegazxu' cue' dumí, na' gúzrebe' le': "Xran, bənnu' neda' gazxu' cue' dumí. Nigá de xegazxu' cue' da bezi'a nen dumí chiu'." ²¹ Na' xránabe' guzre' lebe': "Da chawe' bənu'. Nacu' tu bi wən zrin xrlátaje, ne li lazre'. Gucu' li lazre' lu late' da bənna' lue', na' gúnnaqueza' lue' da zréndxaqueze. Guxú'u naga zua' neda', ne gubélé'e." ²² Gudé na' bzrin bi wən zrin na' guzi'be' chupa cue' dumí, na' gunabe': "Xran, bənnu' neda' chupa cue' dumí. Nigá de xechupa cue' da bezi'a nen dumí chiu'." ²³ Na' xránabe' guzre' lebe': "Da chawe' bənu'. Nacu' tu bi wən zrin xrlátaje, ne li lazre'. Gucu' li lazre' lu late' da bənna' lue', na' gúnnaqueza' lue' da zréndxaqueze. Guxú'u naga zua' neda', ne gubélé'e." ²⁴ Gate bzrin bi wən zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'. ²⁵ Chee le' na' bzreba', na' guxá'a xeajcáchia' dumí chiu' lu xu. Nigá de da naca chiu'." ²⁶ Na' xránabe' guzre' lebe': "Nacu' bi wən zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'. ²⁷ Chee le' na' la xju'u dumí chia' na' lu na' benne' dxelízruje' chee

dumí da dxuluchínene', na' gate za' neda', na' xezi'a da naca chia' nen da belezí'e." 28 Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bènea' nape' chi cue' dumí. 29 Benne' nape' wazidxe' da zrendxa, na' benne' quebe nape', ca late' da du na' nape' wecá'a na. 30 Ca naca bi wen zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'ate lázxabe'."

Ca gun Dios gate guchi'e chee bènneache zaj zre'e xezr la xu

31 Na' gunná Jesús:

—Gate xelá'a neda', Benne' Gulje' Bènneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. 32 Na' bènneache chee xúgute cue' xezr la xu xelexezrague' lawa' neda', na' xebéaja' cha chee' ca dxun benne' dxuxúe' zrila'. xebéaje' chíbudu ca' ládujla zrila' ca'. 33 Guzrá'a benne' ca' zaj naca zrila' chia' chalá'a xabela chia', na' benne' ca' zaj naca ca chíbudu ca' guzrá'a le' chalá'a xéglala chia'. 34 Nadxa xapa' benne' ca' zaj zra' chalá'a xabela chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' bene' xezr la xu nigá. 35 Caní dxaca lawe' da guduna', na' bgágule neda'. Gubíleda', na' bènnae da gu'a. Gudá' ca tu benne' xu'e neza, na' gulu'ule neda' lízrele. 36 Bxázejda' zra lana' gácua', na' bgácule neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'." 37 Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebílenu', na' bènnanu' da gu'u? 38 ¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexázejnu' zra lanu', na' bgácuntu' Lue'? 39 ¿Bata bènentu' quebe chawe' zu', u xu'u lizre xia, na' bedajná bantú' Lue'?" 40 Neda' xechéba': Da li dxapa' le'e, ca da benle chee bènnedu caní, benne' zaj naca dxexruj lazre', chee néda'queza' benle ca'.

41 Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da calela lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. 42 Caní dxaca lawe' da guduna', na' le'e quebe bènnae da gawa'. Gubíleda', na' quebe bènnae da xí'aja'. 43 Gudá' ca tu benne' xu'e neza, na' quebe gulu'ule neda' lízrele. Bxázejda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'. 44 Nadxa benne' ca' xeléqueze' neda': "Xran, ¿bata blé'entu' Lue' dxedunu', u dxebílenu', u xu'u neza, u dxexázejnu' zra lanu', u quebe chawe' zu', u xu'u

lizre xia, na' quebe gúcalentu' Lue'?" ⁴⁵ Neda', benne' wenná bea, xecheba': Da li dxapa' le'e, lawe' da quebe bi benle chee binnedu caní, benne' zaj naca dxexruj lazre', quebe bi benle chee néda'queza'. ⁴⁶ Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

26

Dxelílaje' ájala xelele' Jesús

(Mr. 14.1-2; Lc. 22.1-2; Jn. 11.45-53)

¹ Gate bexuzre bchalaj Jesús caní, na' guzre' benne' ca' dxusedene':

² —Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaje' bèneache chee' lu xezr la xu Egipto, na' neda', Benne' Gulje' Bèneache, xuludé' neda' lu na' benne' xuludé'e neda' xaga béguaj.

³ Ca lu zra na' benne' xíchaje ca' chee bxruze ca', ne benne' dxuluxuzájle'e da bdxixruj Moisés, ne benne' gula sina ca' chee judío ca', belezrague' chale'aj chee xu'u zaca chee Caifás, bxruze blau. ⁴ Na' belílaje' ájala xelele' Jesús lu da wen lazre' chee xelútie' Le'. ⁵ Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

Tu nu'ula dxegu'e Jesús da dxelá zixre

(Mr. 14.3-9; Jn. 12.1-8)

⁶ Zua Jesús xezre Betania lizre Simón, bènea' güe'ene' we' guzru'. ⁷ Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e na xichaj Jesús. ⁸ Gate belelé'e benne' ca' dxusede Jesús da nigá, na' belezré'e, ne gulezú lawe' dxelenné':

—¿Bizr chee na' guzría xi' da nigá? ⁹ Da nigá waca la gudá'u na sí'adxu da zrente, chee gácaleđxu benne' xache' ca'.

¹⁰ Jesús benne' da nigá, na' guzre' benne' ca':

—¿Bizr chee na' dxunle nu'ula nigá zede? Da nigá bene' naca na tu da xrlátaje. ¹¹ Benne' xache' ca' tu zrázqueze' ládujla le'e, na' neda' quegá tu súaleza' le'e. ¹² Ca naca da ben nu'ula nigá, gulu'e da zixre na' bel-la' dxen chia', naca na da xucá'ana chawe na neda' chee zra gachia' lu xedxu ba. ¹³ Da li dxapa' le'e, gáteteze xuluchálaje' dizra' chawe' chia' nigá du gabí'i xezr la xu, na' zralajqueze ca da ben nu'ula nigá, chee cheajlesá lazre' bèneache le'.

Judas dxechebe lazre' gudé'e Jesús

(Mr. 14.10-11; Lc. 22.3-6)

¹⁴ Nadxa tu benne' chazrinnu ca' dxusede Jesús, bénnea' le' Judas Iscariote, guxiájə' xeajchálajləne' benne' xíchajə ca' chee bxruze ca'. ¹⁵ Guzre' le':

—¿Ájate gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata. ¹⁶ Ca lu zra na' guzú lau Judas dxexíajə' ájala gunə' gudéə' Jesús lu na' benne' ca'.

*Da dxágudxu chee xucúbedxu ca guca gate gute Xránadxu
(Mr. 14.12-25; Lc. 22.7-23; Jn. 13.21-30; 1 Co. 11.23-26)*

¹⁷ Zra nedxu chee laní na' gate na' dxelawə' xeta xtila da quebe nachixre cua zichaj chee na, benne' ca' dxusede Jesús belezrine' lau Le', na' buluchəbe' Le':

—¿Gazra dxaca lazru' gucuézentu' da gágudxu chee laní pas-cua chee benne' judío?

¹⁸ Jesús guzre' le':

—Le chjaca lu xezre na', naga zua lizre tu benne', na' le xe'e: "Bennea' dxusédene' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda'."

¹⁹ Benne' ca' dxusede Jesús belunə' ca da gunná bé'ene' le', na' bulucueze' da xelawə' chee Laní Pascua.

²⁰ Gate gula chizrela, na' gudxé' Jesús ga gawə' tu zren nen benne' ca' dxusédene'. ²¹ Dxácatə na' dxelawə', guzre Jesús benne' ca':

—Da li dxapa' le'e, tule le'e naca bénnea' gudéə' neda' lu na' benne' ca' dxelunə' da calela.

²² Nadxa benne' ca' belexewí'inelə'e, na' gulezú lawə' tu tue' dxuluchəbe' Jesús:

—Xran, ¿quebe naca neda'?

²³ Na' bechəbe Jesús:

—Bénnea' dxudé ne'e lu xé'ena tu zren nen neda', benne' na' gudéə' neda'. ²⁴ Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudéə' neda'. Cháwedxa naca la quebe gulaj bénnea'.

²⁵ Nadxa gunná Judas, bénnea' gudéə' Jesús, dxenné':

—Benne' dxusede, ¿quebe naca neda'?

Na' bechəbe Jesús, gunné':

—Awe', lue' na'.

²⁶ Dxácatə dxelawə', Jesús guqué'e xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédene', dxenné':

—Le gagu. Da nigá naca na bel-la' dxen chia'.

²⁷ Gudé na' guqué'e tu zriga, na' guzre' Dios: "Xcalenu'", na' bnézruje' na benne' ca', dxenné':

—Le xi'aj xúgutele da xuzru lu zriga' nigá. ²⁸ Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunite lau Dios dul-la zaj nabaga benne' ca'. ²⁹ Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

Jesús dxenné' nna Pedro quebe núnbe'e Le'

(Mr. 14.26-31; Lc. 22.31-34; Jn. 13.36-38)

³⁰ Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'. ³¹ Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': "Gutia' benne' dxuxúe' zrila', na' zrila' ca' xelase dínnajba'." ³² Gate te xebana' neda', cha'a neda' ga nababa Galilea nédxudxa ca le'e.

³³ Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

³⁴ Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

³⁵ Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

Jesús dxuchálajlene' Dios naga zaj zxe' xaga olivo ca' nazi le na Getsemaní

(Mr. 14.32-42; Lc. 22.39-46)

³⁶ Nadxa bzrin Jesús nen benne' ca' dxusedene' tu lataj nazi le na Getsemaní, na' guzre' le':

—Le cue'e nigá dxácatē cha'a neda', guchálajlena' Dios.

³⁷ Jesús guché'e Pedro, ne dxúpatē zri'ine Zebedeo, na' guzú lawe' bewi'inele'ene' ne guzúale'e stebe. ³⁸ Nadxa guzre' benne' ca':

—Dxewi'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

³⁹ Nadxa Jesús guzé'e zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

⁴⁰ Nadxa bezrín Jesús naga zaj zra' benne' ca' dxusedene', na' blé'ene' benne' ca' dxelásiē, na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? ⁴¹ Le nnaze, ne le guchálajle Dios chee quebe

gun zréaje da xriwe' le'e. Da li bénne'du xu'ule dxaca lázre'lē'e na, san lu bēla' dxen chee'le dxate ni'a na'le.

⁴² Da gudxupe' lasa guxíaj Jesús bchálajlē' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

⁴³ Ca gudé na' bezrine', ne belé'ene' benne' ca' dxusédenē', dxelásiē' lawe' da ba dxeleZRude' lawe' dxelaca wásele'e.

⁴⁴ Bca'ane' benne' ca', guzé'e zéaje' bchálajlē' Dios da gux-unne' lasa, na' gunnáqueze' ca da ba gunné' ca'an bache.

⁴⁵ Nadxa bezrine' naga zaj zra' benne' ca' dxusédenē', na' guzre' le':

—Le gase na'a, ne le xezí' lazre'. Ba bzrin zra gate neda', Benne' Gulje' Bénneache, tea' lu na' benne' dul-la ca'. ⁴⁶ Le chasa, ne le chu'u. Ba za bēnea' dxudé' neda'.

Dxelechē'e Jesús ca tu benne' wen da zrinnaj

(Mr. 14.43-50; Lc. 22.47-53; Jn. 18.2-11)

⁴⁷ Ne dxuchálajte Jesús na' gate bzrin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje' ca' chee' bxruze ca', ne benne' gula sina ca' chee' judío ca'. ⁴⁸ Judas, bēnea' dxudé' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—Bēnea' gunupa' neda', Le' na'. Le che'e ca tu benne' wen da zrinnaj.

⁴⁹ Nadxa bzrin Judas lau Jesús, dxenné':

—Diuzre, Benne' dxusede.

Na' bnupe' Jesús.

⁵⁰ Bechebe Jesús:

—Ljwezra', ¿bi chee' za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

⁵¹ Tu benne' ca' dxusede Jesús guléaje' xia chee', ne guchugue' chalá'a naga bi wen zrin chee' bxruze blau.

⁵² Nadxa Jesús guzre' le':

—Begú'u xia chiu' lu zre na, lawe' da xúgute' benne' dxelute benne' nen xia nalá, cá'anqueze gate le'. ⁵³ ¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee' xabáa, zaj naque' zánete' tu tu cue'?

⁵⁴ Na'a che ca'an guna', ¿ájazra gaca gaca na ca da naxúaj na lu xiche chee' Dios, da dxenná na caní dxal-la' gaca na?

⁵⁵ Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee' quélale neda', dxunle neda' ca tu benne' gubán. Xúgute' zra

gudxe'a neda' lu xudau' dxusédeda' le'e, ne quebe gudélale neda'. ⁵⁶ Xúgute da caní dxaca na chee gaca na ca da gulenná benne' ca' buluchálaje' waláz chee Dios, da na' naxúaj na lu xiche chee Dios.

Nadxa xúgute benne' ca' dxusede Jesús bulucá'ane' Le' tuze', buluxuzrúnnuje'.

Dxezrín Jesús lau benne' ca' chee xu'u lawe' blau chee judío ca'

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bdixruj be'e Moisés, nen benne' gula sina ca'. ⁵⁸ Pedro zéaje nawe' Jesús zítu'la, na' bzrine' chale'aj chee lizre bxruze blau, na' guxú'e, ne gudxé'e tu zren nen bi xa'aga chee lé'ene' ájala xexuzre da dxaca na'.

⁵⁹ Benne' xíchaje ca' chee bxruze ca', ne benne' gula sina ca', ne xúgute benne' ca' chee xu'u lawe' blau chee judío ca' belílaje' ájala xuluzría xi'e Jesús, lácala naca na da wen lazre', chee xelezéqueñe' xuludée' Le' gatie'. ⁶⁰ Quebe bi belezrelne', lácala belezrín benne' zan benne' gulenné' da wen lazre' chee Jesús. Naga xeajsete na belezrín chupa benne' wen lazre'. ⁶¹ Dxelenné':

—Benne' nigá gunné': “Wazéqueda' neda' guchínnaja' xudau' chee Dios, na' xexuna' na lawe' chunna zraze.”

⁶² Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

⁶³ Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

⁶⁴ Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabela chee Dios nen xel-la' szren chee', na' xelá'a lu beuj bza chee xabáa.

⁶⁵ Nadxa bxruze blau gucheze' zra lane' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínnedxadxu benne' xechebe'? Ba bénquezle le'e ca dizra' schanni' dxenné'.

⁶⁶ ¿Bi dxennale le'e?

Benne' ca' gulenné':

—Nabague' zria, ne dxal-la' gatie'.

⁶⁷ Nadxa buluzré'e zrene' lau Jesús, ne belú'e Le', na' xeballe' belegape' dxu'a lawe'. ⁶⁸ Na' gulé'e Le':

—¿Nácaquezu' Lue' Cristo? Gunné xa'a nu be Lue'.

Dxenná Pedro quebe núnbe'e Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Dxácate na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'aqueze lue' nacu' Jesús, benne' Galilea na', tuze.

⁷⁰ Pedro ben chúchue' xrtizre' lávela xúgute benne' ca', gunné':

—Quebe nezda' nu chee na' dxennú'.

⁷¹ Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'aqueze benne' nigá dxedále' Jesús, benne' Nazaret na'.

⁷² Xecha lasa ben chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

⁷³ Xetú chí'idau' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bénnea' lawe' da xel-la' dxenné chiu' dxunna bea na lue'.

⁷⁴ Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácate na' gudxezre xjeaj. ⁷⁵ Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

27

Dxelech'e Jesús lau Pilato

(Mr. 15.1; Lc. 23.1-2; Jn. 18.28-32)

¹ Gate guxaní', xúgute benne' xíchaje ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee xelúti'e Jesús. ² Nadxa beleché'e Le' nadxéaje', ne xejlegu'e Le' lau Poncio Pilato, benne' dxenná be'e waláz chee xezr la xu Roma.

Ca guca gate gute Judas

³ Nadxa Judas, bénnea' bde'e Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje ca' chee bxruze ca', ne benne' gula sina ca'. ⁴ Dxé'e le':

—Neda' bēna' dul-la lawe' da bdea' tu benne' naque' du lazre' chee gati'e.

Belexechebe benne' xíchaje ca':

—¿Bizra naca cheentu' da nigá? Chiu' lue' naca da na'.

⁵ Nadxa Judas buzalē' dumí na' lu xudau', ne bezé'e, na' xeajxelú'u du lbe'e.

⁶ Benne' xíchajē ca' chee bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

⁷ Nadxa belunē' tuze dízra' xelá'awē' tu xēzr la xu nen dumí na' da nazí le na xēzr la xu chee wēn xesu' zruaga, chee gaca na tu lataj naga xelegache benne' zitu'. ⁸ Chee lē na' nazí le xēzr la xu na' Xēzr La Xu Chee Dxen ca lu zra na'a zra. ⁹ Caní guca na chee gaca ca da gunná Jeremías, benne' bchálajē' waláz chee Dios, gunné': “Gulequē'e chi dxua dumí plata da naca na da zaca Le' da buluzúa benne' Israel. ¹⁰ Nen dumí na' belá'awē' xēzr la xu chee benne' wēn xesu' zruaga, cáteze gunná be'e Xrana' neda'.”

Dxezrín Jesús lau Pilato

(Mr. 15.2-5; Lc. 23.3-5; Jn. 18.33-38)

¹¹ Guleché'e Jesús lau bēnnea' dxenná be'e waláz chee xēzr la xu Roma, na' lē' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

¹² Gate benne' xíchajē ca' chee bxruze ca', ne benne' gula sina ca' gulawē' zria chee Jesús, na' Le' quebe bi bechebe'.

¹³ Nadxa gunná Pilato, dxē'e Jesús:

—¿Quebe dxennu' ca da dxelenná benne' caní chiu'?

¹⁴ Jesús quebe bi bechebe'. Ca'an guca bebanne bēnnea', ne quebe bezrela lazre' ájala nne'.

Dxelechugue' chee Jesús gatiē'

(Mr. 15.6-20; Lc. 23.13-25; Jn. 18.38—19.16)

¹⁵ Gate dxu'u laní na', bēnnea' dxenná be'e na' xu'u lawe' dxusanē' tu benne' wēn da zrinnaj, núteteze benne' dxelaca lazre' benne' ca'. ¹⁶ Ca lu zra na' xu'u tu benne' lizre xia, benne' wēnle'e da zrinnaj, nazí lē' Barrabás. ¹⁷ Ca zaj nazraga benne' ca' na', Pilato bchebe' lē':

—¿Nuzra dxaca lázrele gusana' neda'? ¿Gusana' Barrabás, che Jesús, bēnnea' lē' Cristo?

¹⁸ Caní gunné' lawe' da ba nézene' buludēe' Jesús lawe' lē' lawe' da dxelaque' xa lazre' chee Jesús.

¹⁹ Dxácatē na' dxe' Pilato naga dxuchi'e chee bēnneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da guneda' xēla ba dxēle, da bzúalē'e na neda' stēbe ne chee Le'.”

²⁰ Benne' xíchajē ca' chee bxruze ca', ne benne' gula sina ca' belegú'u xelē' benne' ca' chee xelenabe' la Barrabás, ne gate

Jesús. ²¹ Bénnea' dxenná be'e bchálajlęę' benne' ca' xecha lasa. Bucheḃe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

²² Pilato bcheḃe' benne' ca':

—¿Bizra guna' cheę Jesús, benne' le' Cristo?

Xúgute' belexecheḃe':

—Bde'e xaga béguaj.

²³ Nadxa gunná Pilato, dxę'e benne' ca':

—¿Bizra da calela nune'?

Benne' ca' gulezú lawe' dxelebezre xę'e, gulenné':

—Bde'e xaga béguaj. Bde'e xaga béguaj.

²⁴ Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lówela benne' ca', dxenné':

—Quebe bi dul-la nabaga' cheę xel-la' gute cheę benne' xrlátaje nigá. Naca na cheęle le'e.

²⁵ Xúgute' benne' ca' belexecheḃe':

—Netu', ne zrí'inentu' nabáantu' ca naca cheę xel-la' gute chee'.

²⁶ Nadxa Pilato bsane' Barrabás, ne gunná bé'ene' beleché'e Jesús cheę xelu'e Le', na' bdeę Le' cheę te'e xaga béguaj.

²⁷ Nadxa benne' dxjaque' wedil-la cheę bénnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. ²⁸ Belequé'e zra lane', ne bulugácue' Le' tu ladxe' bzawe. ²⁹ Buluzú'e xíchaje' tu da naca na zruze xaga xече', ne buluguxre' Le' tu xaga ne'e xabeła. Nadxa buluzú zribe' lau Jesús, ne belún le' cheę', dxelenné':

—Gaca xabáa chiu', Wenná Bea cheę judío ca'.

³⁰ Cá'anqueze buluzré'e Le' zrene', na' gulequé'e xaga da nuxru Jesús, ne guline' na xíchaje'. ³¹ Ca gudé belún le' cheę Jesús, na' belexegü'e ladxe' bzawe, na' buluxugácue' Le' zra lánaqueze'. Nadxa beleché'e Le' cheę te'e xaga béguaj.

Dxuludé'e Jesús xaga béguaj

(Mr. 15.21-32; Lc. 23.26-43; Jn. 19.17-27)

³² Ca gusiá'que' na', belexezrague' tu benne' xęzre Cirene, le' Simón, na' gulenná bé'ene' le' bi'e xaga béguaj cheę Jesús.

³³ Ca'an guca belezrine' tu lataj nazí le na Gólgota, da dxen-nadxu, Lataj Cheę Zrita Xichaj Benne' Gate. ³⁴ Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

³⁵ Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na cheę xelexelé'e ca

naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na." ³⁶ Nadxa gulebé'e dxuluzuzre' Jesús. ³⁷ Buluzríe' xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

³⁸ Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabela, ne xetúe' chalá'a xéglala ga da' xaga béguaj chee Jesús. ³⁹ Benne' dxeledé'e na' dxelún le' chee Jesús. Dxulutá xíchaje', ⁴⁰ ne dxelenné':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

⁴¹ Cá'anqueze belún la chee' benne' xíchaje' ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

⁴² —Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'. ⁴³ Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

⁴⁴ Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

Ca guca gate gute Jesús

(Mr. 15.33-41; Lc. 23.44-49; Jn. 19.28-30)

⁴⁵ Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. ⁴⁶ La ná'queze Jesús gudxezre xe'e, dxenné':

—Elí, Elí, ¿lama sabactani?
(Da nigá zéaje na: Dios chia', Dios chia', ¿bizr chee na' nusán lazru' neda'?)

⁴⁷ Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

⁴⁸ Dxácaté na' guzá' chegu tu benne' ca', xeajxrí'e tu da dxezrupe nisa, na' ca bsebise' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na. ⁴⁹ Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

⁵⁰ Xecha lasa gudxezre xa'a Jesús, na' gutie'. ⁵¹ Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. ⁵² Gulexalaj ba, na' belexebán benne'

gate ca', benne' guléajle'e da naca chee Dios. ⁵³ Ca gudé bebán Jesús, na' benne' caní belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

⁵⁴ Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezicadxa da ca'an gulaca, na' belezrébele'e, dxelenné':

—Da lítegaze benne' nigá guque' Zri'ine Dios.

⁵⁵ Nu'ula zan zaj zre'e na' dxelenné'e zítu'la, nu'ula ca' xjácale'ne' Jesús gate bezé'e ga nababa Galilea, ne gulácale'queze' Le'. ⁵⁶ Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

Dxulucache' Jesús lu xedxu ba

(Mr. 15.42-47; Lc. 23.50-56; Jn. 19.38-42)

⁵⁷ Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajle'queze' chee Jesús. ⁵⁸ Benne' nigá guxíaje' xeajchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. ⁵⁹ Nadxa José bequé'e bel-la' dxen na', na' bchele' na tu ladxe' da naxadxe. ⁶⁰ Nadxa gulu'e Le' lu ba da naca na cheéqueze José na', da bene' tu lu xiaj. Gulexru'e tu xiaj blaga zren dxu'a ba chee Jesús, na' bezé'e ga na'. ⁶¹ Gulezrá' María Magdalena, ne xetú María, zaj dxe'e le nna' dxu'a ba na'.

Dxulubia dxuluxe' ba chee Jesús

⁶² Zeaj zra xula, da naca na zra ca gudé zra bulucueze', na' benne' xíchaje' ca' chee bxruze ca', ne benne' xudau' fariseo ca' belezrine' lau Pilato. ⁶³ Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zu'e. Gunné' gate gaca chunna zra, na' xebane' ládujla benne' gate. ⁶⁴ Chee le' na', bdixruj be'ene' benne' ca' xulubia xuluxe' ba chee' na' cadxa gaca chunna zra, chee quebe xeledá' benne' ca' bsédené' xedajlexebéaje' bel-la' dxen na' chizrela, na' te na' xuluzenne' bèneache ba bebane' ládujla benne' gate. Che ca'an gaca, na' dizra' wen lazre' bzébe nigá gun na da zrinna' zrendxa ca da nedxu.

⁶⁵ Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se' lau séquele.

⁶⁶ Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

28

*Ca guca gate bebán Jesús**(Mr. 16.1-8; Lc. 24.1-12; Jn. 20.1-10)*

¹ Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xea-jlenné'e ba chee Jesús. ² Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. ³ Gubáz na' dxácatite legale', ne naca chiche zra lane' ca bezxe'. ⁴ Gate belelé'e benne' dxjaque' wedil-la gubáz chee xabáa na', na' belezrine' xel-la' dxelezrebe, ne belexegá'ane' ca benne' gate ca'. ⁵ Nadxa gunná gubáz chee xabáa na', dxé'e nu'ula ca':

—Quebe zrébele. Nezda' dxexílajle Jesús, bènnea' gudé'e xaga béguaj. ⁶ Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. ⁷ Le cheajxáquezega, le cheajezre benne' ca' bsédené' ba bebane' ládujla benne' gate, na' chéaje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

⁸ Nadxa nu'ula ca' besiá'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguezre' benne' ca' bséde Jesús. ⁹ Dxácaté na' Jesús bchague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. ¹⁰ Le' guzre' nu'ula ca':

—Quebe zrébele. Le chjaca, le cheajezre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

Ca da gulenná benne' dxjaque' wedil-la

¹¹ Dxácaté zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje' ca' chee bxruze ca' ca da guca. ¹² Benne' xíchaje' ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente. ¹³ Dxelenné':

—Le nna le'e belelá' benne' ca' bséde Jesús na' chizrela, dxácaté dxásele le'e, na' belexexú'e bel-la' dxen chee'. ¹⁴ Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca chee le'e.

¹⁵ Nadxa benne' dxjaque' wedil-la gulezí' lu ne'e dumí na', na' besiá'que' belune' ca' bache zaj nézene'. Da nigá naca na ca dxelenná judío ca' zéajte lu zra na'a zra.

*Jesús dxesel-le' benne' gubáz chee' ca'**(Mr. 16.14-18; Lc. 24.36-49; Jn. 20.19-23)*

¹⁶ Nadxa xjaca benne' chinéaj ca' bséde Jesús, na' belezrine' lu xi'a naga ba guzre Jesús le'. ¹⁷ Gate belelé'ene' Jesús, na'

bulucá'ana szrene' Le'. Bal-le' gulaca chupa lazre'. ¹⁸ Nadxa Jesús gubigue' naga zaj zra' benne' ca', na' guzre' le':

—Neda' ba nazi' lu na'a ca naca xel-la' dxenná bea xabáa, ne lu xezr la xu nigá. ¹⁹ Chee le na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. ²⁰ Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgutę zra cadxa cheajsé chee xezr la xu nigá. ¡Ca'an gaca na!

DIZRA' CHAWÉ' CA NACA CHEE JESUCRISTO DA BZUAJ SAN MARÇOS

*Da bchalaj Juan, benne' bchue' bénneache nisa
(Mt. 3.1-12; Lc. 3.1-9, 15-17; Jn. 1.19-28)*

¹ Caní guzú lau dizra' chawé' ca naca chee Jesucristo, Zri'ine Dios.

² Bzrin lazre' da bzuaj Isaías, benne' bchálaje' waláz chee Dios, ca da gunná Dios:

¡Le nna'xque nigá!

Neda' dxesel-la' benne' gubáz chia', benne' cuía lawe' lau Lue'. Bénnea' gupé'e neza naga teu' chee ilúnbe'e bénneache Lue'.

³ Welénqueze chi'i benne' dxebezre xé'e le'e xixre' lawe' lataj. Dxenné': "Le gupá'a neza naga te Xránadxu lu xichaj lázrdaule. Le xebéaj li neza lase chee' ca'."

⁴ Caní guca lawe' da bla' Juan le'e xixre' lawe' lataj, na' bchálaje' dizra' chee Dios, ne gunné' dxal-la' xeledxúa bénneache nisa, na' bchue' le' nisa, benne' ca' belexebí'i lazre' chee gunité lau Dios dul-la da zaj nabague'.

⁵ Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xegu Jordán, benne' ca' gulexrúalepe' dul-la da zaj nabague'.

⁶ Caní guca zra lana Juan. Gucue' zra lané' ladxe' xicha zra camello, bia dxelebía bénneache, ne tu xpádxue' xide bchela le'e. Dxawé' biche xuaj, ne dxé'aje' bzrina'dau' chee bézudau'.

⁷ Ca dxuchálaje' dizra' chee Dios, dxenné':

—Gate te chia' neda', na' xida xetú benne', bénnea' nápadxe' xel-la dxenná bea ca neda'. Quebe naca chia' xáchua' chee lechja' zrelé'. ⁸ Da lítega, neda' bchua' le'e nisa. Le' gune' da zéaje xel-la dxedxúa nisa nigá, guzúe' Be' Lá'azxa lu xichaj lázrdaule.

*Ca da guca gate gudxúa Jesús nisa
(Mt. 3.13-17; Lc. 3.21-22)*

⁹ Ca da guca lu zra ca', guzá' Jesús lu xezre Nazaret chee ga nababa Galilea, na' bzrine' lau Juan. Juan nigá bchue' Jesús nisa lu xegu Jordán. ¹⁰ Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxulé'e lawe' ca tu bgúgudu chiche, na' bzrine' ca li xichaj Jesús. ¹¹ Ben tu chi'i da za xabáa, da dxenná na:

—Lue' nacu' Zri'ina'. Nazrí'ida' Lue', ne dxezaca ba lázrelda' Lue'.

Dxaca lazre' Satanás da xriwe' gun ga бага Jesús dul-la
(Mt. 4.1-11; Lc. 4.1-13)

¹² Nadxa Be' Lá'azxa guché'e Jesús le'e xixre' lawe' lataj.
¹³ Guzúa Jesús le'e xixre' lawe' lataj chua zra chua xela. Na' bzrin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalene' Jesús.

Jesús dxezú lawe' dxusédenē' bēnneache
(Mt. 4.12-17; Lc. 4.14-15)

¹⁴ Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajlene' bēnneache dizra' chawe' ca dxenná bea Dios. ¹⁵ Gunná Jesús:

—Ba bzrin zra. Ba zua báguze gate nna bea Dios xezr la xu nigá. Chee le na', le xebí'i lazre', ne le cheajli lazre' dizra' chawe' nigá.

Dxenné Jesús tapa benne' wezén bela chee xelaque Le' tuze
(Mt. 4.18-22; Lc. 5.1-11)

¹⁶ Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzalē' xixruj bela chee' lu nísadau' lawe' da zaj naque' wezén bela.
¹⁷ Na' gunná Jesús:

—Le gun neda' tuze, na' guzúa' le'e gácale wen zrin chia'. Cheajxrile bēnneache ca dxunle dxezenle bela.

¹⁸ La bulucá'anatē' xixruj chee' ca', na' zjácálene' Jesús.

¹⁹ Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre'e lu da dxedá lawe' nísadau', dxelexexunē' xixruj bela chee' ca'. ²⁰ Ca gunné Jesús Jacobo, ne Juan, na' la bulucá'anatē' xre' Zebedeo ne wen zrin chie' ca' zaj zre'e lu da dxedá lawe' nísadau', na' zjácálene' Jesús.

Tu benne' xu'e be' xriwe'
(Lc. 4.31-37)

²¹ Gate gul-la na gulu'e lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédenē' benne' ca' zaj zre'e na'. ²² Belexebánene' ca naca da dxuséde Jesús le' lawe' da dxuchálajē' nen dutē xel-la dxenná bea, ne quegá ca dxuluchalaj benne' ca' dxuluxuzájle'e da nadxixruj bea Dios. ²³ Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bēnneā'. ²⁴ Gunná na:

—¿Bizra nápantu' chiu', Jesús, benne' Nazaret? ¿Za'u guzría xi'u netu'? Ba nézquezda' nu nacu'. Benne' Lá'azxa chee Dios nacu'.

²⁵ Jesús gudil-le' na, gunné':

—Zrize guzúa. Bedxúaj lu bel-la' dxen chee benne' nigá.

²⁶ Nadxa be' xriwe' na' bxrízele'e na bénnea', ne gudxezre xá'alé'e na, na' bedxúaj na. ²⁷ Belexebánele'e xúgute benne' zaj zre'e na', dxelé ljwezre':

—¿Bizra dizra' cube da nigá? Dute xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

²⁸ La bzrílujte dizra' chee xel-la waca chee Jesús du ca naca xezre ca' zaj nababa Galilea.

Jesús dxexune' xrna' zru'ula Pedro

(Mt. 8.14-15; Lc. 4.38-39)

²⁹ Ca belexedxúaje' lu xu'u na' chee judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. ³⁰ Lu xu'u na' de xrna' zru'ula Simón, xu'e da la. La buluchálajlete' Jesús ca dxaca chee nu'ula nigá. ³¹ Le' la bérxute' ne'e, bechise' le'. La bedxúajte da la da xu'e, na' bseni'e da gulawe'.

Jesús dxexune' bénneache zan

(Mt. 8.16-17; Lc. 4.40-41)

³² Ca gula guzré zra na', ca guzría gubizra, na' guleché'e xúgute benne' we' lau Jesús, ne benne' ca' zaj xu'e be' xriwe'.

³³ Ca naca benne' xezre gulebigue' dxa xu'u naga zua Jesús.

³⁴ Jesús bexune' zánete benne' we' ca zaj naca xízrawe' da xu'u tu tu'e, ne bebéaje' zane' be' xriwe' zaj xu'u bénneache ca'. Quebe be'e lataj be' xriwe' ca' xelenné na lawe' da zaj núnbea na Le'.

Dxuchalaj Jesús lau bénneache zaj zre'e Galilea

(Lc. 4.42-44)

³⁵ Ca bebán Jesús bál-lala, ne nachúl-late, bedxúaje' guzé'e zéaje' tu lataj naga nadache' bénneache, na' bchálajlene' Dios.

³⁶ Simón Pedro, ne benne' ca' zaj zrálene' le' belexexílaje' Jesús.

³⁷ Ca xeajlexraque' Jesús, na' gulé'e Le':

—Xúgute bénneache dxelexexílaje' Lue'.

³⁸ Na' gunná Jesús:

—Chéajdxu xezre walizre ca' chee guchálajlena' benne' ca' xrtizra Dios. Chee le' na' belja'.

³⁹ Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee ga nababa Galilea, bchalaj Jesús dizra' chee Dios, ne bebéaje' xízrawe' xriwe' ca' da zaj xu'u benne' we' ca'.

Jesús dxexune' tu benne' dxé'ene' xízrawe' guzru'

(Mt. 8.1-4; Lc. 5.12-16)

⁴⁰ Nadxa bzrin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

⁴¹ Jesús bexache lazre' le', na' bli ne'e, gudané' le'. Dxenné':

—Dxaca lazra'. Na'a dxexacu'.

⁴² Ca gunné' caní, la becuásate xízrawe' na', na' begá'ane' chawe'. ⁴³ Nadxa Jesús bsízrene' le', na' besel-le' le'. ⁴⁴ Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xelexexaque'. Caní gunu' chee xeledé'ene' ba bexacu' na'a.

⁴⁵ Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénneache chee xúgute xezre ca' belezrine' lau Jesús naga zue'.

2

Jesús dxexune' tu benne' quebe gaca se'e

(Mt. 9.1-8; Lc. 5.17-26)

¹ Ca gudé chupa chunna zra, na' guxú'u Jesús xecha lasa lu xezre Capernaum. Belénne bénneache zua Jesús tu lu xu'u. ² La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. ³ Na' belezrin tapa benne' lu xu'u naga zua Jesús, zaj nu'e tu benne' quebe gaca se'e. ⁴ Lawe' da quebe gulezéquene' xelezrine' lau Jesús, lawe' da zaj zra' bénneache zante ga na', na' gulesáluje' chju'u chee xu'u naga zua Jesús. Na' bululétaje' da'a da zrua benne' na' quebe gaca se'e. ⁵ Lawe' da dxeque be'e Jesús ca dxelejli lazre' benne' ca' Le', na' gunné', dxe'e bénnea' quebe gaca se'e:

—Zrí'ina'dau', ba nanite lau dul-la da nabagu'.

⁶ Zaj dxe'e bal-la benne' ga na', benne' dxuluxuzájle'e da nadxixruj bea Dios, na' gulenné lanze': ⁷ —¿Bizr chee na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunité lau dul-la da zaj nabaga bénneache? Tuze Dios na'. ⁸ Dxeque be'e Jesús lu lázrdawe' ca dxelenné lane' chee', na' gunné':

—¿Bizr chee na' dxéquele caní? ⁹ ¿Bizra dizra' quebe naca na sté'bela xapa' benne' nigá quebe gaca se'e? ¿Naca na sté'be xapa' le', ba nanite lau dul-la nabagu'? Cabí. ¿U che sté'be xapa' le', bexasa, becá'a da denu', ne bexíaj? ¹⁰ Na'a, chee nézele le'e neda', Benne' Gulje' Bénneache, napa' xel-la dxenná bea lu xezr la xu gunité lawa' dul-la da zaj nabaga bénneache.

Na' gunná Jesús, dxe'e bénnea'.

¹¹ —Lue' dxapa', bexasa, becá'a da'a chiu', ne bexíaj lizru'.

¹² Ca'an guca, la bexasaté', na' bequé'e da'a chee', ne bedxúaje' lau xúgute bénneache. Ca'an guca, xúgute benne' ca' belexebánene', na' belúe lá'ane' Xránadxu Dios. Dxelenné':

—Cabata' ne lé'edxu gaca na ca guca da nigá.

Dxenné Jesús benne' le' Leví
(Mt. 9.9-13; Lc. 5.27-32)

¹³ Ca gudé na' bedxúaj Jesús zéajé' dxu'a nísadau', na' xúgute bénneache lu xezre ca' belezrine' lau Le'. Nadxa bsédene' benne' ca' xrtizra Dios. ¹⁴ Ca gudé Jesús na', ble'ene' Leví, zri'ine Alfeo, dxé'e lataj chee wechizruj. Na' gunná Jesús, dxé'e le':

—Ben neda' tuze.

La guxásate Leví, guxíajlene' Jesús.

¹⁵ Ca' guca, gate gudxé' Jesús dxawé' lizre Leví, na' zánete benne' wechizruj, ne benne' dul-la ca' gulebé'e dxelágulene' tu zren nen Jesús, ne benne' ca' dxusédene'. Caní naca lawe' da zjácale benne' zante Jesús. ¹⁶ Nadxa benne' ca' dxuluxuzájle'e da nadxixruj bea Dios, ne benne' fariseo ca', gate belelé'ene' ca da dxun Jesús, dxágulene' benne' wechizruj ca', ne benne' dul-la ca', na' gulenné', dxelé'e benne' ca' dxusede Jesús:

—¿Bizra da nigá? Dxagu dxé'ajlene' benne' wechizruj ca', ne benne' dul-la ca'.

¹⁷ Ca ben Jesús da nigá, gunné':

—Benne' chawe' ca' quebe dxelechínene' benne' dxexún bénneache. Benne' we' ca' dxelechínene' bènea'. Quegá bla'a dxennéa' benne' xrlátaje ca'. Benne' dul-la ca' dxennéa'.

Ca dxal-la' xelún bénneache gate dxelune' gubasa
(Mt. 9.14-17; Lc. 5.33-39)

¹⁸ Ca guca lu zra na', belún gubasa benne' ca' dxusede Juan, ne benne' ca' dxulusede benne' fariseo ca'. Na' belezrín benne' ca', bedajleguezre' Jesús:

—¿Bizr chee na' dxelún gubasa benne' ca' dxusede Juan, ne benne' ca' dxulusede benne' fariseo ca', na' benne' ca' dxusédenu' Lue' quebe dxelune' gubasa? ¿Bizr chee na'?

¹⁹ Na' Jesús guzre' benne' ca':

—¿Waca xelún gubasa benne' zaj zre'e laní chee wechaga na' dxácaté na' zua benne' wechaga na' nen le'? Dxácaté na' zua wechaga na' nen le' quebe gaca xelune' gubasa. ²⁰ Wazrín tu zra gate dua benne' wechaga na'. Lu zra na' xelune' gubasa.

²¹ 'Quegá nu benne' xudé'e tu ladxe' cube le'e zradxu gula. Che ca'an gune', ladxe' cube da xudé'e wazrube xu na da gula, na' wachézadxa na. ²² Cá'anqueze, quegá nu benne' que'e xrise uva wal-la cube lu bzude xide gula. Che ca'an gune', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

Benne' ca' dxuseḁe Jesús dxelíchajē' dau chee zrua' xtila zra dxulupá'ana judío ca'

(Mt. 12.1-8; Lc. 6.1-5)

²³ Gate gudé Jesús naga ze zrua' xtila zra dxulupá'ana benne' judío ca', ná'atē na' benne' ca' dxuseḁe Jesús, ca zaj xu'e neza, gulezú lawe' dxelíchajē' dau naga zria zrua' xtila. ²⁴ Nadxa benne' fariseo ca' gulé'e Jesús:

—Gunná'xque. ¿Bizr chee na' dxelunē' zrin da quebe dxal-la' xelunē' zra dxupá'anadxu?

²⁵ Jesús guzre' benne' ca':

—¿Cabata' ne gulábale ca da ben David gate gudunē', ne bxázejene' da gagu le', ne da gugawe' benne' ca' zaj zrálene' le'?

²⁶ Guxú'e lu xu'u chee Dios gate naca Abiatar bxruze blau, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca chee' xelawe' na. Na' bnézrujte David da gulagu benne' ca' zrálene' le' chee xeta xtila na'.

²⁷ Cá'anqueze gunná Jesús, dxē'e benne' ca':

—Dios gudíxruje' zra dxupá'anadxu chee gaca ba neza chee bénneache, quegá bene' bénneache chee xelunē' zrin chee zra dxupá'anadxu. ²⁸ Chee le' na', neda', Benne' Gulje' Bénneache, naca' xrane zra dxupá'anadxu.

3

Ca guca chee tu benne' nazrinnaj ne'e

(Mt. 12.9-14; Lc. 6.6-11)

¹ Gate guxú'u Jesús da xula lu xu'u naga dxelúe lá'ana judío ca' Dios, ze tu benne' biu nazrinnaj ne'e ga na'. ² Judío ca' buluzre' Jesús che xexunē' benne' we' nigá lu zra dxulupá'anē', chee xelezéquene' xelagu zria Jesús. ³ Nadxa gunná Jesús, dxē'e benne' biu na' nazrinnaj ne'e:

—Guxasa. Guzé laduj benne' caní.

⁴ Nadxa gunaba Jesús lau judío ca', dxē'e le':

—¿Naca chee zra dxupá'anadxu gundxu da xrlátaje, u che gundxu da calēla? ¿Waca gupá'adxu xel-la nabán chee nu benne', u che guzría xidxu xel-la nabán chee'?

Na' gulezúa zrize judío ca'. ⁵ Nadxa Jesús gunná zi'e benne' ca'. Bewí'inene' ca naca xel-la lázrdau zide' chee'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. ⁶ Ca'an guca, belexedxúaj benne' fariseo ca', na' belunē' xel-la wezría nen benne' ca' zaj de'e Herodes ájala xelútiē' Jesús.

Bénneache zan dxelezrague' dxu'a nísadau'

⁷ Nadxa gucuasa Jesús laduj benne' ca', na' guxiájə' dxu'a nísadau' nen benne' ca' dxusédene'. Zjácalə benne' zan ca' Jesús, benne' cheə xəzre ca' zaj nababa Galilea. ⁸ Gate belén bənneache ca naca da zren ca' da dxun Jesús, belezrín benne' zan lau Lə', benne' cheə xəzre ca' zaj nababa Judea, ne benne' xəzre Jerusalén, ne benne' cheə xəzre ca' zaj nababa Idumea, ne benne' gusá'aque' xechalá'a xəgu Jordán, ne benne' gusá'aque' xəzre ca' zaj naxechaj na xəzre Tiro, ne xəzre Sidón. ⁹ Cheə lə na' gunná be'e Jesús benne' ca' dxusédene' xulucueze' tu da dxedá lawe' nísadau' checa xuluchide' bənneache zan Lə'. ¹⁰ Caní guca lawe' da bexún Jesús benne' zante, na' benne' wə' ca' gulebigue' lau lə' cheə cheajleté' Lə'. ¹¹ Gate be' xriwə' ca' zaj xu'u bənneache belelé'e na Jesús, na' buluzú zribe na lau Lə', ne gulebezre xa'a na. Dxelenná na:

—Lue' nacu' Zri'ine Dios.

¹² Jesús gudil-lə' be' xriwə' ca' cheə quebe xululé'e na da naca Lə'.

Jesús dxenné' chazrinnu gubáz cheə'

(Mt. 10.1-4; Lc. 6.12-16)

¹³ Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Lə'. ¹⁴ Bchague' chazrinnu benne' xelunə' Lə' tuze, benne' sel-lə' cheajlechálajə' xrtizra Dios. ¹⁵ Bzue' lu na' benne' caní xel-la dxenná bea cheə xelexexunə' benne' wə' ca', ne cheə xelexebéajə' be' xriwə' ca' lu bəl-la' dxen cheə bənneache ca'. ¹⁶ Benne' chazrinnu caní zaj lə':

Simón, bənnea' bzua Jesús xetú lə' Pedro,

¹⁷ ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús lə' Boanerges, da zéajə na benne' wal-la ca guziu'.)

¹⁸ Bchague' Andrés ne Felipe, ne Bartolomé, ne Mateo, ne Tomás, ne Jacobo zri'ine Alfeo, ne Tadeo, ne Simón, benne' dxue lázrele'ə cheə lazriə',

¹⁹ ne Judas Iscariote, bənnea' xudéə' Jesús lu na' benne' ca' dxeledábague' Lə'.

Nu benne' dxenné' schanni' cheə Be' Lá'azxa

(Mt. 12.22-32; Lc. 11.14-23; 12.10)

Ca gudé na' bzrin Jesús tu lu xu'u nen benne' ca' dxusédene'. ²⁰ Xecha lasa gulebiga bənneache zan naga zua Jesús, na' québedxa dxaca lataj xelawə'. ²¹ Gate belene benne' xrtia Jesús ca da dxun Lə', na' belezrine' cheə xelexeché'ə lə'. Dxelenné':

—Quebe zua xrlátaje xichaj lázrdawə'.

²² Cá'aqueze benne' ca' dxuluxuzájle'ə da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne chee xrane be' xriwe' ca' dxebéaje' be' xriwe' ca'.

²³ Nadxa gunné Jesús benne' ca', na' bchálajlene' le' tu da dxulé'e na. Dxenné':

—¿Wazeque Satanás da xriwe' xebéaj cuine na? ²⁴ Che benne' dxelenná bea xelexaque' chupa la'a, quebe díaqueze xel-la dxenná bea chee'. ²⁵ Cá'anqueze che benne' zaj zre'e tu lu xu'u xelaque' chupa la'a, quebe xeledíaqueze benne' zaj zre'e lu xu'u na'. ²⁶ Cá'anqueze, che Satanás tábaga cuínaqueze na, ne xexaca na chupa la'a, quebe díaqueze na. Wadéqueze chee na.

²⁷ 'Quebe nu seque chu'u lizre benne' wal-la chee cuane' da de chee' che quebe guchéaje' le' nédxula. Nadxa seque' cuane' da de lizre benne' wal-la na'.

²⁸ 'Da li dxennía', dxapa' le'e: Xúgute dul-la da dxelún bénneache, ne dizra' schanni' da dxelenné', ájateze zaj naca na, gunite láuqueze Dios chee'. ²⁹ Na'a, ca naca núteteze benne' nne' schanni' chee Be' Lá'azxa, cabata' gunite lau Dios chee bénnea'. Webía xí'queze'.

³⁰ Caní gunná Jesús lawe' da dxelenné':

—Zraga Jesús da xriwe'.

Nu naca ca xrna Jesús, ne bi biche' ca'

(Mt. 12.46-50; Lc. 8.19-21)

³¹ Ca gudé na' bzrin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. ³² Benne' ca' zaj zre'e cuita Jesús gulé'e le':

—Xrna'u ne bi bichu' ca' zaj ze' chalé'ajla, dxelenné' Lue'.

³³ Gunná Jesús, dxe'e benne' ca':

—¿Nézele nuzra na' xrna'a, ne bi bicha' ca'?

³⁴ Nadxa gunná Jesús benne' ca' zaj zre'e cuita Le', na' gunné':

—Benne' caní zaj zrálene' neda' nigá zaj naque' ca xrnáqueza', ne bi bicha' ca'. ³⁵ Caní naca na lawe' da xúgute benne' dxelune' ca da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

4

Da dxulé'e na ca naca chee benne' dxaza dxa'ana

(Mt. 13.1-23; Lc. 8.4-15)

¹ Xetú lasa guzú lau Jesús dxusédené' benne' ca' dxu'a nísadau', na' belezraga bénneache zante naga zue'. Naxánle'e benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé'e lu'ule da dxedá lawe' nísadau', na' bénneache zan ca' gulezré'e dxu'a nísadau'. ² Nadxa bchalaj Jesús da dxululé'e na, na' bsédené' benne' ca' da zante. Ca dxusédené' benne' ca', na' bchálaje' caní:

³ —Le xene da nigá. Tu benne' dxaza dxa'ana zéaje' guza.
⁴ Ca zéaje' dxaze', na' xeajlechaze bal-la binnedu ca' dxu'a neza. Na' belezrín bxinne, ne guláguba' binnedu caní. ⁵ Xezícadxa binnedu ca' xeajlechaze na lu xiaj naga quebe déteca xu. Binnedu caní belezría na lawe' da quebe déteca xu. ⁶ Ca bdxuaj gubizra, na' bzezxe na le na, na' lawe' da quebe zaj nun lue na lu da situj, gulebizre na. ⁷ Xezícadxa binnedu ca' xeajlechaze na naga dxelezría xixre' xeche'. Xixre' xeche' caní gulegúladxa na ca le na, na' bululule na le na, na' quebe gulebía na da gágudxu. ⁸ Xezícadxa binnedu ca' xeajlechaze na lu xu bebe. Belezría na cháwedau', na' belegula na, ne gulezríale'e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

⁹ Gunnadxa Jesús, dxé'e benne' ca':

—Che nu benne' zua nague', dxal-la' xenne' da nigá.

¹⁰ Ca gude' na', ca gucuasa Jesús cuita benne' zan ca', na' gulenaba benne' ca' zrále'ne' benne' ca' dxusede Jesús bi zéaje' ca naca da dxulé'e nigá. ¹¹ Na' gunná Jesús, dxé'e benne' ca':

—Dios dxunne' le'e lataj nézele ca naca chee da nagache chee da dxenná bea Le'. Na'a, ca naca chee benne' ca' zaj zre'e cúzrela, dxuchálajle'na' le' dízra'ze da dxulé'e na. ¹² Caní dx-una' lawe' da dxelenné'e, na' quebe dxelaca lazre' xeledé'ne'. Dxelenne', na' quebe dxelaca lazre' xeléajni'ine', chee quebe xelexebí'i lazre', na' chu'u xel-la wenite lau chee dul-la da za nabague'.

¹³ Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dizra' ca' da dxululé'e na? ¹⁴ Benne' dxaza dxá'ane' naque' benne' dxuchálaje' xrtizra Dios. ¹⁵ Bal-la bèneache zaj naque' ca binnedu ca' xeajlechaze na dxu'a neza. Dxelenne' xrtizra Dios, na' ca dxedé na', dxezrín Satanás, na' dxucuasá na dizra' nigá da zua na xichaj lázrdau benne' ca'. ¹⁶ Benne' xula ca' zaj naque' ca binnedu ca' xeajlechaze na lu xiaj. Ca dxelenne' xrtizra Dios, na' dxelebéle'ne' dxelezi'e na. ¹⁷ Tu chí'idauze dxelune' caní. Gate dxeledé' xel-la zi', ne zua da dxedábaga le' ne chee xrtizra Dios, na' dxelexeuase' lawe' da quebe guxaze xrtizra Dios lú'ulete xichaj lázrdawe' ca guca chee binnedu ca' quebe belún lue na lu xu situj. ¹⁸ Benne' xula ca' zaj naque' ca binnedu ca' xeajlechaze na ládujla xixre' xeche' ca'. Dxelenne' xrtizra Dios. ¹⁹ Lawe' da dxelebe'dxe' gunne xue da naca chee xezr la xu nigá dxezi' xé xel-la gunní'a le', na' dxelezá lazre' da zante da xeleledé'ne'. Xúgute da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. ²⁰ Zaj zra' benne' dxelenne' xrtizra Dios,

ne dxeleží' lu ne'e na. Bal-le' zaj naque' ca binnedu ca' gulebía na chi dxua tu tu na. Benne' xula zaj naque' ca binnedu ca' gulebía na ga xun tu tu na. Benne' xula zaj naque' ca binnedu ca' gulebía na tu gaxúa tu tu na.

Xúgute da nagache gulé'e lawe na
(Lc. 8.16-18)

²¹ Cá'anqueze gunná Jesús, dxé'e benne' ca':

—¿Gúadxu xi', ne guzúadxu na zran xi'ina u che zran ga dxásedxu? Quebe gundxu ca', san guzúadxu na sibe chee gusení na. ²² Xúgute da nagache gulé'e lawe na, na' xúgute da xu'u xichaj lázrdaudxu wénqueze na. ²³ Che nu benne' zua nague', dxal-la' xenne' da nigá.

²⁴ Cá'anqueze gunná Jesús:

—¡Le xene xanne' ca da dxénele! Ca da dxudxírele, nen le na' gudxírequeze Dios chee, na' gúnnadxé' le'e dxénele. ²⁵ Caní gaca na, benne' nape' da naca chee xrtizre'e, gunézrujdxé' chee', na' benne' quebe bi nape', ca da dauze da nape' xecá'ate' na.

Da dxulé'e na ca naca chee binne da dxegula na

²⁶ Na' gunnáqueze Jesús:

—Da dxenná bea Dios naca na ca da dxaca gate tu benne' dxaze' binnedu ca' lu xu. ²⁷ Dxásié' chizrela, dxase' te zra, na' binnedu caní dxelezría na, ne dxelegula na, ne quegá nézene' ájala. ²⁸ Dxaca na caní lawe' da nácaqueze ca da dxun xezr la xu. Nedxu dxebía na xrlegue na, nadxa za dau, na' bzébeté dxebía na binnedu ca' lu dau. ²⁹ Gate ba gulegula xíxredu caní, na' dxechugue' na lawe' da ba bzrin zra xequé'e na.

Da dxulé'e na ca naca chee binne mostaza
(Mt. 13.31-32; Lc. 13.18-19)

³⁰ Cá'anqueze gunná Jesús:

—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le na? ³¹ Naca na ca tu binne mostaza da dxázadxu lu xu. Binnedu nigá nácadxa cuide' ca da zaj nnita lu xezr la xu. ³² Gate ba gúzadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácate dxelebía bxinnedu ca' zran zrula chee na.

Ca bgune Jesús da dxulé'e na caní
(Mt. 13.34-35)

³³ Caní bsede Jesús benne' ca' xrtizra Dios, na' bchálaje' zánete da dxululé'e na caní, cadite guléajni'ine'. ³⁴ Quebe bchálaje' da xula. Tuze dizra' da dxulé'e na bchálajlene' benne' ca'. Bzájla'adxé' ca naca na benne' ca' dxusédené'.

Jesús dxebeche zrië' be' bdunu'

(Mt. 8.23-27; Lc. 8.22-25)

³⁵ Lu zra ná'queze, ca gul-la chizrela, na' gunná Jesús, dxë'e benne' ca' dxusédene':

—Chéajdxu xecha la'a nísadau'.

³⁶ Besá'aque' naga zaj zra' benne' zan ca', na' guleché'e Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga zaj zra' benne', na' xjálaleñe' Le'. ³⁷ Nadxa guzú lau dxaca tu be' bdunu' lu nísadau' na', na' dxu'ute nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. ³⁸ Jesús de' dxasië' lu xcúgüë' naga nácadxa sibe lu da dxedá lawe' nísadau'. Na' bulusebane' Jesús, dxelë'e Le':

—Benne' wesede, ¿quebe dxe'u gunne xue wátedxu nate ca na'a?

³⁹ Nadxa guxasa Jesús, na' bchálajleñe' be' bdunu', ne nísadau'. Dxenné':

—¡Gudxé zri'! ¡Zrize guzúa!

Gudxé zri' be' bdunu', na' nísadau' guzúa zri na. ⁴⁰ Nadxa gunná Jesús, dxë'e benne' ca' dxusédene':

—¿Bizr cheë na' dxezrébele'ele le'e? ¿Quebe dxeajlí lázrele Dios?

⁴¹ Belezrébele'edxe', ne dxelë ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' cheë'.

5

Tu benne' xezre Gadara, benne' xu'e be' xriwe'

(Mt. 8.28-34; Lc. 8.26-39)

¹ Bezrín Jesús, tu zren nen benne' ca' dxusédene' xecha la'a nísadau' lu xezr la xu cheë benne' Gadara ca'. ² Ca bedxúaj Jesús lu da dxedá lawe' nísadau', na' bzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. ³ Benne' biu nigá zúaqueze' lu bluaj na'. Quebe nu dxezúe guchéaj lebe' chalásaze, lácala nu guchéaj lebe' nen du xia. ⁴ Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'eng' lebe'. ⁵ Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. ⁶ Gate ble'ebe' zítu'la ba za Jesús, na' guzá chégube', xeajzú zríbebe' lau Le'. ⁷ Gunné zizraj be' xriwe' xu'ube', dxë na Jesús:

—¿Bizra dxaca chiu' nen neda', Jesús, Zri'ine Dios szrente? Lu La Xránadxu Dios, dxata' xueda' Lue', quebe gudéu' neda' xel-la zi'.

⁸ Caní gunná na lawe' da gunná Jesús, dxë'e na:

—Lue', da xriwe', bedxúaj lu bel-la' dxen chee benne' nigá.

⁹ Nadxa gunaba Jesús, dxē'e na:

—¿Bi leu'?

Na' bechebe na:

—Da Zan lea', lawe' da naxantu'.

¹⁰ Guta' xue na Jesús chee quebe xesel-le' na, ne quebe gucuase' na zitu' lu xezr la xu na'. ¹¹ Zaj zra' gagu lu xi'a na' tu cue' cuche zaj zra'ba' dxeláguba'. ¹² Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' leba'.

¹³ Nadxa Jesús be'e na lataj. Na' be' xriwe' ca' beledxúaj na lu bēnea', na' gulú'u na cuche ca'. Zaj nácaba' ca galaj gaxúa cuche ca', na' buludxixre cuínaba' tu chejéa. Xeaajlechástēba' lu nísadau', ne gulátetēba' lu nisa na'.

¹⁴ Benne' ca' dxuluxúe' cuche ca' buluxuzrúnnuje', na' xea-jlezenne' benne' zaj zre'e lu xezre, ne benne' zaj zre'e le'e xixre'. Na' belezrín benne' ca' naga zua Jesús, benne' ca' belenne' ca da ba guca. ¹⁵ Gate belezrín benne' ca' naga zua Jesús, na' belelé'enē' bēnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lárdaube', na' gulezrebe'. ¹⁶ Benne' ca' belelé'e ca naca da guca chee benne' guxú'ube' be' xriwe' ca', ne ca guca chee cuche ca' buluchálaje' chee da ba guca. ¹⁷ Nadxa benne' xezre ca' gulata' xuene' Jesús xedxúaje' lu xezr la xu chee'.

¹⁸ Ca bexú'u Jesús lu da dxedá lawe' nísadau', na' bēnea' guxú'ube' be' xriwe' ca' guta' xuebe' Jesús gu'e lataj chéajlebe' Le'. ¹⁹ Quebe be' Jesús lebe' lataj, san dxē'e lebe', gunné':

—Bexiaj lizru', ne xeaajchálaje' xrtiu' ca' ca naca da zren ca' da ben Xranu' nen lue', ne ca bexache lazre' lue'.

²⁰ Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute benne' zaj zre'e xezre ca'.

*Bi nu'ula chee Jairo, ne nu'ula na' xeajté' zra lana Jesús
(Mt. 9.18-26; Lc. 8.40-56)*

²¹ Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'anē' dxu'a nísadau'. ²² Ca'an guca bzrin tu benne' xíchaje chee xu'u naga dxelúe lá'ana judío ca' Dios, benne' le' Jairo. Gate blé'enē' Jesús, na' bzu zribe' zran ni'e. ²³ Guta' xuene' Jesús, dxē'e Le':

—¿Bi nu'ula chia' ba dxátebe! ¡Gudá, bze na'u lebe' chee xexácabe', ne xaca banbe'!

²⁴ Nadxa guxíajle Jesús bēnea', na' bēneache zan xjácálene' Le', ne dxuluchíteē' Le'. ²⁵ Ládujla bēneache ca' za tu nu'ula quebe chawe' zuē', ba zeaj chazrinnu iza nape' we' dxen.

²⁶ Da zren da bulusaca benne' dxelexún bénneache ca' nu'ula nigá, na' bache ben dítajé' xúgute da nape'. Quegá bi gúcale na le', san bzáladxa we' chee'. ²⁷ Gate ben nú'ula' dxuluchalaj bénneache ca naca chee Jesús, na' bzrine' cúzrula Jesús ládujla bénneache, na' xeajté' zra lana Jesús. ²⁸ Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. ²⁹ La gulézaté xel-la we' chie', ne la guque bé'etene' ba bexaca bel-la' dxen chee' chee xízrawe' na'. ³⁰ Gúquebe'e Jesús ben zrin xel-la waca chee'. Chee le' na' bexéchaje', dxenné'e bénneache ca', na' gunábene' le':

—¿Nuzra bedajtá zra lana'?

³¹ Nadxa benne' ca' dxusede Jesús gulé'e Le':

—Dxelé'eqeznu' bénneache zan dxuluchie' Lue'. ¿Bizr chee na' dxenabu': "Nuzra bedajtá neda'?"

³² Jesús guzúe' dxenné'e cuite' chee lé'ene' nua' bedajtá Le'.

³³ Nadxa guxíaj nu'ula nigá, dxezrízie' dxezrebe' lawe' da nézene' ca da ba guca chee', na' bzu zribe' lau Jesús, na' gunné' ca naca da li. ³⁴ Nadxa gunná Jesús, dxé'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatequezu' chee xízrawe' da guzxacu'.

³⁵ Ne dxuchálajte Jesús gate belezrín benne' gusá'aca lizre benne' xíchaje chee xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee na' dxunu' zédedxa benne' dxusede nigá?

³⁶ Gate Jesús benne' ca da gulenná benne' caní, dxé'e benne' xíchaje chee xu'u na', gunné':

—Quebe zrebu'. Guxeajlí lazre' neda'.

³⁷ Quebe be'e lataj chjácále bénneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. ³⁸ Ca belezrine' lizre benne' xíchaje na', na' ble'e Jesús bénneache dxelún schaga. Dxelebezre benne', ne dxelebezre xa'ate'. ³⁹ Nadxa guxú'u Jesús lu xu'u, na' dxé'e benne' ca', gunné':

—¿Bizr chee na' dxunle schaga? ¿Bizr chee na' dxebézrele? Quegá nate bidau' nu'ula. Dxásezebe'.

⁴⁰ Belún lala benne' ca' chee'. Nadxa Jesús bebéaje' xúgute benne' ca', na' guché'e xrabe', ne xrna bidau' nigá, ne benne' ca' zjácále' Le', na' guxú'e naga de nú'uladu na'. ⁴¹ Bóxru'e na'be', ne guzre' lebe':

—Bi nú'uladau', lue' dxapa': ¡Guxasa!

⁴² La bexásate nú'uladu na', na' guzátebe' lawe' da ba zéajbe' chazrinnu iza. Na' benne' ca' zaj zre'e lu xu'u na' belezrébele'e.

43 Jesús gunná bé'ene' benne' ca' chee quebe nu xelé'e ca da bene'. Nadxa guzré' benne' ca' xulugawé' nú'uladu na'.

6

Dxezrín Jesús lazrié' da nacan xezre Nazaret
(Mt. 13.53-58; Lc. 4.16-30)

¹ Jesús bezé'e naga zué', ne bezrine' lazrié', na' benne' ca' dxusédené' xjácálene' Le'. ² Ca gula zra dxulupá'ana judío ca', na' bezú lau Jesús dxusédené' benne' ca' zaj zré'e lu xu'u naga dxelúe lá'ana judío ca' Dios. Bénneache zan belenne' chee', ne belexebánene', dxelenné':

—¿Gazra bsede benne' nigá ca nácate? ¿Bizra xel-la sina da nunezruj Le', ne xel-la waca zren caní da dxuné'? ³ ¿Quegá benne' nigá gubizre xaga, zri'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'anqueze zaj zrálene' dxi'u?

Chee le na' quebe guléajle'e chee Jesús. ⁴ Na' gunná Jesús, dxé'e benne' ca':

—Xúgute benne' dxelape' ba lá'ana tu benne' dxuchálaje' waláz chee Dios, san benne' walázr chee' ca', ne benne' xrtie' ca', ne benne' zaj zré'e xu'u lizre' quebe dxelape' le' ba lá'ana.

⁵ Chee le na' quebe ben Jesús lazrié' na' netú xel-la waca zren. Tuze bexuné' bál-laze benne' wé' gate na' guxrúa ne'e xichaj benne' ca'. ⁶ Bebane Jesús lawe' da quebe guléajle'e chee'.

Jesús dxusel-le' benne' ca' dxusédené' cheajlechálaje' xrtizra Dios

(Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' bsédené' benne' zaj zré'e ga na'. ⁷ Gunné' benne' chazrinnu dxusédené', ne guzú lawe' dxesel-le' le' chupa weaje', ne bnézruje' le' xel-la waca xulucuase' be' xriwe' ca' lu bel-la' dxen chee bénneache ca'. ⁸ Gunná bé'ene' le' quebe bi xelu'e chee la neza, con tuze xaga da xuluchiche'. Quebe xelu'e xixruj xeta, ne xeta, ne dumí. ⁹ Waca xululáje' zrelé', ne xelácué' tu cueze zra lane'. ¹⁰ Gunnadxa Jesús, dxé'e benne' ca':

—Gate na' chu'ule le'e tu lu xu'u chee benne', waca xegá'anatele lizre bénnea' ca' zrindxa zra xezá'ale lu xezre na'. ¹¹ Che zrinle tu lu xezre naga quebe xuluxé lawe' le'e, ne quebe xelénene' cheele, waca xezá'ale, na' cuíbetele bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee bénneache, waxache' gácadxa da ba xa' da xeledé benne' xezre Sodoma, ne benne' xezre Gomorra

quézcala da xeledé benne' xezre ca' naga quebe buluzé nague' chee.

¹² Nadxa gusá'aca benne' ca' dxusede Jesús, na' buluchálajle' bèneache chee xelexebí'i lazre'. ¹³ Cá'anqueze belexebáje' zánete' be' xriwe' ca' lu bel-la' dxen chee bèneache ca', na' gulegüe'e da za zane' benne' we', na' belexexaque'.

Ca gute Juan, benne' bchue' bèneache nisa

(Mt. 14.1-12; Lc. 9.7-9)

¹⁴ Na' ben wenná bea Herodes ca' naca da zren ca' da dxun Jesús lawe' da guzé dizra' chee'. Bal-la benne' dxelenné':

—Juan, benne' bchue' bèneache nisa, bache bebane' ládujla benne' gate, na' chee le' na' nape' xel-la waca zren nigá.

¹⁵ Benne' xula dxelenné':

—Elías, bènea' bchálaje' waláz chee Dios benne' nigá.

Benne' xula dxelenné':

—Nácalje' bènea' dxal-la' xelá' guchálaje' waláz chee Dios, che nácalje' benne' gulasa, benne' bchálaje' waláz chee Dios.

¹⁶ Ca ben Herodes da caní, na' gunné':

—Benne' nigá naque' Juan, bènea' gunná be'eda' neda' gulechugue' xíchaje'. Benne' nigá ba bebane' ládujla benne' gate.

¹⁷ Caní gunná Herodes lawe' da gunná be'e le' buluzúe' Juan na' lizre xia, ne buluchéaje' le' du xia, da na' bene' lawe' da dxezrá'a Herodías le'. Herodías nigá guque' zru'ula Felipe, benne' biche Herodes. Herodes nigá bequé'e nu'ula' chee guque' zru'ule'. ¹⁸ Gunná Juan, dxé'e Herodes:

—Quebe dxal-la' súalenu' zru'ula bi bichu'.

¹⁹ Chee le' na' Herodías guzré'e Juan, ne guca lazre' gútete' le'. Quebe guca chee' ²⁰ lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' le'. Chee le' na' quebe be'e lataj Herodías na' gútete' Juan nigá, na' lácala quebe guxéajni'ine' ca' naca xúgute' da bchalaj Juan, Herodes nigá bze nague' chee' du lazre'. ²¹ Herodías na' bzrélene' ájala gune' ca' da dxaca lazre' gate na' guxú'u laní ca' gula la Herodes. Gulé'aj gulagu benne' xíchaje' ca', ne benne' dxelenná be'e lu wedil-la, ne benne' zaj naque' blau lu xezre ca' zaj nababa Galilea. ²² Nadxa guxú'u bi nu'ula chee Herodías na' lu xu'u naga dxelé'aj dxelawe', ne bxá'abe' lau benne' ca'. Bezaca ba lazre' Herodes ca' bxá'abe', ne tuze ca' belún benne' ca' zaj zra' dxelawe' tu zren nen le'. Gunná wenná bea Herodes, dxé'e nu'ula cuide' nigá:

—Gunaba neda' ca' da dxedánenu', na' gunna' na' chiu'.

²³ Guchebe lazre' Herodes, ne bzétaje' Dios gunézruje' bíteteze da nábabe', lácala nábabe' gáchajte naga dxenná be'e le'.

24 Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bénnea' bchue' bénneache nisa.

25 La guxu'ute nu'ula cuide' nigá naga zua wenná bea, na' gunabe', dxe'ebe' le':

—Dxaca lazra' gunnu' neda' na'a tu lu xé'ena xichaj Juan, bénnea' bchue' bénneache nisa.

26 Nadxa wenná bea nigá bewí'inele'e, ne lawe' da ba bzétaje' Dios, na' belénete benne' ca' da gunné', quebe guca lazre' guzruné' ca da gunaba bi nu'ula nigá. 27 Chee le' na' gusella wenná bea tu benne' dxeje' wedil-la, ne gunná bé'ene' le' cheajrí'e xichaj Juan na'. 28 Guxíaj benne' nigá lu xu'u lizre xia, na' bdxixre' xichaj Juan na', ne bexu'e na tu lu xé'ena. Bnézrujte' na bi nu'ula na', na' lebe' bnézrujbe' na xrnabe'.

29 Gate gulénneze benne' ca' da nigá, benne' ca' bsede Juan, na' xeajlexerí'e bel-la' dxen chee', na' xeajlecácheté' na.

Jesús dxugawe' chi xun gaxúa benne' biu

(Mt. 14.13-21; Lc. 9.10-17; Jn. 6.1-14)

30 Ca gudé na' belexezrín benne' gubáz ca' chee Jesús naga zua Le', ne buluzenne' Le' xúgute ca da beluné', ne ca da bulusédené' benne' ca' naga xjaque'. 31 Nadxa gunná Jesús, dxe'e benne' ca':

—Le chu'u. Chéajdxu xezí' lázredxu chadite' naga xu'u lataj.

Gunné' caní lawe' da dxesá'aca benne' dxesá'aca, ne dxellexezrín benne' dxellexezrín, na' quebe dxelu'e lataj xelawe'.

32 Nadxa Jesús ne benne' gubáz chee' ca' belexexú'e leze' tu lu da dxedá lawe' nísadau', na' belezrine' tu lataj naga quebe nu chilá' benne'. 33 Benne' zan ca' belelé'ene' ca' zjaque', ne belexexúnbe'e Jesús, na' gusá'aca chégüe' xjá'aque' na'. Benne' xúgute xezre ca' belezrine' lataj na' nédxudxa ca Jesús. 34 Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le' lawe' da zajzre'e ca zrila' ca' quebe zua benne' dxuxú'e leba'. Na' guzú lawe' dxusédené' benne' ca' da zante. 35 Ca gula guzré', belezrín benne' ca' dxusede Jesús lau Le', na' gulé'e Le':

—Ba dxaca waxrinne, na' quegá nu lizre benne' zua lataj nigá. 36 Besel-la benne' caní chee cheajxaque' xezre ca' zaj nnita gálaze chee xelezí'e xeta xelawe' lawe' da quebe bi de nigá da xelawe'.

37 Na' gunná Jesús, dxe'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee chupa gaxúa zra chee gugágudxu benne' zan caní?

³⁸ Na' gunná Jesús, dxē'ē lē':

—¿Bal-la xeta xtila nápale? Le cheajnná'.

Ca gulénézene', na' gulenné', dxelé'ē Jesús:

—Gazxu' xeta xtila, ne chupa béladau'.

³⁹ Nadxa gunná be'e Jesús gulebé'e xúgute bēnneache ca' tu cue' weaj lu xrguie xa'a. ⁴⁰ Na' gulebé'ē tu cue' weaj, du tu gaxúe', du chi xune'. ⁴¹ Nadxa Jesús bēxrue' gazxu' xeta xtila ca', ne da chupa béladau'. Na' guchisa lawe' xabaala, gunabē' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédene' chee gulísie' na chee benne' ca'. Cá'anqueze gudísie' da chupa béladau' chee xúgute benne' ca'. ⁴² Na' gulagu xúgute' ne gulélajte'. ⁴³ Nadxa buluxutubē' ca da begá'ana chee xeta xtila, ne chee béladu ca', na' guca chazrinnu xcuite xca'a. ⁴⁴ Benne' ca' gulawe' xeta xtila ca' zaj naque' chi xun gaxúa benne' biu.

Dxezá Jesús lawe' nísadau'

(Mt. 14.22-27; Jn. 6.16-21)

⁴⁵ La gunná bé'ete Jesús benne' ca' dxusédene' gulu'e lu da dxedá lawe' nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácatē Le' dxuzé' dízra' bēnne' ca'. ⁴⁶ Ca gudé bze' dízra' benne' ca', na' guzé'ē zéajē' lu xi'a zeajchálajlēne' Dios. ⁴⁷ Gate gula guxrinnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. ⁴⁸ Gate blé'ene' ca dxelezraga lawe' dxulusé'ē da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zre'ē, dxezé'ē lawe' nísadau' na', ne guca lazre' téē' lau da dxedá lawe' nísadau' na'. ⁴⁹ Gate belelé'ene' Le' ze'ē lawe' nísadau' na', guléquene' da dxedá dxēla, na' gulebezre xe'e. ⁵⁰ Belelé'e xúgute' ca dxezé'ē lawe' nísadau', na' belezrébele'ē. Na' gunná Jesús, dxē'ē benne' ca' dxusédene':

—Ga zrēbele. Neda' nigá. Le gun chuchu lázrele.

⁵¹ Nadxa guluén Jesús lu da dxedá lawe' nísadau' naga zaj zre'ē, na' guleza be' na'. Na' guleque zréajene', ne belexebánele'ene', ⁵² lawe' da quebe ne xelájni'ine' ca naca xel-la waca zren da bēne' chee xeta xtila ca', lawe' da ne dxun zide' xichaj lázrdawe'.

Ddexún Jesús benne' we' ca' lu xezre Genesaret

(Mt. 14.34-36)

⁵³ Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'. ⁵⁴ Ca beledxúaje' lu da dxedá lawe'

nísadau', la belexexúnbeate bēnneache ca' Jesús. ⁵⁵ La gusá'aca chégute' zjaque' lu xezre ca' xeajlexrí'e benne' we' ca' tu tu lu ta'a, na' zeajlegüé'e le' naga zaj nézene' xedé Jesús. ⁵⁶ Gáteteze xézredu ca', ne xezre ca', ne le'e xixre' naga dxedé Jesús, na' buluzúe' benne' we' ca' du la neza, ne gulata' xuene' Jesús gunézruje' lataj cheajletaze' zra lane', na' xúgute' benne' ca' xeajleté' zra lane' belexexácate'.

7

Da dxucá'ana sban bēnneache
(Mt. 15.1-20)

¹ Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezríne' lau Jesús. ² Benne' caní belelé'ene' ca' dxelún bal-la benne' dxusede Jesús, dxelawe' xeta ne quebe zaj naxibe ne'e ca' dxelenná bea benne' xudau' ca'. Chee le' na' gulenná benne' Jerusalén ca':

—Zaj naca sban na' benne' ca' dxusede Jesús.

Nadxa gulezí tizre' le'.

³ Caní gulenná benne' ca' lawe' da zjácale' benne' xudau' fariseo ca', ne xúgute' benne' judío ca' ca' naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. ⁴ Gate zjaque' lawe' xi'a wa'u, ca' dxelexezrine' quebe dxelawe' xeta che quebe xelibe ne'e ca' zaj nadxixruj bea benne' xudau' ca'. Cá'anqueze dēdxá da zante' da zjácalene', ca' xexadxe zriga' da dxelé'aje', ne zruaga, ne zriga xé'ena, ne da naga dxelásie'. ⁵ Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulenábene' Jesús:

—¿Bizr chee na' quebe zjácale' benne' ca' dxusédenu' ca' naca da gulún benne' gula? Dxelawe' xeta, zaj naca sban ne'e.

⁶ Na' bechebe Jesús:

—Láweze dxunle da xrlátaje. Lu lázrdaule xu'ule da calela. Cháwedau' bchálajqueze Isaías ca' nácale le'e gate na' bzuaje' caní:

Bēnneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na' neda'.

⁷ Níteze naca xel-la ba lá'ana da dxelu'e neda', lawe' da dxulusédene' da zaj nadxixruj bea bēnneacheze.

⁸ Caní naca xca', le'e dxuzúale chalá'ala ca' da nadxixruj bea Dios, na' zéajlele ca' naca da gulún bēnneache ca' dxíbele zruaga, ne zriga' chee, ne zánete' da caní da dxunle.

⁹ Na' gunnadxe', dxé'e benne' ca':

—Chalá'ala dxuzúale ca' da nadxixruj bea Dios chee zéajlele ca' naca da tu dxúnzquezle. ¹⁰ Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne'

schanni' chee xre', che xrne'e, con gátequeze bénnea'." ¹¹ Le'e dxennale, "Che tu benne' xe'e xra xrne'e: Corbán," da zéaje na, quebe gaca gácalena' le'e lawe' da bache bnézruja' chee Dios ca naca da de chia'. ¹² Che ca'an dxenné', nadxa le'e québedxa dxu'ule le' lataj gácalene' xra xrne'e. ¹³ Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezle dxunle zánete da zaj naca na caní.

¹⁴ Xecha lasa gunné Jesús bénneache ca', na' gunné', dxe'e le':
—Le guzé nágale xúgutele, ne le chéajni'i. ¹⁵ Netú da dxe'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le na' dxucá'ana na le' sban. ¹⁶ Le'e zua nágale, le xene.

¹⁷ Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédené' gulenábene' Le' ca naca chee da dxulé'e nigá. ¹⁸ Nadxa gunná Jesús, dxe'e le':

—¿Cá'unqueze le'e quebe dxéajni'ile? ¿Quebe dxéajni'ile xúgute da dxe'aj dxagu bénneache quebe seque gucá'ana na le' sban ¹⁹ lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxe'aj dxágudxu. ²⁰ Na' gunnadxe':

—Ca naca da dxedxuaj na lu xichaj lázrdau bénneache, le na' dxucá'ana na le' sban ²¹ lawe' da lu xichaj lázrdau bénnea' dxeledxúaj ca da calela da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne', ²² ne xel-la gubán, ne da dxezá lazre' gapa da naca chee benne' xula, ne da calela ca', ne xel-la wezrí xe', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. ²³ Xúgute da calela caní dxeledxúaj na lu xichaj lázrdau bénneache, ne dxuluxrinnaj na le'.

*Tu nu'ula quebe naca judío dxeajlí lazre' Jesús
(Mt. 15.21-28)*

²⁴ Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. ²⁵ La gunézeté tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. ²⁶ Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. ²⁷ Gunná Jesús, dxe'e nu'ula':

—Be' lataj xelagu nedxu zri'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

28 Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruij da dxuluzexruj bidu ca'.

29 Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu beł-la' dxen chee zri'inu' nu'ula.

30 Gate bezrín nu'ula' lizre', na' blé'ene' zri'ine' nu'ula debe' lu da naga dxásebe', na' be' xriwe' ba bedxúaj na lu beł-la' dxen cheebe'.

Dxexún Jesús tu benne' nacuézrué', ne quebe dxaca nnie'

31 Nadxa bedxúaj Jesús, bezé'e naga nababa xezre Tiro, na' gudétié' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xezr la xu Galilea.

32 Nadxa bedajleguá' benne' ca' tu benne' nacuézrué', ne quebe dxaca nnie', na' gulenábe' Jesús xrua ne'e benne' nigá.

33 Guché Jesús benne' nigá chalá'ala naga zaj zra' benne' ca', na' bdié' zrube ne'e lu naga bénnea', na' bzre'e zrene', ne bte' lawe' luzre bénnea'. 34 Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

35 Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. 36 Na' gunná Jesús, dxé'e benne' ca' quebe nu xelé'e ca da bene'. Lácala gunná be'ene' le' caní, buluchíujdxé' dizra' ca da bene'. 37 Benne' ca' zaj zra' na' belexebánele'ene', dxelenné':

—Xúgute dxune' cháwedau'. Dxexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelennétié'.

8

Dxugagu Jesús chua gaxúa benne' biu

(Mt. 15.32-39)

1 Ca lu zra ca' zaj nazraga benne' zan, na' quebe bi de da xelawe'. Ca'an guca gunné Jesús benne' ca' dxusédene', na' guzre' le':

2 —Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'.

3 Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

4 Na' belexechebe benne' ca' dxusede Jesús, dxelé'e Le':

—¿Ájazra gundxu gunézrujdxu da xelawe' nigá, ga quebe nu chilá' benne'?

5 Jesús bchebe' le':

—¿Bal-la xeta xtila nápale le'e?

Benne' ca' gulenné':

—Gazre na.

⁶ Nadxa gunná be'e Jesús xelebé' xúgute bēnneache ca' lu xu. Nadxa guqué'ē xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédene', na' benne' caní gulisiē' na lāwela xúgute bēnneache ca'. ⁷ Zaj nápaquezē' tu chupa bēladau'. Na' Jesús gunabe' Dios gunē' na chawe'. Nadxa gunná bé'ene' gulise benne' ca' le na. ⁸ Gulagu xúgute bēnneache ca', ne belezúale'ē chawe'. Ca gudé na' bulusuzré'ē gazre xcuite xca'a nen xeta bizruj da belegá'ana. ⁹ Benne' ca' gulawe' zaj naque' ca chua gaxúa benne' biu. Nadxa Jesús bze' benne' ca' dizra'. ¹⁰ Nadxa guxú'ē lu da dxedá lawe' nísadau' nen benne' ca' dxusédene'. Xjaque' lu xezr la xu chee benne' xezre Dalmanuta.

Dxelenabe' Jesús gunē' tu xel-la waca

(Mt. 16.1-4; Lc. 12.54-56)

¹¹ Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabe' Jesús gunē' tu xel-la waca da za xabáa, chee xelenézene' bi xel-la waca nape'.

¹² Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

¹³ Nadxa Jesús bca'ane' benne' ca', na' bexu'ē lu da dxedá lawe' nísadau', dxexíaje' xechelá'a chee nísadau'.

Da naca ca' cua zichaj chee xeta xtila

(Mt. 16.5-12)

¹⁴ Gulal-la lazre' benne' ca' dxusēde Jesús xelu'ē da xelawe', na' zaj nu'ē tuze xeta xtila lu da dxedá lawe' nísadau'. ¹⁵ Nadxa Jesús gunná bé'ene', dxē'ē benne' ca':

—¡Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

¹⁶ Nadxa benne' ca' dxusēde Jesús gulé ljwezre':

—Le' dxenné' caní lawe' da quebe de xeta xtila gágudxu.

¹⁷ Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácale'ē zide' lázrdaule? ¹⁸ ¿Quebe dxelé'ele nen xiaj laule, ne quebe dxenle nen nágale? ¿Quebe dxajsá lázrele? ¹⁹ Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinna na.

20 Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zrate beca'ale?

Le' gulenné':

—Gazre na.

21 Nadxa Jesús guzre' benne' ca':

—¿Ne la gázqueze quebe dxéajni'ile?

Jesús dxexune' tu benne' la chul-la

22 Ca gudé na' Jesús, ne benne' ca' dxusédené' belexezrine' lu xezre Betsaida, na' benne' Betsaida guleché'ē tu benne' la chul-la lau Jesús, na' gulata' xuene' Le' guté' le'. 23 Jesús gudele' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawé', ne guxrúa ne'ē le'. Na' bchebe' le' chete dxelé'ene'. 24 Benne' la chul-la gunné'ē, na' gunné':

—Dxelé'eda' benne' ca', zaj naque' ca' weaj xaga, na' dx-esí'aque'.

25 Nadxa Jesús guxrúa ne'ē xiaj lawé' da xula, na' benne' na' gunná' dxgüe'. Na' bexaque', ne xúgute' bache dxelé'ene' cháwedau'. 26 Nadxa Jesús besel-le' le' lizre', dxé'ē le':

—Quebe chu'u lu xezre nigá, ne quebe nu xu'u caní.

Pedro dxenné' naca Jesús benne' nasel-la Dios

(Mt. 16.13-20; Lc. 9.18-21)

27 Ca gudé na' Jesús, ne benne' ca' dxusédené' xjaque' lu xézredu ca' zaj nababa xezre Cesarea naga dxenná bea Filipo. Dxácaté zaj xu'ē neza bchebe Jesús benne' ca':

—¿Nuzra na' dxelenná benne' naca' neda'?

28 Belexechebe':

—Bal-la benne' dxelenné' nacu' Juan, bénnea' bchue' bénneache nisa. Benne' xula dxelenné' nacu' Elías, bénnea' bchálaje' waláz cheē Dios. Benne' xula dxelenné' nacu' tu benne' xula bchálaje' waláz cheē Dios.

29 Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

30 Nadxa gunná be'e Jesús benne' ca'. Gunné':

—Quebe nu xe'le ca'.

Dxuchalaj Jesús ca dxal-la' gatiē'

(Mt. 16.21-28; Lc. 9.22-27)

31 Nadxa guzú lau Jesús dxulé'ene' benne' ca' ca dxal-la' sáca'le'ē Le', Benne' Gulje' Bénneache, ne ca xelún benne' gula cheē judío ca', ne benne' xíchaje' ca' cheē bxruze ca', ne benne' dxuluxuzájle'ē da nadxixruj bea Dios, xuluzúe' Le' chalá'ala. Nadxa guzre' le' welútie' Le', san xebane' zra guxunne zra.

32 Da nigá guzre' le' caníqueze. Nadxa Pedro guché'ē Jesús

chalá'ala, ne guzú lawe' dxedil-le' Le'. ³³ Jesús bexéchaje', ne gunné'e benne' ca' dxusédenē', na' gudil-le' Pedro, dxē'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bēneache dxunu'.

³⁴ Nadxa Jesús gunné' benne' ca' dxusédenē', ne xúgute bēneache ca', na' guzre' le':

—Che núlale dxaca lázrele gunle neda' tuze, dxal-la' guzúale chalá'ala xúgute da dxezá lázrele le'e, ne gácale ca tu benne' zéaje' chee te'e xaga béguaj, na' gunle neda' tu zren. ³⁵ Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bēnea' gunitie' xel-la nabán chee' ne chia' neda', ne ne chee dizra' chawe' chia', benne' nigá guselé' xel-la nabán chee'. ³⁶ Che tu benne' gape' xúgute da naca chee xezr la xu nigá, na' gunitie' bēne'du xu'e, ¿bízraqueze da ba neza gaca na chee bēnea'? ³⁷ Quebe bi gaca gunezruj tu benne' chee guselé' bēne'du xu'e. ³⁸ Che tu benne' gapa stu'e chia' neda', ne chee dizra' chawe' chia' lau bēne' caní, benne' dxulucá'ana Dios, ne dxelún dul-la, la gaze neda', Benne' Gulje' Bēneache, gapa stú'queza' chee bēnea' gate xida' nen xel-la szren chee Xra', ne nen gubáz chee xabáa lá'azxa ca'.

9

¹ Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xeelé'ene' xida xel-la dxenná bea chee Dios nen xel-la waca chee'.

*Ca guca gate bcha ca gunná' Jesús
(Mt. 17.1-13; Lc. 9.28-36)*

² Ca gudé xrupa zra, guché Jesús Pedro, ne Jacobo, ne Juan, na' guxíajlene' benne' canize tu lu xi'a sibe. Na' bcha ca gunná' Jesús lau benne' ca'. ³ Zra lana Jesús bexaca na chiche ca bezxe' da dxágute na laudxu. Quegá nu chilá' benne' lu xezr la xu gaca quibe' zra lanē' chee xegá'ana na chiche ca guca zra lana Jesús. ⁴ Na' benne' ca' dxuséde Jesús belelé'ene' Elías, ne Moisés, benne' gulate nédxudaute, dxuluchálajlene' Jesús.

⁵ Pedro guzre' Jesús:

—Benne' weséde, cháwele'e naca zradxu nigá. Guntu' chunna xu'u lágadau', tu chiu', ne tu chee Moisés, ne tu chee Elías.

⁶ Caní gunná Pedro lawe' da dxelezrebe benne' ca' dxuséde Jesús, na' Pedro quebe nézene' ca da dxenné'. ⁷ Nadxa betaj tu beuj naga zaj zre'e, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'ite lazra'. Le xen da dxenné'.

⁸ Gate gulenné'e, québedxa nu nalá' nen le', san tuze Jesús.

⁹ Dxácatē dxelexétaje' lu xi'a na', gunná be'e Jesús benne' ca' quebe nu xuluchálajlenē' ca naca da belelé'ene' gate te na' xebán Benne' Gulje' Bénneache ládujla benne' gate. ¹⁰ Cheē le na' gulezúe' zrise ca naca da ba guca. Buluchebe ljwezre':

—¿Bizra zéaje da na', xebanē' ládujla benne' gate?

¹¹ Nadxa buluchebe' Jesús:

—¿Bizr cheē na' dxelenná benne' ca' dxuluxuzájle'e da nadxixruj bea Dios dxal-la' xelá' Elías nédxula ca Cristo?

¹² Bechebe Jesús, na' guzre' le':

—Da li xelá' Elías nedxu, ne gucá'ana chawē' xúgute. ¿Bizra dxenná da naxúaj na lu xiche cheē Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. ¹³ Neda' dxapa' le'e, ba bla' Elías, na' belunē' cheē' ca naca xúgute da gulaca lazre' ca da dxenná na lu xiche cheē Dios ca da dxal-la' gaca cheē'.

Dxexún Jesús tu benne' cuide' xu'ube' be' xriwe'
(Mt. 17.14-21; Lc. 9.37-43)

¹⁴ Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxéchaje' le', ne zaj zráqueze na' benne' dxuluxuzájle'e da nadxixruj bea Dios, na' dxulutíl-lalēne' le' dizra'. ¹⁵ Gate belelé'ene' Jesús, na' xúgute' belexebánene', na' gusí'aca chégüe' naga zua Jesús, ne bulugape' Le' diuzre. ¹⁶ Ca'an guca, Jesús bchebe' benne' ca':

—¿Bizra na' dxedíl-lalēle benne' ca'?

¹⁷ Nadxa tu benne' ze' ga na' bechebe':

—Benne' wesēde, nache'a zri'ina' nigá cheē xexunu'-be' lawe' da xu'ube' be' xriwe' da ba nun na lebe' bi quebe dxaca nnebe'. ¹⁸ Gáteteze na' dxu'ube' da xriwe', na' dxella na lebe', ne dxin na lebe' lu xu. Dxezría bzrina' xú'abe', ne dxagu láxzabe'. Cheē le na' ba dxéxrujle'ēbe'. Ba gunaba' benne' ca' dxusédenu' xelexebéaje' be' xriwe' na', san quebe gulezéquene'.

¹⁹ Bechebe Jesús:

—Le'e, benne' quebe dxéajlele chia'. ¿Ájate dxal-la' súalēna' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

²⁰ Na' xeajlexrí'e-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lebe' xu, na' dxebixre dxetúl-labe' lu xu, ne guzría bzrina' dxú'abe'.

²¹ Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatebe' bidau'. ²² Zane' lasa be' xriwe' na' dxugú'u na lebe' lu xi', ne lu nisa chee gute na lebe'. Che wazéquenu' bi gunu' cheebe', bexache lazre' netu', ne gúcale netu'.

²³ Na' guzre Jesús le':

—Che wazéquenu' lue' chéajle'u chia', xúgute wazeque chee benne' dxéajle'e chia'.

²⁴ Nadxa xra bi cuide' nigá gunné' zizraj:

—Dxéajle'a chiu'. Gúcale neda' chee chéajledxa'.

²⁵ Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnie', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu bel-la' dxen cheebe'!

²⁶ Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

²⁷ Nadxa gucá'a Jesús na'be', bechise'-be'. Na' benne' cuide' na' bezebe'.

²⁸ Nadxa guxú'u Jesús tu lu xu'u, na' benne' ca' dxusédene' buluchebe' Le' naga zue' tuze':

—¿Bizr chee na' quebe guzéquentu' netu' xebéajntu' be' xriwe' na'?

²⁹ Nadxa Jesús guzre' benne' ca':

—Ca naca be' xriwe' caní séquele xebéajle na che ná bale lau Dios, ne gunle gubasa.

Jesús dxuchálaje' da xula ca gaca gate gatie'

(Mt. 17.22-23; Lc. 9.43-45)

³⁰ Gate besí'aque' naga zaj zre'e, na' belexedé' naga nababa Galilea. Jesús quebe guca lazre' nu neze ga zue', ³¹ lawe' da dxuzéajni'ine' benne' ca' dxusédene', na' guzre' le':

—Zua tu benne' gudé' neda', Benne' Gulje' Bénneache, lu na' benne' ca' dxeledábague' neda', na' xelútie' neda', san gate gaca chunna zra natia', na' xebana'.

³² Benne' ca' quebe guléajni'ine' ca da dxé'e le', ne belezrebe' xuluchebe' Le'.

Nu benne' naque' blau

(Mt. 18.1-5; Lc. 9.46-48)

³³ Nadxa belezrine' lu xezre Capernaum, na' gate zaj zre'e lu xu'u na', bchebe Jesús benne' ca' dxusédene':

—¿Bizra dizra' dxutil-lalele ljwézrele za'le la neza?

³⁴ Gulezré'e zrise lawe' da bulutil-le' dizra' la neza na' che nule' nácadxe' benne' blau. ³⁵ Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzebe, ne gunle zrin chee xúgute bèneache.

³⁶ Nadxa guqu'e tu bidau', na' bzue' lebe' gachaj lawe' benne' ca'. Na' bnide'-be', ne guzre' benne' ca':

³⁷ —Benne' na' gape' ba lá'ana tu bidau' ca bidu nigá lawe' da nazrí'ine' neda', bènea' gape' ba lá'ana neda', na' bènea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasele' neda'.

Benne' quebe dxedábage' dxi'u, dxácalene' dxi'u
(Lc. 9.49-50; Mt. 10.42)

³⁸ Nadxa Juan guzre' Jesús:

—Benne' Wesede, blé'entu' tu benne' dxebéaje' be' xriwe' da xu'u bèneache, dxuchíne' Lau' Lue', san bènea' quebe dxune' dxi'u tu zren. Chee le' na' gúzrentu' le' québedxa gune' ca'.

³⁹ Jesús guzre' benne' ca' dxusédenē':

—Quebe bi xele le'. Che nu benne' gune' tu xel-la waca, guchíne' La' neda', benne' nigá quebe gaca nne' schanni' chia'. ⁴⁰ Caní naca na lawe' da benne' quebe dxedábage' dxi'u, dxácalene' dxi'u. ⁴¹ Núteteze benne' gunne' le'e tu zriga' nisa ne chee La' neda' lawe' da nácale chia' neda', Cristo, da líqueze dxennía', wazí'queze' da dxal-la' si'e.

Ca naca da dxun na dxi'u benne' dul-la
(Mt. 18.6-9; Lc. 17.1-2)

⁴² Gunnadxa Jesús:

—Núteteze benne' gulé'ene' tu bidau' chee gunbe' dul-la, bidu na' dxéajlebe' chia', cháwedxa guchéajdxu tu xiaj zi' lba bènea', ne cheajchú'unadxu le' lu da situj chee nísadau'.

⁴³ Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpatē na'u, naga quebe xexula xi' da xezacu'. ⁴⁴ Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na.

⁴⁵ Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpatē ni'u, naga quebe xexula xi'. ⁴⁶ Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na.

⁴⁷ Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpatē xiaj lau'. ⁴⁸ Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na.

⁴⁹ 'Ca dxundxu gate dxugú'udxu zede' bela' da guzáladxu lu xi' chee xegá'ana chawe' na, ca'an gaca chee xúgute benne'.

Cá'anqueze dxugú'udxu zede' da dxuzézxedxu lau Dios. ⁵⁰ Zede' na' naca na da chawe', san che xenite xel-la sna'a chee na, ¿ájala gundxu chee guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

10

Ca naca chee benne' dxexelé'e nen zru'ule'
(Mt. 19.1-12; Lc. 16.18)

¹ Nadxa bedxúaj Jesús xezre Capernaum, na' guxíaje' naga nababa Judea xechalá'a xegu Jordán naga dxalaj gubizra. Na' belezraga bénneache zan naga zua Jesús, na' xecha lasa na' bsédené' le' cáqueze dxuné'. ² Nadxa bal-la benne' xudau' fariseo ca' belezrine' lau Jesús, na' buluchebe' Le' chee da gun nne Le' tu da quebe dxal-la' nne'. Buluchebe' Le':

—¿Waca tu benne' xelé'e nen zru'ule'?

³ Nadxa bechebe Jesús:

—¿Bizra gunná be'e Moisés le'e?

⁴ Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

⁵ Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. ⁶ Gate nédxudau' gate ben Dios xúgutę da dxelé'edxu, na' bene' bénneache benne' biu, ne nu'ula, na' gunné': ⁷ “Chee le na' benne' biu na' gusané' xruze xrne'e chee gaque' tuze nen zru'ule', ⁸ na' dxupe' xelaque' ca tuze benne'.” Ca' naca na, québedxa zaj naca chupe', san tuze benne' zaj naque'. ⁹ Chee le na' netú benne' quebe dxal-la' xelé'e da nuchaga Dios.

¹⁰ Gate zaj zra' lu xu'u benne' ca' dxusede Jesús buluchebe' Le' xetú lasa ca naca chee da nigá. ¹¹ Na' Jesús guzre' benne' ca':

—Che tu benne' xelé'e nen zru'ule', ne xezúalęne' nu'ula xula, dxíchuje' xrba chee wechaga na' lawe' da dxusebague' zru'ule' nedxu na' dul-la. ¹² Cá'anqueze che tu nu'ula gusané' benne' chee', ne xezúalęne' benne' xula, la gázqueze dxíchuje' xrba chee wechaga na' da dxusebague' benne' chee' dul-la.

Jesús dxenabe' Dios gun chawe'e bidu ca'
(Mt. 19.13-15; Lc. 18.15-17)

¹³ Nadxa bénneache ca' guleché'e bidu chee' ca' lau Jesús chee xrua ne'e lebe', na' benne' ca' dxusede Jesús gulezú lawe' dxeledil-le' benne' ca' zaj naché'e bidu ca'. ¹⁴ Gate ble'e Jesús da dxeluné', na' bzre'e, ne guzre' le':

—Le güe bidu ca' lataj xeledá'abe' naga zua'. Quebe guzágale-be' lawe' da benne' zaj naque' ca bidu caní xelu'e naga dxenná bea Dios. ¹⁵ Da li dxapa' le'e, che tu benne' quebe gape' ba

lá'ana da dxenná bea Dios ca dxelún bidu caní, cabata' chu'u bēnnea' naga dxenná bea Le'.

¹⁶ Nadxa gucá'a Jesús bidu ca', ne bnide'-be'. Guxrúa ne'e lebe', na' gunabe' Dios gun chawe'e-be'.

*Benne' cuide' nape' da gunní'a dxuchálajlene' Jesús
(Mt. 19.16-30; Lc. 18.18-30)*

¹⁷ Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchebe' Le':

—Benne' xrlátaje, bi dxal-la' guna' chee gapa' xel-la nabán zeajlí canna?

¹⁸ Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. ¹⁹ Núnbeaquezu' ca da bdxixruj bea Dios gate na' gunné':

Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

²⁰ Nadxa bēnnea' bechebe':

—Benne' wesede, xúgutē da caní dxuna' nácatea' bidau'.

²¹ Na' Jesús gunné'e le' xrtandau', ne guzre' le':

—Tu da dxexázejenu'. Guxíaj xeajete xúgutē da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéaje' chee te'e xaga béguaj, ne ben neda' tuze.

²² Gate bene' da nigá, na' benne' cuide' na' bewi'ine lázrele'e, na' bexíaje' dxewí'ine' lawe' da nácale'e benne' gunní'a.

²³ Nadxa Jesús gunné'e ni naze, na' guzre' benne' ca' dxusédene':

—Stébetē naca chu'u benne' gunní'a naga dxenná bea Dios.

²⁴ Belexebánele'e benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébetē naca xelú'u naga dxenná bea Dios benne' dxuluxrén lazre' xel-la gunní'a. ²⁵ Chadidxa te tu bea zren lu negue xeche' quézcala chu'u tu benne' gunní'a naga dxenná bea Dios.

²⁶ Gate belén benne' ca' dizra' nigá, na' belexebánele'ene', na' buluchebe ljwezre':

—¿Núzraqueze la xca'?

²⁷ Jesús gunné'e benne' ca', ne guzre' le':

—Quebe seque' nu bēnne' gune' da nigá, san Dios wazéquene'. Quebe bi de da quebe gaca gun Dios.

²⁸ Nadxa Pedro guzre' Jesús:

—Xránantu', netu' ba bcá'anantu' xúgute da nápantu', ne zéajlentu' Lue'.

²⁹ Na' bechebe Jesús:

—Da li dxapa' le'e, núteteze benne' gusane' lizre', u benne' biche', u nu'ula zane', u xre', u xrne'e, u zru'ule', u zri'ine', u xezr la xu chee' ne chia' neda', u ne chee dizra' chawe' chia',
³⁰ benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bènneache le'. Lu xezr la xu da za za' wazí'queze' xel-la nabán zeajlí canna. ³¹ Zánete benne' zaj naca na'a benne' blau xelaque' ca benne' bzebe, na' zánete benne' zaj naca na'a ca benne' bzebe xelaque' benne' blau.

Dxuchalaj Jesús xetú lasa ca gaca gate gatie'

(Mt. 20.17-19; Lc. 18.31-34)

³² Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédenē'. Dxelezrebe benne' ca', ne lu xel-la dxelezrebe zjácálene' Le'. Na' da xula gucá'a Jesús benne' chazrinnu ca' dxusédenē', na' guzú lawe' dxē'e le' ca naca da dxal-la' gaca chee'. ³³ Na' guzre' le':

—¡Le na' xque nigá! Dxegüendxu zéajdxu Jerusalén naga tu benne' gudéē' neda', Benne' Gulje' Bénneache, lu na' benne' xíchaje ca' chee bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee gatia', na' wuludee' neda' lu na' benne' zitu' ca'. ³⁴ Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

Jacobo ne Juan dxelenabe' Jesús bi gune' chee'

(Mt. 20.20-28)

³⁵ Nadxa Jacobo ne Juan, zri'ine Zebedeo, belezrine' lau Jesús, na' gulé'e Le':

—Benne' Wesede, dxaca lázrentu' gunu' cheentu' da nábantu' Lue'.

³⁶ Nadxa bchebe Jesús le':

—¿Bi dxaca lázrele guna'?

³⁷ Na' belexechebe' Le':

—Benna netu' lataj cué'entu', tuntu' chalá'a xabela chiu', ne xetuntu' chalá'a xéglala chiu' naga nna be'u xabáa chiu'.

³⁸ Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéaje na ca naca da sácadxu? ¿Waca chuale nisa ca chua' neda' nisa lu xel-la gute?

³⁹ Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa. ⁴⁰ Chee cué'ele chala'a xabela chia' u chala'a xéglala chia', quegá neda' gunna' na. Gaca chee benne' ca' ba nucueza Dios chee'.

⁴¹ Gate xechí benne' ca' dxusede Jesús belenne' na, na' belezré'e nen Jacobo ne Juan. ⁴² Jesús gunné' benne' ca', na' guzre' le':

—Ba nézquezle ca dxelún benne' dxelenná be'e benne' xezr la xu ca'. Dxelún cuine' xrane benne' xezr la xu ca'. Benne' blau ládujla le' dxezi'e ba neza xel-la dxenná bea chee'. ⁴³ Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' guné' zrin chee ljwezre', ⁴⁴ na' che nu benne' ládujla le'e dxaca lazre' gaque' benne' xíchaje, benne' nigá dxal-la' gaque' ca tu benne' nada'u chee guné' zrin chee xúgute ljwezre'. ⁴⁵ Caní gaca na lawe' da cá'aqueze neda', Benne' Gulje' Bénneache, bla'a, quegá chee xelún bénneache zrin chia' neda'. Bla'a chee guna' zrin chee bénneache, ne chee guzúa' xel-la nabán chia' chee guselá' benne' zan.

*Dxexún Jesús tu benne' la chul-la le' Bartimeo
(Mt. 20.29-34; Lc. 18.35-43)*

⁴⁶ Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusedene', ne nen benne' zante, na' zua tu benne' la chul-la le' Bartimeo, zri'ine Timeo, dxe'e dxu'a neza dxenabe' guna'. ⁴⁷ Na' ca benne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—¡Jesús, Zri'ine David, bexache lazre' neda'!

⁴⁸ Benne' zan ca' guledil-le' le' chee sue' zrize, na' le' zizrajdxa gunné':

—¡Zri'ine David, bexache lazre' neda'!

⁴⁹ Nadxa gugá Jesús, na' gunné':

—Le nne' le'.

Na' gulenné' benne' la chul-la na', gul'é'e le':

—Bdipa lazru'. Guxasa lawe' da dxenné' lue'.

⁵⁰ Nadxa bzale' lazxe' naxrúa cuzre' chala'ala, na' guxritie' chee zrine' lau Jesús. ⁵¹ Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

⁵² Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

11

Dxu'u Jesús xezre Jerusalén
(Mt. 21.1-11; Lc. 19.28-40; Jn. 12.12-19)

¹ Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédene', ² na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' lēba'. Le sezre-ba', ne le che'-ba' nigá. ³ Che nu benne' nabe' le'e bizr chee na' dxesézrele-ba', xégale le': “Xránadxu dxechine'-ba'”, na' la xesél-la'te' lēba'.

⁴ Nadxa xjaque', ne xeajlexraque' burro na' da'ba' xaga dxu'a dxa xu'u cuíta neza, na' gulesézre'-ba'.

⁵ Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

⁶ Nadxa le' gulé'e benne' ca' ca ba gunnáqueze Jesús, na' belúe' le' lataj. ⁷ La belexeché'ete' búrrua' lau Jesús, na' buluzríe' zra lané' cúzruba', na' guzría Jesús lēba'. ⁸ Benne' zante gulechíluje' xicha chee', ne xladxe' la neza, na' benne' xula gulechugue' zina' da gulíxrue' la neza.

⁹ Na' benne' ca' zaj zrie' lawe', ne benne' ca' zjaque' bzebe, gulezú lawe' dxelenné' zizraj:

—¡Gaca ba! ¡Lá'azxa naca benne' ze'e, nasel-la Xránadxu Dios Le'! ¹⁰ ¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

¹¹ Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute' da zaj nnita du cuíte', na' bezé'e zexíaje' xezre Betania nen benne' chazrinnu ca' dxusédene', lawe' da ba zeaj dxezré'.

Jesús dxugu'e de' xaga higo
(Mt. 21.18-19)

¹² Gute xu zra xula gate na' gusá'aque' xezre Betania, gudún Jesús. ¹³ Na' blé'ene' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre.

¹⁴ Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

Jesús dxexún lbe'e lu xudau'
(Mt. 21.12-17; Lc. 19.45-48; Jn. 2.13-22)

¹⁵ Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa'u na'. Na' bdxixre' blaga

chee benne' weche'e dumí chee benne' zitu', ne bdxixre' naga dxelebé' benne' wete bgúgudu ca'. ¹⁶ Quebe be'e lataj nu benne' xudé'e xua ca' lu xudau'. ¹⁷ Nadxa bsédené' bèneache ca', dxenné':

—Lu xiche lá'azxa dxenná Dios: “Lizra' gaca na tu xu'u naga xuluchálajle Dios benne' zá'aque' xúgute xezre.” Le'e ba nunle lizra' ca tu lizre benne' gubán ca'.

¹⁸ Na' benne' xíchaje ca' chee bxruze ca', ne benne' dxuluxuzájle'e ca da nadxixruj bea Dios belenne', na' gulezú lawe' dxelexíluje' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute bèneache ca naca da dxusede Jesús le'. ¹⁹ Ca gula chizrela, Jesús bezé'e lu xezre.

Dxebizre xaga higo

(Mt. 21.20-22)

²⁰ Ca gula zra xula che zílala, na' Jesús, ne benne' ca' dxusedene' belexedé'e na', na' belelé'ene' xaga higo na', ba nabizre na duté lue na. ²¹ Nadxa xeajsá lazre Pedro, na' guzre' Jesús:

—Benne' wesede, gunná'xque xaga higo nigá da gulú'u na de'. Bache gubizre na.

²² Jesús gunné':

—Le cheajlí lazre Dios. ²³ Da li dxapa' le'e, che nútetezele nnale, xe le xi'a nigá: “Cuasa lue' nigá, xeajchú'u lu nísadau'”, ne che quebe dxun chupa lázrele, na' chéajlele waca da ba gunnale, na' gácaqueze na. ²⁴ Chee le na' dxapa' le'e, xúgute da ná bale Dios gate dxuchálajlele Le', che chéajlele ba guzile na, ca'an gácaqueze. ²⁵ Gate na' dxuchálajlele Dios, che dxezrá'ale nu benne', le gunite lau chee bènea' chee cá'anqueze Xrale zu'e xabáa gunite lawe' dul-la da nabágale. ²⁶ Che quebe gunite laule chee bènea', Xrale zu'e xabáa quebe gunite lawe' dul-la da nabágale.

Ca naca xel-la dxenná bea da napa Jesús

(Mt. 21.23-27; Lc. 20.1-8)

²⁷ Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchaje ca' chee bxruze ca', ne benne' dxuluxuzájle'e da nadxixruj bea Dios, ne benne' gula ca'. ²⁸ Na' benne' caní gulenábene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

²⁹ Na' bechebe Jesús:

—Cá'anqueze neda' de tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. ³⁰ ¿Nuzra gusel-la Juan bchu'e bèneache nisa? ¿Dios che bèneache? Le xechébe na'a.

³¹ Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze': “¿Bizr chee na' quebe guxéajle' chee'?” ³² Che nnadxu bènneache guleselle' le', dxal-la' zrédexu da xelún benne' xezre ca'.

Caní gulenné' lawe' da xúgute benne' xezre nigá dxeléajle'e guca Juan benne' bchálaje' waláz chee Dios. ³³ Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxé'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

12

Da dxulé'e na ca naca chee benne' wen zrin quebe zaj naque' xrlátaje

(Mt. 21.33-46; Lc. 20.9-19)

¹ Nadxa guzú lau Jesús dxuchálajlene' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúe' da caní.

'Nadxa bde'e' xezr la xu chee' na' lu na' benne' wen zrin ca' chee xelune' la'a lina chee na, na' guzé'e zéaje' xezre zitu'.

² Ca gula zra chee lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'. ³ Na' benne' wen zrin ca' gulel-le'-be', ne buluzalje'-be', na' belexesel-le'-be' dáchezebe'. ⁴ Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalene'-be'. ⁵ Na' xránabe' na' gusel-le' xetube', na' bi nigá belútete' benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

⁶ 'Xránabe' zua tu zrí'ine' bi biu, bi nazrí'ilé'ene', na' naga bzébeté gusel-le' zrí'ine' nigá, dxenné' lu xichaj lázrdawé': Dxa-la' xelape' ba lá'ana zrí'ina'. ⁷ Benne' wen zrin ca' gulenné', dxelé ljwezre': “Bi nigá gueque cheebe' xezr la xu nigá. Gútetedxu-be' na'a, na' dxi'u xegá'analedxu da nigá.” ⁸ Ca'an guca, gulel-le'-be', ne belútete'-be', na' gulebéaje' bel-la' dxen cheebe' lu xezr la xu na'.

⁹ Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'e, na' gútete' benne' wen zrin ca', na' gudé'e' xezr la xu chee' lu na' benne' xula ca'. ¹⁰ Ba blábale da naxúaj na lu xiche chee Dios. Dxenná na:

Xiaj na' da quebe buluchine benne' wen xu'u,

xiaj na' naca na'a xiaj blau chee xu'u.

¹¹ Da nigá ben Xránadxu, na' dxexebánedxu chee na.

¹² Nadxa gulaca lazre' xelexe' Jesús lawe' da zaj nézene' bchálaje' da dxulé'e nigá chee gulé'ene' ca zaj naca le'. Quebe bi gulune' lawe' da gulezrebe' bi xelún benne' xezre ca'. Chee le' na' bulusane' Jesús, besí'aque'.

Da bchalaj Jesús chee da dxuchizruj xu'u lawe'

(Mt. 22.15-22; Lc. 20.20-26)

¹³ Ca gudé na' gulesele' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra' chee xelezéquene' xelawe' Le' zria. ¹⁴ Benne' caní belelé'e lau Jesús, na' gulé'e Le':

—Benne' wesede, ba nézentu' ca dxennáu' da li, ne quebe dxezí'u ca da dxelennaze bèneache, lawe' da quebe dxennáu' Lue' ca zaj naca cúzreze bèneache. Da li naca ca dxusédenú' bèneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

¹⁵ Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee na' dxebéaje neda' dizra'? Le dajguá nigá tu dumí da dxízrujle chee le'eda' na.

¹⁶ Na' bedajlegü'e na, na' ca ble'e Jesús le' na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e Le':

—Chee benne' dxenná bea Roma.

¹⁷ Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebáne' ca naca da bchalaj Jesús.

Da bchalaj Jesús ca xelexebán benne' gate

(Mt. 22.23-33; Lc. 20.27-40)

¹⁸ Nadxa belezrín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

¹⁹ —Benne' wesede, Moisés bzuaje' cheedxu da nadxixruj bea nigá: “Che tu benne' biu gatié', ne xegá'ana zru'ulé', na' quebe nu zua bi chee bènea', na' benne' biche' dxal-la' xequ'é nu'ula na' gute benne' chee' chee' sua zri'ine bènea' gutié'.” ²⁰ Gulezrá' gazre benne' biche'. Benne' nedxu bchaga na'abe', na' gútebe' quebe nu zrí'inebe' zua. ²¹ Na' benne' gudxupe' bequ'é nu'ula na', na' cá'aqueze gutié' quebe nu zrí'ine' zúaqueze. Cá'aqueze guca chee benne' guxunne'. ²² Ca'an guca, benne' gazre caní gulezúalene' nu'ula na', na' netue'

quebe nu zrí'ine' guzúa. Naga xeajsete na gútete nu'ula'.
²³ Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

²⁴ Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. ²⁵ Gate na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. ²⁶ Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajlene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.” ²⁷ Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

Da nadxiruj bea Dios da naca blau

(Mt. 22.34-40)

²⁸ Na' zéqueze tu benne' dxuxuzájle'e da nadxiruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxiruj be'e Dios naca na da blaudxa?

²⁹ Na' Jesús guzre' le':

—Da bdxiruj be'e da naca na da blaudxa ca xúgute dxenná na caní: Le xene benne' Israel. Xránadxu Dios tuze naque'.
³⁰ Bzri'i Xranu' Dios du lazru', ne nen dute bénne'du xu'u, ne nen dute xichaj lázrda'u, ne nen dute xel-la wal-la da napu'. Da nigá naca da nadxiruj bea da blaudxa, ³¹ na' da nadxiruj bea gudxupe' nácaqueze na ca le na, da dxenná na caní: Bzri'i benne' xula ca nazrí'i cuinu'. Quebe zua xetú da nadxiruj bea da naca blaudxa ca da chupa caní.

³² Nadxa gunná bénnea' dxuxuzájle'e da nadxiruj bea Dios, dxé'e Jesús:

—Ca'an xanne naca ca bechebu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', ³³ na' che zri'idxu Dios du lázredxu, ne nen dute xichaj lázrdaudxu, ne nen dute bénne'du xú'udxu, ne nen dute xel-la wal-la da nápadxu, ne che zri'idxu benne' xula ca nazrí'i cuínadxu, da caní zaj zácadxa na ca xúgute be xixre' ca' dxútedxu-ba' lau Dios, ne ca xúgute da dxuzéxedxu lu cugu chee Dios.

³⁴ Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lázrda'u.

Na' québedxa nu bexazre nábene' Le' dizra' ca'.

¿Nu zrí'ine' naca Cristo?

(Mt. 22.41-46; Lc. 20.41-44)

³⁵ Jesús dxusédene' benne' ca' lu xudau', na' gunné':

—¿Bizr chee na' dxelenná benne' dxuluxuzájle'e da nadxixruj bea Dios naca Cristo zri'ine David? ³⁶ David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':

“Gudxé'e chala'a xabela chia',
ca zrin zra ba nuzúa' benne' dxeledábague' lue',
chee na be'enu' le'.”

³⁷ Che David ná'queze dxenné': “Xrana”, ¿ájala chee na' naque' zri'ine'?

Benne' zan ca' du lazre' buluzé nague' chee'.

Jesús dxulé'ene' zaj nachixre benne' ca' dxuluxuzájle'e da nadxixruj bea Dios

(Mt. 23.1-36; Lc. 11.37-54; 20.45-47)

³⁸ Ca dxusede Jesús benne' ca', na' gunné':

—Le gapa chi'i cuínale chee benne' ca'an dxuluxuzájle'e da nadxixruj bea Dios. Benne' caní dxeledánene' dxelácue' zra lane' tunna, ne dxeledánene' xulugapa bénneache le' diuzre nen dizra' ba lá'ana lau bénneache ca'. ³⁹ Benne' caní dxeledánene' dxelebé'e lataj blau lu xu'u naga dxelezraga benne' dxelúe lá'ane' Dios, ne dxeledánene' dxelebé'e lataj blau naga dxelawe' xrche'. ⁴⁰ Benne' caní dxelegü'e lizre xrlataj nu'ula ca' ba gulate benne' chee', na' chee xululé'e cuine' ca benne' xrlátaje, dxelune' xel-la dxuluwizraj Dios tunna. Le' zaj nabágadxe' zria.

Dumí da gulú'u nu'ula xache' ba gute benne' chie'

(Lc. 21.1-4)

⁴¹ Tu lasa gate na' dxe' Jesús lu xudau' cuita naga dxelegú'e dumí, na' dxenné'e ca dxelún benne' ca' dxelegú'e dumí, ne ca dxelún benne' gunní'a ca', dxelegú'e dumí zren. ⁴² Ca'an guca, bzrin tu nu'ula xache' ba gute benne' chie', na' gulu'e chupa dumí lásedau' da quebe zaj zátate can. ⁴³ Nadxa gunné Jesús benne' ca'an dxusédene', na' guzre' le':

—Da li dxapa' le'e, nu'ula xache' nigá bnézrujdxe' ca xúgute benne' ca'an gulegú'e dumí. ⁴⁴ Xúgute benne' ca' gulegú'e da québedxa dxelechínne'. Nu'ula xache' nigá gulu'e ca naca da nape', da nunte gawe'.

13

Dxuchalaj Jesús ca gaca gate xrinnaj xudau'

(Mt. 24.1-2; Lc. 21.5-6)

¹ Gate bedxúaj Jesús lu xudau', na' tu benne' dxusédene' guzre' Le':

—Benne' Wesede, gunná'xque ca zren naca xudau', ne xiaj xrtante caní.

² Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

*Da xelunna bea na gate cheajsé chee xezr la xu nigá
(Mt. 24.3-28; Lc. 21.7-24; 17.22-24)*

³ Nadxa xjaque' lu xi'a chee xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulé'e Jesús leze':

⁴ —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgute da caní?

⁵ Na' bechebe Jesús:

—Le gapa chi'i cuínale chee quebe nu si xe le'e, ⁶ lawe' da xeledá' benne' zante xelún lu'a neda', welenné' zaj naque' Cristo, na' welezí xe'e benne' zante.

⁷ 'Le'e, gate xénele gaca wedil-la, ne ba dxaca wedil-la, quebe zrébele. Cá'queze dxal-la' gaca na, san quegá ne zrin zra cheajsé chee na, ⁸ lawe' da xeledíl-lale benne' tu xezr la xu benne' xetú xezr la xu, na' tu xezre benne' tíl-lale na xetú xezre. Wazrú' zánete xezre, ne wata' gubina', ne wadxé'e na zraga bénneache. Da caní zaj naca na naga su lauze ca naca da xezezaca zi' bénneache.

⁹ 'Le guxúe cuínale lawe' da xuludé'e le'e lu na' benne' xu'u lawe', na' xuluzalje' le'e lu xu'u naga dxulucá'ana szrene' Dios. Xuludé'e le'e lau benne' xu'u lawe' ca', ne lau benne' dxelenná be'e lawe' da nácale chia' neda'. Gate ca'an gaca, na' guchálajle chia' neda' lau benne' ca'. ¹⁰ Nédxudxa ca zrin zra cheajsé chee na, dizra' chawe' chia' gaca lban chee na lau bénneache zaj zre'e xúgute xezr la xu. ¹¹ Gate xeleché'e le'e chee xuludé'e le'e lu na' benne' xu'u lawe' ca', quebe cue'le gunne xue bi nnale, ne quebe quilaj lázrele ájala guchálajle. Nnele ca da gunna Dios le'e zra na' lawe' da quegá le'eze nnele, san Be' Lá'azxa, Le' nne'. ¹² Ca xelún bénneache lu zra na', xuludé'e bi biche' ca' lu na' benne' xelúti'e lebe'. Cá'anqueze xelún xruze xrna' ca', xuludé'e zrí'inequeze'. Na' zrí'ine' ca' weledábagabe' xruze xrnabe', ne xelunbe' xelátie'. ¹³ Xúgute bénneache xelezre'e le'e lawe' da nácale chia' neda'. Bénnea' ze tipe' ca zrindxa zra cheajsé chee na, la bénnea'.

¹⁴ 'Daniel, bénnea' bchálaje' waláz chee Dios bzuaje' ca naca chee da sban da guzría xi na. Gate lé'ele le'e zria da nigá lataj lá'azxa naga quebe dxal-la' cuía na, nadxa benne' zaj zre'e xezre ca' zaj nababa xezr la xu Judea dxal-la' xuluzrúnnuje', ne chjaque' lu xi'a zren. (Benne' dxulabe' da nigá dxal-la' cheajní'ine' da naca chee na.) ¹⁵ Nu benne' zria chju'u lizre' lu zra na' quebe dxal-la' xexétaje' chee bi xebéaje' lu

xu'u. ¹⁶ Benne' zē lē'e xixre' quebe dxal-la' xezrine' lizre' chee xequé'e zra lanē'. Dخال-la' xuluzrúnnujtē benne' caní. ¹⁷ Baxache' xelaca nu'ula zaj zuē' zi'i, ne nu'ula ca' zaj nuxre' bidu dxe'ene lu zra na'. ¹⁸ Le naba lau Dios chee quebe gaca beu' zaga gate na' dxal-la' guzrúnnujle, ¹⁹ lawe' da xelezaca zidxa bēneache lu zra ca'an ca da quebe ne xelezácate', gulala bēn Xránadxu Dios xēzr la xu nigá, ne québedxa xelezácadxe' ca'. ²⁰ Che Xránadxu Dios quebe guzáchie' zra ca', québedxa nu láqueze', san ba bzachie' zra ca'an lawe' da nazrí'ine' bi chee' ca', bi ca' ba gucá'a Lē'.

²¹ 'Lu zra na', che nu benne' dxe'e le'e: "Le na' xque, nigá zua Cristo", u che nne': "Le na' xque, na' zē", quebe chéajlele chee'. ²² Welelá' benne' xelezí xē'e, benne' xelunē' lu'a Cristo, ne xelunē' lu'a xel-la waca chee xabáa chee xelezí xē'e bi ca' ba gucá'a Dios che xelezéque'. ²³ Le sua le'e ban lazre'. Neda' ba gucha' le'e xúgute nédxute ca gaca na.

Ca gaca gate xida Benne' Gulje' Bénneache
(Mt. 24.29-35, 42-44; Lc. 21.25-36)

²⁴ Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'. ²⁵ Belaj ca' xelexruj na zran xabáa, na' ca da zaj nalá' zaj zē tipa zran xabáa welezrízetē na. ²⁶ Ca nadxa xelelé'ene' neda', Benne' Gulje' Bénneache, za'a lu beuj bza, napa' xel-la waca zren, ne da xabáa chia'. ²⁷ Na' la sél-latea' gubáz chee xabáa chia' ca' chee xuluchague' benne' ca' gunnía', benne' zaj zre'e dapa saca chee xēzr la xu nigá, benne' zitu' zá'aca nila, zá'aca na'la.

²⁸ Le gusede ca naca da dxulé'e na ca naca chee xaga higo. Gate na' dxelexedxe'ene zruze na, ne zá'aca xrlegue na, na' ba nézele za beu' la. ²⁹ Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácate na. ³⁰ Da li dxapa' le'e, xúgute da caní gaca na nédxudxa ca xelate bēneache zaj zre'e lu zra na'. ³¹ Xabáa ne xēzr la xu nigá wadé chee na. Xrtizra' nigá quebe te na ca'anze, san waca li na.

³² 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

³³ 'Chee lē na', le sua le'e ban lazre'. Le guxúe, ne le guchálajle Dios lawe' da quebe nézele bátala zrin zra na'. ³⁴ Gaca na ca guca chee tu benne' biu, benne' guzé'e zéaje' zitu'. Gate na' za dxúaje' xu'u, na' dxudé' da nape' lu na' bi wēn zrin chee' ca', ne dxunézruje' tu tube' zrin da xelunbe', ne dxusebague' benne' zē' dxa xu'u guxúe xánnie'. ³⁵ Chee lē na', le sua le'e ban lazre' lawe' da quebe nézele le'e bátala xelá' xrane xu'u, che dxe xríinneze, che dxēla, che ca cuezre xjeaj,

che che zílala, ³⁶ ga gaze xelé'e chadí dute, na' cheajxraque' le'e dxásele. ³⁷ Ca da dxennía', dxapa' le'e, dxapa' xúgute benne': ¡Le sua ban lazre'!

14

Dxelexegá'ane' dizra' chee xelē-le' Jesús

(Mt. 26.1-5; Lc. 22.1-2; Jn. 11.45-53)

¹ Xechupa zra za zrin chee xelune' laní chee xulusá lazre' ca naca da ben Dios gate na' bebéaje' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchaje ca' chee bxruze ca', ne benne' dxuluxuzájle'e da nadxixruj bea Dios belilaj lazre' ájala xelune' chee xelē-le' Jesús bagácheze chee xelútiē' Le'. ² Na' gulenné':

—Quegá gundxu na lu laní, chee quebe dxe'ena zraga bēnneache.

Tu nu'ula dxegüē'e da za xichaj Jesús

(Mt. 26.6-13; Jn. 12.1-8)

³ Zua Jesús lu xezre Betania, lu lizre tu benne' le' Simón, benne' guzriē' we' guzru'. Dxácatē zaj dxe'e dxelawe' na', na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazratē na da za da dxelá zixre chee xiaj nardo, da zácalē'e na. Na' gulé'e da dau' na', ne blálajē' da za na' xichaj Jesús. ⁴ Bal-la benne' ca', benne' zaj zre'e na', belezré'e, na' gulenné', dxelé ljwezre':

—¿Bizr chee na' ben ditaj nu'ula nigá da za na'? ⁵ Waca ta'u da na' chee sídxadxu ca lázrujdxu chee tu iza, chee gácalēdxu benne' xache' ca'. Na' guledil-le' nu'ula'.

⁶ Na' Jesús guzre' le':

—Quebe xele nu'ula nigá ca'. ¿Bizr chee na' dxunle le' zēde? Ca naca da ben nu'ula nigá chia' neda' naca na da cháwēle'e. ⁷ Benne' xache' ca' tu zrázqueze' ládújla le'e. Waca gunle benne' ca' chawe' gate dxaca lázrele, san neda' quegá tu súáleza' le'e. ⁸ Nu'ula nigá bene' ca da guzéquene', gulu'e da za bel-la' dxen chia' nédxula chee zra gate gachia' lu xēdxu ba. ⁹ Da li dxapa' le'e, gátetēze na' gaca lban chee dizra' chawe' chia' lu xúgute xezre zaj nnita xezr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

Judas dxexegá'ane' dizra' gudēe' Jesús lu na' benne' ca' dxelédabague' Le'

(Mt. 26.14-16; Lc. 22.3-6)

¹⁰ Nadxa Judas Iscariote, tu benne' chazrinu ca' dxusede Jesús, guxíaje' xeajchálajlēne' benne' xíchaje ca' chee bxruze ca' chee xelexegá'ane' dizra' ájala gunē' gudēe' Jesús lu na' benne'

ca'. ¹¹ Ca belén benne' ca' ca gunná Judas, gulebéle'ene', na' gulechebe lazre' xulunézruje' le' dumí. Nadxa Judas guzú lawe' dxexílaje' ájala gudé' Jesús lu na' benne' ca'.

Da dxágudxu chee gusá lázredxu ca gute Jesús

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Zra nedxu chee laní gate dxelawe' xeta xtila da quebe nachixre cua zichaj chee na, ne dxelutie' zríla'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xezr la xu Egipto, na' benne' ca' dxusede Jesús buluchebe' Le':

—¿Gazra dxaca lazru' chéajntu' cheajcuézentu' da gágudxu Laní Pascua?

¹³ Nadxa Jesús gusel-le' chupa benne' ca' dxusédené'. Dxe'e le':

—Le chjaca lu xezre Jerusalén, na' cheajxrácale tu benne' biu ze nu'e tu dxe'e nisa. Le chjácálene', ¹⁴ na' naga xexu'e, xebe benne' xrane xu'u na': “Benne' Wesede cheedxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusédeda'?” ¹⁵ Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuézale da gágudxu.

¹⁶ Nadxa benne' ca' dxusédené' belexedxúaje' gusá'aque', na' belezrine' xezre Jerusalén. Na' guca xúgutē ca da ba guzre Jesús le', na' bulucueze' da xelawe' lu Laní Pascua.

¹⁷ Ca gula chizrela, na' bzin Jesús nen benne' chazrinnu ca' dxusédené'. ¹⁸ Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudé' neda' lu na' benne' ca' dxeledábague' neda'.

¹⁹ Nadxa benne' ca' gulezúa xácheze', ne gulezú lawe' dxuluchebe' Jesús tu tue':

—¿Neda' xca'?

Na' xetúe' cá'aqueze guzre' Le':

—¿Neda' xca'?

²⁰ Nadxa bechebe Jesús, dxe'e le':

—Tu benne' ládujla le'e chazrínmule, benne' dxawe' tu zren nen neda' lu xé'ena nigá. ²¹ Da li gatia' neda', Benne' Gulje' Bénneache, ca da naxúaj na chia' lu xiche chee Dios. Baxache' naca chee benne' na' gudé' neda' lu na' benne' ca' dxeledábague' neda'. Cháwedxa gaca chee bénnea' la ca gúlaje'.

²² Dxácatē zaj zre'e dxelawe', na' gucá'a Jesús xeta xtila, ne guzre' Dios: “Xcalenu'.” Ca gudé' bzúzruje' na, na' bnézruje' na chee benne' ca', ne guzre' le':

—Le gagu na. Da nigá dxulé'e na ca gaca chee bel-la' dxen chia'.

²³ Nadxa guqu'é'e tu da dxé'ajdxu, ne ca gudé guzre' Dios: "Xcalenu", na' bnézruje' na benne' ca', na' xúgute' gulé'aje' late' weaj da na'. ²⁴ Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na ne chee benne' zan. ²⁵ Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

Dxulé'e Jesús nna Pedro quebe núnbe'e Jesús
(Mt. 26.30-35; Lc. 22.31-34; Jn. 13.36-38)

²⁶ Ca gudé belul-le' da gaca ba Dios, na' belegüene' lu Xi'a Xaga Olivo Ca'. ²⁷ Nadxa gunná Jesús, dxé'e le':

—Xúgutele le'e gusán lázrele neda' na'a xela lawe' da naxúaj na lu xiche chee Dios, dxenné': "Gutia' benne' dxuxúe' zrila' ca', na' zrila' ca' welase dínnajba'." ²⁸ Gate te xebana' lu xedxu ba, wexá'a neda' nédxula ca le'e naga nababa Galilea.

²⁹ Nadxa Pedro guzre' Jesús:

—Láqueze xúgute benne' caní xulusán lazre' Lue', neda' québequeze guna' ca'.

³⁰ Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

³¹ Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

Jesús dxuchálajlene' Dios tu lataj nazí le na Getsemaní
(Mt. 26.36-46; Lc. 22.39-46)

³² Nadxa belezrine' tu lataj naga nazí le na Getsemaní, na' gunná Jesús, dxé'e benne' ca' dxusédené':

—Le cueza nigá dxácaté cha'a cheajchálajlena' Dios.

³³ Nadxa Jesús guché'e Pedro, ne Jacobo, ne Juan, na' guzú lau dxezúa xáche'le'e. ³⁴ Na' dxé'e benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

³⁵ Nadxa Jesús guzré'e zéaje' xelate' ca na'la, na' guzúe' sudxú'ala, gunabe' Dios che gaca, quebe té'e xel-la zi' ca da dxal-la' saque' lu zra na'. ³⁶ Ca dxuchálajlene' Dios na', gunné':

—Xrae, xúgute wazéquenu' Lue'. Bselá neda' chee quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

³⁷ Nadxa bezrine' naga zaj zra' benne' ca'an dxusédené', ne xeajxraque' le' dxelásié'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? ³⁸ Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu beła' dxen chee dxate ni'a na'le.

³⁹ Nadxa Jesús guxíajle' da xula zeajchálajlene' Dios, na' tuze ca dxenné'. ⁴⁰ Nadxa ca bezrine', xecha lasa xeajxraque' benne' ca'an dxusédene', dxelásie' lawe' da xu'u bchigala xiaj lawe'. Benne' caní quebe belexezrela lazre' bi xelé'e Le'. ⁴¹ Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzrin zra tea' neda', Benne' Gulje' Bénneache, lu na' benne' dul-la ca'! ⁴² ¡Le chasa! ¡Le chu'u na'a! ¡Ba za benne' gudé'e neda' lu na' benne' ca' dxeledábague' neda'!

Dxelel-le' Jesús

(Mt. 26.47-56; Lc. 22.47-53; Jn. 18.2-11)

⁴³ Dxácate dxuchalaj Jesús caní, na' bzrin Judas, tu benne' nabábalene' benne' chazrinnu ca' dxusede Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchajle ca' chee bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. ⁴⁴ Judas, benne' dxudé'e Jesús lu na' benne' ca' dxeledábague' Le', ba blé'ene' benne' ca' tu da guné' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

⁴⁵ Na' ca bzrine' na', gubigue' lau Jesús, ne dxé'e Le':

—Benne' Wesede.

Na' bnupe' Le'. ⁴⁶ Nadxa benne' ca' gulel-le' Jesús, ne belexeché'e Le' ba nadxéaje'.

⁴⁷ Tu benne' dxunge' Jesús tu zren guléaje' xia nalá chee', na' guchugue' naga tu bi wen zrin chee bxruze blau. ⁴⁸ Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee quél-lale neda', dxugúnele neda' ca tu benne' gubán? ⁴⁹ Xúgute zra guzúa' neda' ládujla le'e dxusédeda' le'e lu xudau', na' cabata' gudél-lale neda'. Da nigá dxaca na chee gaca li ca da naxúaj na lu xiche chee Dios.

⁵⁰ Nadxa xúgute benne' ca' dxusede Jesús bulusán lazre' Le'. Buluzrúnnuje'.

Dxuzrunnuj tu bi cuide'

⁵¹ Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'. ⁵² Na' bsanbe' ladxe' laga da nácube', na' bzrúnnujbe' gala xídezebe'.

Dxezrín Jesús lau benne' ca' chee xu'u lawe' blau chee judío ca'

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Nadxa beleché'e Jesús lau bxruze blau, na' belezraga xúgute benne' xíchajē ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. ⁵⁴ Pedro nawē' Jesús zítu'la, na' bzrinē' chale'aj chee lizre bxruze blau, naga begá'anē' tu zren nen zruza ni'a na' benne' xu'u lawe' ca', dxuluxuché'e dxu'a xi'.

⁵⁵ Na' bxruze blau, ne xúgute benne' chee xu'u lawe' blau chee judío ca' gulíl-lajē' tu da gagu na zria Jesús chee xezequene' xuluzría xi'e Le' chee gatiē', na' quebe bi belezrélene'. ⁵⁶ Benne' zante belún lazre' chee Jesús. Quebe bedxúaj dizra' chee' tuze ca dxeleonné' tue' ne xetúe'. ⁵⁷ Bal-le' belase', na' gulagu zría Jesús da wen lazre', dxeleonné':

⁵⁸ —Netu' ba bémentu' chee', gunné': "Neda' guchínnaja' xudau' nigá da belún bēneache, na' ca gaca chunna zra xechisa' xetú xudau' da quebe xelún bēneache."

⁵⁹ Cá'aqueze quebe butil-le ca da dxeleonné'.

⁶⁰ Nadxa bxruze blau guxase' ládujla xúgute benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxeleonné' chiu' Lue'?

⁶¹ Jesús guzúe' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

⁶² Na' gunná Jesús, dxe'e le':

—Awe', ca' naca'. Walé'ele neda', Benne' Gulje' Bēneache, dxe'a chalá'a xabēla chee Dios, nape' dutē xel-la waca. Walé'ele neda' zezá'a lu beuj bza.

⁶³ Nadxa bxruze blau gucheze' zra lane', na' gunné':

—¿Núzradxa nachínedxu benne' xelagu zria Le'? ⁶⁴ Le'e bache bēnquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dxal-la gatiē'.

⁶⁵ Nadxa bal-la benne' ca' gulezú lawe' dxuluzré'e Le' zrene', na' bulucache' lau Jesús, ne buluzálajē' Le'. Dxeleonné':

—Gunné' xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

Dxenná Pedro quebe núnbe'e Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Pedro guzúe' lu chale'aj zri-la, na' bzrin tu nu'ula wen zrin chee bxruze blau, ⁶⁷ na' ca ble'ebe' Pedro dxe'e dxu'a xi' dxuxuché'e, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

⁶⁸ Na' bechebe Pedro, dxenné':

—Quebe núnbe'a bénnea', ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. ⁶⁹ Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dxé'ebe' benne' ca' zaj zre'e na':

—Benne' nigá naque' tuze benne' ca'an.

⁷⁰ Pedro xecha lasa bzué' Jesús chalá'ala. Xetú chí'idau' benne' ca' zaj zre'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

⁷¹ Nadxa Pedro guzú lawe' dxuzría xi' cuine', ne ben chúchue' xrtizre', gunné':

—Quebe núnbe'a bénnea' dxennale le'e ca'.

⁷² Ca'an guca, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': “Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'.” Na' ca xeajsá lazre' da nigá, gudxzrele'e.

15

Dxezrín Jesús lau Pilato

(Mt. 27.1-2, 11-14; Lc. 23.1-5; Jn. 18.28-38)

¹ Ca guxani' che zila, na' benne' xíchaje ca' chee bxruze ca' belexedupe' nen benne' gula sina ca', ne benne' ca' dxuluxuzájle'e da nadxixruj bea Dios, ne xúgutę benne' chee xu'u lawe' blau chee judío ca'. Guleché'e Jesús nadxéaje', na' buludé'e Le' lu na' Pilato. ² Pilato gunábene' Jesús:

—¿Nacu' Lue' wenná bea chee judío ca'?

Na' bechebe Jesús:

—Ca' naca na, ca ba gunnáu' lue'.

³ Na' benne' xíchaje ca' chee bxruze ca' gulawe' zria Jesús da zante. ⁴ Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawe' zria Lue'.

⁵ Jesús quebe bi dizra' ca buzri'e. Ca' guca, bebánele'e Pilato.

Dxelichaj be'e gate Jesús

(Mt. 27.15-31; Lc. 23.13-25; Jn. 18.38—19.16)

⁶ Pilato zua tu da dxúnqueze' tu iza tu iza gate dxaca Laní Pascua. Dxusane' tu benne' xu'e lizre xia, núteteze benne' xelenaba bénneache ca' le'. ⁷ Lu xu'u lizre xia na' xu'u tu benne' le' Barrabás, benne' nune' tu zren benne' ca' belutię' benne' ca', gate na' gudíl-lalene' benne' Roma ca'. ⁸ Na' belezrín lau

Pilato benne' xezre ca', ne gulezú lawe' dxelenabe' lau Pilato guné' ca dxúnqueze'. ⁹ Na' bechebe Pilato:

—¿Dxaca lázrele le'e gusana' bènea' naque' wenná bea chee judío ca'?

¹⁰ Caní gunná Pilato lawe' da dxeque be'ene' buludé' benne' xíchaje ca' chee bxruze ca' Jesús lu ne'e lawe' da dxelaque' zre'e lazre' Le'. ¹¹ Na' benne' xíchaje ca' chee bxruze ca' beleché'e benne' xezre ca', ne gulegú'u xel-le' le' chee xelexenabe' lau Pilato gusane' Barrabás. ¹² Nadxa Pilato gunábene' benne' ca':

—¿Bi dxaca lázrele le'e guna' chee bènea' naque' wenná bea chee judío ca'?

¹³ Nadxa belexechebe', gulenné' zizraj:

—Bde'e xaga béguaj.

¹⁴ Na' Pilato bchebe' benne' ca':

—¿Bizra da calela nun benne'?

Xecha lasa gulenné' zizraj:

—Bde'e xaga béguaj.

¹⁵ Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca gudé na' bsebage' benne' ca' xeline' Jesús tu xide, na' bde'e Le' lu na' benne' ca' chee xuludé'e Le' xaga béguaj.

¹⁶ Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. ¹⁷ Na' bulugácu'e Jesús tu ladxe' bzawe, ne buluzrí'e xíchaje' tu da zaj nune' nen zruze xaga xeche'. ¹⁸ Nadxa gulezú lawe' dxelenné' zizraj:

—¿Gaca ba wenná bea chee judío ca'!

¹⁹ Na' belú'e xichaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. ²⁰ Ca gudé bulucá'ana dítaje' Le' caní, na' belexegu'e ladxe' bzawe, na' buluxugácu'e Le' zra lá'anaqueze'. Nadxa belexebéaje' Le' chee chjaque' naga xuludé'e Le' xaga béguaj.

Dxuludé'e Jesús xaga béguaj

(Mt. 27.32-44; Lc. 23.26-43; Jn. 19.17-27)

²¹ Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé' na', na' bulusebage' le' gu'e xaga béguaj chee Jesús.

²² Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." ²³ Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. ²⁴ Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tué'.

25 Guca che zílala gate na' buludé'e Jesús xaga béguaj. 26 Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." 27 Cuita Jesús buludé'e le'e xaga béguaj ca' chupa benne' gubán, tue' chalá'a xabela chee', ne xetúe' chalá'a xéglala chee'. 28 Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinnaj ca'."

29 Na' benne' dxeledé'e na' gulenné' schanni' chee Jesús, ne buluté' xíchajé', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. 30 Bselá cuinu' na'a, ne bexetaj le'e xaga béguaj na'.

31 Cá'anqueze belún benne' xíchajé ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'. 32 Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

Dxate Jesús

(Mt. 27.45-56; Lc. 23.44-49; Jn. 19.28-30)

33 Ca bzrin wagubizra, na' guchul-la duté lu xezr la xu nigá tu chí'i wal-la gula. 34 Ca gudé na', na' gunná Jesús zizraj:

—Eloi, Eloi, ¿lama sabactani?

Da nigá zéajé na: "Dios chia', Dios chia', ¿bizr chee na' nusanu' neda'?"

35 Bal-la benne' ca' zaj zre'e na' belenne' na, na' gulenné':

—Le xene. Dxenné' Elías, bénnea' bchálajé' waláz chee Dios.

36 Nadxa tu benne' guzá chégüe', na' xeajlá'awajé' lu xrise uva zichaj tu da dxezrupe na nisa, na' bzué' na lawe' tu xia xtila da bcuene' dxu'a Jesús chee xi'ajé', na' gunná benne' nigá:

—Cuézadxu. Guxúexquedxu che wida Elías chee xulé'tajé' Le'.

37 Nadxa Jesús gudxezre xe'e, na' gútete'. 38 Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajté na zri'la. 39 Na' benne' dxenná be'e lu wedilla, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

40 Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. 41 Nu'ula caní gusá'acalene' Jesús, ne gulácalene' Le' gate na' gudé' naga nababa Galilea.

Cá'anqueze zaj zē na' zánedxa nu'ula xula, nu'ula ca' belezrine' Jerusalén tu zren nen Jesús.

Dxulucache' Jesús lu xēdxu ba

(Mt. 27.57-61; Lc. 23.50-56; Jn. 19.38-42)

⁴²⁻⁴³ Ca za chizrela bzrin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ane', du lazre' guxú'e lau Pilato, na' gunabe' si'e lataj xexu'e Jesús. ⁴⁴ Bebánele'e Pilato ca bēnnene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. ⁴⁵ Gate bēnnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e Jesús. ⁴⁶ Nadxa José guzi'e tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrue' Jesús tu lu ba da ba gudene' le'e xiaj xre, na' bsézxuje' ba na' nen tu xiaj zren. ⁴⁷ María Magdalena, ne María, xrna José belelé'equezne' naga bulucache' Jesús.

16

Dxexebán Jesús ládujla benne' gate

(Mt. 28.1-10; Lc. 24.1-12; Jn. 20.1-10)

¹ Ca gudé zra dxulupá'ane', na' María Magdalena, ne Salomé, ne María, xrna Jacobo, gulezí'e da dxelá zixre chee cheajlelu'e Jesús. ² Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. ³ Na' gulenné', dxelé' ljwezre':

—¿Nuzra cua xiaj da naxezxuj ba?

⁴ Ca gulenné'e, na' belelé'ene' xiaj zren na' da bulusézxuje' ba, ba nadúa na. ⁵ Ca gulu'e lu ba, na' belelé'ene' tu benne' dxe'e chalá'a xabela, nácue' zra lané' tunna da chiche, na' belezrebe'. ⁶ Na' gunná benne' nigá, dxe'e nu'ula ca':

—Quebe zrébele. Le'e dxexílajle Jesús, benne' Nazaret, bēnnea' gudé'e le'e xaga béguaj. Bache bebán bēnnea'. Québedxa xu'e nigá. Le nna' lataj naga gulexrú'e Le'. ⁷ Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'equezle Le' ca ba gunnáqueze'.

⁸ Nadxa nu'ula ca' buluzrúnnuje', besí'aque' dxu'a ba lawe' da belezrébele'e. Quebe nu guléqueze' ca da guca na lawe' da dxelezrébele'e.

Jesús dxulé'e lau María Magdalena

(Jn. 20.11-18)

⁹ Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawe' zate ca' María Magdalena, nu'ula na' bebéaj Jesús gazre be' xriwe' guxú'e. ¹⁰ Nu'ula nigá guxíajē' xeajezre' benne' ca' gulaque' Jesús tuze, zaj zre'e baxácheze, ne dxelebezre'. ¹¹ Gate na' gulenne' nabán Jesús, na' ba ble'e nu'ula nigá Le', quebe guléajle'e.

Dxul'e lau Jesús chupa benne' bsédene'

(Lc. 24.13-35)

¹² Ca gudé na' ble'e lau Jesús nazrala chupa benne' ca' bsédene' zaj xu'e neza le'e xixre'. ¹³ Benne' caní belexebi'e, na' xeajleguezre' benne' xezícala. Cá'anqueze benne' caní quebe guléajle'e.

Jesús dxusebague' benne' gubáz chee' ca' da dxal-la' xelunē'
(Mt. 28.16-20; Lc. 24.36-49; Jn. 20.19-23)

¹⁴ Ca gudé dxa, na' ble'e lau Jesús chinéaj benne' ca' bsédene' ca' zaj dxe'e dxelawe', na' gudil-le' le' lawe' da quebe guléajle'e ba bebane', ne lawe' da zaj naque' lázrdau zide' lawe' da quebe guléajle'e chee benne' ca' belexelé'ene' Le' ca gudé bebane'. ¹⁵ Na' gunné', dxe'e benne' ca':

—Le chjaca du ca naca xezr la xu. Le cu'u lban chee dizra' chawe' chia' chee xelénqueze xúgutē bēneache. ¹⁶ Benne' chéajle'e, ne chue' nisa, la bēnea', na' benne' quebe chéajle'e, wabía xi' bēnea'. ¹⁷ Da dxelunna bea caní xululé'e benne' ca' xeléajle'e chia', xuluchínene' La neda' chee xelexebéajē' be' xriwe'. Xuluchálajē' dizra' nazrala. ¹⁸ Welúxruē' belá' ca', ne che xelé'ajē' da gute benne', quebe bi xelé'quene'. Cá'anqueze wuluxrúa ne'e benne' quebe chawe' zaj zue', na' xelexex-
aque'.

Dxexepe Jesús xabáa

(Lc. 24.50-53)

¹⁹ Ca gudé bchálaj Xránadxu Jesús nen benne' ca', na' Dios bechise' Le' xabáa, na' gudxé'e chalá'a xabela chee Dios. ²⁰ Nadxa benne' ca' guledxúajē', xeajlelu'e lban chee dizra' chawe' nigá du ca naca xezr la xu nigá. Léqueze Xránadxu gúcalēne' le', na' bdxixruj be'e dizra' chee' ne chee xel-la waca ca' da za xabáa da belunē'. ¡Ca'an gaca na!

DIZRA' CHAWE' CA NACA CHEE JESUCRISTO SDA BZUAJ SAN LUCAS

Dizra' dxuchalaj San Lucas, dxē'e Teófilo

¹ Benne' zan ba belunē' ca da gulezéquene' buluzúaje' cáteze naca da guca ládujla dxi'u, ² cáteze na' gulé benne' ca', benne' belelé'ene' nédxudaute ca naca da guca na, na' buluchálaje' dizra' chawe' na'. ³ Cá'anqueze neda' ba bchi'a xánnia' xúgute da ca' gulaca na nédxudaute, na' dxéqueda' chawe' guzúaja' da nigá chiu' cáteze guca, bi nazrí'ite lazra', lue', Teófilo. ⁴ Dxuna' caní chee nézenu' naca na da li ca da ba bululé'ene' lue'.

Gubáz chee xabáa dxuzenne' ca galaj Juan, benne' guchúe' bēnneache nisa

⁵ Gate na' naca Herodes wenná bea chee xēze ca' zaj nababa Judea, na' zua tu bxruze le' Zacarías, benne' nababē' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale bxruze Aarón. ⁶ Zacarías ne zru'ule' Elisabet gulaque' xrlátaje lau Dios, ne dxelunē' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. ⁷ Quebe nu zrí'ine' chilá', lawe' da naca Elisabet na' nu'ula wizre, na' dxúpate' zaj bezúale'e gula.

⁸ Tu zra, gate belexala bxruze ca' naga nababa Zacarías xelunē' zrin lu xel-la bxruze chee' lau Dios, ⁹ cáteze naca da dxelún bxruze ca', na' bexala Zacarías chu'e lu látaj lá'azxa chee Xránadxu lu xudau' chee guzeze' xala. ¹⁰ Dxácate na' dxexxe xala na', ca naca benne' ca' zaj zra' chalé'ajla dxu-luchálajlēne' Dios. ¹¹ Nadxa ble'e lau tu gubáz chee xabáa chee Xránadxu, ze' chalá'a xabela chee cugu naga zría xala dxexxe na. ¹² Ca ble'e Zacarías gubáz chee xabáa na', guzúe' stebe, ne bzrébele'e.

¹³ Gubáz chee xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajlenu' Le', na' nu'ula chiu', Elisabet, walaj tu zri'ine', bi na' guzú' labe' Juan. ¹⁴ Wabéle'enu', ne gaca chiu' tu da ba neza zrente, na' benne' zan xelebenē' lawe' da ba gulaj bidu na'. ¹⁵ Ca'an gaca lawe' da gaca zri'inu' szrente lau Dios. Quebe xí'ajbe' xrise uva wal-la, u da dxusuzre na bēnneache, na' gate gálajtebe' tu súalezqueze Be' Lá'azxa nen lebe'. ¹⁶ Ne chee lebe' benne' zan xelexaque' bi chee Xránadxu Dios. ¹⁷ Juan nigá quia laube' lau Xránadxu, na' Be' na',

ne xel-la waca da gulezúale na Elías, bènea' bchálaje' waláz chee Dios gate nate, xelezúale na lebe', chee guzúabe' tuze benne' ca' zaj naque' xra xrna nen zrí'ine', ne chee gulé'ebe' benne' dxeledábague' Dios chee xelune' ca dxenná xrtizra' Dios. Ca'an gaca, gucá'ana cháwebe' bèneache chee xelezí' lu ne'e Xránadxu.

¹⁸ Zacarías na' bchebe' gubáz chee xabáa:

—¿Ájazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

¹⁹ Na' bechebe' gubáz chee xabáa na':

—Neda' naca' Gabriel, ne naca' wen zrin chee Dios. Le' gusel-le' neda' chee guchálajle'na' lue', ne guzenda' lue' dizra' chawe' nigá. ²⁰ Na'a, lawe' da quebe guxéajle'u da gucha' lue', xegá'anú' quebe gaca nníu' cadxa galaj zri'inu'. Caní gaca na ca zrinte zra chee na.

²¹ Dxácaté na' zaj zra' benne' ca' chalé'ajla, dxelebeze' Zacarías, ne dxelexebánene' lawe' da dxezréle'ene', quebe dxedxúaje' lu lataj lá'azxa. ²² Gate bedxúaj Zacarías, québedxa dxaca nnie'. Nadxa guleque bé'ene' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nnie'.

²³ Ca xeajsé chee zra ca' dxal-la' gun Zacarías zrin chee xudau', na' bezé'e zexíaje' lizre'. ²⁴ Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe': ²⁵ “Xrana' Dios ba bene' chia' da nigá chee québedxa xuluzúa bèneache neda' chalá'ala.”

Gubáz chee xabáa dxuzenne' ca galaj Jesús

²⁶ Ca gudé xrupa beu' gate na' bchálajle' gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret, ²⁷ chee cheajchálajle'ne' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

²⁸ Gubáz chee xabáa na' guxú'e naga zua María na', na' guzre'-be':

—Padiuzre. Dios dxune' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgute nu'ula ca'.

²⁹ Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

³⁰ Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. ³¹ Na'a, zua da gunna Dios chiu', na' galaj tu bidu biu chiu', na' guzú' labe' Jesús. ³² Lebe' gácabe' szren, na' xelennáqueze' naque' Zri'ine Dios szrente, na' Xránadxu

Dios gunē' Lē' wenná bea ca guca xra xrtawē' David, ³³ chee nna bé'etecazē' xezr la xu Israel, na' xel-la dxenná bea chee' quebe cheajséqueze chee na.

³⁴ Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalēna'?

³⁵ Gubáz chee xabáa na' gunné':

—Be' Lá'azxa chee Dios sue' xichaj lázrda'u, na' xel-la waca chee Dios szrentē sua na nen lue'. Chee lē na' bidu na' gálajbe' gácaquezebe' chee Dios, na' sí'queze labe' Zri'ine Dios.

³⁶ Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. ³⁷ Quebe bi de da quebe gaca gun Dios.

³⁸ Nadxa gunná María:

—Neda' nácaqueza' wēn zrin chee Xránadxu. Gun Dios chia' ca da ba gunnáu'.

Na' gubáz chee xabáa na' bezé'e naga zua María na'.

María zeajxúebe' Elisabet

³⁹ Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. ⁴⁰ Na' guxú'ube' lizre Zacarías, ne bgápabe' diuzre Elisabet. ⁴¹ Gate ben Elisabet dizra' da gunné' María, na' bidu na' xú'ube' lē'e Elisabet guxrítebe', na' guzúalē Be' Lá'azxa lē'.

⁴² Nadxa gunné' tu chi'e zizraj:

—Dios ba bēnē' tu da cháwedxa chiu' quézcala chee xúgute nu'ula ca', lawe' da ba zua da bēnna Dios chiu'. ⁴³ ¿Núzraqueze naca' neda', za xrna Xrana' ga zua' neda'? ⁴⁴ Cáteze benda' dizra' da gunnéu', na' guxrite bidu chia' lu lē'a lu xel-la dxebe' cheebe'. ⁴⁵ Ba neza naca na chiu' guxéajlē'u lawe' da gaca li ca da gunná Xránadxu.

⁴⁶ Nadxa gunná María:

Bénne'du xu'a dxue lá'ana na Xrana'.

⁴⁷ Lázrdawa' dxebe' na ca dxun Dios, weselá chia'.

⁴⁸ Lawe' da gudxé' Dios gunne xue chia', nácaqueza' wēn zrin chee'.

Na'a su lau na, xúgute benne' xelenné' nazi'a tu culuen zren chee Dios.

⁴⁹ Dios Szrentē ba bēnē' tu da zrentē chia' neda'.

Chee lē na' lá'azxa naca La Lē'.

⁵⁰ Lē' xexache lázrqueze' xúgute benne' ca' dxelezrebe' Lē'.

⁵¹ Da zrentē ba bēn Lē'.

Bzue' zrila benne' ca' dxulucá'ana szren cuine'.

⁵² Bebéaje' benne' blau ca' lu lataj chee',

ne bechise' benne' dxexruj lazre' ca'.

53 Bnézrujle'e da gulagu benne' dxeledún,
na' benne' gunní'a ca' bca'ane' le' cá'aze.

54 Gúcalene' benne' Israel, benne' wen zrin chee' ca'
lawe' da bezrí lászrqueze' le',

55 ca da guchebe lazre' chee xra xrtáudxu ca',
chee Abraham, ne chee benne' xrtie' ca' chadía chacanna.

56 María begá'analebe' Elisabet ca chunna beu', na' ca gudé
na' bezrinbe' lízrebe'.

Ca gulaj Juan, benne' bchue' bénneache nisa

57 Ca gudé na' guxá' beu' chee Elisabet na' chee galaj bidu
chee', na' guzane' tu bi biu chee'. 58 Benne' walírz chee' ca',
ne xrtia ljwezre' belezrine' dxelebene' nen le', gate belenne'
Dios bezrí lászrele'e le'. 59 Gate guca xrunu' zra, belezrine' chee
xelechúgue' lu xpélabe' da gulé'e na naca be' bi chee Dios, na'
gulaca lazre' xuluzé' labe' Zacarías ca le' xrabe'.

60 Na' gunná xrnabe':

—Quebe gaca. Dخال-la' si' labe' Juan.

61 Na' gulé'e le':

—¿Bizr chee na'? Quebe nu chilá' xrtia ljwézrele le' ca'.

62 Na' buluchebe' xra bidu na', bulutá ne'e chee xelenézene'
ájazra guzúe' labe'. 63 Na' xrabe' na' gunabe' tu blágadau',
na' bzuaje' le'e na: Juan si' labe'. Na' xúgute benne' ca'
belexebánene'. 64 Ca' guca Zacarías benné', na' guzú lawe'
dxue lá'ane' Dios. 65 Ca belelé'ene' da nigá, xúgute benne'
walírz chee' belexebánene', na' ca naca xezre zaj nnita laduj
xi'a ca ga nababa Judea, buluchálaje' ca da guca. 66 Xúgute
benne' belenne' na, gulezú lawe' dxelenné' lu lászrdawe', ne
buluchebe ljwezre' tue' xetúe':

—¿Ájazraqueze gun bi nigá?

Naca bea na Xránadxu zúalene'-be'.

Ca da bil-la Zacarías

67 Na' Be' Lá'azxa guzúalene' Zacarías, xra bidu nigá, na'
bchálaje' waláz chee Dios, gunné':

68 ¡Gaca ba Xránadxu, Dios chee xezre Israel!

Ba ble'e naga zúadxu, bénneache chee', na' bselé' dxi'u.

69 Ba gusel-le' tu benne' wál-lale'e, weselá cheedxu.

Bénnea' gulaj ládujla xrtia David, benne' wen zrin chee'.

70 Ca'an guchebe lazre' Dios lu dxu'a benne' ca' buluchálaje'
waláz chee' nédxudaute.

71 Guchebe lazre' guselé' dxi'u lu na' benne' dxelezzé'e dxi'u,
ne lu na' benne' dxelecuídené' dxi'u.

72 Xezrí lazre' xra xrtáudxu ca',
ne quebe gal-la lazre' xel-la wezría lá'azxa chee'.

73 Da nigá naca na da guchebe lazre' Dios da bzua chache' nen
xra xrtáudxu Abraham,

da naca tu da gunne' cheedxu dxi'u.

⁷⁴ Guchebe lazre' guselé' dxi'u lu na' benne' dxeleze' dxi'u chee gaca gundxu zrin chee', ne quebe zrébedxu,

⁷⁵ ne gácadxu xrlátaje lau Le', ne gácadxu bi cheéqueze' xúgute zra naca bandxu.

⁷⁶ Lue', zrí'ina'dau', sí'queze lau' bi guchálajqueze waláz chee Dios szrente,

lawe' da quia lau' lau Xránadxu, salju' neza chee Xránadxu,

⁷⁷ Guzénenu' bénneache chee', Le' gunité lawe' dul-la chee', ne guselé' benne' ca'.

⁷⁸ Ca'an gaca lawe' da dxexezrí lazre' Dios dxi'u.

Dxune' na'a dxalaj tu xi' chee xabáa da dxusení' cheedxu,

⁷⁹ na' gusení na naga zaj zra' benne' zaj zre'e lu na' xel-la gute, chee cu'u na dxi'u lu neza xrtante lau Dios.

⁸⁰ Bidu na' bgúlabe', ne bgula bénne'du xu'ube' chawe' lu da naca chee Dios. Guzúaquezbe' le'e xixre' lawe' lataj cadxa bzrin zra ble'e laube' xezre Israel.

2

Ca guca gate gulaj Jesús

(Mt. 1.18-25)

¹ Ca lu zra na' gate dxenná bea Augusto, benne' xezre Roma, benne' dxenná be'e xúgute cue' xezr la xu, le' gunná bé'ene' xelú'u lu xiche xúgute benne' zaj zre'e xezr la xu. ² Da nigá naca da nédxudau' gulú'u bénneache lu xiche. Guca caní gate naca Cirenio benne' zaj xu'u lu ne'e xezre ca' zaj nababa Siria.

³ Xúgute bénneache dxun na ba xen chjaque' lu xezre naga zaj nababe' chee xelu'e lu xiche. ⁴ Chee le' na' José guzé'e lu xezre Nazaret, da nababa Galilea, chee bzrine' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. ⁵ José guxíaje' Belén chee chu'e lu xiche tu zren nen María. María nigá ba nachébebe' guchaga ná'alebe' José, na' ba bnezruj Dios cheebe'. ⁶ Dxácaté na' zaj zre'e lu xezre Belén, na' bzrin zra san María bidu chee'. ⁷ Lu xezre na' gulaj bidu nedxu chee', na' bchele'-be' ládxe'du ca', na' gúxrue'-be' xu'u naga dxelún chi'e da dxelagu bea ca', lawe' da quebe ga bzrela tu lataj lu xu'u naga che'e.

Dxuluchálajle gubáz chee xabáa benne' ca' dxuluxúe' zrila' ca'

⁸ Gagu cuita xezre Belén zaj zra' benne' ca' dxuluxúe' zrila' ca', dxelexegá'ane' le'e xixre' chizrela, dxuluxúe' zrila' chee' ca'. ⁹ Naga zaj zre'e ble'e lau tu gubáz chee xabáa chee Xránadxu. Na' xel-la naxaní' chee Xránadxu Dios bsaní na naga zaj zre'e. Ca'an guca, belezrébele'e. ¹⁰ Na' gubáz chee xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee dizra' nigá xebele'e xúgute bénneache. ¹¹ Na'a, lu xezre chee David, ba gulaj tu bidau' gácabe' weselá cheele. Bi nigá naque' Cristo, Xránadxu. ¹² Da nigá gaca na tu da gunna bea na cheele. Cheajxrácale bidu dxe'ene nigá, dxélabé' ládxe'du ca', ne debe' tu xu'u naga dxelún chi'e da xelagu bea ca'.

¹³ Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lá'ané' Dios, dxelenné':

¹⁴ ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee bénneache,

benne' dxeluné' ca da dxaca lazre' Dios!

¹⁵ Gate besí'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

¹⁶ Ca'an guca, besí'aca zézxuje', na' xeajlexraque' María ne José, ne bidu dxe'ene na', debe' xu'u naga dxelún chi'e da xelagu bea ca'. ¹⁷ Gate belelé'ene' bidu na', na' buluchálajlene' benne' ca' ca da gunná gubáz chee xabáa ca da naca chee bidu na'. ¹⁸ Na' xúgute benne' ca' belenne' da nigá belexebánele'ene' ca da gulenná benne' caní. ¹⁹ María bcache' da nigá lu xichaj lázrdawe', na' blaba lazre' ca naca da nigá. ²⁰ Ca'an guca besí'aca benne' ca' dxuluxúe' zrila', dxulucá'ana szrene' Dios, ne dxelúe lá'ané' Le' ca naca xúgute da belenne', ne da belelé'ene', lawe' da guca xúgute ca da guzre gubáz chee xabáa na' le'.

Ca guca gate belú'e bidu Jesús lu xudau'

²¹ Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

²² Ca bzrin zra chee xeluné' ca bdxixruj bea Moisés chee xelexexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. ²³ Beluné' caní lawe' da ba naxúaj lu da nadxixruj bea Xránadxu Dios da dxenná na caní: Xúgute bi biu, bi nedxu gálajbe' dxal-la' guzúale-be' chee Xránadxu Dios. ²⁴ Na' xjaque' xeajlegu'e dxen chee be xíxre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxínnedau'.

²⁵ Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebeze' benne' sel-la Dios chee guselé' bénneache Israel.

Zúale Be' Lá'azxa chee Dios Simeón na'. ²⁶ Be' Lá'azxa ba guzre' Simeón na' quebe gatię' cadxa lé'eng' Cristo, benne' na' sel-la Xránadxu Dios. ²⁷ Simeón nigá guxíaję' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xelunę' cheebe' ca da bdxixruj be'e Moisés, ²⁸ na' Simeón na' guquę'e bidu na'. Bnide'-be', ne be lá'ane' Dios, gunné':

²⁹ Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchebe lazru' chia', naca' wen zrin chiu'.

³⁰ Nen xiaj láuqueza' ba ble'eda' Benne' Weselá,

³¹ Bénnea' ba bzu' chee gácalenę' xúgutę bénneache.

³² Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bénneache chiu', benne' Israel.

³³ José ne xrna Jesús belexebánele'ene' ca da gunná Simeón chee bidu Jesús. ³⁴ Nadxa Simeón gunabe' lau Dios gunę' chee' da chawe', na' guzre' María, xrna Jesús:

—jGunná'xque nigá! Bidu nigá, Dios nuzúę' lebe' chee gunbe' chee benne' Israel ca', cheajlecházie' benne' zantę lu na' da xriwe', na' benne' zantę xellexase' lau Dios. Lebe' gácabe' tu da dxunna bea chee Dios, na' benne' zantę xuluzúę' lebe' chalá'ala. ³⁵ Ne chee lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

³⁶ Cá'anqueze zua na' tu nu'ula dxenné' waláz chee Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuide'te, na' guzúalene' benne' chee' gazre iza. ³⁷ Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxunę' zrin chee Xránadxu Dios te zra chizrela. Dxunę' gubasa, ne dxuchálajlene' Dios. ³⁸ Ana na' bzrinqueze' na', na' ca gudé guzre' Dios: "Xcalenu'", na' guzú lawe' dxuchálaje' chee bidu Jesús nen xúgutę benne' ca' dxelebeze' benne' na' sel-la Dios chee guselé' benne' Jerusalén ca'.

Ca guca gate belexezrine' xezre Nazaret

³⁹ Ca belunę' xúgutę ca da dxenná da nadxixruj bea Xránadxu, nadxa besiá'que' xjaque' naga nababa Galilea, na' belexezrine' xezre Nazaret da naca lazrie'. ⁴⁰ Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

Ca guca gate bzrin bidu Jesús lu xudau'

⁴¹ Xra xrna' Jesús, tu tu iza dxjá'aque' xezre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. ⁴² Ca guque Jesús chazrinnu iza, na' xjá'aque' xúgute' Jerusalén, ca dxelúnqueze' ca dxaca laní. ⁴³ Ca gudé laní, na' besía'que', na' bidu Jesús begá'anabe' Jerusalén, ne quebe guleque be'e xrnabe', ne José. ⁴⁴ Dxeléquene' Jesús zezabe' ládujla benne' zan ca', na' besía'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, ⁴⁵ quebe belexezréne'-be'. Ca'an guca belexebi'e zeajxá'aque' Jerusalén chee cheajlexedílje'-be' na'.

⁴⁶ Ca gudé guca chunna zra, nadxa belexezréne'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dxelenné', ne dxuchébebe' benne' ca'. ⁴⁷ Xúgute' benne' ca' dxelenne' dxelexebánene' cheebe' ca naca xel-la sina cheebe', ne ca naca da dxuchálajlebe' le'. ⁴⁸ Gate belelé'e xra xrnabe' lebe', na' belexebánene'. Na' gunná xrnabe', dxe'e-be':

—Zri'ina', ¿bizr chee na' benu' caní nen netu'? Cadite stebe ba guzúantu' chiu' dxexilajntu' lue', xrau' ne neda'.

⁴⁹ Nadxa Jesús dxe'ebe' le':

—¿Bizr chee na' dxexilajle neda'? ¿Quebe nézele le'e dxal-la' guna' neda' da naca chee Xra'?

⁵⁰ Xra xrnabe' quebe guléajni'ine' ca da gúzrebe' le'.

⁵¹ Nadxa bezálēbe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute' da nigá lu lázrdawe'. ⁵² Jesús zéajbe' dxegúlabe' lu bel-la' dxen cheebe', ne lu xichaj lázrdaube', na' dxedxúajquezebe' chawe' lau Dios, ne lau bēnneache.

3

Juan, benne' dxuchúe' bēnneache nisa, dxuchálaje' xrtizra' Dios le'e xixre'

(Mt. 3.1-12; Mr. 1.1-8; Jn. 1.19-28)

¹ Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe, benne' biche Herodes, dxenná be'e naga nababa Iturea, ne Traconite, na' Lisantias dxenná be'e naga nababa Abilinia.

² Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. ³ Juan na' gudé' ca naca xézredu ca' zaj nnitan' chalá'a weaj xegu Jordán, na' dxe'e benne' ca' dxal-la' xelexebí'i lazre', ne xeledxúe' nisa chee gunite lau Dios chee xtul-le'. ⁴ Caní guca ca na' gunná Isaías, benne' bchálaje' waláz chee Dios, gunné':

Nen tu chi'i bénnea' dxenné' zizraj le'e xixre' lawe' lataj.

Dxenné':

Le gucueza neza naga te Xránadxu.

Le xulí chawe' neza lase chee'.

⁵ Ca naca zrítudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

⁶ Ca naca bénneache xeelé'eng' Benne' Weselá sel-la Dios.

⁷ Gate benne' ca' belezrine' lau Juan chee' xeledxúe' nisa, na' le' dxé'e benne' ca':

—Xrtia bela snia. ¿Ble'e nu benne' le'e chee' cuásale ca naca xel-la dxezrá'a chee' Dios da ba za? ⁸ Le gun da gul'é'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéqueng' xexunge' xiaj caní xrtia Abraham. ⁹ Xa waga ba de cuásate na chee' chugue' xaga ca', na' xúgute xaga da quebe dxalebía na da xixre chawe' welechugue na, na' xuluzré'e na lu xi'.

¹⁰ Nadxa benne' ca' buluchebe' le':

—¿Bi dxal-la' guntu'?

¹¹ Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bénnea' quebe bi de chee'.

¹² Cá'anqueze belelá' benne' wechizruj ca' chee' xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

¹³ Juan guzre' le':

—Quebe guchízrujle da zrendxa ca da nadxixruj bea na.

¹⁴ Cá'anqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee' cuale dumí chee', na' le be nen cadite názrujle.

¹⁵ Benne' zaj zre'e na' zaj zué' stébe, na' dxuluchebe' lu lázrdawe' che Juan na' naque' Cristo, benne' nasel-la Dios.

¹⁶ Juan na' gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e.

¹⁷ Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

¹⁸ Ca naca dizra' nigá, ne xezícadxa dizra' zan bchálajleñe' benne' ca' ca naca dizra' chawe' chee' Dios. ¹⁹ Juan gudille' Herodes, benne' dxenná be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes ²⁰ béndxaqueze' da calela, gulu'e Juan lizre xia.

Da guca gate gudxúa Jesús nisa

(Mt. 3.13-17; Mr. 1.9-11)

²¹ Gate ne dxuchúa Juan na' bènneache nisa, cá'aqueze Jesús gudxúe' nisa, na' gate dxuchálajleñe' Dios, na' bxfalaj xabáa, ²² na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazrí'ite lazra'. Dxezaca ba lázreleña' Lue'.

Ca naca xra xrtau Jesucristo

(Mt. 1.1-17)

²³ Jesús nape' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

²⁴ Elí na' guque' zri'ine Matat,
Matat na' guque' zri'ine Leví,
Leví na' guque' zri'ine Melqui,
Melqui na' guque' zri'ine Jana,
Jana na' guque' zri'ine xetú José.

²⁵ José nigá guque' zri'ine Matatías,
Matatías na' guque' zri'ine Amós,
Amós na' guque' zri'ine Nahum,
Nahum na' guque' zri'ine Esli,
Esli na' guque' zri'ine Nagai.

²⁶ Nagai na' guque' zri'ine Maat,
Maat na' guque' zri'ine xetú Matatías,
Matatías nigá guque' zri'ine Semei,
Semei na' guque' zri'ine xetú José,
José nigá guque' zri'ine Judá.

²⁷ Judá na' guque' zri'ine Joana,
Joana na' guque' zri'ine Resa,
Resa na' guque' zri'ine Zorobabel,
Zorobabel na' guque' zri'ine Salatiel,
Salatiel na' guque' zri'ine Neri.

²⁸ Neri na' guque' zri'ine xetú Melqui,
Melqui nigá guque' zri'ine Adi,
Adi na' guque' zri'ine Cosam,
Cosam na' guque' zri'ine Elmodam,
Elmodam na' guque' zri'ine Er,

²⁹ Er na' guque' zri'ine Josué,

Josué na' guque' zri'ine Eliezer,
 Eliezer na' guque' zri'ine Jorim,
 Jorim na' guque' zri'ine xetú Matat,
³⁰ Matat nigá guque' zri'ine xetú Leví,
 Leví nigá guque' zri'ine Simeón,
 Simeón na' guque' zri'ine xetú Judá,
 Judá nigá guque' zri'ine xetú José,
 José nigá guque' zri'ine Jonán,
 Jonán na' guque' zri'ine Eliaquim,
³¹ Eliaquim na' guque' zri'ine Melea,
 Melea na' guque' zri'ine Mainán,
 Mainán na' guque' zri'ine Matata,
 Matata na' guque' zri'ine Natán.
³² Natán na' guque' zri'ine David,
 David na' guque' zri'ine Isaí,
 Isaí na' guque' zri'ine Obed,
 Obed na' guque' zri'ine Booz,
 Booz na' guque' zri'ine Salmón,
 Salmón na' guque' zri'ine Naasón.
³³ Naasón na' guque' zri'ine Aminadab,
 Aminadab na' guque' zri'ine Aram,
 Aram na' guque' zri'ine Esrom,
 Esrom na' guque' zri'ine Fares,
 Fares na' guque' zri'ine xetú Judá,
³⁴ Judá nigá guque' zri'ine Jacob,
 Jacob na' guque' zri'ine Isaac,
 Isaac na' guque' zri'ine Abraham,
 Abraham na' guque' zri'ine Taré,
 Taré na' guque' zri'ine Nacor.
³⁵ Nacor na' guque' zri'ine Serug,
 Serug na' guque' zri'ine Ragau,
 Ragau na' guque' zri'ine Peleg,
 Peleg na' guque' zri'ine Heber,
 Heber na' guque' zri'ine Sala,
³⁶ Sala na' guque' zri'ine Cainán,
 Cainán na' guque' zri'ine Arfaxad,
 Arfaxad na' guque' zri'ine Sem,
 Sem na' guque' zri'ine Noé,
 Noé na' guque' zri'ine Lamec,
³⁷ Lamec na' guque' zri'ine Matusalén,
 Matusalén na' guque' zri'ine Enoc,
 Enoc na' guque' zri'ine Jared,
 Jared na' guque' zri'ine Mahalaleel,
 Mahalaleel na' guque' zri'ine xetú Cainán.
³⁸ Cainán na' guque' zri'ine Enós,

Enós na' guque' zri'ine Set,
 Set na' guque' zri'ine Adán,
 Adán na' guque' ca zri'inequeze Dios.

4

Satanás da xriwe' dxilaj lazre' na ájala gusebaga na Jesús dul-
la

(Mt. 4.1-11; Mr. 1.12-13)

¹ Jesús, zúale Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj. ² Na' guzúe' chua zra, na' Satanás da xriwe' gudilaj lazre' na ájala si xe na Le'. Quebe bi gudagu Jesús da chua zra ca', na' ca gude' na' gudune'. ³ Nadxa gunná da xriwe', guzre na Le':

—Che da li nacu' Lue' Zri'ine Dios, ben xelexaca xiaj caní xeta xtila.

⁴ Na' bechebe Jesús:

—Naxúajqueze na lu xiche chee Dios, dxenné': Quegá nen xeta xtilaze gaca ban bénneache, san cá'anqueze nen xrtizra' Dios gaca ban bénneache.

⁵ Nadxa da xriwe' guché na Jesús tu xi'a sibe, na' chadite ble'e na Le' xúgute cue' xezr la xu da zaj nnita lu xezr la xu nigá, ⁶ na' guzre na Le':

—Neda' gunna' Lue' ca naca xel-la dxenná bea nigá, ne xel-la szren chee xúgute xezr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. ⁷ Gunna' na chiu' che lue' guzú zribu' lawa', ne gucá'ana szrenu' neda'.

⁸ Jesús bechebe':

—Gucuasa lue', Satanás, lawe' da dxenná xiche chee Dios, dxé'e bénneache: “Bca'ana szren Xranu' Dios, ne ben zrin chee tuze Le'.”

⁹ Nadxa da xriwe' na' guché na Jesús lu xezre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxezu' lu xu, ¹⁰ lawe' da lu xiche chee Dios dxenné':

Dios gusebague' gubáz chee xabáa chee' ca' xuluxue' Lue'.

¹¹ Xelechísaqueze' Lue' nen ne'e, chee quebe gaca we' ni'u lawe' xiaj ca'.

¹² Jesús bechebe':

—Cá'anqueze naxúaj na lu xiche chee Dios, dxé'e bénneache: “Quebe guchínenu' ca dxaca lazru' Xranu' Dios.”

¹³ Gate da xriwe' québedxa bezrela lazre' na ájala gun zréaje na Jesús, na' becuasa na tu chi'i.

Jesús dxune' zrin chee' naga nababa Galilea
 (Mt. 4.12-17; Mr. 1.14-15)

¹⁴ Na' Jesús bezrine' Galilea, ba nápalē'e xel-la waca chee Be' Lá'azxa, na' ca naca xézredu ca' zaj nababa na' buluchálaj bēneache ca naca xel-la waca chee'. ¹⁵ Jesús bsédene' benne' ca' tu tu lu xudau' ca', na' xúgute' belúe lá'anē' Le'.

Jesús dxexezrine' Nazaret

(Mt. 13.53-58; Mr. 6.1-6)

¹⁶ Nadxa Jesús bezrine' Nazaret, xézre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxune', chee gulabe' da naxúaj na lu xiche chee Dios. ¹⁷ Buludée' Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabe' naga naxúaj da dxenná:

¹⁸ Be' Lá'azxa chee Xránadxu zúalēne' neda', lawe' da guquē'e neda' chee guchálajlena' benne' baxache' ca' dizra' chawe' chee'.

Gusel-le' neda' chee xexuna' benne' ca' quebe chawe' zaj zuē', ne chee guzenda' benne' ba zaj nadxéaje' lu da zrinnaj, waca xeledé',

ne chee xexuna' lau benne' la chul-la ca',

ne chee guselá' benne' dxelezaca zi'e,

¹⁹ ne chee guzenda' bēneache ba bzrin zra Xránadxu Dios gucá'anē' le' chawe'.

²⁰ Nadxa Jesús butube' xiche na', na' bdeē' na lu na' benne' dxuxúe' xu'u na', na' bebé'e. Xúgute' benne' zaj zre'e lu xu'u na' dxelenné'e Le', ²¹ na' Jesús guzú lawe' dxē'e benne' ca':

—Na'a zra guca ca da naxúaj na laule le'e.

²² Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchebe ljwezre':

—¿Quegá benne' nigá zri'ine José?

²³ Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xele neda': Ca da bēntu' benu' lu xézre Capernaum, cá'anqueze ben na lázriu' nigá na'a.

²⁴ Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazriē'. ²⁵ Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. ²⁶ Dios quebe gusel-le' Elías lau netú nu'ula, nate benne' chee', zuē' xezr la xu Israel. Gusel-le' le' lau tu nu'ula, nate benne' chee', zuē' lu xezre Sarepta, da zua na gagu naga dxē' xezre Sidón. ²⁷ Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa

Eliseo, benne' bchálaje' waláz chee Dios, na' netúe' quebe bexaque'. Tuze Naamán, benne' xezr la xu Siria bexaque'.

²⁸ Gate belén benne' ca' zaj zre'e xu'u na' da nigá, na' belezrá'ale'e. ²⁹ Na' gulase', ne belexebéaje' Jesús xezre na', na' beleché'e Le' dxu'a chjéaj naga zria xezre na', chee xuludx-ixre' Le' na'. ³⁰ Na' Jesús bedé'e ládujla benne' ca', na' bezé'e zexíaje'.

Jesús dxexune' tu benne' xu'e be' xriwe'

(Mr. 1.21-28)

³¹ Nadxa Jesús bexíaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee judío ca'. ³² Belexebánene' ca naca da dxusédene', lawe' da dxuchálaje' ca tu benne' nape' xel-la dxenná bea.

³³ Lu xu'u na' zua tu benne' xu'e be' xriwe', na' dxebezre xe'e, ³⁴ dxenné':

—Bsan netu'. ¿Bizr chee na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee Dios.

³⁵ Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na chee'. ³⁶ Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen dute' xel-la dxenná bea chee', ne nen xel-la waca, na' be' xriwe' ca' dxeledxúaj na.

³⁷ Na' buluchálaje' ca naca chee Jesús xúgute' lu xezre ca' zaj nababa na'.

Jesús dxexune' xrna zru'ula Pedro

(Mt. 8.14-15; Mr. 1.29-31)

³⁸ Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexune' le'. ³⁹ Jesús gubigu'e cuite', na' gudil-le' da la na', na' bedxúaj na. Ca ná'queze bexásate', na' guzú lawe' dxuseni'e da xelawe'.

Jesús dxexune' benne' zan quebe chawe' zaj zue'

(Mt. 8.16-17; Mr. 1.32-34)

⁴⁰ Ca dxebía gubizra, benne' ca' zaj nnita' benne' quebe chawe' zaj zue' lizre' belú'e le' lau Jesús, na' Le' bze ne'e tu tu benne' ca', ne bexune' le'. ⁴¹ Cá'anqueze zánete' be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'e na lataj xelenné na, lawe' da zaj neze na naca Le' Cristo.

*Jesús dxuchálaje' naga nababa Galilea**(Mr. 1.35-39)*

⁴² Ca dxani'sise', bdxuaj Jesús xezre na', guxíaje' naga xea-súe' tuze'. Na' benne' ca' belexexílaje' Le', na' belezrine' xuluzague' Le' chee quebe xeze'e. ⁴³ Jesús gunné':

—Dxun na ba xen guzenda' bènneache xezícadxa xezrdu ca' ca dxenná bea Dios, lawe' da chee guna' caní gusel-le' neda'.

⁴⁴ Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

5*Dxelezene' bela zan**(Mt. 4.18-22; Mr. 1.16-20)*

¹ Gate zua Jesús dxu'a nísadau' chee Genesaret, na' belezrín benne' zan, ne buluchídetē' Le', lawe' da dxelaca lazre' xellenē' xrtizra' Dios. ² Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj chee' ca'. ³ Nadxa guxú'u Jesús tu lu da dxedá lawe' nísadau', da naca na chee Simón, na' guzre' Simón guzrigue' na xelate' lu nísadau' na'. Jesús gudxé'e lu da dxedá lawe' nísadau' na', na' guzú lawe' dxusédenē' benne' ca'. ⁴ Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj chee'le na' chee senle bela.

⁵ Simón bechebe':

—Benne' Wesede, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

⁶ Ca belunē' ca gunná Jesús, na' bela zante gulezene', na' gúcate wadxeza xixruj na'. ⁷ Nadxa bulutá ne'e gulenné' benne' ljwezre' zaj zre'e xetú lu da dxedá lawe' nísadau' chee xelácalene' le'. Benne' ca' belezrine', na' bulusezrate' dxúpatē' da dxedá lawe' nísadau' ca', na' gulácate na zi'i, ne dxácate welaze na lu nísadau'. ⁸ Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

⁹ Caní gunná Simón lawe' da dxezrébele'e ne chee da guca na, ne cá'anqueze dxelezrebe benne' ljwezre' ca', gate belelé'ene' bela zan ca'. ¹⁰ Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atēla su lau' senu' bènneache lu da naca chee Dios.

¹¹ Nadxa, ca belexebéaję' da dxedá lawe' nísadau' na' dxú'ela nísadau', na' bulucá'anę' ca naca da ca', na' zjácälęne' Jesús.

Jesús dxexunę' tu benne' dxé'ene' wę' guzru'

(Mt. 8.1-4; Mr. 1.40-45)

¹² Gate Jesús zuę' tu xęzre, na' bzrin tu benne' dxé'ene' wę' guzru', na' ca blé'ene' Jesús, bzu zribe', ne gudíxrujtę lawę' lu xu, na' bca'ana szrenę' Lę', gunné':

—Xran, che dxaca lazru', waca xexunu' neda'.

¹³ Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', wę' guzru' na' bedxúajtę na. ¹⁴ Jesús bsebague' bėnnea' quebe nu xę'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí cheę xexádxęu' lau Dios ca da gunná be'e Moisés cheę xeleneze benne' ba bexacu' ca naca xízrawę' chiu'.

¹⁵ Ca naca xel-la waca cheę Jesús bzrılıjdxá na, na' benne' zante belezrague' lau Jesús cheę xelenne' da dxuchálaję', ne cheę xexunę' le' ca naca xízrawę' cheę'. ¹⁶ Nadxa Jesús bezé'e na', na' bzrine' naga quebe nu chilá' benne', na' bchálajęne' Dios.

Jesús dxexunę' tu benne' naxrú'une ni'a ne'e

(Mt. 9.1-8; Mr. 2.1-12)

¹⁷ Tu zra zua Jesús dxusėdene', na' bal-la benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxę'e na', benne' zá'aque' ca naca xėzredu ca' zaj nababa Galilea, ne xęzre ca' zaj nababa Judea, ne cheę xęzre Jerusalén, na' zúalę xel-la waca cheę Xránadxu Dios Jesús, na' bexunę' benne' ca' quebe chawe' zaj zuę'. ¹⁸ Nadxa belezrín tapa benne' zaj nu'e tu benne' zua zri ni'a ne'e, deę' tu lu blaga', na' gulaca lazre' xelegú'e le' lu xu'u cheę xelíxruę' le' lau Jesús. ¹⁹ Quebe guca xelezrine' lau Jesús lawe' da zrále'e benne' zan ga na'. Nadxa gulegüėne' chju'ula, ne gulesaluje' chju'u, na' bululėtaję' benne' na' de' lu blaga' ládujla benne' zan ca' lau Jesús. ²⁰ Gate ble'e Jesús ca dxelėajle benne' ca' cheę', na' guzre' benne' quebe chawe' zuę':

—Bėnne'dau', ba bnite lawa' dul-la chiu'.

²¹ Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawę' dxelenné' lu xichaj lázrdawę': ¿Nuzra benne' nigá, dxenné' schanni' cheę Dios? Quebe nu benne' séquene' gunite lawę' dul-la cheę bėnneache. Tuze Dios gaque'.

²² Jesús dxėquebe'ene' da dxelenné' lu xichaj lázrdawę', na' guzre' benne' ca':

—¿Bizr cheę na' dxėquele le'e caní? ²³ ¿Bízrala na quebe naca na stębe guna', che xapa' benne' nigá: Ba bnite lawa' dul-la

chiu', u che xapa' le': Guxasa bexíaj? ²⁴ Gulé'eda' le'e neda', Benne' Gulje' Bénneache, napa' xel-la dxenná bea lu xęzr la xu nigá chee gunité lawa' dul-la chee bénneache.

Nadxa guzre' benne' na' naxrú'une ni'a ne'e:

—Lue' dxapa', bexasa, bexúa blaga' chiu', ne bexíaj.

²⁵ Ca gunné' ca', bexásate benne' na' lau xúgute benne' ca', na' bequé'e blaga' chee', ne bezé'e zexíaje' lizre' zeajxé lá'ane' Dios. ²⁶ Xúgute benne' ca' belexebánene', na' belúe lá'ane' Dios, ne nen xel-la dxelezrebe gulenné':

—Na'a ble'edxu da dxebánequezdxu.

Jesús dxenné' Leví

(Mt. 9.9-13; Mr. 2.13-17)

²⁷ Ca gudé na' bezá'a Jesús, na' blé'ene' tu benne' dxuchizruje' waláz chee xęzre Roma, le' Leví. Dxe'e naga dxuchízruje', na' guzre' le':

—Ben neda' tuze.

²⁸ Na' guxasa Leví, bca'ane' ca naca chee' ca', na' guxíajlene' Jesús.

²⁹ Ca gudé na', Leví gulu'e tu xrche' zrente lizre' chee bca'ana szrene' Jesús, na' zrále'equeze na' xezícadxa wechizruj ca', ne xezícadxa benne' zaj dxe'e dxágulene' benne' ca'.

³⁰ Na' benne' xudau' fariseo ca', ne benne' ca' dxuluxuzájle'e da nadxixruj bea na gulezú lawe' dxelezí tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

³¹ Jesús bechebe':

—Quebe zaj nachine benne' zaj zua chawe' nu benne' dxexúné' le'. Benne' quebe chawe' zaj zue' dxelechínene' le'.

³² Neda' quegá za'a dxennéa' benne' xrlátaje. Za'a dxennéa' benne' dul-la, chee xelexebí'i lazre'.

Dxuluchebe' Jesús ca naca chee gubasa

(Mt. 9.14-17; Mr. 2.18-22)

³³ Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusedenu' tu dxelé'aj dxeláguzqueze'?

³⁴ Jesús bechebe':

—¿Wazéquele xele benne' zaj zra' laní chee wechaga na' xelune' gubasa dxácate na' zua benne' wechaga na' nen benne' ca'? ³⁵ Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

³⁶ Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' guné', na' guzría xi'e ca naca zre' cube na', na' ládxé'du cube na' quebe gulé'e na cháwedau' nen ladxe' gula na'. ³⁷ Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. ³⁸ Chee le na' dxal-la' cá'adxu xrise uva cube lu bzude xide cube, na' dxúpaté na' xegá'ana chawe' na. ³⁹ Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

6

Benne' ca' dxuséde Jesús dxelálaje' dau zrua' xtila lu zra lá'azxa chee judío ca'

(Mt. 12.1-8; Mr. 2.23-28)

¹ Tu lu zra lá'azxa chee judío ca', gudé Jesús naga naxaza zrua' xtila, na' benne' ca' dxusédené' zjaque' dxelálaje' dau zrua' xtila, na' dxelezrube na nen ne'e, ne dxelawe' zrua' xtila na'. ² Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lá'azxa cheedxu?

³ Jesús bechebe':

—¿Quebe ne gulábale le'e ca ben David ne benne' ljwezre' ca' gate guleduné'? ⁴ Guxú'u David na' tu lu xudau' chee Dios, ne guqué'e xeta xtila da gulú'u bxruze lau Dios, na' gudawé' na, ne bnézrujte' chee benne' ca' zjácálené' le', ne quebe naca chee' xelawe' xeta xtila na'. Tuze bxruze ca' naca chee' xelawe' na.

⁵ Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca chee zra lá'azxa.

Jesús dxexuné' benne' nazrinnaj ne'e

(Mt. 12.9-14; Mr. 3.1-6)

⁶ Xetú lu zra lá'azxa chee judío ca', guxú'u Jesús tu lu xu'u, na' guzú lawé' dxusédené' benne' zaj nazrague' na'. Zua na' tu benne' nazrinnaj ne'e xabēla. ⁷ Benne' ca' dxuluxuzájle'e da nadxixruj bea na, ne benne' xudau' fariseo ca' dxuluzuzre' Jesús chee xelelé'engé' che xexún Jesús bénnea' lu zra lá'azxa chee', chee xelezéquené' xelawe' zria Jesús. ⁸ Jesús ba nézené' ca da dxelegú'u lazre', na' guzre' bénnea' nazrinnaj ne'e:

—Guxasa, ne guzé laduj nigá.

Benne' na' guxasé', na' guzé' na'. ⁹ Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa chee, da xrlátaje che da calela? ¿Gucache cháwedxu xel-la nabán chee tu benne', che guzría xidxu na?

¹⁰ Nadxa Jesús guné'e benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexácate ne'e na'. ¹¹ Na' benne' ca' zaj zre'e na' belezrá'ale'e, na' gulezú lawe' dxuluchebe ljwezre' bi xelezéquene' xelune' chee Jesús chee xuluzría xi'e Le'.

Jesús dxequ'e benne' chazrinnu ca' xelaque' gubáz chee'
(Mt. 10.1-4; Mr. 3.13-19)

¹² Ca lu zra na' Jesús guxíaje' tu lu xi'a xeajchálajlene' Dios, na' guzúe' bedú xela dxuchálajlene' Dios. ¹³ Ca guxaní' gunné' benne' ca' dxusédené', ne guqu'e chazrinnu benne' ca', na' bzre'e benne' ca' xelaque' gubáz chee'. ¹⁴ Benne' caní zaj naque':

Simón, (bénnea' bzue' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

¹⁵ Mateo, Tomás,

Jacobo, (zri'ine Alfeo),

Simón, (bénnea' dxedábage' benne' Roma ca')

¹⁶ Judas, (benne' biche Jacobo), ne

Judas Iscariote, (bénnea' gudé'e Jesús lu na' benne' ca' dx-eledábage' Le'.)

Jesús dxusédené' benne' zante'
(Mt. 4.23-25)

¹⁷ Jesús bdinne' lu xi'a na' nen benne' ca' dxusédené', na' bzrine' tu lache' nen benne' ca'. Benne' zan zaj zre'e na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'e chee xelenne' da dxuchalaj Jesús, ne chee xexún Jesús le' ca naca xízrawe' dxeledxé'ene'. ¹⁸ Cá'anqueze benne' ca' zaj xu'e be' xriwe' belexaque'. ¹⁹ Xúgute benne' ca' gulaca lazre' xuluté' Jesús lawe' da dxexún Le' xúgute' nen xel-la waca chee'.

Benne' ca' naca da ba neza zren chee', ne benne' ca' zaj naque' baxache'

(Mt. 5.1-12)

²⁰ Nadxa Jesús gunné'e benne' ca' dxusédené', na' guzre' le':

—Ba neza zrente naca na chee'le le'e, dxéquebe'ele nácale benne' xache', lawe' da waxú'ule le'e naga dxenná bea Dios.

²¹ 'Ba neza zrente naca na chee'le le'e, dxedunle da dxunna Dios, lawe' da wélajquezle.

'Ba neza zrente naca na chee'le le'e, dxebézrele ne chee' dula, lawe' da guzrízrequezle.

²² 'Ba neza zrente naca na chee'le le'e, gate xelecuide bénneache le'e, ne gate xelexebéaje' le'e chalé'ajla, ne gate

xelenné' schanni' cheeḷe, ne gate xulucá'ana ditjé' lale ca tu da sban lawe' da nácale bi chia'neda', Benne' Guljé' Bénneache. ²³ Le béle'e, ne le sua lu da ba neza lu zra na' lawe' da zrué'ele tu da zren lu xabáa cheeḷe Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz cheeḷe Dios.

²⁴ 'Baxache' nácale le'e, benne' gunní'a, lawe' da ba nápale xel-la dxebé da naca cheeḷe xezr la xu nigá.

²⁵ 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

²⁶ 'Baxache' nácale le'e gate xúguteḷe bénneache dxeleenné' da chawe' cheeḷe, lawe' da ca' belún xra xrtáule, gulenné' da chawe' cheeḷe benne' wen lazre' ca', benne' gulenné': "Netu' dxuchálajntu' waláz cheeḷe Dios."

Dxal-la' zrí'idxu benne' ca' dxelecuídene' dxi'u
(Mt. 5.38-48; 7.12)

²⁷ Na' gunná Jesús:

—Dxapa' le'e dxénele chia', le zri'i benne' ca' dxelecuídene' le'e, ne le gun chawe' cheeḷe benne' ca' dxelezzré'e le'e. ²⁸ Le nneḷe chawe' cheeḷe benne' ca' dxeleenné' caleḷa cheeḷe, ne le naba lau Dios gaca chawe' cheeḷe benne' ca' dxeleenné' schanni' cheeḷe. ²⁹ Che nu benne' capeḷe xrágale, le guzeḷe xecha la'a, ne che nu benne' que'e xicha cheeḷe, le güe lataj ca'ateḷe zrale. ³⁰ Le gunezruj nüteteze benne' bi nabeḷe le'e, ne che nu benne' que'e da naca cheeḷe, quebe xenábale na. ³¹ Le gun cheeḷe bénneache cáteze na' dxaca lázrele xeluneḷe cheeḷe.

³² 'Che le'e nazri'ile tuze benne' ca' zaj nazrí'ineḷe le'e, ¿bízraqueze da chawe' dxunle? Cá'anqueze dxelún benne' ca' dxeluneḷe da caleḷa. ³³ Che dxunle chawe' cheeḷe tuze benne' ca' dxeluneḷe le'e chawe', ¿bízraqueze da chawe' dxunle? Cá'anqueze dxelún benne' wen da zrinnaj ca'. ³⁴ Che bi dxusanle cheeḷe tuze benne' ba nézele wexunneḷe na, ¿bízraqueze da chawe' dxunle? Cá'anqueze benne' wen da caleḷa ca' dxulusaneḷe da naca cheeḷe cheeḷe benne' ca' dxeluneḷe da caleḷa, lawe' da zaj nézeneḷe wulunézrujteḷe benne' ca' leḷe na. ³⁵ Dxal-la' zri'ile le'e benne' ca' dxelezzré'e le'e, ne gunle da chawe' cheeḷe, ne gusanle cheeḷe benne' ca' da xelenabeḷe le'e, lácala quebe xelexexunneḷe na. Che gunle ca', da zrendxa da si' lu na'le, ne gácale bi ca' cheeḷe Dios szrenteḷe, lawe' da naca Leḷe zri'i lazre' nen benne' ca' quebe dxelexezaca ba lazreḷe, ne benne' wen da caleḷa ca'. ³⁶ Le xezrí lazre' bénneache ca dxun Dios, dxezrí lazreḷe le'e.

Quebe guzúale chalá'ala le sa' ljwézrele
(Mt. 7.1-5)

37 Na' gunná Jesús:

—Quebe guzúale chalá'ala le sa' ljuwézrele, na' Dios quebe guzúe' le'e chalá'ala. Quebe bi nnele chee le sa' ljuwézrele, na' Dios quebe guchi'e chee le'e. Le gunite lau chee le sa' ljuwézrele, na' Dios gunite lawe' chee le'e. 38 Le gunezruj chee bènneache, na' Dios gunne' chee le'e. Dios cu'e lu xcuite chee le tu xi'ina da nálate, ne da naxí'tequeze, ne guníbetē' na, ne sua dí'atequeze na. Dios gudxíxrequeze' chee ca da dxudxíxrele chee bènneache.

39 Nadxa Jesús bchálaje' da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' gune', dxúpatē' xelebixre' tu lu xedxu. 40 Netú benne' dxusede gácadxe' szren ca naca bènnea' dxusedene' le', na' gate xuzre gusedie', gaque' ca naca bènnea' bsédene' le'.

41 '¿Bizr chee na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? 42 Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': “Benna lataj xebéaja' bébedu na' xu'u na xiaj lau'?” Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bébedu na' xu'u na xiaj lau le sa' ljwezru'.

Naca bea tu benne' ne chee da dxune'

(Mt. 7.17-20; 12.34-35)

Nadxa gunná Jesús: 43 —Tu xaga xrlátaje quebe cuía na da zixre calela, na' xaga da quebe naca chawe' quebe gaca cuía na da zixre chawe'. 44 Tu tu xaga naca bea na ne chee da zixre da dxebía na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. 45 Benne' xrlátaje, da xrlátaje dxenné bènnea' lawe' da naxaza da xrlátaje lu xichaj lázrdawe', na' benne' wen da calela, da calela dxenné bènnea' lawe' da xu'u da calela lu xichaj lázrdawe'. Dxu'e na' dxenné na ca naca da xu'u lu xichaj lázrdawe'.

Dxuchalaj Jesús chee chupa lane xu'u

(Mt. 7.24-27)

Gunná Jesús: 46 —¿Bizr chee na' dxele neda': “Xran, Xran”, ne quebe dxunle ca da dxapa' le'e? 47 Xapa' le'e aja naca bènnea' ze'e nen neda', ne dxenne' xrtizra'a, ne dxune' ca da dxapa' le'. 48 Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gune na xu'u na' lawe' da zria lane na lawe' xiaj xre. 49 Na' bènnea' dxenne' xrtizra'a, ne quebe dxune' ca da dxapa' le', naque' ca tu benne' bene' xu'u chee lawe' xu dxeze, ne quebe guzale'

lane na, na' gate bdxuaj xegu na', ne xeajchú'ulẹ'e na le'e xu'u na', na' guchẹ na le na, na' tu chí'izqueze bzria xi na le na.

7

Jesús dxexunẹ' bi wẹn zrin cheẹ tu benne' Roma (Mt. 8.5-13)

¹ Gate bexuzre bchálajle Jesús benne' ca', na' bezé'e zexíaje' Capernaum. ² Zua tu benne' Roma na', benne' dxenná be'e lu wedil-la, na' zua tu bi wẹn zrin cheẹ' nazrí'ile'ene'-be', na' bi na' quebe chawe' zúabe', ne dxaca wátebe'. ³ Gate ben benne' Roma na' ca da dxun Jesús, na' gusél-le' bal-la benne' gula sina cheẹ judío ca', cheẹ xeajleguezre' Jesús xide' xexunẹ' bi wẹn zrin cheẹ'. ⁴ Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca cheẹ' gácalenu' le', ⁵ lawe' da dxape' ba lá'ana xezre cheedxu, na' léqueze' bene' tu xu'u cheedxu ga dxezragadxu.

⁶ Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusél-le' bal-la benne' ljwezre' xeajleguezre' Jesús:

—Xran, quebe senu' gunne xue, lawe' da quebe naca chia' chu'u lizra'. ⁷ Cheẹ le na' ne quebe bexazrda' néda'queza' xedajdilja' Lue'. Cun gunnaze, na' xexaca bi wẹn zrin chia'. ⁸ Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bènnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wẹn zrin chia' da gunbe', na' gunbe' na.

⁹ Gate ben Jesús da nigá, na' bebánene', na' gunné'e benne' ca' zjácale Le', gunné':

—Da li, quebe ne cheajxraca' tu benne' xezre Israel dxeajli lazre' neda' ca dxun benne' nigá.

¹⁰ Gate belexezrin benne' ljwezre benne' Roma na' lizre', na' belelé'ene' ba bexaca bi wẹn zrin na'.

Jesús dxusebane' bi biu cheẹ tu nu'ula ba gute benne' chie'

¹¹ Ca gudé na' Jesús guzé'e zéaje' tu xezre da nazí le na Naín, na' xjácale Le' benne' ca' dxusédené', ne benne' zante. ¹² Gate bzrine' gáguze naga zua xezre na', blé'ene' benne' zaj nu'e tu bi gate zeajlecache'-be', na' naca be' bi tulicha' cheẹ xrnabe', nu'ula na' ba gute benne' chie'. Benne' zan, benne' lazrie' zjácálene' le'. ¹³ Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

¹⁴ Nadxa gubiga Jesús dxu'a xi'ina xu'ube', na' btẹ' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

¹⁵ Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. ¹⁶ Gate beelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente, benne' dxenné' waláz chee Dios, ba ble'e ládujla dxi'u.

Cá'aqueze dxelenné':

—Dios ba ble'e dxácalene' xezr chee'.

¹⁷ Ca naca naga nababa Judea, ne xezre walíxr chee na belén bènneache ca naca xel-la waca chee Jesús.

Juan, bènnea' bchue' bènneache nisa dxesel-le' gubáz chee' lau Jesús

(Mt. 11.2-19)

¹⁸ Naga xu'u Juan lizre xia, bènene' ca naca chee da nigá lawe' da benne' ca' zjácálene' Juan buluzenne' le' da dxaca na. Juan gunné' chupa benne' ca', ¹⁹ na' gusel-le' le' lau Jesús chee cheajlechebe' Le' che da li naque' Cristo, bènnea' dxal-la' xide', u che dxal-la' xelebeze' benne' xula. ²⁰ Nadxa benne' ca' gusel-la Juan belezrine' lau Jesús, na' gulé'e Le':

—Juan, bènnea' bchue' bènneache nisa nasele' netu' zedajchébentu' Lue' che Lue' na' nacu' Cristo, bènnea' dxal-la' xide', u che dxal-la' cuézantu' benne' xula.

²¹ Ca lu zra na' Jesús bexune' benne' zante benne' we', ne benne' dxé'ene' xízrawe' da dxedá du zren, ne benne' ca' zaj xu'e be' xriwe', na' bexune' benne' la chul-la ca'. ²² Nadxa Jesús guzre' benne' ca' nasele' la Juan:

—Le cheajxaca, ne le xe Juan ca naca da ba ble'ele, ne da bénele. Benne' la chul-la ca' dxelexelé'ene', na' benne' zrinnaj ca' dxelexedé', na' benne' dxeledxé'ene' we' guzru' ba belexaque', na' benne' xache' ca' dxelenne' dizra' chawe' chee Dios. ²³ Ba neza zren naca na chee benne' quebe gusán lazre' neda'.

²⁴ Gate besí'aca benne' ca' gusel-la Juan, na' Jesús guzú lawe' dxuchálajlene' benne' zaj zre'e na' ca naca chee Juan na', dxenné':

—¿Bizra guxiajle le'e xeajna'le le'e xixre' lawe' lataj? ¿Tu xia xtila da dxutá be'? ²⁵ Che cabí, ¿bizra xeajna'le? ¿Tu benne' nacu' zra lane' da zácalé'e? Ba nézquezle le'e benne' ca' dxelacu' zra lane' da zácalé'e, ne dxelé'aj dxelawe' da zácalé'e zaj zre'e lizre benne' blau ca'. ²⁶ Che cabí, ¿bizra xeajna'le? ¿Tu benne' dxuchálaje' waláz chee Dios? Awe', ble'ele tu benne' nácadxé' szren ca tu benne' dxuchálaje' waláz chee Dios. ²⁷ Juan nigá naque' bènnea' naxúaj na chee' lu xiche chee Dios, dxenné':

Dxesel-la' gubáz chia' lau Lue',

chee guca'ana chawe' neza naga teu'.

²⁸ Dxapa' le'e, ládujla xúgute benne' quebe nu chilá' benne' dxuchálaje' waláz chee Dios nácadxe' szren ca Juan nigá. Na'a benne' nácadxe' dxexruj lazre' naga dxenná bea Dios nácadxe' blau ca Juan nigá.

²⁹ Na' gunná Jesús:

—Gate na' benne' dxexruj lazre' ca', ne benne' wechizruj ca' belenne' da dxuchalaj Juan, guleque bé'ene' Dios naque' xrlátaje, na' beledxúe' nisa lu na' Juan. ³⁰ Benne' xudau' fariseo ca', ne benne' ca' dxuluxuzájle'e da nadxixruj bea na buluzúe' chalá'ala ca naca da dxaca lazre' Dios guné' chee', na' quebe beledxúe' nisa lu na' Juan.

³¹ Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿ájazra zaj naque'? ³² Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': “Bcuézrentu' bchiuj da bénele, san quebe bxá'ale. Bil-la xáchentu', san quebe gudxézrele.” ³³ Caní zaj naca benne' ca' lawe' da bla' Juan, bénnea' bchué' bénneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'. ³⁴ Nadxa bla'a neda', Benne' Gulje' Bénneache, dxé'aj dxawa', na' dxelenné' naca' wagu xrata, ne benne' dxé'ajle'e, ne dxelenné' naca' ljwezre benne' dul-la ca', ne benne' wechizruj ca'. ³⁵ Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

Da bchalaj Jesús lizre Simón, benne' xudau' fariseo

³⁶ Tu benne' xudau' fariseo gunné' Jesús cheajtawe' xeta lizre', na' Jesús guxíaje' lizre bénnea', na' gudxé'e dxawe'. ³⁷ Nadxa tu nu'ula dul-la chee xezre na', gate benne' bzrin Jesús dxawe' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazráté na da dxelá zixre. ³⁸ Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebizre' ni'e nen xicha xíchaje', ne bnupe' ni'a Jesús, na' gulu'e na da dxelá zixre na'. ³⁹ Na' benne' xudau' fariseo, bénnea' gunné' Jesús lizre', gate blé'ene' da nigá, gunné' lu lázrdawe': “Chela benne' nigá da li naque' benne' dxuchálaje' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la.” ⁴⁰ Nadxa Jesús guzre' benne' fariseo na':

—Simón, de tu da guchálajle'na' lue'.

Na' bechebe benne' fariseo na':

—Gunná, Benne' Wesede.

⁴¹ Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tue' dxal-le' chee' lazruj chee chupiza, na' xetúe' dxebague' lazruj chee chupa beu'. ⁴² Lawe' da quebe dxelezéqueñe' xelexexízruje' chee bénnea', na' le' bnite lawe' chee dxúpatē benne' ca' ca naca da dxelebague' chee'. Na'a gunná, ¿nula benne' caní zrí'idxene' bénnea'?

⁴³ Simón bechebe':

—Dxéqueda' bénnea' bnite lawe' chee' da zrendxa.

Na' Jesús guzre' le':

—Da li dxennáu'.

⁴⁴ Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. ⁴⁵ Quebe bnupu' neda', san nu'ula nigá, gate guxú'utea', quebe dxusane' dxunúpequeze' ni'a. ⁴⁶ Quebe gulú'u da za xíchaja', san nu'ula nigá gulu'e ni'a da dxelále'e zixre. ⁴⁷ Chee le' na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bénnea' naca bábaze dul-la chee' da bnite lawa', láteze zrí'ine' neda'.

⁴⁸ Nadxa Jesús guzre' nu'ula':

—Dul-la chiu' ba bnite lawa'.

⁴⁹ Na' benne' ca' zaj zre'e nen Le', ne zaj dxee' na' gulezú lawe' dxelenné' lu lázrdawe': “¿Nuzra benne' nigá, dxunite láuqueze' dul-la?”

⁵⁰ Jesús guzre' nu'ula na':

—Ba naláu' lawe' da guxéajle'u chia'. Bexíaj dute xel-la dxebeza zri lazre'.

8

Nu'ula ca' belún zrin chee Jesús

¹ Ca gudé da nigá, gudá Jesús zane' xezre, ne xézredu ca', dxusédene', ne dxuchálaje' ca dxenná bea Dios. Benne' chazrinnu gubáz ca' zjácáleñe' Le'. ² Cá'anqueze zjácále Le' bal-la nu'ula ca', benne' ca' bexune' le' ca naca xízrawe' chee', ne bebéaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawe'. ³ Ládujla le' ziajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalēne' Jesús nen da zaj nape'.

*Da dxulé'e na ca naca chee benne' dxaze' zrua' xtila
(Mt. 13.1-9; Mr. 4.1-9)*

⁴ Benne' zan beledxúaje' lu xezre ca' chee xeledé'ene' Jesús, na' gate belezraga benne' zan naga zue', na' bchálaje' tu da dxulé'e na, dxé'e le':

⁵—Tu benne' dxaze' guzë'e zjaze' zrua' xtila. Ca zéaje' dxaze' na, bal-la bínnedu ca' xeajlechaze na dxu'a neza, na' benne' ca' bululéaje' na, na' belezrín bxínnedau' guláguba' na. ⁶Xebal-la bínnedu ca' xeajlechaze na lu xiaj ca', na' gate bínnedu caní belezrí na, chadite' gulebizre na, lawe' da quebe gudxé' gupa'. ⁷Xebal-la bínnedu ca' xeajlechaze na naga zaj dxe' lue xeche', na' bululule xeche' ca' le na. ⁸Xebal-la bínnedu ca' xeajlechaze na lu xu bebe, na' gate belegula na, na' gulezríale'e na. Bal-la na gulezrí na tu gaxúa weaj.

Gate bexuzre bchalaj Jesús da nigá, na' gunné' zizraj:
—¡Che le'e zua nágale, le xene!

Jesús dxenné' bizr chee na' dxuchálaje' da dxululé'e na
(Mt. 13.10-17; Mr. 4.10-12)

⁹Nadxa benne' ca' dxusede Jesús gulenábene' Le' bizra zéaje da dxulé'e nigá. ¹⁰Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajena' le' da dxulé'e na caní, chee gate dxelelé'ene' xelaque' ca benne' quebe dxelelé'ene', ne gate dxelenne' quebe dxeléajni'ine'.

Jesús dxuxuzájle'e da dxulé'e na ca naca chee bénnea' dxaze'
(Mt. 13.18-23; Mr. 4.13-20)

¹¹Na' gunná Jesús:

—Da nigá naca ca zéaje da dxulé'e na': Bínnedu ca' zéaje na xrtizra' Dios. ¹²Bínnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeléajle'e, ne quebe xelelé'. ¹³Bínnedu ca' xeajlechaze na lu xiaj ca' zéaje na benne' ca' dxelenne' dizra' na', ne dxelezi'e na dutë xel-la dxelebé, san quebe dxaze na lu xichaj lázrdawe'. Dxeléajle'e tu chí'idau'ze, na' gate dxeledé' lu da zi' da xa', na' dxulusán lazre' na. ¹⁴Bínnedu ca' xeajlechaze na naga zaj dxe' lue xeche' zéaje na benne' ca' dxelenne' dizra' na', na' dxejxaque', na' lawe' da dxeleze'ne' gunne xue da zante, ne dxelezé lazre' xel-la gunní'a, ne da xele'aj xelawe' da zácale'e, na' xúgute' da caní dxulusunite na dizra' na', na' quebe dxun na zrin lu xichaj lázrdawe'. ¹⁵Na' bínnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawe'.

Da dxulé'e na ca naca chee tu da dxegú'u lení'
(Mr. 4.21-25)

¹⁶Gunná Jesús:

—Netú benne' che gugale' da dxegú'u lení', quebe gudúsie' na tu xi'ina, u zranle ga dxasie', san guzúe' na sibe, chee cu'u

lení' na chee benne' zaj zře'e lu xu'u na'. ¹⁷ Quebe bi de da nagache' da quebe gulé'e lau na, ne quebe bi xu'u lu xichaj lázrdau bēnneache da quebe gaca bea na, ne lá'tequeze na.

¹⁸ 'Chee le na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxéquene' nape'.

Dxeleznín lau Jesús xrne'e, ne benne' biche' ca'

(Mt. 12.46-50; Mr. 3.31-35)

¹⁹ Nadxa xrna Jesús, ne benne' biche' ca' belezrine' naga zue', san quebe gulezéquene' xelezrine' lau Le', lawe' da zralé'e benne' zan ga na'. ²⁰ Tu benne' na' bzenne' Jesús, gunné':

—Xrna'u, ne bi bichu' ca' zaj zře'e chale'aj nigá, dxelaca lazre' xuluchálajlene' Lue'.

²¹ Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bícha'dau' ca'.

Jesús dxuzúa zrie' be' bdunu', ne xeajxruza chee nísadau'

(Mt. 8.23-27; Mr. 4.35-41)

²² Tu zra guxú'u Jesús tu lu da dxedá lawe' nísadau' nen benne' ca' dxusédené', na' guzre' le':

—Cheajdxu xecha la'a nísadau'.

Na' gusiá'que', ²³ ne dxácaté zjaque' lu nísadau' na', guse Jesús. Na' guzú lau dxácalé'e be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácaté waxaze na lu nísadau'. ²⁴ Nadxa bulusebane' Jesús, dxelé'e Le':

—¡Benne' Wesede! ¡Benne' Wesede! ¡Ba dxázedxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na. ²⁵ Nadxa Jesús guzre' benne' ca' dxusédené':

—¿Quebe ne chéajlele chee Dios?

Benne' ca' belezrebe', ne belexebánene', na' buluchebe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

Tu benne' Gadara xu'e be' xriwe'

(Mt. 8.28-34; Mr. 5.1-20)

²⁶ Nadxa belezrine' xecha la'a nisa lu xezr la xu chee xezre Gadara, chalá'a ca'ala chee Galilea. ²⁷ Gate bedxúaj Jesús lu da dxedá lawe' nísadau' na', na' bzrin tu benne' xezre na' lau Le'. Zánete iza ba guca xu'u be' xriwe' ca' benne' nigá. Quebe gúcué' zra lane', ne quebe guzúe' netú lu xu'u, san xeajchu'e tu lu ba ca'. ²⁸ Gate blé'ene' Jesús, na' xeajzú zribe' lau Le', na' gudxezre xe'e, dxenné':

—¿Bizr chee na' za'u naga zua', Jesús, Zri'ine Dios szrente? Dxata' xueda' Lue' quebe gusaca zi'u neda'.

²⁹ Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xezre na' gulele' benne' nigá, ne buluchéaje' le' ni'a ne'e nen du xia, san le' bzúxuje' du xia na', na' be' xriwe' ca' guleché na le' le'e xixre' lawe' lataj. ³⁰ Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. ³¹ Be' xriwe' ca' gulenaba na Jesús quebe sel-le' na lataj chul-la. ³² Lu xi'a naga zua Jesús, na' zralé'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajezrá na lu cuche ca', na' bnezruj Jesús na lataj. ³³ Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute cuche ca' buluzrúnnujba', ne gulebixreba' dxu'a chjéa, na' xeajlecházeba' lu nísadau', naga gulépeba', guláteba'.

³⁴ Benne' ca' dxuluxúe' cuche ca', gate belelé'ene' ca da guca, na' buluzrúnnuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe' xezre ca da guca. ³⁵ Nadxa benne' ca' beledxúaje' xeajlenné'e ca da guca. Gate belezrine' naga zua Jesús, na' belelé'ene' bénnea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. ³⁶ Na' benne' belelé'e ca da guca buluchálajlene' benne' xula ca' ca guca gate bexaca bénnea' guxú'e be' xriwe' ca'. ³⁷ Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxelezebele'e. Ca'an guca, guxú'u Jesús lu da dxedá lawe' nísadau', chee xezé'e xéaje'. ³⁸ Bénnea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

³⁹ —Bexiaj lizru', na' bchalaj chee xúgute ca da ba ben Dios chiu'.

Na' benne' na' bezé'e zexíaje', na' bchálajlene' benne' xezre ca' ca da ben Jesús chee le'.

Jesús dxexune' bí nu'ula chee Jairo, ne tu nu'ula xeajté' zra lane'

(Mt. 9.18-26; Mr. 5.21-43)

⁴⁰ Gate bezrín Jesús xecha la'a dxu'a nísadau', benne' ca' zaj zre'e na' gulezí' lu ne'e Le' nen duté xel-la dxelebé, lawe'

da xúgute' dxelebeze' Le'. ⁴¹ Nadxa bzin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', ⁴² lawe' da zua tuze bi nu'ula chee'. Xu'ube' chazrinu iza, na' ba dxaca wátebe'. Gate guzá' Jesús zéaje', benne' zante zjácálene' Le', ne buluchídetē ljwezre'.

⁴³ Ládujla benne' ca' zeaj tu nu'ula quebe chawe' zue', na' chazrinu iza ba zeaj dxé'ene' we' dxen da dxaca chee nu'ula ca'. Ba gudízruje' benne' dxelexún bénneache ca' xúgute' ca da gudape', na' quebe bi gulezéquene' xelune' chee xexaca nu'ula na'. ⁴⁴ Nu'ula na' gubiguē' cúzrula Jesús, na' xeajté' zran ni'a zre', na' la ná'queze bexágate dxen da dxaca nu'ula na'.

⁴⁵ Nadxa Jesús bchebe':

—¿Nuzra bta neda'?

Xúgute' gulenné': “Quebe nu ne gutá Lue’”, na' Pedro, ne benne' ljwezre' ca' gulenné':

—Benne' Wesede, benne' caní dxuluchídee' Lue', ne dxu-luzrigue' Lue', na' dxuchébequezu', dxennáu': “¿Nuzra bta neda'?”

⁴⁶ Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

⁴⁷ Gate gúquebe'e nu'ula na' ba neze Jesús da guca, nadxa gudé' dxezrízete', na' bzu zribe' lau Jesús, ne guxrúalepe' lau xúgute' benne' ca' bizr chee na' bte' Jesús, ne ca guca bexácate'.

⁴⁸ Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, dutē xel-la dxebeza zri lazre'.

⁴⁹ Ne dxuchálajte Jesús, bzin tu benne' naga ze Jesús, benne' guzé'e lizre Jairo, benne' blau chee xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

⁵⁰ Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

⁵¹ Gate bzin Jesús xu'u na', netú quebe be' lataj chú'ule' Le', san tuze Pedro, ne Jacobo, ne Juan, ne xra xrna bi nu'ula na'. ⁵² Xúgute' benne' zaj zre'e na' dxelebezre', ne dxelebezre xache' chee bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

⁵³ Na' benne' ca' buluzrizre' chee', lawe' da zaj nézquezne' ba gútebe'. ⁵⁴ Nadxa Jesús guqué'e na' bi na', na' gunné' zizraj:

—¡Bi nu'ula, bexasa!

⁵⁵ Na' bebanbe', ne bexásatēbe'. Na' Jesús busebague' le' xulunézruje' da gágube'. ⁵⁶ Xra xrnabe' belexebánele'ene'. Jesús busebague' le' quebe nu xelē'e ca da guca.

9

Jesús dxesel-le' benne' chazrinnu ca' xelunē' xrchine'
(Mt. 10.5-15; Mr. 6.7-13)

¹ Jesús bchague' benne' chazrinnu ca' dxusēdene', na' bnézruje' le' xel-la waca, ne xel-la dxenná bea chee xelexebéaje' xúgute' cue' be' xriwe' ca' da zaj xu'u bēneache, ne chee xelexexunē' benne' ca' zaj xu'e xízrawe'. ² Na' gusel-le' le' chee xuluzenne' bēneache ca dxenná bea Dios, ne chee xelexexunē' benne' zaj xu'e xízrawe' ca'. ³ Na' guzre' le':

—Quebe bi gúale chee la neza. Quebe gúale xaga da guchíchele, na' xixruj cheele, ne da gágule, ne dumí. Le gua' tu cue'ze zra lánale. ⁴ Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. ⁵ Naga quebe xelezí'e dizra' guchálajle le', le xedxúaj xezre na', ne le cuibe bxrte xu da da' ní'ale, da gulé'e na zaj nabague' zria lau Dios.

⁶ Nadxa beledxúaje', na' ca naca xézredu ca' xeajlechálaje' dizra' chawe' chee Dios, ne belexexunē' benne' zaj xu'e xízrawe' ca'.

Ca guca gate gute Juan, benne' bchue' bēneache nisa
(Mt. 14.1-12; Mr. 6.14-29)

⁷ Herodes, benne' dxenná be'ene' xezr la xu na', benne' ca naca xúgute' da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate. ⁸ Xebal-le' dxelenné' Elías, bēnea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ni'te. ⁹ Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxunē'?

Nadxa Herodes bene' ba xuzre lé'ene' Jesús.

Jesús dxugawe' chi xun gaxúa benne'
(Mt. 14.13-21; Mr. 6.30-44; Jn. 6.1-14)

¹⁰ Gate belexezrín benne' gubáz ca' chee Jesús lau Le', na' gulé'e Le' ca da ba belunē'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida. ¹¹ Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchálajlene' le' ca dxenná bea Dios, ne bexunē' benne' zaj xu'e xízrawe' ca'.

¹² Gate guzú lau zeaj dxezré', na' gulebiga benne' chazrinnu gubáz ca' chee Jesús lau Le', na' gulé'e Le':

—Bze benne' caní dizra' chee chjaque' naga xelasié', ne xelíajé' da xelawé' xézredu ca' zaj nnita gagu, lawe' da ga zúadxu nigá quebe bi de.

¹³ Jesús guzre' le':

—Le gunezruj le'e da xelawé'.

Nadxa benne' ca' bele'e Jesús:

—Quebe dedxa cheentu' ca gázxuga xeta xtiladau', ne chúpaga bela, u ¿wacheajxríquezentu' da xelagu catite benne' zan caní?

¹⁴ Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xe benne' ca' xelebé'e chi xun weaje' tu cue' tu cue'.

¹⁵ Ca'an belune', na' gulebe'e xúgute'. ¹⁶ Nadxa Jesús guqu'é'e da gazxu' xeta xtila ca', ne chupa bela ca'. Na' guchisa lawé' xabaala, ne guzre' Dios "Xcalenu'", na' ca' bexuzre bzúzruje' na, na' bnézruje' na benne' ca' dxusédene' chee xelisié' na chee benne' zan ca'. ¹⁷ Xúgute' gulawé', ne belélaje'. Ca' gudé na' bulusuzré'e chazrinnu ga' da bízrujdu ca' belexegá'ana na.

Pedro dxenné' Jesús naque' Cristo

(Mt. 16.13-19; Mr. 8.27-29)

¹⁸ Tu zra gate zua Jesús dxuchálajlene' Dios naga quebe zaj zra benne' zan ca', na' zrale benne' ca' dxusédene' Le', na' Le' bchebe' benne' ca':

—¿Nuzra dxelenná benne' naca' neda'?

¹⁹ Le' belexechebe':

—Bal-le' dxelenné' nacu' Juan, bénnea' bchue' bénneache nisa, na' xebal-le' dxelenné' nacu' Elías, bénnea' bchálaje' waláz chee Dios, na' xebal-le' dxelenné' nacu' tu benne' ca' buluchálaje' waláz chee Dios ca' ni'ite, na' bebane'.

²⁰ Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

Jesús dxuzenne' benne' ca' ca gaca gate gatie'

(Mt. 16.20-28; Mr. 8.30—9.1)

²¹ Jesús bsebague' benne' ca' quebe nu xelé'e ca'. ²² Na' guzre' le':

—Neda', Benne' Gulje' Bénneache, dxal-la' téle'a xel-la zi', na' benne' gula sina ca', ne benne' xíchaje' ca' chee bxruze, ne benne' ca' dxuluxuzájle'e da nadxixruj bea na xuluzúe' neda' chalá'ala. Xelútié' neda', san gate gaca chunna zra, na' xebana'.

²³ Ca' gudé na' guzre' ca' naca benne' zaj zré'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute' da naca chee', na' guné' neda' tuze

xúgute zra, lácala gate benne' na'. ²⁴ Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da naque' chia', wazrué'ene' na. ²⁵ ¿Bizra da ba neza gaca na chee' tu benne' che gape' ca naca da de lu xezr la xu nigá, san cuía xi' léqueze'? ²⁶ Che nu benne' xedué'ene' chia' neda', ne chee' dizra' chia', cá'anqueze neda', Benne' Gulje' Bénneache, wedué'eda' chee' bénnea' gate za'a neda' chee' nna be'a nen xel-la szren chee' Xra', ne chee' gubáz lá'azxa chee' xabáa ca'. ²⁷ Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

Gate bcha lu'a lesaca Jesús

(Mt. 17.1-8; Mr. 9.2-8)

²⁸ Ca guzre xi' gudé gunná Jesús da nigá, na' guluéne' tu lu xi'a chee' guchálajlene' Dios, na' xjácale Pedro, ne Jacobo, ne Juan Le'. ²⁹ Dxácaté dxuchálajlene' Dios, na' bcha lu'a lesaca Jesús, na' zra lané' bexaca na da chiche, ne guca tite na. ³⁰ Nadxa bululé'e lau chupa benne' dxuluchálajlene' Jesús. Zaj naque' Moisés ne Elías. ³¹ Naga zele Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén. ³² Gulácale'e welase Pedro ne benne' ljwezre' ca', san bulusebán lazre', na' belelé'ene' ca naca xel-la szren chee' Jesús, ne chupa benne' ca' zaj zélene' Jesús. ³³ Gate benne' ca' belexesiá'que' naga ze Jesús, na' Pedro gunné':

—Benne' Wesede, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee' Moisés, ne tu chee' Elías.

Pedro quebe dxéquebe'ene' ca da dxenné'. ³⁴ Dxácaté dxenná Pedro caní, na' bla' tu beuj da gucu na naga zaj zre'e, na' belezrebe Pedro, ne benne' ljwezre' ca' gate gulezré'e lu beuj na'. ³⁵ Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'ite lazra'. Le xen da dxuchálajbe'.

³⁶ Ca gudé belenne' chi'i na', na' belelé'ene' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'ene'.

Jesús dxexune' tu bi biu xu'ube' be' xriwe'

(Mt. 17.14-21; Mr. 9.14-29)

³⁷ Gute xu, gate belexexétaje' lu xi'a na', na' benne' zan zjaque' zeajlexrígale' Jesús. ³⁸ Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te bi chia' naca, ³⁹ na' tu be' xriwe' dxaze na lebe', ne dxucuezre xa'a na lebe', ne dxudxixre dxutula na lebe', na' dxebía bzrina' dxú'abe'. Dxusaca zi na lebe', ne

quebe dxaca lazre' na gusán na lebe'. ⁴⁰ Ba guta' xueda' benne' ca' dxusédenu' chee xelexebéajē' na, san quebe gulezéquene'.

⁴¹ Jesús bechebe':

—Le'e, benne' wen chupa lazre', ne wen da calela. ¿Ájate dxal-la' súalēna' le'e? ¿Ájate dxal-la' guchaga lawa' nen le'e? Xeajxrí' zri'inu' na' nigá.

⁴² Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexune' bi cuide' na', na' bdee'-be' lu na' xrabe'.

⁴³ Xúgute' benne' ca' belexebánene' ca naca xel-la szren chee Dios.

Jesús dxuzenne' benne' ca' xecha lasa ca gaca gate gatie'

(Mt. 17.22-23; Mr. 9.30-32)

Dxácate' na' xúgute' benne' ca' dxelexebánene' ca da dxun Jesús, Le' guzre' benne' ca' dxusédene':

⁴⁴ —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludéē' neda' lu na' bénneache.

⁴⁵ Benne' ca' dxusédene' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

¿Nuzra naca blau?

(Mt. 18.1-5; Mr. 9.33-37)

⁴⁶ Nadxa benne' ca' dxusede Jesús gulezú lawe' dxuluchebe ljwezre' núzraqueze naca blau ládujla le'. ⁴⁷ Jesús gúquebe'ene' ca da dxelenné'. Nadxa guqué'e tu bi biúdau', ne bze'-be' cuite', ⁴⁸ na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasele' neda'. Cá'anqueze bénnea' nácadxe' benne' dxexruj lazre' ládujla le'e, benne' nigá naque' benne' blau.

Benne' quebe dxedábage' dxi'u zue' gácalēne' dxi'u

(Mr. 9.38-40)

⁴⁹ Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebeáje' be' xriwe' ca' lu xichaj lázrdau benne' ca', na' gúzrentu' le' quebe gune' ca' lawe' da quebe naque' dxi'u tuze.

⁵⁰ Jesús guzre' le':

—Quebe guzágale ca da dxune' lawe' da benne' quebe dxedábage' dxi'u zue' gácalēne' dxi'u.

Jesús dxedil-le' Jacobo ne Juan

⁵¹ Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. ⁵² Na' gusél-le' gubáz chee' ca' xelebía lawe', na' benne' ca' xjaque' tu xézredau' nababa Samaria chee

cheajlecuéze' naga sua Jesús. ⁵³ Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén. ⁵⁴ Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee guzría xi na benne' caní, ca ben Elías, bènea' bchálaje' waláz chee Dios?

⁵⁵ Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e. ⁵⁶ Caní naca lawe' da bla' neda', Benne' Gulje' Bénneache, quegá chee guzría xi'a xel-la nabán chee bénneache, san chee gucache chawa' le na.

Nadxa xjaque' xetú xézredau'.

Benne' dxelaca lazre' chjácalene' Jesús

(Mt. 8.19-22)

⁵⁷ Ca zjaque' lu neza na', tu benne' biu guzre' Jesús:

—Xran, dxaca lazra' sálēna' Lue' gáteteze chéaju'.

⁵⁸ Jesús bechebe':

—Beza ca' zaj zua bluaj cheeba', na' bxínmedu ca' zaj zria xrú'neba', san neda', Benne' Gulje' Bénneache, quebe bi de ga xrua xíchaja'.

⁵⁹ Na' Jesús guzre' xetú benne':

—Ben neda' tuze.

Benne' nigá gunné':

—Xran, bēnna neda' lataj cheajcáchea' xra'.

⁶⁰ Na' Jesús bechebe':

—Be lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

⁶¹ Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, bēnna neda' lataj xexá'a cheajzéa' dizra' benne' zaj zra' lizra'.

⁶² Jesús guzre' benne' na':

—Benne' dxugá'ane' bezre, na' nne'e cúzrule', quebe gaca chee bēnnea' guné' zrin chee da dxenná bea Dios.

10

Jesús dxesel-le' benne' gaxún chi ca'

¹ Ca gudé na', Xránadxu guqu'é'e xegaxún chi benne' ca', na' gusél-le' chupa weaje' xelebía lawe' lau Le' xúgute xezre, ne xézredu ca' naga dxal-la' chéaje' Le'. ² Guzre' benne' ca':

—Da li dxennéa', lina da zren naca na, na' benne' wen zrin bábaze zaj naque'. Chee le na' le naba lau Xrane zrin na' sel-le' benne' wen zrin ca' xelexequé'e lina na'. ³ ¡Le chjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. ⁴ Quebe gúale xixruj, ne dumí, ne zréale, ne quebe gagale la neza nu guchálajle. ⁵ Gate chu'ule tu lu

xu'u, na' gugápale diuzre, nnale: “Xel-la dxebeza zri lazre' gaca chee benne' zaj zre'e lu xu'u nigá.” ⁶ Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. ⁷ Le xegá'ana lu xu'u ná'queze, na' le xi'aj le gagu ca da xelunne' lawe' da benne' wen zrin quebe te le tune'. Quebe cheajsúale tu xu'u xetú xu'u. ⁸ Gate zrinle tu xezre naga xezezi' lu ne'e le'e, le gagu ca da xelunne'. ⁹ Le xexún benne' zaj xu'e xízrawe' zaj zre'e na', na' le xe'e: “Xel-la dxenná bea chee Dios ba zua nen le'e.” ¹⁰ Che zrinle tu xezre naga quebe xezezi' lu ne'e le'e, le xedxúaj la neza chee xezre na', na' nnale: ¹¹ “Ca naca bxrtedu' da' ní'antu' dxexebíentu' na chee gaca tu da gulé'e na le'e nabágale zria lau Dios. Dخال-la' nézele ba bla' ládujla le'e xel-la dxenná bea chee Dios.” ¹² Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

Da gaca chee xezre naga quebe belune' ca dxenná xrtizra' Dios

(Mt. 11.20-24)

¹³ Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'eng' ca naca xel-la waca chee xabáa da ba gulaca ládujla le'e, gate na'te ba belexebí'i lazre', belácu'e zra lan'e tuzruj, ne buluzri'e de xíchajé'. ¹⁴ Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. ¹⁵ Na' le'e, benne' xezre Capernaum, ¿dxéquele waxásale zrinte xabáa? ¡Lataj chúl-lala xétajle!

¹⁶ Nadxa guzre' benne' ca' dxusédené':

—Benne' xenne' chee le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

Dxelexezrin benne' gaxún chi ca'

¹⁷ Benne' gaxún chi ca' belexezrine' lu xel-la dxelebe', dxe-lenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

¹⁸ Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu. ¹⁹ Neda' ba benna' le'e xel-la dxenná bea chee guléajle be snia ca', ne bexrujni, ne chee guchúchujle duté xel-la dxenná bea chee da xriwe', na' quebe bi seque gune na le'e. ²⁰ Quebe bele lawe' da dxelún be' xriwe' ca dxennale le'e, san le be lawe' da ba naxúaj lale xabáa na'la.

*Jesús dxebene'**(Mt. 11.25-27; 13.16-17)*

²¹ Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' bénne'du caní da bcácheu' chee benne' sina ca', ne benne' dxeléajni'ine'. ¡Ca' naca, Xrae, lawe' da ca'an guca lazru' Lue'!

²² Xra' ba benne' neda' xúgute. Quegá nu neze nu na' naca Zrí'ine', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ine' guzéajni'ine' le' Nu na' naca Xre'.

²³ Nadxa guné'e benne' ca' dxusédene', na' guzre' benne' cá'anze:

—Ba neza naca na chee benne' ca' dxelélé'ene' ca da dxelélé'ele le'e, ²⁴ lawe' da dxapa' le'e, zánete benne' ca', benne' buluchálaje' waláz chee Dios, ne benne' wenná bea ca' gulaca lazre' xelélé'ene' ca da dxelélé'ele le'e, san quebe belelé'ene' na. Gulaca lazre' xelenne' ca da dxenle le'e, san quebe belenne' na.

Da dxulé'e na ca ben benne' Samaria, benne' naque' chawe'

²⁵ Nadxa tu benne' dxuxuzájle'e da nadxixruj bea Dios bdxúaje', ne guxíaje' xejchálajlene' Jesús chee gaca guzúa zrie' Le', na' bchebe' Le':

—Benne' Weséde, ¿bizra dxal-la' guna' chee gata' chia' xel-la nabán da zeajlí canna?

²⁶ Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

²⁷ Bénnea' dxuxuzájle'e da nadxixruj bea Dios bechebe':

—Bzri'i Xranu' Dios dute lárda'u, ne nen dute bénne'du xu'u, ne nen dute xel-la dxun zi' lazre' chiu', ne nen dute xel-la dxulaba lazre' chiu', na' bzri'i le sa' ljwezru' ca nazri'i cuinu'.

²⁸ Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

²⁹ Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

³⁰ Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' gulela gubán le', ne gulebane' ca naca da nape', ne zra lane'. Na' buluzálaje' le', ne besiá'que' zaj nucá'ane' le' ca benne' gate. ³¹ Nadxa gudé tu bxruze neza na', na' gate blé'ene' le', gudé'e chala'ala. ³² Cá'anqueze gudé na' tu benne' xrtia Leví, benne' dxune' zrin chee xudau', na' gate blé'ene'

bénnea', gudéé' chalá'ala. ³³ Nadxa tu benne' Samaria gudéé' neza na', na' gate blé'ene' le' bexache lazre' le'. ³⁴ Gubigue' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. ³⁵ Zra xula, ca bezá' benne' Samaria na', na' gulé'aje' chupa dumí da bnézruje' xrane xu'u na', ne guzre' le': "Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a."

³⁶ Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' gulela gubán ca'?

³⁷ Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

Jesús dxezrine' lizre Marta ne María

³⁸ Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. ³⁹ Marta na', zua tu bi bile' le' María, na' María na' gudxé'e zran ni'a Jesús chee' xenne' da dxuchálaje'. ⁴⁰ Marta déle'e da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee' guna' tuza' zrin cheentu'? Guzre-be' gácalebe' neda'.

⁴¹ Jesús bechebe':

—Marta, Marta, dxezéle'enu' gunne xue, ne zu' stébe ca naca chee' da ca' dxunu', ⁴² san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

11

Ca dxal-la' gundxu guchálajledxu Dios

(Mt. 6.9-15; 7.7-11)

¹ Tu zra Jesús bchálajlene' Dios tu lataj, na' gate bexuzre bchálajlene' Dios, na' tu benne' ca' dxusédene' guzre' Le':

—Xran, bséde netu' guchálajlentu' Dios, ca ben Juan, bsédene' benne' ca' zaj de'e le'.

² Jesús gunné':

—Gate guchálajlele Dios, na' nnale:

Xrantu' Dios, zu' xabáa,
gaca lá'azxa Lau' Lue'.

Gudá nna be'u.

Gaca ca dxaca lazru' lu xezr la xu, ca da dxaca xabáa.

³ Benna cheentu' da gáguntu' na'a zra.

⁴ Bnite lau dul-la cheentu' ca dxunite launtu' chee benne' ca' dxelune' cheentu' da calela.

Quebe gu'u lataj da xriwe' cu'u na netu' neza chee na, na' bselá netu' lu na' da calela.

⁵ Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xe'e le': "Bi ljwezra', guleaj neda' chunna xeta xtila ⁶ lawe' da zua tu bi ljwezra' za belá'tebe' lizra', na' quebe bi de' chia' gugawa'-be'." ⁷ ¿Wechebe benne' ljwezre' na', benne' xu'u lu xu'u: "Quebe gunu' neda' zede. Naxezxuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?" ⁸ Neda' dxapa' le'e, lácala quebe chase' bi gunézruje' le' lawe' da naque' ljwezre', san chase' chee québedxa gune' le' zede, na' gunézruje' le' ca naca da nachínnene'. ⁹ Caní dxapa' le'e:

Le naba, na' Dios gunne' cheele.

Le xexilaj, na' xezrélele.

Le nne' dxu'a dxa xu'u, na' xalaj cheele.

¹⁰ Ca' naca na, lawe' da benne' dxenabe', na' si'e, ne benne' dxexilaje', na' xezrélene', ne benne' dxenné' dxu'a dxa xu'u, na' xalaj chee'.

¹¹ 'Che tu benne' ládujla le'e naque' xra xrna', ¿waca gunézruje' zrí'ine' tu xiaj che nábabe' tu xeta xtila? ¿Waca gunézruje'-be' tu belá' che nábabe' tu bela? ¹² ¿Waca gunézruje'-be' tu bexrujni che nábabe' tu zrita? ¹³ Che le'e nácale benne' wen da calela, na' nézele gunézruje' da chawe' chee zrí'inele, ¿quebe nácadxa Xrale zua xabáa li lazre' chee gunne' chee nu benne' nabe' Be' Lá'azxa?

Dxelenné' napa Jesús xel-la dxenná bea chee da xriwe'
(Mt. 12.22-30; Mr. 3.19-27)

¹⁴ Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bénnea'. Na' benne' ca' belexebánene' chee da nigá. ¹⁵ Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea chee Beelzebú, xrane be' xriwe' ca'.

¹⁶ Xebal-la benne' gulaca lazre' gulé'e Jesús xel-la waca chee', na' gulenabe' Le' gune' tu xel-la waca da za xabáa. ¹⁷ Le' nézene' ca da dxelaca lazre', na' guzre' benne' ca':

—Che benne' zaj zre'e tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'aqueze welebía xi' benne' ca'. ¹⁸ Cá'aqueze, che da xriwe' ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e

lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'. ¹⁹ Che caní naca na, ¿nuzra dxunezruj xel-la dxenná bea benne' ca' dxusédele le'e chee xelexebéaje' be' xriwe' ca'? Chee le na', benne' caníqueze dxululé'ene' dxeque zréajele. ²⁰ Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

²¹ 'Che tu benne' wal-la nape' da guchínene' lu wedil-la, ne dxuxúequeze' lizre', na' da zra lizre' napa chi'e na. ²² Che za' xetú benne' nácadxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bénnea'.

²³ 'Benne' quebe zue' gácalene' neda', dxedábage' neda', na' benne' quebe dxexeque'e nen neda' dxúsela bénnea'.

Be' xriwe' da dxexezrín na lizre na
(Mt. 12.43-45)

²⁴ Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” ²⁵ Gate xezrín na, na' le'e na bénnea' naque' ca tu xu'u da nalúa lu'ule na, ne nabá'ate na. ²⁶ Nadxa zexíaj na, zeajxezrí na xegazre be' xriwe' da zaj nácadxa na xriwe' ca le na, na' ca naca da ca' xelú'u na xelexúa na lu xichaj lázrdau bénnea', na' naga cheajsete chee benne' na' nácadxa da calela chee' ca da guca chee' nédxula.

Da ba neza chee bénneache da naca na li lazre'

²⁷ Dxácate Jesús dxenné' da caní, tu nu'ula ládujla benne' ca' gunné' zizraj:

—Ba neza zrente naca na chee nu'ula na' guzane' Lue', ne bsegule' Lue'.

²⁸ Na' gunná Jesús:

—Ba neza zrendxa naca na chee benne' ca' dxelenne' ca da dxenná Dios, ne dxune' ca dxenná dizra' na'.

Dxelenabe' Jesús guné' tu xel-la waca da za xabáa
(Mt. 12.38-42; Mr. 8.12)

²⁹ Benne' ca' ne zaj zre'e cuita Jesús, na' Le' guzú lawe' dxuchálajlene' le', gunné':

—Benne' zaj zre'e lu zra caní zaj naque' benne' wen da calela, na' dxelenabe' neda' guna' tu xel-la waca da za xabáa, na' québedxa bi xelexé'ene' ca da ble'e Jonás, bénnea' bchálaje' waláz chee Dios. ³⁰ Ca guca chee Jonás, guque' tu da ble'e na benne' gulezré'e lu xezre Nínive, cá'anqueze neda', Benne' Gulje' Bénneache, gaca' tu da gulé'e na benne' zaj zre'e lu zra

na'a zra. ³¹ Lu zra guchi'a Dios, gate Dios guchi'e chee benne' zaj zre'e lu zra na'a zra, na' chasa nu'ula na' gunná bé'ene' xezr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawe' da nu'ula na' guzé'e zítu'te chee xenne' ca naca xel-la sina chee Salomón, na' nigá zua tu Benne' nácadxe' blau ca Salomón na'. ³² Lu zra guchi'a Dios, gate Dios guchi'e chee benne' zaj zre'e lu zra na'a zra, na' xelase' benne' ca' gulezré'e xezre Nínive, na' xululé'ene' zaj nabaga zria benne' caní, lawe' da benne' ca' gulezré'e xezre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxe' blau ca Jonás na'.

Da dxusení' lu xichaj lázrdaudu

(Mt. 5.15; 6.22-23)

³³ Gunná Jesús:

—Netú benne' che dxugale' xi' chee', quebe guzúe' na tu naga nagache, ne quebe gudusie' na tu xi'ina, san guzúe' na sibe chee xeledé'e benne' ca' xelu'e lu xu'u na'. ³⁴ Xiaj laudxu zaj naca na ca tu xi' da dxusení na lu xichaj lázrdaudu. Che xiaj lau' zaj naca na chawe', ca naca xichaj lázrda'u xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrda'u. ³⁵ Bxue xanne' ca naca xi' da napu' chee quebe xexaca na da chul-la. ³⁶ Che ca naca xichaj lázrda'u xu'u na lení', na' quebe bi xu'u da chul-la, na' le'enu' chawe' xúgute ca dxaca gate tu xi' dxusení na lizru'.

Jesús dxedil-le' benne' xudau' ca'

(Mt. 23.1-36; Mr. 12.38-40; Lc. 20.45-47)

³⁷ Gate bexuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'e dxawe'. ³⁸ Na' benne' fariseo na' bebáne' gate blé'ene' Jesús quebe gudibe ne'e ca da zjácale benne' judío gate dxelawe' xeta. ³⁹ Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátete ca naca da ba gulanle, ne da calela da dxunle. ⁴⁰ Le'e, benne' lázrdau zide', ¿quebe nézele Bénnea' bene' da zua cúzrela bénqueze' da zua lu'ula? ⁴¹ Le gunezruj benne' xache' ca' chee da nápa'e, na' ca nácale xegá'anale chawe'.

⁴² 'jEdxugúa le'e, benne' fariseo ca! Le'e dxunézrujle Dios tu cue' chee da chi cue' chee xixru weaj, ne chee binne chee ruda, ne chee xúgute xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' chee Dios. Da caní dxal-la' gunle, ne quebe gusanle ca da ba dxunle.

43 'iEdxugúa le'e, benne' fariseo ca! Dxaca lázrele gápale lataj blau naga cue'le lu xu'u naga dxezrágale, ne dxaca lázrele xelapa benne' le'e ba lá'ana lawe' xi'a ca'.

44 'iEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj nalá', na' benne' ca' dxeledéé' lówela na, ne quebe zaj nézene' da dxululéaje'.

45 Nadxa gunná tu benne' dxuxuzájle'e da nadxixruj bea na, guzre' Jesús:

—Benne' Wesede, gate dxennáu' da nigá, dxennéteu' ca' cheentu'.

46 Na' Jesús gunné':

—iEdxugúa le'e, benne' dxuluxuzájle'e da nadxixruj bea na! Dxugúale bénneache xua da quebe xezezuéne', na' le'e netú zrube názele quebe dxaca lázrele gutale na.

47 'iEdxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule.

48 Ca da dxunle dxulé'e na nácale tuze nen da belún xra xrtáule ca'. Benne' ca' belutie' le', na' le'e dxunle lu'a chee ba chee' ca'.

49 'Chee le' na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútie', na' xebal-le' xeláu zi' xúzrequeze' le'." 50 Dios gusebage' benne' zaj zre'e lu zra na'a zra ca naca xel-la gute chee xúgute benne' ca' gulenné' waláz chee', benne' gulatie' lu na' benne' ca' zaj zre'e gate bente' xezr la xu, 51 gate na' tu benne' betie' Abel, zri'ine Adán, ca bzrinte zra belutie' Zacarías gachaj lówela naga zua lucugu, ne naga zua lataj lá'azxa. Ca'an dxapa' le'e, Dios gusebage' benne' zaj zre'e lu zra na'a zra xel-la gute chee benne' ca'.

52 'iEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'e na'.

53 Gate Jesús guzre' benne' ca' da caní, na' benne' ca' dxuluxuzájle'e da nadxixruj bea na, ne benne' fariseo ca' belezrá'alé'e Le', na' gulezú lawe' dxelune' Le' zede, na' da zante da buluchébe' Le', 54 na' buluzuzre' che bi nna Jesús chee xezezéquene' xelagu zrie' Le'.

12

Jesús dxenné' ca naca chee da naca xrlátaje láweze

1 Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxe'e benne' ca' dxusédene':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee benne' ca'. ² Quebe bi de da dxundxu bagácheze da quebe gulé'e lawe', ne quebe bi de da nagache da quebe nu neze. ³ Chee le na', xúgute da gunle lu da chulla, xululé'e lawe' te zra, na' da gunle bagácheze lu xu'u naga naxéxujte dxa xu'u, wénqueze na lau xúgute bénneache.

Nu dxal-la' zrébedxu
(Mt. 10.28-31)

⁴ Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute bēla' dxen chee bēneache, san gate te na', québedxa xelexéqueñe' bi xelune'. ⁵ Na'a dxapa' le'e nu dxal-la' zrébele. Le zrebe Bēnea' gate te xequé'e xel-la nabán chee bēneache, nape' xel-la dxenná bea gudé'e' bēneache ca' lataj ba xa'. Awe', Le' le zrebe.

⁶ ¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. ⁷ Cá'anqueze xicha xíchajle le'e xúgute na zaj nababa na lau Dios. Chee le na' quebe zrébele. Zácadxale le'e ca be zante bxínnedu ca'.

Benne' dxelexechebe' zaj naque' chee Jesús
(Mt. 10.32-33; 12.32; 10.19-20)

⁸ Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bēneache, cá'anqueze neda', Benne' Gulje' Bēneache, xechébequeza' chee benne' ca' lau gubáz chee xabáa ca' chee Dios, ⁹ san benne' ca' quebe xelexechebe' chia' lau bēneache, néda'queza' quebe xechéba' chee' lau gubáz chee xabáa ca' chee Dios.

¹⁰ 'Che nu benne' bi nnie' chia' neda', Benne' Gulje' Bēneache, gunité lau Dios chee', na' benne' nnie' chee Be' Lá'azxa, quebe gunité lau Dios chee bēnea'.

¹¹ 'Gate xelexé'e le'e lau benne' xíchaj chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, ¹² lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

Da stebe chee xel-la gunní'a

¹³ Tu benne' ládujla benne' ca' guzre' Jesús:

—Benne' Wesede, guzre bi bicha' gúnnabe' chia' da xexal-la' chee da guca chee xrantu'.

¹⁴ Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

¹⁵ Nadxa guzre' benne' ca':

—¡Le na' xque! ¡Le guxúe xanne' cuínale chee quebe gucúdele! Xel-la nabán chee nu benne' quebe zua na lu da nápal'e.

¹⁶ Nadxa bchalaj Jesús da dxul'é nigá, gunné':

—Guzúa tu benne' gunní'a, na' xezr la xu chee' bnézrujle'e na. ¹⁷ Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá. ¹⁸ Nadxa dxenné': “¡Ba nezda' ca da guna! Guchínnaja' naga dxezrá' lina chia', chee guna' da zrí'adxa, na' guzrá'a na' ca naca lina chia' nigá, ne ca naca da ba napa'. ¹⁹ Nadxa nníqueza' néda'queza': Ba déle'e chiu' da zante chee zane' iza. Bezi' lazre'. Güe'e gudagu, ne gubé.” ²⁰ Na' Dios guzre' bénnea': “Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na.” ²¹ Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

Dios dxuxúe' bi chee' ca'
(Mt. 6.25-34)

²² Ca gudé na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gácule. ²³ Xel-la nabán chee zácadxa na ca da gágule, na' bel-la' dxen chee zácadxa na ca zra lánale. ²⁴ Le nna'xque ca dxaca chee bxínnedu ca'. Quebe dxelázaba', ne quebe dxelelápaba', ne quebe zaj zua naga dxuluxuzraba', na' Diósqueze' dxuxi'aj dxugawe'-ba'. Zácadxale le'e ca bxínnedu ca'. ²⁵ ¿Núlale le'e séquele gusetunna cuínale xetú ben lawe' da dxebe'le'ele gunne xue? ²⁶ Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

²⁷ Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucué' da xrtandxa ca tu xiajdu caní. ²⁸ Che Dios dxugacue' caní xíxre'du ca', da zaj zua na'a le'e xixre', na' wxre xelezxe na, ¿quegá gundxe' chee le'e, benne' dxeléajle'e láteze chia'? ²⁹ Chee le' na', quebe cue'le gunne xue ca naca da gágule, u ca naca da xí'ajle, ne quebe súale stebe. ³⁰ Ca' naca na, lawe' da ca naca benne' ca' zaj zre'e xezr la xu dxelexílaje' ca naca da caní, san le'e, zua Xrale xabáa ba nézene' nachínnele ca naca da caní. ³¹ Le cue' gunne xue nna bea Dios lu xichaj lázrdaule, na' sile ca naca da caní.

Da gunní'a da dxegú'u cháwedxu xabáa
(Mt. 6.19-21)

³² Na' gunná Jesús:

—Quebe zrébele, zríla'du chia', bábaze nácale le'e. Xrale Dios dxezaca ba lazre' gunne' chee lataj naga dxenná be'e. ³³ Le

gute da nápaie, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. ³⁴ Naga nuzúale xel-la gunní'a chee, na' súaqueze lázrdaule.

Dxal-la' gupá'a cuínadxu

³⁵ Na' gunná Jesús:

—Le gupá'a cuínale, ne le gugala xi' chee. ³⁶ Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'. ³⁷ Ba neza zrente naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. ³⁸ Lácala xezrine' dxela u dxaní'sise', che xedajxraque' le' dxelennaze', ba neza naca na chee benne' wen zrin ca'. ³⁹ Dxal-la' nézele da nigá, che xrane xu'u gunézené' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. ⁴⁰ Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

Benne' wen zrin li lazre', ne benne' wen zrin quebe naque' li lazre'

(Mt. 24.45-51)

⁴¹ Nadxa Pedro bchebe' Jesús:

—Xran, ¿bchálaju' da dxulé'e nigá chee nétu'ze, che chee xúgute benne'?

⁴² Xránadxu gunné':

—¿Nuzra naca wen zrin li lazre', bénnea' dxucá'ana xrane' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? ⁴³ Ba neza naca na chee benne' wen zrin na', gate xezrin xrane', xedajxraque' le' dxune' ca da nabague'. ⁴⁴ Da li dxapa' le'e, xrane' gucá'ane' lu ne'e xúgute da nape'. ⁴⁵ Che benne' wen zrin na' dxéquene' wazré xrane' xelé'e, ne su lawe' gusaca zi'e benne' wen zrin xezica ca', ne nu'ula wen zrin ca', ne su lawe' xi'aj gawe', ne súzrene', ⁴⁶ nadxa xrane' xelé'e lu zra quebe dxebeze' le', ne lu zra quebe nézene', na' gusaca zí'le'e le', ne chugue' chee' saque' ca xelezaca benne' ca' quebe zaj naque' chee Dios.

⁴⁷ 'Benne' wen zrin na' nézene' ca da dxaca lazre' xrane' san quebe nucueze', ne quebe dxuzúe' dizra', benne' nigá gudée' le' ba xa'. ⁴⁸ Benne' wen zrin na' quebe nézene' da na', ne dxune' da dxusebaga na le' zria, benne' nigá té'e láteze xel-la zi'. Che tu benne' dxezí'le'e da dxunezruj Dios le', Dios wanábale'e le', na' bénnea' Dios nuxrén lazre' le' da zrente, Dios wanné xúle'ene' le'.

Dxelaca benne' chupa la'a ne chee Jesús
(Mt. 10.34-36)

⁴⁹ Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'. ⁵⁰ Dxal-la' chu'a lu xel-la gute ca dxu'u tu benne' lu nisa gate dxedxúe' nisa, na' téle'a xel-la zi' cadxa gácatequeze na. ⁵¹ ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee guna' benne' chupa la'a. ⁵² Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábage' chupe', na' chupe' xeledábage' chunne'. ⁵³ Xra tu bi biu tábage' bi biu chee', na' bi biu na' tábagabe' xrabe'. Xrna tu bi nu'ula tábage' bi nu'ula chee', na' bi nu'ula na' tábagabe' xrnabe'. Tau zri'ine tu nu'ula tábage' zru'a lizre', na' zru'a lizre' na' tábage' tau zri'ine'.

Da dxululé'e na ca da gaca lu zra na'a zra
(Mt. 16.1-4; Mr. 8.11-13)

⁵⁴ Na' Jesús guzre' benne' ca':

—Gate le'e dxelé'ele da' beuj naga dxebía gubizra, na' dxennale, waca xiuj, ne ca' dxaca. ⁵⁵ Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'. ⁵⁶ Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xezr la xu nigá, san quebe dxezéquele xuzájla'ale da dxululé'e na ca gaca chee lu zra na'a zra.

Dxal-la' xezúadxu lu xel-la dxebeza zri lazre' nen benne' dxedábage' dxi'u
(Mt. 5.25-26)

⁵⁷ Na' gunná Jesús:

—¿Bizr chee na' quebe dxeque be'ele da naca xrlátaje? ⁵⁸ Che nu benne' dxaca lazre' guzúe' lue' lau benne' dxuchi'e, na' gate chéajlenu' le' chee zrinle lau bénnea', ben ba xen xezú' lu xel-la dxebeza zri lazre' nen bénnea' dxácaté xu'ule neza, chee quebe che'e lue' lau bénnea', na' bénnea' gudé'e lue' lu na' benne' gusézxuje' lue' lizre xia. ⁵⁹ Dxapa' lue' quebe xedxúaju' na' cadxa quízruju' ca da dxebagu'.

13

Dxal-la' xelexebí'i lazre' bénneache

¹ Ca lu zra na' belezrín bal-la benne' lau Jesús, na' bu-luzenne' Le' ca ben Pilato, bētie' bal-la benne' Galilea, na' bchague' dxen chee benne' ca' nen dxen chee be xixre', bea ca' ba belutiē' chee xuluzriē' dxen chee na lau Dios. ² Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxe' benne' dul-la ca benne' ca' xezícala zaj zre'e xezre ca' zaj nababa Galilea? ³ Dxapa' le'e: Cabí, na' che quebe xebí'i lázrele le'e, xúgutele le'e cuía xile. ⁴ ¿Dxéquele le'e benne' chinu chunna ca' gulatië' gate guzría cha xu'u sibe le' da nazí le na Siloé zaj nabágadxe' dul-la ca xezícala benne' ca' zaj zre'e xezre Jerusalén? ⁵ Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

Xaga higo da quebe dxebía na da zixre

⁶ Nadxa Jesús bchálajlene' benne' ca' da dxulé'e nigá, dxenné':

—Tu benne' zua tu xaga higo cheë' zua na lu xezr la xu cheë', na' xeajnë'e na che zría na, na' quebe bi bezrélene'. ⁷ Nadxa guzre' benne' dxun zrin lu xezr la xu cheë': “Gunná'xque, chun ízate ba bida' dxenná'a che zria xaga nigá, ne quebe bi bezréleda'. ¡Guchugu na! ¿Bizr cheë na' nulán na xezr la xu nigá?” ⁸ Bénnea' dxun zrin cheë xezr la xu na' bechebe': “Xran, bca'ana na xetú iza na'a. Guzúlujdxa' zran na, ne cua'a na bebe. ⁹ Nen da na', gúnnalja na, san che cabí, na' chugu' na.”

Jesús dxexune' tu nu'ula nalegu cuzre'

¹⁰ Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédene' benne' ca', ¹¹ na' zua na' tu nu'ula xu'e we' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelië'. ¹² Gate ble'e Jesús le', na' gunné' le', ne guzre' le':

—Nu'ula, ba bexacu' cheë xízrawë' chiu'.

¹³ Nadxa guxrúa ne'e nu'ula na', na' la ná'queze nu'ula na' belite', na' guzú lawë' dxue lá'ane' Dios. ¹⁴ Na' benne' xíchaje cheë xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

¹⁵ Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre cheële u burro cheële lu zra dxupá'anadxu chjua'le-ba' xelé'ajba' nisa? ¹⁶ Nú'ula nigá naque' xrtia Abraham, na' da xriwe' nuchéaj na le' lu xízrawë' nigá ba zeaj chinu chunna iza, na' ¿quebe dxal-la' xebéaja' xízrawë' da nuchéaj na le' lu zra dxupá'anadxu?

¹⁷ Gate gunná Jesús da nigá, xúgute benne' dxeledábague' Le' belexedué'ene', na' xúgute benne' xezícadxa gulebene' gate belelé'ene' ca naca da zrente da dxun Jesús.

*Da dxulé'e na ca naca cheë binnedau' cheë mostaza
(Mt. 13.31-32; Mr. 4.30-32)*

18 Nadxa gunná Jesús:

—¿Aja naca xel-la dxenná bea chee Dios, ne bi gutil-le lébeda' na? 19 Naca na ca tu binnedau' chee mostaza, tu benne' dxaze' na lu xezr la xu chee', na' dxegula na, ne dxácate na ca tu xaga zren, na' bxínnedu ca' dxuluzríaba' xrú'neba' lu zruze na ca'.

Da dxulé'e na ca naca chee cua zichaj chee xeta xtila
(Mt. 13.33)

20 Cá'anqueze gunná Jesús:

—¿Bizra gutil-le lébeda' xel-la dxenná bea chee Dios?

21 Naca na ca cua zichaj chee xeta xtila tu nu'ula dxuchague' na chunna xaga de xezaj, na' dxuchazra na ca naca cua na'.

Dxa xu'u lechide'
(Mt. 7.13-14, 21-23)

22 Dxácate xu'u Jesús neza zexíaje' xezre Jerusalén, dxusédené' bénneache lu xezre ca', ne xézredu ca' naga dxedéé'. 23 Na' bchebe tu benne' Le':

—Xran, ¿bábaze benne' xeledá?

Bechebe Jesús:

24 —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezéquené'. 25 Ca te na' chasa xrane xu'u, ne guszxuje' dxa xu'u, na' le'e zrale chalé'ajla nnele dxu'a dxa xu'u na', nnale: “Xran, gusalaj chú'untu'.” Na' le' xechebe': “Quebe nezda' ga benne' le'e.” 26 Nadxa su láuquezle le'e nnale: “Güe'e gudágulentu' lue', na' lue' bsédenu' lu neza cheentu' ca'.” 27 Le' xechebe': “Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela.” 28 Na' cuézrele, ne xagu xá'ate lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz chee Dios, zaj zue' naga dxenná bea Dios, na' le'e zrale chalé'ajla. 29 Weledá' benne' zaj zre'e dapa saca chee xezr la xu nigá, na' xelebé'e xelawe' naga dxenná bea Dios. 30 Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

Dxebezre Jesús chee xezre Jerusalén
(Mt. 23.37-39)

31 Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutie' Lue'.

32 Jesús bechebe':

—Le chjaca cheajguézrele benne' wilaj lazre' calela na': “Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'.” 33 Dxun na ba xen chéajlena' neza chia' na'a, ne wxre, ne wizraj, lawe' da

quebe gaca gate tu benne' dxenné' waláz chee Dios che quebe xelute benne' Jerusalén le'.

³⁴ “Jerusalén, Jerusalén, le'e na' dxútele benne' dxelenné' waláz chee Dios, ne dxuzríale xiaj benne' gubáz ca' dxesella Dios. Zane' lasa guca lazra' gutupa' bi chee ca' ca dxun bedxuj, dxutúpaba' bédxujdu ca' zran xrílabá', san quebe guca lázrele. ³⁵ ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bénnea' ze'e lu La Xránadxu!”

14

Jesús dxexuné' tu benne' de xi' ca naca bel-la' dxen chee'

¹ Tu zra dxulupá'ana benne' judío ca' guxíaj Jesús zeajtawé' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi guné'. ² Zúaqueze lau Jesús tu benne' de xi' ca naca bel-la' dxen chee'. ³ Nadxa Jesús bchebe' benne' ca' dxuluxuzájle'e da nadxixruj bea na, ne benne' fariseo ca', gunné':

—¿Waca nu benne' xexuné' benne' we' lu zra dxupá'anadxu, che cabí?

⁴ Benne' ca' gulezúe' zrize. Nadxa Jesús guqué'e benne' we' na', ne bexuné' le', na' guzre' le' xexíaje'. ⁵ Nadxa guzre' benne' fariseo ca':

—¿Núlale le'e, che bezre chee u bia chee bíxreba' tu lu xedxu, quebe xebájle-ba' zra ná'queze lácala naca zra dxupá'anadxu?

⁶ Quebe bi guca xelexechebe'.

Benne' zaj zre'e laní chee wechaga na'

⁷ Gate ble'e Jesús ca' dxelún benne' ca', dxelebé'e lataj blaudxa ga dxelawe', na' bchálaje' da dxulé'e na, dxenné':

⁸ —Gate tu benne' dxenné' lue' laní chee wechaga na', quebe cue'u lataj blau, lawe' da che wazá tu benne' nácadxé' blau ca lue', ⁹ na' bénnea' gunné' dxúpatéle xide' xe'e lue': “Bnezruj lataj nigá benne' nigá.” Nadxa gun na ba xen xexíaju' lataj bzébedxa lu xel-la stu'. ¹⁰ Na'a, gate nu benne' nne' lue', gudxé'e lataj bzébedxa, chee gate za bénnea' gunné' lue', wanné': “Bi ljwezra', gudé nigala naga nácadxa blau.” Ca'an gaca, xegá'anu' szren lau benne' ca' zaj zre'e dxelágulene' lue'. ¹¹ Benne' dxucá'ana szren cuine', wexéxrujla bénnea', na' benne' dxucá'ana baxache' cuine' wegá'ana szrénqueze'.

¹² Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walíizr chiu' ca' zaj nape' da gunní'a, lawe' da benne' caní welenné'queze' lue', na' zrué'eqeznu' da xelexexuné' chiu'. ¹³ Gate dxunu' tu laní,

gunné benne' xache' ca', ne benne' zaj nadxugu ni'a ne'e, ne benne' zrinnaĵ ca', ne benne' la chul-la ca'. ¹⁴ Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazru' gate xelexebán benne' xrlátaje ca'.

Da dxulé'e na ca naca cheĵ tu xrche' zren

¹⁵ Gate ben tu benne' dxágule Le' da na', na' guzre' Jesús:

—Ba neza zrente naca na cheĵ benne' gawe' xeta naga dxenná bea Dios.

¹⁶ Jesús guzre' le':

—Tu benne' gulu'e tu xrche' zren, na' gunné' benne' zan.

¹⁷ Ca bzrin zra xelawe' xrche' na', gusel-le' wen zrin cheĵ cheĵ cheajezre' benne' ca' gunné': "Le da, lawe' da ba nusení'a da gágudxu." ¹⁸ Xúgute' gulezú lawe' dxelenabe' gu'e le' lataj quebe xelide'. Benne' nedxu gunné': "Za bezítea' tu cue' xezr la xu chia', na' dxal-la' cheajnná'a na. Dxata' xueda' lue' si zrenu' chia'." ¹⁹ Xetúe' gunné': "Za bezítea' gazxu' cue' bežr chia', na' guxúa' aja xelunba'. Dxata' xueda' lue' si zrenu' chia'." ²⁰ Na' xetúe' gunné': "Za bchágate' na'a, na' quebe gaca xida'." ²¹ Gate bezrín benne' wen zrin na', guzre' xrané' ca naca da nigá. Nadxa bzra'a xrané' na', na' guzre' wen zrin na': "Guxíaj na'a la neza ca', ne neza cheĵ xezre nigá, na' xeajxri' xúgute' benne' xache' ca', ne benne' zaj nadxugu ni'a ne'e, ne benne' zrinnaĵ ca', ne benne' la chul-la ca'." ²² Ca gudé na' gunná benne' wen zrin na': "Xran, ba beña' ca gunnáu', na' ne dedxa lataj." ²³ Nadxa gunná xrané' na': "Guxíaj na'a la neza ca', ne neza lásedu ca', na' xeajén ba xen xelexé'e, cheĵ cha' lizra' nigá. ²⁴ Dxapa' le'e, netú benne' ca' gunnéa' nédxula quebe xelawe' xrche' chia'."

Xel-la zi' da te benne' chéajleĵe' Jesús

²⁵ Benne' zan zjácalene' Jesús, na' Le' bexéchaje', na' guzre' benne' ca':

²⁶ —Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zane' ca', ne xel-la nabán cheĵ, quebe gaca gaque' neda' tuze. ²⁷ Benne' quebe sál'lene' neda' lácala dxal-la' te'e xaga béguaj, quebe gaca gaque' neda' tuze. ²⁸ Che tu benne' ládujla le'e dxaca lazre' gune' tu xu'u sibe, ¿quebe cue'e nedxu gune' xrbaba cheĵ che wazúene' xuzrte' na? ²⁹ Che quebe gune' caní, ne che cueche' lane na, na' ca te na' quebe suene' xuzre' na, na' xúgute' benne' xelexé'ene' na xelexú lawe' xelún le' cheĵ bénnea', ³⁰ na' xelenné': "Benne' nigá guzú lawe' dxune' tu xu'u. Quebe guque' gune' ca naca." ³¹ Che tu benne' wenná bea dxal-la' cheajtíl-lalene' xetú benne' wenná bea, ¿quebe cue'e gune' xrbaba cheĵ che wazúene' nen tu gaxúa gaxúa

benne' dxjaque' wedil-la cheajtíl-lalene' bënnea' za' nen chupa gaxúa gaxúa benne' dxjaque' wedil-la? ³² Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabe' gata' xel-la dxebeza zri lazre'. ³³ Ca' naca na, núteteze benne' ládujla le'e, che quebe gusane' ca' naca da nape', quebe gaca gaque' neda' tuze.

Zede' da québedxa naca na sna'a

(Mt. 5.13; Mr. 9.50)

³⁴ Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? ³⁵ Quebe gaca guchínedxu na, quegá chee' gucá'ana cháwedxu xezr la xu, ne quegá chee' guchíredxu bebe, san dxal-la' chú'unadxu na. Benne' ca' zaj zua nague', dxal-la' xelenne'.

15

Ca guca chee' tu zrila' guníteba'

(Mt. 18.10-14)

¹ Benne' zante benne' wechizruj waláz chee' Roma, ne benne' dul-la ca' gulebigue' naga zua Jesús chee' xelenne' da dxuchálaje'. ² Chee' le' na' benne' fariseo ca', ne benne' dxulux-uzájle'e da nadxixruj bea na gulezí tizre' Jesús, gulenné':

—Benne' nigá dxune' tu zren benne' dul-la ca', ne dxágulene' le'.

³ Nadxa bchalaj Jesús da dxulé'e na, gunné':

⁴ —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zraba' le'e xixre', na' se'e cheajdílaje' bea na' guníteba' cadxa xezrelne'-ba'? ⁵ Na' gate xezrelne'-ba', bene', na' xeque'e-ba' xexrúe'-ba' xe'a xene'. ⁶ Na' ca xezrine' lizre', gutupe' ljwezre' ca', ne benne' walizre chee' ca'. Na' xe'e le': “Le be nen neda', lawe' da bezrelda' zrila' chia' guníteba'.”

⁷ Na' gunná Jesús, dxé'e benne' ca':

—Cá'aqueze zúale'edxa xel-la dxebé xabáa gate tu benne' dul-la dxexebí'i lazre', quézcala chee' tápalalaj chennu benne' xrlátaje ca' dxeléquene' quebe dxun na ba xen xelexebí'i lazre'.

Ca guca chee' tu dumí da gunite

⁸ Nadxa Jesús bchálaje' xetú da dxulé'e na, dxé'e benne' ca':

—Tu nu'ula nape' chí dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínalu ca xezrelne' dumí chee' da gunite na. ⁹ Na' ca xezrelne' dumí na', gutupe' nu'ula ljwezre' ca', ne nu'ula walíZR chee' ca', na' xe'e le': “Le be nen neda', lawe' da bache bezrelda' dumí chia' da gunite na.”

10 Na' gunná Jesús, dxē'ē benne' ca':

—Cá' anqueze dxelebé gubáz chee xabáa ca' chee Dios gate tu benne' dul-la dxexebí'i lazre'.

Ca guca chee zri'ine tu benne' gunítebe'

11 Nadxa Jesús bchálaje' xetú da dxulé'e na, dxē'ē le':

—Tu benne' zaj zra' chupa bi chee'. 12 Na' bi cuide' chee' gúzrebe' xrabe': "Xrae, bēna chia' da dxal-la' si'a chee da naca chiu'." Nadxa xrabe' bēne' gachaj da bnézuje' cha chee'be' tube', ne xetube'. 13 Ca gudé tu chupa zra, bi cuide' chee' bēnea' btúpabe' xúgute da naca chee'be', na' guzabe' zitu', na' bzrinbe' xetú xezr la xu. Na' bēn dítajbe' dumí chee'be' lu da calela da benbe'. 14 Na' ca gudache xúgute dumí chee'be', bzrin tu gubina' lu xezr la xu na', na' lebe' gudunbe'. 15 Nadxa guzabe' xejtílajbe' zrin gunbe' chee tu benne' lu xezr la xu na'. Benne' na' gusél-le'-be' le'ē xixre' chee' chee' cheajxúbe' cuche chee' ca'. 16 Guca lázrebe' gágube' da calela da dxelagu cuche ca'. Netú benne' quebe bi bnézuje' da gágube'. 17 Nadxa xejásá lázrebe', dxennabe': "Benne' zante, benne' wēn zrin zaj zre'ē lizre xra', na' déle'ē da dxelawe'. Neda' dxátequeza' xel-la dxedún. 18 Webí'iza' xexá'a naga zua xra', na' xapa' le': Xrae, bēna' dul-la lau Dios, ne lau lue'. 19 Québedxa naca chia' gaca' zri'inu'. Bzua neda' ca tu benne' wēn zrin chiu'." 20 Nadxa begú'ube' neza, bezrinbe' lizre xrabe'.

'Tu chi na', ble'e xrabe' lebe' ba zezabe', na' bexache lazre'-be'. Na' guzá chégūe' xejchague'-be', na' bnide'-be', ne bnúpete'-be'. 21 Nadxa gunabe': "Xrae, bēna' dul-la lau Dios, ne lau lue'. Québedxa naca chia' gaca' zri'inu'." 22 Na' gunná xrabe', dxē'ē benne' wēn zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. 23 Le cheajzri' tu bezre bē dxanne, na' gútele-ba'. Gágudxu, ne gundxu laní, 24 lawe' da bi chia' nigá guca chee'be' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelune' laní.

25 'Dxácatē na', zri'ine' bi waca zúabe' le'ē xixre' dxunbe' zrin. Na' chizrela' ca bezrinbe' gagu cuita xu'u lizre xrabe', na' benbe' dxaca wil-la, ne dxaca wexá'a. 26 Nadxa gunnébe' tu bi wēn zrin na', dxē'ēbe' lebe': "¿Bi dxaca nigá?" 27 Bi wēn zrin nigá cúnnabe': "Ba belá' bi bichu', na' xrau' gunná bé'ene' nu gute tu bezre bē dxanne, lawe' da belabe' zúabe' zri'a chawe'." 28 Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lebe' xexú'ube'. 29 Na' cúnnabe', dxē'ēbe' xrabe': "Nézqueznu' zane' iza ba bēna' zrin chiu', ne cabata' bcha'a lue', na' ne tu lasa quebe ne gunnu' chia' tu chíbuda' chee' guna' tu laní nen ljwezra' ca'. 30 Na'a belá' bi chiu' nigá, bi ba bēn dítajbe' dumí chiu', guzúalebe' nu'ula

dxeledá zraga ca', na' bēte lizu' bēzre bē dxanne nē chee lēbe'." ³¹ Nadxa gunná xrabe', dxē'e-be': "Zri'ina', lue' tu zúalezquezu' nen neda', na' xúgute da de chia' naca na chiu'. ³² Na'a dxun na ba xen gundxu laní, ne bedxu, lawe' da bi bichu' gúcabe' ca tu benne' ba gute, ne naca banbe'. Gunítebe', na' ba bezrágdxu-be'."

16

Benne' wēn zrin blau quebe naque' xrlátaje

¹ Nadxa Jesús guzre' benne' ca' dxusédene':

—Guzúa tu benne' gunní'a, na' zua tu benne' wēn zrin blau chee'. Na' bal-la benne' xeajleguezre' le' benne' wēn zrin blau na' dxun dítajē' da de chee xranē'. ² Nadxa xranē' gunné' le', ne guzre' le': "¿Bizra da nigá dxelenné' chiu'? Blué'e neda' ca naca chee zrin dxunu', lawe' da québedxa gaca gacu' wēn zrin blau chia'." ³ Nadxa benne' wēn zrin blau na' guzú lawē' dxenné' lu xichaj lázrdawē': ¿ájazra guna' na'a, lawe' da xebéaj xrana' neda' lu zrin chia'? Quebe sueda' guna' zrin le'e xixre', ne wedué'eda' naba' guna'. ⁴ Na'a ba nezda' tu da guna' chee xelezúa benne' xelezí' lu ne'e neda' gate québedxa de zrin chia'. ⁵ Nadxa gunné' tu tu benne' dxelal-le' chee xranē' na'. Na' bchebē' benne' nedxu: "¿ájatē dxal-lu' chee xrana'?" ⁶ Benne' na' bechebē': "Dxal-la' chee' tu gaxúa zruaga da za." Nadxa benne' wēn zrin blau na' guzre' le': "Nigá de xiche chiu'. Gudxé'e bexún xetú na, na' bzuaj na dxebagu' chi xun zruaga ca'." ⁷ Gudé na' bchebē' xetú benne' ca': "¿Gazra lue', ájatē dxebagu'?" Na' benne' nigá guzre' le': "Dxebaga' tu gaxúa bzude' zrua' xtila." Nadxa benne' wēn zrin blau guzre' le': "Nigá de xiche chiu'. Bēn xetú na, na' bzuaj na dxebagu' tápalalajze." ⁸ Xranē' gúquebe'ene' nácale'e sina benne' wēn zrin blau na' ca bene' da ca'.

Nadxa gunná Jesús:

—Ca' naca na, benne' zaj zre'e na'a zra zaj nácadxe' sina lu da dxelunē' nen le sa' ljwezre' ca', ca zaj naca benne' zaj naque' chee Dios.

⁹ Neda' dxapa' le'e, le guchine xel-la gunní'a chee xēzr la xu nigá chee cha benne' ljwézrele, chee gate te chee xel-la gunní'a na', na' sua nu si' lu na' le'e naga gaca banle chadía chacanna.

¹⁰ 'Benne' dxuchínene' láteze lu dutē xel-la li lazre' chee', cá'aqueze guchínene' tu da zrendxa dutē xel-la li lazre' chee', na' benne' quebe naque' li lazre' ca dxuchínene' láteze, cá'aqueze quebe gaque' li lazre' ca guchínene' tu da zrendxa. ¹¹ Ca' naca na, che quebe nácale li lazre' ca dxuchínele xel-la gunní'a chee xēzr la xu nigá, ¿nuzra guxrén lazre' le'e chee guchínele xel-la gunní'a li? ¹² Che quebe nácale li lazre' ca

dxuchínele da naca chee benne' xula, ¿nuzra gunna le'e da gaca cheéquezle?

¹³ Quebe gaca tu benne' wen zrin gunē' zrin chee chupa xranē', lawe' da cuídenē' tuē', na' xetúē' zrí'ine', u gaque' li lazre' nen tuē', na' xetúē' guzúē' chalá'ala. Quebe gaca nu gun zrin chee Dios, ne chee da gunní'a da nape'.

¹⁴ Benne' fariseo ca', benne' dxulucúdee' dumí, ne dxuluzé nague' da dxenná Jesús, belún le' chee'. ¹⁵ Nadxa gunná Jesús: —Le'e dxulé'e cuínale xrlátaje lau bēnneache ca', san Dios núnbe'e lázrdaule. Da dxeleque bēnneache naca na xrlátaje, naca na da dxuzúa Dios chalá'ala.

Da nadxixruj bea na, ne xel-la dxenná bea chee Dios

¹⁶ Na' gunná Jesús:

—Ca bzrin zra zua Juan gulenná bea da nadxixruj bea na, ne da bululé'e benne' ca' buluchálaje' waláz chee Dios. Na'a, ca na'tē dxendxu dizra' chawe' ca gaca chú'udxu naga dxenná bea Dios, na' xúgute benne' dxelunē' ba xuzre xelu'e na'.

¹⁷ Waca te chee xabáa, ne chee xezr la xu nigá, san quebe te chee tu da naxúaj na lu da nadxixruj bea na.

Benne' biu dxulusáne' nu'ula chee'

(Mt. 19.1-12; Mr. 10.1-12)

¹⁸ Na' gunná Jesús:

—Che tu benne' biu gusanē' zru'ule', ne súalēne' nu'ula xula, benne' biu nigá dxunē' dul-la dxáchajne' xrba chee xel-la wechaga na', na' benne' biu zúalēne' tu nu'ula ba bsan benne' chee' le', benne' nigá cá'anqueze dxunē' dul-la dxáchajne' xrba chee xel-la wechaga na'.

Tu benne' gunní'a, ne tu benne' xache'

¹⁹ Na' gunná Jesús:

—Guzúa tu benne' gunní'a, gúcuē' zra lanē' da zaca, ne da zri'a xrtan, na' xúgute zra bēne' laní zren. ²⁰ Cá'anqueze guzúa tu benne' xache' le' Lázaro, nazrate we' lu bel-la' dxen chee', na' dxeajché'e lu xu dxu'a lizre benne' gunní'a na'.

²¹ Benne' xache' nigá guzá lazre' gawe' ca da dxelexruj zranla ga dxelagu benne' gunní'a na', na' bécudu ca' dxelelé'ēba' lu we' ca' chee Lázaro. ²² Bzrin zra gute benne' xache' na', na' belexeché' gubáz chee xabáa ca' le' zeajzezúalēne' Abraham lu lataj chawe' chee Dios. Cá'anqueze gute benne' gunní'a na', na' bulucachē' le'. ²³ Gate benne' gunní'a na' dxezaca zi'e lataj chul-la chee benne' gate, na' guchisa lawe', na' blé'ene' Abraham zue' zitu', ne Lázaro zúalēne' le'. ²⁴ Nadxa gudxezre xe'e, gunné': “¡Xrae, Abraham, bexache lazre' neda', ne gusella Lázaro, cheajsebise' tu zrube ne'e, na' xide' xucule' luzra' nigá! Dxezaca zi'a lu xi' nigá.” ²⁵ Na' Abraham gunné': “Bi

chia', bsa lazre' gúcalē'e chawe' chiu' lu xēzr la xu, san Lázaro gúcalē'e da zi' da xa' chee'. Na'a le' dxezi'e da ba neza nigá, na' lue' dxezaca zi'u na'. ²⁶Xetú da zua, zua tu chejéa zrentē laduj netu' ne le'e. Ca' naca na, che nu benne' zua nigá dxaca lazre' chéajē' naga zu', quebe gaca, ne quebe gaca benne' zua naga zu' xide' naga zúantu' netu'." ²⁷Nadxa gunná benne' gunní'a na': "Dxata' xueda' lue', xrae Abraham, sel-lu' Lázaro lizre xra', ²⁸naga zaj zra' gazxu' bi bícha'dau', chee cheajchálajlēne'-be', chee quebe xeledá' lēbe' nigá xelezaca zi'be' ca dxaca chia'." ²⁹Abraham gunné': "Zaj nape' da buluzúaj Moisés, ne benne' ca' buluchálajē' waláz chee Dios. Dخال-la' xelená' xánnie' da na' naxúaj na." ³⁰Benne' gunní'a na' bechebe': "Awe', xrae Abraham, san che nu benne' ládujla benne' gate chéajē' cheajchálajlēne' le', welexebí'i lazre'." ³¹Abraham gunné': "Che quebe xelenne' ca da gulenná Moisés, ne benne' ca' buluchálajē' waláz chee Dios, quebequeze xeléajlē'e che tu benne' xebanē' ládujla benne' gate."

17

Ca naca da dxun na ga nabágadxu dul-la

(Mt. 18.6-7, 21-22; Mr. 9.42)

¹Jesús guzre' benne' ca' dxusédene':

—Welezúaqueze da xelún na xelebaga bēnneache dul-la, na' edxugúa bēnnea' gunē' da gun na xebaga benne' xula dul-la.

²Gácadxa chawe' chee bēnnea' che nu guchéaj xiaj xiche lbe', na' chu'e lu nísadau' naga gátete' quézcala gunē' da gun na xebaga bidu caní dul-la. ³Le guxúe xanne' cuínale.

'Che le sa' ljwezru' gunē' chiu' da calēla, bzéajni'ine', na' che xebí'i lazre', bnite lau chee'. ⁴Lácala gunē' chiu' da calēla gazre lasa tu zra, na' gazre lasa xide' xē'e lue': "Dxexebí'i lazra'", dxal-la' gunitē lau' chee'.

Xel-la waca chee xel-la dxeajlí lazre'

⁵Benne' gubáz ca' chee Xránadxu gulé'e Le':

—Ben ga cheajlí lázredxantu' Dios.

⁶Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu binnedu chee mostaza, waca xēle xaga zrentē nigá: "Gucuasa nigá, ne xeajsúa lu nísadau'," na' xaga na' guzúa na dizra' cheele.

Da dxal-la' gun benne' wēn zrin

⁷'Che tu benne' ládujla le'e zua tu benne' wēn zrin chee', na' xelē'e le'e xixre' gate te gudé'e bezre u guxúe' béadu ca', ¿we'e benne' wēn zrin na': "Gudé nigala, gudxé'e gagu'?" ⁸Cabí, san nne': "Bcueza da gawa', ne gusí' chawe' le'u chee gaca ca'u

chia' da xi'aj gawa'. Te na' waca xi'aj gagu' lue'." 9 ¿We'e benne' wen zrin na': "Xcalenu'", lawe' da bene' da gunná be'e xrané' le'? Cabí. 10 Cá'anqueze le'e, gate xuzre gunle xúgute da gunná be'e Dios le'e, dxal-la' nna: "Nácantu' benne' wen zrin quebe bi zaj zaca, lawe' da quebe bi ne guntu' da zrédxala ca naca da nabágantú'."

Jesús dxexuné' chi benne' zaj de'e we' guzru'

11 Ca zexíaj Jesús zéaje' Jerusalén, gudé'e lu xezr la xu chee xezre ca' zaj nababa Samaria, ne xezre ca' zaj nababa Galilea. 12 Gate bzrine' tu xézredau', bedajlechaga Le' chi benne' zaj de'e we' guzru', na' belezé' zítu'la, 13 ne gulebezre xe'e, dxelenné':

—Jesús, Benne' Wesede, bexache lazre' netu'.

14 Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácate zjaque' na', na' belexexaque' chee xízrawe' chee'. 15 Nadxa tu benne' ca', gate guque bé'ene' ba bexaque', na' bebi'e, dxue lá'ane' Dios du lazre'. 16 Bzu zribe' lau Jesús, ne gudíxrujte' lawe' lu xu, dxé'e Le': "Xcalenu'." Benne' nigá naque' tu benne' Samaria. 17 Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' regué'? 18 ¿Tuze benne' zitu' nigá belá' güe lá'ane' Dios?

19 Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

Ca la' xel-la dxenná bea chee Dios

(Mt. 24.23-28, 36-41)

20 Benne' fariseo ca' buluchébe' Jesús bátala la' xel-la dxenná bea chee Dios, na' bechébe Le':

—Ca la' xel-la dxenná bea chee Dios quebe naca na da lé'ele.

21 Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee Dios.

22 Nadxa guzre' benne' ca' dxusédené':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. 23 Che xelenná bénneache, xelé'e le'e: "Nigá zue'", u: "Na' zue'", quebe chéajle, ne quebe gaule benne' ca'. 24 Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'.

25 Nédxula dxal-la' tél'e a xel-la zi', na' benne' zaj zre'e lu zra na'a zra xuluzúe' neda' chalá'ala. 26 Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. 27 Lu zra na' zua Noé gulé'aj gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da

dxedá lawe' nísadau', na' gúcale'ē xiuj, na' gulate xúgute benne' ca'. ²⁸ Cá'anqueze guca lu zra zua Lot, gulé'aj gulawe', ne gulá'awe', ne belútie', na' gulaze', ne belune' lizre', ²⁹ na' gate Lot bedxúaje' lu xezre Sodoma, na' ca dxaca gate dxaca xiuj, ca'an guca bexruij xi', ne da gache da dxuzé'zxele'e zran xabáa, ne bzria xi na ca naca benne' ca'. ³⁰ Ca'an gaca lu zra xelá'a neda', Benne' Gulje' Bénneache.

³¹ 'Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéaje' na, na' che nu benne' zue' le'e xixre', quebe dxal-la' xezrine' lizre'. ³² Le cheajsá lazre' ca guca chee' zru'ula Lot. ³³ Benne' dxaca lazre' gapa chí'e xel-la nabán chee' gunitie' na, na' bènnea' wde'e' na, wazrué'e bènnea' xel-la nabán.

³⁴ 'Dxapa' le'e, lu zre na', chupa benne' xelate' tu zren ga dxelase'. Tu'e xeché'e, na' xetúe' xegá'ane'. ³⁵ Chupa nu'ula xezeze' dxelútue'. Tu'e xeché'e, na' xetúe' xegá'ane'. ³⁶ Chupa benne' xezeze' le'e xixre'. Tu'e xeché'e, na' xetúe' xegá'ane'.

³⁷ Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

18

Da dxulé'e na ca naca chee' tu nu'ula ba gute benne' chee', ne benne' dxuchi'a da dxaca

¹ Jesús bchálaje' da dxulé'e na ca naca chee' gusedene' benne' ca' dxal-la' xuluwírajtecaze' Dios, ne quebe xelexebigue'. ² Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bènneache. ³ Lu xezre ná'queze guzúa tu nu'ula ba gute benne' chee'. Guxíaje' xejnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da calela. ⁴ Zane' lásate benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'anqueze bènneache, ⁵ san lawe' da nu'ula nigá dxune' neda' zede, guchí'a chaza' da dxaca chee' chee' québedxa xide' gúnle'e neda' zede.

⁶ Na' gunná Xránadxu:

—Caní na' gunná benne' wen da calela na', benne' dxuchi'e da dxaca. ⁷ ¿Quebe guchi'a Dios da dxaca chee' benne' ca' ba guqué'e, benne' ca' dxelenné' Le' te zra, ne chizrela? ¿Wazrene' xechebe' chee' benne' ca'? ⁸ Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje'

Bénneache, ¿wazréldxeda' tu benne' lu xęzr la xu nigá, benne' dxéajle'ę chia'?

Da dxulé'e na ca naca cheę tu benne' fariseo, ne tu benne' wechizruj

⁹ Jesús bchálaje' xetú da dxulé'e na, cheę xelene benne' ca' dxeléquene' zaj naque' xrlátaje, san dxuluzúę' chalá'ala le sa' ljwezre'. ¹⁰ Gunné':

—Chupa benne' xjaque' xudau' cheę xuluchálajlene' Dios. Tuę' naque' benne' xudau' fariseo, na' xetúę' naque' wechizruj waláz cheę xęzre zitu'. ¹¹ Benne' xudau' na' guzé' dxuchálajlene' Dios, gunné': “Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da caleła, ne benne' dxelún dul-la dxeláchajne' xrba cheę wechaga na', ne quegá ca benne' wechizruj nigá. ¹² Neda' dxuna' gubasa chupa lasa da gazre zra, ne dxunna' chiu' tu cue' cheę da chí cue' da dxezi'a.” ¹³ Benne' wechizruj na' guzúę' dxu'a dxa xú'uze, ne quebe bexazrjne' chisa lawe' xabáa. Béle'ę la chu'ę, dxenné': “Dios, bexache lazre' neda', naca' benne' dul-la.” ¹⁴ Dxapa' le'e, benne' wechizruj na' bezé'ę xexíaje' lizre', ne bexaque' xrlátaje lau Dios, san quegá caní guca cheę benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

Jesús dxenabe' gaca chawe' cheę bidu ca'

(Mt. 19.13-15; Mr. 10.13-16)

¹⁵ Belezrín benne' ca' zaj naché'ę bidu ca' lau Jesús cheę guzé' ne'ę lebe'. Gate belelé'e benne' ca' dxusede Jesús da nigá, na' gulezú lawe' dxeledil-le' benne' ca'. ¹⁶ Jesús gunné' benne' ca' dxusédené', na' dxe'ę le':

—Le güe lataj xeledá' bidu ca' naga zua', ne quebe guzágalebe', lawe' da benne' zaj naque' ca' bidu caní welexu'ę naga dxenná bea Dios. ¹⁷ Da li dxapa' le'e, benne' quebe si' lu ne'ę nna bea Dios le' ca' dxelún bidu caní, québequeze chu'ę naga dxenná bea Dios.

Tu benne' cuide' naque' benne' gunní'a

(Mt. 19.16-30; Mr. 10.17-31)

¹⁸ Tu benne' xíchaje' bchebe' Jesús:

—Benne' Wesede xrlátaje, ¿bi da dxal-la' guna' cheę zrué'eda' xel-la nabán zeajlí canna?

¹⁹ Jesús guzre' le':

—¿Bizr cheę na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. ²⁰ Lue' núnbe'u ca zaj naca xrba cheę Dios:

Quebe gunu' dul-la da dxachaj na xrba cheę wechaga na'.

Quebe gutiu' benne'.

Quebe cuanu'.

Quebe nneu' chee le sa' ljwezru' da quebe naca na.

Gudapa ba lá'ana xra xrna'u.

²¹ Benne' na' guzre' Jesús:

—Xúgutę da caní dxuna' ne nácatea' bídau'tę.

²² Gate ben Jesús da nigá, na' guzre'-be':

—Ne dxexázejenu' xetú da dxal-la' gunu'. Bete ca naca da de chiu', na' bnezruj na chee benne' xache' ca'. Nadxa gapu' xel-la gunní'a lu xabáa chee Dios. Na' gudá sálenu' neda'.

²³ Gate benne' cuide' na' benne' da nigá, bewí'inele'ene' lawe' da nápalęę da gunní'a. ²⁴ Gate ble'e Jesús ca bewí'ine benne' na', gunné':

—Stębetę naca chee benne' gunní'a ca' xelexú'ę naga dxenná bea Dios. ²⁵ Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

²⁶ Na' benne' ca' dxelenne' gulenné':

—Che ca' naca na, ¿núzraqueze la?

²⁷ Jesús guzre' benne' ca':

—Da quebe gaca xelún bėnneache, waca Dios gúnqueze' na.

²⁸ Na' gunná Pedro, guzre' Jesús:

—Xran, ba bsantu' ca da gudápantu' chee zálentu' Lue'.

²⁹ Nadxa Jesús bechebe':

—Da li dxapa' le'e, núteteze benne' gusane' lizre', u xra xrne'ę, u bi biche', bi zane' ca', u zru'ule', u zrí'ine' ca', chee gunę' zrin chee xel-la dxenná bea chee Dios, ³⁰ benne' nigá wazí'ę da zrendxa lu xezr la xu nigá, na' lu xezr la xu da za za' wazí'ę xel-la nabán da zeajlí canna.

Jesús dxuchálaje' xecha lasa ca gaca gate gatie'

(Mt. 20.17-19; Mr. 10.32-34)

³¹ Na' Jesús gunné' chalá'ala benne' chazrinnu ca' dxusédenę', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaje' waláz chee Dios ca gaca chia' neda', Benne' Gulje' Bėnneache. ³² Benne' zaj zre'ę Jerusalén xuludę' neda' lu na' benne' zitu' ca', na' xelún le' chia', ne xelennęqueze' schanni' chia', ne wuluzráqueze' neda' zrene'.

³³ Welúequeze' neda', na' te na' xelútię' neda', na' zra guxunne' zra xebana' ládujla benne' gate.

³⁴ Benne' ca' quebe guléajni'ine' da nigá, ne quebe zaj nézene' bi chee na' dxuchálajlene' le', lawe' da zaj naca da quebe guca xeléajni'iquezne'.

Tu benne' la chul-la, benne' zue' xezre Jericó

(Mt. 20.29-34; Mr. 10.46-52)

³⁵ Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. ³⁶ Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na'. ³⁷ Na' gulé'e le':

—Jesús, benne' Nazaret dxedé'e nigá.

³⁸ Nadxa gudxezre xa'a la chul-la na', gunné':

—¡Jesús, Zri'ine David, bexache lazre' neda'!

³⁹ Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxa le', dxenné':

—¡Zri'ine David, bexache lazre' neda'!

⁴⁰ Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

⁴¹ —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

⁴² Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

⁴³ Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute benne' ca' belelé'ene' da nigá cá'aqueze belúe lá'ane' Dios.

19

Jesús dxuchálajlene' Zaqueo

¹ Nadxa Jesús guxú'e xezre Jericó, ne dxedé'e xezre na'. ² Lu xezre na' zua tu benne' gunní'a le' Zaqueo. Naque' xíchaje chee benne' wechizruj ca'. ³ Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. ⁴ Nadxa guxíaj chégü'e' guzría lawe', ne chee gaca lé'ene' guluéne' tu lu xaga zren da zua gagu naga dxal-la' te Jesús. ⁵ Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen regá'ana' lizru'.

⁶ Nadxa Zaqueo na' bexétaje' chadí, na' nen duté xel-la dxebe' guz' lu ne'e Jesús. ⁷ Gate belelé'e benne' ca' da nigá, xúgute' gulezú lawe' dxelezí tizre' Jesús, dxelenné':

—Jesús bzrine' begá'ane' lizre tu benne' dul-la.

⁸ Nadxa Zaqueo na' guzé', na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de' chia', na' che nu benne' bsaca zia' le', xunézruja' tapa cue'la chee'.

⁹ Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. ¹⁰ Ca' naca na lawe' da bla' neda',

Benne' Gulje' Bénneache, chee xexíłaja', ne guselá' benne' ca' zaj nanítie'.

Da dxulé'e na ca naca chee chi dumí zaca

¹¹ Dxácatę na' dxuluzé naga benne' ca' dxenná Jesús da caní, na' bchálaje' tu da dxulé'e na lawe' da ba zuę' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá. ¹² Nadxa guzre' benne' ca':

—Guzúa tu benne' gunní'a xrlátaje, na' dxal-la' chéaje' zitu' chee xuluzúę' le' gaque' wenná bea, na' te na' xezrine' lazrie'. ¹³ Gate za se'e, gunné' chi benne' wen zrin chee', na' bnézuje' tu tu benne' ca' tuwéaj dumí zácalę'e, ne guzre' benne' ca': “Le guchine dumí nigá cadxa xelá'a.” ¹⁴ Benne' zaj zre'e lázrie' dxelecuídene' le', na' gulesel-le' bal-la benne' gubáz chee' naga zéaje' chee' cheajleguezre' benne' zaj zre'e na': “Quebe dxaca lázrentu' gaca benne' nigá wenná bea cheentu'.” ¹⁵ Buluzúę' le' gaque' wenná bea, na' bezrine' lázrie'. Gate bezrine' gunné' benne' wen zrin ca' bnézuje' dumí, chee nézene' ájate bezi' tu tu benne' ca'. ¹⁶ Benne' nedxu bzrine' lawe', na' gunné': “Xran, dumí chiu' ba bezi' na chi cue'la.” ¹⁷ Wenná bea na' bechebe': “Chawe' benu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'.” ¹⁸ Na' bzrin xetúę' lawe', na' gunné': “Xran, dumí chiu' ba bezi' na gazxu' cue'la.” ¹⁹ Cá'anqueze guzre' benne' nigá: “Lue' gacu' benne' nna be'ene' gazxu' xezre ca'.” ²⁰ Nadxa xetúę' bzrine', na' gunné': “Xran, nigá de dumí chiu'. Bcache chawa'a na tu lu bazxu, ²¹ lawe' da bzreba' lue'. Nacu' tu benne' dxuzúa xuzre. Dxexeca'u da quebe guxrú', ne dxexelapu' naga quebe guzu'.” ²² Nadxa wenná bea na' guzre' le': “Wen zrin calęla. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', ²³ ębizr chee na' quebe xju'u dumí chia' lu na' benne' xuluchínene' na, chee xezí' lu na'a neda' dumí chia' nen da gun xíchaje na, gate xezrina' neda' lizra'?” ²⁴ Nadxa guzre' benne' ca' zaj zre'e na': “Le xecá'a dumí na' lu ne'e, na' le gunezruj na benne' nape' chi dumí ca'.” ²⁵ Benne' ca' gulę'e le': “Xran, ba nape' chi dumí.” ²⁶ Na' bechebe' wenná bea na': “Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. ²⁷ Na'a, ca naca chee benne' ca' quebe gulaca lazre' gaca' neda' wenná bea chee', le cheajxri'e nigá, ne le gutie' lawa' neda'.”

Jesús dxexu'e Jerusalén

(Mt. 21.1-11; Mr. 11.1-11; Jn. 12.12-19)

28 Ca gudé gunné' da nigá, na' bexú'u Jesús neza zexíaje' Jerusalén. 29 Gate ba zua xezrine' xezre Betfagé, ne xezre Betania, ne zué' gáguze naga zua Xi'a Xaga Olivo, na' gusel-le' chupa benne' ca' dxusédene'. 30 Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía leba'. Le sezre-ba', na' le che'-ba' nigá. 31 Che nu naba le'e bizr chee na' dxesézrele-ba', le xe'e Xránadxu nachínene'-ba'.

32 Na' gusiá'ca benne' ca', na' belelé'ene' xúgute naca na ca ba guzre Jesús le'. 33 Na' gate dxeleseze' búrrua', na' xránaba' buluchebe' le':

—¿Bizr chee na' dxesézrele búrrua'?

34 Benne' chupa ca' belexechebe':

—Lawe' da nachine Xránadxu leba'.

35 Na' beleché'e-ba' lau Jesús, na' belexrúe' xicha chee' cúzruba', na' buluzrié' Jesús cúzruba'. 36 Ca zeaj Jesús, xu'e neza zrié' búrrudu na', na' dxelechiluj benne' ca' xicha chee' la neza naga téé'. 37 Gate bzrine' gagu naga naca létajla chee Xi'a Xaga Olivo, xúgute benne' ca' zaj de'e Le' gulezú lawe' dxelebezre xe'e lu xel-la dxelebé, ne dxelúe lá'ane' Dios ca naca xúgute xel-la waca chee xabáa da belelé'ene'. 38 Gulenné':

—La'azxa naca wenná bea, benne' za' waláz chee Xránadxu Dios. Gaca xel-la dxebeza zri lazre' da za xabáa, ne gaca ba Dios.

39 Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

40 Jesús bechebe':

—Dxapa' le'e, che benne' caní xelezúa zrié', xiaj caní xelebezre xa'a na.

41 Gate bzrine' gagu xezre Jerusalén, ne ca blé'ene' na, na' gudxezre Jesús ca naca chee na. 42 Na' gunné':

—La chéajni'ile lu zra chee le nigá da gaca gunna chee le xel-la dxebeza zri lazre'. Na'a da na' nagache na, na' quebe gaca lé'ele na. 43 Welezrín zra gaca chee le da zrinnaj, gate benne' dxelecuídene' le'e xeléchaje' ze'e dxu'a xezre chee le, ne xuluzague' le'e gáteteze na', 44 na' xuluchínnaje' xezre chee le. Na' xelútie' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca chee le lawe' da quebe gúquebe'ele zra bla' Dios chee gácalene' le'e.

Jesús dxucá'ana chawe' chale'aj xudau'
(Mt. 21.12-17; Mr. 11.15-19; Jn. 2.13-22)

45 Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutie', ne dxelá'awe' na'. 46 Na' guzre' benne' ca':

—Lu xiche chee Dios dxenné': "Lizra' naca na xu'u naga guchálajle neda'," na' le'e nunle na ca tu lizre gubán ca'.

⁴⁷ Tu zra tu zra Jesús dxusédené' benne' ca' zaj zra' chale'aj xudau'. Benne' xíchaje ca' chee bxruze, ne benne' dxuluxuzájle'e da nadxixruj bea na, ne benne' xu'u lawe' chee xezre na' dxelíajé' ájala xeluné' xelútié' Le'. ⁴⁸ Quebe belezrélené' ájala xeluné', lawe' da dxuluzé naga xanne' xúgute benne' ca' Jesús, chee xelenne' ca da dxenné'.

20

*Ca naca xel-la dxenná bea napa Jesús
(Mt. 21.23-27; Mr. 11.27-33)*

¹ Tu zra gate zua Jesús chale'aj xudau' dxusédené' benne' ca', ne dxuchálajle' le' ca naca dizra' chawe' chee Dios, na' belezrín na' benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, ne benne' gula sina ca', ² na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

³ Na' gunná Jesús:

—Cá'anqueze neda' guche'ba' le'e tu. Le xeche'be chia'.

⁴ ¿Nuzra gusel-la Juan guchúe' bénneache nisa? ¿Dios che bénneache?

⁵ Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guche'be' dxi'u: "¿Bizr chee na' quebe guxéajle chee'?" ⁶ Che xedxu Le', bénneache gusesel-le' le', benne' zaj zre'e nigá wuluzríe' dxi'u xiaj, lawe' da zaj neze xánnie' bchalaj Juan waláz chee Dios.

⁷ Nadxa belexeche'be' quebe zaj nézene' nu gusel-la Juan bchue' bénneache nisa. ⁸ Na' Jesús guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

*Da dxulé'e na ca naca chee benne' wen zrin calela ca'
(Mt. 21.33-44; Mr. 12.1-11)*

⁹ Na' guzú lau Jesús dxuchálajle' benne' ca' zaj zre'e na', dxuchálaje' da dxulé'e na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ane' na lu na' benne' wen zrin ca', na' guz'é'e na' zane' iza. ¹⁰ Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. ¹¹ Nadxa xrane lina na' gusel-le' xetú bi wen zrin chee', na' cá'anqueze bi nigá bulucháchalene'-be', ne

buluzálaje'-be', na' belexesel-le'-be' cá'aze. ¹² Xrane na' gusél-le' xetú bi wən zrin chee', na' benne' wən zrin ca', cá'anqueze beluné'-be' zi', na' belexebéaje'-be' lu lina na'.

¹³ Naga xeajche'te na, xrane na' gunné': "¿ájazra guna'? Sel-la' zri'ina' nazrí'ite lazra'. Gate xeledé'ene'-be' nalja xelape'-be' ba lá'ana." ¹⁴ Na' gate benne' wən zrin ca' belelé'ene'-be', na' gulé ljwezre': "Bi nigá xezí' lu na'be' da de chee xránadxu. Gútedxu-be', chee gácadxu xrane na dxí'uqueze." ¹⁵ Nadxa belexebéaje'-be' lu xezr la xu na', na' belutie'-be'.

Nadxa Jesús bchebe' benne' ca':

—¿Bizra gun xrane na' chee benne' wən zrin ca'? ¹⁶ Xelé'e, na' gutie' benne' wən zrin ca', na' gudé'e xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'e lataj gaca ca'.

¹⁷ Na' Jesús gunné'e benne' ca', na' gunné':

—¿Bizra zéaje da naxúaj na lu xiche chee Dios? Dxenné' caní: Xiaj na' da buluzúa benne' wən xu'u ca' chalá'ala, le na' naca na xiaj blau.

¹⁸ Núteteze benne' cheajchazie' lawe' xiaj na', na' chúzrujqueze bénnea', na' che xiaj na' xexruj na lawe' nu benne', gútute na le'.

Ca naca chee da dxuchizruj xezre zi'tu'

(Mt. 21.45-46; 22.15-22; Mr. 12.13-17)

¹⁹ Benne' xíchaje ca' chee bxruze ca', ne benne' ca' dxulux-uzájl'e da nadxixruj bea na gulaca lazre' xelele' Jesús zra ná'queze, lawe' da guleque bé'ene' bchalaj Jesús da dxulé'e na ca zaj naca le', san belezrebe' da xelún bénneache ca'. ²⁰ Nadxa gulesel-le' benne' ca' xuluzuzre' Jesús, benne' xululé'e cuine' ca benne' xrlátaje ca'. Benne' caní dxelaca lazre' xelebéaje' Jesús dizra' chee xelezéquene' xuludé'e Le' lu na' bénnea' dxenná be'e. ²¹ Chee xeluné' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee bénneache cáteze dxululé'e cuine', san lu da li dxusédenu' da naca chee Dios. ²² Guzre netu', ¿naca na chawe' quízrujdxu da dxuchizruj César, bénnea' dxenná bé'ene' dute xezr la xu, che cabí?

²³ Dxeque be'e Jesús ca naca da dxelaca lazre' xeluné' chee', na' guzre' benne' ca':

—¿Bizr chee na' dxaca lázrele gun xálele neda'? ²⁴ Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee benne' dxenná bea na'.

²⁵ Nadxa gunná Jesús:

—Le gunezruj bénnea' da naca chee', na' le gunezruj Dios da naca chee' Dios.

²⁶ Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

Ca gaca gate xelexebán benne' gate

(Mt. 22.23-33; Mr. 12.18-27)

²⁷ Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxeléquene' quebe xelexebán benne' gate, na' gulé'e Jesús:

²⁸ —Benne' Wesede, Moisés bzúaje' cheentu' che tu benne' gatie', ne gucá'ane' zru'ule', ne che quebe nu chilá' zrí'ine', na' bi biche bénnea' dxal-la' guchaga na'abe' nen nu'ula na' gute benne' chee' chee' galaj tu bidau' gácabe' ca zrí'ine bénnea' ba gútee'. ²⁹ Gulezrá' gazre benne' gulaque' zrí'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. ³⁰ Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. ³¹ Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. ³² Naga xeajche'te na, na' gute nu'ula na'. ³³ Gate xelexebán benne' gate, ¿nula bi ca' gaca zrú'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

³⁴ Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. ³⁵ Na' benne' ca' naca chee' xelexexú'e xezr la xu da za za', ne chee' xelexebane' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. ³⁶ Ca'an gaca lawe' da quebe nu gátedxa na'. Xelaque' ca zaj naca gubáz chee' xabáa ca', ne xelaque' bi chee' Dios lawe' da belexebane'. ³⁷ Moisésqueze, gate bzuaje' ca guca chee' bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee' Dios, naque' Dios chee' Abraham, ne Dios chee' Isaac, ne Dios chee' Jacob. ³⁸ Dios quebe naque' Dios chee' benne' gate ca'. Naque' Dios chee' benne' ban cá', lawe' da lau Le' zaj naca ban xúgute bénneache.

³⁹ Nadxa bal-la benne' ca', benne' dxuluxuzájle'e da nadx-ixruj bea na gulé'e Jesús:

—Cháwedau' dxennáu', Benne' Wesede.

⁴⁰ Québedxa belexázrjne' bi xuluchebe' Jesús.

¿Nu benne' naca Cristo zrí'ine'?

(Mt. 22.41-46; Mr. 12.35-37)

⁴¹ Jesús guzre' le':

—¿Bizr chee na' dxennale le'e naca Cristo zri'ine David?
 42 Davídqueze gunné' lu xiche naga zaj naxúaj salmo ca':
 Xránadxu Dios guzre' Xrana':
 “Gudxé'e cuita' xabela chia',
 43 Cadxa guzúa' benne' dxelecuídenē' lue' ca' zran ni'u.”
 44 ¿ájazra chee na' naca Cristo zri'ine David, na' Davídqueze
 dxē'e Le': “Xran”?

Jesús dxenné' chee benne' ca' dxuluxuzájle'e da nadxixruj bea na

(Mt. 23.1-36; Mr. 12.38-40; Lc. 11.37-54)

45 Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédenē':

46 —Le guxúe xanne' cuínale chee benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bēneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezrágale, ne lataj blau ca' naga dxelawe' zruē. 47 Benne' caní dxelequē'e ca naca lizre nu'ula ca' ba gulate benne' chee', na' chee xulucá'ana cuine' xrlátaje lau bēneache ca' dxululawízrajē' Dios da tunna lu xu'u ca' naga dxezrágale. Benne' caní xelezaca zídxaqueze'.

21

Dumí da bnezruj tu nu'ula xache' ba gute benne' chee'

(Mr. 12.41-44)

1 Gate zua Jesús chale'aj xudau', blé'ene' benne' gunní'a ca' dxelegú'e dumí lu xí'ina chee xudau'. 2 Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'. 3 Na' gunná Jesús:

—Da li dxapa' le'e, nu'ula xache' nigá gulú'udxē' da zrendxa ca benne' gunní'a caní, 4 lawe' da dxelegú'u benne' ca' chee da dxutínneze na, san nu'ula nigá, lu xel-la baxache' chee' bnézruje' ca naca da nape' da nunte gawe'.

Jesús dxuchálaje' ca gaca gate cuía xi' xudau'

(Mt. 24.1-2; Mr. 13.1-2)

5 Bal-la benne' dxuluchálaje' ca naca chee xudau' na', ne chee xiaj xrtante da zaj zrále'e na ze'e xudau' na', ne chee da xrtan da bulunezruj benne' chee xudau' na'. Nadxa gunná Jesús, dxē'e le':

6 —Wazrín zra gate xelebía xi' xúgute da caní dxelé'ele, ne quebe xegá'ana netú xiaj cuzru ljwezre na.

Da xululé'e na gate cheajsé chee xezr la xu nigá

(Mt. 24.3-28; Mr. 13.3-23)

7 Nadxa benne' ca' buluchebe' Jesús:

—Benne' Wesēde, ¿bata gaca da na'? ¿Bi gulé'e na gate ba za xelaca da caní?

⁸ Jesús gunné':

—Le guxúe xanne' cuínale, ne quebe güele lataj nu si xe le'e, lawe' da xeledá' benne' zantę benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. ⁹ Gate xénele dxaca wedil-la, ne xeledábage' bēnneache xu'u lawe', quebe zrēbele, lawe' da dxal-la' gaca da caní nedxu, san quebe ne zrin zra cheajsé cheę xęzr la xu nigá.

¹⁰ Nadxa guzre' benne' ca':

—Bēnneache tu xęzr la xu xeledíl-lalę bēnneache xetú xęzr la xu, na' benne' tu xęzre xeledíl-lalę benne' xetú xęzre. ¹¹ Wazrú'le'equeze, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

¹² Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' cheę xelechugue' ca xelunę' cheele, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. ¹³ Gate gaca da caní gata' lataj guchálajlele benne' ca' ca naca chia' neda'. ¹⁴ Le guzúa chacha lázrdaule, quebe gucuézale nédxula da dxal-la' nnele, ¹⁵ lawe' da gunna' neda' le'e dizra', ne xel-la sina da quebe xezezeque benne' dxeledábage' le'e bi xelenné' cheę na. ¹⁶ Wuludéqueze bēnneache le'e lu na' benne' dxeledábage' le'e. Caní xelúnqueze xra xrnale, ne bi bíchele, ne xrtia lįwézrele, ne bi lįwézrele ca'. Welútequeze' bál-lale le'e, ¹⁷ na' xúgute bēnneache welecuídenę' le'e lawe' da nácale neda' tuze, ¹⁸ san quebe nite tu xicha xíchajle lau Dios. ¹⁹ Che sua cháchale, na' gápale xel-la nabán.

²⁰ Gate lé'ele zaj naxechaj benne' dxjaque' wedil-la xęzre Jerusalén, na' nézele ba za cuía xi' xęzre nigá. ²¹ Lu zra na', benne' zaj zre'e xęzre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xęzre Jerusalén dxal-la' xeledxúaje' na', na' benne' zaj zre'e le'e xixre' quebe dxal-la' xelexezrine' xęzre na'. ²² Lu zra ca' Dios gudé' benne' ca' lu da zi' da xa', na' gaca li ca naca da naxúaj na lu xiche cheę Dios ca dxal-la' gaca cheę benne' ca'. ²³ Edxugúa nu'ula zaj zuę' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bēnneache ca', na' gaca tu da ba xa' zrentę cheę benne' ca'. ²⁴ Bal-le' xelatie' lu wedil-la na', na' xebal-le' xeleché'e le' zaj nadxéaję' tu tu xęzr la xu ca', na' benne' zitu' ca' xululéaje' xęzre Jerusalén cadxa cheajsé cheę zra xelenná bea benne' zitu' ca'.

Ca gaca gate xelá' Benne' Gulje' Bénneache
(Mt. 24.29-35, 42-44; Mr. 13.24-37)

²⁵ Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu xelezúa stebe benne' ca', ne xelezrebe' ca naca schaga' da gun nísadau', ne xeajxruza chee na. ²⁶ Benne' ca' xelate ni'a ne'e ne chee xel-la dxelezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelezrízequeze na. ²⁷ Lu zra na' xeelé'equezne' neda', Benne' Gulje' Bénneache, xelá'a tu lu beuj, nen dute xel-la waca zren, ne da xabáa chia'. ²⁸ Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca chee.

²⁹ Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. ³⁰ Gate lé'ele ba dxezría na laga' dxé'ene, nézqueze le'e ba za xaca beu' la. ³¹ Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

³² 'Da li dxapa' le'e, xúgute da caní xelaca na nédxudxa gate quebe ne xelate bénneache zaj zra' lu zra na'a zra. ³³ Xabáa, ne xezr la xu weledé chee na, san dizra' chia' quebe te chee na.

³⁴ Le guxúe xanne' cuínale, quebe güele lataj xelú'u lu xichaj lázrdaule da calela ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na', ³⁵ ne chee quebe gaca na ca tu da quele na le'e, lawe' da caní gaca chee xúgute benne' zaj zre'e lu xezr la xu nigá. ³⁶ Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Gulje' Bénneache.

³⁷ Jesús bsédené' benne' ca' lu xudau' te zra, na' chizrela dxexíaje' lu Xi'a Xaga Olivo. ³⁸ Xúgute benne' ca' belezrine' lu xudau' na' xugu' zila chee xelenne' chee Jesús.

22

Dxeluné' tuze dizra' xelele' Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' bénneache chee' lu xezr la xu Egipto. ² Lu zra ca' benne' xíchaje ca' chee bxruze ca', ne benne' ca' dxuluxuzájle'e da nadxixruj bea na belílaje' ájala xeluné' xelútie' Jesús bagácheze, lawe' da dxelezrebe' da xelún benne' zan ca'.

³ Nadxa guxú'u Satanás da xriwe' lu lázrdau Judas, bēnea' cá'aqueze le' Iscariote. Naque' tu benne' chazrinnu gubáz ca' chee Jesús. ⁴ Judas nigá guxíaje' xeajchálajlene' benne' xíchaje ca' chee bxruze ca', ne benne' blau ca' chee xudau', na' bchálajlene' benne' ca' ájala gunē' gudēe' Jesús lu na' benne' ca'. ⁵ Benne' caní gulebene', na' gulechebe lazre' xulunézruje' le' dumí. ⁶ Judas na' guzú' lu ne'e dumí na', na' guzú lawe' dxílaje' ájala gunē' gudēe' Jesús lu na' benne' ca' gate quebe nu chilá' benne'.

Da dxágudxu chee cheajsá lazrdxu ca gute Xránadxu
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútie' zríla'dau' ca' chee Laní Pascua. ⁸ Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

⁹ Benne' caní buluchebe' Le':

—¿Ga dxaca lazru' gucuézentu' na?

¹⁰ Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dx'e nisa. Le chjácālene' xu'u naga xezrine', ¹¹ na' le xē xrane xu'u na': “Benne' Wesede dx'e'e lue': ¿Ga zua xu'u naga gágulēna' benne' ca' dxusēdea' zríla'dau' chee Laní Pascua?” ¹² Nadxa gulé'ene' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

¹³ Benne' ca' xjaque', na' belezrélene' xúgute ca da ba guzre Jesús le', na' bulucueze' da xelawe' chee Laní Pascua.

¹⁴ Gate bzrin zra, Jesús ne benne' ca' dxusédene' gulezré'e ga xelawe' na. ¹⁵ Nadxa gunná Jesús, dx'e'e benne' ca':

—Guzá lázrele'a gágulēna' le'e chee Laní Pascua nigá nédxudxa ca quebe ne gatía'. ¹⁶ Dxapa' le'e québedxa gawa' da nigá cadxa gaca li na naga dxenná bea Dios.

¹⁷ Nadxa guquē'e tu zruágadau', na' guzre' Dios: “Xcalenu”, na' gunné':

—Le xi'aj late' weaj tu tule le'e. ¹⁸ Dxapa' le'e québedxa xí'aja' chee nisa uva caní cadxa xida xel-la dxenná bea chee Dios.

¹⁹ Nadxa guquē'e xeta xtila, ne guzre' Dios: “Xcalenu”, na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz chee. Le gun da nigá chee cheajsá lázrele chia' neda'.

²⁰ Cá'aqueze bene' nen zruágadau' na' ca gudé gulawe' xrche', na' gunné':

—Zruágadau' nigá zéaje na xel-la wezría cube, da guzúa' chúchua' nen dxen chia', da gulálaja' waláz chee.

21 'Na'a, zrua na' benne' biu na' tu zren nen na'a ga zua da dxágadxu, bēneea' gudéē' neda' lu na' benne' dxeledábage' neda'. 22 Neda', Benne' Gulje' Bēneache, waxá'a lu neza da ble'e Dios neda' naga gatia', san edxugúa bēneea' gudéē' neda' chee' gatia'.

23 Nadxa benne' ca' dxusede Jesús gulezú lawe' dxuluchebe ljwezre' nu na' gudé Jesús.

Dxuluchebe ljwezre' nule' gácadxe' blau

24 Cá'anqueze buluchebe ljwezre' nule' gácadxe' benne' blau.

25 Na' Jesús guzre' le':

—Benne' wenná bea chee xezr la xu ca' dxelenná bé'ene' bēneache ca' xrane bēneache ca', na' benne' xíchajē chee benne' ca' dxelenné' zaj naque' benne' dxelune' da chawe' chee benneáche ca'. 26 Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca' benne' nácadxe' cuide', na' benne' dxenná be'e dxal-la' gaque' ca' benne' nada'u chee ljwezre' ca'. 27 ¿Nu nácadxa blau, benne' dxe'e dxawe', che benne' dxudéē' xel-la' wagu? ¿Quebe naca bēneea' dxe'e dxawe'? Neda' zúalēna' le'e ca' tu benne' dxunē' zrin chee.

28 'Le'e guzúalequezele neda' gate neda' guzú guzaca'. 29 Chee le' na' dxunna' le'e lataj nna beale, ca' ben Xra', benne' na' neda', 30 chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinnu cue' xrtia Israel.

Jesús dxenné' Pedro nne' quebe núnbe'e Le'

(Mt. 26.31-35; Mr. 14.27-31; Jn. 13.36-38)

31 Na' gunnáqueze Xránadxu:

—Simón, Simón, Satanás, da xriwe' ba gunaba na' le'e chee seque gudé na' le'e lu dul-la' ca' dxun tu benne' dxudixire dxutul-le' xizre za. 32 Neda' guta' xueda' Xra' gácalēne' lue' chee quebe guníteu' xel-la' dxeajlí lazre chiu'. Na' lue', gate bache bexacu' dipa lazre', gúcalē le' sa' ljwezru' ca' chee xelezé chache'.

33 Na' gunná Simón, guzre' Jesús:

—Xran, ba zúaqueza' sá'lēna' Lue' lizre xia, ne chee gátequeza' nen Lue'.

34 Jesús guzre' le':

—Pedro, dxapa' lue', ná'atēla ne dédxela cuezre xjeaj, lue' wannáu' chunna lasa quebe núnbe'u neda'.

Ba zua gagu zra si saca Jesús

35 Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zrélale, ¿bxázrjele bi da guchínnele?

Benne' ca' belexechebe':

—Gutu bi de.

³⁶ Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchíneñe' lu wedil-la, dxal-la' xexutie' xicha chee', na' si'e xia chee'. ³⁷ Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenne': "Gubabe' ca tu benne' wen da zrinnaj." Xúgute da naxúaj na chia' dxal-la' gaca li na.

³⁸ Nadxa benne' ca' gulenne':

—Xran, nigá de chupa xia.

Le' bechebe':

—Da naze.

Jesús dxuchálajlene' Dios naga nazí le na Getsemaní

(Mt. 26.36-46; Mr. 14.32-42)

³⁹ Nadxa bedxúaj Jesús xu'u na', na' ca dxúnqueze', guxíaje' lu Xi'a Xaga Olivo, na' benne' ca' dxusédene' xjácálene' Le'.

⁴⁰ Gate belezrine' na', Jesús guzre' le':

—Le naba lau Dios chee' quebe seque da xriwe' cu'u na le'e lu dul-la.

⁴¹ Nadxa Jesús guzé'e ca tu legu'una xiaj naga zaj zra' benne' ca', na' bzu zribe' bchálajlene' Dios. ⁴² Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

⁴³ Nadxa ble'e lau naga zua Jesús tu gubáz chee' xabáa, na' btipe' lazre' Jesús. ⁴⁴ Gate ne dxezácale'e, du lazre' bchálajlene' Dios, na' xesa chee' guca na ca dxen dxelezzún na lu xu.

⁴⁵ Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédene', na' blé'ene' dxelase benne' ca', lu xel-la dxelexewi'ine lazre' chee'. ⁴⁶ Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee' quebe seque da xriwe' cu'u na le'e lu dul-la.

Dxelele' Jesús

(Mt. 26.47-56; Mr. 14.43-50; Jn. 18.2-11)

⁴⁷ Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'e zria lawe' lau benne' ca', na' gubigue' cuita Jesús chee' gunupe' Le'. ⁴⁸ Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee' gudéu' neda' lu na' benne' dxeledábague' neda'?

⁴⁹ Benne' ca' zralene' Jesús, ca belelé'ene' ca da dxaca, na' buluchebe' Jesús:

—Xran, ¿guchínentu' xia?

⁵⁰ Tu benne' ca' dxedále Jesús bene' zi' tu bi wen zrin chee bxruze blau, guchugue' nágabe' zua xabela. ⁵¹ Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexune' na.

⁵² Na' guzre' benne' xíchaje' ca' chee bxruze, ne benne' blau ca' chee xudau', ne benne' gula sina ca', benne' zá'aque' xeleché'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán? ⁵³ Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

Pedro dxenné' quebe núnbe'e Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Nadxa gulele' Jesús, na' guleché'e Le' lizre bxruze blau, na' Pedro zíaje' nawe' Le' zítu'la. ⁵⁵ Na' gulebé'e guléchaje' xi' na', na' Pedro gudxé'e ládujla benne' ca'. ⁵⁶ Nadxa tu nu'ula wen zrin, gate blé'ene' Pedro dxe'e dxu'a xi' na', guzúe' dxenné'e le', na' gunné':

—Cá'anqueze benne' nigá guque' tuze len Jesús.

⁵⁷ Pedro gunné':

—Nu'ula, quebe núnbe'a bénnea'.

⁵⁸ Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

⁵⁹ Xelate gudé na', xetú benne' ben chúchue' xrtizre', gunné':
—Da li, benne' nigá guque' tuze len Jesús, lawe' da naque' benne' Galilea.

⁶⁰ Nadxa gunná Pedro:

—Benne', quebe nezda' nu chee na' dxuchálaju'.

Dxácate na' ne dxuchálajte Pedro ca', na' gudxezre xjeaj.

⁶¹ Nadxa Xránadxu bzechaj xíchaje', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atela ne dédxela cuezre xjeaj, lue' wannáu' chunna lasa quebe núnbe'u neda'.” ⁶² Nadxa bedxúaj Pedro, na' gudxezre xáche'le'e.

Dxelún le' chee Jesús

(Mt. 26.67-68; Mr. 14.65)

⁶³ Na' benne' ca' zaj nuxre' Jesús belún le' chee', na' bu-luzalje' Le'. ⁶⁴ Bulucache' lawe', na' belegape' xrague', dxelé'e Le':

—Gunné' xa'a nu be Lue'.

⁶⁵ Da zan da gulenné', dxelenné' schanni' chee Jesús.

Jesús dxezrine' lau benne' ca' chee xu'u lawe' blau chee judío ca'

(Mt. 26.59-66; Mr. 14.55-64; Jn. 18.19-24)

⁶⁶ Gate naca te zra, na' belezraga benne' gula sina ca' chee judío ca', ne benne' xíchaję ca' chee bxruze ca', ne benne' ca' dxuluxuzájle'e da nadxixruj bea na, na' guleché'e Jesús lau benne' ca' chee xu'u lawe' blau chee judío ca'. Na' buluchebe' Le':

⁶⁷ —Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajle, ⁶⁸ na' che bi gucheba' le'e, quebe xechébele chia', ne quebe gusanle neda'.

⁶⁹ Ná'atęla neda', Benne' Gulje' Bénneache, cue'a chalá'a xabęla chee Dios nape' dute xel-la waca.

⁷⁰ Nadxa xúgute' buluchebe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáquezle le'e.

⁷¹ Nadxa gulenná benne' ca':

—¿Núzradxa chinnedxu bi nne' chee benne' nigá? Dxí'unqueze ba benedxu ca da gunnáqueze'.

23

Jesús dxezrine' lau Pilato

(Mt. 27.1-2, 11-14; Mr. 15.1-5; Jn. 18.28-38)

¹ Nadxa gulasa xúgute' benne' dxuluchi'e, na' guleché'e Jesús lau Pilato, benne' dxenná be'e waláz chee Roma. ² Na' gulezú lawe' dxelagu zrię Jesús, dxelenné':

—Ble'entu' benne' nigá dxegú'u xel-le' bėnneache chee xeledábague' xu'u lawe'. Dxenné' quebe dxal-la' quízrujntu' da dxuchizruj César, benne' Roma, na' cá'unqueze dxenné' naque' Cristo, Benne' Wenná Bea.

³ Nadxa Pilato bchebe' Jesús:

—¿Nacu' Lue' Wenná Bea chee judío ca'?

Na' bechebe Jesús:

—Ca' naca na, ca ba gunnáu' lue'.

⁴ Nadxa gunná Pilato, guzre' benne' xíchaję ca' chee bxruze ca', ne bėnneache ca':

—Quebe bi da zrinnaj dxezrelda' nun benne' nigá.

⁵ Benne' ca' belún chúchue' dizra' chee', gulenné':

—Dxegu'u xel-le' xúgute' benne' zaj zre'e xezre ca' zaj nababa Judea chee xeledábague' xu'u lawe'. Guzú lawe' dxune' na naga nababa Galilea, na' na'a dxune' na nigá.

Jesús dxezrine' lau Herodes

⁶ Gate ben Pilato da nigá, na' bchebe' che naca Jesús benne' Galilea. ⁷ Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. ⁸ Gate ble'e Herodes Jesús, gubelé'ene', lawe' da bátate dxaca lazre' lé'ene' Le', lawe' da ba benne' dxuluchalaj bèneache chee Jesús, na' guca lazre' lé'ene' gun Jesús tu xel-la waca da za xabáa. ⁹ Da zante da bchebe' Jesús, na' Le' quebe bi bechebe'. ¹⁰ Zráqueze benne' xíchaje ca' chee bxruze ca' na', nen benne' ca' dxulux-uzájle'e da nadxixruj bea na, na' belún chúchue' dizra' chee' da dxelagu zria Jesús. ¹¹ Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee xelún le' chee', bulugácue' Le' ladxe' bzawe ca naca zra tu benne' wená bea. Nadxa Herodes besel-le' Le' lau Pilato. ¹² Lu zra na' Pilato, ne Herodes belexaque' tuze, lawe' da belezrá'a ljwezre' nédxute.

Dxelechugue' chee Jesús gatié'

(Mt. 27.15-26; Mr. 15.6-15; Jn. 18.39—19.16)

¹³ Nadxa Pilato bchague' benne' xíchaje ca' chee bxruze ca', ne benne' xu'u lawe' ca', ¹⁴ na' guzre' benne' ca':

—Le'e guchele benne' nigá za'le naga zua', dxennale dx-egú'u xel-le' bèneache chee xeledábague' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nune' ca naca da dxennale chee'. ¹⁵ Cá'anqueze Herodes quebe bi da zrinnaj bzrélene' da nun Jesús, na' budé'e Le' launtu'. Quebe bi ne gune' chee chuga' chee' gatié'. ¹⁶ Gudéa' Le' xel-la zi', na' gusánqueza' Le'.

¹⁷ Dxácate dxaca laní na', Pilato dxal-la' gune' tu da dx-elezaca ba lazre' bèneache, gusane' tu benne' xu'e lizre xia. ¹⁸ Xúgute benne' ca' gulezú lawe' dxelebezre xe'e, dxelenné':

—¡Gate benne' nigá! ¡Bsan Barrabás na'!

¹⁹ Barrabás nigá gulegú'e le' lizre xia lawe' da gudábague' xu'u lawe', na' betie' tu benne'. ²⁰ Pilato guca lazre' gusane' Jesús, na' bchálajlene' benne' ca' xetú. ²¹ Na' benne' ca' gule-bezre xe'e zízrajdxá, dxelenné':

—¡Bde'e xaga béguaj! ¡Bde'e xaga béguaj!

²² Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatié'. Gudéa' Le' xel-la zi', na' te na' gusana' Le'.

²³ Na' benne' ca' belún chúchue' dizra' chee' chee te'e xaga béguaj, ne gulebezre xá'atie', nen benne' xíchaje ca' chee bxruze ca', cadxa guca ca da gulaca lazre'. ²⁴ Nadxa Pilato guchugue' chee Jesús gaca chee' ca da dxelaca lazre' benne' ca'. ²⁵ Na' bsane' bènea' belenabe', xu'e lizre xia lawe' da

gudábague' xu'u lawe', ne betie' tu benne', na' bdee' Jesús chee gaca chee' ca dxelaca lazre' benne' ca'.

Dxuludé'e Jesús xaga béguaj

(Mt. 27.32-44; Mr. 15.21-32; Jn. 19.17-27)

²⁶ Gate zjaque' zaj naché'e Jesús chee xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee Jesús, na' zéaje' cuzru Jesús na'.

²⁷ Na' xjácale Le' benne' zante, ne nu'ula zan dxelebezre', na' dxelebezre xache' ne chee da dxaca chee Jesús. ²⁸ Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee zrí'inele, ²⁹ lawe' da zrin zra gate xelenné': “Ba neza zren naca na chee nu'ula wizre, ne nu'ula ca' cabata' gulezúe' zi'i, ne nu'ula ca' cabata' bulugazre' bidau'.” ³⁰ Lu zra na' xelezú lau bénneache xelé'e xi'a ca': “Le gugacu netu' xu.” Na' xelé'e xí'adu ca': “Le gucache netu'.”

³¹ Che dxelune' da caní chia' neda', naca' ca tu xaga ban, ¿gáhradxa xelune' chee le'e, nácale ca xaga bizre ca'?

³² Cá'anqueze guleché'e chupa benne' wen da zrinnaj chee xelútie' le' tu zren nen Jesús. ³³ Gate belezrine' lataj na' nazí le na, Calavera, da zéaje na, Xi'a Zrita Xíchajdxu, na' buludé'e Jesús xaga béguaj, ne cá'anqueze belune' chee benne' wen da zrinnaj ca', tue' cuite' xabela, ne xetúe' cuite' xéglala. ³⁴ Ca dxuludé'e Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dxunna bea' chee xelezí'e late' weaj zra lana Jesús. ³⁵ Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bénnea' Gucá'a Dios.

³⁶ Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. ³⁷ Gulé'e Le':

—Che lue' nacu' Wenná Bea chee judío ca', bselá cuinu'.

³⁸ Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

³⁹ Tu benne' wen da zrinnaj, bénnea' de'e xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselate netu'.

⁴⁰ Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezácaquezu' ca da gulechugue' chee' Le'. ⁴¹ Dxi'u dxezácadxu ca da dxál-la'queze sácadxu, lawe' da dxaca cheedxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

⁴² Nadxa gunné':

—Jesús, xeajsá lazre' neda' gate su lau' nna be'u.

⁴³ Na' bechebe Jesús:

—Da li dxapa' lue', ná'atela súalequezu' neda' lu lataj chawe' chee' Dios.

Ca guca gate gute Jesús

(Mt. 27.45-56; Mr. 15.33-41; Jn. 19.28-30)

⁴⁴ Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna. ⁴⁵ Gubizra guchul-la na, na' ladxe' ze lu xudau' bdxuaj na chúpala. ⁴⁶ Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutie'.

⁴⁷ Gate benne' dxenná bé'ene' benne' dxjaque' wedil-la blé'ene' ca da guca, na' be' lá'ane' Dios, gunné':

—Da li, benne' nigá quebe bi da zrinnaj bene'.

⁴⁸ Xúgute benne' ca' zaj zre'e na', gate belelé'ene' ca da guca, na' besiá'que' na', dxelu'e lachu'e. ⁴⁹ Xúgute benne' ca' zaj núnbe'e Jesús, ne nu'ula ca' xjácane' Jesús gate bezé'e Galilea, belexegá'ane' zítu'la dxelenné'e da caní.

Dxulucache' Jesús

(Mt. 27.57-61; Mr. 15.42-47; Jn. 19.38-42)

⁵⁰ Zua tu benne' chawe' ne xrlátaje le' José, benne' xezre Arimatea chee' xezre ca' zaj nababa Judea. Nababe' xu'u lawe' blau chee' judío ca'. ⁵¹ José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'. ⁵² Benne' nigá guxíaje' xeajchálajlene' Pilato, na' gunabe' latja gucache' Jesús. ⁵³ Ca bexuzre buluxulétaje' Le' xaga béguaj, na' buluxuchele' Le' tu ladxe', na' gulu'e Le' tu lu xedxu ba, da ba gudene' tu le'e xi'a xiaj, naga quebe nu ne gáchequeze. ⁵⁴ Naca na zra dxulucueze' chee' zra dxulupá'ane', da ba zua su lau na.

⁵⁵ Nu'ula ca' xjácane' Jesús gate bezé'e xezre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xedxu ba. ⁵⁶ Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

24

*Ca guca gate bebán Jesús**(Mt. 28.1-10; Mr. 16.1-8; Jn. 20.1-10)*

¹ Zra nedxu chee da gazre zra, nu'ula ca' belezrine' dxu'a ba na' dxani'sise', zaj nu'e ca naca da ca' dxelelá zixre da bulucueze', na' xebal-la nu'ula xjácálene' le'. ² Gate belezrine' na', belelé'ene' xiaj da guduse dxu'a ba na', québedxa naduse na naga guduse na. ³ Belú'e lu ba na', san quebe belexezrelne' Xránadxu Jesús na'. ⁴ Na' belezrébele'e, ne quebe zaj nézene' ájala xelune', na' belelé'ene' chupa benne' zaj ze' cuite', zaj nacue' zra lane' dxácatite na. ⁵ Nu'ula ca' belezúe' sudxú'ala lu xu, ne belezrébele'e. Na' benne' ca' gulé'e le':

—¿Bizr chee na' dxexilajle le'e tu benne' naca bané' lówela benne' gate? ⁶ Quebe zué' nigá, lawe' da ba bebané'. Le gusá lázre' da bchálajlene' le'e gate ne zué' Galilea. ⁷ Gunné': "Benne' Gulje' Bénneache dxal-la' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebané'."

⁸ Nadxa nu'ula ca' xeajlesá lazre' ca naca da gunná Jesús. ⁹ Ca gudé besia'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee Jesús, ne xúgute benne' ca' xezica, ca naca da guca na'. ¹⁰ Nu'ula ca' xjaque' xeajlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. ¹¹ Benne' gubáz ca' guléquene' da xálaze dxelenná nu'ula caní, na' quebe guléajle'e chee'.

¹² Nadxa bdxuaj Pedro, zeaj chégüe' dxu'a ba na', na' gate guné'e lu ba na', blé'ene' ladxe' da bedxela Jesús xu'u na chala'ala, na' bezé'e zexíaje' xu'u naga guzé'e, dxexebánene' ca naca da guca.

*Da guca lu neza da zeaj xezre Emaús**(Mr. 16.12-13)*

¹³ Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. ¹⁴ Zjaque' dxuluchálaje' ca naca da guca lu zra ca'. ¹⁵ Dxácaté na' dxuluchálaje' caní, na' Jesús ná'queze gubigue' cuita benne' ca', na' guzú lawe' zéajlene' le'. ¹⁶ Quebe belexúnbe'e Jesús, lawe' da guzúa tu da guxúa na xiaj lau benne' ca'. ¹⁷ Nadxa bchebe Jesús benne' ca':

—¿Bizr da na' dxuchálajle ljwézrele dxácaté xu'ule neza? ¿Bizr chee na' zale dxewí'ine lázrele?

¹⁸ Tu benne' ca' le' Cleofas bechebe':

—Xúgute benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

19 Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchálaje' waláz chee Dios, na' xel-la waca zren ca' bene', ne bchálaje' dizra' lau Dios, ne lau xúgute bèneache. ²⁰ Na' benne' xíchaje' ca' chee bxruze ca', ne benne' xu'u lawe' cheentu' ca' buludé'e Le' chee gulechugue' chee' gatíe', na' buludé'e Le' xaga béguaj. ²¹ Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. ²² Bal-la nu'ula ca' ládujla netu' buluzúaqueze' netu' lu da stebe, lawe' da xjaque' dxaní'sise' dxu'a ba chee' na', ²³ na' gate quebe belexezrelne' Le', na' belexelé'e naga zúantu', ne gulenné' belelé'ene' chupa gubáz chee xabáa ca' bululé'e lawe' nu'ula ca', na' gulé'e le' nabán Jesús. ²⁴ Nadxa bal-la benne' ljwézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

²⁵ Nadxa gunná Jesús:

—Le'e quebe dxéajni'ile, na' ne naca zide' lázrdaule chee quebe chéajlele xúgute da gulenná benne' ca' buluchálaje' waláz chee Dios. ²⁶ ¿Quebe dxal-la' saca Cristo da caní nédxudxa ca xegá'ane' szren?

²⁷ Nadxa guzú lawe' dxuzéajni'ine' benne' ca' ca naca xúgute da naxúaj lu xiche chee Dios naga dxuchalaj na chee Le'. Guzú lawe' lu xiche ca' chee Moisés, na' ne zéajdxaqueze na lu xiche ca' chee benne' ca' buluchálaje' waláz chee Dios.

²⁸ Gate belezrine' lu xezre naga zjaque', Jesús bene' ca' benne' zeajteze' xu'e neza. ²⁹ Na' benne' ca' buluxucá'ane' Le' xadía, dxelenné':

—Begá'anale' netu', lawe' da ba zeaj dxezré', ne ba dxe' xrínnequeze na'a.

Nadxa Jesús guxú'ulene' benne' ca'. ³⁰ Gate na' dxé'lene' le' dxelawe', guqué'e xeta xtila, ne bzúzruje' na, na' guzre' Dios "Xcalenu'", ne bnézruje' na benne' ca'. ³¹ La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. ³² Na' gulé' ljwezre':

—¿Quebe guxúa xel-la dxebé lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee Dios?

³³ Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljwezre' ca'. ³⁴ Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

³⁵ Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúzruje' xeta xtila na'.

Jesús dxulé'e lawe' benne' ca' xjácaləŋe' Le'
(Mt. 28.16-20; Mr. 16.14-18; Jn. 20.19-23)

³⁶ Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

³⁷ Na' benne' ca' belexruse', ne belezrébele'e. Guléquene' dxelelé'ene' bxinne dxəla. ³⁸ Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? ³⁹ Le na' na'a caní, ne le na' ni'a. Néda'queza' na'. Le gutá neda', ne le guxúe xque neda'. Tu bxinne dxəla quebe napa na belá' zrita, ca dxelé'ele le'e napa' neda'.

⁴⁰ Ca dxə'e benne' ca' da nigá, na' blé'ene' le' ne'e, ne ni'e. ⁴¹ Benne' ca' québequeze dxeləjle'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late' da gawa' nigá?

⁴² Nadxa bulunézruje' Le' late' belá' guzrúa xi', ne late' da zixre che bézudau', ⁴³ na' gucá'a Jesús da ca', ne gudawe' na lau benne' ca'. ⁴⁴ Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca naca xúgute' da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálaje' waláz chee Dios.

⁴⁵ Nadxa bzéajni'ine' benne' ca' ca da naxúaj lu xiche chee Dios, ⁴⁶ na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', ⁴⁷ na' lu La Le' dxal-la' xuluchalaj bėnneache lau xúgute' xezr la xu ca'. Su lau gunle na lu xezre Jerusalén, xele bėnneache dxal-la' xelexebí'i lazre' chee gunite lau Dios dul-la zaj nabaga benne' ca'. ⁴⁸ Le'e nácale benne' xelexechebe' da caní. ⁴⁹ ¡Le nna'xque! Neda' sel-la' chee ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

Jesús dxexegüéne' xabáa
(Mr. 16.19-20)

⁵⁰ Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'. ⁵¹ Ne dxúntee' ca', na' bezé'e naga zaj zra' benne' ca', begüéne' zexíaje' xabáa. ⁵² Ca bexuzre belúe lá'ane' Le', besiá'que' zeajxaque' Jerusalén lu dute' xel-la dxelebé, ⁵³ na' gulezráqueze' chale'aj xudau' dxelúe lá'ane' Dios. Ca' naca na.

DIZRA' CHAWE' CA NACA CHEE JESUCRISTO DA BZUAJ SAN JUAÑ

Bénnea' le' Xrtizra' Dios dxaque' bénneache

¹ Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' dute da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios. ² Nédxudaute Benne' nigá zúalene' Dios. ³ Lu na' Benne' nigá ben Dios xúgute da de. Quebe bi de da quebe nun Le'. ⁴ Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca bane'. ⁵ Xel-la' naxaní' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

⁶ Guzúa tu benne' le' Juan, gusel-la Dios benne'. ⁷ Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xeléajle xúgute bénneache chee Bénnea' ne chee da dxenné'. ⁸ Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. ⁹ Xel-la' naxaní' li, da dxusení na lu xichaj lázrdau xúgute bénneache ba za' la' na lu xezr la xu nigá.

¹⁰ Bénnea' naque' Xrtizra' Dios zue' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belexexúnbe'e Le'. ¹¹ Ble'e naga zua da naca chee', na' benne' lazrie' ca' quebe gulezí' lu ne'e Le'. ¹² Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee Dios. ¹³ Benne' caní québedxa zaj naque' ca zri'ine bénneacheze, bi ca' dxelálajbe' ne chee bénneache, u ne chee da dxezá lazre' tu benne'. Benne' caní zaj naque' bi ca' chee Dios ná'queze.

¹⁴ Bénnea' naque' Xrtizra' Dios gúlaje' ca tu bénneache, na' guzúe' ládujla dxi'u, zaj zúale xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ine' tu licha'. ¹⁵ Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunnéa' Bénnea' ze'e te chia' neda' naque' szrendxa ca neda' lawe' da zúaqueze' nédxute ca neda'.

¹⁶ Xúgutedxu ba guzidxu xel-la' zri'i lazre' chee' da dxúnnaqueze Le'. ¹⁷ Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. ¹⁸ Netú benne' quebe ne lé'engé' Dios. Zrí'ine' tu

licha', bi nazrí'itę lazre', benne' nigá guque' tuz ca nácaqueze Xre'.

*Juan, benne' bchue' bénneache nisa, dxexechebe' chee Jesús
(Mt. 3.11-12; Mr. 1.7-8; Lc. 3.15-17)*

¹⁹Benne' xíchaję ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchebe xánnie' le' nu naque'. ²⁰Bechebe Juan du lazre', gunné':

—Quebe naca' neda' Cristo. (Dizra' nigá zéaję na Benne' guchebe lazre' Dios sel-le'.)

²¹Nadxa buluchebe' le':

—¿Nuzra nacu'? ¿Nacu' Elías, bénnea' bchálaję' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bénnea' dxal-la' le'e, ne guchalaję' waláz chee Dios, ca da gunná Moisés dxal-la' gaca na?

Le' bechebe':

—Cabí.

²²Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

²³Juan bechebe':

—Neda' naca' bénnea' naxúaj na ca naca chee' lu xiche chee Dios, da dxenná: Wen chí'i tu benne' dxebezre xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaiás, bénnea' bchalaję' waláz chee Dios.

²⁴Benne' xudau' fariseo ca' gulesel-le' benne' caní chee cheajlechálajlene' Juan. ²⁵Le' buluchebe' le':

—Che lue' quebe nacu' Cristo, ne Elías, ne bénnea' dxal-la' xedajchalaję' waláz chee Dios, ¿bi xel-la' dxenná bea napu' dxuchú' bénneache nisa?

²⁶Juan guzre' benne' ca':

—Neda' dxuchúa' bénneache nisa lu nísaze. Zua tu benne' ládujla le'e quebe nézele ca szren naque'. ²⁷Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrele' da xu'u ni'e.

²⁸Xúgute da caní guca na lu xęzr la xu chee xęzre Betábara, da zua na chalá'a xęgu Jordán naga dxalaj gubizra, naga zua Juan dxuchúe' bénneache nisa.

Jesús naque' Zríla'dau' chee Dios, be dxelutie' lau Dios ne chee xtul-le'

²⁹Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' chee Dios, cue' dul-la zaj nabaga bēneache. ³⁰ Neda' bchálaja' ca naca chee' gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudautē ca neda'. ³¹ Néda'queza' quebe gunezda' nu naque'. Bla'a dxuchúa' bēneache nisa chee xeleneze xezre Israel nu Benne' naca Le'.

³² Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analēne' Benne' nigá. ³³ Neda' quebe ne nezda' nu naque'. Dios na' nasel-le' neda' chee guchúa' bēneache nisa, Le' guzre' neda': “Gate le'enu' Be' Lá'azxa xétaje' xegá'analēne' tu benne', Benne' nigá gune' da zéaje xella' dxedxúa nisa, guzúe' Be' Lá'azxa lu xichaj lázrdaule.” ³⁴ Na'a ba ble'eda' guca da nigá, ne dxexecheba' nácaqueze Benne' nigá Zrí'ine Dios.

Benne' nedxu ca' dxusede Jesús

³⁵ Zra xula zúaqueze na' Juan nen chupa benne' ca' dxusedene'. ³⁶ Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' chee Dios, bia gáteba' ne chee dul-la nabágadxu!

³⁷ Dxúpatē benne' ca' dxusede Juan belenne' ca da gunné', na' xjácālēne' Jesús. ³⁸ Nadxa bexechaj Jesús, gunné'e' cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexílajle?

Benne' caní gulé'e' Jesús:

—Benne' Wesede, ¿gazra zu'?

³⁹ Jesús bechebe':

—Le da nna'le.

Nadxa xjácālēne' Jesús, ne belelé'ene' naga zue', na' belexegá'analēne' Le' zra na' lawe' da bache zeaj du dxedá' tapa.

⁴⁰ Tu benne' chupa ca', benne' belenne' ca da gunná Juan, ne xjácālēne' Jesús, naque' Andrés, benne' biche Simón Pedro. ⁴¹ Andrés nigá la guxíajte' xejdíljaje' bi biche' Simón, na' guzre' le':

—Ba bezrélentu' Mesías. (Dizra' nigá zéaje na Cristo, Bēnea' guchebe lazre' Dios sel-le'.)

⁴² Nadxa Andrés guché'e' Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

Jesús dxenné' Felipe ne Natanael

⁴³ Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

44 Felipe nigá naque' benne' xezre Betsaida, da naca na lazre Andrés, ne Pedro. 45 Felipe guxíaję' xeajdíaję' Natanael, na' guzre' le':

—Ba bezréntu' Bénnea' bzuaj Moisés cheę' lu xiche naga zaj naxúaj da nadxixruj bea na, ne cá'anqueze cheę Benne' nigá buluzúaj benne' ca' buluchálaję' waláz cheę Dios. Benne' nigá naque' Jesús, zri'ine José, tu benne' xezre Nazaret.

46 Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

47 Gate ble'e Jesús za Natanael naga zue', gunné':

—Nigá za' tu benne' naca xánnię' benne' Israel, benne' dxennéqueze' da dxéquene'.

48 Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

49 Nadxa Natanael guzre' Jesús:

—Benne' Wesede, Lue' nacu' Zri'ine Dios. Lue' nacu' Wenná Bea cheętu', benne' Israel.

50 Bechebe Jesús:

—¿Dxéajle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. 51 Da li dxapa' le'e, walé'equezle le'e naxalaj xabáa, na' gubáz cheę xabáa ca' cheę Dios dxelétaję', ne dxelalexgüene' naga zua neda', Benne' Gulje' Bénneache.

2

Dxaca laní cheę wechaga na' lu xezre Caná

1 Zra guxunne zra, na' guca laní cheę wechaga na' lu xezre Caná da nababa Galilea. Xrna Jesús zue' na', 2 na' zua nu gunné Jesús, ne benne' ca' dxusédenę' lu laní na'. 3 Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aję'.

4 Jesús bechebe':

—Nú'uladau', ¿bizr cheę na' dxu'u neda' caní? Quebe ne zrin zra gulé'e lau da naca'.

5 Xrne'e guzre' benne' wen zrin ca':

—Le gun ca naca da xe'e le'e.

6 Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácálene'. Tu tu xesu' xiaj ca' dxeluzru na chupa u chunna dxee nisa. 7 Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'.
 8 Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. 9 Bénnea' zue' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zue' dxu'a ga dxelawe' gunné' benne' wechaga na', 10 na' guzre' le':

—Xúgute benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na na'a.

11 Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-la' szren chee', na' benne' ca' dxusédené' guléajle'e chee'.

12 Gudé na' Jesús bezé'e zexíaje' xezre Capernaum, zéajle' xrne'e Le' nen benne' biche' ca', ne benne' ca' dxusédené'. Na' gulezúe' na' zane' zra.

Jesús dxucá'ana chawe' chale'aj xudau'

(Mt. 21.12-13; Mr. 11.15-18; Lc. 19.45-46)

13 Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto. 14 Lu xezre Jerusalén blé'ene' lu chale'aj xudau' na' zaj zra' benne' dxelexutié' bezre ca', ne zrila' ca', ne bgúgudu ca', béadu ca' dxelutié' lau Dios. Cá'anqueze blé'ene' na' benne' dxuluxuché'e dumí chee' xezr zitu' ca'. 15 Gate ble'e Jesús da caní, na' bgu'e du ca' da güe'e benne' ca', na' bebéaje' ca' naca benne' ca' tu zrente nen bezre chee' ca', ne zrila' chee' ca'. Na' gudxú'une' lu xula dumí chee' benne' ca' dxuluxuché'e dumí, ne bdxixre' blaga' ca' chee' benne' ca'. 16 Na' guzre' benne' ca' dxelexutié' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

17 Nadxa benne' ca' dxuséde Jesús xeajlesá lazre' da naxúaj na lu xiche chee' Dios, da dxenná na: Dxácaté zi' lázrdawa' lawe' da dxé'le'a gunne xue chee' lizru'.

18 Nadxa judío blau ca' buluchebe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

19 Bechebe Jesús:

—Le guzría xi' xudau' nigá, na' neda', te chunna zra xechisa' na.

20 Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

²¹ Bchalaj Jesús chee xudau' na' da naca na bel-la' dxen chee'. ²² Chee le na', gate bebán Jesús ládujla benne' gate, na' benne' ca' bsédene' xeajlesá lazre' ca da gunné', na' guléajle'e chee da naxúaj na lu xiche chee Dios ca naca chee Jesús, ne chee da guzre Jesús le'.

Jesús núnbe'e xúgutę bénneache

²³ Gate zua Jesús xezre Jerusalén lu Laní Pascua chee judío ca', na' benne' zan guléajle'e chee' gate belelé'ene' ca naca xel-la' waca zren ca' da dxune'. ²⁴ Jesús quebe bde cuine' lu na' benne' ca' lawe' da nézquezne' quegá xúgutę benne' ca' dxeléajle'e chee'. ²⁵ Quebe guchínene' nu benne' xe'e Le' ca zaj naca bénneache lawe' da nézquezne' ca da zaj xu'u xichaj lázxdau bénneache.

3

Jesús dxuchálajle' Nicodemo

¹ Zua tu benne' xudau' fariseo le' Nicodemo. Naque' benne' blau lávela benne' judío ca'. ² Benne' nigá guxíaje' xeajnné'e Jesús chizrela, na' guzre' Le':

—Benne' Wesede, nézentu' Dios nasel-le' Lue' chee gusédenu' netu' lawe' da quebe nu benne' gaca guné' ca zaj naca xel-la' waca zrentę da dxunu' Lue' che quebe zúale Dios le'.

³ Nadxa Jesús guzre' le':

—Da li dxapa' lue', nu benne' quebe gálaje' xecha lasa quebe gaca gaque' tuze benne' ca' dxenná be'e Dios.

⁴ Nicodemo bchebe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e chee gálaje' xetú?

⁵ Jesús bechebe':

—Da li dxapa' lue', nu benne' quebe gálaje' ne chee nisa chee xrtizra' Dios, ne ne chee Be' Lá'azxa, quebe gaca chu'e naga dxenná bea Dios. ⁶ Benne' nálaje' lu ni'a lu na' bénneache, naque' bénneacheze. Nu benne' nálaje' ne chee Be' Lá'azxa, naca ban bénnea' ne chee Be' Lá'azxa. ⁷ Quebe xebánenu' lawe' da dxapa' lue', dxun na ba xen gálaju' xecha lasa. ⁸ Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca chee benne' zaj nálaje' ne chee Be' Lá'azxa. Gaca le'enu' da ba nun Be' na' lu xichaj lázxdau bénnea', na' quebe dxelé'enu' ájala dxun Be' na'.

⁹ Nadxa Nicodemo bchebe' Jesús:

—¿Ájazra gaca da caní?

10 Bechebe Jesús:

—Lue' nacu' tu benne' weséde blau ládujla benne' Israel ca', na' ¿quebe nézenu' da caní? 11 Da li dxapa' lue', netu' dxuchálajntu' ca naca da nézentu', ne dxexechébentu' ca da blé'entu', na' le'e quebe dxéajlele da dxentu' le'e. 12 Che quebe dxéajlele chia' gate dxuchálajlena' le'e ca naca chee da dxaca lu xezr la xu nigá, ¿ájazra gaca chéajlele chia' che guchálajlena' le'e chee da dxaca xabáa?

13 'Quebe ne cuen tu benne' xabáa chee lé'ene' ca dxaca na'. Tuze Bénnea' bétaje' xabáa, Bénnea' naca' neda', Benne' Gulje' Bénneache, naca' Bénnea' zúaqueze' xabáa. 14 Ca ben Moisés, bdé'e tu bela' xia le'e xaga naga zua le'e xixre' lawe' lataj, cá'anqueze neda', Benne' Gulje' Bénneache, wuludá'queze' neda' tu le'e xaga, 15 chee quebe xelebía xi' nu benne' xeléajle'e chia'. Zrué'e bénnea' xel-la' nabán da zeajlí canna.

Dios dxezrí'i lazre' bénneache

16 Dios dxezrí'i lázrele'ene' bénneache, na' chee le na' bdee' Zrí'ine' tu licha' chee quebe xelebía xi' nu benne' dxeléajle'e chee'. Zrué'e bénnea' xel-la' nabán da zeajlí canna. 17 Dios gusél-le' Zrí'ine' lu xezr la xu nigá, quegá chee guzría xi'e bénneache, san chee guselé' bénneache.

18 Bénnea' dxéajle'e chee Zri'ine Dios quebe naca chee' cuía xi'e, san nu benne' quebe dxéajle'e chee' ba naca chee' cuía xi'e lawe' da quebe dxéajle'e chee' Zri'ine Dios, bi tu licha' chee'. 19 Benne' ca' quebe dxeléajle'e chee' ba zaj naca chee' cuía xi'e lawe' da gate bla' xel-la' naxaní' lu xezr la xu nigá, beledánedxene' da chul-la ca xel-la' naxaní', lawe' da dxelune' da calela. 20 Xúgutę benne' dxelune' da calela dxelecuídene' xel-la' naxaní', ne quebe dxelebigue' lu xel-la' naxaní', chee quebe gaca bea da calela da dxelune'. 21 Benne' ca' dxelune' ca naca da li dxelebigue' lu xel-la' naxaní' chee gaca bea naca na chee Dios da dxelune'.

Da gunná Juan, bénnea' bchuę' bénneache nisa

22 Gudé na' guxíaj Jesús naga nababa Judea nen benne' ca' dxusédene', na' guzúe' na' zane' zra nen benne' ca', dxuluchúe' bénneache nisa. 23 Cá'anqueze zua Juan lu xezr la xu chee xezre Enón da zua gáguze naga dxe' xezre Salím, dxuchúe' bénneache nisa lataj na' lawe' da déle'e na' nisa zila, na' belezrín benne' zan naga zua Juan, na' beledxúe' nisa. 24 Da nigá guca na nédxudxa gate quebe ne xelegú'e Juan lizre xia.

25 Nadxa bal-la benne' zaj de'e Juan gulezú lawe' dxulutil-le' judío ca' dizra' ca naca chee da dxucá'ana chawe na bénneache lau Dios. 26 Nadxa xeajleguzre' Juan:

—Benne' wesede, bénnea' blē'e naga zu' chalá'a xegu Jordán naga dxalaj gubizra, bénnea' bchálajlenu' netu' chee', na'a dxuchúe' bénneache nisa, na' xúgute' bénneache zjácálenē' Le'.

²⁷ Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na chee'. ²⁸ Le'e bénquezle gunnía' neda' quebe nácaqueza' neda' Cristo, Bénnea' guchebe lazre' Dios sel-le'. Naca' tu benne' nase-la Dios chee quia lawa' lau Le'. ²⁹ Lu laní chee wechaga na', bénnea' si'e nu'ula wechaga na' naque' benne' wechaga na', na' benne' ljwezre benne' wechaga na', bénnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo. ³⁰ Le' dxal-la' gácadxe' szren, na' neda' dxal-la' gácadxa' cá'aze.

Ca naca chee Bénnea' za' xabáa

³¹ Na' gunná Juan:

—Bénnea' za' xabáa nácadxe' blau ca xúgute' bénneache. Benne' naque' chee xezr la xu nigá naque' bénneacheze, ne dxuchálaje' ca naca chee da dxaca lu xezr la xu nigáze. Bénnea' ze'e xabáa nácadxe' szren ca xúgute' bénneache. ³² Le' dxuchálaje' ca naca chee da ba blé'ene', ne da ba benne' xabaala, na' quebe dxéajle' nu benne' chee da dxenné'. ³³ Che nu benne' dxéajle'e chee', benne' nigá dxulé'ene' naca li ca da dxenná Dios. ³⁴ Bénnea' nase-la Dios dxuchálaje' xrtizra' Dios lawe' da dxunna Dios Le' Be' Lá'azxa chee' dutē ca naque'. ³⁵ Xradxu Dios nazrí'ine' Zrí'inequeze', ne ba bdee' lu ne'e xúgute' da de. ³⁶ Nu benne' dxéajle'e chee' Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee' Zrí'ine Dios quebe gape' xel-la' nabán caní. Wadée' lu da ba xa' da gun Dios.

4

Dxuchálajle Jesús tu nu'ula chee tu xezre nababa na Samaria

¹ Benne' fariseo ca' belenne' zjácále benne' zandxa Jesús ca benne' zjácálenē' Juan, na' dxuchúa Jesús benne' zandxa nisa ca benne' dxuchúa Juan nisa. ² Quebe dxuchúaqueze Jesús bénneache nisa. Benne' ca' dxusédene' dxuluchúe' bénneache nisa. ³ Gate guque be'e Jesús da nigá, na' bezé'e naga nababa Judea, xexíaje' naga nababa Galilea.

⁴ Ca xu'u Jesús neza, ben na ba xen té'e naga nababa Samaria. ⁵ Ca'an guca, bzrine' tu xezre naga nababa Samaria nazí le na Sicar, da dxe' gáguze naga zua xezr la xu na' bnezruj Jacob chee zrí'ine', bi lebe' José. ⁶ Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e neza, na' gudxé'e dxu'a beaj na'. Naca na zran

wagubizra. ⁷⁻⁸ Benne' ca' dxusede Jesús xjaque' lu xezre Sicar, xeajlegá'awe' da xelawe'. Dxácatę na' bzrin tu nu'ula Samaria dxu'a beaj na' zeajxri'e nisa, na' Jesús guzre' le':

—Benna nisa xí'aja'.

⁹ Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'. ¹⁰ Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

¹¹ Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e na situj. ¿Ájazra na' gunu' gunnu' neda' nisa chee xel-la' nabán? ¹² Xra xrtáuntu', Jacob, benne' netu' beaj nigá, naga güé'eqeze le' nisa, ne naga gulé'ajqueze zrí'ine', ne be xixre' chee'. ¿Nácadxu' szrendxa ca le'?

¹³ Jesús bechebe':

—Xúgute benne' dxelé'aje' nisa chee beaj nigá welexebilequezne' nisa. ¹⁴ Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

¹⁵ Nadxa nu'ula na' guzre' Le':

—Benne', benna neda' nisa na', chee québedxa gun na ba xen xida' nigá xedajxri'a nisa.

¹⁶ Na' Jesús guzre' nu'ula na':

—Guxíaj xeajnné benne' chiu', na' xídale nigá.

¹⁷ Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxennáu' quebe nu chilá' benne' chiu', ¹⁸ lawe' da ba guzúalęnu' gazxu' benne', na' bėnnea' zúalęnu' na'a quebe naque' benne' chiu'. Ca naca da nigá gunnáu' da li.

¹⁹ Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee Dios. ²⁰ Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

²¹ Na' bechebe Jesús:

—Guxéajle chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle Jerusalén. ²² Le'e, benne' Samaria, quebe núnbeale nua' dxucá'ana szrenle. Netu'

núnbeantu' Nua' dxucá'ana szrentu', lawe' da za' benne' weselá ládujla benne' judío ca'. ²³ Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelunē' na ne chee Be' Lá'azxa, ne ne chee da li, lawe' da dxaca lazre' Xradxu Dios xulucá'ana szren bēneache Le' caní. ²⁴ Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne chee Be' Lá'azxa, ne ne chee da li.

²⁵ Na' nu'ula na' guzre' Le':

—Neda' nezda' walá' benne' Mesías (da zéaje na Cristo), na' gate la' Le', na' guzéajni'ine' dxi'u ca naca xúgute.

²⁶ Jesús guzre' le':

—Neda' naca' Bēneacha, dxuchálajle'na' lue'.

²⁷ Ca gunné' ca', na' belexezrín benne' ca' dxusedene', na' belexebāne' lawe' da dxuchálajle' Jesús tu nu'ula Netúe' quebe bexázejne' guchebe' Le' bi da dxaca lazre', u bizra cheen dxuchálajle' nu'ula na'. ²⁸ Nadxa nu'ula na' bca'ane' dxe'e chee' dxu'a beaj na', na' bezé'e zexíaje' xezre na' naga xeajezre' benne' ca':

²⁹ —Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bēneacha sel-la Dios?

³⁰ Nadxa beledxúaj benne' ca' xezre na', zjaque' naga zua Jesús. ³¹ Dxácatē na', benne' ca' dxusede Jesús gulata' xuene' Le', gulenné':

—Benne' Wesede, gudagu late'.

³² Jesús guzre' benne' ca':

—De da dxawa', da quebe núnbeale le'e.

³³ Nadxa benne' ca' dxusede Jesús gulezú lawe' dxuluchebe ljwezre', dxelenné':

—¿Núteca bedajgú'e da gudawe'?

³⁴ Jesús guzre' le':

—Xela wagu chia' naca na chee guna' da dxaca lazre' Xra', Bēneacha nasele' neda', ne chee gusexuzra' guna' zrin chee'.

³⁵ Le'e dxennale: “Xetapa beu' xelápadxu.” Neda' dxapa' le'e, le nna' bēneache zaj naque' ca tu lina, da bache naca na xelápadxu. ³⁶ Benne' dxelape' dxezi'e lazruj chee', na' da dxelape' naca na chee xelapa bēneache xel-la' nabán da zeajlí canna, chee sua xel-la' dxebe' benne' dxaza tu zren nen benne' ca' dxelelape'. ³⁷ Da li naca ca da dxelenná bēneache: Tu benne' dxaze', na' xetúe' dxelape'. ³⁸ Neda' gusel-la' le'e xelápale naga quebe gúzale. Ca' naca na, benne' xula belunē' zrin gulaze', na' le'e dxezile ba neza zrin da belún benne' ca'.

³⁹ Benne' zan, benne' xezre na' naga nababa Samaria, guléajle'e chee Jesús ne chee xrtizra' nu'ula na', gunné': “Guzre' neda' xúgute da ba bēna'.” ⁴⁰ Gate belelá' benne' Samaria ca' naga zua Jesús, na' gulata' xuene' Le' xegá'ane'

nen le', na' begá'ane' na' chupa zra. ⁴¹ Benne' zandxa guléajle'e chee Jesús gate belenne' ca da dxenná Le'. ⁴² Nadxa gulé'e nu'ula na':

—Na'a dxéajlentu' chee' quegá tuze ne chee da guzru' lue' netu', na' cá'anqueze lawe' da bénquezentu' netu' chee', na' nézentu' da li naque' Cristo, Bénnea' guselé' ca naca bénneache.

Jesús dxexune' zri'ine tu benne' wen zrin blau chee xu'u lawe'
⁴³ Gudé chupa zra bezá' Jesús xezre ca' zaj nababa Samaria, na' guzé'e zéaje' naga nababa Galilea. ⁴⁴ Guxíaje' na' lawe' da gunnáqueze Jesús, gunné': "Tu benne' dxuchalaje' waláz chee Dios, quebe dxelapa benne' lazri'e le' ba lá'ana." ⁴⁵ Gate bezrine' naga nababa Galilea, benne' zaj zre'e na' belezí' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belele'ene' xúgutę da ben Jesús lu laní na'.

⁴⁶ Nadxa bezrín Jesús xezre Caná naga nababa Galilea naga bene' bexaca nisa xrise uva wal-la. Zua lu xezre Capernaum tu benne' wen zrin blau chee xu'u lawe', zua tu zri'ine' bi biu quebe chawe' zúabe'. ⁴⁷ Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xeajnné'e Jesús, na' gutá' xuene' Le' chéaje' lizre' xexune' bi biu chee', bi na' ba zua gátebe'. ⁴⁸ Nadxa Jesús guzre le':

—Le'e quebe chéajlele chia' che quebe lé'ele xel-la' waca chee xabáa da dxulé'eda'.

⁴⁹ Benne' wen zrin blau na' gunné':

—Xran, gudázega na'a quebe ne gate zri'ina'.

⁵⁰ Nadxa guzre Jesús le':

—Bexíaj lizru'. Naca ban bi chiu'.

Benne' wen zrin blau na' guxéajle'e chee da guzre Jesús lé', na' bezé'e zexíaje'. ⁵¹ Gate ba zua xezrine' lizre', na' benne' wen zrin chee' xeajlexezrigale' le', na' gulé'e le':

—Naca ban zri'inu'.

⁵² Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

⁵³ Nadxa benne' wen zrin blau na' bexúnene' guca na la ná'queze gate guzre Jesús le': "Naca ban zri'inu'." Ca'an guca, le', ne xúgutę benne' zaj zra' lizre' guléajle'e chee Jesús.

⁵⁴ Da nigá naca na xel-la' waca zren da gudxupe' da ben Jesús gate bezrine' naga nababa Galilea.

5

Jesús dxexune' tu benne' biu naga nazí le na Betesda

¹ Ca gudé na' guxú'u tu laní chee judío ca', na' bezrín Jesús xezre Jerusalén. ² Lu xezre na', gáguze naga zua dxa xu'u chee

xęzre da nazí le na Dxa Xu'u Cheę Zrila' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila. ³ Lachila ca' zaj de benne' zan zaj xu'e wę', benne' la chul-la ca', ne benne' zaj zua zri ni'a ne'e, ne benne' zrinnaj ca'. Dxelebeze' ca bixre nisa na'. ⁴ Ca'an naca lawe' da dxetaj tu gubáz cheę xabáa bata gala, ne dxunibe' nisa na', na' benne' nedxu dxeajchu'e lu nisa na' ca dxedé dxunibe' na, dxexaque' cheę biteteze xel-la' wę' xu'e. ⁵ Zua tu benne' na' ba guca chinu chunne dxua iza xu'e wę'. ⁶ Gate ble'e Jesús benne' nigá, ne dxeque bé'eng' ba guca zane' iza xu'e wę' na', na' bchebe' le':

—¿Dxaca lazru' xexacu'?

⁷ Benne' wę' na' bechebe':

—Benne', quebe nu chilá' benne' cu'e neda' lu nisa na' ca dxedé dxebixre na. Tu tu lasa gate dxaca lazra' chu'a, benne' xula dxu'e nédxudxa.

⁸ Jesús guzre' le':

—¡Guxasa! Becá'a da'a chiu', ne bexíaj.

⁹ La' ná'queze bexaca benne' wę' na', na' bequę'e da'a cheę', ne guzú lawe' dxedé'. Zra na' naca zra dxulupá'ana judío ca', ¹⁰ na' benne' judío ca' gulę'e bénnea' bexaque':

—Na'a naca na zra dxupá'anadxu. Quebe naca na gu'u da'a chiu'.

¹¹ Na' benne' na' bechebe':

—Bénnea' bexune' neda' guzre' neda': “Becá'a da'a chiu', ne bexíaj.”

¹² Nadxa buluchebe' le':

—¿Nuzra na' guzre' lue': Becá'a da'a chiu', ne bexíaj?

¹³ Benne' na' quebe nézene' nu bénnea' bexune' le' lawe' da ba zexíaj Jesús lówela benne' zan ca' zaj zre'e na'. ¹⁴ Ca gudé na' Jesús bezrague' bénnea', dxedé' chale'aj xudau', na' guzre' le':

—¡Gunná'xque! Ba bexacu' na'a. Québedxa gunu' dul-la, cheę quebe bi sacu' xetú da wál-ladxa.

¹⁵ Nadxa benne' na' bezę'e zexíaje', na' bzenne' judío ca' bexún Jesús le'. ¹⁶ Cheę le' na' benne' judío ca' guláu zi' xuzre' Jesús, ne gulaca lazre' xelútię' Le' lawe' da dxune' da caní lu zra dxulupá'ane'. ¹⁷ Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

¹⁸ Cheę le' na' benne' judío ca' gulaca lázredxe' xelútię' Jesús lawe' da quegá tuze dxuzúę' chalá'ala da nadxixruj bea na cheę zra dxulupá'ane', na' cá'anqueze dxun cuinę' ca Dios gate gunné' Dios nácaqueze' Xre'.

Xel-la' dxenná bea da napa Zri'ine Dios

¹⁹ Nadxa Jesús guzre' benne' judío ca':

—Da li dxapa' le'e, neda', Zri'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgute da dxun Xra', cá'anqueze dxuna' neda', Zrí'ine'. ²⁰ Dios, Xra', nazrí'ine' neda', Zrí'ine', ne dxulé'ene' neda' xúgute da dxúnqueze' Le', na' gulé'ene' neda' da zaj nácadxa szren ca da ca' dxuna', na' xebánequezle le'e ca xelaca na. ²¹ Ca dxun Xradxu Dios, dxusebanē' benne' gate, ne dxuxunézruje' xel-la' nabán cheē', cá'anqueze neda', Zrí'ine', dxuxunézruja' xel-la' nabán cheē' benne' ca' dxaca lazra' xunézruja' na. ²² Xradxu Dios quebe dxuchi'e nu benne', san ba benne' neda', Zrí'ine', xel-la' dxenná bea guchi'a da dxelún tu tu bēnneache, ²³ cheē xelapa xúgute benne' neda', Zrí'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zrí'ine', cá'anqueze quebe dxape' ba lá'ana Xradxu Dios nasel-le' neda'.

²⁴ Da li dxapa' le'e, benne' dxenne' da dxennéa' neda', ne dxéajle'e cheē Dios nasel-le' neda', benne' nigá nape' xel-la' nabán da zeajlí canna, na' quebe cuía xi'e lawe' da ba bedxúaje' lu na' xel-la' gute, ne ba zuē' lu xel-la' nabán. ²⁵ Da li dxapa' le'e, wazrín zra, ne ba dxezrín zra na' gate benne' gate ca' xelenne' chi'a neda', Zri'ine Dios, na' benne' xuluzúa xrtizra' welaca bánqueze'. ²⁶ Xráqueza' nape' xel-la' dxenná bea xunézruje' xel-la' nabán da naca na li lazre' cheē bēnneache, ne cá'anqueze ba benne' neda', Zrí'ine', xel-la' dxenná bea xunézruja' bēnneache xel-la' nabán caní, ²⁷ ne ba benne' neda' xel-la' dxenná bea guchi'a cheē bēnneache lawe' da naca' Benne' Gulje' Bēnneache. ²⁸ Quebe xebánele cheē da nigá lawe' da zrin zra gate xúgute benne' gate xelenne' chi'a ²⁹ xelexedxúaje' lu xēdxu ba. Benne' ca' belunē' da xrlátaje xelexebanē' cheē xelape' xel-la' nabán da zeajlí canna. Benne' ca' belunē' da calēla xelexebanē' cheē xelebía xi'e.

Da dxelunna bea na napa Jesús xel-la' dxenná bea

³⁰ Na' gunná Jesús:

—Neda' quebe bi gaca guna' cheézqueza'. Neda' dxuchi'a cheē bēnneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasel-le' neda'. ³¹ Che neda' dxexecheba' da nácaze cheéqueza', da dxennéa' quebe naca na da dxunna bea na. ³² Zua tu benne' xula dxexechebe' da nácaqueze chia', na' da dxenné' naca na da dxunna bea na. ³³ Le'e gusél-lale benne' xeajlechebe' Juan, na' ca da bechebe' naca na da li. ³⁴ Da dxunna bea na da dxuxrén lazra' neda' quebe naca na cheē bēnneacheze. Dxapa' le'e da nigá cheē lale le'e. ³⁵ Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. ³⁶ Zua tu da dxunna

bea na chia' neda', da nácadxa szren ca da bchalaj Juan. Da ca' dxuna' neda', da bsebaga Xra' neda' dxuna'. Da caní dxelunna bea na da li Dios, Xra', gusél-le' neda'. ³⁷ Cá'anqueze Xra' nasele-le' neda' dxexechebe' chia'. Lácala ba bchalaj Le', le'e quebe ne xénele chi'e, ne quebe ne lé'ele Le', ³⁸ ne quebe nuzúale dizra' chee' xichaj lázrdaule lawe' da quebe dxéajlele chia' neda', nasele-la Xra' neda'. ³⁹ Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. ⁴⁰ Le'e quebe dxaca lázrele xídale naga zua' neda' chee gápale xel-la' nabán na'.

⁴¹ 'Neda' quebe dxezi'a xel-la' ba lá'ana ca da dxelunna bénneache, da quebe naca na li lazre'. ⁴² Neda' núnbe'a le'e, ne nezda' quebe nazrí'ile Dios. ⁴³ Bla'a neda' waláz chee Dios, Xra', na' le'e quebe dxezi' lu na'le neda'. Che za' tu benne' lu da naca cheézqueze', benne' na' wazí' lu na'le. ⁴⁴ ¿Ájazra gaca chéajlele le'e chia' che dxunle zrin chee xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? ⁴⁵ Quebe guéquele néda'queza' gusebaga' le'e zria lau Dios, Xra'. Da gusebaga le'e zria naca na da ba gunná Moisésqueze, da na' dxuxrén lázrele guselá na le'e. ⁴⁶ Che da li guxéajlele le'e chee da gunná Moisés, cá'anqueze chéajlele chia' neda' lawe' da bzuaj Moisés ca naca chia' neda'. ⁴⁷ Na'a, che quebe dxéajlele chee da bzuaj le', ¿ájazra gaca chéajlele chee da dxapa' le'e?

6

Jesús dxugawe' chi xun gaxúa benne' biu
(Mt. 14.13-21; Mr. 6.30-44; Lc. 9.10-17)

¹ Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. ² Benne' zante zjálaleñe' Jesús lawe' da ba belelé'ene' xel-la' waca zren ca' da dxun Le', dxexune' benne' we' ca'. ³ Nadxa Jesús guluéne' tu lu xí'a, na' gudxé'e na' nen benne' ca' dxusédenē'. ⁴ Ba zua gagu Laní Pascua chee judío ca'. ⁵ Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxridxu da xelagu benne' zan caní?

⁶ Gunná caní Jesús chee la' bi nna Felipe, lawe' da ba neze Jesús ca da gunē'. ⁷ Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelezí' benne' caní late' weaj.

⁸ Nadxa Andrés, xetú benne' ca' dxusede Jesús, ne naque' bi biche Simón Pedro, guzre' Jesús:

9 —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ajazra gun da nigá gueque na chee xúgute benne' caní?

10 Nadxa gunná Jesús:

—Le xę xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. 11 Nadxa gucá'a Jesús xeta xtila ca', na' ca gudę guzre' Dios “Xcalenu”, bnęzruje' na benne' ca' dxusędene', na' benne' caní gulísie' na láwele benne' zan ca' zaj dxę'e na'. Cá'anqueze ben Jesús chee bela ca', na' bnęzruje' ca da gulaca lazre' benne' ca'. 12 Gate gulęlaje benne' ca', na' Jesús guzre' benne' ca' dxusędene':

—Le xutupa da bızrujdu ca' da dxęlexegá'ana na, chee quebe bi gaca dıtaje.

13 Belexęquę'e na, na' buluzrę'e chazrinnu xcuite da bizruj ca' zaj nagá'ana na chee da gazxu' xeta xtila zrua' cebada ca'. 14 Nadxa benne' zan ca', gate belelé'ęne' xel-la' waca zren nigá da ben Jesús, gulennę':

—Da li benne' nigá naque' bęnnea' guchálaje' waláz chee Dios, bęnnea' dxal-la' le'e.

15 Guque bé'ęne' Jesús dxelaca lazre' xeleché'e Le' xadía chee xuluzę' Le' ca benne' wenná bea, na' bezę'e na', ne begüęne' lu xi'a sibe na' chee sue' leze'.

Jesús dxedę' lawe' nısadau'

(Mt. 14.22-27; Mr. 6.45-52)

16 Gate ba za xrinne, benne' ca' dxusęde Jesús belętaje' dxu'a nısadau', 17 na' gulu'e lu da dxedá lawe' nısadau', ne gulezú lawe' zjaque' xeledęę' xechalá'a nısadau' chee xelezrine' xęzre Capernaum. Ca guxrinne, quebe ne xezrín Jesús na'. 18 Nadxa guzú lau dxaca tu be' bdunu' lawe' nısadau' na', na' xeajxruga chee nısadau' na' guxásale'e na. 19 Gate ba guledęę' lu nısadau' na' catite sadxu tu chi'i zren, na' belelé'ęne' Jesús ba dxęzrine' naga ziaj da dxedá lawe' nısadau', dxęzę'e lawe' nısadau', na' belezrebe'. 20 Nadxa Jesús guzre' benne' ca':

—Neda' na'. Quebe zrębele.

21 Nadxa lu dute' xel-la' dxęlebé' gulezí' lu nę'e Le' lu da dxedá lawe' nısadau' na', na' chadite' belezrine' lu xęzr la xu naga zjaque'.

Benne' zan ca' dxęlexılaje' Jesús

22 Zra xula benne' zan ca', benne' belexegá'ana xecha la'a nısadau', guleque bé'ęne' ba zeajxaca benne' ca' dxusęde Jesús lu da dxedá lawe' nısadau' tu licha' da dxę' chalá'a na', na' Jesús quebe guxıajle' benne' ca'. 23 Dxácatę na' xezıcala da dxęledá lawe' nısadau', da ca' beledxúaj na xęzre Tiberias, belezrín

na tu lataj da zua gáguze naga gulawē' xeta xtila na' ca gudé guzre Xránadxu Dios: "Xcalenu'." ²⁴ Cheē le na' gate benne' zan ca' guleque bé'ene' québedxa zua Jesús na', ne cá'unqueze benne' ca' dxusédene', na' gulu'e lu da dxeledá lawe' nísadau', ne xjaque' xezre Capernaum zeajlexedilajē' Jesús.

Jesús naque' xeta xtila da dxunna na xel-la' nabán li lazre'

²⁵ Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

²⁶ Jesús guzre' benne' ca':

—Da li dxapa' le'e, dxexilajle le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. ²⁷ Quebe cue'le gunne xue sile da gágule da te cheē na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Guljē' Bénneache, le'e, lawe' da bzua Xra' Dios nen neda' da dxunna bea na naca' Zrí'ine'.

²⁸ Nadxa buluchebe' Le':

—¿Bi dxal-la' guntu' cheē gaca ca da dxaca lazre' Dios guntu'?

²⁹ Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusel-la Dios.

³⁰ Nadxa buluchebe' Le':

—¿Bizra xel-la' waca gunu' cheē le'entu' na, na' chéajlentu chiu'? ¿Bizra dxunu'? ³¹ Xra xrtauntu' ca' gulawē' xeta maná le'e xixre' lawe' lataj, ca naxúaj na lu xiche cheē Dios, dxenná na: Dios bgawē' benne' ca' xeta xtila da za xabáa.

³² Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'. ³³ Xeta xtila na' da dxunna Dios le'e naca na Bénnea' bétajē' xabáa, ne dxunézruje' cheē bénneache xel-la' nabán li lazre'.

³⁴ Nadxa benne' ca' gulé'e Le':

—Xran, tu bēnnazqueze cheentu' xeta xtila caní.

³⁵ Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xidē' naga zua' neda' cabátadxa tune', na' benne' chéajle'e chia' cabátadxa bílene'. ³⁶ Naca na ca ba gucha' le'e. Le'e na' quebe dxéajlele chia', lácala ba ble'ele neda'. ³⁷ Xúgute benne' ca' dxunna Xra' neda', xelexé'e lawa', na' benne' ca' xelexé'e naga zua', quebe guzúa' benne' ca' chalá'ala. ³⁸ Neda' guzá'a xabáa, quegá cheē guna' ca dxaca lázrequeza' neda'. Bla'a cheē guna' ca da dxaca lazre' Xra', gusel-le' neda'. ³⁹ Da dxaca lazre' Xra', nasel-le' neda', naca na cheē quebe gunitia'

netú benne' ca' ba benne' chia'. Nacan chee gusebana' benne' ca' lu zra bzebe. ⁴⁰ Da dxaca lazre' Xra', nasele' neda', naca na chee xelapa benneache xel-la' nabán da zeajlí canna, xúgute benne' ca' xelenné'e neda', Zri'ine Dios, ne xeléajle'e chia' neda', na' chee gusebana' neda' benne' ca' lu zra bzebe na'.

⁴¹ Gate belenne' da nigá, na' judío ca' gulezú lawe' dxelezí tizre' Jesús lawe' da gunné': "Neda' naca' xeta xtila da betaj xabáa." ⁴² Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'e. ¿Bizr chee na' dxenné' bétaje' xabáa?

⁴³ Nadxa Jesús guzre' benne' ca':

—Québedxa si tízrale. ⁴⁴ Quebe nu benne' gaca xide' naga zua' neda', che quebe xedajgúa Xra' nasele' neda' bennea', na' neda' gusebana' bennea' lu zra bzebe na'. ⁴⁵ Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios gusedene' xúgute benneache. Ca' gaca na, xúgute benne' ca' dxuluzé nague' ca da dxusede Xra', dxelelé'e naga zua'.

⁴⁶ 'Quebe ne le'e nu benne' Xra'. Benne' tu licha', bennea' blé'ene' Le', naca bennea' guzé'e naga zua Dios. ⁴⁷ Da li dxapa' le'e, nu benne' dxéajle'e chia' neda' nape' xel-la' nabán da zeajlí canna. ⁴⁸ Neda' naca' xeta xtila da dxunna na xel-la' nabán li lazre'. ⁴⁹ Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gulatíe'. ⁵⁰ Xeta xtila nigá naca na da za xabáa, na' che nu benne' gawe' na, quebe gatié' tu chí'ize. ⁵¹ Néda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadía chacanna. Xeta xtila na' da dxunna' neda' naca na belá' dxen cheézqueza', da gunna' chee xelaca bánqueze benneache.

⁵² Nadxa benne' judío ca' gulezú lawe' dxuluchebe ljwezre', dxelenné':

—¿Ájazra gun benne' nigá, gunne' dxi'u belá' dxen cheézqueze' chee gágudxu na?

⁵³ Jesús guzre' benne' ca':

—Da li dxapa' le'e, che le'e quebe gágule belá' dxen chia' neda', Benne' Gulje' Benneache, ne che quebe xí'ajle dxen chia', quebe gápale xel-la' nabán li lazre'. ⁵⁴ Benne' dxawe' belá' dxen chia', ne dxí'aje' dxen chia' nape' xel-la' nabán da zeajlí canna, na' neda' gusebana' bennea' lu zra bzebe na'. ⁵⁵ Belá' dxen chia' naca na xel-la' wagu li lazre' chee benne'du xu'ule, na' dxen chia' naca na da xele'aj benneache da naca na li lazre'. ⁵⁶ Benne' dxawe' belá' dxen chia', ne dxí'aje' dxen chia', naque' neda' tuze, na' néda'queza' naca' bennea' tuze. ⁵⁷ Xra' nasele' neda' xu'u lu ne'e xel-la' nabán li lazre', na' neda' naca bana'

ne chee Le'. Cá'anqueze bènea' dxawe' da naca chia' neda' gaca bánqueze' ne chia' neda'. ⁵⁸ Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawe' xeta xtila nigá waca bánqueze' chadía chacanna.

⁵⁹ Bsede Jesús ca naca da caní naga zaj zra' benne' zan ca' lu xu'u naga dxelezraga bènneache chee xezre Capernaum.

Ca naca dizra' na' da dxunna na xel-la' nabán da zeajlí canna

⁶⁰ Gate belén benne' zan ca' da nigá dxusede Jesús, na' benne' ca' zjácale Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní?

⁶¹ Guque bé'ene' Jesús dxelenné' chee xrtizre', na' bchebe' benne' ca':

—¿Dxuzúa dizra' nigá le'e stebe? ⁶² ¿Ájazra gunle checa' lé'ele neda', Benne' Gulje' Bénneache, xegüéna' xabáa naga zua' nédxute? ⁶³ Be' naca na da dxunna xel-la' nabán li lazre'. Da naca na belá' dxen quebe bi zaca na. Dizra' ca' da ba gucha' le'e zaj naca na chee Be', ne zaj naca na da dxelunna na xel-la' nabán li lazre'. ⁶⁴ Bál-lale le'e quebe dxéajlele chia'.

Caní gunná Jesús lawe' da nézene' nédxudaute nu benne' ca' quebe dxeléajle'e chee', ne nua' gudé Le' lu na' benne' guledábage' Le'. ⁶⁵ Nadxa gunná Jesús:

—Chee le na' gucha' le'e, quebe nu benne' gaca xide' naga zua' neda' che quebe xedajgúa Xra' bènea'.

⁶⁶ Lu zra ná'queze benne' zan ca', benne' xjácalene' Jesús, québedxa xjácalene' Le'. ⁶⁷ Nadxa Jesús bchebe' benne' chazrinna ca' dxusédene', gunné':

—¿Cá'anqueze le'e dxaca lázrele xexíajle?

⁶⁸ Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. ⁶⁹ Netu' dxéajlentu' chiu', ne nézentu' nacu' Cristo, Zri'ine Dios ban.

⁷⁰ Jesús bechebe':

—Neda' gucá'a le'e, benne' chazrinna, na' tu benne' ládujla le'e xu'e da xriwe'.

⁷¹ Da nigá gunná Jesús, bchálaje' ca naca chee Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábage' Le'. Naque' tu benne' chazrinna ca' dxusede Jesús.

7

Benne' biche Jesús quebe dxeléajle'e chee'

¹ Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío

blau zaj zre'e na' xelútię' Le'. ² Ba za laní gate judío ca' dxelezúe' lu xu'u laga' ca'. ³ Chee le na' bi biche Jesús gulé'e Le':

—Quebe xegá'anu' nigáze. Bexíaj Judea, chee cá'anqueze benne' ca' dxeléajle chiu' zaj zre'e na' gaca xeelé'ene' ca da dxunu'. ⁴ Che nu benne' dxaca lazre' xelúnbe'e bénneache le', quebe dxunę' da ca' bagácheze. Lawe' da dxunu' Lue' da caní, beŋ na lau xúgute bénneache.

⁵ Caní gulenné' lawe' da quebe dxeléajle benne' biche' ca' chee Jesús. ⁶ Nadxa Jesús guzre' benne' ca':

—Quebe ne zrin zra cha'a na'. Chee le'e bíteteze zra waca chéajle. ⁷ Benne' ca' zaj naca chee xezr la xu nigá quebe gaca xeleguédene' le'e. Dxeleguédene' neda' lawe' da dxulé'eda' neda' naca da calęla da dxelún benne' ca'. ⁸ Le chjaca le'e laní na'. Quebe sa'a neda' na'a lawe' da quebe ne zrin zra cha'a.

⁹ Ca gudé guzre Jesús benne' ca' da nigá, na' begá'ane' naga nababa Galilea na'.

Jesús dxezrine' laní gate judío ca' dxelezúe' xu'u laga' ca'

¹⁰ Ca gudé besiá'aca benne' biche Jesús, na' cá'anqueze Le' guxíaję' laní na'. Bagácheze guxíaję' chee quebe nu le'e Le'. ¹¹ Benne' xíchaję chee judío ca' belexíaję' Jesús lu laní na'. Dxelenné':

—¿Gazra zua bénnea'?

¹² Ládujla benne' zan ca', benne' zan buluchálaję' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxezí xęe bénneache.”

¹³ Quebe nu benne' bchálaję' caníqueze ca naca chee' lawe' da dxelezrebe' da xelún benne' xíchaję ca' chee judío ca'.

¹⁴ Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'e na'. ¹⁵ Belexebane benne' judío ca', dxelenné':

—¿Ájazra na' benne' nigá da zante nézene', ne quebe bsédie' chee xudau'?

¹⁶ Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasele' neda'. ¹⁷ Che nu benne' dxaca lazre' gunę' ca da dxaca lazre' Dios, na' wanézene' che da dxusédeda' naca na chee Dios, u che dxennéa' ca da naca cheézqueza'. ¹⁸ Benne' dxuchálaję' da naca cheézqueze' dxunę' na chee xelapa bénneache le' ba lá'ana. Bénnea' dxue lazre' xelapa bénneache ba lá'ana bénnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

19 'Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrele gútele neda'?

20 Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

21 Jesús guzre' benne' ca':

—Tu xel-la' waca bena' lu zra dxupá'anale, na' xúgutele le'e dxebánele. 22 Moisés benne' da zéajlele, dxechúgule late' weaj belá' chee bel-la' dxen chee zrí'inele bi biudu ca' chee xelexegá'anabe' xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'anté. Chee le na' le'e dxechúgule late' belá' chee bel-la' dxen chee tu bi biúda' chee xegá'anabe' xrlátaje lau Dios lácala naca zra dxupá'anale. 23 Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezrá'ale neda' lawe' da bexuna' duté bel-la' dxen chee tu benne' gate naca zra dxupá'anale? 24 Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

Jesús dxuchálaje' chee naga ze'e

25 Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bénnea' dxelexílaje' chee xelútie' le'?

26 Nigá zue' dxuchálaje' lávela bénneache, na' quebe nu bi dxé Le'. ¿Zaj neze benne' xíchaje ca' da li naca benne' nigá Cristo, Bénnea' nase-la Dios? 27 Netu' nézentu' ga za' benne' nigá. Gate xida Cristo, quegá nu neze ga ze'e.

28 Jesús zue' dxusédené' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nase-le' neda' naque' li lazre', na' Bénnea' quebe núnbeale le'e. 29 Neda' núnbe'a Le' lawe' da za'a naga zua Le', na' Le' gusél-le' neda'.

30 Nadxa gulaca lazre' xelexé-le' Jesús. Quebe nu gudela Le' lawe' da quebe ne zrin zra chee xelútie' Le'. 31 Benne' zan guléajle'e chee Jesús, na' gulenné':

—Gate xida Cristo, ¿gúnljadxe' xel-la' waca zrenté ca da dxun benne' nigá?

Benne' fariseo ca' dxelesel-le' xra'aga wen zrin chee' chee xelexé-le' Jesús

32 Benne' fariseo ca' belenne' ca da dxelenná bénneache ca naca chee Jesús, na' le', ne benne' xíchaje ca' chee bxruze ca' gulesel-le' xra'aga wen zrin chee xudau' chee xelexé-le' Jesús.

33 Nadxa gunná Jesús:

—Wazúalena' le'e xetú chí'idau', na' xezrínqueza' naga zua Bénnea' gusél-le' neda'. ³⁴ Le'e wexílajle neda', na' quebe xezrélele neda', lawe' da quebe gaca sa'le naga sua' neda'.

³⁵ Nadxa benne' judío ca' gulezú lawe' dxuluchēbe ljwezre':

—¿Gazra cheaj benne' nigá, naga quebe gaca xezreldxu Le'? ¿Waxíajē' naga zaj zra' benne' judío ca' zaj nase dinnajē' ládujla benne' xezr la xu ca' chee gusédenē' benne' quebe zaj naque' judío? ³⁶ ¿Bizra zéajē' da nigá guzre' dxi'u: Wexílajle neda', na' quebe xezrélele neda' lawe' da quebe gaca sa'le naga sua' neda'?

Jesús dxuchálajē' chee xegu nisa da dxunna xel-la' nabán li lazre'

³⁷ Zra bzebe chee laní na' naca na zra blaudxa. Lu zra na' guzé Jesús, na' gunné' zizraj:

—Che nu benne' dxebílenē', dxal-la' xide' naga zua' neda', na' xí'ajē'. ³⁸ Naca na ca naxúaj na lu xiche chee Dios, dxenné': "Benne' dxéajlē'ē' chia', lu lázrdawē' galaj xegu nisa da gunna na xel-la' nabán."

³⁹ Da nigá gunná Jesús ca naca chee Be' Lá'azxa, Bénnea' xelezi' benne' ca' xeléajlē'ē' chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

Bénneache dxelaque' chupa la'a

⁴⁰ Bal-la bénneache, gate belenne' da nigá, gulenné':

—Da li benne' nigá naque' Bénnea' guchalajē' waláz chee Dios, Bénnea' dxal-la' xide'.

⁴¹ Xebal-le' gulenné':

—Benne' nigá naque' Cristo, Benne' guchēbe lazre' Dios sel-le'.

Xebal-le' gulenné':

—¿Waca Cristo benne' Galilea? ⁴² Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

⁴³ Ca'an guca, gulaca benne' ca' chupa la'a ne chee Jesús.

⁴⁴ Bal-le' gulaca lazre' xelēl-le' Jesús, na' quebe nu bexazre gunē' na.

Benne' xíchajē' ca' chee judío ca' quebe dxeléajlē'ē' chee Jesús

⁴⁵ Xra'aga wēn zrin ca' chee xudau' belexezrine' naga zaj zra' fariseo ca', ne benne' xíchajē' ca' chee bxruze ca', na' benne' caní buluchēbe' xra'aga wēn zrin ca':

—¿Bizr chee na' quebe guchēle bénnea'?

⁴⁶ Belexechēbe xra'aga wēn zrin ca':

—Quebe ne guchalaj nu bénneache ca dxuchalaj benne' nigá.

⁴⁷ Nadxa fariseo ca' gulē'ē' xra'aga wēn zrin ca':

—¿Cá'anqueze le'e beḷe lataj guzú xē'e le'e? ⁴⁸ Quebe nu ne chéajḷ chee bēnnea', benne' xíchajē caní, ne cá'anqueze benne' fariseo ca'. ⁴⁹ Benne' ca' dxelájḷe'e chee bēnnea' quebe zaj núnbe'e da nadxixruj bea na, ne zaj nabía xi'e.

⁵⁰ Nicodemo, bēnnea' guxíajē' xeajnné'e Jesús chizrela naque' tu benne' fariseo ca', na' guzre' benne' ca':

⁵¹ —Cateze dxenná da nadxixruj bea cheedxu quebe gaca guzría xidxu tu benne' che quebe ne xénedxu xechebe' chee nézedxu che bi da nabague'e.

⁵² Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalajē' waláz chee Dios quebe ne gálajē' naga nababa Galilea, naga zaj zra' bēnneache quebe zaj naca xánnie' judío.

⁵³ Nadxa tu tu benne' ca' xeajxaque' lizre'.

8

¹ Na' Jesús guzé'e zéajē' lu Xi'a Xaga Olivo.

Jesús dxuchálajḷenē' tu nu'ula dxunē' dul-la dxíchajē' xrba chee xel-la' nuchaga na'

² Zra xula, gate guxaní', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawe' dxusédene' benne' ca'. ³ Nadxa benne' ca' dxuluxuzájḷe'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxunē' dul-la dxíchajē' xrba chee xel-la' nuchaga na'. Buluzé' nu'ula na' laduj benne' zaj zre'e na', ⁴ na' gulé'e Jesús:

—Benne' Wesede, nu'ula nigá blé'entu' le' dxunē' dul-la dxíchajē' xrba chee xel-la' nuchaga na'. ⁵ Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxennáu' Lue'?

⁶ Caní gulenná benne' ca' chee xuludxixre' Jesús chee xelezéquene' xelagu zria Le'. Nadxa gudxé' luche Jesús, ne guzú lawe' dxuzúajē' lu xu nen zrube ne'e. ⁷ Benne' ca' buluchébequeze' Jesús, na' Le' bezé' dxē'e benne' ca':

—Nútetezlale le'e quebe nabágale dul-la, waca su laule güele nu'ula nigá xiaj.

⁸ Na' bebé' luche Jesús, ne bzúajqueze' lu xu. ⁹ Benne' ca', gate belenne' da nigá, quebe bzua xichaj lázrdawe' le' zrize, na' belexedxúajē' tu weajē'. Belexedxúaj za'a benne' gúladxá, na' ca' belexedxúaj xúgute benne' ca' dxelagu zriē' nu'ula', na' begá'ana Jesús tuze' nen nu'ula na', ze' laduj benne' ca' dxuluzé' nague' chee'. ¹⁰ Nadxa bezé' Jesús, ne gate québedxa nu'ula benne' ca' ble'e Jesús, benne' dxulagu zriē' nu'ula na', nadxa guzre' le':

—Nu'ula, ¿gazra na' benne' ca' gulagu zrië' lue'? ¿Quebe nu chilá' benne' guzría xi'ë lue'?

¹¹ Nu'ula na' gunné':

—Quebe nu chilá', Xran.

Nadxa Jesús guzrë' nu'ula na':

—Cá'anqueze neda', quebe guzría xi'a lue'. Bexíaj, ne québedxa gunu' dul-la.

Jesús dxusení'ë lu xichaj lázxdau bénneache

¹² Bchálajle Jesús benne' ca' xecha lasa, gunné':

—Neda' naca' xel-la' naxaní' cheë lu xichaj lázxdau bénneache. Benne' dxedálëne' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxe' lu da chul-la cheë dul-la da zaj nabague'.

¹³ Nadxa benne' fariseo ca' gulé'ë Le':

—Lue' dxexechebu' cheézquezu', na' da dxexechebu' quebe bi zaca na.

¹⁴ Bechebe Jesús:

—Da dxexecheba' zaca na lácala néda'queza' dxexecheba' cheézqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. ¹⁵ Le'e dxuchi'ale cáteze dxenná xichaj lázrdaule. Bla'a neda', quegá cheë guchi'a ca da dxun nu benne'. ¹⁶ Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasele' neda' dxuchi'ë tu zren nen neda' ca naca da dxelún bénneache. ¹⁷ Lu da nadxixruj bea cheële le'e naxúaj gate zaj zra' chupa benne' dxelexechebe' tuz ca dxelenné', naca da li xrtizra' benne' ca'. ¹⁸ Néda'queza' dxexecheba' da naca cheézqueza', na' Xra' nasele' neda', cá'anqueze dxexechebe' chia'.

¹⁹ Nadxa benne' ca' buluchebe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

²⁰ Da caní bchalaj Jesús dxácatë na' dxusédene' bénneache chale'aj xudau' naga zaj nnita xi'ina dumí cheë xudau'. Quebe nu gudëla Le' lawe' da quebe ne zrin zra cheë'.

Dxenná Jesús: "Naga cha'a neda' quebe gaca sa'le le'e"

²¹ Nadxa Jesús guzrë' benne' ca':

—Wexá'a neda', na' le'e xexílajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

²² Nadxa benne' judío ca' gulé' ljwezrë':

—¿Gute cuine', ne cheë le' na' dxenné' quebe gaca chéajdxu naga cheaj Le'?

²³ Nadxa Jesús guzrë' benne' ca':

—Le'e nácale chee zran xabáa nigá. Neda' naca' chee xabáa na'la. Le'e nácale chee xezr la xu nigá. Neda' quebe naca' chee xezr la xu nigá. ²⁴ Chee le na' gucha' le'e wátele lu dul-la nabágale, lawe' da che quebe dxéajle zúaqueza' neda', wátele lu dul-la nabágale.

²⁵ Nadxa benne' ca' buluchēbe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudaute. ²⁶ Déle'e da dxalla' nnia' cheele, ne da dxalla' guchi'a ca naca da dxunle. Bénnea' gusel-le' neda' dxenné' da li, na' da dxapa' bēneache naca na da ba benda' gunné Le', lácala quebe dxezaca ba lázrele na.

²⁷ Benne' ca' quebe guléajni'ine' dxuchálajle Jesús le' ca naca chee Dios, Xre'. ²⁸ Nadxa Jesús guzre' benne' ca':

—Gate le'e chísale sibe neda', Benne' Gulje' Bēneache, nadxa xúnbeale zúaqueza' neda', ne quebe bi dxuna' da naca cheézqueza'. Tuzé dxennéa' ca da ba ble'e Xra' neda'. ²⁹ Bénnea' gusel-le' neda' zúalequeze' neda'. Xra' quebe nucá'angé' neda' tuza' lawe' da tu dxúnzqueza' ca da dxezaca ba lazre' Le'.

³⁰ Ca gunná Jesús da caní, guléajle benne' zan chee'.

Benne' zaj naque' chee Dios, ne benne' ca' nuxru dul-la le'

³¹ Nadxa Jesús guzre' benne' judío ca', benne' dxeléajle'e chee':

—Che le'e se típale lu da dxapa' le'e, da li nácale neda' tuze.

³² Gúnbeale da li, na' da li na' guselá na le'e.

³³ Belexechebe benne' zan ca':

—Netu' nácantu' xrtia Abraham, ne quebe ne chú'untu' lu na' nu benne' ca benne' zaj nada'u. ¿Bizr chee na' dxennáu' Lue' lantu'?

³⁴ Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'. ³⁵ Nu benne' xu'e lu na' tu benne' ca benne' nada'u quebe tu súazqueze' xu'u na'. Zrí'inequeze bēne' wazúatequezebe'. ³⁶ Chee le na', che neda', Zrí'ine Xra', guselá' le'e, da li láqueze le'e. ³⁷ Nezda' nácale le'e xrtia Abraham. Na'a dxaca lázrele gútele neda' lawe' da quebe dxezí' lu na'le da dxapa' le'e. ³⁸ Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

³⁹ Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. ⁴⁰ Lácala gucha' le'e da li da ble'e Xra' neda', le'e

dxaca lázrele gútele neda'. Abraham cabata' benē' da caní.

⁴¹ Le'e dxúnquezle ca da dxun xráquezle.

Nadxa benne' ca' gulé'ē Jesús:

—Netu' quebe nácantu' bi lan. Zua tuze Xrantu', Dios.

⁴² Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasel-le' neda'. ⁴³ ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'. ⁴⁴ Xráquezle le'e naca da xriwe'. Le'e nácale chee da na', ne dxaca lázrele gunle ca da dxaca lazre' le na. Da xriwe' na' naca na wete benne' nédxudautē. Cabata' dxenné na da li lawe' da quebe bi zua da li nen le na. Gate dxun lazre' na, dxenné na cáteze naca na, lawe' da tu dxun lázrezqueze na, ne naca na da guzú lau na ben lazre' na. ⁴⁵ Lácala dxapa' le'e da li, le'e quebe dxéajlele chia'. ⁴⁶ ¿Núlale le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajlele chia'? ⁴⁷ Benne' naque' chee Dios dxenne' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

Cristo ba zúaqueze' nédxudxa ca Abraham

⁴⁸ Nadxa benne' judío ca' gulé'ē Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

⁴⁹ Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala. ⁵⁰ Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'ē ca da dxunle. ⁵¹ Da li dxapa' le'e: Benne' dxunē' ca naca dizra' chia', cabata' gátequeze bénnea'.

⁵² Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgutē benne' ca' buluchálaje' waláz chee Dios, na' lue' dxennáu' benne' gunē' ca naca dizra' chiu' cabata' gátequeze'. ⁵³ ¿Nácadxu' szrendxa ca xra xrtáudxu Abraham? Gútequeze Le', ne cá'anqueze gulate benne' ca' buluchálaje' waláz chee Dios. ¿Bízraqueze dxugune cuinu'?

⁵⁴ Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénnea' dxennale le'e naque' Xrale. ⁵⁵ Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. ⁵⁶ Xra xrtáule Abraham, bénnea' gutiē' nédxudautē,

gubélē'ēne' lawe' da dxal-la' lé'ene' zra zua neda'. Blé'ene' na, na' gubélē'ēne'.

⁵⁷ Nadxa benne' judío ca' gulé'ē Jesús:

—Québequeze ne su' chi xun iza, na' ¿dxennáu' blé'enu' Abraham?

⁵⁸ Jesús bechebe':

—Da li dxapa' le'e, nédxudautē gate quebe ne sua Abraham, báchequeze zua' neda'.

⁵⁹ Nadxa gulequē'ē xiaj chee xelu'ē Jesús, na' Lē' bcache cuine'. Bdeē' ládujla benne' ca', na' bedxúajē' chale'aj xudau', ne bezé'ē.

9

Jesús dxexunē' tu benne' gúlajē' la chul-la

¹ Gate gudé Jesús tu lataj, na' blé'ene' tu benne' gúlajē' la chul-la. ² Benne' ca' dxusede Jesús buluchebe' Lē':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'ē dul-la, che lawe' da ben léqueze' dul-la?

³ Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'ē dul-la. Naca na chee gulé'e lau xella' szren chee Dios ne chee benne' nigá. ⁴ Dxácatē naca te zra dxal-la' guna' zrin chee Bénnea' nasel-le' neda' lawe' da ba za da chul-la gate netú benne' quebe seque' gunē' zrin. ⁵ Dxácatē ne zua' neda' xēzr la xu nigá, naca' xel-la' naxaní' chee bēneache.

⁶ Ca gudé gunná Jesús da nigá, na' bzre'ē zrene' lu xu, ne bene' guna' nen zrene' na', na' btupe' na xiaj lau benne' la chul-la na'. ⁷ Nadxa guzre' le':

—Guxíaj xejtibe lau' lu beaj nisa nazí le na Siloé. (Dizra' nigá zéajē na: Da Nasel-la Na.)

Benne' la chul-la na' guxíajē' xejtibe lawē', na' gate bezrine' ba dxelé'ene'. ⁸ Nadxa benne' walíZR chee' ca', ne benne' ca' belelé'ene' le' nédxula, naque' la chul-la, gulenné':

—¿Quegá benne' nigá bēneea' dxebé'ē dxenabe' guna'?

⁹ Bal-le' gulenné':

—Lē' na'.

Xebal-le' gulenné':

—Quegá le' na', na' ca'an ca dxenné'ē.

Benne' ná'queze gunné':

—Neda' na'.

¹⁰ Nadxa buluchebe' le':

—¿Ájazra na' ba dxelé'enu'?

¹¹ Bechebe bēneea':

—Bénnea' le' Jesús bene' guna', ne btupe' na xiaj lawa', na' gunné': "Guxíaj beaj nisa nazí le na Siloé, xeajtibe lau'." Guxá'a na', na' gate gudiba' lawa', guca ble'eda'.

¹² Nadxa buluchebe' le':

—¿Ga na' zua bénnea'?

Le' guzre' benne' ca':

—Quebe nezda'.

Benne' fariseo ca' dxuluchebe' bénnea' guque' la chul-la

¹³ Nadxa benne' ca' guleché'e bénnea' guque' la chul-la lau benne' fariseo ca'. ¹⁴ Naca na zra dxulupá'ana judío ca' gate ben Jesús guna', ne btupe' na xiaj lau benne' la chul-la na'.

¹⁵ Chee le' na' benne' fariseo ca' buluchebe' bénnea' guque' la chul-la ájazra guca dxelé'ene'. Le' guzre' benne' ca':

—Bzrie' guna' xiaj lawa', na' bexiba' na, ne dxelé'eda'.

¹⁶ Nadxa bal-la benne' judío ca' gulenné':

—Bénnea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-le' gulenné':

—¿Ájazra na' dxune' xel-la' waca zrente' caní che naque' benne' dul-la?

Ca'an guca, gulaca chupa la'a benne' fariseo ca'. ¹⁷ Xecha lasa buluchebe' bénnea' guque' la chul-la:

—¿Bi dxennáu' lue' chee bénnea' bexune' lue'?

Le' gunné':

—Neda' dxennéa' naque' benne' dxuchalaje' waláz chee Dios.

¹⁸ Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bénnea' bexaque'. ¹⁹ Na' buluchebe' xra xrna bénnea':

—¿Náaqueze benne' nigá zrí'inele, dxennale le'e gúlaje' la chul-la? ¿Ájazra na' dxaca dxelé'ene'?

²⁰ Belexechebe xra xrne'e:

—Nézentu' benne' nigá naque' zrí'inentu', ne gúlaje' la chul-la. ²¹ Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe le'. Ba nápaqueze' iza, ne waca xechébequeze'.

²² Caní gulenná xra xrne'e lu xel-la' dxelezrebe lawe' da ba zaj nun benne' xíchaje chee judío ca' tuze dizra' xelexebéaje' xu'u na' núteteze benne' xechébe' Jesús naque' Cristo. ²³ Chee le' na' gulenná xra xrne'e: "Le guchebe le'. Ba nápaqueze' iza."

²⁴ Nadxa benne' judío ca' belenné' bénnea' guque' la chul-la, na' gulé'e le':

—¿Gunné' da li lau Dios! Nézentu' naca benne' nigá benne' dul-la.

²⁵ Le' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

²⁶ Na' buluchébequeze' le':

—¿Bizra bene' chiu'? ¿Ájazra bene' chee bexune' xiaj lau'?

²⁷ Na' bechebe bènea':

—Ba gucha' le'e, ne quebe dxénele chia'. ¿Bizr chee na' dxaca lázrele nnia' xetú? ¿Cá'anqueze le'e dxaca lázrele gácale Le' tuze?

²⁸ Nadxa benne' judío ca' gulenné' schanni' chee bènea' guque' la chul-la, dxelenné':

—Lue' da'u bènea', na' netu' da'ntu' Moisés. ²⁹ Netu' nézentu' Dios bchálajlene' Moisés. Quebe nézentu' ga benne' benne' nigá.

³⁰ Nadxa bènea' bechebe':

—Da nigá naca na da dxebáneda'. Le'e quebe nézele ga bènea', na' bexune' xiaj lawa'. ³¹ Nézquezdxu Dios quebe dxenne' chee benne' dul-la. Tuze dxenne' chee benne' ca' dxulucá'ana szrene' Le', ne dxelune' ca da dxaca lazre' Le'.

³² Quebe ne xendxu che nu benne' xexune' tu benne' gúlajé' la chul-la. ³³ Chela benne' nigá quebe naque' chee Dios, quebe gaca bi gune'.

³⁴ Nadxa gulé'e le':

—Ca gúlajquezu' dxulé'e na nabagu' dul-la. Na'a, ¿dxaca lazru' guzéajni'inu' netu'?

Nadxa belexebéaje' le' lu xu'u na'.

Benne' zaj naque' la chul-la lu xichaj lázrdawe'

³⁵ Jesús benne' belexebéaje' bènea' guque' la chul-la, na' gate bezrague' le', guzre' le':

—¿Dxéajle'u lue' chee Zri'ine Dios?

³⁶ Benne' na' guzre' Jesús:

—Xran, guzre neda' Nu na', chee chéajle'a chee'.

³⁷ Bechebe Jesús:

—Ba blé'equeznu' Le'. Neda', dxuchálajlena' lue' naca' Bènea'.

³⁸ Nadxa benne' na' bzu zribe' lau Jesús, na' gunné':

—Dxéajle'a chiu', Xran.

³⁹ Nadxa gunná Jesús:

—Neda' bla'a lu xezr la xu nigá chee guchi'a ca da dxelún bèneache, chee xeledé'e la chul-la ca', ne chee xelexaca ca la chul-la benne' ca' dxelenné' dxeledé'ene'.

⁴⁰ Nadxa bal-la benne' fariseo ca', benne' zaj zre'e nen Jesús, gate belenne' da nigá gunná Jesús, buluchébe' Le':

—¿Cá'anqueze netu' nácantu' la chul-la?

⁴¹ Jesús bechebe':

—Chela nácale le'e la chul-la quebe nabágale ca naca dul-la da benle. Dxennale dxelé'ele, na' chee le' na' nabágale dul-la.

10

Dxuchalaj Jesús da dxulé'e na ca naca chee le'aj chee zrila' ca'

¹ Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee le'aj chee zrila' ca', na' dxu'e naga xula, naque' gubán, ne tu dxebánqueze'. ² Bénnea' dxu'e dxu'a dxa xu'u na' naque' benne' dxuxúequeze' zrila' ca'. ³ Bénnea' zu'e dxu'a dxa xu'u dxesálaje' chee chu'u bénnea' dxuxúequeze'-ba', na' zrila' ca' dxelexúnbeaba' chi'e. Benne' nigá dxu'e la tu tu zrila' ca', ne dxebéaje'-ba' lu le'aj cheeba'. ⁴ Ca dxedé dxebéaje' xúgute'ba', na' dxebíá lawe' lauba', na' zrila' ca' zjácale'ba' Le', lawe' da dxelexúnbeaba' chi'e. ⁵ Quebe zjácale'ba' tu benne' quebe zaj núnbeaba'. Dxuluzrúnnujba' lau benne' na' lawe' da quebe dxelexúnbeaba' chi'i benne' quebe zaj núnbeaba'.

⁶ Bchálajle Jesús benne' ca' da dxulé'e nigá, na' benne' ca' quebe guléajni'ine' bi zéaje da guzre Jesús le'.

Jesús naque' benne' chawe' dxuxúe' zrila' ca'

⁷ Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca zrila' chia' ca'. ⁸ Xúgute' benne' dxuluxúe' zrila', benne' belelé'e nédxudxa ca neda', gulaque' gubán, ne tu gulebánzqueze'. Zrila' ca' quebe beléneba' chee benne' ca'. ⁹ Neda' naca' dxa xu'u. Bénnea' chu'e ne chia' neda', láqueze bénnea'. Gaque' ca tu zrila' dxu'uba', ne dxuajba' le'aj cheeba', na' dxezréleba' zri'edu dxáguba'.

¹⁰ Benne' gubán ze'e tuze chee cuane'-ba', ne chee gútete'-ba, ne chee guzríá xi'te'-ba'. Neda' bla'a chee gápale xel-la' nabán, ne chee gapa xánnele na. ¹¹ Neda' naca' benne' chawe' dxuxúa' zrila' ca'. Benne' chawe' dxuxúe' zrila' ca' dxuzúe' xel-la' nabán chee' chee guselé' zrila' ca'. ¹² Benne' dxuxúe'-ba' lawe' da dxezi'e lazruj, gate dxelé'ene' za becu' xi'a, na' dxusane' zrila' ca', ne dxuzrúnnuje', lawe' da quebe nácaqueze' benne' dxuxúe' le'ba', na' zrila' ca' quebe zaj nácaba' be' cheézqueze'. ¹³ Benne' nigá dxuzrúnnuje' lawe' da dxunze' zrin chee si'e lázruje', na' quebe dxe'e gunne xue cheeba'.

¹⁴⁻¹⁵ Neda' naca' benne' chawe' dxuxúa' zrila' ca'. Cáteze núnbea Xra' neda', na' neda' núnbe'a Xra', cá'anqueze neda' núnbe'a zrila' chia' ca', na' le'ba' zaj núnbeaba' neda'. Neda' dxuzúa' xel-la' nabán chia' chee guselá' zrila' ca'. ¹⁶ Cá'anqueze zaj zra' zrila' chia' quebe zaj zraba' lu le'aj nigá. Dxal-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' le'ba'.

¹⁷ Xra' nazrí'ine' neda' lawe' da dxuzúa' xel-la' nabán chia', na' xecá'a na. ¹⁸ Quebe nu seque' cua xel-la' nabán chia'. Neda'

xuzúa' na cáteze dxaca lázrequeza' neda'. Napa' xel-la' dxenná bea guzúa' na, ne chee xecá'a na. Da nigá naca na da gunná be'e Xra' neda' guna'.

¹⁹ Gate benne' judío ca' belenne' dizra' caní, na' gulaque' chupa la'a xetú. ²⁰ Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

²¹ Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la?

Dxuluzúa benne' judío ca' Jesús chalá'ala

²² Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios. ²³ Jesús dxedé' chale'aj xudau' na' naga naca lachila chee Salomón. ²⁴ Nadxa benne' judío ca' guléchajé' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátégala.

²⁵ Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. ²⁶ Le'e quebe dxéajlele chia' lawe' da quebe nácale zrila' chia', ca ba gucha' le'e nédxula. ²⁷ Zrila' chia' dxelexúnbeaba' chí'a, na' neda' núnbe'a-ba', na' leba' dxe-lauba' neda'. ²⁸ Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebía xi'e, na' quebe nu seque' xecá'a le' lu na'a neda'. ²⁹ Xra' benne' neda' benne' caní, na' Le' nácadxe' szren ca xúgute bénneache, na' quebe nu seque' xecá'a benne' ca' lu na' Xra'. ³⁰ Neda', ne Xra' tuze nácantu'.

³¹ Nadxa benne' judío ca' gulequé'e xiaj xetú chee xelútie' Jesús. ³² Nadxa Jesús guzre' benne' ca':

—Ba bénqueza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

³³ Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bénneache, na' dxun cuinu' Dios.

³⁴ Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'. ³⁵ Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulezí'e xrtizre' zaj naque' dios ca'. ³⁶ Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? ³⁷ Che quebe dxuna' ca naca da dxun

Xra', quebe chéajlele chia'. ³⁸ Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

³⁹ Xetú lasa gulaca lazre' xelēl-le' Jesús, na' Le' gulé' lu na' benne' ca'.

⁴⁰ Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bēneache nisa. ⁴¹ Benne' zan xjaque' xeajlenné'e Jesús, na' gulenné':

—Juan, da li quebe bi xel-la' waca zren bene', na' xúgute da gunné' ca naca chee benne' nigá naca na da li.

⁴² Benne' zan guléajle'e chee Jesús lataj na'.

11

Ca guca gate gute Lázaro

¹ Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta. ² María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelále'e zixre, ne bsebize' na nen xicha xíchaje'.

³ Dxúpatē nu'ula caní gulesel-le' benne' xeajeze' Jesús:

—Xran, bēneea' nazrí'inu' quebe chawe' zue'.

⁴ Ca ben Jesús da nigá, na' gunné':

—Da dxé'ene' quebe naca na da gútete na le'. Naca na chee gulé'e lau na xel-la' szren chee Dios, ne cá'aqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

⁵ Lácala nazrí'i Jesús Marta, ne bi bile', ne Lázaro, ⁶ gate benne' quebe chawe' zua Lázaro na', begá'ane' naga zue' xechupa zra. ⁷ Ca gudé na' guzre' benne' ca' dxusédené':

—Le chu'u naga nababa Judea xetú.

⁸ Nadxa benne' ca' gulé'e Le':

—Benne' Wesede, ná'asca benne' judío ca' zaj zre'e na' gulaca lazre' xelútiē' Lue' nen xiaj. ¿Dxaca lazru' chéaju' na' xetú?

⁹ Jesús guzre' benne' ca':

—¿Quebe nun Dios dute te zra gate dxelún bēneache zrin? Che nu benne' dxedé' te zra, quebe cheajchazie' lu da stebe lawe' da dxelé'ene' xel-la' naxaní' da nuzúa Dios lu xezr la xu nigá. ¹⁰ Che nu benne' dxedé' chizrela, dxechégüe' lawe' da quebe zúale xel-la' naxaní' le'.

¹¹ Ca gudé na' guzre Jesús benne' ca':

—Benne' ljwézredxu Lázaro ba dxásiē'. Cha'a neda' cheajsebana' le'.

¹² Nadxa benne' ca' gulé'e Jesús:

—Xran, che dxásiē', wexaque'.

13 Da nigá da gunná Jesús zéaje na ba gute Lázaro. Benne' ca' dxusédene' guléquene' gunná Jesús dxáseze'. 14 Nadxa Jesús bzéajni'ine' benne' ca', gunné':

—Ba gútequeze Lázaro. 15 Dxebeda' lawe' da quebe zua' na'. Caní gácadxa chawe' chee le'e, chee chéajle chia'. Le chu'u cheajnnadxu Lázaro.

16 Nadxa Tomás, bénnea' léqueze' bilide', guzre' xezícala benne' ca':

—Le ch́u'queze dxi'u chee gátedxu tu zren nen Jesús.

Jesús naque' benne' dxusebane' benne' gate ca', ne benne' dxunne' dxi'u xel-la' nabán li lazre'

17 Gate belezrine' xezre Betania, na' bene Jesús gudapa zra bulucache' Lázaro. 18 Betania dxe' na gáguze naga dxe' Jerusalén, ca cadite sadxu tu chí'idau'ze zrindxu na', 19 na' benne' zan benne' judío ca' xjaque' xeajlenné'e Marta ne María, na' xulunézruje' le' xel-la' zren lazre' lawe' da gute bi zane'. 20 Gate ben Marta ba za' Jesús, na' guzé'e zeajxrigale' Le', na' María begá'ane' xu'u. 21 Marta guzre' Jesús:

—Xran, chela zu' nigá, quebe gute bi zana'. 22 Neda' nezda' Dios gunne' Lue' bíteteze da nabu'.

23 Jesús gunné':

—Webán bi zanu'.

24 Nadxa Marta guzre' Le':

—Nezda' webane' lu zra xelexebán benne' gate ca', zra bzebe na'.

25 Nadxa gunná Jesús:

—Neda' naca' benne' dxusebáne' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lácala gatie', webane', 26 na' xúgute benne' zaj naca bane', ne dxeléajle'e chia', québequeze xelatíe' tu chí'ize. ¿Dxéajle'u da nigá?

27 Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

Jesús dxebezre' lawe' da zaj zua baxache' nu'ula ca'

28 Ca gudé gunná Marta da nigá, na' guxíaje' xeajzenne' bi bile' María, na' guzre' le' zrize:

—Ba bla' Benne' dxusede, ne dxenné' lue'.

29 Ca ben María da nigá, na' guxase' guzé'e, xeajnné'e Jesús.

30 Jesús quebe ne chu'e xezre na', na' zue' naga bezraga Marta Le'. 31 Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácale benne' caní le', dxeléquene' zéaje' dxu'a ba zeajchezre' na'.

32 Gate bzin María naga zua Jesús, na' bzu zribē' zran ni'a Jesús, gunné':

—Xran, chela zu' nigá, quebe gute bi zana'.

33 Gate ble'e Jesús dxebezre María, ne cá'anqueze dxelebezre judío ca', benne' zjácalēne' María, na' bexíajle'ēne', ne guzúe' stēbe lu lázrdawē'. 34 Na' bchēbe' benne' ca':

—¿Ga bcáchele bēnea'?

Na' gulé'e Le':

—Xran, gudá le'enu'.

35 Na' gudxezre Jesús. 36 Nadxa gulenná benne' judío ca':

—Le nna'xque cátitē nazrí'ine' le'.

37 Bal-la benne' ca' gulenné':

—Benne' nigá bexunē' benne' la chul-la. La zuē' nigá, ¿quebe guzéquene' ájala gunē' cheē quebe gute Lázaro?

Jesús dxusebanē' Lázaro

38 Jesús guzúe' stēbe xetú, na' bzrine' dxu'a ba. Ba na' naca na tu bluaj, na' da' tu xiaj ta'a dxu'e na. 39 Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bēnea' tula, lawe' da ba guca tapa zra na'a gutie'.

40 Na' Jesús gunné':

—¿Quebe gucha' lue' che chéajle'u chia', walé'enu' xel-la' szren cheē Dios?

41 Nadxa belexequē'e xiaj ta'a na'. Jesús guné'e xabáa, gunné':

—Xrae, dxapa' Lue': "Xcalenu'" lawe' da ba bennu' chia'.

42 Neda' nezda' tu dxénzquezenu' chia'. Dxennéa' da nigá cheē gaca tu da ba neza cheē benne' caní, cheē xeléajle'e chiu' nase-lu' neda'.

43 Ca gudé gunné' da nigá, na' gunné' zizraj:

—¡Lázaro, bedxúaj nigá!

44 Bedxúaj benne' gate na', nadxéaj ni'a ne'e nen ládxe'dau' da buluchelē' ni'a ne'e, na' lawē' dxela na ladxe'. Jesús guzre' benne' ca':

—Le xesezre', ne le gusanē' xexíaje'.

Benne' dxeledábaguē' Jesús dxelunē' tuze dizra' xelēl-le' Le' (Mt. 26.1-5; Mr. 14.1-2; Lc. 22.1-2)

45 Nadxa guléajle benne' zan cheē Jesús, benne' judío ca' xjácalē María, ne belelé'ene' ca da ben Jesús. 46 Bal-la benne' ca' xjaque' xejlechálajle' benne' fariseo ca', na' buluzenne' le' ca da ben Jesús. 47 Nadxa fariseo ca', ne benne' xíchaje' ca' cheē bxruze ca' belezraguē' nen benne' xu'u lawe' blau cheē judío ca', na' gulenné':

—¿Ajazra gundxu? Benne' nigá dxúnle'e xel-la' waca da za xabáa. ⁴⁸ Che ca' güedxu Le' lataj, xúgutę bénneache xeleajlé'e chee' chee xuluzúe' Le' ca wenná bea, na' xeledá' benne' Roma ca', benne' zjaque' wedil-la, na' xuluzría xi'e xudau' cheedxu, ne xezr la xu cheedxu.

⁴⁹ Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, ⁵⁰ ne quebe dxeque be'ele gácadxa chawe' cheedxu gate' tuze benne' ne chee xezre nigá, ne quegala ca naca xezr la xu nigá cuía xi na.

⁵¹ (Quegá gunná Caifás da nigá cheézqueze'. Lawe' da naque' bxruze blau iza na', bchálaje' waláz chee Dios, gunné' gate' Jesús ne chee xezr la xu judío. ⁵² Quegá gatie' tuze ne chee xezr la xu naze. Cá'anqueze chee xutupe' lu na' Dios xúgutę benne' zaj naque' chee Dios, benne' zaj nase dínnaje', benne' ca' zaj nababe' xúgutę cue' xezr la xu.) ⁵³ Ca'an guca, ca lu zra na'tę benne' judío wenná bea ca' belune' tuze dizra' xelútie' Jesús.

⁵⁴ Chee le' na' Jesús québedxa gudé' naga zaj zra' benne' wenná bea ca' chee judío ca', na' guzé'e naga nababa Judea, na' guxíaje' xezre Efraín naga zua gáguze tu le'e xixre' lawe' lataj. Begá'ane' xezre na' nen benne' ca' dxusédene'.

⁵⁵ Ba zua gáguze zrin Laní Pascua chee judío ca', na' benne' zan chee xezre ca' xjaque' Jerusalén chee xulucá'ana chawe' cuine' nédxudxa ca zrin Laní Pascua. ⁵⁶ Guledé' dxelexíaje' Jesús, na' gate zaj zre'e chale'aj xudau' na', bu-luchebe ljwezre':

—¿'Ajazra dxéquele? ¿Wide' laní, che quebe xide'?

⁵⁷ Benne' fariseo ca', ne benne' xíchaje' ca' chee bxruze ca' ba gulebéaje' dizra' che nu benne' ca' nézene' ga zua Jesús, na' xelé'e benne' ca' chee gaca xelél-le' Le'.

12

María dxugu'e da dxelá zixre ni'a Jesús

(Mt. 26.6-13; Mr. 14.3-9)

¹ Xrupa zra nédxudxa gate za chu'u Laní Pascua chee judío ca', guxíaj Jesús xezre Betania naga zua Lázaro, bénnea' bsebán Jesús ládujla benne' gate'. ² Lu xezre na' belune' tu xrche', chee gulape' ba lá'ana Jesús. Marta bdee' xel-la' wagu, na' Lázaro dxé'lene' benne' ca' dxelágulene' Jesús. ³ Nadxa María guqué'e tu xia da za da dxelále'e zixre, da naca na chee dusén lase, da zácale'e na, na' gulu'e da za na' ni'a Jesús, ne bsebize' na nen xicha xíchaje'. Ca naca benne' zaj zra' xu'u na' gulelé'ene' ca dxelá da zixre na'. ⁴ Nadxa Judas Iscariote, zri'ine Simón, tu

benne' ca' dxusede Jesús, ne naque' bënnea' gudée' Jesús lu na' benne' guledábage' Le', gunné':

⁵ —¿Bizr chee na' quebe gudá'u da zixre na', na' sidxu na dumí lazruj chee chunna gaxúa zra chee gácaledxu benne' xache' ca'?

⁶ Quebe gunná Judas da nigá lawe' da dxe'e gunne xue chee benne' xache' ca'. Naque' gubán, ne nu'e bzude dumí chee benne' ca' dxusede Jesús, ne dxebane' late' weaj dumí na' da dxuluzré'e lu bzude na'. ⁷ Nadxa Jesús guzre' Judas na':

—Be lataj nu'ula nigá lawe' da bene' da nigá chee dxucá'ana chawe' neda' chee gate xulucache' neda' lu xedxu ba. ⁸ Benne' xache' ca' tu zrázqueze' ládujla le'e. Neda' quebe tu súazqueza' nen le'e.

Dxelunē tuze dizra' xelútiē' Lázaro

⁹ Zane' benne' judío ca' belenne' zua Jesús xezre Betania, na' xjaque' na', quegá tuze zeajlenné'e Jesús. Cá'anqueze zeajlenné'e Lázaro, bënnea' bsebán Jesús ládujla benne' gate ca'. ¹⁰ Nadxa benne' xíchaje ca' chee bxruze ca' belunē' tuze dizra' cá'anqueze xelútiē' Lázaro, ¹¹ lawe' da ne chee Lázaro benne' zan benne' judío ca' dxelebéaj xíchaje' bxruze ca' chee xeajlé'e chee Jesús.

Dxexú'u Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xezre na'. ¹³ Nadxa gulechugue' zina', na' xjaque' xeajlexrígale' Jesús, ne dxelenné' zizraj:

—¡Gaca ba lá'azxa Dios! ¡Ba neza zrentē naca na chee Benne' ze'e waláz chee Xránadxu Dios! ¡Ba neza zrentē naca na chee Wenná Bea chee xezre Israel!

¹⁴ Jesús xeajxraque' tu burro, na' guzriē'-ba', ca naxúaj na lu xiche chee Dios, dxenná na:

¹⁵ Quebe zrébele le'e, benne' zre'e xezre Sión.

Le nna'xque, ba za' Wenná Bea chee.

Zrie' tu burro.

¹⁶ Nédxute benne' ca' dxusede Jesús quebe guléajni'ine' da na' dxaca na. Ca gudé na', gate begá'ana szren Jesús lau Dios, na' xeajlesá lazre' xúgute da caní zaj naxúaj na lu xiche chee Dios ca naca chee Jesús, na' ca'an guca chee'.

¹⁷ Benne' ca' zaj zre'e nen Jesús gate gunné' Lázaro lu xedxu ba, ne bsebane' le' ládujla benne' gate, buluzenne' bënneache Jerusalén ca da guca na'. ¹⁸ Chee le' na' benne' caní xeajlexrígale' Jesús lawe' da belenne' ca naca xel-la' waca zrentē da bene'. ¹⁹ Nadxa benne' fariseo ca' gulé ljwezre':

—Ba dxelé'ele quebe séquedxu bi gundxu. Ca naca bèneache dxelunē' Le' tuze.

Dxelexilaj benne' griego ca' Jesús

²⁰ Zaj zra' bal-la benne' griego ca' ládujla benne' ca' belezrinē' Jerusalén chee xulucá'ana szrenē' Dios lu laní na'. ²¹ Benne' caní belezrinē' lau Felipe, benne' Betsaida chee ga nababa Galilea, ne naque' Jesús tuze, na' gulata' xuene' le', dxelenné':

—Benne', dxaca lázrentu' le'entu' Jesús.

²² Felipe guxiájē' xeajezre' Andrés caní, na' xjaca dxupe' xeajleguezre' Jesús ca'. ²³ Nadxa Jesús guzre' benne' dxupa ca':

—Ba bzin zra xegá'ana szrena' neda', Benne' Gulje' Bénneache. ²⁴ Da li dxapa' le'e, tu binne zrua' xtila wegá'ana na tuze na che quebe xexruj na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. ²⁵ Benne' dxe'e gunne xue gapa chi'e xel-la' nabán chee' gunitie' na. Bénnea' dxuzúe' chalá'ala xel-la' nabán chee' lu xezr la xu nigá, gapa chi'e na, ne zrué'ene' xel-la' nabán da zeajlí canna. ²⁶ Che nu benne' dxaca lazre' gune' zrin chia', dxal-la' gaque' neda' tuze, na' gáteteze sua' neda', na' súaqueze benne' dxunē' zrin chia'. Che nu benne' dxunē' zrin chia', Xra' gape' le' ba lá'ana.

Jesús dxuchálaje' ca gaca gate gatie'

²⁷ Gunná Jesús:

—Na'a stébele'e zua'. ¿Bizra nnia'? ¿Nnia': Xrae, bselá neda' lu da dxal-la' gaca chia' na'a? Belájqueza' chee gaca chia' da caní. ²⁸ Xrae, bca'ana szren lau'.

Nadxa ben tu chi'i benne' dxenné' xabáa:

—Ba bca'ana szrena' na, ne gucá'ana szrena' na xetu'.

²⁹ Benne' ca' zre'e na' dxelennē' gulennē' guziu' gunné. Xebal-le' gulenné':

—Tu gubáz chee xabáa bchálajlene' Le'.

³⁰ Nadxa Jesús guzre' benne' ca':

—Quegá gunné chi'e na' ne chia' neda'. Gunné na ne chee le'e. ³¹ Na'a ba bzin zra guchi'a Dios chee bèneache zre'e xezr la xu nigá, na' na'a cueaj Dios chalá'ala da xriwe', da na' dxenná bea na lu xezr la xu nigá, chee québedxa nna bea na. ³² Gate xelechise' neda' lu xezr la xu nigá le'e xaga béguaj, na' neda' nnia' xúgute bèneache chee xelaque' neda' tuze.

³³ Gate gunné' caní, ble'e Jesús ca gatie'. ³⁴ Nadxa benne' zan ca' gulé'e Jesús:

—Netu' bémentu' ca da naxúaj na lu xiche chee da nadxixruj bea na da dxenná na waca bánqueze Cristo chadía chacanna.

¿Bizr chee na' dxennáu' Benne' Gulje' Bénneache xelechise' Le'?
 ¿Nuzra na' Benne' Gulje' Bénneache?

³⁵ Nadxa Jesús guzre' benne' ca':

—Xetú chí'idauze xel-la' naxaní' sua na ládujla le'e. Le ta na'a dxácatę ne zua xel-la' naxaní' nen le'e, chee quebe xrínnele, lawe' da benne' dxedé' lu da chul-la quebe nézene' ga zéaje'.
³⁶ Le cheajlé chee xel-la' naxaní' da naca' neda' dxácatę zua xel-la' naxaní' nen le'e, chee gácale tuze xel-la' naxaní' na'.

Ca gudé gunná Jesús da nigá, na' bezé'e bcache cuine' lau benne' ca'.

Benne' judío ca' quebe dxeajlé'e chee Jesús

³⁷ Lácala ble'e Jesús zane' xel-la' waca zrentę lau benne' judío ca', quegá xúgute' guleajlé'e chee', ³⁸ lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé chee dizra' cheedxu?

¿Nuzra na' ble'e Xránadxu xel-la' waca chee'?

³⁹ Ca'an guca, quebe guca xeleajlé'e chee' lawe' da caní gunnáqueze Isaías na':

⁴⁰ Dios bene' benne' ca' la chul-la, ne bene' zide' lázrdawe',

chee quebe xeledé'ene' nen xiaj lawe',

ne quebe xeléajni'ine' lu xichaj lázrdawe',

ne quebe xeledé'e lawa' neda' chee xexuna' le'.

⁴¹ Isaías na' gunné' da nigá lawe' da blé'ene' xel-la' szren chee Jesús, ne bchálaje' ca naca chee'.

⁴² Zane' benne' judío ca' guléajlé'e chee Jesús, ne cá'anqueze bal-la benne' xíchaje' ca'. Quebe belexechebe' lówela bénneache lawe' da belezrebe' da xelún benne' fariseo ca', chee quebe xelexebéaje' le' xu'u naga dxelezrague'. ⁴³ Caní belune' lawe' da beledánedxene' xel-la' ba lá'ana da dxelúe bénneache le' ca xel-la' ba lá'ana da dxue Dios le'.

Dizra' chee Jesús guchi'a na chee da dxelún bénneache

⁴⁴ Jesús gunné' zizraj:

—Benne' dxéajlé'e chia', quegá cheeza' dxéajlé'e, cá'anqueze dxéajlé'e chee Xra' nasel-le' neda'. ⁴⁵ Bénnea' dxelé'ene' neda', dxelé'equene' Xra' nasel-le' neda'. ⁴⁶ Neda', xel-la' naxaní', bla'a lu xęzr la xu nigá chee québedxa xelexegá'ana benne' dxeléajlé'e chia' lu da chul-la. ⁴⁷ Che nu benne' dxenne' dizra' chia', ne quebe dxune' ca naca na, quegá neda' guzría xi'a le', lawe' da quebe bla'a neda' chee guzría xi'a bénneache. Bla'a chee guselá' benne' ca'. ⁴⁸ Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bénnea' lu zra bzebe na'. ⁴⁹ Caní gaca na lawe' da quebe dxuchálaja' cheézqueza', lawe' da Xra' nasel-le' neda' ba gunná bé'ene'

neda' bi dxal-la' nnia', ne bi dxal-la' gusédeda'. ⁵⁰ Neda' nezda' gunná be'e Xra' neda' caní chee xezezeque bénneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

13

Jesús dxibe' ni'a benne' ca' dxusédene'

¹ Naca na zra nedxu gate za chu'u Laní Pascua chee judío ca'. Jesús ba nézene' ba bzrin zra xezé'e lu xezr la xu nigá chee xexíaje' naga zua Xre'. Nazrí'iquezne' benne' zaj naca chee', benne' zaj zre'e xezr la xu, na' na'a ba zua gulé'ene' benne' ca' tu da zrendxa da gulé'e na nazrí'ine' le'.

²⁻⁴ Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' guné' chee gudéé' Jesús lu na' benne' guledábage' Le'. Nézqueze Jesús ze'e naga zua Dios, ne dxal-la' xezrine' naga zua Dios, na' Xre' ba bnézruje' Le' dute xel-la' dxenná bea. Chee le' na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'e. ⁵ Nadxa gudé'e nisa tu zriga xia zren, ne guzú lawe' dxibe' ni'a benne' ca' dxusédene', na' bsebizre' ni'e nen ladxe' na' da nunase' dxu'a le'e.

⁶ Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

⁷ Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

⁸ Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

⁹ Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

¹⁰ Jesús guzre' le':

—Benne' ba bexuzrte guzje', tuze ni'e dxal-la' chadxe lawe' da ba naxádxexeze'. Le'e ba naxádxele, san quegá xúgutele.

¹¹ Gunná Jesús: “Quegá xúgutele”, lawe' da nézene' nu na' gudéé' Le' lu na' benne' dxeledábage' Le'.

¹² Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'e ga dxelawe', na' guzre' benne' ca':

—¿Dxéajni'ile le'e da ba bēna'? ¹³ Le'e dxēle neda': Benne'

Wesede, ne: Xran, na' caní dxal-la' nnale lawe' da caní naca'.

¹⁴ Che neda', Benne' Wesede chee, ne Xránale, ba gudiba' ní'ale, cá'anqueze le'e dxal-la' quíbele ni'a ljwézrele tule xetule.

¹⁵ Neda' ba ble'eda' le'e tu da dxulé'e na, chee gunle le'e ca da bēna' neda'. ¹⁶ Da li dxapa' le'e, tu benne' wēn zrin quebe nácadxē' szren ca xranē', na' tu benne' gubáz quebe nácadxē'

szren ca benne' nasele-łe' le'. ¹⁷ Che dxéajni'ile da caní, ne dxunle ca zaj naca na, gaca cheełe tu da ba neza.

¹⁸ 'Quebe dxuchálaja' chee xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche chee Dios, dxenná na: Benne' dxágule neda' ba gudábague' neda' chee gudé' neda'. ¹⁹ Dxapa' le'e da nigá na'a, nédxula gate quebe ne gaca na, chee gate gaca na, na' chéajlele le'e zúaqueza' neda'. ²⁰ Da li dxapa' le'e: Benne' dxezí' lu ne'e Bénnea' dxusel-łe' neda', neda' na' dxezí' lu ne'e, na' benne' dxezí' lu ne'e neda', dxezí' lu ne'e Xra' nasele-łe' neda'.

Dxenná Jesús gudé Judas Le' lu na' benne' dxeledábague' Le'
(Mt. 26.20-25; Mr. 14.17-21; Lc. 22.21-23)

²¹ Ca gudé gunná Jesús da nigá, na' guzúe' stebe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé' neda' lu na' benne' ca' dxeledábague' neda'.

²² Nadxa benne' ca' dxusede Jesús gulezú lawe' dxelenná' ljwezre', ne quebe zaj nézene' nu chee na' dxuchalaj Jesús.

²³ Tu benne' ca' dxusede Jesús, bénnea' nazrí'ile'e Jesús le', zue' cuita Jesús naga dxelawe' xrche', ²⁴ na' Simón Pedro bene' tu da dxunna bea lau bénnea' chee guchebe' Jesús nu chee na' dxenné' caní. ²⁵ Nadxa bénnea' de'e cuita Jesús bchebe' Le':

—Xran, ¿nuzra na'?

²⁶ Bechebe Jesús:

—Gusebisa' late' xeta xtila, na' bénnea' gunézruja' na, benne' ná'queze'.

Nadxa Jesús bsebiše' late' xeta xtila, na' bnézruje' na chee Judas Iscariote, zri'ine Simón. ²⁷ Ca gucá'a Judas xeta xtila na', na' da xriwe' guxú'ute na lu xichaj lázrdawe'. Nadxa Jesús guzre' le':

—Da dxal-la' gunu', bęntega na.

²⁸ Benne' ca' zaj zre'e dxelawe' na' quebe guléajni'ine' bizr chee na' guzre' Judas na' caní. ²⁹ Lawe' da nua Judas bzude' dumí, bal-le' guléquene' Jesús guzre' le' bi si'e chee laní na', u bi gunézruje' benne' xache' ca'. ³⁰ Ca gudé gudagu Judas xeta xtila na', na' bdxúaje'. Ba guxrinne.

Da nadxixruj bea cube

³¹ Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bénneache, na' xegá'ana szren Dios ne chia' neda'. ³² Che neda', Benne' Gulje' Bénneache, dxulé'eda' ca naca xel-la' szren chee Dios, na' Dios gulé'ene' ca naca xel-la' szren chia' neda', ne la gúntequeze' na. ³³ Le'e, bidu chia' ca', québedxa sua' schá' nen le'e. Le'e wexílajle neda', san ca gucha' benne' judío

ca', dxapa' le'e na'a, quebe gaca sa'le le'e naga cha'a neda'.
³⁴ Tu da cube dxixruj be'eda' le'e. Le zri'i le sa' ljuwézrele tule
 xetule ca neda' nazrí'ida' le'e. Caní dxal-la' zri'i ljuwézrele tule
 xetule. ³⁵ Che nazrí'i ljuwézrele tule xetule, na' xúgute bènneache
 xeleque bé'ene' nácale neda' tuze.

Jesús dxenné' nna Pedro quebe núnbe'e Le'
 (Mt. 26.31-35; Mr. 14.27-31; Lc. 22.31-34)

³⁶ Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lenu' neda' na'a. Te na'a
 wadéquezu' naga tea' neda'.

³⁷ Nadxa gunná Pedro:

—Xran, ¿bizr chee na' quebe gaca sá'lëna' Lue' na'a?
 Zúaqueza' guzúa' xel-la' nabán chia' chee guna' Lue' tuze.

³⁸ Jesús bechebe':

—¿Zúaquezu' guzú' xel-la' nabán chiu' chee gacu' neda' tuze?
 Da li dxapa' lue', nédxudxa ca cuezre xjeaj, lue' wannáquezu'
 chunna lasa quebe núnbe'u neda'.

14

Jesús naque' neza da dxezrín na naga zua Xradxu Dios

¹ Gunná Jesús:

—Quebe cuele le'e gunne xue. Le guxrén lazre' Dios, ne
 le guxrén lazre' neda'. ² Lizre Xra' délë'e lataj naga súale.
 Chela quebe naca na caní, neda' ba gucha' le'e. Wexá'a
 cheajxecueza' lataj chee. ³ Ca te xexá'a cheajxecueza' lataj
 chee, na' wexelájqueza' xetú chee xedajxezri'a le'e súalele
 neda', chee súale le'e naga súaqueza' neda'. ⁴ Le'e nézele naga
 cha'a, ne núnbeale neza na'.

⁵ Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu'
 neza na'?

⁶ Jesús bechebe':

—Neda' naca' neza na', ne naca' da li, ne naca' xel-la' nabán.
 Tuze ne chia' neda' waca zrinle naga zua Xra'. ⁷ Chela núnbeale
 neda', cá'aqueze núnbeale Xra'. Ná'atëla núnbeale Le' lawe' da
 ba dxelé'ele Le'.

⁸ Nadxa Felipe guzre' Jesús:

—Xran, ble'e netu' Xrau', xetú da ná'teze.

⁹ Bechebe Jesús:

—Felipe, scha' ba guzúalëna' le'e, na' ¿quebe ne gúnbe'u
 neda'? Benne' dxelé'ene' neda', dxelé'equezene' Xra'. Chee le
 na', ¿bizr chee na' dxenabu' neda' gulé'eda' le'e Xra'? ¹⁰ ¿Quebe
 dxéajle'u zúalëna' Xra', na' Xra' zúalëne' neda'? Da dxapa' le'e,

quegá dxennéa' na cheézqueza'. Xra', Bénnea' zúalene' neda', Léqueze' na' dxune' zrin chee' lu na'a neda'. ¹¹ Le chéajlele zúalena' Xra', na' Xra' zúalene' neda', u che cabí dxéajlele ca da dxennéa', le chéajle chia' ne chee da ca' dxuna'. ¹² Da li dxapa' le'e, benne' dxéajle'e chia', gúnqueze' ca da dxuna' neda', na' guné' da zaj nácadxa zren ca da caní dxuna' lawe' da xexá'a neda' naga zua Xra'. ¹³ Xúgute da ná bale le'e lu La' neda', neda' guna' na, chee gulé'eda' neda' xel-la' szren chee Xra'. ¹⁴ Néda'queza' guna' bíteteze da ná bale lu La' neda'.

Jesús dxechebe lazre' sel-le' Be' Lá'azxa

¹⁵ Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. ¹⁶ Neda' gata' xueda' Xra' sel-le' chee xetú Benne' gácalequeze' le'e, ne súaletecaze' le'e. ¹⁷ Benne' nigá naque' Be' Lá'azxa gulé'ene' le'e ca naca da li. Benne' zaj naca chee xezr la xu nigá quebe xelezéquene' xelezí' lu ne'e Le' lawe' da quebe gaca xelelé'ene' Le', ne quebe zaj núnbe'e Le'. Le'e núnbeale Le' lawe' da zúalene' le'e, ne súaqueze' lu xichaj lázrdaule. ¹⁸ Quebe gucá'ana' le'e ca bi wezebe ca'. Welá'queza' súalena' le'e. ¹⁹ Xetú chí'idau' bénneache ca' québedxa xelelé'ene' neda', san le'e welé'ele neda'. Le'e tu gaca bánzquezle lawe' da tu naca bánzqueza' neda'. ²⁰ Lu zra na' guéquebe'ele neda' zúalena' Xra', na' le'e zúalele neda', na' neda' zúalena' le'e. ²¹ Benne' nézene' ca naca da nadxixruj bea na nuna' neda', ne dxune' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'aqueze neda' zrí'ida' bénnea', ne gulé'e lawa' le'.

²² Judas, quegá bénnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau' bénneache zaj zre'e xezr la xu nigá?

²³ Jesús bechebe':

—Benne' nazrí'ine' neda' dxune' ca naca da dxennéa', na' Xra' zrí'ine' bénnea', na' neda' ne Xra' xedajsúalentu' le'. ²⁴ Benne' quebe nazrí'ine' neda' quebe dxune' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' nasele' neda'.

²⁵ 'Dxapa' le'e xúgute da caní dxácaté ne zúalena' le'e, ²⁶ na' Be' Lá'azxa, Bénnea' sel-la Xra' lu La' neda' chee gácale' le'e, Le' gulé'ene' le'e xúgute, ne gusá'queze' lázrele ca naca xúgute da ba gucha' le'e.

²⁷ 'Xel-la' dxebeza zri lazre' dxuca'ana' chee. Dxunna' le'e xel-la' dxebeza zri lazre' chia'. Quebe dxunna' na ca dxelunna bénneache xel-la' dxebeza zri lazre'. Quebe cuele gunne xue, ne quebe zrébele. ²⁸ Ba bénele gunnéa' wexá'a, ne welá'a súalena' le'e xetú. Chela da li nazrí'ile neda', suale xel-la' dxebé, lawe' da xexá'a naga zua Xra', na' nácadxa Le' szren

ca neda'. ²⁹ Da nigá dxapa' le'e na'a nédxula gate quebe ne gaca na, chee gate gaca na, na' chéajlele chee da dxennéa'.

³⁰ 'Québedxa guchálajleteca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'. ³¹ Caní dxal-la' gaca chee xeleneze bèneache neda' nazrí'ida' Xra', ne dxuna' ca da gunná bé'eng' neda'. ¡Le chasa! ¡Le xebú'u nigá!

15

Jesús dxuchálaje' chee lba uva ne chee zruze na ca'

¹ Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ane' na. ² Le' dxechugue' zruze na ca' da quebe dxelebía na da zixre, ne dxun chi'e zruze na ca' da dxelebía na da zixre chee xelebiádxna. ³ Le'e nácale ca zruze na ca' da ba nun chi'e, ne chee dizra' da ba gucha' le'e. ⁴ Le súaqueze gácale neda' tuze ca neda' tu zúalezqueza' le'e. Tu zruze xaga quebe gaca cuía na da zixre cheézqueze na che quebe súalequeze na xaga na'. Cá'unqueze le'e quebe bi gaca gunle che quebe tu gácazquezle neda' tuze.

⁵ 'Neda' naca' bzrigu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxebíale'e na da zixre, lawe' da quebe bi seque' gunle che quebe gácale neda' tuze. ⁶ Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

⁷ 'Che le'e súatequezle neda' tuze, ne quebe gusanle dizra' chia', waca nácale ca da dxaca lázrele, na' sile na. ⁸ Xra' dxegá'ana szrene' gate nácale ca zruze na ca' da dxelebíale'e na da zixre, ne caní gaca bea na nácale neda' tuze. ⁹ Neda' nazrí'ida' le'e ca nazrí'i Xra' neda'. Chee le na' le súaquezle lu xel-la' zri'i lazre' chia'. ¹⁰ Che gunle ca da dxixruj be'eda' le'e, na' súatequezle lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

¹¹ 'Neda' dxuchálajlena' le'e caní chee súale lu xel-la' dxebé chia', ne chee gaca du lazre' xel-la' dxebé chee. ¹² Cani naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e. ¹³ Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee gácalene' bi ljwezre' ca'. ¹⁴ Le'e nácale bi ljwezra' che dxunle ca da dxixruj be'eda' le'e. ¹⁵ Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute da guzre Xra' neda'. ¹⁶ Le'e quebe gunnéle neda'.

Neda' gunnéa' le'e, ne ba nuzúa' le'e chee gácale ca zruze lba na' da dxelebále'e na da zixre, na' tu súazqueze da zixre na'. Che gunle caní, na' Xra' gunne' le'e xúgute da nácale lu La' neda'. ¹⁷ Da nigá naca na da dxixruj be'eda' le'e: Le zri'i le sa' ljwézrele tule xetule.

Bénneache chee xezr la xu nigá dxelecuídenē' Jesús, ne cá'anqueze benne' chee' ca'

¹⁸ Nadxa gunná Jesús:

—Che bénneache dxelecuídenē' le'e, dxal-la' cheajsá lázrele belecuídequeze' neda' nédxute. ¹⁹ Chela nácale le'e chee xezr la xu nigá, na' xelezrí'i bénneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bénneache chee xezr la xu nigá, na' chee le na' dxelecuide bénneache le'e lawe' da québedxa nácale xezr la xu nigá tuze. ²⁰ Le gusá lázrele da gucha' le'e, gunnéa': Netú benne' wen zrin quebe nácadxe' szren ca xrane'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' chee le'e. ²¹ Xúgute da caní xelune' chee le'e lawe' da nácale chia', ne lawe' da quebe zaj núnbe'e Xra' nasel-le' neda'.

²² Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la ²³ lawe' da nu benne' dxecuídenē' neda', cá'anqueze dxecuídenē' Xra'. ²⁴ Chela quebe bēna' neda' xel-la' waca zren ca' lówela benne' ca' ca da netú benne' quebe ne gunē', na' quebe bi dul-la xelebáguē'. Lácala ba belelé'ene' da ca', dxelecuídenē' neda', ne dxelecuídenē' Xra'. ²⁵ Da nigá dxaca na chee gaca li ca naxúaj na lu da nadxixruj bea na da zjácale benne' ca'. Dxenná na: Belecuídenē' neda' ne quebe bi da calēla bēna' chee benne' ca'.

²⁶ 'Gate xida Bénnea' gácalēne' le'e, Bénnea' naque' Be' Lá'azxa, ne dxulé'ene' da li, Bénnea' sel-la' neda' waláz chee Xra', Lé'queze' xechēbe' ca naca chia' neda'. ²⁷ Cá'anqueze le'e wechébequezle ca naca chia' neda' lawe' da zúalele neda' nédxudaute.

16

¹ Gunná Jesús:

—Dxapa' le'e da caní chee quebe gusán lázrele da naca chia'. ² Welexebáje' le'e lu xu'u naga dxelezrague', na' zrin zra gate nútetezé benne' gutie' le'e guéquene' gunē' zrin chee Dios. ³ Caní xelune' lawe' da quebe ne xelúnbe'e Xra', ne neda'. ⁴ Dxapa' le'e da nigá chee gate zrin zra na', na' cheajsá lázrele ba gucha' le'e da nigá.

Da dxun Be' Lá'azxa
Nadxa gunná Jesús:

—Quebe gucha' le'e da nigá nédxute lawe' da zúalequeza' le'e. ⁵ Na'a wexá'a cheajxexúalena' Xra' nasele' neda', na' netule le'e quebe dxuchébele neda' ga cha'a. ⁶ Dxewí'ine lázrele lawe' da gucha' le'e da caní. ⁷ Na'a dxapa' le'e da li: Cháwe'dxa gaca chee le'e che xexá'a neda' lawe' da che quebe xexá'a, quebe xida Be' Lá'azxa xedajsúalene' le'e, Bénnea' gácalene' le'e. Che xexá'a neda', sel-la' Le' chee. ⁸ Gate xida Le', na' gulé'ene' bènneache zaj naque' benne' dul-la, ne quebe dxelune' da xrlátaje, na' Dios guzría xi'e benne' caní. ⁹ Zaj naque' benne' dul-la lawe' da quebe dxeléajle'e chia' neda'. ¹⁰ Xeleque bé'ene' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'. ¹¹ Xeleque bé'ene' Dios guzría xi'e le' lawe' da ba guchugue' chee da xriwe', da na' dxenná bea na lu xezr la xu nigá.

¹² 'Ne déle'e da dxal-la' xapa' le'e, san le'e quebe gaca chéajni'ile na na'a. ¹³ Gate xida Be' Lá'azxa, Bénnea' dxulé'ene' da li, Le' gulé'ene' le'e ca naca xúgute da li lawe' da quebe guchálaje' cheézqueze'. Wanné' xúgute da xénene', na' guzéajni'ine' le'e ca da dxal-la' gaca na. ¹⁴ Le' gucá'ana szrene' neda' lawe' da wazi'e chee da naca chia' neda', na' guzéajni'ine' na le'e. ¹⁵ Xúgute da napa Xra', cheéqueza' naca na, na' chee le' na' gunnéa', wazí' Be' Lá'azxa da naca chia', na' guzéajni'ine' na le'e.

Xel-la' dxelewí'ine lazre' chee benne' ca' xexaca na xel-la' dxelebé

¹⁶ Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xelé'ele neda' lawe' da xexá'a neda' naga zua Xra'.

¹⁷ Nadxa bal-la benne' ca' dxusede Jesús buluchebe ljwezre':

—¿Bizra zéaje da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xelé'edxu Le' lawe' da xexíaje' naga zua Xre'. ¹⁸ ¿Bi zéaje da na', xetú chí'idau'? Quebe dxéajni'idxu bi chee dxuchálaje'.

¹⁹ Guque be'e Jesús dxelaca lazre' xuluchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xelé'ele neda'. ¿Da nigá na' dxuchebe ljwézrele?

²⁰ Da li dxapa' le'e, wabézrele le'e, ne xewi'ine lázrele, san bènneache chee xezr la xu nigá xelebene'. Lácala le'e xewi'ine lázrele, xel-la' dxewí'ine lazre' chee xexaca na xel-la' dxebé. ²¹ Gate tu nu'ula zua sane' bidau' zue' stebe lawe' da ba bzrin zra sua xel-la' dxudía chee'. Gate te galaj bidu na', na' québedxa dxeajsá lazre' da guzaque' lawe' da dxebéle'ene' chee bidu na' ba gúlajbe'. ²² Cá'anqueze le'e zúale stebe na'a,

san neda' welá'queza' xedajxenná'a le'e, na' lu xichaj lárdaule súatequeze xel-la' dxebé, da naca na tu xel-la' dxebé da quebe nu seque' cua.

²³ Lu zra na' québedxa bi guchébele neda'. Da li dxapa' le'e, Xra' gunne' le'e xúgutę da ná bale lu La' neda'. ²⁴ Nédxula quebe bi gunábale lu La' neda'. Na'a le naba, na' si'le, cheę súale'ele xel-la' dxebé.

Jesús guchuchuj guléaję' da dxaca lu xęzr la xu nigá

²⁵ Gunná Jesús:

—Ba gucha' le'e da caní nen dizra' ca' da dxululé'e na. Wazrín zra gate québedxa guchálajlena' le'e da naca da dxulé'e na. Guchálajlena' le'e caníqueze da naca cheę Xra'. ²⁶ Lu zra na' ná bale Xra' lu La' neda', na' quebe dxennéa' neda' gata' xueda' Xra' waláz cheęle, ²⁷ lawe' da Xrá'queze nazrí'ine' le'e. Nazrí'ine' le'e lawe' da nazrí'ile le'e neda', ne dxéajlele chia' za'a naga zua Dios. ²⁸ Guzá'a lau Xra' cheę bla'a lu xęzr la xu nigá cheę xexá'a naga zua Xra'.

²⁹ Nadxa benne' ca' dxusede Jesús gulé'e Le':

—Na'a dxuchálajlenu' netu' caníqueze. Quebe dxuchínenu' dizra' ca' da dxululé'e na. ³⁰ Na'a dxeque bé'entu' nézenu' xúgutę da ca', na' quebe dxal-la' nu guchębe Lue'. Cheę le na' dxéajlentu' chiu' za'u naga zua Dios.

³¹ Jesús guzre' benne' ca':

—¿Dxéajlele chia' na'a? ³² Za' zra, ne ba naca zra ná'queze gate le'e gase dínnaile ca'ale xrneza cha cheęle, na' gucá'anale neda' tuza'. Quebe zúaqueza' tuza' lawe' da zúale Xra' neda'. ³³ Dxapa' le'e da nigá cheę gápale xel-la' dxebeza zri lazre' lawe' da nácale neda' tuze. Lu xęzr la xu nigá dxun na ba xen si sácale. Le gun chuchu lárdaule, lawe' da ba bchuchuj bléaja' da dxaca lu xęzr la xu nigá.

17

Jesús dxenabe' Dios xucá'ana chawe'e benne' ca' dxeléajle'e cheę'

¹ Ca gudé gunné' da nigá, na' Jesús gunné'e xabáa, dxenné':

—Xrae, ba bzin zra. Bca'ana szren neda', Zri'inu', cheę cá'anqueze neda', Zri'inu', gucá'ana szrena' Lue'. ² Lue' ba bęnnu' neda', Zri'inu', xel-la' dxenná bea cheę nna be'eda' xúgutę bęnneache, cheę gunézruja' xel-la' nabán da zeajlí canna cheę xúgutę benne' ca' bęnnu' neda'. ³ Xel-la' nabán da zeajlí canna naca na cheę xelúnbe'e Lue', nacu' Dios tu licha', ne li lazre', na' cheę xelúnbe'e neda', Jesucristo, Bęnnea' gusel-lu' Lue'.

⁴ Neda' ba bca'ana szrena' Lue' lu xęzr la xu nigá, ne ba bexuzre bęna' da bdxixruj be'enu' neda'. ⁵ Na'a, Xrae, bęna

neda' xel-la' szren lau Lue', da naca na xel-la' szren na' da guca na chia' naga zu' Lue' nédxudaute gate za gata' xęzr la xu nigá.

6 'Benne' ca' guca'u Lue' ládujla bėnneache, benne' ca' bėnnu' neda', neda' ba bzėajni'ida' lę' Nu nacu' Lue'. Gulaque' chiu', na' Lue' bėnnu' neda' benne' ca', na' ba belune' ca dxenná xrtizru'. 7 Na'a zaj nézene' xúgute da bėnnu' neda' za na naga zu' Lue'. 8 Ba bnėzruja' cheę benne' caní dizra' chiu' da bėnnu' neda', na' benne' caní ba gulezí' lu ne'e na. Ba guleque bé'ene' da li neda' za'a naga zu' Lue', ne ba gulėajlę'e chiu', gusel-lu' neda'.

9 'Neda' dxata' xueda' Lue' gaca chawe' cheę benne' caní. Quebe dxata' xueda' Lue' ne cheę benne' ca' zaj naque' cheę xęzr la xu nigá. Dxenaba' Lue' ne cheę benne' ca' bėnnu' neda', lawe' da zaj naque' chiu'. 10 Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne cheę benne' caní.

11 'Neda' québedxa sua' lu xęzr la xu nigá, san benne' caní xelexegá'anę' lu xęzr la xu nigá, na' neda' wezá'a nigá, ne xedajxezúalęqueza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bėnnu' neda', cheę xelácaqueze' tuze ca nácadxu dxi'u tuze, Lue' ne neda'. 12 Gate ne zua' neda' lu xęzr la xu nigá, bxua' benne' caní nen xel-la' dxenná bea chiu', benne' caní bėnnu' neda', ne bcache chawa' lę'. Netú benne' caní quebe gunite, san tuze bėnnea' ba nanítequeze', na' caní guca na cheę guca li ca naxúaj na lu xiche chiu'.

13 'Na'a ba zezá'a naga zu' Lue'. Dxácate ne zua' lu xęzr la xu nigá dxennéa' da caní cheę xelápale'e benne' caní xel-la' dxebé ca da nápaqueza' neda'. 14 Neda' bnėzruja' benne' caní dizra' chiu'. Bėnneache cheę xęzr la xu nigá dxelecuídene' benne' caní lawe' da québedxa zaj naque' tuze nen benne' ca' cheę xęzr la xu nigá, ca na' neda' quebe naca' tuze nen da naca cheę xęzr la xu nigá. 15 Quebe dxenaba' Lue' xeca'u benne' caní lu xęzr la xu nigá. Dxenaba' guzrá chawu' benne' caní cheę quebe seque' da xriwe' bi gun na cheę lę'. 16 Ca neda' quebe naca' cheę xęzr la xu nigá, cá'anqueze benne' caní quebe zaj naque' cheę xęzr la xu nigá. 17 Bzua benne' caní cheę xelaque' cheéquezu' Lue' ne cheę da li. Dizra' chiu' naca na da li. 18 Ca gusel-lu' Lue' neda' ládujla bėnneache zaj naque' cheę xęzr la xu nigá, cá'anqueze neda' dxusel-lę' benne' caní ládujla bėnneache zaj naque' cheę xęzr la xu nigá. 19 Ne cheę benne' caní nuzúa cuina' cheéquezu' Lue', cheę cá'anqueze benne' caní xelaque' cheéquezu' Lue' ne cheę da li.

20 'Dxata' xueda' Lue', quegaze cheę benne' caní, san cá'anqueze cheę benne' ca' xelėajlę'e chia' gate xelenne' da xuluchalaj benne' caní. 21 Dxenaba' Lue' cheę xelaca xúgute

benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bēnneache zaj naca chee xezr la xu nigá Lue' gusel-lu' neda'. ²² Neda' ba bnézruja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. ²³ Neda' súalēna' benne' caní, na' Lue' súalēnu' neda', chee xelácaqueze benne' caní tuze, na' caní xeleque be'e bēnneache Lue' gusel-lu' neda', ne nazrí'inu' benne' caní cáteze nazrí'inu' neda'.

²⁴ 'Xrae, Lue' bennu' neda' benne' caní, na' dxaca lazra' xelezúalēne' neda' naga sua' neda', chee xeledé'eng' xel-la' szren da ba bennu' neda', lawe' da nazrí'inu' neda' nédxudaute gate quebe ne gunu' xezr la xu nigá. ²⁵ Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'. ²⁶ Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súale néda'queza' le'.

18

Dxelel-le' Jesús

(Mt. 26.47-56; Mr. 14.43-50; Lc. 22.47-53)

¹ Ca gudé gunná Jesús da caní, na' bdxúajē' nen benne' ca' dxusédene' chee chjaque' xecha la'a xegu Cedrón. Lataj na' zélé'e xaga olivo naga guxú'u Jesús nen benne' ca'. ² Cá'anqueze Judas, bēnnea' dxudéē' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédene'. ³ Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wēn zrin chee xudau', benne' ca' gulesel-la benne' xíchajē' ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xedxe. ⁴ Jesús ba nézene' ca' da gaca chee', na' chee le' na' bdxúajē' lau benne' ca', na' bchebe' le':

—¿Nuzra dxexíajle?

⁵ Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bēnnea' dxudéē' Jesús lu na' benne' ca' zúaqueze' ládujla benne' ca'. ⁶ Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu. ⁷ Nadxa Jesús bchebe' benne' ca' da xula:

—¿Nuzra dxexíajle?

Gulenná benne' ca':

—Jesús, benne' Nazaret.

⁸ Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

⁹ Ca guca da nigá guca li ca gunná Jesús, gunné': "Benne' ca' benna Xra' neda', netue' quebe bnitia'." ¹⁰ Nadxa Simón Pedro, ne nu'e xia, guléajé' na, na' guchugue' naga da zua xabela chee Malco, wen zrin chee bxruze blau. ¹¹ Jesús guzre' Pedro:

—Begu'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

Jesús dxezrine' lau bxruze blau

(Mt. 26.57-58; Mr. 14.53-54; Lc. 22.54)

¹² Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulel-le' Jesús, ne buluchéajé' Le'. ¹³ Nadxa guleché'e Jesús lizre Anás. Anás nigá naque' xrtau zri'ine Caifás, benna' naque' bxruze blau iza na'. ¹⁴ Caifás nigá naque' benna' guzre' judío blau ca' gácadxa chawe' gate tuze benne' waláz chee xezr la xu chee'.

Pedro dxenné' quebe núnbe'e Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro, ne xetú benne' ca' dxuséde Jesús zjaque' zeajnawé' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. ¹⁶ Pedro begá'ane' dxu'a dxa xu'u da zua chale'aj na'. Chee le' na' bdxuaj benna' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'. ¹⁷ Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

¹⁸ Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxelexezré'ene'. Pedro ze' nen benne' ca', dxexezré'ene' dxu'a xi' na'.

Bxruze blau dxuchebe' Jesús

(Mt. 26.59-66; Mr. 14.55-64; Lc. 22.66-71)

¹⁹ Bxruze blau guzú lawe' dxuchebe' Jesús nuca benne' ca' zaj naque' benne' dxusédene', ne bi da dxusédene' le'. ²⁰ Jesús guzre' le':

—Neda' ba bchálajqueza' lálwela xúgute benna'che. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze. ²¹ ¿Bizr chee na' dxuchebu' neda'? Bchebe benne' ca' ba belenne' chia', na'

le' xelenné' bi da bchálajlęna' le'. Benne' ca' zaj nézene' da ba gunnéa'.

²² Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné':

—¿Caní dxexechebu' lau bxruze blau nigá?

²³ Jesús bechebe':

—Che gunnéa' tu da calela, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

²⁴ Nadxa Anás gusél-le' Jesús, zaj nadxéaj ne'e, lau Caifás, bxruze blau.

Pedro dxenné' xecha lasa quebe núnbe'e Jesús

(Mt. 26.71-75; Mr. 14.69-72; Lc. 22.58-62)

²⁵ Dxácatę na' ze' Pedro dxu'a xi' na' dxexezré'ene', na' gulé'e le':

—¿Quebe nacu' lue' tu benne' ca' zaj naque' tuze nen bénnea'? Na' Pedro gunné':

—Quebe naca'.

²⁶ Nadxa tu benne' wen zrin chee bxruze blau, benne' naque' xrtia bénnea' guchugu Pedro nague', bchebe' le':

—¿Quegá ble'eda' lue' nen bénnea' naga zaj ze' xaga olivo ca'?

²⁷ Pedro gunné' xecha lasa:

—Quebe núnbe'a bénnea'.

La' ná'queze gudxezre xjeaj.

Jesús dxezrine' lau Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxaní'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua. ²⁹ Chee le' na' bdxuaj Pilato bchálajlęne' benne' ca', na' guzre' le':

—¿Bizra da zria dxágule benne' nigá?

³⁰ Belexechebe benne' ca':

—Chela ca' naque' tu benne' wen da zrinnaj, quebe gudentu' le' lau'.

³¹ Nadxa Pilato guzre' benne' ca':

—Le xeché'e, ne le guchi'a chee' cáteze naca da nadxixruj bea chee.

Belexechebe benne' judío ca':

—Netu', benne' judío, quebe naca cheentu' nu gútentu'.

³² Ca'an guca, guca li ca naca da ba gunná Jesús ca gatię'.

³³ Pilato bexu'e xu'u na', na' gunné' Jesús, ne bchebe' Le':

—¿Nacu' Lue' Wenná Bea chee judío ca'?

³⁴ Jesús gunné':

—¿Dxenabu' da nigá lue'zqueze, u lawe' da nu guzre lue' ca naca chia'?

³⁵ Pilato bechebe':

—¿Naca' neda' judío? Benne' xezr la xu chiu', ne benne' xíchaje' ca' chee bxruze ca' buludé'e' lue' lawa' neda'. ¿Bizra benu'?

³⁶ Nadxa bechebe Jesús:

—Naga dxenná be'a quebe naca na chee xezr la xu nigá. Chela naca na chee xezr la xu nigá, na' benne' ca' zaj naque' neda' tuze welásaquez'e' chee quebe tea' neda' lu na' benne' judío caní. Naga dxenná be'a quebe naca na nigá.

³⁷ Nadxa guzre Pilato Jesús:

—¿Nacu' Lue' wenná bea?

Bechebe Jesús:

—Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee nnia' da li. Xúgute benne' ca' dxelune' ca' dxenná dízra' chee da li dxelenne' da dxenné'a' neda'.

³⁸ Pilato gunné':

—¿Bizra na' da li?

Dxelechugue' chee Jesús gatie'

(Mt. 27.15-31; Mr. 15.6-20; Lc. 23.13-25)

Ca gudé bchebe Pilato Jesús caní, na' bdxúaje' xetu'. Bchálajlene' benne' judío ca', na' guzre' le':

—Neda' quebe bi da calēla dxezrelda' nun benne' nigá.

³⁹ Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee judío ca'?

⁴⁰ Nadxa xúgute' gulenné' zizraj:

—¡Quegá benne' nigá! ¡Bsan Barrabás!

Barrabás na' naque' gubán.

19

¹ Nadxa Pilato guqué'e Jesús, na' bdxixruj bé'ene' xelu'e Le' xide'. ² Benne' dxjaque' wedil-la buluzrié' xichaj Jesús tu da' belune' zruze xaga xeché', ne bulugácue' Le' tu ladxe' bzawe.

³ Nadxa guléchaje' Le', dxelenné':

—¡Gaca ba lue', wenná bea chee judío ca'!

Nadxa belú'e dxu'a lau Jesús.

⁴ Nadxa bdxuaj Pilato da xula, ne guzre' benne' ca':

—¡Le nna'xque! Dxebéaja' benne' nigá chee nézele quebe dxezrelda' bi da zrinnaj nabague'.

⁵ Bdxuaj Jesús zria xíchaje' da naca zruze xaga xeché', ne nacue' ladxe' bzawe na'. Nadxa Pilato guzre' benne' ca':

—Nigá zua bēnea'.

⁶ Gate benne' xíchaje ca' chee bxruze ca', ne xra'aga wen zrin chee' ca' belelé'engé' Jesús, na' gulezú lawe' dxelenné' zizraj:

—¡Bde'e xaga béguaj! ¡Bde'e xaga béguaj!

Pilato guzre' benne' ca':

—Le che'e, ne le gudé'e xaga béguaj lé'equeze, lawe' da quebe dxezrelda' bi da zrinna' nabague'.

⁷ Na' benne' judío ca' belexechebe':

—Netu' nápanu' tu da nadxixruj bea na, ne ca dxenná na dxal-la' gatie' lawe' da dxun cuine' Zri'ine Dios.

⁸ Gate ben Pilato da nigá, na' bezrébedxe'. ⁹ Bexu'e xu'u na', na' bchebe' Jesús:

—¿Gazra benne' Lue'?

Quebe bi bechebe Jesús.

¹⁰ Nadxa guzre Pilato Le':

—¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

¹¹ Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee le na', bènea' bde'e' neda' lu na'u dul-la zrendxa nabague' ca lue'.

¹² Lu zra na'te gudilaj lazre' Pilato ájala gune' gusane' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bènea' dxenná bea Roma. Nu benne' dxun cuine' wenná bea dxedábage' César.

¹³ Nadxa Pilato, gate benne' da nigá, bdxixruj bé'engé' xelexebéaje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zéaje na chale'aj xiaj ta'a. ¹⁴ Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea chee.

¹⁵ Na' benne' ca' gulenné' zizraj:

—¡Gatie'! ¡Gatie'! ¡Bde'e xaga béguaj!

Pilato guzre' benne' ca':

—¿Gudá'a wenná bea chee xaga béguaj?

Belexechebe benne' xíchaje ca' chee bxruze ca':

—Netu' zua tuze wenná bea cheentu'. ¡César! ¹⁶ Nadxa Pilato bde'e' Jesús lu na' benne' ca' chee te'e xaga béguaj, na' guleché'e Jesús.

Jesús dxedé'e xaga béguaj

(Mt. 27.32-44; Mr. 15.21-32; Lc. 23.26-43)

¹⁷ Na' bdxuaj Jesús nu'e xaga béguaj chee chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. ¹⁸ Buludé'e Jesús xaga béguaj lataj na', na' tu zren

nen Jesús buludé'e xechupa benne' xaga béguaj ca' chalá'a weaj naga da' Jesús. ¹⁹ Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee Judío Ca'. ²⁰ Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. ²¹ Chee le' na' benne' xíchaje' ca' chee bxruze chee judío ca' gulé'e Pilato:

—Quebe guzúaju' na: Wenná Bea Chee Judío Ca'. Bzuaj na: Le' Gunné' Naque' Wenná Bea Chee Judío Ca'.

²² Bechebe Pilato:

—Da bzuaja', ba naxúajqueze na.

²³ Ca gudé buludá' benne' dxjaque' wedil-la Jesús xaga béguaj, na' belexequé'e zra lane', ne belebeque' na tapa cue', tu cue' weaj chee tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. ²⁴ Chee le' na' benne' dxjaque' wedil-la gulé' ljwezre':

—Quebe chézadxu na. Cwéajdxu da gunna bea na chee la' nu xala le' na.

Ca'an guca, guca li da naxúaj na lu xiche chee Dios, da dxenná na: Belexelé'e zra lana', ne guléaje' da gunna bea na chee le' na. Caní belún benne' dxjaque' wedil-la.

²⁵ Gáguze naga zua xaga béguaj chee Jesús ze xrna Jesús nen bi bila xrne'e, ne María, zru'ula Cleofas, ne María Magdalena.

²⁶ Gate ble'e Jesús xrne'e, ne cuita xrne'e na' ze Juan, benne' bsede Jesús, bénnea' nazri'idxe', na' guzre' xrne'e:

—Nú'uladau', na' ze zri'inu'.

²⁷ Nadxa guzre Jesús bénnea':

—Na' ze xrna'u.

Zra na'te benne' nigá beche'e nu'ula na' lizre'.

Dxate Jesús

(Mt. 27.45-56; Mr. 15.33-41; Lc. 23.44-49)

²⁸ Ca gudé gunná Jesús da nigá, lawe' da nézene' xúgute' na ba guca li, ne chee guca li ca naxúaj na lu xiche chee Dios, gunné':

—Dxebíleda'.

²⁹ Zua na' tu dxe'e nupe zichaj, na' bulusubise' tu da dxerupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús. ³⁰ Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

Tu benne' dxeje' wedil-la dxechizie' xia lachú'u Jesús

³¹ Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu

zra dxulupá'anē' lawe' da naca zra na' tu zra blau. Chee le na' gulenabē' lau Pilato dxixruj bé'ene' xelíchajē' ni'a benne' ca' zaj de'e xaga béguaj ca', ne xelexequē'e le' le'e xaga béguaj ca'. ³² Nadxa tu benne' ca' dxjaque' wedil-la gudíchajē' ni'a benne' nedxu na', ne cá'anqueze chee benne' xetú de'e cuita Jesús. ³³ Gate bzrine' naga da' Jesús, blé'ene' ba gutiē', na' chee le na' quebe gudíchajē' ni'e.

³⁴ Tu benne' ca' dxjaque' wedil-la guchíziē' xia chee' lachú'u Jesús, na' bdxuaj dxen, ne nisa na'. ³⁵ Benne' dxuchalaj da nigá naque' benne' blé'ene' na, ne dxuchálajē' da li, ne nézene' dxenné' da li, chee cá'anqueze le'e chéajlele chee Jesús. ³⁶ Da caní guca na chee guca li ca da naxúaj na lu xiche chee Dios, da dxenná na: Quebe gulíchajē' netú zrita chee'. ³⁷ Xetú da naxúaj na lu xiche chee Dios dxenná na: Welelé'ene' bēnnea' belune' we'.

Dxulucache' Jesús

(Mt. 27.57-61; Mr. 15.42-47; Lc. 23.50-56)

³⁸ Ca gudé na' José, benne' xezre Arimatea, xeajnabē' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. ³⁹ Cá'anqueze Nicodemo, bēnnea' xeajchálajle' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. ⁴⁰ Nadxa José, ne Nicodemo belexequē'e Jesús, na' buluchele' Le' ladxe' nen nedxe na' ca naca da zjácāle benne' judío ca' da dxelune' chee benne' gate', gate na' dxulucache' le'. ⁴¹ Lataj na' naga buludé'e Jesús xaga béguaj zua tu lataj naga zaj ze xaga ca', na' lávela lataj na' zua tu ba cube le'e xiaj na', naga quebe nu ne chú'unqueze benne' gate'. ⁴² Lu ba na' belegu'e Jesús lawe' da zua ba na' gáguze, ne lawe' da ba dxebía gubizra, ne ba zua su lau zra dxulupá'ana judío ca'.

20

Jesús dxexebane' ládujla benne' gate

(Mt. 28.1-10; Mr. 16.1-8; Lc. 24.1-12)

¹ Zra nedxu, guxíaj María Magdalena dxu'a ba na' dxaní'sise', gate ne nachúl-late, na' blé'ene' québedxa naduse xiaj dxu'a ba na'. ² Nadxa bexíaj chégüē' naga zua Simón Pedro nen xetú benne' bsēde Jesús, bēnnea' bzri'idxe' Jesús, na' guzre' benne' ca':

—Ba belequē'e Xránadxu lu ba na', ne quebe nézentu' ga xeajlelú'e Le'.

³ Nadxa Pedro, ne bēnnea' xetú beledxúajē' zjaque' dxu'a ba na'. ⁴ Dxúpatē' zjaca chégüē' tu zren, san bēnnea' xetú guzá chégudxe' ca Pedro, ne bzrine' nédxudxa dxu'a ba na'. ⁵ Na'

xeajsé' su dxú'ala xeajnné'ē lu ba na', na' blé'ene' ladxe' da buluchele' Jesús xu'u na na', san quebe guxú'ē lu ba na'. ⁶Ca gudé na', bzrin Simón Pedro, na' guxú'e lu ba na'. Cá'anqueze le' blé'ene' ladxe' na' xu'u na na', ⁷ne blé'ene' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chalá'ala. ⁸Nadxa cá'anqueze guxú'u bēnea' xetú, bēnea' bzrin nedxu dxu'a ba na', na' blé'ene' ladxe' ca', ne guxéajle'ē. ⁹Quebe ne xeléajni'ine' da naxúaj na lu xiche chee Dios da dxenná na xebán Jesús ládujla benne' gate'. ¹⁰Nadxa benne' ca' bsēde Jesús belexezrine' xu'u naga zaj zre'ē.

Jesús dxulé'e lawe' María Magdalena
(Mr. 16.9-11)

¹¹María begá'ane' dxu'a ba na', dxebezre'. Ca dxebezre' na', na' gulégüē' dxenné'ē lu ba na', ¹²na' blé'ene' chupa gubáz chee xabáa zaj nácuē' zra lane' chiche, zaj dxe'ē naga guxú'u Jesús. Tue' dxe'ē naga guzrúa xichaj Jesús, na' xetúē' dxe'ē zeaj zranle ga guzrúa ni'a Le'. ¹³Na' buluchebe gubáz chee xabáa ca' María na':

—Nu'ula, ¿bizr chee na' dxebezru'?

Le' guzre' gubáz chee xabáa ca':

—Lawe' da belú'e Xrana', ne quebe nezda' ga xeajlelú'ē Le'.

¹⁴Caní dxenné', na' bzéchaj xíchajē', ne blé'ene' Jesús ze' ca'ala, san quebe nézene' che Jesús na'. ¹⁵Nadxa Jesús bchebe' María na':

—Nú'uladau', ¿bizr chee na' dxebezru'? ¿Nu dxexíaju'?

María gúquene' naque' benne' dxá'ane' xaga ca' zaj ze na', na' guzre' Le':

—Benne', che lue' bi'u Le', gunná ga xeajlú'u Le', chee cheajxezri'a Le'.

¹⁶Nadxa Jesús guzre' nu'ula na':

—María.

María na' bexéchajē', ne guzre' Le' nen dizra' hebreo:

—¡Raboni!

Dizra' nigá zéajē na: Benne' Dxusēde.

¹⁷Jesús guzre' María na':

—Bsan neda' lawe' da quebe ne xegüéna' naga zua Xra'. Bexíaj, xeajxezre bi bícha'dau' ca', benne' ca' bsédeda', xegüéna' naga zua Xra', ne nácaqueze' Xrale. Naque' Dios chia', ne Dios chee.

¹⁸Nadxa bexíaj María Magdalena, xeajzenne' benne' ca' bsēde Jesús ba blé'ene' Jesús, na' Le' guzre' le' da caní.

Jesús dxulé'e lawe' benne' ca' bsédenē'
(Mt. 28.16-20; Mr. 16.14-18; Lc. 24.36-49)

19 Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bsede Jesús, ne zaj nusézxuje' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

20 Ca gudé gunná Jesús da nigá, na' blé'ene' benne' ca' ne'e, ne le'e naga gudé xia na'. Benne' ca' bsede Jesús gulebéle'ene' gate belelé'ene' Xránadxu. 21 Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'aqueze dxusel-la' neda' le'e.

22 Nadxa blube' lau benne' ca' ne guzre' le':

—Le si' Be' Lá'azxa chee Dios. 23 Benne' ca' dxunite laule le'e chee dul-la zaj nabague' ba bnite lau Dios chee', na' benne' ca' quebe dxunite laule le'e chee dul-la zaj nabague', quebe bunite lau Dios chee'.

Tomás dxelé'ene' Xránadxu ba bebane'

24 Tomás, tu benne' chazrinnu ca' bsede Jesús, bénnea' le' Bi Lide', quebe zué' nen benne' ca' xezícadxa gate ble'e lau Jesús.

25 Ca gudé na' gulé'e Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé bdiduj ca', ne gudéa' zrube na'a lu xedxu chee bdiduj ca', ne gudéa' na'a le'e naga gudé xia na', québequeze chéajle'a.

26 Ca guca xrunu' zra, benne' ca' bsede Jesús zaj nazrágaqueze' lu xu'u na' xetú lasa, na' zua Tomás nen benne' ca'. Nadxa, lácala zaj naxezxuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

27 Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle'.

28 Nadxa bechebe Tomás:

—Xrana', ne Dios chia'.

29 Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrenté naca na chee benne' ca' dxeléajle'e chia' lácala quebe ne xeelé'ene' neda'.

Da dxaca lazre' Juan gun xiche nigá

30 Jesús bene' da zandxa xel-la' waca zrenté lau benne' ca' bsédené' da quebe zaj naxúaj na lu xiche nigá. 31 Da caní zaj

naxúaj na chee chéajlele le'e chee Jesús, naque' Cristo nase-la Dios, ne Zri'ine Dios, ne chee gápale xel-la' nabán lawe' da dxéajlele chee'.

21

Jesús dxulé'e lawe' gazre benne' ca' bsédené'

¹ Ca gudé na' Jesús ble'e lawe' lau benne' ca' bsédené' dxu'a nísadau' chee Tiberias. Caní guca na. ² Zaj nazraga Simón Pedro, ne Tomás, bénnea' léqueze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús. ³ Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'lentu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. ⁴ Ca guzú lau dxani'sise', ble'e lau Jesús dxu'a nísadau' na'. Benne' ca' bsédené' quebe zaj nézene' che Jesús na'. ⁵ Nadxa Jesús guzre' benne' ca':

—Bénne'dau', ¿quebe nu bela ne senle?

Belexechebe benne' ca':

—Quebe bi ne sentu'-ba'.

⁶ Nadxa guzre Jesús benne' ca':

—Le guzala xixruj na' chalá'a xabēla chee da dxedá lawe' nísadau' na', na' senle bela.

Ca' beluné', na' ca dxelexequé'e xixruj na' quebe dxelexegué'engé' na lawe' da nazrate na bela zan. ⁷ Nadxa bénnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázié' ladxe' dxexrúa cuzre' lawe' da nagüé' na, na' bexétajé' lu nisa. ⁸ Xezícadxa benne' ca' belexezrine' dxu'a nísadau' na', zaj zre'e lu da dxedá lawe' nísadau', dxelexezrube xue' xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. ⁹ Gate belexétajé' lu xu bizre, na' belelé'engé' ba dxe' xi', ne ba zrua tu bela lawe' xi' na', na' de na' xeta xtila. ¹⁰ Nadxa Jesús guzre' benne' ca':

—Le cheajxrí' tu chupa bela ca', bē za guzéntele.

¹¹ Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazrate na bela zri'a, tu gaxúa chí'inu xunba', na' lálcala naca tu cá'antēba' quebe gudxeza xixruj na'. ¹² Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchebe' Le' nu Le', lawe' da zaj nézene' naque' Xránadxu. ¹³ Nadxa Jesús guqu'é'e

xeta xtila na', na' bnézruje' na benne' ca', ne cá'anqueze bene' chee' bela ca'.

¹⁴ Da nigá naca na da guxunne' lasa ble'e lau Jesús lau benne' ca' bsédene' ca gudé bebane' ládujla benne' gate.

Jesús dxuchálajle' Simón Pedro

¹⁵ Ca gudé gulawe' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila'du chia' ca'.

¹⁶ Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

¹⁷ Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgutē. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. ¹⁸ Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácuē' lue', ne che'e lue' naga quebe gaca lazru' chéaju'.

¹⁹ Gate gunná Jesús da nigá, dxuzéajni'ine' benne' ca' ca dxal-la' gate' Pedro chee' gucá'ana szrene' Dios. Ca gudé na' Jesús guzre' le':

—Ben neda' tuze.

Da gaca chee' bēnnea' nazrí'idxa Jesús

²⁰ Gate bexechaj Pedro, blé'ene' bēnnea' nazrí'idxa Jesús zéaje nawe' le', naque' bēnnea' dxe'e cuita Jesús gate na' gulawe' xrche' na', ne bchebe' Jesús: “Xran, ¿nuzra na' gudé Lue' lu na' benne' ca' dxeledábague' lue'?” ²¹ Gate Pedro blé'ene' bēnnea', na' bchebe' Jesús:

—Xran, ¿gazra benne' nigá? ¿Aja gaca chee'?

²² Jesús bechebe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

²³ Belén benne' ca' zaj de'e Jesús quebe gate benne' na'. Jesús quebe guzre' le' quebe gatíe'. Guzre' le': “Che neda' dxaca

lazra' xegá'ane' ca zrindxa zra xelá'a neda', ¿naca na chiu' lue' nézenu'?"

²⁴ Benne' nigá naque' benne' dxexechēbe' chee da nigá, ne ba nuzúaje' na. Nézentu' dxenné' da li.

²⁵ Cá'anqueze ne zaj dedxa da zante da ben Jesús, na' chela xuaj tu tu na, dxéqueda' quebe gueque lu xēzr la xu nigá cha' xiche ca' dxal-la' guzúajdxu. Ca' naca na.

DA CA' BELÚN BENNE' GUBÁZ CHEE CRISTO

Dios nachebe lazre' sel-le' Be' Lá'azxa

¹ Lue', Teófilo, bzuaja' chiu' lu xiche nedxu ca naca xúgute da guzú lau Jesús dxune', ne dxusédene' nédxudaute, ² cadxa begüene' xabáa. Gate za xezé'e xexíaje' xabáa guqué'e gubáz chee' ca', na' zúale Be' Lá'azxa Le' guzre' benne' ca' ca da dxalla' xelune'. ³ Ca gudé gutie', Jesús ná'queze ble'e lawe' benne' ca', ne lawe' chua zra ble'e lawe' benne' ca', na' blé'ene' da zan da dxelunna bea na naca bané', ne bchálajlene' benne' ca' ca dxal-la' nna bea Dios.

⁴ Gate ne zúale Jesús benne' gubáz ca', gunné xuene' le' quebe xesí'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunne' chee, ca gunníqueza' neda'. ⁵ Da li Juan bchue' bénneache nisa, san lu zra caní gaca chee ca da zéaje xel-la' dxedxúa nisa, xida Be' Lá'azxa xedajsúe' lu xichaj lázrdaule.

Jesús dxegüene' xabáa

⁶ Gate na' zaj nazrague' nen Jesús, na' buluchebe' Le':

—Xran, ¿güe Dios lataj nna béaqueze xezre Israel lu zra caní?

⁷ Na' bechebe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca gune'. ⁸ Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca náaqueze xezr la xu nigá.

⁹ Ca gudé gunné' da nigá, ne dxácate dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. ¹⁰ Ne zaj zra' benne' ca' dxelenné'e dxácate dxegüén Jesús, belelá' chupa benne' zaj nácue' ladxe' chiche lau benne' ca', ¹¹ na' gulé'e benne' gubáz ca':

—Le'e, benne' Galilea, ¿bizr chee na' zele dxenna'le xabáa? Jesús nigáqueze begüene' zexíaje' xabáa, bezé'e ládujla le'e, welé'e xetú cáqueze ble'ele Le' zexíaje'.

Dxelequé'e Matías chee xedé' waláz chee Judas

¹² Nadxa besí'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxe' cáтитеze da dxunna da nadxixruj bea na lataj xesí'aque' lu zra dxulupá'ane'. ¹³ Gate belexezrine' lu xezre na', belexegüene' xu'u sibe naga zaj zue'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás,

ne Bartolomé, ne Mateo, ne Jacobo zri'ine Alfeo, ne Simón, bēnnea' dxedábague' benne' Roma ca', ne Judas, zri'ine Jacobo. ¹⁴ Xúgute benne' caní tu dxelezzrágazqueze' nen benne' biche Jesús, ne María xrna Jesús, ne xebal-la nu'ula ca', chee xu-luchálajlene' Dios.

¹⁵ Lu zra ca' Pedro guzé' laduj bi bíchedxu ca', zaj naque' ca' tu gaxúa galaj bēnneache, na' guzre' le':

¹⁶ —Le'e, bi bícha'dau', ben na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bēnnea' guché'e benne' ca' gulel-le' Jesús. ¹⁷ Judas nigá guzúalene' dxi'u tu zren, ne guque' dxi'u tuze lu zrin nigá. ¹⁸ Bxa'u tu cue' xezr la xu ca naca lazruj chee Judas, da guzú' lu ne'e chee da calela da bene'. Na' benne' nigá xeajcházie' suxíchajla, ne gutín le'e, na' bdxuaj ca naca zrájlué'. ¹⁹ Xúgute benne' zaj zre'e Jerusalén belenne' da nigá, na' buluzúe' la xezr la xu na' Acéldama, da zéaje na: Xezr La Xu Chee Dxen. ²⁰ Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na: Xegá'ana cá'aze lizre',

ne quebe nu chilá' sua na'.

Cá'anqueze dxenná na:

Xetú benne' té'e waláz chee'.

²¹ 'Zaj zra' nigá benne' ca' gusá'acalene' dxi'u ca naca dxácate guzúale Jesús dxi'u. ²² Guzú lau na gate bchua Juan Jesús nisa, cadxa bzrin zra begüéne' xabáa. Dxun na ba xen tu benne' caní gaque' dxi'u tuze chee xechēbe' ca guca gate bebán Jesús lu xel-la' gute.

²³ Nadxa gulebéaje' chupa benne' ca', José ne Matías. José na' léqueze' Barsabás ne léqueze' Justo. ²⁴ Buluchálajlene' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bēnneache. Ble'e netu' nula benne' chupa caní ba nabéaju' Lue', ²⁵ chee gaque' gubáz chiu', ne xedé'e waláz chee Judas, bēnnea' bnitie' da naca chee' lawe' da bene' dul-la, na' bexíaje' lataj naga naca chee'.

²⁶ Nadxa gulebéaje' da gaca bea na, na' bexala Matías, na' gúcate' tuze benne' chinéaj gubáz ca'.

2

Ca guca gate bla' Be' Lá'azxa

¹ Ca bzrin zra Pentecostés, xúgute benne' ca' dxeléajle'e chee Jesús zaj nazrague' tuze lataj. ² Ca' guca, belenne' tu schaga da za' lu be' zran xabáa, ca dxun tu be' bdunu', na' belén na xúgute benne' zaj zre'e lu xu'u naga zaj dxe'e. ³ Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'.

⁴ Nadxa guzáleṭequeze Be' Lá'azxa xúguteṭ benne' ca', na' tu tuṭ' gulezú lawe' dxuluchálaje' dizra' nazrala cáteze dxuchine Be' Lá'azxa le'.

⁵ Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúguteṭ xezr la xu zaj dxe' lu xezr la xu nigá. ⁶ Ca belenne' bènneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha cheṭ' da dxuluchalaj benne' ca' dxeléajle'ṭ cheṭ' Jesús. ⁷ Na' belexebánele'ene', ne belexruse', ne gulé ljwezre' tuṭ' xetúṭ':

—Zaj naca benne' Galilea xúguteṭ benne' caní dxuluchálaje'.

⁸ ¿Ájazra na' dxendxu dxuluchálaje' dizra' cha cheṭdxu dxi'u?

⁹ Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' cheṭ xezre ca' zaj nababa Judea, ne benne' cheṭ naga nababa Capadocia, ne benne' cheṭ naga nababa Ponto, ne benne' cheṭ naga nababa Asia,

¹⁰ ne benne' cheṭ naga nababa Frigia, ne benne' cheṭ naga nababa Panfilia, ne benne' xezr la xu Egipto, ne benne' cheṭ xezr la xu Africa da zua dédedxa cheṭ xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj naziṭ ca naca da nadxixruj bea cheṭ benne' judío ca'.

¹¹ Cá'anqueze nácadxu benne' xezr la xu Creta, ne benne' xezr la xu Arabia. Xúguteṭdxu dxendxu lu dizra' cha cheṭdxu dxuluchalaj benne' caní ca naca da zren ca' da dxun Dios.

¹² Xúguteṭ belexebáneṭe', ne quebe zaj nézene' bi da dxaca na', na' gulenaba ljwezre' tuṭ' xetúṭ':

—¿Bizra zéaje da nigá?

¹³ Benne' xula ca' belún le', gulenné':

—Dxelezuzre benne' caní.

Da bchalaj Pedro lau benne' ca'

¹⁴ Nadxa guxasa Pedro nen benne' chinéaj gubáz cheṭ Cristo, na' zizraj bchálajleṭe' bènneache zaj zra' na'. Dxe'ṭ le':

—Le'e, benne' Judea, ne xúgutele le'e nazrágale xezre Jerusalén. Dxa-la' nézele le'e da nigá. Le xen xanne' ca naca da xapa' le'e. ¹⁵ Netu' quebe dxezúzrentu' ca dxéquele le'e. Za gudete xrsila na'a. Netú benne' quebe dxezúzrene' ca ná'queze.

¹⁶ Da nigá naca da gunnáqueze Joel, bènnea' bchálaje' waláz cheṭ Dios gate na' gunné':

¹⁷ Caní dxenná Dios: “Lu zra bzebe wasél-laqueza'

Be' Lá'azxa chia' cheṭ súaleṭe' xúguteṭ bènneache.

Zrí'inele bi biu ne bi nu'ula welennéquezebe' waláz chia' neda'.

Bi cuide' ca' welelé'equezebe' ca da gulé'eda'-be'.

Na' benne' gula ca' welennéquezeneḡ xēla.

¹⁸ Ca lu zra na' guzuáqueza' Be' Lá'azxa chia' nen bi wen zrin chia' ca', benne' biu ne nu'ula ca', na' guchálajquezebe' waláz chia' neda'.

¹⁹ Lu be' zran xabáa gulé'equezda' xel-la' waca chia', na' lu xēzr la xu dxē'ela gulé'eda' da xelunna bea na, dxen, ne xi', ne zren da naca ca beuj gasaj."

²⁰ Gubizra xechul-la na, na' beu' xexaca na xrna ca dxen nedxu ca za zrin zra xelá' Xránadxu. Zra na' gaca na tu zra cheḡ da xebánedxu ne zra na' walé'equezdxu xel-la' szren cheḡ Dios.

²¹ Nadxa xelélé xúgutē benne' ca' xelenné' Xránadxu lu xel-la' dxelejli lazre' cheḡ.

²² 'Cheḡ lē na', le'e, benne' Israel, le xen ca da xapa' le'e. Jesús, benne' Nazaret, guquē' tu benne' bedxúajē' xrlátaje lau xúgutēle le'e ne cheḡ da ben Dios laule le'e. Lu na' Jesús Dios blé'engē' da zan da dxebánedxu, ne xel-la' waca ca', ne da dxelunna bea na ca ba nézquezle le'e. ²³ Gate Dios be'e lataj tu benne' bdeḡ Lē' lu na'le le'e cáteze bache núnquezeḡ nedxu, nadxa le'e gudél-lale Lē', na' bēteḡ Lē' gate na' bdele Lē' lu na' benne' ca' dxelunē' da calela, benne' ca' buludé'e Lē' xaga béguaj naga gutiē'. ²⁴ Nadxa Dios bsebanē' Lē', bebéajē' Lē' lu xel-la' gute. Quebe guxú'u ájala xegá'anē' chalásaze lu xel-la' gute na'. ²⁵ Ca naca da nigá bchalaj wenná bea David ca naca cheḡ Jesús na', gate gunné':

Belé'equezda' Xrana' lawa' nigá.

Lē' zuē' cuita' xabela, cheḡ quebe bi guchebe na neda'.

²⁶ Cheḡ lē na' gubélé'eda', ne bil-la' lu xel-la' dxebé chia'.

Cheḡ lē na' guxrén lázrequeza' Lē' gate gatia',

²⁷ lawe' da quebe xucá'anaquezu' neda' lu lataj cheḡ benne' gate.

Quebe güéquezu' lataj guzru beḡ-la' dxen chia' neda',

naca' benne' wen zrin chiu', ne benne' nazrí'inu'.

²⁸ Blé'equezenu' neda' ca dxal-la' guna' cheḡ zrué'eda' xel-la' nabán,

na' gúnnaḡ'u neda' xel-la' dxebé lawe' da zúalenu' neda'.

²⁹ 'Le'e, bi bícha'dau'. Naca bea na gute xra xrtáudxu David, na' bulucacheḡ lē' lu xēdxu ba cheḡ da zúaqueze na na'a nagá zúadxu. ³⁰ David na' guquē' tu benne' bchálajē' waláz cheḡ Dios, ne gunézeneḡ ca da nachebe lázrequeze Dios gunē'. Gunné' lie' tu benne' zri'ine zre sua David na' gaquē' Cristo, Bénnea' nna béaquezeḡ, xequé'e lawe' cheḡ David. ³¹ Ca' guca, David nigá belé'equezneḡ nedxu ca naca da dxal-la' gaca cheḡ Cristo, na' bchálajē' ca guca gate bebán Cristo, gunné': "Benne' nigá quebe xegá'anaquezeḡ lataj cheḡ benne' gate, ne quebe

gúzruqueze bēl-la' dxen chee'." ³² Caní guca, Dios bsebanē' Jesús nigá, na' netu' dxexechēbentu' da li ca guca da nigá. ³³ Ca' guca, Dios bzue' Jesús lu xabáa chee' nen xel-la' waca chee', na' bē'e Le' lataj gusel-le' Be' Lá'azxa chee' nigá ca nachebe lázrequeze' nedxu gunē', na' xúgute da caní dxelé'ele le'e, ne dxenle zaj naca na da dxun Be' Lá'azxa na'. ³⁴ David na' quebe begüéne' xabáa, san léqueze' gunē':

Xránadxu Dios guzre' Xrana':

"Gudxe'e cuita' xabēla nigá

³⁵ ca zrindxa zra guzúa' benne' dxedábague' lue' chee nna be'enu le'."

³⁶ 'Xúgutele le'e, benne' Israel, dxal-la' nézquezle da nigá: Jesús nigá, bēnnea' bda'le le'e xaga béguaj, Dios ba nune' Le' Xránale ne Cristo cheele, Benne' guselē' le'e.

³⁷ Gate benne' ca' belenne' da nigá, na' belexewí'ine lazre', na' buluchebe' Pedro, ne benne' gubáz ca' chee Jesús, dxelé'e le':

—Benne' bíchentu', ¿ájazra dxal-la' guntu' xca'?

³⁸ Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunita lau Le' cheele le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa chee' chee súalene' le'e. ³⁹ Da nigá nachebe lazre' Dios naca na cheele le'e, ne chee zrí'inele, ne chee xúgute benne' zaj zre'e zitu', xúgute benne' ca' dxaca lazre' Dios nne'.

⁴⁰ Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le ládujla benne' wen da calēla caní.

⁴¹ Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na' belaca tuze ca chi dxua gaxúa benne' nen benne' ca' ba dxeléajle'e chee Jesús. ⁴² Na' xúgute benne' ca' gulezúa típaqueze' ca da dxulusede benne' gubáz chee Jesús le', na' gulezúe' tuze nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca guca gate gute Cristo.

Ca belún benne' nedxu ca', benne' guleajlí lazre' Cristo

⁴³ Xúgute benne' ca' gulezrebe' gate belelé'ene' xel-la' waca zante, ne da dxelunna bea na da dxelún benne' gubáz chee Jesús. ⁴⁴ Xúgute benne' ca' dxeléajle'e chee Jesús gulaque' tuze, ne bulunézruje' da de chee' tue' xetúe'. ⁴⁵ Belutiē' xúgute da zaj nape', ne bulunézruje' dumí na' chee benne' ca' ca da dxelexáazrjene'. ⁴⁶ Xugu' zra belexezrague' lu xudau', ne cá'anqueze lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrente lu xel-la' dxelebe', ne dutē xel-la' dxelexruj lazre' chee'. ⁴⁷ Belúe lá'ane' Dios, na'

xúgute bēnneache guléquene' benne' ca' ba lá'ana. Tu zra tu zra Xránadxu bzane' benne' ca' chee Cristo ca dxelezi' lu ne'e tu tu'e Cristo.

3

Dxexaca tu benne' zrinnaj

¹ Tu zra xjaque' Pedro ne Juan lu xudau' dxexedá' chunna, da naca na gate dxululáwizraj bēnneache Dios lu xudau'. ² Tu zra tu zra zua tu benne' na' naque' zrinnaj ca nálajte'. Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na: Da Xrtante, chee nabe' guna' chee benne' dxelu'e na'. ³ Gate benne' zrinnaj nigá blé'ene' Pedro ne Juan, dxelu'e xudau', na' gunabe' guna' lau benne' caní. ⁴ Nadxa Pedro ne Juan gulenné'e le', na' Pedro guzre' benne' na':

—Gunná' netu'.

⁵ Benne' na' gunná' xánnie' le' lawe' da dxéquene' bi xulunezruje' le'. ⁶ Pedro guzre' le':

—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

⁷ Nadxa Pedro guqu'é na' benne' zrinnaj na' da zua xabela, ne bechise' le', na' ca bene' caní, belexezúa chacha ni'e, ne béchajdu chee' ca'. ⁸ Nadxa benne' zrinnaj na' guxrítie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexrítie', ne dxue lá'ane' Dios. ⁹ Xúgute benne' zaj zre'e na' belelé'ene' le' dxedé', ne dxue lá'ane' Dios. ¹⁰ Belexebánene', ne belezrebe' ca da belelé'ene' guca na, lawe' da zaj núnbe'e benne' zrinnaj na', ne zaj nézene' naque' bēnnea' dxebé'e dxenabe' guna' ga dxelexú'u bēnneache xudau', da na' nazí le na Da Xrtante.

Da bchalaj Pedro la chila da nazí le na La Chila Chee Salomón

¹¹ Benne' zrinnaj na', benne' ba bexaque', quebe bsane' na' Pedro ne Juan, na' xúgute benne' dxelexebánene', ne xjaque' naga nazí le na La Chila Chee Salomón, naga zaj zra' Pedro ne Juan. ¹² Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebé'ene le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? ¹³ ¡Cabí! Dios chee xra xrtáudxu Abraham, ne Isaac, ne Jacob bca'ana szrene' Zrí'ine', Jesús, Bēnnea' bdele le'e lu na' benne' xu'u lawe'. Gate guca lazre' Pilato gusane' Le', le'e quebe guca lázrele. ¹⁴ Bzúale chalá'ala Benne' na' naque' lá'azxa ne xrlátaje, na' gunábale la tu benne' wēn da zrinnaj. ¹⁵ Ca'an guca, bétele le'e Bēnnea' dxunne'

bénneache xel-la' nabán, san Dios bsebanē' Le' ládujla benne' gate, na' netu' dxexechébentu' chee da nigá. ¹⁶ Guca lu La Jesús nigáqueze, u nnadxu guca na lawe' da guxéajle chee La Jesús, chee bezí' le dipa benne' nigá dxelé'ele, ne núnbeale le'. Lawe' da guxéajle'e chee Jesús, ba bexácatequeze' ca dxelé'ele le'e xúgutele.

¹⁷ 'Le'e, Bi bicha', nezda' gate le'e, ne benne' xíchajē ca' chee le bétele Jesús, quebe guque be'ele ca da dxunle. ¹⁸ Dios bene' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios. ¹⁹ Chee le na', le xebí'i lázrele, ne le xexaca Dios tuze, chee xusule' dul-la nabágale. Nadxa Xránadxu Dios gunné' le'e lataj xexaca chawe' xichaj lázrdaule. ²⁰ Sel-le' chee Jesús, Bénnea' guchebe lazre' sel-le' chee le nédxudaute. ²¹ Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálajē waláz chee' nédxudaute. ²² Ca' naca na, lawe' da gunná Moisés, guzre' xra xrtáudxu ca': "Sel-la Xránadxu Dios chee le tu benne' guchálajē waláz chee'. Gaque' tu benne' ládujla bi bíchele ca', na' sel-le' le' chee le ca gusel-le' neda'. Le xen xanne' xúgute da xē'e le'e, ²³ lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

²⁴ 'Xúgute benne' ca', benne' buluchálajē waláz chee Dios, guzú lau na gate zua Samuel, ne zeaj na, buluchálajē chee zra caní. ²⁵ Le'e dxezile ca da gulenná benne' ca' buluchálajē waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zri'ine zre su' gaca chawe' chee xúgute bénneache zaj zre'e lu xezr la xu." ²⁶ Gate Dios bsebanē' Zrí'ine', gusel-le' Le' nedxu laule le'e chee gaca chawe' chee le, chee gusanle tu tule le'e da calela da dxunle.

4

Pedro ne Juan dxelezzrine' lau benne' xu'u lawe' ca'

¹ Pedro ne Juan ne dxuluchálajle' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'. ² Dxelezzré'e lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús. ³ Nadxa gulel-le' Pedro ne Juan, na' guleché'e le' lize xia ca zrindxa zra xula lawe' da ba dxezré' zra na'. ⁴ Guléajle' benne' zan ládujla benne' ca' belénne' da bchalaj Pedro, na' cáтите benne' ca' dxeléajle'e chee Jesús zaj naque' ca gazxu' cue' chi gaxúa benne' biu.

⁵ Zra xula na' benne' xíchaję ca' cheę judío ca', ne benne' gula sina ca', ne benne' ca' dxuluxuzájle'e da nadxixruj bea na, belezrague' lu xęzre Jerusalén ⁶ nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. ⁷ Nadxa gulenná be'e xeajlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dxunle da caní?

⁸ Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaję ca' cheę bxruze, ne benne' gula sina ca', ⁹ le'e dxuchébele netu' cheę tu da chawe' da guca cheę tu benne' we', cheę nézele ájala guca bexaca bënnea'. ¹⁰ Dxuzentu' xúgutele le'e cheę xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bënnea' bda'le le'e le'e xaga béguaj, na' Dios bsebanę' Le' ládujla benne' gate. ¹¹ Jesús nigá naque' xiaj na', le'e, benne' węn xu'u bzúale chalá'ala, san na'a Léqueze' naque' xiaj blau cheę xu'u. ¹² Quebe nu chilá' bënneache seque' guselé' dxi'u lawe' da quebe ne gunna Dios xetú La bënneache lu xęzr la xu nigá, benne' séquene' guselé' dxi'u.

¹³ Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaję ca', san guleque bé'ene' zaj naque' benne' guledálęne' Jesús. ¹⁴ Cá'anqueze bënnea' bexaque' ze' na' nen Pedro ne Juan, na' cheę le' na' quebe gulezéquene' bi xelenné' cheę'. ¹⁵ Nadxa gulenná be'e belexedxúaj benne' gubáz ca' ládujla le'. Cate' belexegá'ana leze' buluchebe ljwezre', ¹⁶ dxelenné':

—¿Ájazra gundxu cheę benne' caní? Xúgute benne' zaj zre'e Jerusalén zaj nézene' belune' xel-la' waca zren nigá, na' quebe gaca tábagadxu na. ¹⁷ Na'a, cheę québedxa zriluj da nigá lówela bënneache, guxrúsadxu benne' caní cheę québedxa nu xuluchálajle' lu La Jesús.

¹⁸ Nadxa gulenná be'e belexezrín Pedro ne Juan, na' gulenná bé'ene' le' québedxa nu xuluchálajle'ne', ne quebe nu xulusédenę' lu La Jesús. ¹⁹ Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios. ²⁰ Netu' quebe gaca gusantu' gucháljantu' ca naca da blé'entu', ne da bënentu'.

²¹ Nadxa benne' xu'u lawe' ca' buluxruse' Pedro ne Juan, san bulusanę' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute bënneache Dios ca naca da ba guca. ²² Bënnea' bexaque' ne cheę xel-la' waca zren nigá ba gudéę' chua iza.

Benne' ca' dxelájle'e chee Jesús dxelenabe' lau Dios gunézruje' le' xel-la' dxuluxrén lazre'

²³ Gate bulusane' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute' da gulenná benne' xíchaje ca' chee bxruze ca', ne benne' gula sina ca'. ²⁴ Gate belenne' da caní, xúgute' buluchálajlene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute' da zaj nnita lataj ca'. ²⁵ Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bénneache xezr la xu ca', na' bénneache dxelegú'u lazre' da quebe bi zaj zaca?

²⁶ Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague' chee xeledábage'e Xránadxu Dios, ne Cristo chee'.

²⁷ Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábage' Zri'inu' Lá'azxa, Jesús, Bénnea' bzúaquezu' Lue'. ²⁸ Ca'an guca, benne' ca' belune' xúgute' ca da ba núnquezu' Lue' dxal-la' gaca na. ²⁹ Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrémentu', ³⁰ ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

³¹ Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale' Be' Lá'azxa le', na' buluchálaje' xrtizra' Dios duté xel-la' dxuluxrén lazre' chee'.

Xúgute' dxelune' tuze ca naca da zaj nape'

³² Benne' zan ca', benne' dxelájle'e chee Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute' da zaj nape' zaj nune' tuze. ³³ Benne' gubáz ca' chee Jesús, nen duté xel-la' dxelenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute' benne' ca'. ³⁴ Quebe nu guzúa ládujla benne' ca' bi bxázejne' lawe' da caní belún xúgute' benne' zaj nape' xezr la xu ca' u xu'u ca'. Belutie' na, na' belú'e dumí na', ³⁵ ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'. ³⁶ Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le' na. Benne' nigá, buluzúa gubáz ca' le' Bernabé, da zéaje na benne' dxexúe zrene'. ³⁷ Benne' nigá betie' tu xezr la xu da nape', na' bi'e dumí na', ne bnézruje' na lu na' benne' gubáz ca'.

5

Dul-la da belún Ananías ne Safira

¹ Xetú benne' le' Ananías nen zru'ule' Safira, betie' tu xezr la xu chee'. ² Benne' nigá bequé'e late' dumí na', na' da begá'anaze bi'e lau benne' gubáz ca', ne gunné' ca naca na'. Zru'ule' ca naca na nézene'. ³ Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lárda'u chee si xē'u Be' Lá'azxa, na' beca'u late' chiu' ca naca da guzi'u chee xezr la xu na'? ⁴ ¿Quebe guca xezr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca benu' da nigá? Dios guzú xē'u, quegá bēneache.

⁵ Ca ben Ananías da nigá, na' guzré'e gútete'. Xúgute benne' belén da nigá belezrébele'e. ⁶ Nadxa gulebiga bal-la bi cuide' ca', ne buluchélabe' le' tu ladxe', na' belúabe' le' cheajlecáchebe' le' lu ba.

⁷ Ca guca chunna hora gudé na', guxú'u zru'ula Ananías na', ne quebe nézene' bi ba guca. ⁸ Pedro bchebe' le':

—Gunná, ¿bētele le'e xezr la xu na' ca dxennale guzile na?

Gunná Safira na':

—Awe', ca naca na'.

⁹ Nadxa Pedro guzre' le':

—¿Bizr chee na' benle le'e tuze dizra' gúquele si xe'le Be' Lá'azxa? Chale'aj na' ba zesí'aca bi ca' xeajlecáchebe' benne' chiu', na' na'a xelúatequezebe' lue'.

¹⁰ La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba gutie', na' belexebéajbe' le' xeajlecáchebe' le' cuita ba chee benne' chee'. ¹¹ Xúgute benne' ca' zaj nazrague' na', ne xúgute bēneache, benne' belén da caní belezrébele'e.

Benne' gubáz ca' dxelúnle'e xel-la' waca chee xabáa

¹² Benne' gubáz ca' belúnle'e xel-la' waca chee xabáa, ne da dxelunna bea na lau benne' ca', na' xúgute' belezrague' La Chila Chee Salomón, da naca na chee xudau'. ¹³ Netú benne' ca', benne' quebe dxeléajle'e chee Jesús, quebe belexázrene' guné' benne' ca' tuze, san xúgute bēneache belape' benne' caní ba lánana. ¹⁴ Benne' zandxa gulezú lawe' dxeléajle'e chee Xránadxu, benne' biu ne nu'ula ca'. ¹⁵ Ca' guca na, belebéaje' benne' we' ca', zaj de' lu da dxeláta'ne', ne da'a chee', na' gulíxrué' le' la neza ca' chee gate te Pedro na', na' te zrula chee' lawe' benne' ca'. ¹⁶ Cá'anqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xriwe' ca', na' xúgute' belexexaque'.

Benne' gubáz ca' dxelu'e lizre xia

17 Nadxa bxruze blau, ne benne' saduceo ca' zaj zúalene' le', gulaque' xa lazre', 18 na' gulel-le' benne' gubáz ca', ne buluzré'e le' lizre xia. 19 Na' tu gubáz chee xabáa chee Xránadxu gusálaje' dxa xu'u chee lizre xia na' chizrela, na' bebéaje' benne' ca', ne dxe'e le':

20 —Le hjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

21 Ca belenne' da nigá, zra xula belú'e chila xudau' che zílala, na' gulezú lawe' dxulusédenē' benne' zaj zre'e na'.

Dxácate na', bxruze blau na', ne benne' zrálene' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xelexebéaje' gubáz ca' zaj xu'e lizre xia. 22 Gate belezrín bi xra'aga chee xudau' na', quebe nu belelé'ene' lu xu'u lizre xia, na' belexezrine', ne buluzenne' benne' ca', 23 dxelenné':

—Gate bzrintu' lizre xia na', naxeZXuj tipa na, na' benne' dxjaque' wedil-la zaj zre'e dxu'a dxa xu'u na', ne dxuluxúe' na, san gate gusálajntu' na, quebe nu bezréntu' lu xu'u na'.

24 Gate bxruze blau, ne benne' xíchaje ca' chee bxruze ca', ne xíchaje chee bi xra'aga ca', belenne' da nigá, na' buluchebe ljwezre' ga cheajsé da nigá. 25 La' ná'queze bzrin tu benne' guzre' le':

—Benne' ca' bzra'le le'e lizre xia zaj zre'e lu chila xudau', dxulusédenē' bēnneache.

26 Nadxa benne' xíchaje chee bi xra'aga chee xudau' guxíajlene' bi xra'aga ca', na' xeaJlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxelenne' chee gubáz ca', lawe' da dxeléquene' xelu'e le' xiaj. 27 Gate xeaJlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dxe'e benne' gubáz ca':

28 —Netu' bzrúnantu' le'e quebe guchálajledxale bēnneache lu la bēnea'. ¿Bizra na' benle? Ba bzenle ca naca benne' zaj zre'e xezre Jerusalén ca naca da dxusédele, ne dxaca lázrele gusebágale netu' xel-la' gute chee benne' na'.

29 Nadxa belexechebe Pedro, ne xezícadxa benne' gubáz ca':

—Dxala' guzúantu' xrtizra' Dios, quegá xrtizra' bēnneache.

30 Dios chee xra xrtáudxu ca' bsebanē' Jesús, Bēnea' bétele le'e bda'ale Le' xaga béguaj. 31 Dios bca'ana szrene' Le' chalá'a xabēla chee', ne bene' Le' Benne' Blau, ne Weselá, chee gata' lataj chee benne' Israel xelexebí'i lazre' chee gunite lau Dios dul-la chee'. 32 Chee le' na' netu' dxexechēbentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúe' dizra' chee'.

33 Gate belenne' da nigá, na' belezré'e, ne gulaca lazre' xelútie' gubáz ca'. 34 Ládujla benne' xu'u lawe' ca' zua tu benne'

fariseo le' Gamaliel. Naque' benne' dxuxuzájle'e da nadxixruj bea na, na' dxelápalē'e bēnneache le' ba lá'ana. Benne' nigá guzē', na' gunná bé'ene' xelexebéaje' gubáz ca' chalé'ajla tu chí'idau'. ³⁵ Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. ³⁶ Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácalē ca tapa gaxúa benne' biu le'. Na' belutiē le', na' xúgute benne' ca' gulaca le' tuze belexase dinnaje' ca', na' gudé chee da na'. ³⁷ Gudé na', lu zra gate belú'u bēnneache xiche, na' bla' Judas, benne' Galilea, na' benne' zan xjácalēne' le'. Cá'anqueze belutiē bēnnea', na' xúgute benne' guledē'e le' belexase dinnaje'. ³⁸ Chee le' na', le gusán benne' caní, ne quebe guchixre chee nen benne' ca'. Che da nigá naca na da dxun beneácheze, wadé chee na. ³⁹ Che naca na da dxun Dios, quebe séquele le'e guzría xile na. Le guxúe xanne' chee quebe tíl-lalele Dios.

⁴⁰ Xúgute' belexaque' tuze. Nadxa gulenná be'e belú'u gubáz ca' da xula, na' ca belú'u benne' ca', na' buluzrunē le' québedxa nu xuluchálajle benne' ca' lu La Jesús. Gudé na' bulusanē le'. ⁴¹ Na' benne' gubáz ca' belexedxúaje' naga zaj zra' benne' xu'u lawe' ca', dxelebélé'ene' lawe' da be' Dios lataj guledé'e xella' zi' lawe' da zaj naque' Jesús tuze. ⁴² Quebe bulusanē dxuluchálajē, ne dxulusédene' bēnneache ca naca chee Jesucristo xúgute zra, lu chila xudau', ne lu xu'u ca'.

6

Dxuluzúe' gazre benne' xelunē' zrin chee benne' zaj de'e Cristo

¹ Lu zra ca', gate zaj dxan benne' ca' zaj de'e Jesús, na' benne' ca' dxelenné' dizra' griego gulawe' zria benne' ca' dxelenné' dizra' hebreo. Dxelenné' quebe nu dxunezruj xanne' da xeláw nu'ula ba gulate benne' chee' zaj zre'e ládujla le' gate dxelisiē' xel-la' wagu tu zra tu zra. ² Nadxa benne' gubáz ca' buluchague' ca naca benne' ca' dxeléajle'e chee Jesús, na' gulé'e le':

—Quebe naca xrlátaje gusantu' guchálajntu' xrtizra' Dios chee gudentu' xel-la' wagu. ³ Chee le' na', biche ljwézrentu', le quilaj gazre benne' lálwela le'e, benne' zaj naque' du lazre', ne dxeléajni'ine', ne zúalē Be' Lá'azxa le', na' le gusebague' zrin nigá. ⁴ Netu' tu guchálajlezquezentu' Dios, ne gusédentu' bēnneache xrtizra' Dios.

⁵ Xúgute' gulaza lazre', na' gulequé'e Esteban, tu benne' dxéajle'e dute lázrdawē' chee Jesús, ne zúalē Be' Lá'azxa le'. Cá'anqueze gulequé'e Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne'

nédxute bexaque' tuze benne' judío ca'. ⁶ Na' guleché'e benne' caní lau benne' gubáz ca', na' le' bululáwizre' Dios, ne buluzé ne'e lawe' benne' gazre caní.

⁷ Xrtizra' Dios zeaj dxezriluj na, na' benne' ca' dxeléajle chee Jesús guxánle'e lu xezre Jerusalén, na' bxruze zan chee judío ca' guléajle'e chee'.

Dxelel-le' Esteban

⁸ Esteban, tu benne' nápalé'e xel-la' waca, ne naque' chawe' lau Dios, bene' xel-la' waca ca' chee xabáa, ne da dxelunna bea na chee da ca' lau bèneache ca'. ⁹ Nadxa bal-la benne' chee xu'u naga dxelezraga bèneache ca', nazí le na Xu'u Chee Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' chee ga nababa Cilicia, ne Asia, gulezú lawe' dxulutíl-lalene' Esteban dizra'. ¹⁰ Quebe gulezéquene' bi xelenné' chee xrtizra' Esteban lawe' da bchálaje' nen dute xel-la' sina chee Be' Lá'azxa. ¹¹ Nadxa gulízruje' bal-la benne' ca' chee xelenné' belenne' gunné Esteban dizra' schanni' chee Moisés, ne chee Dios. ¹² Caní belune', ne gulu'e xel-le' bèneache ca', ne benne' gula sina ca', ne benne' dxuluxuzájle'e da nadxixruj bea na, na' gulebía di'e Esteban. Gulel-le' le', ne guleché'e le' lau benne' xu'u lawe' blau. ¹³ Cá'anqueze gulíaje' benne' wen lazre' xelenné' chee Esteban, na' gulenné':

—Benne' nigá quebe dxusane' dxenné' schanni' chee xudau' lá'azxa nigá, ne chee da bdxixruj bea Dios. ¹⁴ Ba bentu' gunné' ca gun Jesús, benne' Nazaret, dxenné' guzría xi'e xudau' nigá, ne guché'e ca naca da zéajledxu da bca'ana Moisés.

¹⁵ Nadxa benne' xu'u lawe' ca', ne xúgute benne' zaj zre'e na', gate gulenné'e Esteban, belelé'ene' lawe', naca na ca lau tu gubáz chee xabáa.

7

Dxexechebe Esteban lau benne' xu'u lawe' ca'

¹ Nadxa bxruze blau bchebe' Esteban:

—¿Zaj naca da li da caní?

² Na' Esteban bechebe':

—Le'e, benne' gula, ne le'e biche ljwezra', le xene. Xradxu zue' xabáa ble'e lawe' lau xra xrtáudxu Abraham gate ne zue' lu xezr la xu Mesopotamia, nédxudxa gate quebe ne xezé'e cheajxezúe xezre Harán. ³ Dios guzre' le': "Bsan lázriu' ne xúgute xrtia ljwezru', na' guxíaj lu xezr la xu da gulé'eda' lue'."

⁴ Nadxa Abraham guzé'e lu xezr la xu Caldea, xeajsúe' xezre Harán. Ca gudé gute xra Abraham, Dios guché'e Abraham lu xezr la xu nigá, naga zrale le'e na'a. ⁵ Dios quebe bi bnézruje' chee Abraham naga sue' lu xezr la xu nigá, ne naga guné'

lizre', san guchebe lazre' gunézruje' le' xezr la xu nigá, na' gate te gate le', na' gaca na chee zrí'ine', lácala lu zra na' quebe ne galaj nu zrí'ine Abraham. ⁶ Cá'anqueze Dios guzre' le' xelezúa zrí'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. ⁷ Cá'anqueze Dios le': "Neda' chuga' ca gaca chee xezr la xu na' guchine na zrí'ine zre su', na' te na' xelexedxúaje' ga na', ne xelúe lá'ane' neda' lu xezr la xu nigá." ⁸ Dios bene' tu xel-la' wezría nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee', tu da guzúa chuchu na xel-la' wezría na'. Chee le' na' gate gulaj Isaac, zrí'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zrí'ine', Jacob, ne cá'anqueze ben Jacob chee zrí'ine' ca', benne' ca' gulaque' xra chazrinnu cue' benne' Israel.

⁹ 'Zrí'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutie-be' chee chu'ube' lu na' benne' guchínene'-be' lu xezr la xu Egipto. Dios guzúalene' José, ¹⁰ na' bselé'-be' lu xúgute da zi' da xa'. Bnézruje'-be' xel-la' dxéajni'i, na' ben Dios bezaca ba lázrele Faraón José na'. Faraón nigá guque' wenná bea lu xezr la xu Egipto, na' bzue' José gácabe' benne' xu'u lu ne'e xezr la xu Egipto na', ne benne' walizre Faraón na'.

¹¹ 'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrélene' da xelawe'. ¹² Gate ben Jacob de zrua' xtila lu xezr la xu Egipto, na' gusel-le' na' zrí'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. ¹³ Da gudxupe' lasa xjaque' na', José ble'e lawe' benne' biche' ca', na' ca'an guca guneze wenná bea chee Egipto ga benne' José na'. ¹⁴ Nadxa José gunná bé'ene' xejlexrí'e xre', ne ca naca xrtia ljwezre', zaj naque' ga xun chínue'. ¹⁵ Ca'an guca, Jacob xejúsúe' Egipto naga gutie', ne naga gulátequeze xra xrtáudxu ca'. ¹⁶ Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzú' Abraham nen dumí da gudízruje' bi ca' zrí'ine Hamor lu xezre Siquem na'.

¹⁷ 'Gate ba zua gagu zra gaca li da guchebe lazre' Dios da na' ben chúchue' lau Abraham, na' benne' Israel zaj zre'e xezr la xu Egipto gulánle'e. ¹⁸ Nadxa guzú lau dxenná bea tu wenná bea lu xezr la xu Egipto, benne' quebe núnbe'e José. ¹⁹ Wenná bea nigá guzú xe'e benne' ljwézredxu, ne bzálaje' xra xrtáudxu ca', na' gunná bé'ene' le' cheajlecá'ane'-be' bidu dxe'ene chee' ca' chee xelátebe'. ²⁰ Lu zra ca' gulaj Moisés,

ne gúcabe' tu bidau' bezaca ba lazre' Dios cheebe', na' xra xrnabe' bulusegule'-be' lizre' chunna beu'. ²¹ Gate bzin zra zxa-la' cheajlega'ane'-be', na' bi nu'ula chee wenná bea na' bequé'e-be', ne bsegule'-be' ca zrí'inequeze'. ²² Chee le na', Moisés guzédebe' ca naca xel-la' sina chee Egipto, na' gúcabe' tu benne' nape' xel-la' dxenná bea ca naca da gunné', ne da bene'.

²³ 'Gate bzrie' chua iza, Moisés guca lazre' cheajnné'e benne' ljwezre', benne' Israel ca'. ²⁴ Blé'ene' tu benne' Egipto dxu'e tu benne' Israel. Chee gúcalene' benne' na', ne chee bebéaj lazre' bènea', betie' benne' Egipto na'. ²⁵ Moisés gúquene' benne' lazrie', benne' Israel ca', xeque bé'ene' Dios guselé' benne' ca' ne chee le'. Benne' ca' quebe guleque bé'ene' na. ²⁶ Zra xula Moisés blé'ene' chupa benne' Israel dxeledile', na' lawe' da guca lazre' xezezá zrie' benne' ca', na' guzre' le': "Le'e nácale biche ljwézrele. ¿Bizr chee na' dxue ljwézrele?" ²⁷ Nadxa benne' na' dxu'e benne' ljwezre' bzriague' Moisés, na' guzre' le': "¿Nu bzua lue' ca benne' xíchaje cheentu' chee guchi'u ca da dxuntu'?" ²⁸ ¿Dxaca lazru' gutiu' neda' ca benu' neaje, betiu' benne' Egipto na'?" ²⁹ Ca ben Moisés da nigá, na' bzrúnajé' zexíaje' lu xezr la xu chee benne' Madián ca'. Na' guzúe' ca tu benne' zitu', na' bchaga ná'lene' nu'ula, na' gulaj chupa zrí'ine'.

³⁰ 'Ca gudé chua iza, gate zue' le'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa le' tu lu xi' da dxe' lu xeche' bisigá. ³¹ Moisés bzrebe' ca naca da blé'ene', san gate gubigue' chee le'e xánnene', benne' chi'i Xránadxu, dxenné': ³² "Neda' naca' Dios chee xra xrta'u ca', Dios chee Abraham, ne Dios chee Isaac, ne Dios chee Jacob." Nadxa Moisés guzú lau dxezrízie' lu xel-la' dxezebe, na' quebe bexázejene' nne'e. ³³ Xránadxu guzre' le': "Guleaj zrelu' xu'u ni'u lawe' da naca lá'azxa lataj naga dxeléaju'. ³⁴ Neda' ba ble'eda' ca naca da dxelezaca zi' bèneache chia' zaj zre'e lu xezr la xu Egipto. Dxenda' ca dxelebezre xache', ne ba bla'a chee guselá' benne' ca'. Gudá lue', sel-la' lue' lu xezr la xu Egipto."

³⁵ 'Lácala benne' ca' buluzúe' Moisés chalá'ala, gulé'e le': "¿Nu bzua lue' ca benne' xíchaje cheentu' chee guchi'u ca da dxuntu'?" Dios gusel-le' le' ca benne' xíchaje, ne benne' guselá le', ne chee gubáz chee xabáa na' ble'e lawe' le' lu xeche' bisigá. ³⁶ Moisés na' bebéaje' xra xrtáudxu ca' lu xezr la xu Egipto, ne bene' xel-la' waca ca', ne da gulunna bea na da bene' lu xezr la xu na', ne lu nísadau' Xrna, ne le'e xixre' lawe' lataj da chua iza na'. ³⁷ Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' ládujla xrtia

ljwézrele le'e, ca gusel-le' neda'. Chee Le' le xen." ³⁸ Cá'anqueze Moisés nigá, bënnea' guzúale benne' ca' le'e xixre' lawe' lataj, tu zren nen gubáz chee xabáa na' bchálajle le' lu xi'a Sinaí, guzúaleñe' xra xrtáudxu ca', ne guzi'e dizra' chee xel-la' nabán chee bde'e' na cheentu'.

³⁹ 'Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chala'ala, ne gulaca lazre' xelexezrine' Egipto. ⁴⁰ Gate cabí zue' Moisés ga na' gulé'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bënnea' bebéaje' netu' lu xezr la xu Egipto." ⁴¹ Nadxa belune' tu bedáu' guca na ca tu bézredau', ne belutie' be xixre'du ca' lau bedáu' na', ne gulebene' chee da zaj nune'. ⁴² Nadxa Dios becuase' nen benne' ca', na' be'e le' lataj belúe lá'ane' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxelenné':

Le'e, benne' Israel ca', ¿guzríale-ba' chia' neda' be xixre'du ca' bétele

dute' chua iza gate na' guzúale le'e xixre' lawe' lataj?

⁴³ ¡Cabí! Bíale xudau' xide zra be xixre' chee dios chee le, Moloc, ne xudau' chee belaj nazí le na Renfán, dios chee le, bedáu' ca' bënquezele le'e chee be lá'anale na. Chee le na' cuéaja' le'e lu xezr la xu chee le, ne sel-la' le'e dédedxa ca naga dxe' Babilonia.

⁴⁴ 'Le'e xixre' lawe' lataj na' xra xrtáudxu ca' belune' tu xudau' xide naga buluzrá chawe' blaga' xiaj naga naxúaj da nadxixruj bea na. Belune' na ca naca da ble'e Dios Moisés, gate guzre' le' guné' na ca naca da na' ba blé'ene'. ⁴⁵ Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequé'e xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézruje' xezr la xu nigá chee xra xrtáudxu ca'. Ca'an guca ca bzrinte' zra ca' zua David. ⁴⁶ Wenná bea David na', Dios bezaca ba lazre' chee', na' guca lazre' David guné' tu xudau' naga sua Dios chee Jacob. ⁴⁷ Salomón, zri'ine David, bene' lizre Dios na'. ⁴⁸ Dios szrente' quebe zue' lu xudau' ca' da zaj nun bënneache. Caní gunná tu benne' bchálaje' waláz chee Dios, gunné':

⁴⁹ Xabáa naca lataj naga dxe'a, na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

⁵⁰ ¿Quegá neda' bënqueza' da ca'?

⁵¹ Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. ⁵² Xra xrtáule ca' buluzría xi'e xúgute benne' ca' buluchálaje' waláz chee Dios. Belutie' benne' ca' buluchálaje' nédxudautē ca dxal-la' gaca chee benne' xrlátaje nigá, na' gate blē'e, lé'equezle bdele Le' lu na' benne' ca' guledábague' Le', ne bétele Le'. ⁵³ Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

Dxelutie' Esteban

⁵⁴ Gate belén benne' ca' da caní, na' gulagu lazxe' lu xel-la' dxelezá'a Esteban. ⁵⁵ Nadxa Esteban, zúale Be' Lá'azxa le', gunné'e xabáa, ne blé'ene' xel-la' szren chee Dios, na' Jesús ze' chalá'a xabēla chee Dios. ⁵⁶ Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bénneache ze' chalá'a xabēla chee Dios.

⁵⁷ Benne' ca' bulusézxuje' nague', na' gulebezre xe'e, ne xeajlechía che'e Esteban na'. ⁵⁸ Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ane' zra lane' lu na' tu benne' cuide' le' Saulo. ⁵⁹ Dxácate dxuluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be' nácaqueza'.

⁶⁰ Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutie'.

8

Saulo dxenáu zi' xuzre' benne' ca' dxeléajle'e chee Jesús

¹ Saulo guque' tuze nen benne' ca' belutie' Esteban.

Lu zra ná'queze gulezú lawe' dxelau zi' xuzre' benne' ca' dxeléajle'e chee Jesús, benne' ca' zaj zre'e xezre Jerusalén. Xúgute' belexase dinnaje' ca naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ane' xezre Jerusalén na'. ² Bal-la benne' ca' zaj naque' chee Dios bulucache' Esteban na', ne gulebézrele'e chee'. ³ Dxácate na' Saulo dxenáu zi' xuzre' benne' ca' dxeléajle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

Dxuluchálaje' dizra' chawe' chee Jesús naga nababa Samaria

⁴ Benne' ca' chee Cristo, benne' buluzrúnmuje' Jerusalén, buluchálaje' dizra' chawe' chee Jesús gáteteze na' zjaque'.

⁵ Felipe, tue' benne' ca', guxíaje' tu xezre naga nababa Samaria, na' guzú lawe' dxuchálajlene' benne' ca' ca naca chee Cristo. ⁶ Benne' ca' zaj nazrague' belén xánnene' ca da

dxuchalaj Felipe, ne belelé'equeznē' ca naca xel-la' waca ca' da dxunē'. ⁷ Benne' zan, benne' zaj xu'ē be' xriwē' belexexaque', na' be' xriwē' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexexaque'. ⁸ Ca'an guca, gulebéle'e xúgutē benne' ca' lu xēzre na'.

⁹ Zua na' tu benne' le' Simón, nédxutē guque' benne' wazrá', ne guzú xē'e benne' Samaria ca', dxenné' naque' tu benne' szren. ¹⁰ Xúgutē' belén xánnene' chee', benne' cazraze ca', ne benne' blau ca', gulenné':

—Benne' nigá nape' xel-la' szren chee' Dios.

¹¹ Gulape' le' ba lá'ana lawe' da lu xel-la' wazrá' chee' na' guzú xē'e benne' ca' zane' iza. ¹² Gate guléajle'e chee' dizra' chawe' da dxuchalaj Felipe ca dxenná bea Dios, ne ca naca chee' La Jesucristo, xúgutē', benne' biu, ne nu'ula ca', beledxúe' nisa. ¹³ Cá'anqueze Simón na' guxéajle'e chee' Jesús, ne gudxúe' nisa, na' guzú lawe' zéajle' Felipe, na' dxexebánene' ca naca xel-la' waca da za xabáa da dxun Felipe.

¹⁴ Gate benne' gubáz ca' chee' Jesús, benne' zaj zre'e Jerusalén, belenne' gulezí' lu na' benne' Samaria ca' xrtizra' Dios, na' gulesel-le' Pedro ne Juan na'. ¹⁵ Gate belezrine' na', na' belenabe' law Dios chee' benne' Samaria ca' dxeléajle'e chee' Jesús chee' xelezí'e Be' Lá'azxa. ¹⁶ Quebe ne xida Be' Lá'azxa súale' netú benne' ca'. Tuze beledxúaze' nisa lu La Xránadxu Jesús. ¹⁷ Nadxa Pedro ne Juan buluzé ne'e lawe' benne' ca', na' gulezí'e Be' Lá'azxa.

¹⁸ Gate ble'e Simón bla' Be' Lá'azxa gate gubáz ca' buluzé ne'e benne' ca', na' guca lazre' gunézruje' gubáz ca' dumí, ¹⁹ gunné':

—Le gunna neda' xel-la' waca nigá chee' gate guzéa' na'a lawe' núteteze benne', na' si'e Be' Lá'azxa.

²⁰ Nadxa guzre Pedro le':

—Wabía xi' dumí chiu' na' nen lue' lawe' da dxéquenu' wazéquenu' ga'u nen dumí ca da dxúnnaze Dios. ²¹ Quebe naca chiu', ne quebe napu' lataj lu da nigá lawe' da quebe naca xrlátaje xichaj lázrda'u lau Dios. ²² Bsan ca naca da calēla chiu' nigá, ne guta' xue Dios chee' gunite lawe' chiu' ca da gúquenu' lu xichaj lázrda'u. ²³ Dxeque be'eda' nazrate' xichaj lázrda'u da calēla, na' da calēla na' nuchéaj na lue'.

²⁴ Na' bechebe Simón:

—Le gata' xue Xránadxu chia' neda', chee' quebe gaca chia' ca da gunnú'.

²⁵ Ca gudé belexechebe' chee' Jesús, ne buluchálaje' dizra' chee' Dios, na' benne' gubáz ca' buluzenne' bēnneache dizra' chawe' chee' Jesús lu xēzredu ca' zaj nababa Samaria, na' ca gudé na' belexezrine' Jerusalén.

Felipe dxuchálajleṅe' tu benne' chee xezr la xu Etiopía

²⁶ Gudé na' guzre tu gubáz chee xabáa chee Xránadxu Felipe:

—Guxasa, guxíaj chálá'a naga dxedé gubizra beu' zaga ca', naga zrua neza chee Jerusalén da zeaj xezre Gaza, da dxedé na le'e xixre' lawe' lataj.

²⁷ Felipe guxase', na' guzé'e zéaje', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a chee Candace, nu'ula na' dxenná bé'ene' xezr la xu Etiopía. Ba guxíaj benne' nigá Jerusalén chee be lá'ane' Dios. ²⁸ Na'a zexíaje' Etiopía na', dxe'e lu carreta chee' da dxelecá'a bzrina', ne dxulabe' xiche naga zaj naxúaj xrtizra' Isaías, benne' bchálaje' waláz chee Dios.

²⁹ Nadxa gunná Be' Lá'azxa, guzre' Felipe:

—Gubiga gagu cuita carreta na'.

³⁰ Gate gubiga Felipe na' benne' dxulaba bénnea' xiche chee Isaías, na' bchebe' le':

—¿Dxéajni'inu' ca naca da dxulabu'?

³¹ Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'ida' neda'?

Na' guzre' Felipe cuene' cué'leṅe' le'.

³² Naga dxulabe' lu xiche chee Dios dxenná na caní:

Beleché'e Le' naga gatie' ca tu zrila'dau', na' ca zrila' na' dxátaba' zrize lau benne' ca' dxuluchibe' zraba', ca' bénqueze Le', quebe bi gunné'.

³³ Bulucá'ana ditje' Le', ne quebe belú'e lataj nu guchi'a chee', ne quebe nu gaca guchálaje' ca naca chee zri'ine zre sue', lawe' da belutie' Le'.

³⁴ Na' benne' Etiopía na' bchebe' Felipe:

—Gunná, ¿nuzra chee dxenná benne' nigá, cheéqueze' na', che chee xetu' benne' xula?

³⁵ Nadxa guzú lau Felipe bzéajni'ine' le' ca naca naga dxulabe', ne bchálajleṅe' le' dizra' chawe' ca naca chee Jesús.

³⁶ Gate guledé'e tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

³⁷ Felipe guzre' le':

—Che dxéajle'u duté lázrda'u, waca.

Benne' na' bechebe':

—Dxéajle'a naca Jesucristo Zri'ine Dios.

³⁸ Nadxa gunná bé'ene' guleza carreta na', na' dxúpate' gulu'e lu nisa, na' Felipe bchue' le' nisa. ³⁹ Gate belexedxúaje' lu nisa na', na' Be' chee Xránadxu beche'e Felipe naga xula. Benne' Etiopía na' québedxa blé'ene' le', na' bexu'e neza chee' duté xel-la' dxebé. ⁴⁰ Felipe na' guque bé'ene' ba zu'e xezre

Azoto, na' gudé'e tu tu xezre dxuchálaję' dizra' chawe' ca naca cheę Jesús cadxa bezrinę' Cesarea.

9

Saulo dxexaque' benne' cheę Jesús
(Hch. 22.6-16; 26.12-18)

¹ Dxácatę na' Saulo quebe dxusane' dxunę' ba xuzre gutię' benne' ca' dxeléajlę'e cheę Xránadxu. Cheę gunę' caní guxíaję' xeajchálajlęne' bxruze blau. ² Gunabe' xiche da dxulé'e na nape' xel-la' dxenná bea da gu'e chéaję' xudau' ca' zaj nnita xezre Damasco, cheę séquene' cheajxedílaję' benne' ca' dx-eléajlę'e cheę dizra' chawe' cheę Jesús, ne che'e lę', benne' biu, ne nu'ula ca', cheę guzré'e lę' lizre xia lu xezre Jerusalén. ³ Na' gate ne xu'e neza zéaję', ne ca ba zua zrine' xezre Damasco, na' bsaní' tu xi' naga zéaję' da za' xabáa. ⁴ Saulo xeajcházię' lu xu, na' benne' chi'i tu benne' dxę'e lę':

—Saulo, Saulo, ¿bizr cheę na' nau zi' xuzru' neda'?

⁵ Nadxa Saulo bchebę':

—¿Nuzra Lue', Xran?

Na' bėnnea' bechebę':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun bezre gate dxulíbeba' lawe' xágala da dxáduę'-ba'.

⁶ Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' lę':

—Guxasa, guxú'u lu xezre, na' xeléqueze' lue' da dxal-la' gunu'.

⁷ Benne' ca' zjácale Saulo belezrébele'e lawe' da belenne' chi'i benne' na', san quebe nu belelé'ene'. ⁸ Nadxa Saulo bexasę' lu xu na', na' gate guxá' lawe', quebe guca lé'ene'. Ca' guca, belequę'e ne'e, ne guleché'e lę' lu xezre Damasco. ⁹ Guzúę' na' chunna zra quebe dxelé'ene', ne quebe bi güe'e gudawę'.

¹⁰ Lu xezre Damasco na' zua tu benne' dxéajlę'e cheę Jesús lę' Ananías, na' Xránadxu ble'e lawę' lę' tu lu da ble'e lę', na' guzre' lę':

—Ananías.

Na' lę' bechebę':

—Nigá zua', Xran.

¹¹ Nadxa gunná Xránadxu, dxę'e lę':

—Guxasa, guxíaj neza da nazí le na: Neza Li, na' lizre Judas guchębu' cheę tu benne' Tarso, lę' Saulo. Benne' nigá dxuláwizre' Dios. ¹² Tu lu da blé'ene', ba blé'ene' tu benne' lę' Ananías chu'e guzé ne'e lę' cheę xelé'ene'.

¹³ Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgute da calela da dxune' chee benne' ca' dxeléajle'e chiu' Lue' lu xezre Jerusalén. ¹⁴ Na'a ble'e nigá nape' xel-la' dxenná bea chee benne' xíchaje ca' chee bxruze ca', chee che'e lizre xia xúgute benne' dxelenné' Dios lu Lau' Lue'.

¹⁵ Na' Xránadxu guzre' le':

—Guxíaj. Neda' ba gucá'a benne' na' chee cheajzenne' benne' xezr la xu ca', ne benne' wenná bea ca', ne benne' Israel ca', ca naca chia' neda'. ¹⁶ Neda' gul'éda' le' ca naca da zante da saque'e ne chia' neda'.

¹⁷ Nadxa Ananías guzé'e zéaje' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bénnea' ble'e lawe' lue' la neza naga za'u, nasel-le' neda' chee xelé'enu', ne chee súale Be' Lá'azxa lue'.

¹⁸ Ca' guca beléxrujte lu xiaj lawe' da zaj naca ca xrlacu bela, na' belé'ene'. Na' bexasa Saulo, ne gudxúate' nisa. ¹⁹ Gudé na' gudawe', ne bedipe'. Begá'ane' tu chupa zra nen benne' Damasco ca' dxeléajle'e chee Jesús.

Saulo dxuchálaje' chee Jesús lu xezre Damasco

²⁰ Nadxa guzú lau Saulo dxuchálaje' chee Jesús lu xu'u ga dxelezraga judío ca' zaj nnite' Damasco, dxenné' Jesús naque' Zri'ine Dios. ²¹ Xúgute benne' belénene' chee' belexebánene', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' ble'e nigá chee che'e benne' ca' xezre Jerusalén chee gudé'e le' lu na' benne' xíchaje ca' chee bxruze ca'?

²² Saulo bchálajdxé' du lazre' chee Jesús, ne dxulé'ene' Jesús naque' Cristo chee Dios, na' bzua zrie' benne' judío ca' zaj zre'e Damasco.

Saulo dxelé' lu na' benne' judío ca'

²³ Ca gudé zane' zra, benne' judío ca' belune' tuze dizra' xelútie' Saulo. ²⁴ Gunezne' le' da nigá. Te zra ne chizrela gulebeza benne' judío ca' dxu'a dxa xu'u ca' naga dxelexedxúaj bénneache xezre na', chee xelútie' le'. ²⁵ Nadxa benne' ca' dxeléajle'e chee Jesús gulegú'e Saulo tu lu xcuite lba zren, na' buluxulétajé' le' chizrela le'e ze'e da naxechaj na xezre. Ca' guca, gulá Saulo.

Saulo dxezrine' Jerusalén

²⁶ Gate bezrín Saulo Jerusalén, guca lazre' gune' tuze benne' ca' dxeléajle'e chee Jesús, san benne' ca' dxelezrebe' le' lawe' da quebe dxeléajle'e ba dxéajle'e Saulo chee Jesús. ²⁷ Bernabé guché'e Saulo, ne bze' le' lau benne' gubáz ca' chee Jesús. Na'

bchálajle Bernabé gubáz ca' ca ble'e Saulo Xránadxu la neza, ne ca ben Xránadxu bchálajlene' Saulo, ne ca bchalaj Saulo du lazre' lu xezre Damasco nen xel-la' dxenná bea chee La Jesús. ²⁸ Nadxa Saulo begá'ang' Jerusalén, dxedálene' benne' ca'. ²⁹ Bchalaj Saulo du lazre' lu La Xránadxu, dxuchálajlene' benne' ca' dxelenné' dizra' griego, san benne' caní gulaca lazre' xelútié' le'. ³⁰ Gate guleque be'e biche ljwézredxu da caní, na' guleché'e Saulo lu xezre Cesarea, na' lu xezre na' guleselle' le' xezre Tarso.

³¹ Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale Be' Lá'azxa le', gulane'.

Pedro dxexung' Eneas

³² Gate dxedá Pedro dxeajnné'e biche ljwézredxu ca', na' guxíajqueze' xejnné'e benne' ca' dxeléajle'e chee Jesús lu xezre Lida. ³³ Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. ³⁴ Na' gunná Pedro, dxé'e le':

—Eneas, Jesucristo ba bexung' lue'. Bexasa, ne butube da'a chiu'.

Na' bexásate Eneas na'. ³⁵ Belelé'e xúgute benne' le', benne' zaj zre'e xezre Lida, ne xezre Sarón, na' belexaque' chee Xránadxu.

Dorcax dxexebane' ládujla benne' gate

³⁶ Lu zra na' zua tu nu'ula le' Tabita lu xezre Jope. Dxéajle'e chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalene' benne' xache' ca'. ³⁷ Lu zra ca' guxú'u Dorcas xel-la' we', na' gutié'. Na' bulugazje' le', ne belexrué' le' tu lu xu'u naga zua gudxupe' cuía dxala. ³⁸ Xezre Jope na' zua na gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' guleselle' chupa benne' biu cheajleguezre' le':

—Gudázega xezre Jope.

³⁹ Nadxa Pedro guxíajlene' benne' ca'. Gate bzrine' na', na' beleché'e le' naga zrua Dorcas na', na' xúgute nu'ula ca' ba zaj nate benne' chie' zaj naxéchaje' Pedro dxelebezre', ne dxululé'ene' le' zra nu'ula, ne zra benne' biu, da ca' ben Dorcas na' gate ne zue' nen benne' ca'. ⁴⁰ Nadxa guleaj Pedro xúgute benne' ca', na' bzu zribe' bchálajlene' Dios. Na' gunné'e nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'ene' Pedro, bexase' gudxé'e. ⁴¹ Na' Pedro bequé'e ne'e, bechise' le'. Nadxa gunné' biche ljwézredxu ca', ne nu'ula ca' ba gute benne' biu chee', na'

blé'ene' benne' ca' le' naca banē'. ⁴² Ca guca da nigá belén ca naca benne' zaj zre'e xezre Jope, na' benne' zan guléajle'e chee Xránadxu. ⁴³ Pedro begá'ane' zane' zra lu xezre na' lizre Simón, tu benne' dxucá'ana chawe' xide zra be xixre'.

10

Pedro ne Cornelio

¹ Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazí le na Benne' Italia Zjaque' Wedil-la. ² Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'aqueze dxunézrujle'e dumí dxácalene' benne' judío ca', ne tu dxuchálajlezqueze' Dios. ³ Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee xabáa naga zue', na' guzre' le':

—Cornelio.

⁴ Cornelio guzúe' dxenné'e gubáz chee xabáa na' dute xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. ⁵ Gusel-la benne' chjaque' xezre Jope, cheajlenné' Simón, bénnea' léqueze' Pedro. ⁶ Zue' lizre xetú benne' le' Simón, benne' dxucá'ana chawe' xide zra be xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

⁷ Gate bezá' gubáz chee xabáa na' bchálajlene' le', na' gunné Cornelio chupa bi wen zrin chee', ne tu benne' dxeje' wedilla, ne dxape' Dios ba lá'ana, ne zúaqueze' lizre Cornelio na'. ⁸ Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

⁹ Zra xula, dxácatē zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagu-bizra chee guchálajlene' Dios. ¹⁰ Ba dxedúnle'e, ne guca lazre' gawe', na' dxácatē ne dxulucueze' da gawe', blé'ene' tu da ble'e Dios le'. ¹¹ Blé'ene' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápatē la'a chee na. ¹² Lawe' ladxe' na' zaj zria xúgutē cue' be xixre', be zria tapa ni'a na'ba', ne be snia ca', ne be zua xrila ca'. ¹³ Nadxa benne' tu chí'i benne' dxe'e le':

—Guxasa, Pedro. Bete tu bea ca' chee gagu'-ba'.

¹⁴ Pedro bechebe':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

¹⁵ Benne' na' bchálaje' da xula, dxe'e le':

—Da ba nucá'ana chawe' Dios, quebe nnau' lue' naca na sban.

¹⁶ Da nigá guca na chunna lasa, na' ladxe' na' begüén na xabáala. ¹⁷ Dxácatę dxe' Pedro dxulaba lazrę' bi zéaję ca naca da blé'ene', na' belezrín benne' ca' nasel-la Cornelio dxu'a dxa xu'u, dxuluchebe' ga zua lizre Simón. ¹⁸ Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bėnnea' léqueze' Pedro. ¹⁹ Gate Pedro ne dxulaba lazrę' ca naca da blé'ene', na' Be' Lá'azxa guzrę' le':

—Gunná'xque, chunna benne' dxelexılaję' lue'. ²⁰ Guxasa, bexetaj. Guxıaję benne' ca', ne quebe gun chupa lazru' lawe' da nasel-la' neda' benne' ca'.

²¹ Nadxa Pedro bexétaję' naga zaj zra' benne' ca' nasel-la Cornelio, na' guzrę' le':

—Neda' na' dxexılajle le'e. ¿Bizra cheę za'le?

²² Benne' ca' belexechebe':

—Za'ntu' waláz cheę Cornelio, benne' dxenná be'e lu wedilla. Naque' benne' xrlátaję, ne dxezrebe' Dios, na' xúgute benne' judío ca' dxelape' le' ba lá'ana, ne zaj nazrí'ine' le'. Tu gubáz cheę xabáa cheę Dios guzrę' le' dxal-la' sel-le' benne' xedajlenné' lue' xidu' lizrę' cheę xenne' ca da dxal-la' xu'u le'.

²³ Nadxa Pedro bzrę'e benne' ca' xu'u na', na' belexegá'ane' nen le' xela na'. Zra xula guxıaję Pedro benne' ca', na' xjácale bal-la biche ljwézredxu le', benne' zaj zrę'e Jope.

²⁴ Zra gudxupe' zra belezrine' xezre Cesarea naga zua Cornelio dxebeze' le', ne zrale bal-la benne' xrtie' le', ne xezıacaxa benne' ljwezrę', benne' ca' gunné'. ²⁵ Gate bžrin Pedro chale'aj, bdxuaj Cornelio guzı' lu ne'e le'. Bzu zrıbe' lau Pedro cheę gucá'ana szrene' le'. ²⁶ Pedro bechise' le', dxenné':

—Guzé. La gázqueze neda' naca' bėnneache ca lue'.

²⁷ Dxácatę dxuchálaję Pedro Cornelio, gulu'e lu xu'ula, na' blé'ene' benne' zan zaj nazrague' na'. ²⁸ Nadxa gunná Pedro, dxę'e le':

—Nézquezle le'e quebe dxunna da nadxixruj bea cheę judío ca' neda' lataj gaca' tuze nen benne' quebe zaj naque' judío u chu'a lizrę'. Na'a Dios ba blé'ene' neda' quebe dxal-la' nnia' cheę netú benne', quebe nnia' naque' sban, u naque' benne' quebe gapa' ba lá'ana. ²⁹ Cheę le' na', gate gulenné' neda', la guzá'tea', ne quebe bęn chupa lazra'. Dxaca lazra' nezda' bi cheę na' gunnele neda'.

³⁰ Nadxa bechebe Cornelio:

—Ba zeaj tapa zra ca zúadxu na'a, zua' lizra' nigá dxuna' gubasa, ne dxuchálajęna' Dios, gate ble'e lau tu benne' neda', nacie' zra lane' da dxácatite na. ³¹ Benne' na' guzrę' neda': “Cornelio, Dios ba benne' da dxuchálajęnu' Le', na' nézene' ca da dxunu' dxácalęnu' benne' xache' ca'. ³² Gusel-la benne'

chjaque' xezre Jope, cheajlexri'e Simón, bènnea' léqueze' Pedro. Zue' lizre xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xide' nigá, na' guchálajlene' lue'." ³³ Ca'an guca, gusél-latea' benne' ca' bedajlexedilaje' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute ca da gunná be'e Xránadxu lue' guchálajlenu' netu'.

Da bchalaj Pedro lizre Cornelio

³⁴ Nadxa guzú lau Pedro dxuchálaje', dxenné':

—Na'a dxéajni'ida' Dios quebe dxebéaje' bál-laze bènneache, ³⁵ Na' xúgute xezr la xu Dios dxezí' lu ne'e benne' ca' dx-elezrebe Le', ne dxelune' da xrlátaje. ³⁶ Dios bchálajlene' zri'ine zre sua Israel ca', ne bchálaje' dizra' chawe' chee xel-la' dxebeza zri lazre', da dxezidxu ne chee Jesucristo, Bènnea' naque' Xrana xúgute bènneache. ³⁷ Le'e ba nézquezle ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bènneache nisa. ³⁸ Nézele ca ben Dios, bnézuje' Jesús, benne' Nazaret, xel-la' waca chee Be' Lá'azxa, ne ca gudá Le' dxune' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúale Dios Le'. ³⁹ Netu' dxexeché'bentu' chee da caní, xúgute da ben Jesús naga nababa Galilea, ne da bene' lu xezre Jerusalén. Gudé na' belutie' Le', gate buludé'e Le' xaga béguaj, ⁴⁰ na' Dios bsebane' Le' gate guca chunna zra, na' be'e lataj ble'e lau Jesús netu'. ⁴¹ Quebe ble'e lawe' xúgute bènneache, san launtu' nétu'ze, nácantu' benne' ca' guleaj Dios nédxudaute chee xeché'bentu' chee da caní. Netu' güe'e gudáguntu' nen Le' gate gudé bebane' ládujla benne' gate. ⁴² Gusel-le' netu' guchálajlentu' bènneache, ne xeché'bentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. ⁴³ La gázqueze nédxudaute gulenná xúgute benne' ca' buluchálaje' waláz chee Dios, buluchálaje' ca dxal-la' gaca chee Jesús, gulenné' xúgute benne' xeléajle'e chee Jesús, na' ne chee Le' Dios gunite lawe' xtul-la benne' ca'.

Benne' quebe zaj naque' judío dxelezi'e Be' Lá'azxa

⁴⁴ Ne dxuchalaj Pedro gate bzrin Be' Lá'azxa bedajsúalene' xúgute benne' ca' dxelenne' da dxuchalaj Pedro. ⁴⁵ Benne' judío ca' dxeléajle'e chee Jesús, benne' ca' zá'acalene' Pedro, belexebánene' gate guleque bé'ene' ba zúale Be' Lá'azxa benne' ca' quebe zaj naque' judío. ⁴⁶ Dxeleque bé'ene' na lawe' da belenne' dxuluchalaj benne' ca' dizra' chee benne' xula, ne dxelúe lá'ane' Dios. ⁴⁷ Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezí'ē Be' Lá'azxa ca bentu' netu'?

⁴⁸ Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

11

Pedro dxuzenne' benne' gubáz ca' zaj zre'ē Jerusalén ca naca da bene'

¹ Benne' gubáz ca', ne biche ljwézredxu ca' zaj zre'ē Jerusalén belenne' ba gulezí' lu na' benne' quebe zaj naque' judío dizra' chee Dios. ² Gate bezrín Pedro xezre Jerusalén, gulezí' tizra' benne' ca' le', benne' ca' dxeleñné' dxal-la' chugu late' be'la' chee benne' ca' zaj naque' chee Dios. ³ Benne' caní buluchebe' Pedro:

—¿Bizr chee na' guxíaju' xeajsúalenu' benne' ca' quebe zaj naque' judío, ne gudágulenu' le'?

⁴ Nadxa Pedro bzenne' benne' ca' xúgute da guca cha chee na, gunné':

⁵ —Neda' zua' lu xezre Jope, na' gate dxuchálajlena' Dios, ble'eda' tu da ble'e Dios neda'. Ble'eda' tu ladxe' zren nadxéaj dápatē la'a chee na, da dxetaj na xabáa, ne bedajsé na lawa'.

⁶ Gate gunná' xánnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrílabá'.

⁷ Na' benda' tu chi'i benne' guzre' neda': "Guxasa Pedro, bete tu bea ca', na' gagu'-ba'." ⁸ Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bēneache, ne quegá da naca sban. ⁹ Nadxa bēnea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban."

¹⁰ Da nigá guca na chunna lasa, na' ca gudé na' xúgute da ca' belexegüén na xabáa. ¹¹ Lu zra ná'queze belelá' chunna benne' lu xu'u naga zua', benne' ca' gusel-la tu benne' zua

Cesarea chee zedajlexedilaj neda'. ¹² Be' Lá'azxa gunná bé'ene' neda' chéajlena' benne' ca', ne quebe gun chupa lazra'. La gázqueze gusiá'cale xrupa benne' biche ljwézredxu caní neda'. Xúgutentu' guxú'untu' lizre tu benne'. ¹³ Le' bchálajlene' netu' ca blé'ene' lizre' tu gubáz chee xabáa, ze ni'e, ne guzre' le':

"Gusel-la benne' chjaca xezre Jope chee cheajleñné' Simón, benne' léqueze' Pedro. ¹⁴ Benne' nigá xe'e lue' aja gunu' chee lau' lue', ne xeeléa xúgute benne' zaj zre'ē lizru'."

¹⁵ Gate guzú lawa' dxuchálajlena' benne' ca', na' bzrin Be' Lá'azxa guzúalene' benne' ca', ca ble'e guzúalene' dxi'u nédxudaute.

¹⁶ Nadxa xeajsá lazra' ca gunná Xránadxu, gunné': "Da li Juan bchue' bēneache nisa, na' gaca chee da zéaje xel-la' dxedxúa

nisa, súalę Be' Lá'azxa le'e." 17 Che Dios bnézruje' cheę benne' ca' ca benne' dxi'u, guxéajlędxu cheę Xránadxu Jesucristo, ħnuzra naca' neda' cheę tábaga' Dios?

18 Nadxa gate biche ljwézredxu ca' zaj zře'ę Jerusalén benne' da caní, na' gulezúa zrie', ne gulezú lawę' dxelúe lá'ane' Dios, dxelenné':

—Ca' naca, la gázqueze dxunna Dios lataj benne' quebe zaj naque' judío xelexebí'i lazře' cheę xezezi'ę xel-la' nabán zeajlí canna.

Benne' dxeléajlę'ę cheę Jesús zaj zře'ę xęzre Antioquía

19 Gate belutie' Esteban, na' belau zi' xuzře' xezícala benne' dxeléajlę'ę cheę Jesús, na' bal-le' buluzrúnnaje', xjaque' xęzre Fenicia, ne lu xu Chipre, ne xęzre Antioquía. Gate belezrine' lataj ca', na' buluchálaje' dizra' cheę Jesús lau benne' judío cá'aze, ne quegá lau benne' quebe zaj naque' judío. 20 Nadxa bal-la benne' dxeléajlę'ę cheę Jesús, benne' Chipre, ne benne' Cirene, belelé'ę xęzre Antioquía, na' buluchálajlęne' benne' ca' quebe zaj naque' judío, ne buluzenne' le' dizra' chawe' ca naca cheę Xránadxu Jesús. 21 Xel-la' waca cheę Xránadxu guzúale na benne' ca', na' ca'an guca, benne' zan belexexaque' cheę Xránadxu.

22 Gate belén benne' ca' da nigá, benne' dxeléajlę'ę cheę Jesús zaj zře'ę Jerusalén, na' gulesel-le' Bernabé xęzre Antioquía. 23 Gate bzrin Bernabé na', blé'ene' ca da chawe' da dxun Dios cheę benne' ca', na' gubéle'ęne'. Na' bsízrene' xúgute benne' ca' cheę xelezúa chúchue' lu da naca cheę Xránadxu. 24 Bernabé naque' benne' xrlátaje, na' zúalę Be' Lá'azxa le', ne dutę lázrdawę' dxéajlę'ę cheę Jesús. Ca'an guca, ne cheę le' guléajlę benne' zan cheę Xránadxu.

25 Gudé na' guxíaj Bernabé xęzre Tarso, zeajxedílaje' Saulo, na' gate bezrelne' le', beche'ę le' Antioquía. 26 Gulezúe' na' tu iza naxá' nen benne' ca' dxeléajlę'ę cheę Jesús, na' bulusédenę' benne' zan. Lu xęzre Antioquía na' guca na da nedxu gulé'ę benne' ca' dxeléajlę'ę cheę Xránadxu, Benne' Cristiano.

27 Ca lu zra ca', bal-la benne' dxelenné' waláz cheę Dios besiá'que' Jerusalén, xjaque' Antioquía. 28 Tu benne' ca' le' Agabo guzé' lówela biche ljwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xęzr la xu, na' gubina' nigá guca na gate naca Claudio benne' dxenná bé'ene' ca naca xęzr la xu Roma. 29 Nadxa benne' ca' dxeléajlę'ę cheę Jesús, benne' zaj zře'ę Antioquía belún zi' lazře' xelesel-le' da gácale na biche ljwézredxu zaj zře'ę xęzre ca' zaj nababa Judea, ca da xezezeque' tu tuę' xulunézruje'. 30 Ca'an belune', na' belesel-le' tu guna' lau benne' gula ca' cheę Cristo zaj zře'ę Judea, na' Bernabé ne Saulo belú'ę na na'.

12

Dxelutië' Jacobo ne dxelegú'ë Pedro lizre xia

¹ Lu zra ca' guzú lau wenná bea Herodes nau zi' xuzre' bal-la benne' ca' dxeléajle'ë cheë Jesús. ² Gunná bé'ene' be-lutië' Jacobo, biche Juan nen xia nalá. ³ Gate ble'e Herodes dxelexezaca ba lazre' benne' judío ca' ca naca da bene', na' gudël-le' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj cheë xeta xtila. ⁴ Ca gudé gudël-le' Pedro, na' gulu'ë le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúe' Pedro lau benne' xezre ca' te laní. ⁵ Ca'an guca xu'u Pedro lizre xia naga dxuluxúe xánnie' le', na' benne' biche ljwézredxu ca' buluchálajlequeze' Dios du lazre'.

Dios dxuselé' Pedro lizre xia

⁶ Dxe-la xanne' ca za chaní' zra xula gate dxal-la' guzúa Herodes le' lau benne' xezre ca', Pedro de' dxásie' laduj chupa benne' dxjaque' wedil-la, nadxéajë' chupa du xia, na' xebal-la benne' dxjaca wedil-la zaj zre'ë dxu'a dxa xu'u dxuluxúe' lizre xia na'. ⁷ Nadxa ble'e lau tu gubáz cheë xabáa cheë Xránadxu, na' ca naca lizre xia na' guxaní'. Na' gubáz cheë xabáa na' bte' le'ë Pedro, ne bsebanë' le', na' guzre' le':

—Guxásache.

Ca'an guca, du xia ca' belexezeze na na' Pedro. ⁸ Na' gunná gubáz cheë xabáa na', guzre' le':

—Besí le'u, ne buléaj zrelu'.

Gate bexuzre ben Pedro da na', na' guzre gubáz cheë xabáa na' le':

—Guxrúa xicha chiu' cuxru', ne gudále neda'.

⁹ Pedro bedxúaje' cuzru gubáz cheë xabáa na', ne quebe nézene' che naca da li che cabí ca da dxun gubáz cheë xabáa na'. Dxéquene' dxelé'ene' tu da dxulé'e Dios le'. ¹⁰ Belexedéë' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na bjalaj na. Belexedxúaje', na' ca gudé besiá'que' belezrine' xetú neza xula cheë xezr na', na' bca'ana gubáz cheë xabáa na' leze'. ¹¹ Nadxa guque be'e Pedro ba bedxúaje', na' guzá' lazre', gunné': Na'a dxelé'eda' naca na da li. Xrana' gusel-le' gubáz cheë xabáa cheë cheë bselé' neda' lu na' Herodes, ne lu xúgute da gulaca lazre' judío ca' xelune' chia'.

¹² Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalëne' Pedro. ¹³ Gate

gunné Pedro dxu'a dxa xu'u na', bzrin na' tu bi nu'ula lebe' Rode zeajnabe' nu na'. ¹⁴ Gate bexúnbeabe' chi'i Pedro, quebe gusalajbe' dxa xu'u. Xel-la' dxebé cheebe' zexíaj chégube' naga zaj nazraga benne' ca' chee zeajézrebe' benne' ca' ze Pedro dxu'a dxa xu'u. ¹⁵ Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

¹⁶ Dxácatē na' ze Pedro tu dxennézqueze' dxu'a dxa xu'u. Na' gate gulesálaje', ne belelé'ene' Pedro, na' belexebánene'. ¹⁷ Pedro guchisa ne'e chee xelezúa benne' ca' zrize, na' bchálajlene' benne' ca' ca ben Xránadxu bebéaje' le' lizre xia. Na' guzre' benne' ca':

—Le guzén Jacobo, ne biche ljwézredxu ca' ca naca da nigá.

Nadxa bezé'e zexíaje' naga xula.

¹⁸ Gate guxaní', gulezúale'e stebe benne' dxjaque' wedil-la ca' lawe' da quebe zaj nézene' aja guca chee Pedro. ¹⁹ Herodes gunná bé'ene' xelexilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'ene' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxíaje' xaajsúe' xezre Cesarea.

Dxate Herodes

²⁰ Herodes dxezré'e benne' ca' zaj zré'e xezre Tiro, ne xezre Sidón. Benne' chee xezre ca' belune' tuze dizra' chee cheajlelé'e cuine' lau Herodes na'. Belune' Blasto benne' ljwezre'. Naque' tu benne' blau chee wenná bea Herodes, na' gulesel-le' le' lau Herodes na' chee nabe' le' sua zri ca naca da dxaca chee Herodes nen benne' ca'. Caní belune' lawe' da nédxute dxelagu benne' xezre Tiro, ne Sidón da guzá' xezre Cesarea naga zua Herodes. ²¹ Nadxa Herodes bzuē' tu zra xelezrín benne' ca' lawe'. Lu zra na' Herodes gucuē' zra lane' da zácale'e, na' gudxé'e lataj blau chee', ne bchálajlene' benne' zan ca'. ²² Nadxa benne' zan ca' gulezú lawe' dxelenné' zizraj:

—¡Benne' nigá dxuchálaje' quebe naque' beníácheze! ¡Dios na'!

²³ Zra na'te tu gubáz chee xabáa chee Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gútete'.

²⁴ Bzriluj dizra' chawe' chee Xránadxu, na' benne' ca' bu-luchálaje' ca naca na gáteteze na'.

²⁵ Gate belezúe Bernabé, ne Saulo zrin dxelune' lu xezre Jerusalén, besiá'que' xezre na', zaj naché'e Juan, bi na' léquezebe' Marcos.

13

Bernabé ne Saulo dxelezú lawe' dxeledé' dxuluchálaje' dizra' chee Dios

¹ Ládujla benne' ca' zaj nazraga chee Cristo lu xezre Antioquía zaj zra' benne' ca' dxelenné' waláz chee Dios, ne benne' ca' dxulusédene' bènneache xrtizra' Dios. Ládujla benne' caní zaj zua Bernabé, ne Simón, bènnea' léqueze' benne' gasaj, ne Lucio, benne' xezre Cirene, ne Manaén, benne' gúlalebe' Herodes, benne' xu'u lu ne'e xezr la xu Galilea na', ne Saulo. ² Tu zra gate benne' caní zaj zre'e dxelúe lá'ane' Dios, ne dxelune' gubasa, Be' Lá'azxa gunné':

—Le cueaj Bernabé, ne Saulo chee xelune' zrin na' da gunnéa' le' xelune'.

³ Chee le na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé le' dizra'.

Dxupa benne' gubáz ca' dxuluchálaje' dizra' chee Dios lu xezr la xu Chipre

⁴ Gudé na', ca gusel-la Be' Lá'azxa le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee chjaque' lu xezr la xu da naxečaj nísadau' da nazí le na Chipre. ⁵ Gate belezrine' na', na' belexedxúaje' lu da dxedá lawe' nísadau' naga zua xezre Salamina, na' gulezú lawe' dxuluchálaje' dizra' chee Dios lu xudau' ca' chee benne' judío ca'. Juan zéajlequezebe' gubáz ca' chee gácalebe' le'. ⁶ Na' guledé' xúguté xézredu ca' da zaj nnita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálaje' waláz chee Dios. ⁷ Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeajnné' Bernabé, ne Saulo lawe' da dxaca lazre' xenne' dizra' chee Dios. ⁸ Na' benne' wazrá' na', léqueze' Elimas gudábage' gubáz ca' lawe' da guca lazre' quebe chéajle chee Jesús benne' xu'u lu ne'e xezr la xu na'. ⁹ Nadxa Saulo, bènnea' léqueze' Pablo, zúale Be' Lá'azxa le', gunná' dxugüe' le', ¹⁰ na' guzre' le':

—Guzrí xé, benne' wen da calela. Zri'ine da xriwe', ne benne' dxusezxiuj xrneza xúguté bènneache. ¿Bizr chee na' quebe dxusanu' dxuséxiuju' neza chee benne' ca' dxelaca lazre' chjácálene' Xránantu'? ¹¹ Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxaní' chee gubizra.

Benne' na' guzúe' lu da chul-la, na' guzú lawe' dxílaje' nu xecá'a ne'e lawe' da québedxa dxelé'ene'. ¹² Gate ble'e benne' xu'u lu ne'e xezr la xu na' da nigá, na' guxéajle'e chee Jesús

lawe' da bebánene' ca naca da dxusede Pablo ca naca chee Xránadxu.

Pablo ne Bernabé dxelezrine' xezre Antioquía da nababa xezr la xu Pisidia

¹³ Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' belezrine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. ¹⁴ Gudé na' gubáz ca' besíaque' Perge, na' belezrine' xezre Antioquía da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee judío ca', na' gulebé'e. ¹⁵ Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee Dios, na' benne' xíchaje ca' chee xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápaie dizra' da guzéajni'ile netu', waca nnele na na'a.

¹⁶ Nadxa Pablo guxase', na' guchisa ne'e chee xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. ¹⁷ Dios chee xezre Israel guqué'e xra xrtáudxu ca', na' bene' benne' ca' tu cue' benne' zante gate ne zaj zre'e ca benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' duté xel-la' waca chee'. ¹⁸ Dios bchaga lawe' benne' ca' chua iza le'e xixre' lawe' lataj, ¹⁹ na' bzria xi'e gazre cue' bèneache gulezúa lu xezr la xu Canaán, chee bnézruje' xra xrtáudxu ca' xezr la xu chee benne' ca'. ²⁰ Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzin zra zua Samuel, benne' bchálaje' waláz chee Dios. ²¹ Nadxa benne' ca' gulenabe' Dios sua tu benne' gaque' wenná bea chee', na' Dios bzu'e wenná bea tu benne' le' Saúl, zri'ine Cis, tu benne' chee tu cue' benne' judío zaj naque' zri'ine zre sua Benjamín. Saúl nigá guque' wenná bea lawe' chua iza. ²² Gudé na' Dios begüe' Saúl lataj chee', na' bzu'e David gaque' wenná bea chee', na' chee benne' nigá gunné': “Nezda' David, zri'ine Isaí, naque' tu benne' dxune' da dxezaca ba lazra', ne guné' xúgute' da dxaca lazra'.” ²³ Tu benne' zri'ine zre sua David nigá naca Jesús, bènea' bzua Dios chee guselé' benne' Israel ca', ca ba guchebe lazre' chee David. ²⁴ Nédxudxa gate za xida Jesús, Juan bchálajlene' ca naca benne' Israel ca', guzre' benne' ca' dxal-la' xelexebí'i lazre', ne xelexedxúe' nisa. ²⁵ Na' gate ba za cheajsé chee Juan, na' gunné': “Neda' quebe naca bènea' dxéquele naca, san ca te chia' neda' za xetú benne' quebe naca chia' neda' cuéaja' zrele' da xu'u ni'e.”

26 'Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' cheeḷe dizra' nigá cheeḷe lale. 27 Benne' ca' gulezrá' Jerusalén, ne benne' blau chee' ca', quebe belexúnbe'e nu na' Jesús, ne quebe guléajni'ine' dizra' da buluchalaj benne' ca' buluchálajē' waláz cheeḷe Dios da dxelenne' xúguteḷe zra dxulupá'ane'. Ca' guca, benne' ca' belún líqueze' ca' naca da naxúaj na cheeḷe Jesús gate gulechugue' chee' gatie'. 28 Lácala quebe belezrelne' tu da nabaga Jesús cheeḷe xelútie' Le', gulenabe' lau Pilato nna bé'ene' gatie'. 29 Nadxa, gate gudé belune' xúguteḷe da naxúaj na lu xiche cheeḷe Dios ca' naca da dxal-la' gaca cheeḷe Jesús, na' buluxulétaje' Le' xaga béguaj, ne bulucache' Le'. 30 Nadxa Dios bsebane' Le' ládujla benne' gate. 31 Lu zane' zra Jesús ble'e lawe' benne' ca' guledálene' Le' gate bezé'e Galilea dxeaje' Jerusalén, na' na'a, benne' caní dxelexechebe' ca' naca chee' lau bēneache.

32 'Cá'aqueze netu' dxuzénentu' le'e dizra' chawe' ca' naca da guchebe lazre' Dios lau xra xrtáudxu ca'. 33 Ben lie' ca' naca da guchebe lazre' cheedxu dxi'u, nácadxu zri'ine zre sua benne' ca', gate bsebane' Jesús, ca' naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." 34 Dios blé'ene' gusebane' Le' ládujla benne' gate, cheeḷe quebe guzru beḷ-la' dxen chee' gate gunné' lu xiche chee': "Gunna' le'e da chawe' da guchebe lazra' lau David." 35 Cá'aqueze dxenné' xetú lu salmo: "Quebe gu'u lataj guzru beḷ-la' dxen cheeḷe wen zrin chiu', bi nazri'iteḷe lazru'." 36 Da li David bene' zrin cheeḷe benne' ca' zaj zre'e gate zua le', ca' gunná be'e Dios le', san ca' gudé na' gutie', na' bulucache' le' naga belegache xra xrtawe' ca', na' guzru beḷ-la' dxen chee'. 37 Quebe guzru beḷ-la' dxen cheeḷe Bēne'a' bsebán Dios Le'. 38 Biche ljwezra', dxuzenda' le'e, dxal-la' nézele Dios gunite lawe' cheeḷe dul-la cheeḷe ne cheeḷe Jesús. 39 Ne cheeḷe Le', xúguteḷe benne' dxeleajlí lazre' Le', Dios dxunite lawe' cheeḷe benne' ca' ca' naca xúguteḷe da quebe guca gunite lawe' cheeḷe lácala belune' ca' naca da bdxixruj be'e Moisés. 40 Le guxúe xanne' cuínale cheeḷe quebe gaca cheeḷe ca' naca da buluzúaj benne' ca' buluchálajē' waláz cheeḷe Dios, gate gulenné':

41 Le nna', le'e, benne' wen la, ne le xebane, ne le xenite, lawe' da guna' neda', Dios cheeḷe, lu zra cheeḷe, tu da naca da zrente, da quebe chéajlele lácala nu guzén le'e.

42 Gate Pablo ne benne' ljwezre' ca' belexedxúaje' lu xudau' cheeḷe judío ca', na' benne' ca' quebe zaj nálaje' judío gulenabe' le' guchálajlene' le' cheeḷe da caní gate zrin xetú zra dxulupá'ane'. 43 Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelune' da naca cheeḷe Dios, xjálalene' Pablo ne Bernabé. Gubáz caní

buluzéajni'ine' benne' ca' dxal-la' xelezúa chache' lu xel-la' zri'i lazre' chee Dios.

⁴⁴ Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenne' dizra' chee Dios. ⁴⁵ Gate benne' judío ca' belelé'ene' benne' zante zaj nazrague' na', na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. ⁴⁶ Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzénentu' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca chee gápale xel-la' nabán zeajlí canna, chee le na' chéajntu' na'a chálajlentu' benne' quebe zaj naque' judío. ⁴⁷ Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca', ne chee gacu' weselá chee bénneache zaj zre'e ca naca xezr la xu.

⁴⁸ Gate belenne' da nigá, benne' quebe zaj naque' judío gulebéle'ene', na' gulezú lawe' dxelenné' xrlátaje naca dizra' chee Xránadxu, na' guléajle xúgute benne' ca' ba nabéaj Dios chee xelape' xel-la' nabán zeajlí canna. ⁴⁹ Ca' guca, bzriluj dizra' chee Dios du ca naca lu xezre ca' zaj nababa na'. ⁵⁰ Benne' judío ca' buluchálajlene' bal-la nu'ula blau ca' zjácálene' da dxulusédene' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. ⁵¹ Nadxa gubáz ca' belexebibe' bxrte xu da zeajzría na zrele' da dxulé'e na zaj nabaga benne' ca' zria, na' xjaque' lu xezre Iconio. ⁵² Gulebéle'e benne' zaj zre'e Antioquía na', benne' dxeléajle'e chee Jesús, zúale Be' Lá'axza le'.

14

Da belún Pablo ne Bernabé lu xezre Iconio

¹ Gate belezrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío. ² Nadxa benne' judío ca', benne' quebe dxeléajle'e chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'. ³ Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. ⁴ Benne' ca' zaj zre'e xezre na' gulaque' chupa la'a. Bal-le' beledé'e

judío ca', na' xebal-le' beledé'e gubáz ca' chee Jesús. ⁵ Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzrié' le' xiaj. ⁶ Pablo ne Bernabé, gate belenne' ca', buluzrúnajé' zjaque' naga zaj dxé' xezre Listra, ne xezre Derbe, da zaj nababa Licaonia, na' guledé'e ca' naca xézredu ca' chee xezre ca' zaj nababa na', ⁷ na' buluchálaje' na' ca' naca dizra' chawe' chee Jesús.

Dxuluzrié' Pablo xiaj lu xezre Listra

⁸ Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. ⁹ Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' nape' xel-la' dxeají lazre' chee xexaque'. ¹⁰ Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. ¹¹ Gate beledé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca' bènneache ba beledé'e naga zúadxu.

¹² Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. ¹³ Na' bxruze chee dios Júpiter, zua xudau' chee na' ca' dxú'udxu xezre na', guché'e beze ca' ne xiaj zaj nuzé'e na' du, na' bxruze na', ne benne' zan ca' gulaca lazre' xuluxucá'ana szrene' benne' gubáz ca', ne xelútié' beze ca' lau benne' gubáz ca' ca' dxelúnqueze benne' xezre Listra na' chee dios chee'. ¹⁴ Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na' dxelezrebe' bi gun Dios, na' gulu'e lálwela benne' ca', dxelenné' zizraj:

¹⁵ —Le'e, benne', ¿bizr chee na' dxunle da nigá? Netu' nácantu' bènneache ca' lé'equeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajlele chee Dios ban, Bénnea' bene' xabáa ne xezr la xu, ne nísadau', ne xúgute' da de lu'ule na. ¹⁶ Lu iza da ba guledé Dios be'e lataj xúgute' bènneache guledé' lu xrneza cha chee', na' belune' ca' da gulaca lazre', ¹⁷ lálcala blé'equezne' benne' ca' nu' naca Le' ne chee da chawe' da dxune' chee benne' ca'. Le' dxusel-la' xiuj cheedxu ne ca' naca lina xrtante, ne dxunne' da dxechínedxu da gágudxu, ne chee bedxu.

¹⁸ Lálcala gulenná gubáz ca' da nigá, gúcale'e na' stebe buluzague' benne' ca' chee quebe xelútié' beze ca' lau le' chee xuluxucá'ana szrene' le'.

¹⁹ Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bènneache ca', na' buluzrié' Pablo xiaj. Guléquene' ba belutié' Pablo, na' gulezrube

xue' le' belebéaje' le' xezre na'. ²⁰ Gate benne' ca' dxeléajle'e chee Jesús belezrague' zaj naxéchaje' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

²¹ Ca gudé bchálaje' dizra' chawe' chee Jesús lu xezre Derbe, naga benne' zante gulezí' lu ne'e dizra' chee Dios, na' gubáz ca' belexedé'e xezre Listra, ne xezre Iconio, ne xezre Antioquía. ²² Lu xezre caní belún chache' lázrdau benne' ca' dxeléajle'e chee Jesús, ne bulusízrene' le' chjácalene' da naca chee Dios, dxelé'e le':

—Benne' xelu'e naga dxenná bea Dios, xel-la' zi' zrente xeledé'e'.

²³ La gázqueze buluzú'e' benne' gula ca' chee xuluxú'e' tu tu cue' benne' ca' dxeléajle'e chee Jesús, na' ca gudé na' buluzré'e benne' ca' lu na' Xránadxu, Bénnea' ba guléajle'e chee'.

Pablo ne Bernabé dxelexezrine' lu xezre Antioquía da nababa Siria

²⁴ Ca gudé na' belexedé'e' naga nababa Pisidia, na' belezrine' naga nababa Panfilia. ²⁵ Buluchálaje' dizra' chee Dios lu xezre Perge, na' ca gudé na' xjaque' xezre Atalia. ²⁶ Na' belexú'e' da dxedá lawe' nísadau', na' belexezrine' xezre Antioquía, naga zaj zra' benne' belegu'e' gubáz ca' lu na' Dios chee xelune' zrin na', da ba belezuene' na'a. ²⁷ Gate belezrine' Antioquía na', na' bulutupe' benne' ca' dxeléajle'e chee Jesús, ne buluzenne' benne' ca' xúgute' da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e chee Jesús. ²⁸ Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

15

Gubáz ca' chee Jesús dxelexezrague' Jerusalén

¹ Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelé'e biche ljwézredxu ca' dxal-la' chugu late' weaj belá' chee bel-la' dxen chee benne' biu ca' chee xelélé', ca gunná bea Moisés. ² Pablo ne Bernabé bulutíl-lale'e le' dizra', na' naga xeajche'te na, biche ljwézredxu ca' buluzú'e' Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

³ Benne' dxeléajle'e chee Jesús, benne' zaj zre'e Antioquía, belexegu'e' benne' caní neza, na' belexedé'e' xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque'

judío, ba belexexaque' chee Dios, na' xúgute biche ljwézredxu belebéle'ene' gate belenne' da nigá.

⁴ Gate Pablo ne Bernabé belexezrine' Jerusalén, na' benne' ca' dxeléajle'e chee Jesús ne benne' gubáz ca', ne benne' gula ca' gulezí' lu ne'e le', na' Pablo ne Bernabé buluzenne' le' ca naca da ben Dios lu na' le'. ⁵ Bal-la benne' fariseo ca', benne' ba guléajle'e chee Jesús, gulezé' gulenné':

—Dxun na ba xen chugu late' weaj bēla' chee bēl-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzúe' dizra' da bdxixruj be'e Moisés.

⁶ Nadxa belezraga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. ⁷ Ca gudé buluchálajle ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'é e neda' nédxute ládujla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle benne' ca' chee Le'. ⁸ Dios nézene' ca naca da xu'u lu xichaj lázxdau bēnneache, na' blé'ene' dxezí' lu ne'e benne' ca', lawe' da bnézruje' benne' ca' Be' Lá'azxa ca bene' cheedxu dxi'u. ⁹ Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. ¹⁰ Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca xelúa xra xrtáudxu na? ¹¹ Na'a, dxéajledxu dxi'u bache naladxu ne chee xel-la' zri'i lazre' chee Xránadxu Jesús, ne cá'anqueze zaj nalá benne' ca'.

¹² Nadxa xúgute' gulezúa zrie', ne buluzé nague' dxácate dxuchalaj Pablo ne Bernabé ca naca da ben Dios, bene' da zan da dxelunna bea na naca li xrtizre' nen xel-la' waca ca' da za xabáa, da ca' bene' lu na' Pablo ne Bernabé lávela benne' ca' quebe zaj naque' judío. ¹³ Gate bexuzre buluchálaje', na' gunná Jacobo:

—Biche ljwezra', le xene chia'. ¹⁴ Simón Pedro bzenne' dxi'u ca ben Dios, be'e lataj benne' ca' quebe zaj naca judío xelexexaque' chee' da nedxu lasa, bequ'é e ládujla benne' ca' bēnneache xelexexaque' chee'. ¹⁵ Da na' guca naca na tuze nen da buluzúaj benne' ca' buluchálaje' waláz chee Dios, da na' naxúaj na lu xiche chee Dios, dxenné':

¹⁶ Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana chee na,

na' xechísaqueza' na,

¹⁷ chee xelexílaj xúgute benne' xezica ca' Xrane' Dios,

ne cá'anqueze xelún xúgute benne' zaj zra' xęzr la xu ca',
benne' ca' xelenne' chee La' neda'.

¹⁸ Ca' dxenná Xránadxu, blé'ene' da nigá nédxudaute.

¹⁹ 'Chee le na' dxapa' le'e quebe dxal-la' gunle zede benne'
quebe zaj naque' judío, benne' ca' dxelexexaque' chee Dios.

²⁰ Dxal-la' guzúajntu' chee benne' ca' dxal-la' xulusane' da
naca chee bedáu' xaga ca' u bedáu' xiaj, ne quebe dxal-la'
xelune' dul-la chee da dxucá'ana sban bėnneache, ne quebe
dxal-la' xelawe' belá' chee bę xixre', bę quebe bdxuaj dxen, ne
quebe dxal-la' xelawe' dxen cheeba'. ²¹ Caní dxal-la' xelune'
lawe' da ca ni'i zaj zra' benne' tu tu xęzre, benne' dxuluzenne'
bėnneache ca naca da bdxixruj bea Moisés, da na' dxululabe'
lu xudau' ca' chee benne' judío ca' tu tu zra ca' dxulupá'ane'.

²² Nadxa benne' gubáz ca', ne benne' gula ca', ne xúgute
benne' dxelėjle'e chee Jesús belune' tuze dizra' xeleque'e
bal-la benne' ca' ládujla le' ne xelesel-le' le' xęzre Antioquía
nen Pablo, ne Bernabé. Beleque'e Judas, bėnnea' lequeze'
Barsabás, ne Silas. Chupa benne' caní zaj naque' benne' blau
ládujla biche lјwézredxu ca'. ²³ Bulugüe'e benne' ca' tu xiche
da dxenná na: "Netu', benne' gubáz zrantu' nigá, ne benne'
gula zrantu' nigá, ne biche lјwézrele zrantu' nigá, dxugápantu'
le'e diuzre, biche lјwézrentu' quebe nácale judío, zrale xęzre
Antioquía, ne le'e zrale xęzre ca' zaj nababa Siria, ne xęzre ca'
zaj nababa Cilicia. ²⁴ Ba bėnentu' bal-la benne' ba besiá'que'
nigá, ne quebe nasél-lantu' netu' le', na' belune' le'e zede nen
dizra' da buluchálaje', ne belún zréajene' le'e, dxelenné' dxal-
la' chugu late' weaj belá' chee bel-la' dxen chee, benne' biu
ca', ne chėjlele ca naca da bdxixruj be'e Moisés. ²⁵ Chee le
na' dxéquentu' naca xrlátaje cá'antu' bal-la benne' ládujla netu'
chee xelee'e xedajlenné'e le'e nen biche lјwézredxu Bernabé
ne Pablo, benne' ca' nazrí'i lázrele'entu'. ²⁶ Benne' caní belune'
zrin chee Xránadxu Jesucristo, xjaque' lu da stebe naga gulaca
lazre' bėnneache xelútie' le'. ²⁷ Ca' naca na, dxesél-lantu' naga
zúale Judas ne Silas, na' benne' caní xuluchálajlene' le'e ca
naca chee da nigá. ²⁸ Guque Be' Lá'azxa xrlátaje, ne cá'anqueze
netu' gúquentu' xrlátaje quebe bi xua' guzúantu' lawe' le'e, san
da canize dxun na ba xen gunle. ²⁹ Dxal-la' gusanle da naca
chee bedáu' xaga, ne bedáu' xiaj ca', ne quebe dxal-la' gunle
dul-la chee da dxucá'ana sban bėnneache, ne quebe dxal-la'
gágule belá' chee bę xixre', bę quebe bdxuaj dxen, ne quebe
dxal-la' gágule dxen cheeba'. Che gunle ca naca da nadxixruj
bea caní, gunle xrlátaje. Dxenábantu' lau Dios gaca chawe'
chee."

³⁰ Nadxa benne' ca' gulesel-le' xjaque' xęzre Antioquía. Na'
buluchague' benne' ca' zaj naque' chee Dios, ne bulunézruje'

le' xiche na'. ³¹ Gate biche ljwézredxu ca' bululabe' na, na' gulebéle'ene' lawe' da dxue zren na le'. ³² Judas ne Silas zaj naque' benne' dxelenné' waláz chee Dios. Chee le' na' buluchálajle' biche ljwézredxu ca', belúe zrene' le', ne bulutipe' lazre' le'. ³³ Gate gudé guca tu chi'i zaj zre'e na, na' benne' bíchedxu ca' buluzé' benne' ca' dizra', ne gulenabe' Dios sua xel-la' dxebeza zri lazre' nen benne' ca', chee xesi'aque' xelexezrine' naga zaj zra' benne' ca' gulesel-le' le'. ³⁴ Silas gúquene' xrlátaje xegá'ane' na'. ³⁵ Cá'aqueze Pablo, ne Bernabé belexegá'ane' lu xezre Antioquía, na' tu zren nen benne' zandxa gulezúe' dxulusédené' bénneache, ne dxuluchálaje' ca naca dizra' chee Xránadxu.

Dxezú lau Pablo zéaje' zitu' da gudxupe' lasa guchálaje' chee Jesús

³⁶ Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca' zaj zre'e xúgute xezre ca' naga xeajchálajdxu dizra' chee Xránadxu, chee cheajnnadxu aja dxaca zaj zre'e.

³⁷ Bernabé guca lazre' che'e Juan nen le', bi na' léquezebe' Marcos, ³⁸ san Pablo quebe guzáza lazre' che'e-be' lawe' da bsanbe' benne' ca' gate zaj zre'e xezre ca' zaj nababa Panfilia, ne québedxa guxíajlebe' le' lu zrin chee Xránadxu. ³⁹ Na' Pablo, ne Bernabé bulutil-la ljwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. ⁴⁰ Na' Pablo guqué'e Silas, na' ca gudé biche ljwézredxu ca' belegü'e Pablo ne Silas lu na' Xránadxu chee gune' da chawe' chee benne' ca', ⁴¹ na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

16

Timoteo dxéajlebe' Pablo ne Bernabé

¹ Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee Jesús, lebe' Timoteo, zri'ine tu nu'ula judío dxéajle'e chee Jesús, san xrabe' naque' benne' griego. ² Bi bíchedxu zaj zre'e xezre Listra, ne xezre Iconio dxelenné' xrlátaje dxgua dxunbe'. ³ Pablo guca lazre' chéajle Timoteo le', na' guchugue' late' bela' chee bel-la' dxen cheebe' ca dxenná bea da bdxixruij be'e Moisés, chee quebe xelezrá'a benne' judío ca' zaj zre'e naga nababa na lawe' da zaj neze xúgute benne' ca' naca xra Timoteo benne' griego. ⁴ Lu xúgute xezre naga dxeledé'e buluzenne' benne' bíchedxu ca' ca naca da zaj nadxixruij bea na belún benne' gubáz ca', ne benne' gula ca' zaj zre'e Jerusalén. ⁵ Ca'an guca

bi bíchedxu ca' gulezúa chúchue' ca dxeleajlí lazre' Jesús, na' benne' ca' dxeléajle'e chee', tu zra tu zra zeajte dxelane'.

Dxele'e Pablo tu da ble'e Dios le', dxelé'ene' tu benne' Macedonia

⁶ Be' Lá'azxa quebe be'e benne' gubáz ca' lataj xuluchálaje' dizra' chee' Dios naga nababa Asia. Chee' le' na' guledé'e' naga nababa Frigia, ne xezre ca' zaj nababa Galacia. ⁷ Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee' Jesús quebe be'e le' lataj. ⁸ Nadxa guledé'e' naga nababa Misia, na' belezrine' xezre Troas. ⁹ Lu xezre na' Pablo blé'ene' tu da ba ble'e Dios le' chizrela, blé'ene' tu benne' biu chee' ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." ¹⁰ Gate ble'e Pablo da nigá, na' benne' ca', ne neda', Lucas, la gudíljajntu' ájala guntu' chee' chéajntu' ga nababa Macedonia lawe' da gúquequezentu' Dios dxenné' netu' chee' cheajchálajntu' benne' ca' dizra' chawe' ca' naca chee' Jesús.

Pablo ne Silas dxelezrine' ciudad Filipos

¹¹ Lu xezre Troas na' guxú'untu' tu lu da dxedá lawe' nísadau', na' guxéajntu' tu xezr la xu da naxechaj nísadau', nazí le na Samotracia, na' zra xula bzrintu' xezre Neápolis. ¹² Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzú'antu' tu chupa zra. ¹³ Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéaje' dxeajlechálajlene' Dios. Gudxe'ntu' na' ne bchálajntu' nu'ula ca' zaj nazrague' na' ca naca dizra' chawe' ca naca chee' Jesús. ¹⁴ Tu nu'ula ca' le' Lidia, naque' nu'ula chee' xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee' Dios, na' benne' cheentu', na' Xránadxu bzani'e lázrdawe' chee' guzú' lu ne'e da dxuchalaj Pablo. ¹⁵ Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bene' ba xuzre begá'anantu' na'.

¹⁶ Tu zra gate zéajntu' naga zeajchálajntu' Dios, bezrágantu' tu bi nu'ula cuide' xu'ube' be' xriwe', ne dxenné' xa'abe' ne chee' be' xriwe' na'. Bi nu'ula nigá xú'ube' lu na' benne' ca' dxuluchínene' lebe' xadía, na' xránabe' ca' dxelezile'e dumí da dxezibe', dxenné' xa'abe'. ¹⁷ Bi nu'ula nigá guzú' laube' za'be' cuzru Pablo ne netu', dxennabe' zizraj:

—Benne' caní dxelunę' zrin cheę Dios szrentę, ne dxuluzenne' le'e ájala gunle lále.

¹⁸ Zane' zra benbe' caní cadxa guque Pablo zęde, na' bexéchaję', ne guzre' be' xriwe' da xu'ubę':

—Lu La Jesucristo dxenná be'eda' lue' xedxúaju' lu bel-la' dxen cheę bi nu'ula nigá.

Na' be' xriwe' na' bedxúaję na.

¹⁹ Gate benne' ca' dxuluchínene'-be' xadía guleque bé'ene' québedxa bi xelexezí'ę ne cheębe', na' gulel-le' Pablo ne Silas, na' guleché'ę benne' caní lau benne' xu'u lawe' naga zua chale'aj xu'u lawe' blau. ²⁰ Na' buluzúę' benne' caní lau benne' xu'u lawe' ca', na' gulennę':

—Benne' caní zaj naque' judío ne dxelún zréajene' benne' zaj zre'ę xęzre cheędxu, ²¹ ne dxulusédenę' ca' naca da zjálalęne', da quebe gaca sidxu, ne quebe gaca gundxu na lawe' da nábabadxu Roma.

²² Nadxa benne' zaj zre'ę xęzre na' guledábague' Pablo ne Silas, na' benne' xu'u lawe' na' gulenná be'e xelexéchaję' zra lana Pablo ne Silas, ne xelu'e le' zrise. ²³ Ca gudé belúelę' le', na' buluzré'ę le' lizre xia, ne gulenná bé'ene' benne' xu'u lu ne'ę lizre xia na' guxúe xánnię' benne' ca'. ²⁴ Gate benne' ca' gulenná be'e, na' bzre'ę le' zane' léxzudxa ne bzre'ę ni'a benne' ca' lu xędxu cheę cuaga da dxuxru na ni'e.

²⁵ Gate gula dxęla Pablo ne Silas dxuluchálajlęne' Dios, ne dxelul-le' da dxelúe lá'anę' Dios, na' xezícadxa benne' zaj zre'ę lizre xia dxuluzé nague' cheę'. ²⁶ La' na'tę guzrú'le'ę da bxrize na ca naca lizre xia, na' belexalaj xúgute dxa xu'u ca', ne belexęzre du xia da zaj nadxéaj ni'a xúgute benne' ca' zaj zre'ę lizre xia. ²⁷ Na' benne' xu'u lu ne'ę lizre xia na' bebanę', ne gate blé'ene' zaj naxalaj dxa xu'u ca' cheę lizre xia, gúlaję' xia cheę xute cuine' lawe' da dxéquene' ba buluxuzrúnnaj benne' ca' zaj zre'e lizre xia. ²⁸ Pablo gudxęzre xę'e, guzre' le':

—Quebe bi gune cuinu'. Xúgute'ntu' zúantu' nigá.

²⁹ Nadxa benne' na' xu'u lu ne'ę lizre xia gunabe' tu xi', na' guxú'u chégüę', dxezrízequeze' xel-la' dxezrebe, na' bzu zribe' lau Pablo ne Silas. ³⁰ Nadxa guléaję' benne' ca' ne bchebe' le':

—Le'e, benne', ¿bizra dxal-la' guna' cheę la'?

³¹ Benne' ca' belexechebe':

—Guxéajlę cheę Xránadxu Jesucristo, na' lau', ne cá'anqueze benne' zaj zre'e lizru'.

³² Na' buluchálajlęne' le', ne xúgute benne' zaj zre'ę lizre' ca' naca dizra' cheę Xránadxu. ³³ Lu xęla ná'queze benne' na' xu'u lu ne'ę lizre xia gudibe' we' cheę Pablo ne Silas, na' ca gudé na', le' ne xúgute benne' zaj zre'ę lizre' guledxúę' nisa. ³⁴ Ca gudé na' beche'ę Pablo ne Silas lizre', na' bnézruje' da gulawe', na'

le' ne benne' zaj zre'e lizre' gulebéle'ene' lawe' da ba guléajle'e chee Dios.

³⁵ Che zílala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusane' Pablo ne Silas. ³⁶ Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

³⁷ Pablo guzre' bi xra'aga ca':

—Netu' nabáantu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

³⁸ Bi xra'aga ca' xejlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababe' Roma. ³⁹ Na' xjaque' lizre xia na', ne gulenabe' Pablo ne Silas xelezí zrene' chee'. Nadxa belexebéaje' le', ne gulata' xuene' le' xelexedxúaje' xezre na'. ⁴⁰ Gate Pablo ne Silas belexedxúaje' lizre xia na', na' xjaque' lizre Lidia, na' ca' gudé buluchálajlene' biche ljwézredxu ca', ne bulutipe' lazre', na' besía'que'.

17

Benne' zaj zre'e xezre Tesalónica dxeledábaque' Pablo

¹ Nadxa Pablo ne Silas guledé'e xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. ² Pablo guxíaje' xudau' na', na' ca' dxúnqueze' bchálajlene' benne' ca' tu tu zra dxulupá'ane' du chunna da gazre zra. ³ Ca da naxúaj na lu xiche chee Dios, bzéajni'ine' le' ben na ba xen Cristo guzí guzaque', ne gutie', na' ca' gudé na' ben na ba xen bebane' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

⁴ Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle benne' zan benne' griego, ne nu'ula zan zaj naque' nu'ula blau. ⁵ Benne' judío ca', benne' quebe dxeléajle'e chee Jesús gulaque' xa lazre' chee Pablo, na' buluchague' bal-la benne' ca' dxelune' da caléla dxeledaze', ne bulutupa ljwezre', na' buluzúe' stébe ca naca benne' xezre. Gulu'e xadía lizre Jasón, dxelexílaje' Pablo ne Silas, chee xelexebéaje' le', ne xuludé'e le' lu na' benne' xezre ca'. ⁶ Gate quebe belexezrelne' Pablo ne Silas lu xu'u na', nadxa beleché'e xadía Jasón ne xebal-la biche ljwézredxu

ca' lau benne' xu'u lawe' ca' chee xezre, na' dxelebezre xe'e, dxelenné':

—Benne' ca', benne' ba belún zréajene' ca' naca benne' zaj zre'e xezr la xu, cá'anqueze ba belelé'e nigá. ⁷ Jasón nigá ba gulu'e benne' ca' lizre'. Ca' naca benne' ca' dxeledábage' da bdxixruj bea César lawe' da dxelenné' zua xetú wenná bea, tu benne' le' Jesús.

⁸ Gate belenne' da caní, na' benne' xezre ca', ne benne' xu'u lawe' ca' gulezúe' stebe. ⁹ Jasón, ne biche ljwézredxu ca' bulucá'ane' dumí chee gulezú'e lataj, na' benne' xu'u lawe' ca' bulusané' le'.

Pablo ne Silas dxelezzrine' xezre Berea

¹⁰ Nadxa biche ljwézredxu gulé'e Pablo ne Silas chee xesi'aque' chizrela, chee chjaque' xezre Berea. Gate belezzrine' na', na' belú'e lu xudau' chee judío ca'. ¹¹ Benne' judío caní zaj nácadxé' zren lazre' ca' benne' Tesalónica ca' lawe' da du lazre' gulezú'e dizra' chee Dios, na' tu zra tu zra dxululabe' lu xiche chee Dios chee xuluxúe' che naca da li da dxelé'e le'. ¹² Ca'an guca, benne' zan benne' judío ca' guléajle'e chee Jesús, ne cá'anqueze benne' griego. Benne' zan guléajle'e, nu'ula blau ca', ne benne' biu ca'. ¹³ Gate benne' judío ca' zaj zre'e xezre Tesalónica guleque bé'ene' dxuchalaj Pablo dizra' chee Dios lu xezre Berea, na' belezzrine' na', ne gulegú'u xel-le' bèneache chee xeledábage' Pablo ne Silas. ¹⁴ Biche ljwézredxu ca' la gulesél-la'te' Pablo chéajé' dxu'a nísadau', na' Silas ne Timoteo belexegá'ane' lu xezre Berea. ¹⁵ Benne' ca' zjácálene' Pablo beleché'e le' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácazegue' naga zua Pablo.

Da dxun Pablo lu xezre Atenas

¹⁶ Dxácaté na' Pablo dxebeze' Silas ne Timoteo naga zue' lu xezre Atenas, na' guzúale'e stebe gate blé'ene' ca' naca xezre na', ni' naze nítale'e bedáu' xiaj. ¹⁷ Chee le' na' bchálaje' lu xudau' chee judío ca' nen benne' judío ca', ne xezícala benne' ca' zjácálene' da naca chee Dios, na' tu zra tu zra bchálajlene' benne' ca' zaj zre'e lawe' xi'a. ¹⁸ Bal-la benne' zjácálene' ca' naca da dxulusede benne' ca' zaj le' benne' epicureo, ne benne' estoico gulezú lawe' dxuluchálajlene' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' chee dios zitu' ca'.

Ca'an gulenné' lawe' da dxuchalaj Pablo dizra' chawe' ca' naca chee Jesús, ne ca' naca chee xel-la' dxexebán. ¹⁹ Nadxa guleché'e Pablo lu lataj nazí le' na' Areópago, naga dxelezzragaze' bi xuluzén ljwezre'. Na' buluchebe' Pablo:

—¿Waca guzénenu' netu' ca naca da cube nigá da dxusédenu' bénneache? ²⁰ Lue' dxuchálaju' dizra' da quebe ne xénentu', na' dxaca lázrentu' nézentu' bi zéaję ca naca da caní.

²¹ Caní gulenné' lawe' da dxuluzé nágaze, ne dxuluchálajze ca naca tu dizra' cube xúgute benne' Atenas, ne benne' zitu' ca' zaj zre'e xezre na'.

²² Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dxelé'eda', dxulé'e na dxápale'ele ba lá'ana dios chee ca', ²³ lawe' da gate gudá' neda' gunná'a ca zaj naca xudau' ca' naga dxue lá'anale dios chee ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee Dios na' dxuchálajęna' le'e.

²⁴ 'Naque' Dios na' bene' xezr la xu nigá, ne xúgute da de lawe na. Naque' Xrane xabáa, ne Xrane xezr la xu nigá. Quebe zue' xudau' da nun ni'a na' bénneache. ²⁵ Quebe nachínene' bi da gaca xelún bénneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

²⁶ 'Tuze benne' bene' naque' xra xúgute cue' xezr la xu ca' chee che'e du gabí'i xezr la xu, na' blé'ene' zra, ne lataj naga dxal-la' xelezre'e, ²⁷ chee xelexexílaje' Dios chee ajala xelexezrelne' Le' lácala quebe xelúnbea xánne' Le', san da li Dios quebe zue' zitu' naga zua tu tudxu dxi'u. ²⁸ Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wila chee, gulenné': “Nácadxu xrtia Dios.” ²⁹ Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bénneache cáteze dxululaba lázrequeze'. ³⁰ Dios bzue' chalá'ala da belún bénneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zre'e xelexebí'i lazre'. ³¹ Dios ba nuzúe' tu zra gate guchi'e chee xúgute bénneache lu da xrlátaje chee' lu na' tu benne' ba gucá'a Le', na' chee da nigá bzue' tu da dxunna bea na gate bsebane' bénnea' ládujla benne' gate.

³² Gate benne' ca' belenne' dizra' nigá ca naca chee tu benne' bebane' ládujla benne' gate, na' bal-le' belún le' chee', ne xeballe' gulenné':

—Waca guchálajęnu' netu' ca naca da nigá xetú zra.

³³ Nadxa Pablo bezé'e naga zaj zra' benne' ca'. ³⁴ Bal-la benne' ca' guléajle'e chee Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

18

Pablo dxezrine' xezre Corinto

¹ Gudé na' bezá' Pablo xezre Atenas, bexíaje' xezre Corinto. ² Lu xezre na' xeajxraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belexezrín Aquilo, ne zru'ule' Priscila ga na'. Benne' caní besía' que' xezr la xu Italia lawe' da gunná bea César Claudio xelexedxúaj xúgutę benne' judío ca' xezre Roma. Pablo guxíaje' xeajnné'e Aquilo ne Priscila, ³ na' lawe' da tuze ca naca zrin da dxelún Pablo ne Aquilo, dxelunę' xu'u xide zra be xixre' da dxelútię' cheę benne' dxjaca wedil-la, na' begá'ana Pablo nen benne' caní cheę xelunę' tu zren zrin. ⁴ Tu zra tu zra gate naca zra dxulupá'ana judío ca', Pablo zéaje' lu xudáudau' cheę judío ca' naga bchálaje', ne blé'ene' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios sel-le'.

⁵ Gate belezrín Silas, ne Timoteo ga na', gudé belexesí'aque' xezre ca' zaj nababa Macedonia, na' Pablo tu dxuchálajzqueze' dizra' cheę Dios, ne dxulé'ene' benne' judío ca' da li Jesús naque' Cristo, bénnea' nase-la Dios, bénnea' dxelebeza judío ca'. ⁶ Benne' judío ca' gulezú lawe' dxeledábague' Pablo, ne dxelenné' schanni' cheę'. Nadxa Pablo guzribę' gabán cheę' da dxulé'e na' dxebeáj xíchaje' benne' ca', dxenné':

—Le'e nabágale cheę xel-la' gute cheę bénne'du xu'ule. Québedxa nabaga' neda' cheę na lawe' da ba bzenda' le'e dizra' chawe' cheę Cristo. Ná'atęla guchálajęna' benne' quebe zaj naque' judío.

⁷ Bezé'e lu xudáudau' na', na' bezrine' lizre tu benne' le' Justo, benne' dxucá'ana szrene' Dios ne zua lizre' cuita xudáudau' cheę judío ca'. ⁸ Na' Crispo, benne' xíchaje cheę xudáudau' cheę judío ca', ne ca naca benne' zaj zre'e lizre' guléajle'e cheę Xránadxu. Cá'anqueze benne' zan benne' Corinto, gate belenne' dizra' cheę Dios, guléajle'e ne guledxúę' nisa. ⁹ Nadxa Xránadxu ble'e lawe' Pablo tu zre' tu lu da ble'e Dios le', ne guzre' le':

—Quebe zrebu'. Bchálajteze, ne quebe sua zriu'. ¹⁰ Neda' zúalęna' lue', na' quebe nu seque' bi gune lue' lawe' da zaj zrále'e benne' zaj naque' chia' lu xezre nigá.

¹¹ Ca'an guca, begá'ana Pablo tu iza xugachaj lu xezre Corinto, dxusédenę' benne' ca' dizra' cheę Dios.

¹² Lu zra ca' gate naca Galión benne' xu'u lu ne'e xezr la xu na' naga nababa Acaya, waláz cheę Roma, na' benne' judío ca' guledábague' Pablo. Beleché'e le' xu'u lawe', ¹³ ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' bénneache chee xelúe lá'ané' Dios, ne xeluné' tu da dxedábaga da nadxixruj bea cheentu'.

¹⁴ Pablo ba zue' guchálaje' gate Galión guzre' benne' judío ca':

—Chela naca na chee tu da dxuzúa chalá'ala da bdxixruj bea César u chee tu da zrinnaj zren, na' gun na ba xen xenda' ca da dxennale le'e, benne' judío. ¹⁵ Lawe' da naca na chee dízra'ze, ne chee la tu benne', ne chee da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchi'e da dxaca chee da ca'.

¹⁶ Nadxa bebéaje' benne' ca' lu xu'u lawe' na'. ¹⁷ Nadxa xúgute' benne' griego gulel-le' Sóstenes, benne' xíchaje' chee xudáudau' chee judío ca', ne belú'e le' lau benne' xu'u lu ne'e xezr la xu na', le' Galión. Galión na' quebe be' lazre'e chee da na'.

Pablo dxezrine' xezre Antioquía, na' dxezú lawe' zéaje' da guxunne' lasa zéaje' wen zrin chee Cristo

¹⁸ Pablo begá'ané' xezre na' xezane' zra. Gudé na' bze' biche ljuwézredxu ca' dizra', na' guxú'e tu lu da dxedá lawe' nísadau' zéaje' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nísadau', Pablo bzuaté' xídeze xíchaje', da dxunna bea na zua tu da nachebe lazre' guné' lau Dios. ¹⁹ Gate belezrine' lu xezre Efeso, Pablo bsané' Priscila ne Aquilo, na' guxíaje' lu xudáudau' chee judío ca', ne bchálajlene' judío ca' zaj nazrague' na'. ²⁰ Benne' ca' gulata' xuene' le' xegá'anadxé' xetú chi'i, na' le' quebe guca lazre'. ²¹ Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén chee súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nísadau', ne bezé'e Efeso na'. ²² Gate bezrine' xezre Cesarea, Pablo guxíaje' Jerusalén xeajape' diuzre benne' ca' dxeléajle'e chee Jesús, na' gudé na' guxíaje' xezre Antioquía. ²³ Ca gudé guzúe' na' tu chi'i, na' bezé'e na', gudé'e tu tu xézredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajle'e chee Jesús.

Apolos dxuchálaje' dizra' chee Dios lu xezre Efeso

²⁴ Ca lu zra ca' tu benne' judío le' Apolos bzrine' lu xezre Efeso, naque' benne' xezre Alejandría, lu xu Egipto. Naque' tu benne' nupá'ale'e xrtizre', ne núnbeale'e da naxúaj na lu xiche chee Dios. ²⁵ Naxéajni'ile'ene' ca naca chee Xránadxu, ne dute lázrdawe' dxuchálaje', dxusédené' cáteze naca chee Jesús, lácala

dxusédezenē' xel-la' dxuchúa nisa ca ben Juan. ²⁶ Apolos guzú lawē' dxusédene' benne' ca' zaj zre'e xudáudau' chee judío ca' du lazre'. Gate belén Priscila, ne Aquilo chee', na' guleché'e le' chala'ala, ne buluzéajni'idxenē' le' cáteze naca dizra' chee Dios. ²⁷ Ca gudé na', gate guca lazre' Apolos chéajē' naga nababa Acaya, bi bíchedxu ca' bulutipe' lazre', ne buluzuaje' tu xiche chee benne' ca' dxeléajle'e chee Jesús zaj zre'e xezre ca' zaj nababa Acaya na' chee xelezí' lu ne'e Apolos na'. Gate bzrin le' naga nababa Acaya, gúcalele'ene' benne' ca', na' Dios be'e le' lataj guléajle'e chee Jesús. ²⁸ Apolos blé'ene' lau xúgute benne' ca' ca dxeleque zréaje benne' judío ca', ne blé'ene' ne chee da naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

19

Pablo dxezrine' xezre Efeso

¹ Dxácatē zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxeléajle'e chee Jesús. ² Na' bchebe' benne' ca':

—¿Guzi'le le'e Be' Lá'azxa gate guxéajle'e?

Belexechebe':

—Ne quebe xénentu' che zua Be' Lá'azxa.

³ Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca ben Juan.

⁴ Na' gunná Pablo, guzre' benne' ca':

—Awe', Juan bchue' nisa benne' ca' belexebí'i lazre', san guzre' benne' ca' dxal-la' xeléajle'e chee Bénnea' xide' ca te chee le', da zéaje na, chee Jesús, Bénnea' naque' Cristo, nase-la Dios.

⁵ Gate belenne' da nigá, na' beledxúe' nisa lu La Xránadxu Jesús. ⁶ Gate bze' na' Pablo benne' ca', na' guzúale' Be' Lá'azxa le', na' gulenné' dizra' chee benne' zitu' da quebe bulusede', ne buluchálaje' waláz chee Dios. ⁷ Benne' caní zaj naca chazrínnue'.

⁸ Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca naca xel-la' dxenná bea chee Dios. ⁹ Bal-le' belún zide' lázrdawe', ne quebe gulaca lazre' xeléajle'e chee Jesús, na' gulenné' schanni' chee dizra' chawe' ca naca chee Jesús lówela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxeléajle'e chee Jesús lu xu'u ga dxusede tu benne' le' Tiranno,

na' lu xu'u na' bchálajlęne' benne' ca' tu zra tu zra. ¹⁰ Ca' beņe' lawe' chupa iza, na' ca'an guca xúgute' benne' zaj zře'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío. ¹¹ Dios beņe' xel-la' waca zri'a ca' lu na' Pablo lu zra ca'. ¹² Ca'an guca, gulequę'e ladxe' ca' da dxuchėj xichaj Pablo, ne ladxe' ca' da bde'e lachu'e, na' belú'e na naga zaj de' benne' we' ca', na' benne' caní belexexaque' ca naca xízrawe' da zaj nape', na' be' xriwe' ca' belexedxúaj na lu beł-la' dxen chee benne' ca'.

¹³ Bal-la benne' judío ca', benne' dxeledé' dxelexebėj be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelexebėj na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

¹⁴ Caní belún gazre benne' zaj naque' zri'ine tu benne' judío le' Esceva, naque' tu benne' xíchaje chee bxruze ca'. ¹⁵ Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

¹⁶ Gate gunná na da nigá, na' benne' biu na' xu'e be' xriwe' na', guxritie' guzría che'e benne' ca', na' dutę xel-la' wal-la chee' buculę' xúgute' benne' ca', na' bé'le'e benne' ca' cadxa buluzrúnnuje' lu xu'u na' gala' xídeze, ne dxelaque' dxen. ¹⁷ Xúgute' benne' zaj zře'e xezre Efeso, benne' judío ca', ne benne' quebe zaj naque' judío, belenne' ca guca da nigá, na' chee le' na' belezrébele'e, ne bulucá'ana szrene' La Xránadxu Jesús.

¹⁸ Cá'anqueze benne' zan lówela benne' ca' dxelėjle'e chee Jesús belelé'e dxelexrúalepe' da calęla da belune', ¹⁹ na' benne' zan, benne' belúne' xel-la' wazrá', zaj nu'e xiche chee wazrá', na' buluzezxe' na lau xúgute' benne' ca'. Gate bululabe' ca gulezaca xiche ca', na' gulénezene' gulezaca na ca gazxu gaxúa cue' tu gaxúa dumí plata. ²⁰ Ca'an guca, guxíaj bzriluj dizra' chee Xránadxu, ne ble'e na xel-la' waca chee na.

²¹ Gudé na' Pablo guca lazre' té'e xézredu ca' zaj nababa Macedonia, ne Acaya, na' te na' chėjje' xezre Jerusalén. Gunné' ca te chėjje' Jerusalén, na' dxal-la' cheajtje' xezre Roma. ²² Nadxa gusel-le' chupa benne' dxelácale le', Timoteo ne Erasto, naga nababa Macedonia, dxácatę begá'ana le' xetú chi'i naga nababa Asia.

Benne' xezre Efeso dxeledábague' Pablo

²³ Ca lu zra na' benne' zan guledábague' dizra' chawe' ca naca chee Jesús, ²⁴ da na' guca na ne chee tu benne' le' Demetrio, benne' gubizre plata. Benne' nigá dxune' níchudu ca' da zaj naca plata ca xudau' chee dios nu'ula le' Diana,

na' benne' ca' dxelúnleṅe' le' zrin nigá dxelezí'le'e dumí.
 25 Demetrio na' bchague' benne' caní tu zren nen xezica
 benne' dxelune' zrin caní, na' guzre' benne' ca':

—Le'e, benne', nézquezle lu zrin nigá dxaca cheḗdxu da
 cháwele'e, 26 na' ca' dxelé'equezle le'e ne dxenle, Pablo nigá
 dxedé' dxenné' dios ca' da zaj nun bēneache quebe zaj naca
 na dios, na' caní ba bsédene' benne' zan, quegá Efeso nigáze,
 san du ca nababa Asia. 27 Da nigá nácale'e na stebe cheḗdxu,
 lawe' da ca naca zrin cheḗdxu nigá nazruzre cuía xi na, ne
 la gaze xudau' cheḗ dios nu'ula Diana nazruzre nite xel-la'
 nuzé cheḗ na, na' caní xegá'ana ditaj ca naca xel-la' szren cheḗ
 dios nu'ula, bēne' dxelúe lá'ana ca naca benne' zaj zre'e ga
 nababa Asia, ne du ca naca bēneache zaj zre'e xezr la xu.

28 Gate belenne' da nigá, na' belezrá'ale'e benne' ca', ne
 gulebezre xe'e, dxelenné':

—¡Ga'ana szren Diana, dios cheḗdxu, benne' Efeso!

29 Na' ca naca benne' zaj zre'e xezre na' guleque zréajene'.
 Gulele' Gayo, ne Aristarco, benne' Macedonia dxeledálene'
 Pablo, na' gulezrube xue' benne' caní chale'aj xu'u lawe'.
 30 Pablo guca lazre' chu'e na' cheḗ guchálajlene' benne' ca',
 san bi bíchedxu ca' quebe gulegú'e le' lataj. 31 Cá'anqueze bal-
 la benne' xu'u lawe' cheḗ xezre ca' zaj nababa Asia gulesel-
 le' benne' xeajezre' Pablo quebe dxal-la' chu'e na'. 32 Dxácate
 na', naga zaj nazraga benne' ca', bal-le' gulebezre xe'e, tu da
 dxelenné', na' xebal-le' dxelebezre xe'e, dxelenné' da xula,
 lawe' da beledxé'ena zraga benne' zan, na' benne' zante quebe
 zaj nézene' bizr cheḗ na' zaj nazrague' na'. 33 Nadxa benne'
 judío ca' buluzúe' Alejandro lau benne' ca' cheḗ guzájni'ine'
 le' ca naca da nigá, na' le' guchisa ne'e cheḗ xelezúa zri
 benne' ca' lawe' da guca lazre' guchálajlene' benne' zan ca'
 da gácale na judío ca'. 34 Gate benne' zan ca' guleque bé'ene'
 naque' benne' judío, na' gulebezre xa'a xúgute' ca chupa hora,
 dxelenné':

—¡Ga'ana szren Diana, dios cheḗdxu, benne' Efeso!

35 Nadxa benne' dxuzúaje' ne cheḗ xezre na', gate ba bzua
 zrie' benne' zan ca', gunné':

—Le'e, benne' Efeso. Ca naca bēneache zaj zra' xezr la
 xu nigá zaj nézene' benne' zaj zre'e xezre Efeso nigá zaj
 nabague' xuluxúe' xudau' cheḗ dios nu'ula Diana, ne bedáu'
 cheḗ da bexruj na zran xabáa. 36 Quebe nu seque' tábaga' da
 nigá. Cheḗ le na' le sua zrize, ne quebe bi gunle da quebe
 ne guxúe xánnele. 37 Benne' caní nache'le nigá quebe bi da
 calēla ne xelune', ne quebe bi schanni' ne xelenné' cheḗ dios
 nu'ula cheḗle. 38 Che Demetrio, ne benne' ca' dxelune' zrin
 nen le' dxelaca lazre' xelagu zria cheḗ tu benne', zaj zra'

benne' dxuluchi'e da dxaca, ne zaj zua xu'u lawe' ca' naga gaca xelawe' zría chee benne' ca'. ³⁹ Na' che le'e bi xetú da nábale, dxal-la' nábale na naga zaj nazraga benne' xu'u lawe' ca dxenná bea da bdxixruj bea César. ⁴⁰ Na'a zúadxu stebe ga gaze nu gagu zria cheedxu ca naca da bendxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

⁴¹ Ca gudé gunné' da nigá, na' bze' benne' zan ca' dizra'.

20

Pablo dxedé' ga nababa Macedonia ne Grecia

¹ Gate gudé guca da stebe na' lu xezre Efeso, na' Pablo btupe' benne' ca' dxeléajle'e chee Jesús chee guzéajni'ine' le'. Nadxa bze' benne' ca' dizra', ne bnide' le', na' guzé'e zéaje' xezre ca' zaj nababa Macedonia. ² Xeajné'e bíchedxu ca' zaj zre'e xúgute xézredu ca', ne btípale'e lazre' benne' ca' ne chee dizra' da bchálajlene' le'. Ca gudé na' bezrine' naga nababa Grecia. ³ Begá'ane' na' chunna beu', na' gudé na' gate ba zuate' chu'e tu lu da dxedá lawe' nísadau' chéaje' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le na' gulú'u bi'e xezé'e ni'e té'e naga nababa Macedonia. ⁴ Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. ⁵ Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebeze' netu' lu xezre Troas. ⁶ Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xejzrentu' bi bíchedxu ca' lu xezre Troas, naga guzúantu' gazre zra.

Da ben Pablo lu xezre Troas

⁷ Zra nedxu chee da gazre zra bezrágantu' chee gáguntu' da dxusá lázredxu ca guca gate gute Xránadxu, na' Pablo bsédene' bi bíchedxu ca'. Ben na ba xen xeza'ntu' zra xula, na' chee le na' bchálajqueze Pablo cadxa bzrinte dxela. ⁸ Nazrágantu' tu xu'u da zua chunna cuía sibe, na' zaj zéle'e xi' da dxulusení na. ⁹ Tu bi cuide' zríabe' ga dxu'u lení', na' gate Pablo bsetúnnadxé' xrtizre', na' guca wásele'e bi cuide' na', na' naga xejchete na, na' dxásetebe' gubíxrebe' chunna cuía sibe, na' xejlechise'-be' ba nátebe'. ¹⁰ Nadxa betaj Pablo, na' gulégüe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

¹¹ Nadxa Pablo begüene' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa

guxaní'te. Zra na' bezé'e na'. ¹² Nadxa bíchedxu ca' belexeché'e bi na' gubíxrebe' ba bexaca banbe', na' xúgute' gulezúe' lu xel-la' dxelezné' lazre'.

Pablo dxexeze'e xezre Troas xezrine' xezre Mileto

¹³ Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca ba nun le' lawe' da guca lazre' zéaje' ní'aze'. ¹⁴ Gate bezrágantu' le' lu xezre Asón, na' guxú'e lu da dxedá lawe' nísadau' naga xu'untu', na' guxíajntu' xezre Mitilene. ¹⁵ Beza'ntu' na', na' zra xula bedentu' le nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezi' lázrentu', na' zra xula bzrintu' xezre Mileto. ¹⁶ Ca' bentu' chee quebe guzré'tecantu' naga nababa Asia. Chee le' na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

Pablo dxuchálajle' benne' gula dxelájl'e chee Jesús, benne' zaj zre'e Efeso

¹⁷ Ca zrantu' lu xezre Mileto, Pablo gusel-le' tu benne' cheajnné' benne' gula ca' dxelájl'e chee Jesús zaj zre'e xezre Efeso. ¹⁸ Gate belelá' benne' ca', Pablo guzre' le':

—Le'e nézquezle ca bēna' neda' xúgute zra ca gudé bla'a ga nababa Asia. ¹⁹ Xúgute zra guzúa' lávela le'e dxuna' zrin chee Xránadxu duté xel-la' dxexruj lazre', ne zane' lasa gudxezra', na' gudéa' lu zane' da guxzaca' ca naca da gulaca lazre' benne' judío ca' xelune' chia'. ²⁰ Bchálajle' le'e xúgute da naca na xrlátaje, ne bsédeda' le'e lávela benne' zan, ne lízrquezle. ²¹ Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebi'i lazre' lau Dios, ne xelájl'e chee Xránadxu Jesucristo. ²² Na'a zexá'a Jerusalén, ca dxenná be'e Be' Lá'azxa neda', ne quebe nezda' bi gaca chia' na'. ²³ Tuze da nezda', lu xúgute xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'. ²⁴ Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajle' ca naca da dxuna', ne chee gusexúzrqueza' guna' ca naca da nusebaga Xránadxu Jesús neda', guchálaja' dizra' chawe' ca nazrí'i Dios dxi'u.

²⁵ Nézquezda' netule le'e, ba bchálajle' le'e ca dxenná bea Dios, québedxa lé'ele neda'. ²⁶ Chee le' na', dxaca lazra' xapa' le'e na'a, quebe nabaga' zria ne chee tule le'e, ²⁷ lawe' da ba bzenda' le'e ca naca da dxaca lazre' Dios guné', ne quebe bi bcá'ana' da quebe bzéajni'ida' le'e. ²⁸ Chee le' na', le guxúe cuínale, ne le guxúe ca naca benne' ca' nácale tuze, benne' ca' Be' Lá'azxa ba nuzúe' le'e ládujla le' chee chu'u lu na'le guxuele

benne' ca' zaj nazrague' chee Xránadxu, benne' ca' naxá'awene' nen dxen cheéqueze'. ²⁹ Ne zda' gate xezá'a neda' xeledá' bal-la benne' xelaca lazre' guzría xi'e benne' zaj nazraga chee Xránadxu ca dxelún becu' xi'a, be snia ca' dxuluzría xiba' zrila' ca'. ³⁰ Ládujla le'e weledá' bal-la benne' xulusédene' da wen lazre', ne quegá da li, chee chjácále benne' ca' dxeléajle'e chee Jesús le'. ³¹ Chee le na', le guxúe cuínale. Le gusá' lázrele ca be na' chun iza, te zra ne chizrela quebe bsana' bzéajni'ida' le'e tu tule le'e, ne gudxzérete'a'.

³² Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na xel-la' waca chee gun na le'e benne' chuchu lazre', ne chee guzúa na le'e lávela xúgute benne' ca' ba guleaj Dios cheéqueze'. ³³ Quebe guca lazra' neda' si'a chia' dumí ne zra lana nu benne'. ³⁴ Nézquezle le'e ca be na', be na' zrin nen ni'a ná'queza' chee guta' da guchínneda' neda', ne da gulechinne benne' ca' gulaque' neda' tuze. ³⁵ Blé'equezda' le'e, ca'an dxal-la' gunle zrin chee séquele gácale benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na chee benne' dxunezruj, quézcala chee benne' si' lu ne'e."

³⁶ Ca gudé gunná Pablo da nigá, na' bzu zribe', ne bchálajlene' Dios nen xúgute benne' ca'. ³⁷ Xúgute' gulebezre', na' bulunide', ne bulunupe' Pablo. ³⁸ Belexewí'inele'ene' lawe' da guzre' le' québedxa xeledé'ene' le'. Na' xjácálene' le' naga be xu'e lu da dxedá lawe' nísadau'.

21

Pablo dxezrine' xezre Jerusalén

¹ Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxe' xezre Cos, na' zra xula gudentu' naga dxe' xezre Rodas, na' gudé na' bzrintu' xezre Pátara. ² Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. ³ Gate gudentu' naga dxe' xezr la xu Chipre, blé'entu' na chalá'a xéglala, na' bexíajteczentu', bzrintu' lu xezre ca' zaj nababa Siria. Lu xezre Tiro be na ba xen xuluxulétaje' xua' da nua da dxedá lawe' nísadau' na', na' chee le na' bzrintu' na'. ⁴ Na' bezrágantu' benne' ca' dxeléajle'e chee Jesús, benne' zaj zre'e xezre Tiro na', na' begá'anantu' nen benne' ca' gazre zra. Benne' caní, lawe' da bzéajni'i Be' Lá'azxa le' da gaca, gulé'e Pablo quebe dxal-la' chéaje' Jerusalén. ⁵ Gate gudé guca gazre zra ca', na' zua xeza'ntu' na'. Xúgute benne' ca' dxeléajle'e chee Xránadxu, ne zru'ule' ca', ne bidu chee' ca' gusá'acale' netu' bedxúajtęntu' xezre na', na' dxu'a nísadau' na' bzu zribentu'

bchálajentu' Dios. ⁶ Nadxa bze ljwézrentu' dizra', ne bnídate ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

⁷ Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. ⁸ Zra xula Pablo, ne netu' zralentu' le' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálaje' dizra' chee Dios. Naque' tu benne' gazre, benne' ca' buluzúa gubáz ca' xelune' zrin chee Jesús. Begá'anantu' nen benne' nigá. ⁹ Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee Dios. ¹⁰ Guzúantu' na' zane' zra gate bla' tu benne' le' Agabo chee xezre ca' zaj nababa Judea. Naque' benne' dxuchálaje' waláz chee Dios. ¹¹ Agabo na' bide' bedajnné'e netu'. Guqué'e bazxu dxu'a le'e chee Pablo, na' bchéaje' na ni'a na' cuine', dxenné':

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

¹² Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén. ¹³ Pablo bechebe':

—¿Bizr chee na' dxebézrele, ne dxuzúale neda' xel-la' dxewí'ine lazre'? Ba zúaqueza', quegá tuze xuluchéaje' neda', san la gázqueze zua' chee gatia' lu xezre Jerusalén ne chee Xránadxu Jesús.

¹⁴ Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

¹⁵ Gudé na' bsení'antu' cheentu', na' guxíajntu' Jerusalén. ¹⁶ Na' gusiá'acale bal-la benne' netu', benne' Cesarea dxeléajle'e chee Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e chee Jesús, na' lizre benne' nigá dxal-la' zrintu' súantu'.

Pablo zeajnné'e Jacobo

¹⁷ Gate bzrintu' Jerusalén, bi bíchedxu ca' belezí' lu ne'e netu' duté xel-la' dxelebé. ¹⁸ Zra xula Pablo guxíajlene' netu' xea-jnná'ntu' Jacobo, na' zaj zrá'queze na' xúgute benne' gula ca' dxeléajle'e chee Jesús. ¹⁹ Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío. ²⁰ Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee Jesús, na' xúgute' dxelenné' dxun na ba xen chéajledxu da bdxixruj bea Moisés. ²¹ Zaj zra' benne' ba gulé'e benne' judío caní lue' dxusédenu' xúgute' benne'

judío zaj zre'e zitu' québedxa xelune' ca da gunná be'e Moisés, ne quebe xelechugue' late' béla'dau' chee bel-la' dxen chee bidu biu chee' ca', ne quebe chjácálenē' ca naca da zéajledxu dxi'u dxundxu. ²² ¿Ájala dxal-la' gundxu? Benne' judío caní welezrague' gate xelenne' ba bla'u. ²³ Cháwedxa gunu' da caní: Zaj zra' tapa benne' lówela dxi'u dxal-la' xelune' tu da zaj nachēbe lazre' lau Dios. ²⁴ Guché benne' caní chjá'acalēne' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xicha xichaj benne' caní. Ca'an gaca, xúgute benne' xeleque bé'ene' quebe naca da li ca da gulenné' chiu', san la gázqueze lue' dxunu' xúgute ca da dxenná da nadxixruj bea na. ²⁵ Ca naca chee benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee bedáu' xiaj xaga ca', ne quebe xelawe' dxen chee be xixre' ca', ne quebe xelawe' béla' chee be xixre', be quebe bdxuaj dxen, ne quebe xelune' dul-la chee da dxucá'ana sban bēnneache.

Dxelele' Pablo lu xudau'

²⁶ Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee buluzenne' bxruze ca' gate xexuzre zra ca' chee da dxulucá'ana chawe' cuine' lau Dios, gate na' tu tue' dxal-la' xelegú'e guna'.

²⁷ Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. ²⁸ Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédenē' xúgute bēnneache xuluzúe' chalá'ala xezr la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxucá'ana dítaje' lataj lá'azxa nigá.

²⁹ Caní gulenné' lawe' da ba belelé'ene' Pablo lu xezre na' nen Trófimo, tu benne' xezre Efeso, na' dxeléquene' gulú'u Pablo le' lu xudau'.

³⁰ Ca naca benne' zaj zre'e xezre na' beledxé'ena zrague', ne zá'aca chégüē'. Nadxa gulēl-le' Pablo, ne gulezrube xue' le' chale'aj xudau' na', na' bulusézxuje' dxa xu'u chee na. ³¹ Ba zuate xelútiē' Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. ³² Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégüē' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje'

Pablo. ³³ Nadxa gubiga' benne' na' dxenná be'e lu wedil-la, na' gudël-le' Pablo, ne gunná bé'ene' xuluchéajë' le' chupa du xia. Gudé na' bchebe' benne' ca' nua' benne' nigá, ne bi ba bene'. ³⁴ Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xelechë'e Pablo xu'u naga zaj zra' benne' dxjaque' wedil-la, benne' zan ca'. ³⁵ Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúle'e benne' zan ca' Pablo, ³⁶ na' xúgutë' zá'aque' cuzre na' dxelenné' zizraj:

—Gate bënnea'.

Pablo dxexechebe' lau benne' zan ca'

³⁷ Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bënnea' le':

—¿Waca nneu' dizra' griego? ³⁸ ¿Quebe nacu' lue' benne' Egipto na' ba zeaj tu chupa iza btupe' benne' ca' guledábague' xu'u lawe', na' guché'e tapa gaxúa benne' dxelutie' benne', xeajzré'e le' le'e xixre' lawe' lataj?

³⁹ Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlëna' benne' zan caní.

⁴⁰ Benne' na' be'e le' lataj, na' Pablo guzé' lachila chee xu'u na', na' guchisa ne'e chee xelezúa zri benne' zan ca'. Gate gudxé' zri, na' bchálajlëne' le' dizra' hebreo, dxenné':

22

¹ —Le'e, benne' gula, ne le'e, bi bicha', le xen ca da xapa' le'e da dxexecheba' chee.

² Gate belenne' dxuchálajlë Pablo le' dizra' hebreo, na' gulezúadxë' zrize, na' Pablo guzre' le':

³ —Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédene' neda' cáteze naca da nadxixruij bea na chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. ⁴ Nédxute gudáu zi' xuzra' benne' ca' dxeléajlë'e chee Jesús, ne bétequeza' bal-le', ne guche'a benne' biu, ne nu'ula chee, na' bzra'a le' lizre xia. ⁵ Bxruxe blau, ne xúgutë benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxeléajlë'e chee Jesús chee che'a benne' ca' Jerusalén nigá, chee xeledé'e ba xa'.

6 'Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. 7 Na' xea-jchazia' lu xu, ne benda' chi'i tu benne' guzre' neda': "Saulo, Saulo, ¿bizr chee na' nau zi' xuzru' neda'?" 8 Nadxa bcheba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bënnea' nau zi' xuzru' lue'." 9 Benne' ca' zralene' neda' belelé'ene' xi' na', ne belezrebe', san quebe belenne' chi'i bënnea' gunné' neda'. 10 Nadxa gunnéa': ¿Bidxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'e lue' ca da dxal-la' gunu'." 11 Benne' ca' zjácálene' neda' belequé'e na'a zeajntu' Damasco lawe' da bca'ana xi' na' neda' la chul-la.

12 'Zua na' tu benne' le' Ananías, benne' dxune' du lazre' ca naca da bdxixruj be'e Moisés, na' xúgute benne' judío zaj zre'e Damasco dxelenné' cháwélé'e ca dxune'. 13 Ananías na' ble'e naga zua' neda', na' guzre' neda': "Bicha' Saulo, na'a xele'enu'." Lu zra ná'queze belé'eteda', ne ble'eda' benne' na'. 14 Nadxa guzre' neda': "Dios chee xra xrtáudxu guqué'e lue' nédxute chee gúnbe'u ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bënnea'. 15 Lue' guchálaju' da naca chee Le' lau ca naca bënneache zaj zre'e lu xezr la xu, ne guzennu' benne' ca' ca naca da blé'enu', ne da bennu'. 16 Na'a, ¿bizr chee na' dxezrenu'? Guxasa, gudxúa nisa, ne bxren lazre' chee Xránu' Dios chee cue'e' dul-la chiu'."

17 'Gate bezrina' Jerusalén, guxá'a lu xudau' xejchálajlena' Dios, na' ble'eda' tu da ble'e Dios neda'. 18 Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelezí'e ca naca da guchálaju' chia'." 19 Nadxa gucha' Le': Xran, zaj nézquezne' guxá'a neda' xúgute xu'u naga dxelezraga judío ca', ne xejxri'a benne' ca' dxeléajle' chiu', na' bzra'a le' lizre xia, ne bzálajqueza' benne' ca', 20 na' gate belútie' Esteban, benne' wen zrin chiu', na' zéqueza' neda' naca' tuze nen benne' ca' belútie' le'. 21 Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

Da ben benne' dxenná be'e lu wedil-la

22 Dizra' caní belenne', san lu dizra' nigá gulezú lawe' dxelebezre xe'e, dxelenné':

—¡Gate benne' nigá! ¡Québedxa dxal-la' gaca bané'!

23 Na' gulebezre xá'aqueze', ne buluzale' sibe zra lane', ne belequé'e bxrte xu da buluzale' sibe. 24 Chee le' na' benne' na' dxenná be'e lu wedil-la gunná bé'ene' xelegú'e Pablo lu xu'ula, ne xelu'e le' chee nne' da li, bizr chee na' gulebezre xa'a benne' zan ca' chee le'. 25 Gate bexuzre buluchéaje' na'

Pablo, chee xelu'e le', Pablo guzre' tu benne' dxeaje' wedil-la zue' na':

—¿Naca chee le'e güele tu benne' nababe' Roma, ne quebe ne guchi'ale aja naca chee'?

²⁶ Gate ben benne' dxeaje' wedil-la da nigá, na' guxíaje' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

²⁷ Nadxa benne' nigá gubigue' naga ze Pablo, na' bchebe' le':

—¿Da li na' nababu' Roma?

Pablo bechebe':

—Awe'.

²⁸ Na' benne' dxenná be'e lu wedil-la gunné':

—Neda' da zrente gudízruja' chee gubaba' Roma.

Na' Pablo gunné':

—Neda' nabábaqueza' Roma gate gúlajtea'.

²⁹ Gate belenne' da nigá, na' benne' ca' ba zaj ze' xelu'e Pablo belexecuase' cuita le', na' la gaze benne' na' dxenná be'e lu wedil-la, gate guque bé'ene' nababa Pablo Roma, bzrebe' lawe' da nuchéaje' le' du xia.

Pablo dxezrine' lau benne' xu'u lawe' blau ca' chee judío ca'

³⁰ Zra xula, benne' na' dxenná be'e lu wedil-la guca lazre' nézene' bi chee na' dxelagu zria judío ca' Pablo, na' bequé'e du xia na' nadxéaj na na' Pablo, na' gunná bé'ene' xelezraga benne' xíchaje ca' chee bxruze, ne xúgute benne' xu'u lawe' blau. Nadxa guléaje' Pablo, na' bze' le' lau benne' ca'.

23

¹ Pablo gunné'e benne' xu'u lawe' blau ca', na' guzre' le':

—Le'e, bi bicha', ca naca xúgute da ba bēna' neda', zua zri xichaj lázrdawa' lau Dios.

² Nadxa Ananías, bxruze blau, gunná bé'ene' benne' zaj ze' na' xelegape' dxu'a Pablo. ³ Na' Pablo bechebe':

—Dios güe'e lue', benne' dxun láweze da xrlátaje. Dxe'u na' chee guchi'u chia' neda' ca dxenná bea da nadxixruj bea Dios. ¿Bizr chee na' dxunu' da dxedábaga da bdxixruje', dxenná be'enu' xelu'e neda'?

⁴ Benne' ca' zaj zre'e na' gulé'e Pablo:

—¿Caní schanni' dxennáu' chee bxruze blau chee Dios?

⁵ Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche chee Dios: Quebe nneu' schanni' chee benne' dxenná be'e lázriu'.

⁶ Nadxa guque bé'ene' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nauē' fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

⁷ Gate gunná Pablo da nigá, na' benne' fariseo ca', ne benne' saduceo ca' gulezú lawē' dxulutil-la ljwezre' dizra', na' gulaca chupa la'a ca naca benne' ca'. ⁸ Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz cheē xabáa ca', ne quebe nu chilá' bēnne'du xu'u bēnneache, san benne' fariseo ca' dxeléajle'ē dxata' xúgute da ca'. ⁹ Xúgute' gulebezre xē'ē, na' gulezé bal-la benne' dxuluxuzájle'ē da nadxixruj bea na, benne' zaj naque' fariseo, na' gulenné':

—Benne' nigá quebe bi da calela ne gunē'. Che nu bēnnedu xu'u bēnneache, u tu gubáz cheē xabáa ba gunné' le', quebe dxal-la' nneđxu cheē Dios.

¹⁰ Na' bulutil-lale'ē ljwezre' dizra', na' benne' na' dxenná be'ē lu wedil-la bzrebe' xelēl-le' Pablo xuluzúzruje' le'. Cheē le' na' gunná bé'enē' benne' dxjaca wedil-la xelexebéajē' le' lāwela benne' ca', ne xelexeché'ē le' lu xu'u na' naga zaj zra' benne' dxjaque' wedil-la.

¹¹ Xela xula, Xránadxu ble'e lawē' Pablo, na' guzre' le':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la'queze guchálaju' chia' lu xezre Roma.

Zaj nun benne' judío ca xelunē' xelútiē' Pablo

¹² Zra xula bal-la benne' judío ca' belunē' tuze dizra' xelútiē' Pablo. Gulenné':

—Dios cu'ē dxi'u de' che bi xi'aj gágudxu, ne quebe ne gútedxu Pablo.

¹³ Nadé chua benne' biu ca' zaj nachebe lazre' xelunē' da nigá. ¹⁴ Benne' caní xjaque' lau benne' xíchajē ca' cheē bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'ē netu' de' che bi gáguntu', ne quebe ne gútentu' Pablo. ¹⁵ Na'a, le'e, ne xezícadxa benne' xu'u lawe' blau ca' dxal-la' nábale benne' dxenná be'ē lu wedil-la xedajlegüē'ē Pablo wxre zila laule le'e, xele bēnne' dxaca lázrele guchébe xánnele Pablo, na' netu' se' cuásantu' gútentu' le' québela ne xidē' nigá.

¹⁶ Zri'ine bi zan Pablo benbe' ca naca da nigá, na' guxíajbe' naga zua Pablo cheajézrebe' le'. ¹⁷ Nadxa Pablo gunné' tu benne' xu'u lu ne'ē benne' ca' dxjaque' wedil-la, na' guzre' le':

—Guché' bi cuide' nigá lau benne' xíchajē chiu' lawe' da de da dxal-la' xebe' le'.

¹⁸ Na' benne' na' xu'u lu ne'ē benne' ca' dxjaque' wedil-la guché'ē-be' lau xranē', na' guzre' le':

—Pablo, b́ennea' nadxéaję' gunné' neda', na' gunabę' xeda-
jgu'a bi cuide' nigá naga zu' lawe' da dę da dxal-la' xębe' lue'.

¹⁹ Benne' xíchaję na' guquę'ę na' bi cuide' na', na' guchę'ę-be'
chalá'ala, ne bchebe'ę-be':

—¿Bi dxaca lazru' xu'u neda'?

²⁰ Na' gunná bi cuide' na', gųzrebe' le':

—Benne' judío ca' ba zaj nune' tuze dizra' xelenabę' lue'
chę'u Pablo wxre zila lau benne' xu'u lawe' blau ca', xe-
lenné' dxelaca lazre' xuluchębe xánnię' le'. ²¹ Quebe chéajle'u
cheę benne' ca' lawe' da nadé chua benne' ca' xebeze' le'
bagácheze, ne ba gulechębe lazre' lau Dios Le' cu'ę benne' ca'
de' che bi xe'aj xelawę', ne quebe ne xelútię' Pablo. Na'a ba
zaj zuę' dxebeze'ę xrtizru'.

²² Nadxa benne' xíchaję na' bze' bi cuide' na' dizra', na'
guzre'ę-be' quebe nu xębe' ba xeajęzrebe' le' caní.

Dxelesel-le' Pablo lau Félix, benne' xu'u lu ne'ę xęzr la xu na'

²³ Benne' xíchaję na' gunné' chupa benne' cheę', benne' xu'u
lu ne'ę benne' ca' dxjaque' wedil-la, na' gunná bé'ene' le' xu-
lucueze' chupa gaxúa benne' dxjaque' wedil-la, benne' sa'aca
ni'ę, ne ga xun chi benne' dxjaque' wedil-la, benne' xelebía
bzrina', ne chupa gaxúa benne' dxjaque' wedil-la, benne'
xelu'ę xia tunna, cheę chjaque' lu xęzre Cesarea dxedá' ga
chizrela. ²⁴ La gázqueze gunná bé'ene' xulucueze'ę bzrina'
cuía Pablo, ne gunná bé'ene' xeleché'ę le' cháwedau' lau Félix,
benne' xu'u lu ne'ę xęzr la xu na' waláz cheę Roma. ²⁵ Gusel-le'
tu xiche da belúa benne' dxjaque' wedil-la. Caní naxúaj na:

²⁶ Neda' Claudio, dxugapa' lue' diuzre Félix, benne' xu'u lu
na'u xęzr la xu nigá. ²⁷ Benne' judío ca' gulel-le' benne' nigá
ná'tega na'a cheę xelútię' le'. Gate gunezda' neda' nababę'
Roma, na' guxíajlena' benne' chia' ca', benne' dxjaque' wedil-
la, xeajselá' le'. ²⁸ Guca lazra' nezda' bi dxelagu zria le', na'
guchę'a le' lau benne' xu'u lawe' ca' cheę judío ca'. ²⁹ Na'
gunezda' dxelagu zria le' da naca cheę da nadxixruj bea cheę
judío ca', san quebe naca na cheę xelútię' le', ne cheę chu'ę
lizre xia. ³⁰ Gate benda' ca ba zaj nun judío ca' cheę xelútię'
le', na' dxusel-la' le' naga zu', ne ba gucha' benne' ca' dxelagu
zria le' waca xelawę' le' zria lau lue'. Gaca xrlátaje chiu'.

³¹ Nadxa benne' dxjaque' wedil-la belune' ca gunná
be'e benne' xíchaję cheę', na' beleché'ę Pablo chizrela, na'
belezrine'ę xęzre Antípatris. ³² Zra xula benne' dxjaca wedil-la,
benne' ca' dxeledá' ní'aze, belexezrine'ę Jerusalén, na' benne'
dxjaque' wedil-la zaj zrię'ę bzrina' beleché'ę Pablo naga dxal-
la' zrine'. ³³ Gate belezrine'ę xęzre Cesarea, na' bulunézruje'
benne' xu'u lu ne'ę xęzr la xu na' xiche na', ne buludéę' Pablo
lu ne'ę. ³⁴ Ca bexuzre blabę' xiche na', na' benne' xu'u lu ne'ę

xęzr la xu na' bchebę' ga benne' Pablo. Gate benne' naque' benne' cheę xęzre nababa Cilicia,³⁵ na' guzre' le':

—Guchi'a cheę da dxaca chiu' gate xeelá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúe' Pablo naga zua xu'u lawe' cheę Herodes.

24

Pablo dxuzri'e dizra' da dxácale na le' lau Félix

¹ Ca gudé gaxxu' zra, Ananías, bxruze blau, bzrine' xęzre Cesarea nen bal-la benne' gula sina ca', ne tu benne' dxenné' waláz cheę benne' ca', le' Tértulo. Benne' caní belezrine' lau benne' xu'u lu ne'e xęzr la xu na' cheę xelagu zria Pablo. ² Gate xeajlexrí'e Pablo, na' guzú lau Tértulo dxawe' xria Pablo, dxę'e Félix:

—Xcalenu' lue', benne' xu'u lu na'u xęzr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheętu', na' ca dxenná be'enu' netu' lu xel-la' sina chiu' dxexedxúaj na chawe'. ³ Xúgute da nigá dxezí'queze lu na'ntu' gáteteze na', ne dxętu' lue' xcalén cuinu', Félix.

⁴ Cheę québedxa guntu' lue' zédete, dxata' xueda' lue' gun zren lazru' xennu' cheętu' tu chí'idau'. ⁵ Dxenná'antu' benne' nigá dxúnle'e da caleła, ne gáteteze na' lu xęzr la xu nigá dxune' benne' judío chupa la'a, ne naque' benne' xíchaje cheę benne' ca' zaj da' tu benne' Nazaret. ⁶ Benne' nigá guca lazre' guzúe' chalá'ala xudau' cheętu', na' netu' gudél-lantu' le', ne guca lázrentu' guchí'antu' da naca cheę' ca nadxixruj bea na cheętu'. ⁷ Na' Lisias, benne' dxenná be'e lu wedil-la, bequé'e le' lu na'ntu' xadía. ⁸ Na' gunné' che zaj zra benne' xelagu zrie' Le', dxal-la' xeelé'e lau lue'. Lue' gaca guchębu' benne' nigá, na' nézenu' naca da li zria dxáguntu' le'.

⁹ Benne' judío ca' zaj zre'e na' gulenné' naca da li xúgute da ca'. ¹⁰ Nadxa benne' xu'u lu ne'e xęzr la xu na' guchisa ne'e cheę guchalaj Pablo, na' gunná Pablo:

—Dxebéle'ęda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca cheę xęzr la xu cheętu' ba zeaj zane' iza. ¹¹ Lué'queze waca chéajni'inu' ba zeaj chazrinnu zraze bla'a Jerusalén cheę güe lá'ana' Dios. ¹² Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' cheę xęzre na'. ¹³ Benne' caní quebe xelezé'quene' xululé'ene' naca da li ca zaj naca da dxelawe' neda' zria. ¹⁴ Tu da dxexecheba', dxucá'ana szrena' Dios cheę xra xrtáudxu ca', dxuna' ca da dxelenná benne' caní naca na da węn lazre', lawe' da dxéajle'a xúgute da naxúaj

na lu xiche chee da nadxixruj bea na, ne chee benne' ca' buluchálaje' waláz chee Dios. ¹⁵ Neda' dxebeza lázrqueza' ca da gun Dios, ca dxelebeza lazre' benne' caní, dxebeza lázrentu' Dios gusebane' benne' gate ca', benne' xrlátaje, ne benne' ca' dxelune' da calela. ¹⁶ Chee le na' dxue lazra' sua zri xichaj lázrdawa' lau Dios, ne lau bèneache ca'.

¹⁷ 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. ¹⁸ Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca gudé bca'ana chawe' cuina' cáteze naca da zéajlentu', san quebe nu benne' bchaga', ne quebe nu benne' guché'ena' zraga. ¹⁹ Benne' caní dxal-la' xelélé'e nigá chee xelawe' neda' zria che bi zua dxelaca chee' nen neda', ²⁰ san che quebe bi de, na' benne' caní zaj zre'e nigá dxal-la' xelenné' che bi belezrélene' da dxebaga' gate zua' lau benne' xu'u lawe' blau ca' chee judío ca'. ²¹ Tuze da bēna' gate zua' lau benne' ca', gunnéa' zizraj: Na'a dxuchi'ale chia' lawe' da dxeajlí lazra' xelexebán benne' gate.

²² Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxeda' chee da nigá dxaca chee.

²³ Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelexegu'e Pablo lu xu'u lawe' na', na' xelu'e le' lataj bi gune', ne xelu'e lataj benne' ljwezre Pablo cheajlenné'e le', ne bi xelune' chee'.

²⁴ Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzrin Pablo chee guchálajlene' le' ca naca xel-la' dxeajlí lazre' chee' chee Jesucristo. ²⁵ Gate Pablo bchálajlene' le' ca dxal-la' gundxu da xrlátaje, ne nna be'e cuínadxu, na' zrin zra guchi'a Dios cheedxu gate cheajsé chee xezr la xu, na' bzrebe Félix, ne guzre' Pablo:

—Bexíaj na'a. Gate nalátaja', na' nnéqueza' lue'.

²⁶ La gaze dxaca lazre' Félix gunezruj Pablo le' dumí chee gusane' le'. Chee le na' gunnéle'e Pablo chee guchálajlene' le'. ²⁷ Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lizre xia lawe' da guca lazre' xegá'ane' chawe' lau judío ca'.

25

Pablo dxexechebe' lau Festo

¹ Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxíaję' Jerusalén. ² Lu xezre na' belezrín benne' xíchaję ca' chee bxruze ca', ne benne' judío blau ca' lau le', ne gulawe' zria Pablo. ³ Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelútię' Pablo la neza gate zezé'e na'. ⁴ Bechebe Festo ba xu'u Pablo lizre xia lu xezre Cesarea, na' léqueze' ba nune' chéaję' na' xetú chupa zra. ⁵ Na' guzre' benne' ca':

—Benne' ca' zaj zre'e lówela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da caleła da bene', waca gágule le' zria.

⁶ Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xejlexrí'e Pablo. ⁷ Gate bzin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. ⁸ Nadxa Pablo bechebe' waláz chee', gunné':

—Neda' quebe bi da caleła ne guna', quegá chee da nadxixruj bea chee judío ca', ne quegá chee xudau' chee', ne quegá chee César.

⁹ Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéaju' Jerusalén chee guchi'a neda' ca naca chiu' na'?

¹⁰ Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinnaj ne guna' chee benne' judío ca'. ¹¹ Che ba bęna' tu da zrinnaj da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé'e neda' lu na' benne' ca'. Dxenaba' zri'a chia' lau César.

¹² Ca gudé bchálajlene' benne' dxuluzéajni'i le', na' Festo guzre' Pablo:

—Ba gunabu' zri'a chiu' lau César. Chéaju' lau César.

Pablo dxezrine' lau Agripa, benne' wenná bea

¹³ Ca gudé zane' zra Agripa, benne' wenná bea, ne bi zane' belezrine' Cesarea chee xulugape' Festo diuzre. ¹⁴ Gulezúe' na' tu chupa zra, na' Festo bzenne' Agripa, benne' wenná bea na' ca naca chee Pablo. Guzre' le':

—Zua tu benne' nigá, benne' bca'ana Félix lizre xia. ¹⁵ Gate guzúa' xezre Jerusalén, na' benne' xíchaję ca' chee bxruze ca', ne benne' gula sina ca' chee judío ca' gulenné' chee benne' nigá, ne gulenabe' neda' chuga' chee' gatię'. ¹⁶ Neda' becheba'

benne' ca', gunnía' benne' xu'u lawe' chee Roma quebe nu benne' dxelechugue' chee' gatië' che quebe zrine' lau benne' ca' dxelawe' le' zria chee xechëbe' waláz chee'. ¹⁷ Chee le na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'. ¹⁸ Benne' ca' gulawe' le' zria quebe bi gulenné' chee' ca da gúqueda' neda'. ¹⁹ Laze láweze da gulenné' chee' naca na ca naca da dxeléajle'e chee Dios, ne chee tu benne' le' Jesús, benne' gute, san dxenná Pablo naca banë'. ²⁰ Quebe bezréleda' ájala guna' chee da na', na' bchëba' Pablo che dxaca lazre' chéajë' Jerusalén chee zri'a ca naca chee' na'. ²¹ Nadxa le' gunabë' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

²² Nadxa gunná Agripa, dxë'e Festo:

—La gaze neda' dxaca lazra' xenda' chee benne' nigá.

Na' bechëbe Festo:

—Wxre xennu' chee'.

²³ Zra xula, gate belezrín Agripa, ne Berenice ga na', belú'e lu dutë xel-la' szren nen benne' dxenná be'e lu wedil-la, ne benne' blau ca' chee xezre. Na' Festo gunná bé'ene' xeajlexrí'e Pablo, ²⁴ na' gunné':

—Agripa, benne' wenná bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee benne' nigá, na' tu gulézqueze' neda' dxal-la' gatië'. ²⁵ Neda' dxéqueda' quebe bi bene' da gudé na le' gatië', san léqueze' gunabë' zri'a chee' lau César. Chee le na' ba nuna' chee' sel-la' le' lau César. ²⁶ Quebe bi de da guzúaja' chee Xrana' César ca naca chee benne' nigá. Chee le na' dxuzúa' benne' nigá laule le'e, ne da naca bláuqueze, dxuzúa' le' lau lue', wenná bea Agripa, chee guchëbu' le' chee gata' late' da guzúaja' ca naca chee'. ²⁷ Dxéqueda' quebe naca chawe' sel-la' tu benne' nadxéajë' du xia, ne quebe nnia' bi da zria nape'.

26

Pablo dxexechëbe' lau Agripa, benne' wenná bea

¹ Nadxa gunná wenná bea Agripa, guzre' Pablo:

—Waca xechëbu'.

Na' Pablo guchisa ne'e, ne guzú lawe' dxuchálajë', dxenné':

² —Dxebéle'eda' dxunu' neda' lataj dxuchálaja' lau lue', wenná bea Agripa, chee xechëba' ca da gulenná benne' judío chia' neda', ³ ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee le na' dxenaba' lue' xennu' chia' dutë xel-la' zren lazre' chiu'.

4 'Xúgute benne' judío ca' zaj nézene' ca bēna' lazria', ne lu xezre Jerusalén gate nácatea' bidau'te. 5 Zaj nézqueze benne' ca', ne waca xelexechebe' che dxelaca lazre', ca nácatea' benne' cuíde'te, naca' fariseo. Benne' fariseo ca' zjácaldxe' ca naca chee da dxeléajle judío ca' chee Dios. 6 Na'a lawe' da dxebeza lazra' gusebán Dios benne' gate ca', ca guchebe lazre' chee xra xrtáuntu' ca', benne' ca' buluzúe' neda' lau xu'u lawe'. 7 Dxebeza lazre' chazrinu cue' zri'ine zre sua Israel xelexe'ene' gaca ca naca da nigá guchebe lazre' Dios, na' chee le na' dxulucá'ana szrene' Dios, ne dxelune' zrin chee' te zra ne chizrela. Na'a, wenná bea Agripa, benne' judío ca' dxelawe' neda' zria lawe' da dxebeza lazra' ca naca da caníqueze da nachebe lazre' Dios. 8 ¿Quebe dxéajle'u gusebán Dios benne' gate ca'?

9 'Néda'queza' nédxute gúqueda' da zan da dxal-la' guna' chee benne' ca' dxeléajle'e chee Jesús, benne' Nazaret. 10 Caní bēna' lu xezre Jerusalén. Lu xel-la' dxenná bea chee benne' xíchaje ca' chee bxruze ca', benne' zan bzra'a lizre xia, benne' dxeléajle'e chee Jesús, na' gate belúti'e benne' ca' neda' bēnqueza' tuze benne' ca' belúti'e le'. 11 Zane' lásate bdea' benne' ca' ba xa' chee xulusane' xel-la' dxeleajlí lazre' chee'. Caní bēna' xúgute lu xu'u ca' naga dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xezre zitu' ca'.

12 'Chee guna' da nigá zexá'a xezre Damasco, zaj nase-la benne' xíchaje ca' chee bxruze ca' neda' nen xel-la' dxenná bea chee'. 13 Ca zexá'a xu'a neza na', du wagubizra ble'eda' tu xi' da za' xabáa da nácadxa ca xel-la' dxenná' chee gubizra, na' gusení na naga zexá'a neda' nen benne' zjácálene' neda'. 14 Nadxa xúgutentu' xeajcházentu' lu xu, na' benda' chi'i tu benne' gunné' dizra' hebreo, guzre' neda': "Saulo, Saulo, ¿bizra chee na' nau zi' xuzru' neda'? Lue'ze dxun zi' cuinu' ca dxun bezre gate dxulíbeba' lawe' xágala da dxádu'e-ba'." 15 Nadxa gunnéa': ¿Nuzra Lue', Xran? na' Xránadxu guzre' neda': "Neda' naca' Jesús, bēnea' nau zi' xuzru'." 16 Bexasa, guzé, lawe' da ble'e lawa' lue' chee gunu' zrin chia', ne chee xechebu' ca naca da ba blé'enu', ne ca naca da za le'enu' gate te na'a. 17 Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a. 18 Dxsusel-la' lue' lau benne' ca' chee sálaju' xiaj lau benne' ca' chee xulusane' da naca chee da chul-la, na' xelune' da naca chee xel-la' naxaní', ne chee xelexedxúaje' lu na' da xriwe', ne xelexú'e lu na' Dios, ne chee xeléajle'e chia' neda', na' xunite lau Dios ca naca dul-la chee', ne gaca chee' tu da xelape' lówela benne' ca' ba gucá'a Dios."

19 'Ca' guca, wenná bea Agripa. Bzua' dizra' ca naca da ble'e Dios neda' da naca chee xabáa. 20 Nedxu bchálaja' dizra'

chee Dios lau benne' zaj zře'e xezre Damasco, na' gudé na' lau benne' zaj zře'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexeb'i lazre', ne xelexexaque' chee Dios, na' xelune' da xelunna bea na ca da ba zaj naque'. ²¹ Chee le na' benne' judío ca' gulél-le' neda' lu xudau', ne gulaca lazre' xelútié' neda'. ²² Dios dxácalene' neda', na' ze chúchuqueza' lu zra na'a zra, dxuchálajlena' xúgute benne' ca naca chee Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee Dios, ne da gunná Moisés dxal-la' gaca. ²³ Gulenné' Cristo dxal-la' si' saque', na' ca te gatié' dxal-la' xebane' ládujla benne' gate nédxudxa ca xúgute benne' ca', na' gulenné' xelén benne' judío ca', ne benne' quebe zaj naque' judío ca naca chee xel-la' naxaní' chee Dios, da dxulé'e na le' ca gaca xeelé'.

Pablo dxaca lazre' guzėjni'ine' Agripa gaque' benne' chee Cristo

²⁴ Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

²⁵ Pablo bechebe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajlędxu, ne da li. ²⁶ Nigá zua wenná bea Agripa. Nézele'ene' ca naca chee da caní, na' chee le na' dxuchálaja' dute xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee da quebe guca na bagácheze. ²⁷ ¿Dxéajle'u lue', wenná bea Agripa, ca naca da gulenná benne' ca' buluchálaje' waláz chee Dios? Nezda' dxéajle'u.

²⁸ Nadxa gunná Agripa:

—Xeláteze guzėjni'inu' neda' gaca' chee Cristo.

²⁹ Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute benne' dxellené' chia' na'a, xelaque' ca néda'queza', san quebe xeledxéaje' du xia.

³⁰ Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute benne' ca' zaj dx'e'e na'. ³¹ Belexedxúaje' cheeze' chee xuluchálajle ljwezre' ca naca chee da nigá. Na' gulenné', dxelé ljwezre':

—Benne' nigá quebe bi da calęla ne gune' da gudé na le' gatié', ne quebe dxal-la' chu'e lizre xia.

³² Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

27

Dxelesel-le' Pablo lu xezre Roma

¹ Gate ba zaj nune' xelesel-le' netu' lu xezr la xu Italia, na' Pablo, ne xezícala benne' ca' zaj zre'e lizre xia, buludé'e le' lu na' tu benne' dxenná bé'ene lu wedil-la le' Julio, benne' yu'u lu ne'e tu cue' benne' dxjaque' wedil-la nazí le na Benne' Chee Augusto Dxjaque' Wedil-la. ² Na' guxú'untu' tu lu da dxedá lawe' nísadau' chee xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. ³ Zra xula bzrintu' xezre Sidón, naga Julio bēnle'e da chawe' chee Pablo, na' be'e le' lataj xeajnné'e bi bíchedxu ca' chee bi belune' chee'. ⁴ Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chalá'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. ⁵ Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

⁶ Lu xezre na' benne' dxenná be'e lu wedil-la bezrague' tu da dxedá lawe' nísadau' chee xezre Alejandría da zeaj na xezr la xu Italia, na' bzre'e netu' lawle chee zeajntu' Italia na'. ⁷ Zane' zra zéajntu' chawe' lazre', na' stébele'e bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xezr la xu Creta da naxechaj nísadau'. ⁸ Stébele'e gudentu' chalá'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

⁹ Záne'te zra bnítentu' xu'untu' da dxedá lawe' nísadau' na', na' ba naca stebe zéajntu' lu nísadau' na' lawe' da ba dxexú'udxu beu' zaga. Chee le na' bzéajni'i Pablo benne' ca'. ¹⁰ Dxenné':

—Le'e, benne', dxelé'eda' wácale'e stebe naga zéajdxu na'a, na' wabía xi' da dxedá lawe' nísadau' nigá ne xua da nua na, na' zrúzetē cuía xidxu dxi'u.

¹¹ Benne' dxenná be'e lu wedil-la guxéajledxe' chee xrane da dxedá lawe' nísadau' na', ne chee benne' xu'u na lu ne'e, ca chee Pablo. ¹² Na' lawe' da quebe naca lataj na' chawe' súadxu na' beu' zaga ca', na' xúgutē' guléquene' nácadxa chawe' xezá' da dxedá lawe' nísadau' na' chee xexéaj na Fenice, tu xezre chee Creta na', da dxe' chalá'a chee xezr la xu Creta naga dxebía gubizra, na' xegá'anadxu na' beu' zaga ca'.

Dxaca be' bdunu' lu nísadau'

¹³ Nadxa guzú' lau dxaca lase be' da za' chalá'a naga dxedé gubizra beu' zaga, na' guléquene' waca chéajtezentu' lu nísadau', na' gudentu' gáguze lu xezr la xu Creta na'. ¹⁴ Nadxa

chíteze guca guzú lau dxácale'e be' bdunu' da za' chalá'a ga za' be' zaga. ¹⁵ Be' na' guzú lau dxuzriga na chalá'ala da dxedá lawe' nísadau' na', na' lawe' da québedxa guca chéajdxantu' naga za' be' na' ben na ba xen bentu' lataj bzriga na da dxedá lawe' nísadau' na'. ¹⁶ Na' gudentu' cúzrela tu xezr la xudau' naxechaj nísadau' da nazí le na Clauda, naga québedxa dxácate na be' na' wal-la, na' stébele'e gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. ¹⁷ Ca gudé bulucuenē' da dau' na', na' buludé'e du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebe' chaze da dxedá lawe' nísadau' na' lu xuzre' naga nazí le Sirte, na' bululétaje' ladxe' ca' da dxelecá'a be' lu da dxedá lawe' nísadau' na', na' belúe lataj be' na' bzriga na len. ¹⁸ Zra xula, lawe' da ne dxácale'e be' bdunu', gulezú lawe' dx-eledxú'unē' xua ca' lu nísadau', da nua da dxedá lawe' nísadau' na'. ¹⁹ Zra guxunne' zra nen ná'quezentu' gudxú'unantu' lu nísadau' da dxuluchínene' chee da dxedá lawe' nísadau' na'. ²⁰ Zane' zra quebe blé'entu' gubizra ne belaj ca', ne ca naca be' bdunu' zren na' ne dxuzriga na da dxedá lawe' nísadau' na', na' québedxa guleza lázrentu' láquezentu'.

²¹ Zane' zra gudentu' quebe náguntu', na' guzē Pablo láwela benne' ca', ne gunné':

—Le'e, benne', cháwedxa la guca cheedxu la benle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau' nigá, na' xua' da nua na quebe guzrí xi'. ²² Na'a, quebe guchebe lázrele. Netudxu dxi'u quebe cuía xidxu, lácala cuía xi' da dxedá lawe' nísadau' nigá. ²³ Ba dxēle ble'e lau tu gubáz chee xabáa chee Dios neda'. Naca' chee Dios nigá ne dxuna' zrin chee'. ²⁴ Gubáz na' guzre' neda': "Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselé' lu xel-la' gute xúgute benne' zaj zra' nen lue' lu da dxedá lawe' nísadau' nigá." ²⁵ Chee le na', benne', le gun dipa lázrele, lawe' da dxuxrén lazra' Dios, ne nezda' waca ca gunná gubáz chee xabáa na' bchálajlene' neda'. ²⁶ Na'a dxun na ba xen cheajchaze da dxedá lawe' nísadau' nigá tu lu xezr la xu da naxechaj nísadau'.

²⁷ Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxēla guleque be'e benne' ca' dxulusá da dxedá lawe' nísadau' na' ba dxezrín na dxu'a xu bizre. ²⁸ Na' buludxixre' cátite situj dxe' nisa na', na' dxe' na galaj esa. Na' xetú chí'idau' gudé buludxixre' da xula, na' dxe' na chinu' ésaze. ²⁹ Belezrebe' cheajtá da dxedá lawe' nísadau' na' xiaj, na' buluzale' tapa xia da nácale'e zi'i zran nisa zeaj zranla da dxedá lawe' nísadau' na', na' gulebeze'

chaní' dudxuze dxelezrebe'. ³⁰ Nadxa benne' ca' dxulusá da dxedá lawe' nísadau' na' guléquene' xelexedxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelune' ca' benne' xuluzáladxa xia da guxru na da dxedá lawe' nísadau' zren na' da zeaj laula na. ³¹ Pablo bzenne' benne' dxenná be'ē lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lale le'e.

³² Nadxa benne' dxjaque' wedil-la gulechugue' du zri'a da nadxéaj da dau' na', na' belú'ē na lataj bexruj na lu nísadau'.

³³ Ca guxaní'sise' bzéajni'i Pablo xúgute' benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule. ³⁴ Dxata' xueda' le'e gágule. Da nigá dxun na ba xen chee lale. Netudxu dxi'u quebe cuía xi' netú xicha xíchajdxu.

³⁵ Ca gunné' caní, Pablo guqu'é' tu xeta xtila, na' guzre' Dios: “Xcalenu”, lau xúgute' benne' ca'. Nadxa bzúzruje' na, na' guzú lawe' dxawe'. ³⁶ Nadxa xúgute' belún dipa lazre', na' gulezú lau dxelawe'. ³⁷ Cátite netu' zrantu' lu da dxedá lawe' nísadau' na' nácantu' chupa gaxúa ga xun chinu tuntu'. ³⁸ Ca gudé gulawe' cátite guléljene', na' buluzale' zrua' xtila lu nísadau' chee bezrá' da dxedá lawe' nísadau' na'.

Dxebía xi' da zren da dxedá lawe' nísadau'

³⁹ Gate guxaní', benne' ca' dxulusá da dxedá lawe' nísadau' na' quebe belexúnbe'ē xezr la xu na' da zua na le nna' naga zaj zre'ē. Belelé'ene' naga dxexú'u nísadau' gachaj lówela xezr la xu na', na' dxu'e na' naca lache'. Na' gulaca lazre' xuluxudé' da dxedá lawe' nísadau' laduj na'. ⁴⁰ Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'e xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lówela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. ⁴¹ Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lówela da dxedá lawe' nísadau', na' begá'ana na chalásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxeajéle'ē xeajxruza chee nísadau' na' zran da dxedá lawe' nísadau' na'. ⁴² Benne' dxjaque' wedil-la gulaca lazre' xelútie' benne' zaj nadxéaje' chee quebe xuluxuzrúnmuje' xelezrúe' lawe' nisa na'. ⁴³ Benne' dxenná be'ē lu wedil-la guca lazre' guselé' Pablo, na' quebe be'ē lataj benne' dxjaque' wedil-la xelútie' benne' ca'. Na' gunná bé'ene' benne' ca' dxelaque' dxelezrúe' nisa cheajlexexrité' lu nisa

na' chee xelexezrine' lu xu bizre. ⁴⁴ Benne' ca' xezícala, bal-le' gulequē'e blaga', ne xebal-le' gulequē'e blaga' bizruj chee da dxedá lawe' nísadau' na', na' caní guca, xúgute' belexezrine' lu xu bizre.

28

Da ben Pablo lu xezr la xu na' nazi le na Malta

¹ Ca gulá xúgute'ntu', na' gunézentu' xezr la xu na' da naxechaj nísadau' nazi le na Malta. ² Benne' zaj zre'e na' belúnle' netu' cháwedau'. Gulebéche'le'e xi' lawe' da dxúnle'e zaga, ne dxaca xiuj, na' gulenné' netu' cheajsentu' dxu'a xi' chee xezré'entu'. ³ Nadxa Pablo guquē'e tu xrunu zruze xaga, na' ca dxuzré'e na lu xi', bedxúaj tu belá' da na' dxuzrúnnujba' lu da la na', na' gudagu xa'aba' na' Pablo. ⁴ Gate belelé'e benne' ca' zaj zre'e lu xezr la xu na', nal-la' belá' na' na' Pablo, na' gulé ljwezre':

—Benne' nigá naque' wete benne' lawe' da lácala gulé' lu nísadau', quebe dxue lataj dios na' nazi'i le' Xrlátaje gaca ban le'.

⁵ Pablo guzribe' belá' na' lu xi', ne quebe bi gúquene'. ⁶ Xúgute' gulebeze' chee gata' xi' na' Pablo u che'e gatie'. Ca gudé gulebeze' tu chi'i wal-la, ne belelé'ene' quebe bi gúquene', na' buluché'e ca da dxeléquene', ne gulezú lawe' dxelenné' naca Pablo tu dios.

⁷ Gágute' naga zrantu' de xezr la xu chee benne' blau chee xezr la xu na', le' Publio. Benne' nigá guzi' lu ne'e netu', ne bxúle'e netu' cháwedau' lawe' chunna zra. ⁸ Xra Publio deze', quebe chawe' zue', na' xu'e da la, ne dxaque' xízrawe' dxen. Pablo guxíaje' xejnné'e le', na' ca gudé bchálajlene' Dios, bze ne'e lawe' le', na' bexaque'. ⁹ Gate belenne' da nigá, na' benne' ca' xezícadxa, benne' we' ca' zaj zre'e xezr la xu na', belezrine' lau Pablo, na' belexaque'. ¹⁰ Gulápalé'e netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgute' da nachínnentu'.

Pablo dxezrine' xezre Roma

¹¹ Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na' na' dxácatē naca beu' zaga ca'. Naca na tu da dxedá lawe' nísadau' chee xezre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj le' Cástor ne Pólux. ¹² Bzrintu' dxu'a xezre Siracusa naga begá'anantu' chunna zra. ¹³ Gate beza'ntu' na', na' gudentu' dxu'a xezr la xu na', ne bzrintu' xezre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xezre Puteoli. ¹⁴ Lu xezre na' bezrágantu' bal-la bi

bíchedxu, benne' gulenné' netu' lizre' xegá' analentu' le' xrunu' zra, na' ca' gudé na' guza'ntu' ní'antu' zéajntu' Roma. ¹⁵ Bi bíchedxu zaj zra' Roma ba belenne' cheentu', na' beledxúaje' xezre na', bedajlechague' netu' tu xézredau' nazí le na Xi'a Chee Apio, na' xebal-le' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu", ne ben dipa lazre'. ¹⁶ Gate bzrintu' Roma, benne' dxenná be'e lu wedil-la bde'e benne' zaj nadxéaje' lu na' benne' xíchaje chee bi xra'aga ca', san be'e lataj Pablo sue' cheeze' nen tu benne' dxéaje' wedil-la, benne' guxúe' le' chee quebe xuzrúnnuje'.

Pablo dxuchálaje' chee Jesús lu xezre Roma

¹⁷ Ca' gudé chunna zra Pablo gusel-le' benne' xeajnné' benne' judío blau ca' zaj zre'e Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'e Jerusalén buludé'e neda' lu na' benne' Roma ca'. ¹⁸ Gate benne' Roma zaj zre'e na' buluchebe' neda', gulaca lazre' xulusane' neda' lawe' da quebe belezrelne' bi da bena' da gun na xelechugue' chia' gatia'. ¹⁹ Judío ca' guledábague', na' ben na ba xen gunaba' neda' zri'a chia' lau César. Quebe nacan chee gawa' zria benne' lázredxu. ²⁰ Chee le' na' gunnéa' le'e chee le'eda' le'e, ne guchálajlena' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

²¹ Nadxa gulé'e le':

—Netu' quebe bi xiche ne si' lu na'ntu' da za na Judea ca naca chiu' lue', na' netú bi bíchedxu, benne' judío, benne' ba bele'e nigá bezé'e Judea, quebe bi da calela dxenné' benu'. ²² Dxaca lázrentu' xénentu' ca da dxéquenu' lue' lawe' da nézentu' gáteteze na' dxeleenné' chee benne' ca' dxelájle'e dizra' cube nigá.

²³ Buluzúe' tu zra gate xelexezrague', na' lu zra na' benne' zan belezrague' naga zua Pablo. Bchálajlene' benne' ca' ca naca xel-la' dxenná bea chee Dios che zílatela guxrínnele'e. Bené' ba xuzre guzéajni'ine' benne' ca' ca naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. ²⁴ Bal-le' gulezi'e xrtizra' Pablo, san xebal-le' quebe gulájle'e. ²⁵ Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bénnea' bchalaje' waláz chee Dios, gunné':

²⁶ Guxíaj, xeajezre benne' ca':

Da li wenle le'e san quebe chéajni'ile.

Da li walé'ele, ne quebe gueque be'ele.

27 Zaj naca zide' lázxdau benne' caní,
ne quebe dxelenne' chawe'.

Zaj naxezxuj xiaj lawe'
chee quebe xeelé'ene' nen xiaj lawe',
ne quebe xelénene' nen nague',
ne quebe xeléajni'ine' nen lázrdawe',
ne quebe xelexelé'e lawa' neda' chee xexuna' neda' le'.

28 'Dxal-la' nézele le'e, na'a ne da za za' xel-la' weselá chee
Dios guchálajlentu' benne' quebe zaj naque' judío, na' benne'
ca' xelezí'e na.

29 Gate gunná Pablo da nigá, na' besía'aca judío ca', dxu-
luchébele'e ljwezre'.

30 Pablo guzúe' chupa iza lu xu'u da dxízruje', ne dxezí' lu
ne'e xúgute benne' dxedajlenné'e le'. 31 Du lazre' bchálaje' ca
naca xel-la' dxenná bea chee Dios, ne bsédené' ca naca chee
Xránadxu Jesucristo, na' netú quebe nu blale' le'.

DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA

Pablo dxugape' diuzre bi chee Cristo zaj zrabe' Roma

¹ Neda', Pablo, naca' wən zrin chee Jesucristo. Dios bláwizre' neda' chee gaca' gubáz chee', ne guqué'e neda' chee guzenda' bėnneache dizra' chawe' chee'.

² Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálaje' waláz chee'. ³ Dizra' chawe' nigá dxulé'e na ca naca chee Xránadxu Jesucristo, Zri'ine Dios. Lu bėla' dxen chee' naque' zri'ine zre sua wenná bea David. ⁴ Lu be' nácaqueze' da naca na lá'azxa, naque' Zri'ine Dios. Dios blé'ene' naca caní gate bsebanē' Le' ládujla benne' gate ne chee xel-la waca chee'. ⁵ Ne chee Zrí'ine' Dios nunne' netu' lataj nácantu' gubáz chee' chee xelezrá' benne' ládujla xúgute cue' xezr la xu, benne' xeleajlí lazre' Cristo, ne xuluzúe' dizra' chee' chee gaca ba La Le'. ⁶ Ládujla benne' caní zrale le'e chee gácale bi chee Jesucristo.

⁷ Dxuzúaja' chee xúgutele le'e dxéajlele chee Cristo, zrale xezre Roma. Dios nazrí'ine' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo gunē' chawe' chee, ne gunne' le'e xel-la dxebeza zri lazre'.

Pablo dxaca lazre' chéaje' xezre Roma

⁸ Da naca blaudxa, ne chee Jesucristo dxapa' Dios chia' xcalene' ca naca chee xúgutele lawe' da dxezralaj ca dxeajlí lázrele Cristo du gabí'i xezr la xu. ⁹ Duté lázrdawa' dxuna' zrin chee Dios, dxuzenda' bėnneache dizra' chawe' chee Zrí'ine'. Le' nézquezne' dxeajsá lázrqueza' le'e gate dxuchálajleña' Le'. ¹⁰ Dxata' xúeda' Dios, che naca da dxaca lazre' Le', chee ájala gunne' neda' lataj xedajnná'a le'e ¹¹ lawe' da dxaca lazra' le'eda' le'e ne gunna' le'e lataj si'le da naca chee Be' Lá'azxa, chee se cháchadxale. ¹² Caní gutipa lázredxu tudxu xetudxu lu xel-la dxeajlí lazre' cheedxu.

¹³ Bi bícha'dau', dxaca lazra' nézele zane' lasa guca lazra' xida' xedajnná'a le'e, san dxácatē ca' dxecuasa na. Dxaca lázrele'a xida' chee guna' zrin gusédeda' da naca chee Cristo ládujla le'e, cáteze ba bėna' ládujla xezícadxa bėnneache zaj zre'e lu xezr la xu nigá. ¹⁴ Nabaga' guna' zrin caní ládujla xúgute bėnneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. ¹⁵ Chee le na', neda' ba zúaqueza' guzenda' le'e zrale xezre Roma dizra' chawe' chee Cristo.

Xel-la waca chee dizra' chawe' chee Cristo

¹⁶ Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxelejli lazre' le na, nédxula benne' judío ca', san cá'anqueze benne' quebe zaj naque' judío. ¹⁷ Dizra' chawe' nigá dxulé'e na dxi'u nagá'anadxu chawe' lau Dios che dxeajli lázredxu le na, chee cheajli lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajli lazre' Le'.

Dul-la da zaj nabaga bénneache

¹⁸ Ba ble'e Dios lu xabáa chee' ca gune', gudée' xel-la zi' xúgute benne' dxuluzúe' chalá'ala Dios, ne benne' wen da calela, benne' dxuluzague' da li ne chee da calela da dxelune'. ¹⁹ Zaj nézquezne' ca gaca xelúnbea bénneache da naca chee Dios lawe' da Léqueze Dios na' bache blé'ene' na zaca ba lau. ²⁰ Da quebe gaca lé'edxu chee Dios gaca gúnbeadxu na ne chee da ca' da ben Dios. Gate bente' xezr la xu dxunna bea na nácaqueze Dios, ne nápaqueze' xel-la waca. Chee le na' quebe bi de xuludé'ene'. ²¹ Lácala zaj núnbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé lazre' da níteze, na' gulechul-la xichaj lázrdawe' lawe' da zaj naque' benne' zide'. ²² Lácala dxeléquene' zaj naxéajni'ine', da li zaj naque' benne' xala, ²³ lawe' da buluzúe' chalá'ala Dios xabáa, Bénnea' quebe dxedé chee', ne dxelúe lá'ane' bedáu' xiaj xaga zaj naca na lu'a bénneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ni'a na'ba'.

²⁴ Chee le na' Dios ba guleaj xichaje' benne' ca' chee xelune' xúgute da sban da dxelezá lazre', na' bulucá'ana ditaj cuine' tue' xetue', ²⁵ lawe' da buluzúe' chalá'ala xel-la li chee Dios, na' gulezi' lu ne'e da wen lazre', ne belúe lá'ane', ne belecá'ana szrene' da ca' nun Dios, ne quegá Diosqueze, Bénnea' dxal-la' güe lá'anaquezdxu. ¡Ca'an gaca na!

²⁶ Chee le na' Dios ba guleaj xichaje' benne' ca' chee xelune' da dxelezá lazre' da ca' xedué'edxu. Cá'anqueze nu'ula buluzúe' chalá'ala xel-la zúale benne' chee', ne dxelune' da quebe zaj naca chee' xelune'. ²⁷ Cá'anqueze belún benne' biu, buluzúe' chalá'ala xel-la zúale zru'ule', ne dxelune' da sban da dxelezá lazre' tue' xetue', ne dxelune' da ca' xedué'edxu tue' xetue', na' dxeledé'e' xel-la zi' lu bel-la' dxen chee' ne chee da sban da dxelune'.

²⁸ Lawe' da québedxa gulaca lazre' xelexúnbe'e Dios, Le' guleaj xichaje' benne' ca' chee xuludé lazre' da calela, ne chee xelune' da quebe dxal-la' xelune'.

²⁹ Dxelune' xúgute da calela.

Dxulucá'ana ditje' bénneache.
 Dxelunē' da quebe naca xrlátaje.
 Zaj naque' benne' wecude'.
 Dxelunē' da zrinnaj.
 Zaj naque' benne' xa lazre'.
 Dxelutie' benne'.
 Dxelílaje' da ba xa'.
 Dxelezí xe'e.
 Dxeledanne' da xálaze.
 Dxuluchálaje' dizra' bizruj.
 30 Dxelenné' schanni' chee ljwezre'.
 Dxelecuídenē' Dios.
 Zaj naque' benne' wenné wal-la.
 Dxulucá'ana szren cuine'.
 Zaj naque' benne' wezé cua.
 Dxelalaj lazre' bícala da sban.
 Quebe dxuluzúe' dizra' chee xra xrne'e.
 31 Zaj naque' benne' lázrdau zide'.
 Dxulunitie' xrtizre'.
 Quebe zaj naque' zri'i lazre'.
 Quebe dxulunite lawe' chee ljwezre'.
 Quebe dxelexache lazre' chee ljwezre'.
 32 Zaj nézene' Dios guzríá xi'e bénneache,
 na' benne' dxelunē' da caní dxal-la' xelátie'.
 Benne' caní tu dxelúnzqueze' na,
 ne dxelexezaca ba lazre' nen benne' dxelunē' da caníqueze.

2

Dios dxuchi'e chee bénneache cáteze da zaj nune'

1 Chee le na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. 2 Nézquezdxu dxuchi'a Dios cáteze da naca na gate dxenné' zaj nabaga zria benne' ca' dxelún da caní. 3 ¿Dxéquenu' lue' wadé gun ca'aze chiu' gate Dios nne' zaj nabaga zria bénneache, lue' na' dxennáu' zaj nabaga zria benne' dxelún da caní, ne cá'anqueze dxunu' lue'? 4 ¿Dxuzú' chalá'ala xel-la zri'i lazre', ne xel-la zren lazre' zren chee Dios, ne quebe nézenu' lu xel-la zri'i lazre' chee' dxunne' lue' lataj xebi' lazru'? 5 Nacu' lázrdau zide', ne quebe dxexebi' lazru'. Chee le na' dxuzanu' da si sacu' lu zra na' gate Dios nne' zaj nabaga zria benne' ca' dxelunē' da calēla. Naca xrlátaje gune' da caní. 6 Lu zra na' gunne' ca da dxal-la' si' tu tudxu cáteze naca da bendxu. 7 Xel-la nabán zeajlí canna gunna Le' xúgute' benne' dxelaca lazre' xelezí'e lu na' Dios da xabáa, ne xel-la ba lá'ana, ne da zaj naca na da

chadía chacanna ne chee da chawe' da tu dxelúnzqueze'. ⁸ Lu xel-la dxezrá'a chee' nne' zaj nabaga zria xúgute benne' zre'e lazre' ca', benne' quebe dxuluzúe' dizra' da li, san dxuluzúe' dizra' da wen lazre'. ⁹ Gusaca zi'e, ne gudée' lu da ba xa' xúgute benne' dxelune' da calela. Ga su lau gunē' caní chee benne' judío ca', ne cá'anqueze gunē' chee benne' quebe zaj naque' judío. ¹⁰ Da xabáa, ne da ba lá'ana, ne xel-la dxebeza zri lazre' gunne' xúgute benne' dxelune' da chawe'. Ga su lau gunē' caní chee benne' judío ca', ne cá'anqueze gunē' chee benne' quebe zaj naque' judío.

¹¹ Dios tuze ca dxuchi'e da dxelún xúgute bēneache, ¹² na' benne' dxelune' dul-la, ne quebe zaj núnbe'e da bdxixruj be'e Moisés welebía xi'e lácala quebe belúnbe'e da nadxixruj bea na, na' benne' dxelune' dul-la lácala zaj núnbe'e da bdxixruj be'e Moisés welebía xi'e ne chee da nadxixruj bea na na'. ¹³ Quebe zaj nagá'ana chawe' lau Dios benne' dxelénzene' da nadxixruj bea na, san zaj nagá'ana chawe' lau Dios benne' dxuluzúe' dizra' da nadxixruj bea na. ¹⁴ Benne' zitu' ca', benne' quebe zaj núnbe'e da bdxixruj be'e Moisés, gate dxelune' ca dxenná da nadxixruj bea na na', lácala quebe zaj núnbe'e da nadxixruj bea na, naca chee' cáteze zua da nadxixruj bea na lu xichaj lázrdawe'. ¹⁵ Caní naquen lawe' da ca dxelune' dxulé'e na zua xichaj lázrdawe' ca naca da nadxixruj bea na, na' naca na ca naca da bdxixruj be'e Moisés. Xichaj lázrdawe' dxunna bea na chee da nigá, na' da dxelegú'u lazre' guzría xi na le', u xecá'a na le' ¹⁶ lu zra na' gate Dios guchi'e xúgute da nagache' chee xúgute bēneache lu na' Jesucristo cáteze dxenná dizra' chawe' na' da dxuzenda' bēneache.

Ca naca chee benne' judío ca' ne da bdxixruj be'e Moisés

¹⁷ Dxennáu' nacu' judío, ne dxennélenu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. ¹⁸ Nézenu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. ¹⁹ Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne gusení'u benne' zaj zra' lu da chul-la. ²⁰ Dxéquenu' waca guzėjajni'inu' benne' quebe zaj naxėjajni'e, ne gusédenu' benne' quebe ne cheajni'e lawe' da naca da nadxixruj bea na da napu' tu da dxulé'e na dxi'u chee gúnbeadxu da li. ²¹ Lue' dxusédenu' benne' xula. ¿Bizr chee na' quebe dxusede cuinu'? Lue' dxuzennu' benne' quebe dxal-la' cuandxu. ¿Bizr chee na' dxebanu' lue'? ²² Lue' dxennáu' quebe dxal-la' súaledxu zru'ula benne' xula. ¿Bizr chee na' dxunu' lue' ca'? Lue' dxecuídenu' bedáu' xiaj xaga. ¿Bizr chee na' dxebanu' lue' da gunní'a da de lu xudau' ca' chee bedáu' xiaj xaga ca'? ²³ Dxucá'ana szren cuinu' lawe' da núnbe'u da nadxixruj bea

na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. ²⁴ Naxúaj lu dizra' lá'azxa da dxenná na: Benne' quebe zaj naque' judío dxelenné' schanni' chee Dios ne chee da calela da dxunle le'e.

²⁵ Da li da nadxugu lu belá' chiu' da dxulé'e na nacu' bi chee Dios, naca na tu da chawe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu belá' chee' da na' dxulé'e na. ²⁶ Che benne' quebe nadxugu lu belá' chee' dxune' ca nadxixruj bea na, naque' ca tu benne' nadxúguqueze lu belá' chee' da na', lácala quebe naca caní chee'. ²⁷ Benne' quebe nadxugu lu belá' chee' da na' dxulé'e na, san dxune' da nadxixruj bea na, da na' dxune' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu belá' chiu' da na'. ²⁸ Quebe naca xanne' judío bénnea' naque' caní cúzreze, ne quebe naca xanne' da nadxugu na lu belá' chee benne' da naca na cúzreze, lu béla'ze. ²⁹ Benne' naca xánnie' judío naque' bénnea' naque' judío lu xichaj lázrdawe', ne da naca xanne' da nadxugu lu belá' chee benne' naca na da zua na lázrdawe'. Quebe nácaqueze na nen dízra'ze san naca na chee be' chee'. Benne' caní dxelezi'e xel-la ba lá'ana, quegá chee bénneache, san chee Dios.

3

¹ ¿Bizra da ba neza naca na chee benne' lawe' da nadxugu lu belá' chee' da na' dxulé'e na? ² Nácale'e na, ne zánete ca naca na. Da nédxute, Dios bdee' dizra' chee' lu na' benne' judío ca'. ³ ¿Bizra xca'? Che bal-la benne' judío ca' quebe zaj naque' li lazre', ¿nnadxu chee da na' quebe naca Dios li lazre'? ⁴ ¡Cabata! Dios dxúnqueze' ca naca da li lácala xúguté bénneache zaj naque' wen lazre', lawe' da naxúaj lu dizra' lá'azxa da dxenná Dios. Dxenné':

Nacu' xrlátaje ca da dxennáu',

na' wegá'anaquezu' xrlátaje gate xuluchi'e ca da dxunu'.

⁵ Che da calela da dxundxu dxulé'e na naca Dios xrlátaje, ¿Bízraqueze nnadxu? (Dxuchálaja' ca da dxuluchalaj bénneache.) ¿Naca Dios benne' quebe naca xrlátaje lawe' da dxudé'e dxi'u xel-la zi'? ⁶ ¡Cabata! Chela naca Dios Benne' quebe dxun da xrlátaje, ¿ájazra gune' guchi'e ca da dxelún bénneache?

⁷ Che da wen lazre' da dxuna' gun na chee xegá'ana zrendxa da li da dxun Dios, ¿bizr chee na' dxuchi'e chia' neda', dxenné' naca' benne' dul-la? ⁸ Che naca na caní, ¿bizr chee na' quebe gundxu da calela chee gulé'e laudxa da xrlátaje? Da nigá naca na da dxelenná bal-la benne' dxundxu, benne' ca' dxelún da

caleļa, ne dxelenné' schanni' cheędxu. Xrlátaje naca Dios nne' zaj nabaga zria benne' caní.

Xúguteđxu nabágadxu dul-la

⁹ ¿Bizra xca'? Dxi'u, benne' judío, ¿nácadxadxu xrlátaje ca xezícadxa benne' ca'? ¡Cabata! Bache blé'entu' zaj nabaga dul-la benne' judío, ne cá'anqueze xezícadxa benne' ca'. ¹⁰ Naxúaj lu xiche lá'azxa da dxenná na:

Quebe nu chilá' benne' xrlátaje, netú gue'.

¹¹ Quebe nu chilá' benne' dxéajni'ine'.

Quebe nu chilá' benne' dxexílaje' Dios.

¹² Xúgute' dxeledé' caleļa. Xúgute' zaj nanítie'.

Quebe nu chilá' benne' dxune' da xrlátaje, netú gue'.

¹³ Da dxelennéqueze' naca na ca tu da sgute, ca tu ba da naxálajze.

Nen luzre' ca' dxelezí xe'e.

Xrtizre' zaj naca na ca nisa snia cheę beļa' da dxe na zran lázxaba'.

¹⁴ Tu dxelennézqueze' dizra' schanni', ne dizra' zi'.

¹⁵ Chadite dxelútie' bėnneache.

¹⁶ Gáteteze dxeledé' dxuluzría xi'e, ne dxulusaca zi'e.

¹⁷ Quebe zaj nézene' ájala xelebeza zri lazre'.

¹⁸ Quebe dxelezrebe' Dios.

¹⁹ Nezdxu xúgute' ca da dxenná da nadxixruj bea gula na' da bzuaj Moisés, dxę na benne' ca' zaj xu'e lu na' da nadxixruj bea na na', cheę xelezúa zri xúgute', ne cheę xelexúnbea xúgute' bėnneache zaj nabague' zria lau Dios. ²⁰ Netú benne' quebe xegá'ane' xrlátaje lau Dios lawe' da nune' da dxenná bea da nadxixruj bea na, lawe' da dxulé'eze da nadxixruj bea na dxi'u nácadxu benne' dul-la.

Xelelá bėnneache che xeléajle'e cheę Cristo

²¹ Na'a, dxunna bea na ca gaca xegá'anadxu xrlátaje lau Dios, da quebe naca na ne cheę da nadxixruj bea na, lácala lu da nadxixruj bea na, ne lu da buluzúaj benne' ca' gu-lenné' waláz cheę Dios dxuluchalaj na ca naca cheę da nigá.

²² Nagá'anadxu xrlátaje lau Dios caní che dxeajlí lázredxu Jesucristo, ne cá'anqueze gaca cheę xúgute' bėnneache xeleajlí lazre' Le'. Tuz ca naca cheę bėnneache ²³ lawe' da zaj nun xúgute' bėnneache dul-la, ne quebe zaj naca cheę' xelexú'e lu xabáa cheę Dios. ²⁴ Lu da chawe' cheę Dios, cá'aze nune' cheę xegá'anadxu xrlátaje lau Le' lawe' da bexa'u Jesucristo dxi'u lu dul-la da nabágadxu. ²⁵ Dios bzuę' Jesucristo gutie' ne cheę xtúl-ladxu cheę xegá'anadxu xrlátaje lau Le' che dxeajlí lázredxu da ben Le'. Da nigá guca na cheę ble'e Dios naque' xrlátaje lácala lu xel-la zren lazre' cheę' bdeę' cá'aze ca naca dul-la da bęndxu nédxute. ²⁶ Gúcaqueze da nigá cheę gulé'e lawe' naca

Dios xrlátaje na'a, ne gácaqueze' xrlátaje gate gucá'ane' xrlátaje benne' ca' dxelejli lazre' Jesús.

²⁷ Na'a, ¿waca gucá'ana szren cuínadxu? ¡Cabata! ¿Bizr chee na'? Naca na lawe' da nagá'anadxu xrlátaje, quegá lawe' da bendxu ca nadxixruj bea na, san lawe' da guxeajli lázredxu Cristo. ²⁸ Ca'an naca, dxunna bea na nagá'ana xrlátaje tu benne' lau Dios lawe' da dxeajli lazre' Cristo, ne quegá lawe' da nune' ca da nadxixruj bea na.

²⁹ ¿Naca Dios cheeze benne' judío ca'? ¿Quegá nácaqueze' Dios chee benne' ca' quebe zaj naque' judío? Da li nácaqueze' Dios chee benne' ca' ³⁰ lawe' da zua tuze Dios, na' Le' gucá'ane' xrlátaje benne' ca' zaj nadxugu lu bela' chee' da na' dxunna bea na che dxelejli lazre' Cristo, ne cá'anqueze gucá'ane' xrlátaje benne' ca' quebe zaj nadxugu lu bela' chee' da na', che dxelejli lazre' Cristo. ³¹ Na'a che dxucá'ana Dios xrlátaje benne' dxelejli lázreze', ¿naca da nadxixruj bea na tu da québedxa zaca? ¡Cabata! Che dxéajledxu chee Cristo dxúnquezdxu ca dxenná da nadxixruj bea na.

4

Da dxulé'e da guca chee Abraham

¹ ¿Bízraqueze nadxu chee da ba neza da guca na chee xra xrtáudxu Abraham? ² Che Abraham bega'ane' xrlátaje lau Dios ne chee tu da bene', waca gucá'ana szren cuine' san quegá lau Dios. ³ ¿Bízraqueze naxúaj na lu dizra' lá'azxa? Dxenná na: Abraham guxeajli lazre' Dios, na' Dios guz' lu ne'e le' ca tu benne' xrlátaje. ⁴ Che nu benne' dxune' zrin, lazruj da si'e quebe naca na tu da dxunézruzjedxu, san naca na tu da nabágaquezdxu chee'. ⁵ Che nu benne' quebe bi nune', san dxeajli lázreze' Dios, Bénnea' dxucá'ane' xrlátaje benne' dul-la, nacan lawe' da dxezi' lu na' Dios xel-la dxeajli lazre' chee' chee xuca'ane' le' xrlátaje. ⁶ Cá'anqueze bchalaj David ca naca chee benne' naca da ba neza chee' lawe' da dxucá'ana Dios le' xrlátaje lácala quebe bi nune' chee xegá'ane' xrlátaje. ⁷ Gunná David:

Ba neza zrente naca na chee benne' ca' ba bunte lau Dios chee' da zrinnaj da zaj nune', ne gudé' cá'aze dul-la da belún benne' ca'.

⁸ Ba neza zrente naca na chee benne' ca' quebe dxusebaga Xránadxu le' dul-la da belune'.

⁹ ¿Naca ba neza nigá cheeze benne' ca' zaj nadxugu lu bela' chee' da na' dxulé'e na, u che nácaqueze na chee benne' ca' quebe zaj nadxugu lu bela' chee' da na'? Bache blé'entu' bca'ana Dios Abraham xrlátaje lawe' da guxeajli lazre' Le'. ¹⁰ ¿Bátazra bca'ane' le' xrlátaje? ¿Guca na ca gudé gudxugu lu

bela' chee Abraham da na' dxulé'e na, u che nédxula? Quebe guca na ca gudé na', san nédxula guca na. ¹¹ Gudxugu da na' lu bela' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu bela' chee'. Ca'an guca, naca Abraham xra xúgute benne' dxeleajlí lazre' Dios, ne quebe zaj nadxugu da na' lu bela' chee'. Cá'anqueze dxucá'ana Dios le' xrlátaje lawe' da dxeleajlí lazre' Le'. ¹² Da li naca Abraham xra benne' ca' zaj nadxugu da na' lu bela' chee', na' cá'anqueze dxeleajlí lazre' Dios ca ben xradxu Abraham gate na' quebe ne chugu lu bela' chee' da na'.

Dxezidxu da guchebe lazre' Dios che dxeajlí lázredxu Cristo

¹³ Dios guchebe lazre' chee Abraham, ne chee zri'ine zre sue' gaca chee benne' ca' xezr la xu nigá. Quebe guchebe lazre' na chee' lawe' da nune' ca dxenná bea da nadxixruj bea na, san lawe' da bega'ane' xrlátaje lau Dios gate guxeajlí lazre' Le'. ¹⁴ Che xezr la xu nigá gaca na tuze chee benne' ca' dxelune' ca da dxenná bea da nadxixruj bea na, dácheze nagá'ana xel-la dxeajlí lazre', ne québedxa zaca da guchebe lazre' Dios. ¹⁵ Lu da nadxixruj bea na xelebía xi' bènneache, san naga quebe ne zrin da nadxixruj bea na, quebe bi zaj nabaga bènneache chee da nadxixruj bea na na'.

¹⁶ Ca' naca na, dxezí' lu nnadxu da guchebe lazre' Dios ne chee xel-la dxeajlí lazre' cheedxu Le', chee gaca na tu da sidxu cá'aze, ne chee gaca na tu da súatequeze chee xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxixruj bea na, san cá'anqueze naca na chee benne' ca' dxeleajlí lazre' Dios ca ben Abraham. Ca' naca na, le' naque' xra xúgutedxu ¹⁷ lau Dios, Bénnea' guxeajlí lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bènneache zánete cue' xezr la xu.

Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

¹⁸ Abraham guxeajlí lazre' Dios, ne guleza lazre' si'e da guchebe lazre' Dios, lácala ba gudé chee si'e da dxebeza lazre'. Ca'an guca, guque' xra bènneache zánete cue' xezr la xu cáteze ba guzre Dios le', gunné: "Canite chan zri'ine zre su'." ¹⁹ Abraham ba zu'e ca tu gaxúa iza, san quebe gute ni'a ne'e lu xel-la dxeajlí lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. ²⁰ Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajlí lazre', ne bxren lázredxe'. Bca'ana szrene' Dios, ²¹ ne bèntequeze' neza napa Dios xel-la waca gune' xúgute ca da guchebe lazre'. ²² Chee le

na' Dios guzı' lu ne'e xel-la dxeajlı lazre' chee' chee' bca'ane' le' xrlátaje.

²³ Gate dxenná na: “Dios guzı' lu ne'e xel-la dxeajlı lazre' chee'”, quebe guxuaj na chee' tuze Abraham ²⁴ san cá'anqueze cheedxu dxi'u lawe' da si' lu na' Dios xel-la dxeajlı lazre' cheedxu che dxeajlı lázredxu Bénnea' bsebanē' Xránadxu Jesucristo ládujla benne' gate, ²⁵ na' naca Jesús Bénnea' bde Dios Le' chee' gutie' ne' chee' dul-la da nabágadxu dxi'u, ne bsebanē' Le' chee' xegá'anadxu xrlátaje lau Dios.

5

Da naca cheedxu lawe' da nagá'anadxu xrlátaje lau Dios

¹ Che nagá'anadxu xrlátaje lau Dios lawe' da dxeajlı lázredxu Cristo zúadxu xrlátaje nen Dios ne' chee' Xránadxu Jesucristo.

² Cá'anqueze lawe' da dxeajlı lázredxu Cristo, ne' chee' Le' dxezidxu da xrlátaje chee' Dios da tu dxeajlézquezdxu, ne dxebéle'edxu lawe' da dxebeza lázredxu sidxu da xabáa chee' Dios.

³ Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', ⁴ na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. ⁵ Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne' chee' Be' Lá'azxa, Bénnea' ba nunna Dios dxi'u.

⁶ Gate na' quebe guzéquedxu guselá cuínadxu, lu zra blé'eqeze Dios, gute Cristo waláz chee' benne' wen da zrinnaj ca'.

⁷ Stébele'e naca che nu benne' gatiē' waláz chee' tu benne' xrlátaje, lácala wexázrelja tu benne' gatiē' waláz chee' tu benne' naque' dutē li lazre'.

⁸ Dios dxulé'ene' dxi'u ca nazrí'ile'ene' dxi'u lawe' da gute Cristo waláz cheedxu gate ne nácadxu benne' dul-la.

⁹ Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne' chee' Le' lu da zi' da xa', da za za' lu zra ni'.

¹⁰ Gate na' ne dxecuıdedxu Dios, Le' bexunē' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne' chee' xel-la nabán chee' Cristo da zúale' na dxi'u.

¹¹ Quegá tuze da nigá, san cá'anqueze dxebéle'edxu lu da naca chee' Dios ne' chee' Xránadxu Jesucristo, ne ne' chee' Le' nácadxu tuze nen Dios.

Da nun Adán, na' da nun Cristo

¹² Ca guca, guxú'u dul-la lu xezr la xu nigá ne' chee' da ben tuze benne', na' bla' xel-la gute ne' chee' dul-la, ca'an guca gulú'u bénneache lu na' xel-la gute lawe' da zaj nun xúgute' dul-la.

¹³ Nédxula ca bla' da nadxixruj bea na, ba zaj nun bénneache dul-la lu xezr la xu nigá, lácala quebe dxusebaga

Dios bēnneache dul-la gate quebe ne zrin da nadxixruj bea na. ¹⁴ Ca guzú lau lu zra zua Adán ca bzrin zra zua Moisés, gulú'u bēnneache lu na' xel-la gute, benne' ca' zaj nune' dul-la, lácala quebe belune' dul-la ca da bēn Adán, bēnnea' gudichje' da gunná be'e Dios, na' Adán na' naque' tu da dxulé'eze na ca naca Bēnnea' dxal-la' xide', Le' Cristo.

¹⁵ Da zrinnaj da bēn Adán quebe gaca dí-lalēbe na ca da dxunna Dios dxi'u. Ne chee da zrinnaj da bēn tuze benne', gulate benne' zante, san xel-la weselá da nunna Dios dxi'u cá'aze ne chee xetuze benne', Jesucristo, naca na da zrēndxaqueze, ne naca na da ba neza chee benne' zante. ¹⁶ Da zrinnaj na' da bēn tuze benne' quebe gaca dí-lalēbe na ca da dxunna Dios dxi'u lawe' da ne chee tuze da zrinnaj, zaj nabaga zria bēnneache, san da dxunna Dios dxi'u naca na chee xelexegá'ana xrlátaje benne' zante benne' zaj nune' da zrinnaj. ¹⁷ Ne chee da zrinnaj da bēn tuze benne' gulú'u bēnneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxelezéque' xelenná be'e cuine' lu xel-la nabán chee' ne chee da nun xetuze benne', Jesucristo.

¹⁸ Ca guca zaj nabaga zria xúgute bēnneache ne chee da zrinnaj da bēn tuze benne', Adán, cá'anqueze ne chee da xrlátaje da bēn xetuze benne', Jesucristo, belexexaca bēnneache xrlátaje chee xelaca banē'. ¹⁹ Ca guca belexexaca bēnneache zante benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zante xrlátaje lau Dios.

²⁰ Bzua Dios da nadxixruj bea na chee gunná béadxa na da naca dul-la, na' gate dul-la guxánle'e na, ca' guzrendxa xel-la zri'i lazre' chee Dios. ²¹ Ca naca zua lu na' dul-la gute na bēnneache, cá'anqueze zua lu na' xel-la zri'i lazre' chee Dios gucá'ana na dxi'u xrlátaje lau Dios chee gaca bandxu chadía chacanna ne chee Xránadxu Jesucristo.

6

Nácadxu ca benne' gate ca' chee québedxa gundxu dul-la, na' naca bandxu nen Cristo

¹ ¿Bízaqueze nnadxu? ¿Gúndxadxu dul-la chee gulé'e láwedxa xel-la zri'i lazre' chee Dios? ² ¡Cabata! Ba nácadxu ca benne' gate chee québedxa gundxu dul-la. ¿Ájazra gúndxadxu dul-la? ³ ¿Quebe nézele le'e, xúgutedxu dxi'u ba nadxúadxu nisa chee gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? ⁴ Ca' naca na, ne chee da nadxúadxu nisa naca ca bgáchedxu tu zren nen Le', ne nátedxu chee xebandxu, ne súadxu tu lu xel-la nabán cube cáteze guca

cheē Cristo, bebañe' ládujla benne' gate nē cheē xel-la waca xabáa cheē Xre'.

⁵ Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. ⁶ NezdXu da gúcadxu gate nate ba gudá na le'e xaga béguaj tu zren nen Le' cheē cuía xi' benne' dul-la da gúcadxu cheē québedxa gundxu zrin cheē dul-la ca benne' zaj nada'u cheen. ⁷ Tu benne' ba nate, ba bedxúaje' lu na' dul-la. ⁸ Che ba gútedxu tu zren nen Cristo, dxuxrén lázredxu gaca bánquezdxu tu zren nen Le' ⁹ lawe' da nezdXu quebe gate Cristo da xula lawe' da ba bebañe' ládujla benne' gate, na' québedxa xu'e lu na' xel-la gute. ¹⁰ Gate gute Cristo, tu lásaze gutie' nē cheē dul-la waláz cheē xúgute bēnneache, san na'a naca bañe', na' lu na' Dios naca bañe'. ¹¹ Cá'anqueze le'e, le gueque nácale benne' gate cheē québedxa gunle dul-la, san naca banle lu na' Dios tu zren nen XránadXu Jesucristo.

¹² Cheē le na' québedxa güele lataj nna be'e dul-la beła' dxen cheēle da dxal-la' gate, cheē québedxa gun na gunle da dxezá lazre' beła' dxen cheēle. ¹³ Quebe guzúa cuínale lu na' dul-la cheē guchine na le'e lu da caleła, san le guzúa cuínale lu na' Dios, gácale ca benne' belexebán ládujla benne' gate, cheē guchínene' le'e lu da xrlátaje. ¹⁴ Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' cheē Dios.

Tu da dxulé'e na ca naca cheē benne' zaj nada'u

¹⁵ ¿Bizra xca'? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' cheē Dios? ¡Cabata'! ¹⁶ Ba nézquezle che guzúa cuínale lu na' tu xránale ca benne' zaj nada'u cheē guzúale dizra' cheē', nadxa nácale benne' zaj nada'u cheē xránale, ne dxun na ba xen guzúale dizra' cheē'. Cá'anqueze naca cheēle le'e che guzúale dizra' cheē dul-la, da gunna na le'e xel-la gute, u che guzúale dizra' cheē Dios, cheē gácale xrlátaje. ¹⁷ Xcalén Dios, lácala gúcale ca benne' zaj nada'u lu na' dul-la, na'a du lázrele dxuzúale dizra' cheē dizra' li na', lu da na' bzua cuínale. ¹⁸ Gate bedxúajle le'e lu na' dul-la, bexácale wen zrin cheē da xrlátaje. ¹⁹ (Dxuchálajlena' le'e ca dxuluchalaj bēnneache lawe' da lu beła' dxen cheēle quebe gaca chéajni'ile ca naca da nigá.) Cáteze beñle gate na' bzua cuínale lu na' da sban, ne lu na' da zrinnaj cheē gunle da zrinnaj, cá'anqueze le gun na'a, le guzúa cuínale lu na' da xrlátaje cheē gácaquezle bi cheē Dios.

²⁰ Gate ne nácale ca benne' zaj nada'u lu na' dul-la, quebe beñ na ba xen gunle da xrlátaje. ²¹ Na'a ¿bizra da ba neza guca cheēle da ca' dxexedué'ele cheen na'a? Da ca' beñle nédxute guché na le'e lu xel-la gute. ²² Na'a nadxúajle lu na' dul-la,

ne ba nácale wēn zrin cheē Dios cheē gácaquezle bi cheē Dios da naché na le'e lu xel-la nabán da zeajlí canna. ²³ Benne' dxunē' dul-la dzezi'e lazruj cheē' da naca na xel-la gute, san da dxúnnaze Dios dxi'u naca na xel-la nabán da zeajlí canna tu zren nen Xránadxu Jesucristo.

7

Tu da dxulé'e na ca naca cheē xel-la wechaga na'

¹ Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bēnneache tuze dxácatē ne zaj naca banē'. ² Ca naca da nigá, tu nu'ula nuchaga na' xu'e lu na' benne' cheē' nē cheē da nadxixruj bea na dxácatē zuē nabanē', san che gate benne' cheē', na' xedxúaj zru'ulē' lu na' da nadxixruj bea na na'. ³ Ca' naca na, che nu'ula na' súalēnē' benne' xula dxácatē ne nabán benne' cheē', gunē' dul-la gáchajnē' xrba cheē xel-la nuchaga na', san che benne' cheē' na' gatiē', xedxúaj zru'ulē' lu na' da nadxixruj bea na na', na' waca xuchaga ná'lēnē' benne' xula, ne quebe gunē' dul-la da gáchajnē' xrba cheē xel-la nuchaga na'.

⁴ Cá'anqueze naca cheēle le'e, bi bícha'dau', le'e zrágale bel-la' dxen cheē Cristo, ba nácale ca benne' gate, ne québedxa xu'ule lu na' da bdxixruj be'e Moisés, cheē gácale ca zru'ula benne' xula. Na'a nácale ca zru'ula Cristo, Bēnnea' bebanē' ládujla benne' gate, cheē gácadxu bi guchine Dios. ⁵ Dxácatē na' bēndxu da naca cheē bel-la' dxen cheēdxu, da nadxixruj bea na ble'e na dxi'u naca dul-la da bēndxu ca da dxezá lazre' bel-la' dxen cheēdxu, na' da na' guché na dxi'u lu xel-la gute. ⁶ Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, cheē gaca gundxu zrin cheē Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

Dul-la da zúalē neda'

⁷ ¿Bizra nnadxu xca'? ¿Dxun da nadxixruj bea na nácadxu benne' dul-la? ¡Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca cheē nu benne' chela ca gunná da nadxixruj bea na: Quebe sa lazru' da naca cheē nu benne'. ⁸ Ble'e da nadxixruj bea na neda' da naca dul-la, na' guque be'eda' zúalē'e zánetē da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. ⁹ Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bēnbe'a da naca dul-la, na' guque be'eda' nabaga' zria, ne dxal-la'

gatia'. ¹⁰ Ca'an guca, da nadxixruj bea na' naca na chee gunna na neda' xel-la nabán, san guca na chia' ca tu da beṭe neda' ¹¹ lawe' da ble'e da nadxixruj bea na' neda' da naca na dul-la, da na' guzí xē na neda', na' ne chee da nadxixruj bea na' guque be'eda' nabaga' zria, ne dxal-la' gatia'.

¹² Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'.

¹³ ¿Ájazra naca da nigá? ¿Beṭe da nadxixruj bea xrlátaje na' neda'? ¿Cabata! Dul-la na' beṭe na neda', na' caní guque be'eda' naca na dul-la. Da nigá guque be'eda' ne chee da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

¹⁴ Nezdru da nadxixruj bea na naca na da benna Be' Lá'azxa chee Dios dxi'u, san lu beḷa' dxen chia' naca' ca tu benne' nada'u, na' da naca' dxun na guna' dul-la. ¹⁵ Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuída' naca na da dxuna'. ¹⁶ Che dxuna' da caleḷa da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na. ¹⁷ Ca' naca na, quegá neda' dxuna' da na', san dul-la da zúale neda', le na' dxun na ca'. ¹⁸ Nezda' quebe bi zúale beḷa' dxen chia' da naca xrlátaje, lawe' da dxezá lazra' guna' da xrlátaje, san quebe dxezéqueda' guna' na. ¹⁹ Quebe dxuna' da xrlátaje da dxaca lazra' guna', san dxuna' da caleḷa da quebe dxaca lazra' guna'. ²⁰ Chee le na', che dxuna' da quebe dxaca lazra' guna', quebe naca neda' dxuna' na, san dul-la da zúale neda' dxun na ca'.

²¹ Caní naca da dxaca chia': Gate dxaca lazra' guna' da xrlátaje, dxulé'e lawe zúale da caleḷa neda'. ²² Lu xichaj lázrdawa' dxedáneda' da nadxixruj bea Dios, ²³ san dxeque be'eda' lu beḷa' dxen chia' zua tu da dxedábaga na ca da dxaca lazra', da naca da nadxixruj bea dul-la da zúale beḷa' dxen chia', na' dxenná be'e na neda'.

²⁴ ¡Edxugúa neda! ¿Nu guselá neda' lu beḷa' dxen chia' da naché na neda' lu xel-la gute? ²⁵ Xcalén Dios, Le' gunē na ne chee Xránadru Jesucristo. Ca' naca, lu xichaj lázrdawa' dxuzúa cuina' lu na' Dios, san lu beḷa' dxen chia' naca' ca tu benne' nada'u lu na' da nadxixruj bea dul-la.

8

Xel-la nabán da dxunna Be' Lá'azxa chee Dios dxi'u

¹ Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxelunē da caleḷa cáteze dxenná bea beḷa' dxen chee', san dxelunē da xrlátaje cáteze dxenná bea Be' Lá'azxa. ² Da nadxixruj bea na da dxunna Be' Lá'azxa,

Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxixruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. ³ Ba ben Dios da quebe guca gun da bdxixruj be'e Moisés, ba gudúe' dul-la da zaj nabaga bénneache. Da nadxixruj bea na quebe guca gun na gundxu da xrlátaje lawe' da nate ní'a na' bēla' dxen cheedxu. Chee le na' Dios gusel-le' Zrí'inequeze', na' guque' bénneache ca naca bēla' dxen cheedxu da xu'u na lu na' dul-la, chee gutie' ne chee dul-la cheedxu, lawe' da nabágadxu zria gátedxu ne chee dul-la da zúale bēla' dxen cheedxu. ⁴ Caní bene' chee gaca gundxu da nadxixruj bea na, dxi'u québedxa dxundxu ca dxenná bea bēla' dxen cheedxu, san dxundxu ca dxenná bea Be' Lá'azxa.

⁵ Benne' dxelune' ca dxenná bea bēla' dxen chee' zaj dxee' gunne xue da naca chee bēla' dxen chee', san benne' dxelune' ca dxenná bea Be' Lá'azxa zaj dxee' gunne xue da naca chee Be' Lá'azxa. ⁶ Benne' zaj dxee' gunne xue da naca chee bēla' dxen chee' welátequeze', san benne' ca' zaj dxee' gunne xue da naca chee Be' Lá'azxa xelaca banē', ne xelebeza zri lazre'. ⁷ Benne' zaj dxee' gunne xue chee bēla' dxen chee' dxelecuídenē' Dios, lawe' da quebe dxelaca lazre', ne quebe gaca xuluzúa cuine' lu na' da nadxixruj bea Le'. ⁸ Chee le na' benne' dxelune' ca da dxezá lazre' bēla' dxen chee' quebe gaca xelune' da dxezaca ba lazre' Dios.

⁹ Le'e quebe dxunle ca dxenná bea bēla' dxen chee, san dxunle ca dxenná bea Be' Lá'azxa, lawe' da ba zúale Be' Lá'azxa chee Dios le'e. Benne' quebe zúale Be' Lá'azxa le', Be' da nasella Cristo, quebe naque' bi chee Cristo. ¹⁰ Lácala zua Cristo lu xichaj lázrdaule, lu bēla' dxen chee dxal-la' gátele, san lu xichaj lázrdaule ba xu'ule tu xel-la nabán cube lawe' da bca'ana Dios le'e xrlátaje. ¹¹ Che zúale Be' Lá'azxa le'e, Be' chee Dios, Bénnea' bsebanē' Jesucristo ládujla benne' gate, Léqueze Dios na', Bénnea' bsebanē' Le', gunne' xel-la nabán cube chee bēla' dxen chee da gátequeze na. Da nigá gune' ne chee Be' Lá'azxa chee Dios, Bénnea' zue' xichaj lázrdaule.

¹² Ca' naca na, bi bícha'dau', nabágadxu tu da gundxu, san quegá chee gundxu ca dxenná bea bēla' dxen cheedxu. ¹³ Che gundxu ca dxenná bea bēla' dxen cheedxu, gátequezdxu, san che ne chee Be' Lá'azxa guzúadxu chalá'ala da dxun bēla' dxen cheedxu, na' gaca bandxu.

¹⁴ Xúgute benne' ca' dxelún ca dxulé'e Be' Lá'azxa le', benne' caní zaj naque' bi chee Dios. ¹⁵ Be' Lá'azxa da guzi' lu na'le quebe dxugu'e le'e lu xel-la dxezebe ca benne' zaj nada'u, san dxune' nácale bi chee Dios. Ne chee Be' Lá'azxa nigá dxennedxu: "Xrae", gate dxuláwizredxu Dios. ¹⁶ Léqueze Be'

Lá'azxa nigá dxexechébelene' be' nácadxu, dxenné' nácadxu bi chee Dios. ¹⁷ Che nácadxu bi chee' ca', gácaqueze cheedxu da naca chee Dios. Gaca cheedxu da dxal-la' gaca chee Cristo che gudedxu xel-la zi' tu zren nen Le', chee xegá'ana szrendxu tu zren nen Le'.

¹⁸ Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'. ¹⁹ Da dxelezá lazre', ne da dxelebeza xúgute da nun Dios naca na chee gulé'e Dios bi zaj naca be' bi chee' ca'. ²⁰ Ca naca da nun Dios belexaca na dácheze, quegá ca gulaca lazre' le na, san lawe' da núnqueze Dios gaca na ca'. Bene' zua da dxelebeza lazre na ²¹ lawe' da xeledxúaj ca da nun Dios lu na' da dxuzría xi' le na, chee gaca ba neza chee na tu zren nen bi ca' zaj naca bi ca' chee Dios lu xel-la weselá cheebe' da naca xabáa. ²² Nézquezdxu, ca zrin na'a zra, xúgute da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía chee sane' bidau'. ²³ Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheedxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácaté na' dxebézadxu zra gulé'e Dios nácadxu bi chee' ca', gate na' gunne' cheedxu tu belá' dxen cube. ²⁴ Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. ²⁵ Che da dxebeza lázredxu naca na tu da quebe gaca lé'edxu, dxun na ba xen cuézadxu na lu dute xel-la zren lazre' cheedxu.

²⁶ Cá'anqueze Be' Lá'azxa dxácalene' dxi'u lu xel-la nate ni'a na' cheedxu. Quebe nezdxu guchálajledxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheedxu, ne dxebezre lazre' ca da quebe dxezeque' nu nne. ²⁷ Dios, Bénnea' dxenné'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz chee bi zaj naca be' chee'.

Nácadxu wal-la ca tu benne' dxezrué'ene'

²⁸ Nezdxu dxuchine Dios xúgute da dxaca cheedxu chee gucá'ana na dxi'u chawe', dxi'u na' nazri'idxu Le', na' Le' bláwizre' dxi'u ca naca da nune' guné'. ²⁹ Benne' ca' bénbea Dios nédxudaute, ben Le' nédxudaute xelaque' ca naca Zrí'inequeze', chee gaca Zrí'ine' na' Benne' blau ládujla zánete bi biche'. ³⁰ Benne' ca' ben Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'ane' le' xrlátaje, na' benne' ca' bca'ane' xrlátaje, cá'anqueze bca'ana szrénqueze' le'.

³¹ ¿Bizra nnadxu chee da caní? Che caní dxácale Dios dxi'u, ¿nuzra benne' seque' tábague' dxi'u? ³² Dios quebe bezúene' zi' gunne' dxi'u Zrí'inequeze', san bdee' Le' chee gútiē' waláz cheedxu. ¿Quebe gunne' cheedxu xúgute da ca' tu zren nen Zrí'ine'? ³³ ¿Nuzra seque' bi nne chee benne' ca' ba gucá'a Dios le'? Léqueze Dios na' bca'ane' benne' ca' xrlátaje. ³⁴ ¿Nuzra benne' seque' nne' zaj nabaga zria benne' ca'? Léqueze Cristo gutiē' waláz cheedxu, ne da naca na blaudxa, naque' Bénnea' bebán ládujla benne' gate, na' zue' chalá'a xabēla chee Dios, ga dxue lazre' lau Le' waláz cheedxu. ³⁵ ¿Nuzra seque' xecá'a dxi'u lu na' Cristo, Bénnea' nazrí'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stebe, u xel-la gute? ³⁶ Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgute zra.

Dxelune' netu' ca zríla'dau' ba zaj zúaba' chee xelútiē'-ba'.

³⁷ Lu xúgute da caní nácadxadxu szren ca benne' dxelezrué'ene', ne chee Bénnea' bzri'ine' dxi'u. ³⁸ Chee le na' dxuxrén lazra' quebe bi de da seque' gucuasa na dxi'u lu na' Dios, Bénnea' nazrí'ine' dxi'u.

Ne xel-la gute, ne xel-la nabán,

ne gubáz chee xabáa ca', ne be' xriwe' dxelenná bea,

ne xel-la waca chee be' xriwe' ca',

ne da dxaca na'a, ne da za za',

³⁹ ne da zua xabáa, ne da zua lu xezr la xu,

ne xetú da nun Dios,

quebe seque' xecá'a na dxi'u lu xel-la zri'i lazre' chee Dios,

da blé'ene' dxi'u gate bdee' Xránadxu Jesucristo waláz cheedxu.

9

Dios guqué'e benne' Israel ca'

¹ Dxennía' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxē na neda' naca na da li. ² Dxexíaje lázrele'eda', ne tu zúazqueze xel-la dxudía lu lázrdawa', ³ na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' waláZR chia', benne' judío. ⁴ Benne' caní zaj naque' zri'ine zre sua Israel, na' Dios guzí' lu ne'e benne' caní ca bi chee' ca'. Dios guzúe' ládujla benne' ca' lu da xabáa chee', ne bene' tu xel-la wezríá nen benne' ca', ne bnézruje' le' da nadxixruj bea na da bzuj Moisés, ne xel-la wil-la chee xudau', ne da nachebe lazre'. ⁵ Zaj naque' zri'ine zre zua xra xrtáudxu ca', na' ládujla benne' waláZR chee' ca', lu beLa' dxen chee' bla' Cristo, Bénnea' naque' Dios lawe' xúgute da de, ne gaca báqueze' chadíá chacanna. ¡Ca' gaca na!

⁶ Quebe nnadxu quebe dxun Dios da dxenná xrtizre', san da naca na, quegá xúgute zri'ine zre sua Israel zaj nababa benne' Israel ca' chee Dios. ⁷ Quegá xúgute zri'ine zre sua Abraham zaj naca xánnie' zri'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su'." ⁸ Da nigá dxulé'e na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. ⁹ Ca naca da guchebe lazre' Dios da gunné' chee Abraham naca na da nigá: Lu zra da ba gunnía' xida', na' Sara chiu' sané' tu zri'inu'.

¹⁰ Quegá tuze da nigá, san cá'anqueze gate Rebeca guzrá' chupa zri'ine' naca tuze xrabe', Isáac, xra xrtáudxu, ¹¹⁻¹³ ne gate bi ca' quebe ne xelálajbe', ne quebe ne xelunbe' da xrlátaje u da calëla, Dios guzre' Rebeca: "Bi waca chiu' gácabe' wen zrin chee bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxée' ca naca da núnqueze', benne' ca' dxaca lazre' guláwizre', ne quebe dxuché'e ca da zaj nune'.

¹⁴ ¿Bízraqueze nnadxu? ¿Naca Dios Benne' quebe dxun da xrlátaje? ¿Cabata! ¹⁵ Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." ¹⁶ Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. ¹⁷ Lu dizra' lá'azxa Dios dxé'e wenná bea chee xezr la xu Egipto: "Bena' lue' wenná bea chee gulé'eda' ne chiu' lue' xel-la waca chia', ne chee xelúnbea bënneache La neda' du gabí'i xezr la xu." ¹⁸ Ca' naca na, Dios dxexache lazre' benne' dxaca lazre', ne cá'anqueze dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

¹⁹ Na'a xi'u neda': Che caní naca na, ¿bizr chee na' dxugapa Dios bënneache dul-la? ¿Núzraqueze seque' tábaga ca da dxaca lazre' Le'? ²⁰ Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xé na benne' bené' le' na: ¿Bizr chéé na' benu' neda' caní? ²¹ Benne' wen xesu' zruaga na' wazéquene' gune' chee guna' na' ca dxaca lazre'. Wazéquene' gune' chee guna' ná'queze tu xesu' da zácadxa, ne tu xesu' da xálaze. ²² ¿Bizra nnáquezdxu che Dios guca lazre' gulé'ene' dxi'u ca dxuzríia xi'e bënneache, ne ca naca xel-la waca chee', na' lu xel-la zren lazre' chee' bhaga lawe' chee benne' ca' lácala dxal-la' xeledé' le' xel-la zi', na' xelebía xí'tequeze'?

²³ Bene' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequé'e dxi'u nédxute chee gaca cheedxu xabáa na' da nucueza Le'. ²⁴ Dios bláwizre' dxi'u ládujla benne' judío,

ne ládujla benne' quebe zaj naque' judío. ²⁵ Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'ite lazra'.

²⁶ Lu lataj naga gucha'-be': Quebe nácale bi chia', ná'queze xapa' le' bi chee Dios ban.

²⁷ Ca naca chee benne' Israel ca', Isaías dxenné': "Lácala zaj naxán zri'ine zre sua Israel ca naxán xuzre' dxe' dxu'a tu xegu zren, bábase benne' ca' xelexegá'ane' chee xelexé'", ²⁸ lawe' da gun Xránadxu ca dxenná xrtizre', guzria xi'e zezr la xu nigá lu da naca xrlátaje, ne chadite. ²⁹ Naca na ca gunná léqueze Isaías na' gate nate, gunné':

Chela Xránadxu, Xrana zánete gubáz chee xabáa, quebe bca'ane' zri'ine zre súadxu ca', na' xenítedxu ca guca chee xezre Sodoma, ne chee xezre Gomorra.

Benne' judío ca', ne dizra' chawe'

³⁰ ¿Bízaqueze nnadxu? Benne' quebe zaj naque' judío, ne quebe belexexílaj lazre' xelexegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. ³¹ Benne' Israel ca', benne' belune' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéquene' xelexegá'ane' xrlátaje lawe' Le'. ³² ¿Bizr chee na'? Naca na lawe' da quebe belune' ba xuzre xelexegá'ane' xrlátaje ne chee xel-la dxeajlí lazre' chee', san gulaca lazre' xelexegá'ane' xrlátaje ne chee da belúnqueze' le'. Chee le' na' xeajlecházie' lawe' xiaj da dxelechegu bénneache, da na' naca Cristo ³³ ca da dxenná Dios lu dizra' lá'azxa chee', dxenné':

Neda' dxuzúa' lu xezre Sión tu benne' naque' xiaj da dxelechegu bénneache.

Nu benne' cheajlí lazre' Le' quebe xedué'equezne'.

10

¹ Le'e, bi bícha'dau', da dxezá lazra', ne da dxenaba' Dios guné' chee benne' Israel ca' naca na chee xelexé'. ² Ca naca chee benne' ca', da li dxelebile lazre' da naca chee Dios, san quebe naca na chee xel-la sina li. ³ Quebe zaj nézene' ca xrlátaje dxucá'ana Dios bénneache, san dxelaca lazre' xulucá'ana xrlátaje cuine', ne quebe dxelezí' lu ne'e ca xrlátaje dxucá'ana Dios bénneache. ⁴ Cristo dxune' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúgute bénneache dxeleajlí lazre' Le'.

⁵ Ca naca chee da dxucá'ana xrlátaje bénneache lau Dios da naca na ne chee da nadxixruj bea na, bzuaj Moisés caní:

Benne' dxunę' ca naca da dxenná da nadxixruj bea na gaca banę' ne cheę lę na. ⁶ Ca naca cheę da dxucá'ana xrlátaje bénneache lau Dios da naca na ne cheę xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na cheę gulétaje' Cristo), ⁷ ne quebe nnau': "¿Núzraqueze benne' xétaje' lataj chul-la cheę benne' gate ca'?" (da naca na cheę xebéaje' Cristo ládujla benne' gate.) ⁸ ¿Bizra da na' dxenná na: Dizra' na' zua na gágutę naga zu', lu dxu'u ne lu lazrda'u? Dizra' nigá naca na dizra' chawe' da dxuzéentu' bénneache cheę xeléajlę'e cheę Cristo. ⁹ Che nen dxu'u dxennáu' naca Cristo Xranu', ne che lu lazrda'u dxeajlí lazru' Dios bsebanę' Lę' ládujla benne' gate, nadxa lau'. ¹⁰ Lu lázrdaudxu dxeajlí lázredxu cheę xegá'anadxu xrlátaje lau Dios, ne nen dxú'adxu dxexechébedxu nácadxu cheę Cristo cheę ladxu.

¹¹ Lu dizra' lá'azxa dxenná na: Nu benne' dxeajlí lazre' Lę' quebe xeduéene'. ¹² Dios quebe dxebéę' benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúgutę bénneache, na' dxunézrujle'e xúgutę benne' ca' dxululáwizre' Lę'. ¹³ Naca na ca da dxenná na: Xúgutę benne' dxululáwizre' La Xránadxu xeलेlé'. ¹⁴ Na'a ¿ájazra xululáwizre' Lę' che quebe ne xeléajlę'e cheę? ¿Ájazra xeléajlę'e cheę' che quebe ne xelenne' nu dxuchalaj cheę'? ¿Ájazra xelenne' che quebe nu chilá' benne' guzenne' lę'? ¹⁵ ¿Ájazra xuluzenne' bénneache che quebe nu nasel-la lę'? Naca na ca dxenná dizra' lá'azxa, dxenná na: Xrtantę naca lau Dios da dxelún benne' dxeledé' dxuluzenne' bénneache dizra' cheę xel-la dxebeza zri lazre', ne dizra' chawe'.

¹⁶ Quegá xúgutę bénneache dxelezi' lu ne'e dizra' chawe' nigá. Naca na ca gunná Isaías, gunné': "Xran, ¿zua nu benne' ba guxéajlę'e ca da dxuchálajntu'?" ¹⁷ Ca' naca na, dxéajlędxu cheę' gate dxénedxu, na' da dxal-la' xénedxu naca na da gunná Cristo.

¹⁸ Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na:

Da dxuluzén benne' caní bache belén bénneache du ca naca xęzr la xu nigá.

Dizra' cheę benne' caní bache belén bénneache du gabí'i xęzr la xu.

¹⁹ Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné': Neda' guna' gácale benne' sę lazre' cheę tu xęzre benne' quebe ne xelaque' tu xęzre.

Guna' zrá'ale tu xęzre benne' quebe ne xeléajni'ine'.

²⁰ Gudé na' bzuaj Isaías ca gunná Dios, gunné':

Benne' quebe belexílaje' neda' belexezrélenę' neda'.

Ble'e lawa' benne' ca' quebe bululáwizre' neda'.

²¹ Ca naca chee benne' Israel, gunná Dios: “Tu dxuláwizrazqueza' benne' quebe dxuluzúe' dizra', ne dxeledábage' xrtizra'.”

11

Nu benne' Israel ca' zaj nalé'

¹ Na'a dxenaba': ¿Ba bzua Dios chalá'ala xezre chee', benne' Israel ca', tu chí'izqueze? ¡Cabata! Néda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín. ² Gate nate Dios guzú' lu ne'e benne' Israel ca', na' na'a quebe nuzúe' benne' ca' chalá'ala. ¿Quebe nézele le'e da dxenná dizra' lá'azxa ca naca chee Elías, bēneea' bchálaje' waláz chee Dios, gate na' gudawe' zria benne' Israel ca' lau Dios? Gunné': ³ “Xran, ba belútiē' benne' buluchálaje' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútiē'.” ⁴ Dios bechebe', guzre' Elías: “Ba gucá'a chia' ga xun chi gaxúa benne' quebe ne xuluzúa zribe' lau bedáu' xiaj xaga le' na Baal.” ⁵ Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. ⁶ Na'a, che naca na ne chee xel-la zri'i lazre' chee Dios, quebe naca na ne chee da gaca gun nu benne', lawe' da la guca na ca', na' xel-la zri'i lazre' chee Dios quebe naca na xel-la zri'i lazre'.

⁷ ¿Bizra xca'? Benne' Israel ca' quebe belezrué'ene' da dx-elexilaje', san benne' ca' gucá'a Dios le' belezrué'ene' na, san xezícadxa benne' ca' gulaque' benne' zide'. ⁸ Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. ⁹ Cá'anqueze gunná Davíd, gunné':

Ca naca laní chee benne' ca' bēn xelaca na ca tu xralaj,

u ca tu da que'la na le'

chee cheajlecházie', na' gudé Dios le' lu da ba xa'.

¹⁰ Xiaj lawe' xelechul-la na chee québedxa xeledé'ene', na' xeledégüē' chadía chacanna zran xua da naca na dul-la chee'.

Ca zaj nalá benne' quebe zaj naque' judío

¹¹ Na'a dxenaba': ¿Tu chí'ize belenite benne' judío ca' gate xeajlecházie'? ¡Cabata! Gate benne' judío ca' guledábage' xrtizra Dios, guta' lataj xeledá benne' quebe zaj naque' judío, chee xelezúa benne' judío ca' lu xel-la dxezá lazre'. ¹² Na'a, che da zrinnaj da belún benne' judío ca' bēn na guca tu da ba neza chee xúgute' bēneache, ne che gate belenitie' guca na tu

da ba neza chee benne' quebe zaj naque' judío, gaca na tu da ba neza zrendxa gate xelexú'u xúgute benne' judío ca' lu na' Dios.

¹³ De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee guzenda' benne' quebe zaj naque' judío xrtizre', dxé'le'a gunne xue chee zrin nabaga' guna'. ¹⁴ Dxaca lazra' guna' xelezúa lu xel-la dxezá lazre' bal-la benne' waláZR chia' chee xeलेlé'. ¹⁵ Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bane' ládujla benne' gate. ¹⁶ Che guzúadxu lau Dios xeta nedxu chee cua, na nácaqueze chee' dute cua na'. Na' che naca chee Dios lue xaga, zaj nácaqueze chee' ca naca zruze xaga na'.

¹⁷ Benne' judío ca' zaj naque' ca zrúzequeze tu xaga olivo, san bal-la zruze guledxugu na, na' lue' beda'u waláz chee zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee xaga olivo na'. ¹⁸ Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu na lue'.

¹⁹ Wannáu': Awe', guledxugu zruze ca' chee cheajxedá'a neda' le'e xaga olivo na'. ²⁰ Ca'an naca, san guledxugu na lawe' da quebe guléajle'e chee Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. ²¹ Che Dios quebe bnite lawe' chee benne' ca' zaj naque' ca zrúzequeze xaga na', na' bebéajle' le', cá'anqueze quebe gunite lawe' chiu' lue', na' xebéajle' lue'. ²² Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xeajlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegüe' lue'. ²³ Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xune' le' tuze. ²⁴ Lue' quebe nacu' judío, san guchugue' lue' le'e tu xaga olivo xixre', na' bexune' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca zrúzequeze xaga olivo chawe' na', gácadxá chawe' xexune' le' tuze nen xaga olivo cheéqueze' na'.

Ca xelexú'u benne' judío lu na' Dios

²⁵ Le'e, bi bícha'dau', dxaca lazra' chéajni'ile chee da nagache nigá, chee quebe guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute benne' quebe zaj naque' judío.

²⁶ Gate gaca na, nadxa xeledá xúgute benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,

na' cue' da calela da zaj nabaga zri'ine zre sua Jacob.

²⁷ Da nigá gaca xel-la wezría guna' nen benne' ca', gate neda' cua' dul-la chee'.

²⁸ Ca naca chee dizra' chawe' chee Cristo, zaj naca benne' judío ca' ca benne' dxelecuídenē' Dios chee gaca da ba neza chee le'e, san Dios ne nazrí'ine' benne' ca' lawe' da guqué'e xra xrtawe' ca'. ²⁹ Ca da dxunna Dios, quebe xequé'e na, ne quebe dxuzúe' chalá'ala nu ba bláwizre'. ³⁰ Le'e nédxute gudábagale xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e. ³¹ Cá'anqueze na'a, benne' judío ca' dxeledábague' xrtizra Dios, san naca na chee xexache lazre' Dios le' ca' dxexache lazre' le'e. ³² Dios be' lataj xúgute' guledábague' xrtizre' chee gaca xexache lazre' xúgute'.

³³ Szrentē naca xel-la gunní'a chee xel-la sina, ne xel-la dxéajni'i chee Dios. Quebe séquedxu chéajni'idxu ca da dxuchi'e, ne quebe gaca gúnbea xánnedxu da dxunē'.

³⁴ ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i Le'? ³⁵ ¿Núzraqueze benne' bi bnézruje' chee Xránadxu, chee gun na ba xen bi xuzri'e chee bēnnea'? ³⁶ Xúgute da dxelédxu zá'aca na lu na' Dios, na' Le' bēne' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

12

Da dxal-la' gun benne' naque' bi chee Dios

¹ Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle.

² Québedxa gunle ca dxelún bēnneache chee xezr la xu nigá, san le guchá cuínale chee caní zra dute ca naca lu xichaj lázrdau. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

³ Ne chee da nusebaga Dios neda' lu da chawe' chee' dxapa' xúgutele le'e quebe nu benne' dxal-la' gucá'ana cuine' szrendxa ca dxal-la' gune', san dxal-la' guxúe' ca da naque' lu xel-la dxexruj lazre', cáteze naca xel-la dxeajlí lazre' da nunezruj Dios le'. ⁴ Ca naca chee bel-la' dxen cheedxu, zánete da napa na, na' xúgute da ca' quebe dxelún na tuze zrin, ⁵ cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu xetudxu ca zaj naca da ca' napa tu bel-la' dxen chee nu benne'.

6 Dios nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dxal-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee', dxal-la' gundxu na dutē xel-la dxeajlí lazre' da nápadxu.

7 Che nunne' dxi'u chee gundxu zrin chee ljuwézredxu, dxal-la' gundxu na cháwe'dau'.

Che nunne' dxi'u chee gusededxu bēnneache, dxal-la' gusede xánnedxu le'.

8 Che nunne' dxi'u chee gutípadxu lazre' bēnneache, dxal-la' gutipa xánnedxu lazre' le'.

Che nunne' dxi'u chee bi gunézrujdxu, dxal-la' gundxu na du lázredxu.

Che nunne' dxi'u chee nne xuedxu, dxal-la' guxúe xánnedxu ca dxundxu na.

Che nunne' dxi'u gácalēdxu benne' xache' ca', dxal-la' gundxu na dutē xel-la dxebé cheedxu.

9 Le zri'i ljuwézrele du lázrele tule xetule.

Le guzúa chalá'ala da calēla, ne le gun da xrlátaje.

10 Dخال-la' zri'i ljuwézrele tule xetule ca nazri'ile bi bíchequezle.

Le gapa ba lá'ana ljuwézrele, ne le güe lataj tule xetule.

11 Le gun zi' lázrele, ne quebe gácale zrawēde, na' le gun zrin chee Xránadxu dutē lázrdaule.

12 Le sua xel-la dxebé lu da dxebeza lázrele. Le gaca dxexruj lazre' gate dxedele xel-la zi'.

Le guchálajleze Xránadxu.

13 Le gunezruj da dxelexazrje benne' ca' zaj naque' bi chee Dios.

Le si' lu na'le du lázrele benne' ca' zá'aque' dxelenabe' le'e.

14 Le naba da chawe' chee benne' ca' zaj nau zi' xuzre' le'e.

Le naba da xrlátaje chee', ne quebe návale da calēla chee benne' ca'.

15 Le be nen benne' dxelebé, ne le xexache lazre' benne' ca' dxelebezre xache'.

16 Le gaca tuze nen ljuwézrele tule xetule.

Quebe gucá'ana szren cuínale, san le gaca tuze nen benne' dxexruj lazre' ca'.

Quebe guéquele ba návale dutē xel-la sina.

17 Quebe xebi'ile da calēla chee benne' nune' chee da calēla. Le gun ba xuzre gunle da xrlátaje lau xúgute bēnneache.

18 Che naca chee, le gun naga zē lau séquele cueza zri lázrele nen xúgute bēnneache. 19 Bi bícha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj lu dizra' lá'azxa da dxenná na: Chia' neda' naca xebéaj lazra'. "Neda' xebi'a chee bēnneache," dxenná Xránadxu.

20 Cá'anqueze dxenná na: Che dxedún benne' dxecuídene' lue',

bnezruj da gawe', na' che dxebilene', bnezruj da xí'aje', lawe' da gate dxunle caní, xedué'e bénnea'. ²¹ Quebe gu'u lataj da calela nna be'e na lue', san gunná be'e da calela ne chee da xrlátaje da dxunu'.

13

¹ Xúgute dxu dxal-la' guzúadxu dizra' chee benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea chee'. Benne' xu'u lawe' ca' zaj naque' benne' nuzúa Dios. ² Chee le' na' nu benne' dxedábague' benne' xu'u lawe' dxedábague' ca da nun Dios. Benne' dxeledábague' caní zaj nabague' zria, na' Dios xuzri'e chee' da xexal-le'. ³ Benne' ca' dxelenná be'e quebe nuzúa Dios le' chee xuluchebe' benne' dxelune' da xrlátaje, san chee xuluchebe' benne' dxelune' da calela. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lá'ana lue' ⁴ lawe' da zaj naque' wen zrin chee Dios chee xelune' chiu' da xrlátaje. Che dxunu' da calela, dxal-la' zrebu' lawe' da quegá dácheze zaj nape' xel-la dxenná bea xelexebi'e chee bénneache lawe' da zaj naque' wen zrin chee Dios chee xuluzúe' lu da ba xa' benne' ca' dxelune' da calela. ⁵ Chee le' na', dxun na ba xen guzúadxu dizra' chee benne' xu'u lawe', quegá tuze chee quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. ⁶ Chee le' na' dxízruje da dxebágale chee xu'u lawe', lawe' da zaj naca benne' xu'u lawe' wen zrin chee Dios, ne dxelún xánnie' zrin chee' na'.

⁷ Le quizruj xúgute bénneache ca da nabágale chee'.

Da nabágale chee benne' wechizruj, le quizruj da nabágale.

Da nabágale chee xu'u lawe', le quizruj na.

Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ane' szren.

⁸ Quebe dxal-la' cue zria chee nen nu benne' san tuze chee zri'ile le' ca dxal-la' gunle chee le sa' ljwézrele tule xetule. Che gunle da nigá, na' gunle da nadxixruj bea na. ⁹ Naga zaj naxúaj da nadxixruj be'e Dios dxenná na:

Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun bénnea' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. ¹⁰ Bénnea' nazrí'ine' le sa' ljwezre' quebe dxune' da calela chee le sa' ljwezre' na'. Ca'an naca, bénnea' nazrí'ine' le sa' ljwezre' dxuzúe' dizra' chee da nadxixruj bea na.

¹¹ Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajlędxu. ¹² Ba dxedé cheę da chul-la, ne ba za te zra. Cheę le na' dxal-la' gusandxu da dxelún bėnneache lu da chul-la, na' gácadxu ca tu benne' zeje' wedil-la dxacu zra lanę' xia, cheę tadxu lu xel-la naxaní' cheę Dios.

¹³ Dخال-la' tadxu li lazre' ca dxal-la' tadxu te zra. Quebe dxal-la' xí'ajdxu da dxuzuzre na bėnneache, ne quebe gagu xrátadxu.

Quebe gundxu da sban, ne da calęla.

Quebe tıl-lalędxu le sa' ljwėzredxu, ne quebe gácadxu xa lazre'.

¹⁴ Xránadxu Jesucristo gácaqueze' ca zra lánadxu xia, na' quebe gundxu da dxezá lazre' bęla' dxen cheędxu.

14

Quebe si tizru' biche ljwezru'

¹ Che tu bi bíchedxu quebe ne se cháchabe' lu xel-la dxeajlı lazre', le si' lu na'le lebe', san quegá cheę gutıl-lalele lebe' dizra' ca naca da quebe dxun na ba xen. ² Ca naca na, zaj zra' benne' dxeleajlı lazre' naca cheę' xelawe' bal-la bi de, san zaj zra' benne' xezícadxa quebe ne xelezé chache' lu xel-la dxeajlı lazre', na' dxelėquene' waca xelawe' tuze xixre' cuan. ³ Benne' dxawe' xúgute da ca' quebe dxal-la' guzúe' chalá'ala bėnnea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bėnnea' dxawe' bal-la bi de, lawe' da nazı' lu na' Dios bėnnea'. ⁴ ¿Nuzra nacu' lue' dxezi' tizru' wen zrin cheę Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca cheę gucá'ane' le' xrlátaje.

⁵ Canı naca xetú. Zaj zra' benne' dxulupá'anadxe' tu zra ca xetú zra, na' zaj zra' benne' dxelėquene' tuz ca zaj naca xúgute zra. Tu tudxu dxal-la' se cháchadxu lu xichaj lázrdaudxu ca naca da canı. ⁶ Benne' dxupá'ane' tu zra dxune' na cheę gape' ba lá'ana Xránadxu, na' bėnnea' quebe dxupá'ane' zra na' dxune' ca' cheę gape' ba lá'ana Xránadxu. Benne' dxawe' bal-la bi de dxune' na cheę gape' ba lá'ana Xránadxu lawe' da dxe'e Dios: Xcalenu', na' bėnnea' nadxúaj nadxeze da dxawe' dxune' na cheę gape' ba lá'ana Xránadxu, na' cá'aqueze dxe'e Dios: Xcalenu'.

⁷ Netudxu dxi'u naca bandxu cheę gundxu da naca cheézedxu, ne quegá gátedxu lu da naca cheézedxu. ⁸ Che naca bandxu, naca na cheę gaca ba Xránadxu. Ca' naca na, che gaca bandxu, u che gátedxu nácadxu bi cheę Xránadxu. ⁹ Cristo

gutie', ne bebane' chee gaque' Xrana benne' gate ca', ne Xrana benne' ban ca'.

¹⁰ Na'a lue', ¿bizr chee na' quebe dxelé'enu' chawe' ca da dxun le sa' ljwezru', bi bíchedxu? ¿Bizr chee na' dxuzú' le' chalá'ala? Xúgute dxu dxal-la' zrindxu lau Cristo chee guchi'e ca da nundxu tu tudxu. ¹¹ Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxennía':

Xúgute bénneache xuluzú zribe' lawa'.

Xúgute' xelexechebe' lawe' lau naca' Dios."

¹² Ca'an naca, tu tudxu dxi'u dxun na ba xen gulé'edxu ca da nundxu lau Dios.

¹³ Chee le na' québedxa dxal-la' si tízradxu tudxu xetudxu. Le gun ba xuzre quebe bi gunle da gun na ga chegu bi bíchele, u da gun na cheajcházie' lu dul-la. ¹⁴ Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban. ¹⁵ Che ne chee da dxagu' lue', dxunu' dxeajchaze bi bichu', quebe dxunu' da naca chee xel-la zri'i lazre'. Quebe gunu' cuía xi' tu benne', bénnea' gute Cristo waláz chee', lawe' da dxaca lazru' lue' gagu' bi xel-la wagu. ¹⁶ Quebe bi gunle da güe lataj nu nne schanní' chee da dxéquele naca na da xrlátaje. ¹⁷ Chee súadxu naga dxenná be'e Dios dxi'u quebe naca na chee da dxágudxu, u chee da dxí'ajdxu, san naca na chee xegá'anadxu xrlátaje lau Dios, ne chee gápadxu xel-la dxebeza zri lazre', ne chee súadxu xel-la dxebé, da ca' nápadxu ne chee Be' Lá'azxa. ¹⁸ Nu benne' dxune' zrin chee Cristo caní dxune' da dxezaca ba lazre' Dios, na' dxelapa bénneache le' ba lá'ana.

¹⁹ Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u. ²⁰ Quebe guzría xi'u da nun Dios lu xichaj lázrdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. ²¹ Xrlátaje naca quebe gágudxu bela', ne quebe xi'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzría xi na xel-la dxeajlí lazre' chee'. ²² Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzría xi' cuine' ne chee da dxéquene' naca na da xrlátaje guné'. ²³ Bénnea' dxawe' da dxéquene' quebe dxal-la' gawe', nabague' zria gate dxawe' na lawe' da dxawe' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

15

Ben da dxezaca ba lazre' bi bichu', ne quegá da dxezaca ba lázrezu' lue'

¹ Dxi'u ba ze cháchadxu lu xel-la dxeajlí lazre' dxal-la' gácale_{dxu} benne' quebe ne se chache' lu xel-la dxeajlí lazre', ne quebe gundxu da dxezaca ba lázredxu dxi'uze. ² Tu tudxu dxal-la' gundxu da dxezaca ba lazre' bi bíchedxu lu da gun na chawe' chee_{be}', ne lu da gusegula na le_{be}' lu xel-la dxeajlí lazre' chee_{be}'. ³ Cristoqueze quebe bene' da dxezaca ba lazre' le_{ze}', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'. ⁴ Xúgute da naxúaj nédxudauté lu dizra' lá'azxa zaj naxúaj na chee guzéajni'i na dxi'u, chee gápadxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na. ⁵ Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácale_{ne}' le'e chee gácale tuze tule xetule ne chee Jesucristo, ⁶ chee gunle xúgute_{le} tu zren güe lá'anale Dios, Xra Xránadxu Jesucristo.

Dxelén benne' quebe zaj naque' judío dizra' chawe'

⁷ Ca'an naca, chee gaca ba Dios, le si' lu na'le ljwézrele tule xetule ca ben Cristo, guzi' lu ne'e dxi'u. ⁸ Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchebe lazre' Dios lau xra xrtáudxu ca', ne caní blé'ene' naca Dios li lazre'. ⁹ Cá'anqueze ble'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné':

Güe lá'ana' lue', Dios, lau benne' xezr la xu ca',
ne tu gul-lazqueza' da xelapa ba lá'ana Lue'.

¹⁰ Cá'anqueze dxenná na:

Le be, le'e, bénneache duté xezr la xu
nen benne' zaj naque' bi chee Dios.

¹¹ Cá'anqueze dxenná na:

Le güe lá'ana Xránadxu,
le'e, bénneache chee xúgute xezr la xu,
ne le guchalaj chee xel-la szren chee',
le'e, xúgute bénneache.

¹² Cá'anqueze bchalaj Isaías ca naca chee Cristo, gunné':

Welá'queze tu zri'ine zre sua Isaí,
Bénnea' nna bé'ene' xúgute cue' xezr la xu,
na' benne' ca' xelebeza lazre' Le'.

¹³ Dxenaba' Dios, Bénnea' dxunne' dxi'u xel-la dxebeza lazre', chee gúnnale'e le'e xel-la dxebe, ne xel-la dxebeza zri

lazre' lawe' da dxeajlí lázrele Le', chee gápale'equezle xel-la dxebeza lazre' ne chee xel-la waca chee Be' Lá'azxa.

¹⁴ Le'e, bi bícha'dau', dxuxrén lazra' nápale'e da chawe', ne núnbeale xúgute chee gaca guzėjni'ile ljwézrele tule xetule.

¹⁵ Lu xiche nigá bechugu lazra' guzújaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. ¹⁶ Caní guna' zrin chee Jesucristo ládujla benne' quebe zaj naque' judío. Zrin dxuna' naca na chee guzenda' bėnneache dizra' chawe' chee Dios chee guzrá'a benne' quebe zaj naque' judío lau Dios ca tu guna' da dzezaca ba lazre' Le'. Xelaque' benne' lá'azxa ne chee Be' Lá'azxa.

¹⁷ Lu da naca' chee Jesucristo waca xezaca ba lazra' lu zrin dxuna' chee Dios ¹⁸lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá bėna' ne chee da bchálaja', ne da bėna', ¹⁹ ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. ²⁰ Caní naca, bėna' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezícadxa benne', ²¹ na', ca dxenná dizra' lá'azxa:

Xelelé'e benne' ca' quebe ne zrin nu benne' guzenne' le' chee Cristo,
na' benne' ca' quebe ne xelén chee Le' xelėjni'ine da naca chee'.

Pablo dxugú'u be'e chėjje' xezre Roma

²² Chee guzenda' le'e da caní, da zan lasa guca lazra' xedajnná'a le'e zrale xezre Roma, san quebe guca chia'. ²³ Na'a, ba bexuzre bėna' zrin nigá, ne lawe' da zánete iza ba guca lazra' xida' súałena' le'e, ²⁴ dxebeza lazra' tea' xedajnná'a le'e gate cha'a lu xezr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala. ²⁵ Na'a cha'a Jerusalén, gu'a late' da gácale na bi bíchedxu zaj zre'e na', ²⁶ lawe' da bi bíchedxu zaj zre'e xezre ca' zaj nababa Macedonia, ne xezre ca' zaj nababa Acaya gulėquene' naca xrlátaje bulutube' dumí da xelesel-le' chee bi bíchedxu zaj naque' baxache', zaj zrabe' Jerusalén. ²⁷ Gulėquene' naca xrlátaje xelune' da nigá, na' caní naca na lawe' da dxelebague' chee benne' ca', lawe' da benne' judío ca', benne' dxelėjle'e chee Cristo, bulunėzruje' chee benne' quebe zaj naque' judío chee da zaj nape' chee Dios, na' benne' caní dxal-la' xulunėzruje' chee benne' judío ca' chee da zaj nape' chee xezr la xu nigá. ²⁸ Caní naca, gate xexuzre guna' da nigá, ne ba

bnézruja' le' dumí nigá, na' cha'a lu xęzr la xu España, na' ca teza' xedajnná'a le'e. ²⁹ Dxuxrén lazra' gate xida' naga zrale le'e, gúale'a da chawe' chee dizra' chawe' chee Cristo.

³⁰ Le'e, bi bícha'dau', dxata' xúeda' le'e ne chee Xránadxu Jesucristo, ne ne chee xel-la zri'i lazre' da dxunna Be' Lá'azxa dxi'u, chee gácale tuze nen neda' guchálajędxu Dios chee gácaleņe' neda'. ³¹ Le naba Dios chee guselé' neda' lu na' benne' quebe dxeléajle'e chee Cristo naga nababa Judea, ne chee xezezí' du lazre' bi bíchedxu zaj zře'e Jerusalén dumí nigá da nu'a, ³² na' che naca da dxaca lazre' Dios, la'a lu dutę xel-la dxebé xedajnná'a le'e, ne chee xezi' lazra' naga zrale le'e. ³³ Dxenaba' Dios, Bénnea' dxunne' dxi'u xel-la dxebeza zri lazre', súaleņe' xúgutele le'e. ¡Ca'an gaca na!

16

Pablo dxugape' diuzre bi bíchedxu ca'

¹ Dxegu'a lu na'le nu'ula zandxu Febe, nu'ula na' ba bene' zrin chee Cristo ládujla bi bíchedxu zaj zře'e xęzre Cencrea. ² Le si' lu na'le le' cháwedau' lu La Xránadxu, ca dxal-la' gaca ládujla bi bíchedxu dxeléajle'e chee Cristo, na' le gácaleņe' bíteteze da dxexájrjene', lawe' da ba gúcale le' benne' zan, ne néda'queza'.

³ Le gugapa diuzre Priscila ne Aquilo, benne' belún zrin chee Jesucristo tu zren nen neda'. ⁴ Benne' caní buluzúe' xel-la nabán chee' lu da stebe chee gúcaleņe' neda'. Ca' naca na, dxapa' benne' ca' xcalenle, ne quegaze neda', san cá'anqueze dxelún xúgute bi bíchedxu quebe zaj naque' judío. ⁵ Le gugapa diuzre bi bíchedxu ca' dxelezhágabe' lizre Priscila, ne Aquilo. Le gugapa diuzre Epeneto, benne' ljwezra' nazri'ite lazra'. Le' guque' benne' nedxu naga nababa Acaya guxéajle'e chee Cristo. ⁶ Le gugapa diuzre María, nu'ula na' ba benle'e zrin ládujla le'e. ⁷ Le gugapa diuzre benne' walázh chia', Andrónico, ne Junias, benne' ca' gulaque' ljwezra' lizre xia. Zaj naque' benne' blau ládujla benne' gubáz ca' chee Cristo, na' guléajle'e chee Cristo nédxudxa ca neda'.

⁸ Le gugapa diuzre Amplias, benne' ljwezra' nazri'ite lazra' lu La Xránadxu. ⁹ Le gugapa diuzre Urbano, benne' ljwezra' lu zrin chee Jesucristo, ne le gugapa diuzre Estaquis, benne' nazri'ite lazra'. ¹⁰ Le gugapa diuzre Apeles, benne' blé'ene' da zan lasa ca dxeajlí lazre' Cristo. Cá'anqueze le gugapa diuzre Aristóbulo, benne' xrtia'. ¹¹ Le gugapa diuzre Herodión, benne' walázh chia', ne Narciso, benne' xrtia', benne' dxeléajle'e chee Xránadxu. ¹² Le gugapa diuzre Trifena ne Trifosa, nu'ula ca' dxelune' zrin chee Xránadxu, ne le gugapa diuzre Pérsida, bi zandxu nazri'ite lazrdxu, nu'ula na' ba benle'e zrin chee Xránadxu. ¹³ Le gugapa diuzre Rufo, benne'

blau dxéajlę'e cheę Xránadxu, ne xrņę'e, nu'ula na' naque' ca xrnáqueza'. ¹⁴ Le gugapa diuzre Asíncrito, ne Flegonte, ne Hermas, ne Patrobas, ne Hermes, ne bi bíchedxu ca' zrálene' le'. ¹⁵ Cá'anqueze le gugapa diuzre Filólogo, ne Julia, ne Nereo, ne nu'ula zane', ne Olimpas, ne xúgute' bi bíchedxu dxeleajlę lazre' Cristo, benne' zrálene' benne' caní.

¹⁶ Le gugapa diuzre ljwézrele tule xetule, gunídate' ljwézrele. Xúgute' cue' bi bíchedxu dxulugape' le'e diuzre.

¹⁷ Le'e, bi bícha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházie' benne' ca', na' dxulusédenę' da dxedábaga na ca da nusédele. Le cuasa naga zaj zra' benne' ca' ¹⁸ lawe' da quebe dxelún benne' ca' zrin cheę Xránadxu Jesucristo. Dxelune' ca da dzezaca ba lazre' bęla' dxen cheęqueze', ne dxelezí xę'e benneáchedu ca' quebe ne xeleneze xánnię' ca naca dizra' chawe'. Benne' wen lazre' ca' cadite zaj nupę'e, ne zaj nézene' da dxuluchálaje'. ¹⁹ Xúgute' bęnneache zaj nézene' ca ba bzúale xtizra' Dios. Cheę le na' dxebeda', ne dxaca lazra' gácale ban lazre' gunle da xrlátaje, na' quegá gunle da caleła. ²⁰ Dios, Bęnnea' dxunne' dxi'u xel-la dxebeza zri lazre' ba zúaqueze' gácalene' le'e, cheę guchúchujle Satanás da xriwe'. Dxenaba' lau Xránadxu Jesucristo gunę' gaca chawe' cheęle.

²¹ Bi bíchedxu Timoteo dxugápabe' le'e diuzre. Nácabe' ljwezra' lu zrin cheę Cristo. Cá'anqueze dxulugape' le'e diuzre benne' walázr chia' Lucio, ne Jasón, ne Sosípater.

²² Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

²³ Gayo dxugape' le'e diuzre, bęnnea' zua' lizre', na' dxunne' lizre' naga dxelezraga xúgute' benne' bíchedxu caní. Cá'anqueze dxulugape' le'e diuzre Erasto, benne' xu'u lu ne'e dumí cheę xezre, ne bi bíchedxu Cuarto.

²⁴ Dxenaba' Xránadxu Jesucristo gunę' gaca chawe' cheę xúgutele le'e. ¡Ca'an gaca na!

Pablo dxue lá'ane' Dios

²⁵ Na'a, dxue lá'anantu' Dios, Bęnnea' séquene' guzę cháchadxe' le'e lu dizra' chawe' da dxuzenda' bęnneache, ne lu da dxusédeda' ca naca cheę Jesucristo. Da nigá naca na tuze nen da ble'e Dios cheę da nagache da gulú'u chawe' bagácheze nédxudautę, ²⁶ san na'a ba ble'e lawe' na ne cheę dizra' lá'azxa da buluzúaj benne' ca' buluchálaje' waláz cheę Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúgute' xęzr la xu cheę xeléajlę'e cheę na, ne xuluzúę' dizra' cheę na.

²⁷ Dios, Benne' tu licha', ne Benne' sina, gaca ba Le' chadía chacanna ne cheę Jesucristo. ¡Ca'an gaca na!

DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO

Pablo dxuzúaje' chee bíchedxu zaj zre'e xezre Corinto

¹ Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes ² dxuzúaja' da nigá chee le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. ³ Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

Da chawe' da nápadxu ne chee Cristo

⁴ Dxápequeza' Dios: Xcalenu', ca naca chee le'e ne chee da chawe' da benne' Dios le'e ne chee Jesucristo. ⁵ Lawe' da nácale tuze nen Cristo, Dios ba benne' le'e xel-la gunni'a zante da naca chee Be' Lá'azxa chee', lu da dxuchálajle, ne lu da nézele. ⁶ Ca' naca na, da dxuchálajdxu ca naca chee Cristo ba guca na li chee le'e. ⁷ Ca' naca na, quebe bi dxexáizrjele ca da dxunna Dios dxi'u dxácatę dxebézadxu zra xelá' Xránadxu Jesucristo. ⁸ Le' guxru chache' le'e ca zrin zra bzebe, chee quebe nu benne' gaca gusebáguę' le'e zría gate xelá' Xránadxu Jesucristo. ⁹ Dios tu dxúnzqueze' ca da nachebe lazre', naque' Bénnea' bláwizre' le'e chee gácale tuze nen Zri'ine', Xránadxu Jesucristo.

Dxaca chupa la'a bi chee Cristo

¹⁰ Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. ¹¹ Da nigá dxapa' le'e, bi bicha', lawe' da buluzén benne' xrtia Cloé neda' dxutíl-lale dizra'. ¹² Da nigá zéaje na nácale chupa la'a, na' bál-lale dxennale: Netu' da'ntu' Pablo. Xezícale' dxennale: Netu' da'ntu' Apolos. Xezícale dxennale: Netu' da'ntu' Pedro. Xezícale dxennale: Netu' da'ntu' Cristo. ¹³ ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz chee le'e? ¿Bedxúale le'e nisa lu la Pablo? ¹⁴ Xcalén Dios quebe núlale le'e bchua' nisa san tuze Crispo, ne Gayo ¹⁵ lawe' da quebe nu gaca nna: Lu la Pablo gudxúa' nisa. ¹⁶ Cá'anqueze bchua' nisa benne' xrtia Estéfanos, san quebe

dxeajsá lazra' che nu xetú bchua' nisa. ¹⁷ Cristo quebe gusel-
le' neda' nu guchúa' nisa, san chee guzenda' bénneache dizra'
chawe' chee', quegá nen dizra' sina, chee quebe gaca dácheze
da ben Cristo gate gutie' le'e xaga béguaj.

Cristo naque' xel-la waca, ne xel-la sina chee Dios

¹⁸ Dizra' ca gute Cristo le'e xaga béguaj naca na ca tu da
xálaze lau benne' xelebía xi'e, san chee dxu dxi'u, nápadxu xel-
la weselá, dizra' nigá napa na xel-la waca chee Dios. ¹⁹ Naca
na ca naxúaj na lu dizra' lá'azxa. Dxenná Dios:

Guzría xi'a xel-la sina chee benne' sina ca',
ne guzúa' chalá'ala xel-la naxéajni'i chee benne' dxeléajni'ine'.

²⁰ ¿Gazra nagá'ana benne' sina na'a? ¿Waca guselá cuine'?
¿Gazra nagá'ana benne' dxusédené' bénneache? ¿Gazra nagá'ana
benne' dxuchálaje' ca naca da dxaca lu xezr la xu nigá? Ca
naca xel-la sina chee xezr la xu nigá, Dios ba nune' na tu da
xálaze lawe' da tuze Le' gaca guselé' bénneache. ²¹ Dios nézene'
xúgute. Quebe be'e lataj bénneache xelúnbe'e Le' ne chee xel-la
sina chee bénneache. Bezaca ba lazre' Dios ne chee dizra' nigá
bselé' benne' ca' dxuluxrén lazre' Le', lácala zaj zra' benne'
dxeléquene' naca dizra' nigá tu da xálaze.

²² Benne' judío ca' dxelaca lazre' xelelé'ene' xel-la waca da
za xabáa, na' benne' griego ca' dxelexílaje' xel-la sina, ²³ san
dxi'u dxuzendxu bénneache ca naca chee Cristo, ca gutie' le'e
xaga béguaj. Benne' judío dxelexedué'ene' chee dizra' nigá,
na' benne' quebe zaj naque' judío dxeléquene' naca na tu da
ca zeaje na. ²⁴ Na'a, benne' ca' ba bláwizra Dios, benne' judío
ca', ne benne' quebe zaj naque' judío, Cristo nácaqueze' xel-
la waca, ne xel-la sina chee Dios. ²⁵ Da dxeleque bénneache
naca tu da xálaze chee Dios nácadxa na sina ca xel-la sina chee
bénneache, na' da dxeleque bénneache naca na tu da naca bea
nate ni'a na' Dios nápadxa na xel-la waca ca xel-la waca chee
bénneache. ²⁶ Le'e, bi bicha', dxal-la' gueque be'ele ba bláwizra
Dios le'e lácala bábaze le'e nácale sina lau bénneache chee xezr
la xu nigá, ne bábaze le'e nácale xel-la dxenná bea, u nácale
xrtia benne' zaj naque' blau. ²⁷ Dios ba guqué'e benne' ca' dx-
eleque bénneache zaj naque' benne' xálaze, chee xelexedué'e
benne' sina ca', ne ba guqué'e benne' ca' dxeleque bénneache
zaj nate ni'a ne'e, chee xelexedué'e benne' wal-la ca'. ²⁸ Dios
ba guqué'e benne' ca' quebe zaj naque' blau, ne benne' ca'
zaj nuzúa bénneache chalá'ala, benne' ca' quebe nu zaj naque',
chee guzague' naze benne' zaj naque' blau, ²⁹ chee quebe nu
seque' gucá'ana szren cuina lau Dios. ³⁰ Diósqueze ba nune'
le'e tuze nen Jesucristo, ne nune' naca Cristo Benne' dxunna
dxi'u xel-la sina, ne Benne' gucá'ana dxi'u xrlátaje, ne Benne'
dxuzúe' dxi'u lu na' Dios, ne benne' dxexá'awe' dxi'u. ³¹ Ca'

naca na ca da naxúaj na lu dizra' lá'azxa, da dxenná na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

2

Dizra' ca naca chee Cristo, gudé'e xaga béguaj

¹ Na'a, bi bícha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca. ² Gate ne zúalena' le'e quebe guca lazra' guchálaja' chee bila da xetú san tuze chee Jesucristo, Bénnea' gudé'e xaga béguaj. ³ Gate guzúalena' le'e ne nátete ní'a na'a, ne guzrízetea' lawe' da bzreba' quebe guca guna' da nusebaga' Cristo neda'. ⁴ Gate bchálajlena' le'e, ne bzenda' le'e dizra' chawe', quebe guca lazra' guna' chéajlele chee' nen dizra' sina chee bénneache da guchálaja', san bena' guxéajlele chee' ne chee Be' Lá'azxa, ne ne chee xel-la waca chee Dios ⁵ chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

Dios dxulé'e cuine' ne chee Be' Lá'azxa

⁶ Dxuchálajntu' dizra' sina lau benne' ca' ba zaj ze chache' lu xel-la dxeleajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé chie'. ⁷ Dxuchálajntu' xel-la sina nagache chee Dios, da na' bzua Dios nédxudaute ca bene' xezr la xu nigá, chee ladxu chadía chacanna. ⁸ Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. ⁹ Naca na ca da naxúaj na lu dizra' lá'azxa, dxenná na:

Dios ba nucueze' chee benne' ca' zaj nazrí'ine' Le' da ca' quebe nu ne le'e, ne quebe nu ne xen, ne da quebe nu ne cu'u lazre'.

¹⁰ Da caní zaj naca na da ble'e Dios dxi'u ne chee Be' Lá'azxa nasel-la Le', lawe' da dxelé'e Be' Lá'azxa xúgute da de, ne dute da xu'u na lu xichaj lázrdau Diósqueze.

¹¹ Ládujla bénneache, ¿nu seque' neze da xu'u lu xichaj lázrdau xetú benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios. ¹² Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. ¹³ Dxuchálajntu' ca naca da caní nen dizra' da bsede Be' Lá'azxa chee Dios netu', ne quegá nen dizra' da bsédentu' lu xel-la sina cheentu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

¹⁴ Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéqueñe' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa. ¹⁵ Bénnea' nazi'e Be' Lá'azxa chee Dios dxezéqueñe' chéajni'ine' xúgute da dxulé'e Be' Lá'azxa le'. Benne' quebe zúale Be' Lá'azxa le', quebe séqueñe' chéajni'ine' da dxuséde Be' Lá'azxa dxi'u. ¹⁶ Naxúaj lu dizra' lá'azxa da dxenná na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séqueñe' guzéajni'ine' Dios? Dxi'u nazidxu ca da xu'u xichaj lázrdau Cristo.

3

Benne' dxelunę' tu zren Dios lu zrin chee'

¹ Na'a, le'e, bi bícha'dau', quebe guca guchálajlęna' le'e ca dxuchálajlęna' benne' ca' zúale Be' Lá'azxa chee Dios le', san bchálajlęna' le'e ca dxuchálajlęna' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. ² Bsédeda' le'e da quebe zaj naca na stębe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquele chéajni'ile da zaj naca na stębe. Cá'anqueze na'a quebe ne séquele chéajni'ile na ³ lawe' da ne nácale ca zaj naca benne' cun ca nálaje'. Dxácatę ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute bęneache. ⁴ Dxácatę ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálaje'.

⁵ Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajlęle chee Xránadxu. Tu tuntu' bęntu' zrin chee Xránadxu da blé'ene' netu'. ⁶ Neda' guza' binnedu ca' lu xichaj lázrdau, bchálajlęna' le'e xrtizra Dios, na' Apolos gudile' na, san Dios bsegule' na. ⁷ Ca' naca na, ne benne' dxaze', ne benne' dxile' na, quebe bi zaque', san Dios na' dxune' xúgute, lawe' da dxusegule' da du ca'. ⁸ Benne' dxelaze', ne benne' dxelile' zaj naque' lébete, san Dios quízruje' tu tu benne' caní ca naca zrin da belunę'. ⁹ Nácantu' wen zrin tu zren nen Dios, na' le'e nácale ca tu xęzr la xu naga dxun Dios zrin.

Cá'anqueze nácale ca tu xu'u da dxun Dios. ¹⁰ Neda' naca' ca tu wen xu'u blau, na' Dios bęne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnię' ca dxusegule' na. ¹¹ Québedxa nu seque' cueche' xetú lane ca da ba dxe', da na' naca na Jesucrístoqueze, ¹² san waca

nu benne' gusegule' lawe' na da zaca na ca oro, ne plata, ne xiaj da zaj zaca, u waca gusegule' lawe' na da quebe zaca na ca blaga', ne xizre, ne luaj laga'. ¹³ Zrin da nun tu tu benne' gulé'equeze lawe na lu zra guchi'a Dios, lawe' da lu zra na' la' tu xi', na' lu xi' na' gulé'e lawe na ca naca zrin nun tu tudxu. ¹⁴ Che nu benne' nune' tu zrin da quebe chezxe na lu xi', na' wazi'e lazruj chee'. ¹⁵ Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

¹⁶ ¿Quebe nézele le'e nácale xudau' chee Dios, na' Be' Lá'azxa chee Dios zu'e' lu xichaj lázrdaule? ¹⁷ Che nu benne' gucá'ana dítaje' xudau' nigá chee Dios, Dios guzría xi'e bènea' lawe' da naca lá'azxa xudau' chee Dios, na' lé'equezle nácale xudau' na'.

¹⁸ Quebe si xe cuínale. Che núlale dxéquele nácale benne' sina lu da naca chee xezr la xu nigá, dxal-la' xun cuínale ca tu benne' quebe bi dxaque', chee gunna Dios le'e xel-la sina li. ¹⁹ Xel-la sina chee xezr la xu nigá naca na tu da xálaze lau Dios. Naxúaj lu dizra' lá'azxa da dxenná na: Dios dxun zréajane' benne' sina ca' lu xel-la sina da zaj nápaqueze'. ²⁰ Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. ²¹ Chee le na' quebe nu benne' dxal-la' gun szren cuine' lawe' da de'e tu benne', lawe' da Dios dxunne' le'e xúgute da ca' dxechínnele. ²² Pablo, ne Apolos, ne Pedro, ne xezr la xu nigá, ne xel-la nabán, ne xel-la gute, ne na'a zra, ne da za za', ne xúgute da ca' zaj naca na chee gaca da chawe' chee, ²³ na' lé'equezle xu'ule lu na' Cristo, na' Cristo xu'e lu na' Xradxu Dios.

4

Zrin dxelún benne' gubáz chee Cristo

¹ Ca' naca na, dxal-la' guéquele nácazentu' wen zrin chee Cristo, ne nabágantu' gusedentu' bèneache da zaj nagache chee Dios. ² Na'a, benne' nabague' tu zrin, dxun na ba xen gaque' li lazre'. ³ Neda' quebe dxé'a gunne xue bi dxéquele naca' neda', u bi dxeleque bèneache naca'. Quebe gaca nnia' xrlátaje u quegá chee da nuna' ⁴ lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'. ⁵ Ca' naca na, quebe guchi'ale chee da ca' che quebe ne zrin zra. Le cueza zra xelá' Xránadxu, na' xebéaje' lu xel-la naxaní' ca naca da nagache lu da chul-la. Xránadxu gulé'ene' ca naca da dxulaba lázredxu, na' Dios gulé'ene' chawe' tu tudxu ca da dxal-la' sidxu.

⁶ Le'e, bi bicha', dxuchálajlena' le'e da caní chee gaca chawe' chee, dxuzúa' ca tu da gulé'e na le'e Apolos, ne néda'queza'. Dxennía' da nigá chee gusedele ne chee netu' chee quebe

gundxale ca da dxue lataj dizra' lá'azxa le'e, ne chee quebe gucá'ana szren cuínale, ne chee quebe guzúale chalá'ala le sa' ljuwézrele. ⁷ ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee na' dxucá'ana szren cuinu', dxéquenu' lué'queze gudilju' da na'?

⁸ ¿Nácale le'e benne' gunnía'? ¿Nápale xúgute da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezle wenná bea chee guntu' netu' le'e tu zren lu xel-la dxenná bea chee. ⁹ Dxéqueda' Dios nuzúe' netu', benne' gubáz chee', lu lataj bzebe. Nácantu' ca benne' ba zaj nabía xi' chee gátentu'. Nácantu' ca tu da dxuzé na lau bénneache, na' dxelenná' gubáz chee xabáa ca', ne bénneache netu'. ¹⁰ Dxeleque bénneache nácantu' netu' tu da xálaze lawe' da dxuntu' zrin chee Cristo, san le'e dxéquele dxéajni' xánnele da zaj naca chee Cristo. Dxeleque bénneache nate ni'a na'ntu' netu' san le'e dxéquele nácale le'e benne' walla. Dxuluzúa bénneache netu' chalá'ala, san dxelape' le'e ba lá'ana. ¹¹ Ga bzrinte lu zra na'a zra dxeduntu', ne dxebilentu', ne nácantu' gala xídeze, na' bénneache dxulucháchalene' netu', ne quebe zua lízrentu'. ¹² Dxexedú lázrentu' dxuntu' zrin. Dxelenné bénneache schanni' cheentu', san netu' dxexechébentu' dizra' chawe'. Zaj nau zi' xuzre' netu' san dxuchaga launtu' na. ¹³ Dxelenné' schanni' cheentu', san netu' dxuchálajlentu' le' da li dute xel-la zren lazre' cheentu'. Dxelune' netu' ca tu xizre bebe, ne ca tu da ba guca ditaj chee bénneache ca lu zra na'a zra.

¹⁴ Quegá dxuzúaja' chee da nigá chee xedué'ele, san chee guzéajni'ida' le'e, nácale ca bi chia' nazri'ite lazra'. ¹⁵ Lácala zaj zúale le'e gaxúa gaxúane benne' dxulusédene' le'e ca naca chee Cristo, quebe nu zua xetú xrale. Néda'queza' naca' xrale lu xel-la dxejlí lazre' chee Cristo lawe' da bzenda' le'e dizra' chawe' chee Jesucristo. ¹⁶ Ca' naca na, dxata' xúeda' le'e gunle ca dxuna' neda'.

¹⁷ Chee le na' dxusel-la' Timoteo xedajná'abe' le'e, nácabe' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédeda' bénneache gáteteze na', ne lau xúgute cue' bi chee Cristo. ¹⁸ Bál-lale le'e ba nucá'ana szren cuínale lawe' da dxéquele quebe xida' xedajnnaba' le'e, ¹⁹ san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'. ²⁰ Che dxenná be'e Dios dxi'u quebe naca na chee tu da dxuchálajzedxu. Lécaze' ba nunne' dxi'u xel-la waca chee'. ²¹ ¿Bizra dxaca lázrele le'e?

¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexruj lazre'?

5

Pablo dxuchi'e chee tu da sban

¹ Ba benda' zua tu benne' ládujla le'e nune' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'ene' Dios. ² Ca naca da na' le'e ne dxucá'ana szren cuínale. Dخال-la' cuezre xáchele. Bénnea' nune' da nigá dxal-la' xebéajle le' ládujla le'e. ³ Quebe zua' neda' naga zúale lu bēla' dxen chia', san naca cáteze zúaleña' le'e lu be' nácaqueza', na' ba bchi'a chee bénnea' nune' dul-la nigá ca tu benne' zúaletequeze le'e. ⁴ Le zraga le'e lu La Xránadxu Jesucristo, na' gaca na cáteze neda' súaļeña' le'e lu be' nácaqueza', na' xel-la waca chee Xránadxu Jesús suale na le'e. ⁵ Nadxa dxal-la' xudele bénnea' lu na' Satanás da xriwe', na' lácala cuía xi' bēla' dxen chee' na' be' nácaqueze' la na lu zra xelá' Xránadxu Jesús.

⁶ Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze cua zichaj dxuchazra na ca naca cua na'? ⁷ Le xebéaj chalá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutie' waláz cheedxu. Naque' cheedxu zrila', be dxelutie' laní pascua. ⁸ Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calēla, ne lu da zrinnaj, da ca' zaj naca na ca cua zichaj gula na'.

⁹ Lu da bzuaja' chee le nédxudxa gucha' le'e quebe guchixre chee le nen benne' ca' dxelune' da sban. ¹⁰ Quebe gucha' le'e xecuásatequezele chee benne' zaj zre'e xezr la xu nigá, benne' dxelune' da sban, ne benne' wecude' ca', ne benne' gubán ca', ne benne' dxelúe lá'ane' bedáu' xiaj xaga ca', lawe' da chee quebe guchixre chee le nen benne' caní, dxun na ba xen xedxúajle xezr la xu nigá. ¹¹ Da guca lazra' xapa' le'e naca na chee quebe guchixre chee le nen netú benne' dxenné' naque' bíchedxu, san dxune' da sban, u naque' benne' wecude', u dxue lá'ane' bedáu' xiaj xaga, u dxutupe' dizra' bizruj, u dxí'aje', u naque' gubán. Quebe dxal-la' gágulele benne' caní. ¹²⁻¹³ Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchi'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

6

Zria da dxelagu ljwezre bi ca' chee Cristo

¹ Gate tule le'e zua da dxaca chee le nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bíchele? ² ¿Quebe nézele le'e, benne' zaj naca bi chee Dios xuluchi'e ca da dxelún bénneache chee xezr la xu nigá? Che le'e guchí'ale chee bénneache lu xezr la xu nigá, ¿quebe naca chee le guchí'ale chee tu da dauze? ³ ¿Quebe nézele le'e guchí'adxu chee gubáz chee xabáa ca'? Cá'anqueze dxal-la' guchí'adxu da naca chee xezr la xu nigá. ⁴ Che le'e zua da dxaca chee le lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchi'e chee da na'? ⁵ Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ine' chee guchi'e tu da dxaca chee bi bíchedxu ca'? ⁶ ¿Dxun na ba xen tu bi bíchedxu cheajtágube' zria da dxaca chee be' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

⁷ Che zua da dxedíl-lalele biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuane' chee le? ⁸ Le'e dxunle da quebe naca na xrlátaje, ne dxebanle, na' dxunle caní chee bi bíchele.

⁹⁻¹⁰ ¿Quebe nézele le'e, quebe xelexú'u benne' wen da calela naga dxenná bea Dios? Quebe güele lataj nu si xē le'e. Quebe xelexú'u naga dxenná bea Dios benne' ca' dxelune' da sban, ne benne' ca' dxelúe lá'anē' bedáu' xiaj xaga, ne benne' ca' dxelezúalēne' zru'ula benne' xula, ne benne' ca' dxeledálēne' ljwezre biue', ne benne' gubán ca', ne benne' wecude' ca', ne benne' ca' dxelé'aje', ne benne' ca' dxulutupe' dizra' bizruj, ne benne' ca' dxulucache lanē'. ¹¹ Caní gúcale bál-lale le'e, san na'a bache bexádxele lu xichaj lázrdaule, ne nuzúa cuínale lu na' Dios, na' nazí' lu ne'e le'e lu La Xránadxu Jesús ne chee Be' Lá'azxa chee Dios cheedxu.

Naca lá'azxa bēla' dxen cheedxu

¹² Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj gunē' da dxaca lazre', san quebe dxal-la' gu'e lataj bi da nna be'e na le'. ¹³ Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpatē na. Quebe naca bēla' dxen cheedxu chee gun na da sban. Bēla' dxen cheedxu naca na da gunézrujdxu chee Xránadxu, na' Xránadxu naque' Bénnea' guchínene' bēla' dxen cheedxu lu da xrlátaje. ¹⁴ Ca

bēn Dios bsebanē' Xránadxu ládujla benne' gate ca', cá'anqueze gusebanē' dxi'u nen xel-la waca chee'.

¹⁵ ¿Quebe nézele le'e bēla' dxen chee'le naca na chee' Cristo? ¿Wacá'a tu da naca na bēla' dxen chee' Cristo, ne guchaga' na nen bēla' dxen chee' tu nu'ula wēn da sban? ¡Cabata'! ¹⁶ ¿Quebe nézele le'e gate tu benne' biu dxuchague' tu nu'ula wēn da sban dxúpatē' zaj naque' ca tuze bēla' dxen? Naxúaj lu dizra' lá'azxa da dxenná na: Dxúpatē' xelexaque' tuze bēla' dxen. ¹⁷ Gate tu benne' dxuchague' Xránadxu, dxelexaque' tuze be'.

¹⁸ Le guzrunnaj chee' da sban. Zaj nita dul-la xula da dxun benne' da quebe dxulucá'ana ditaj na bēla' dxen chee', san benne' dxuchague' nu'ula quebe naca zru'ule' dxunē' dul-la lu bēla' dxen chee'queze'. ¹⁹ ¿Quebe nézele le'e naca bēla' dxen chee'le xudau' chee' Be' Lá'azxa, Bénnea' nunna Dios le'e, na' Be' Lá'azxa zue' xichaj lázrdaule? Quebe nácale xrana bēla' dxen chee'le, ²⁰ lawe' da guz' Dios le' na nen tu lazruj zrentē. Chee' le' na', dxal-la' gápale ba lá'ana Dios nen bēla' dxen chee'le, ne nen be' nácaquezle, lawe' da dxúpatē' na' zaj naca na chee' Dios.

7

Ca naca chee' xel-la dxuchaga na'

¹ Na'a xechēba' ca zaj naca da bchébele neda'. Da li naca xrlátaje quebe guchaga na' tu benne'. ² Lawe' da dxácale'ē da sban naga zúale, tu tu benne' biu dxal-la' súalēne' nu'ula chee'queze', na' tu tu nu'ula dxal-la' súalēne' benne' biu chee'queze'. ³ Benne' biu dxal-la' gunē' nen zru'ule' da nabague' chee' zru'ule', na' cá'anqueze nu'ula dxal-la' gunē' nen benne' biu chee' da nabague' chee' benne' chee'. ⁴ Nu'ula na' quebe naque' xrana bēla' dxen chee', san naca na chee' benne' biu chee'. Cá'anqueze benne' biu quebe naque' xrana bēla' dxen chee', san naca na chee' zru'ule'. ⁵ Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee' xuluzúa cuine' lau Dios chee' xuluchálajlēne' Le'. Te na' dxal-la' xuluchaga ljwezre' chee' quebe seque' Satanás nna be'e na le' che quebe xelezéquene' xelenná be'e cuine'.

⁶ Da nigá dxapa' le'e naca na tu da dxue le'e lataj. Quebe naca na tu da nadxixruj bea na. ⁷ Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

⁸ Dxapa' benne' wegū, ne nu'ula wezebe, naca xrlátaje xelexegá'ane' cá'aze ca zua' neda'. ⁹ Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu bēla' dxen chee'.

¹⁰ Benne' zaj nuchaga ne'e dxapa' nu'ula quebe gusané' benne' biu chee'. Quebe naca chee'za' da nadxixruj bea nigá, san naca na da dxun Xránadxu. ¹¹ Che nu nu'ula gusané' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusané' zru'ule'.

¹² Dxapa' xezícadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne' chee', bi bíchedxu na' quebe dxal-la' gusané' le'. ¹³ Che benne' biu chee tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusané' benne' biu chee' na'. ¹⁴ Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zri'ine benne' quebe zaj naque' chee Dios, san da li zaj nácabe' ca bi chee Dios. ¹⁵ Che benne' biu na' u zru'ule', benne' quebe dxéajle'e chee Xránadxu, dxaca lázrtequeze' gusané' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu. ¹⁶ Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

¹⁷ Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anadxu cáteze nácadxu gate gunné Dios dxi'u. Caní dxapa' xúgute cue' bi chee Cristo. ¹⁸ Che Dios dxenné' tu benne' biu nadxugu lu belá' chee' da dxulé'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu belá' chee' da na', quebe dxal-la' chugu lu belá' chee' da na'. ¹⁹ Quebe bi naca che nadxugu da na' lu belá' cheedxu, u quebe. Da dxun na ba xen naca gundxu da dxaca lazre' Dios. ²⁰ Tu tudxu dxal-la' xegá'anadxu cáteze nácadxu gate Dios dxenné' dxi'u chee gácadxu bi chee'. ²¹ Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. ²² Bénnea' guque' benne' nada'u gate gunné Xránadxu le' naque' ca benne' quebe nada'u chee gune' zrin chee Xránadxu, na' cá'anqueze bénnea' quebe naque' benne' nada'u gate gunné Xránadxu le', naque' ca benne' nada'u chee Xránadxu. ²³ Dios ba ná'awe' le'e nen tu lazruj zrente. Quebe güele lataj nu benne' gune' le'e benne' zaj nada'u. ²⁴ Ca' naca na, bi bicha', tu tudxu dxal-la' xegá'anadxu

lau Dios cáteze nácadxu gate gunné' dxi'u.

²⁵ Ca naca chee benne' ca' quebe zaj nuchaga ne'e quebe bi gunná be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. ²⁶ Dxéqueda' neda' dxal-la' xegá'ana tu benne' biu cáteze naque' lawe' da zúadxu zra stébele'e. ²⁷ Che nuchagu' nu'ula quebe cuasu' le', na' che quebe nuchagu' nu'ula, quebe guchaga na'u. ²⁸ Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stébe lu zra caní, na' dxaca lazra' quebe súale stébe caní.

²⁹ Bi bícha'dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee Cristo ca dxelún benne' quebe zaj nuchaga ne'e. ³⁰ Benne' dxelebezre xache' dxal-la' xelune' da naca chee Cristo ca dxelún benne' quebe zaj naque' baxache'. Benne' zaj zra' laní dxal-la' xelune' da naca chee Cristo ca dxelún benne' quebe zaj zue' xel-la dxebé, na' benne' dxelá'awe' dxal-la' xelune' da naca chee Cristo ca dxelún benne' quebe zaj nape' da na' dxelá'awe'. ³¹ Benne' dxelezi'e ba neza lu xezr la xu nigá dxal-la' xelune' da naca chee Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

³² Dxaca lazra' quebe bi cue'le gunne xue. Gate tu benne' biu nácabé' wegu' dxe'ebe' gunne xue da naca chee Xránadxu chee gunbe' da dxezaca ba lazre' Xránadxu. ³³ Gate ba nuchaga ne'e, dxe'e gunne xue da naca chee xezr la xu nigá chee guné' da dxezaca ba lazre' zru'ule'. ³⁴ Cá'anqueze dxaca chee nu'ula zua benne' biu chee', ne nu'ula wegu'. Nu'ula wegu' dxe'ebe' gunne xue da naca chee Xránadxu chee chu'ube' lu na' Dios duté bela' dxen cheebe', ne duté be' cheebe', san nu'ula zua benne' biu chee' dxe'e gunne xue da naca chee xezr la xu nigá chee guné' da xezaca ba lazre' benne' chee'.

³⁵ Dxapa' le'e da nigá chee gaca chawe' cheele, ne quebe chee nna be'eda' le'e, san chee gunle da xrlátaje, ne da li, chee chu'ule du lázrele lu na' Xránadxu.

³⁶ Che nu benne' dxéquene' nácadxa xrlátaje guchaga na' zrí'ine' nu'ula lawe' da ba dxedé xel-la cuide' cheebe', ne naca da dxal-la' gunbe', dxal-la' guné' da dxéquene' naca xrlátaje. Waca guchaga na'abe'. Quebe naca na dul-la. ³⁷ Che nu benne' quebe dxéquene' dxun na ba xen, ne che nape' lataj guné' da dxaca lazre', ne che ba nune' lu xichaj lázrdawe' xegá'ana zrí'ine' nu'ula wegu', dxune' da xrlátaje. ³⁸ Ca' naca na, benne' dxu'e lataj guchaga na'abe' zrí'ine' nu'ula, dxune'

da xrlátaje, na' bénnea' quebe dxuḗ lataj dxunḗ da nácadxa xrlátaje.

³⁹ Nu'ula zua benne' biu cheḗ nuchaguḗ bénnea' ne cheḗ da nadxixruj bea na dxácatḗ ne zuḗ nabaneḗ, san che gate benne' cheḗ, de lataj nu'ula na' guchaga ne'e nen núteteze benne' biu, san dxun na ba xen dxéajle'e cheḗ Xránadxu. ⁴⁰ Gácadxa cheḗ da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa cheḗ Dios neda' tuze.

8

Xel-la wagu da zaj nuzúa bénneache lau bedáu' xiaj xaga

¹ Na'a guchálaja' ca naca cheḗ xel-la wagu da zaj nuzúa bénneache lau bedáu' xiaj xaga. Da li xúguteḗdxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxeajlí lazre' cheḗdxu. ² Che nu benne' dxéquene' nape' dutḗ xel-la dxéajni'i, quebe ne chéajni'ine' ca dxal-la' chéajni'ine'. ³ Che nu benne' nazrí'ine' Dios, Dios ba nazi' lu ne'e bénnea'.

⁴ Na'a, ca naca cheḗ xel-la wagu da zaj nuzúa bénneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bénnea' naque' Dios. ⁵ Lácala zaj zra' xabáa, ne xezr la xu nigá da zantḗ da dxeleque bénneache zaj naca na dios, ne cheḗ benne' caní zantḗ dios zaj zra na, ne zantḗ xrane' zaj zra na, ⁶ cheḗdxu dxi'u che nácadxu cheḗ Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu cheḗ guchínene' dxi'u. Cá'aqueze tuze Bénnea' naque' Xránadxu, Jesucristo. Ne cheḗ Le' guzrá' xúgute da de, na' zúadxu dxi'u ne cheḗ Le'.

⁷ Quegá xúgute bi cheḗ Cristo zaj nézene' da nigá. Bal-la benne' caní gulú'u lawe' belúe lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na cheḗ bedáu', na' lawe' da quebe zaj ze chache' lu xichaj lázrdawe', dxeléquene' zaj nabague' zria ne cheḗ da dxelawe'. ⁸ Da na' dxágudxu quebe dxucá'anadxa na dxi'u xrlátaje lau Dios, lawe' da quebe nácadxadxu xrlátaje che dxágudxu, ne quebe nácadxadxu caleḗa che quebe dxágudxu. ⁹ Le guxúe xanne' cuínale ca naca lataj da nápaḗ bi gágule cheḗ quebe guzría xile tu benne' quebe ze chache' lu xel-la dxeajlí lazre' cheḗ'. ¹⁰ Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu, benne' quebe ze chache' lu xel-la dxeajlí lazre' cheḗ, lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bénneache lau tu dios quebe bi naca.

11 Ca' naca na, lue', lawe' da napu' xel-la dxéajni'i, guzría xi'u tu bi bichu' quebe zę chache' lu xel-la dxeajlí lazre' chee', na' naque' benne' gute Cristo waláz chee'. 12 Ca' naca na, gate dxuzría xile bi bíchedxu quebe zaj zę chache' lu xel-la dxeleajlí lazre' chee', dxunle dul-la da dxuzúa Crístoqueze chalá'ala. 13 Chee le' na', che guzría xi'a tu bi bicha' ne chee da dxawa', nácadxa chawe' cabátadxa gawa' belá' chee quebe guzría xi'a le'.

9

Da naca chee tu benne' gubáz chee Cristo

1 Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin bena' chee'. 2 Che dxeleque xezícadxa benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

3 Da nigá naca na da dxapa' benne' ca' dxelezi' tizre' neda': 4 Naca chia' si' lu na'a da xi'aj gawa' ne chee zrin da dxuna'. 5 Cá'anqueze naca chia' guchaga na'a tu nu'ula zandxu chee chéajlene' neda' ca dxelún xezícadxa benne' gubáz chee Cristo, ne benne' bíchequeze Xránadxu, ne Pedro. 6 ¿Dxéquele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzénentu' bėnneache dizra' chawe'? 7 ¿Nuzra benne' gaque' benne' zeje' wedil-la che quebe nu quizruj le'? ¿Nuzra benne' dxaze' lba uva che quebe gawe' na? ¿Nuzra benne' gusegule' zrila' che quebe xequé'e xicha zraba'? 8 Quebe dxal-la' guéquele dxapa' le'e da nigá néda'queza', lawe' da caníqueze dxenná na lu da bdxixruj be'e Moisés. 9 Naxúaj lu da nadxixruj bea na da dxenná Dios: Quebe cu'ule xixruj dxu'a beze, be dxíchuba' zrua' xtila. Quebe gunná Dios da nigá lawe' da dxue lazre' chee beze cá'aze. 10 Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' beze, ne benne' dxine' dxal-la' xebebeza lazre' xelexezi'e ca naca da gunna lina da xelaze'. 11 Na'a, che netu' ba gúzantu' lu xichaj lázrdaule da naca na chee Be' Lá'azxa, ¿quebe dxal-la' si' lu na'ntu' látedauze da naca chee lu xezr la xu nigá? 12 Che xezícadxa benne' naca chee' xelexi' lu ne'e da naca chee, ¿gáhradxa netu'?

Quebe ne guchíntu' da nigá naca na cheentu'. Bchaga launtu' xúgute chee quebe guzágantu' ca naca dizra' chawe' chee Cristo. 13 Ba nézele benne' dxelune' zrin chee xudau' dxelawe' chee da xu'u lu xudau' na', na' benne' dxelune' zrin chee lu cugu naga dxelutie' be xixre'du ca' lau Dios dxelawe' belá' chee béadu ca'. 14 Cá'anqueze ba nun Xránadxu chee

benne' dxuluchalaje' dizra' chawe', xelezí'ē ba neza zrin da dxelunē'. ¹⁵ Cabata' guchíneda' netú da caní zaj naca na chia', ne quebe dxuzúaja' da nigá cheē gúnnale neda' late'. Gaca lázredxa' gatia' quézcala nu gucuasa da ba neza da napa'.

¹⁶ Quebe dxal-la' gucá'ana szren cuina' lawe' da dxuzenda' bēneache dizra' chawe' cheē Cristo, lawe' da dxun na ba xen guna' na. Baxache' naca' che quebe guzenda' bēneache dizra' chawe' nigá. ¹⁷ Cheē lē na', che dxuna' na lawe' da naca na da dxaca lazra' guna', ba dē lazruj chia'. Na'a, che dxuna' na xadíaze, naca na tu da nusebaga Dios neda'. ¹⁸ Ca' naca na, lazruj da dxezi'a naca na da ba neza napa' gate dxuzenda' bēneache dizra' chawe' cheē Cristo, ne quebe bi dxuchízruja' benne' ca'. Ca' naca na, quebe dxuchíneda' da naca na chia' lawe' da dxuna' zrin nigá.

¹⁹ Lácala quebe naca' benne' nada'u cheē nu benne', ba nun cuina' ca tu benne' nada'u cheē xúgutē bēneache, cheē séqueda' cu'a benne' zandxa lu na' Cristo. ²⁰ Gate zua' ládujla benne' judío ca', dxun cuina' benne' judío cheē cu'a lē' lu na' Cristo. Ca' naca na, ládujla benne' zaj xu'ē lu na' da nadxixruj bea na dxun cuina' ca tu benne' xu'ē lu na' da nadxixruj bea na, cheē cu'a lē' lu na' Cristo lácala da li quebe xu'a lu na' da nadxixruj bea na na'. ²¹ Xetú na'a, cheē séqueda' cu'a lu na' Cristo benne' ca' quebe zaj xu'ē lu na' da bdxixruj be'e Moisés, dxun cuina' ca tu benne' quebe xu'ē lu na' da nadxixruj bea na na', lácala da li xu'a lu na' da nadxixruj bea na cheē Dios lawe' da xu'a lu na' da nadxixruj bea na cheē Cristo. ²² Gate zua' ládujla benne' ca' quebe zaj zē chache' lu xel-la dxeajlí lazre' cheē' dxun cuina' ca zaj naca benne' ca' cheē séqueda' cu'a lē' lu na' Cristo. Ca' naca na, dxun cuina' ca naca tu tu benne' ca' cheē ájatezla séqueda' cu'a bal-la benne' ca' lu na' Cristo. ²³ Dxuna' xúgutē da nigá nē cheē dizra' chawe' cheē Cristo cheē gapa' tu da ba neza cheē na.

²⁴ Ba nézquezle le'e tu lu da huitaj benne' zan dxesí'aca chégüē' na' tuze' dxezrué'ene' lataj blau. Le sa'aca chegu le'e cheē zrué'ele da dxunna Cristo. ²⁵ Xúgutē benne' ca' dxulupá'a cuine' cheē xelu'ē da huitaj, dxuluzúē' chalá'ala xúgutē da dxun na calēla cheē'. Benne' caní dxelunē' da caní cheē xelezí' lu nē'ē tu da guzúē' xíchaje' da naca na laga' da québequeze si bea, san dxi'u dxundxu zrin cheē zrué'edxu da zeajlí canna. ²⁶ Neda' quebe dxezá chégua' ájatezla, ne quebe dxedil-la' ca tu benne' dxu'ē lu be'ze gate dxedil-lē'. ²⁷ Neda' dxudéa' xel-la zi' bēla' dxen chia', ne dxenná be'eda' na, cheē quebe gunitia' neda' da naca chia' lu zrin nigá, ca te na' ba bsédeda' benne' xula ca'.

10

Da dxuzéajni'i na dxi'u ca naca chee bedáu' xiaj xaga ca'

¹ Dxaca lazra' nézele, bi bícha'dau', ca guca chee xra xrtáudxu ca' xjácáleñe' Moisés. Dios guché'e xúgute benne' ca' ne chee beuj bza na', na' xúgute' guledé'e' ládujla nísadau' da nazí le na Xrna. ² Ca' naca na, waca nnadxu xúgute' beledxúe' nisa lu nísadau' na', ne gulaque' tuze nen Moisés gate guledáleñe' beuj bza na'. ³ Cá'anqueze xúgute' gulawe' tuze xel-la wagu da bnezruij Dios le', ⁴ ne gule'aj xúgute' tuze nisa da bnezruij Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajleñe' benne' ca' le'e xixre' lawe' lataj na'. ⁵ Benne' zan benne' ca' quebe belune' da bezaca ba lazre' Dios, na' chee le na' gulatié' le'e xixre' lawe' lataj.

⁶ Xúgute da caní guca na chee guzéajni'i na dxi'u chee quebe sa lázredxu da caléla ca', ca belún benne' ca'. ⁷ Chee le na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawe' lau bedáu' xiaj xaga, na' belexase' chee buluxé'e. ⁸ Quebe dxal-la' gundxu da sban ca belún bal-la benne' ca', na' tu zraze gulate chupa gaxúa chi dxua gaxue'. ⁹ Quebe dxal-la' guchínedxu xel-la zren lazre' chee Xránadxu chee gundxu da caléla ca belún bal-la benne' ca', na' gulatié', gate gulí'ina belá' le'. ¹⁰ Quebe nnele chee Dios ca gulenné bal-la benne' ca', na' gubáz chee xabáa chee xel-la gute bété' benne' ca'.

¹¹ Xúgute da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. ¹² Ca' naca na, nu benne' dxéqueñe' ze chache' lu da naca chee Dios dxal-la' guxúe xanne' cuine' chee quebe cheajházié'. ¹³ Da dxelún zréaje le'e naca na tuze ca da dxelún zréaje xúgute bénneache, na' waca guxrén lázrele Dios lawe' da quebe gu'e lataj bi gun zréaje le'e da quebe séquele guchaga laule, na' gate gaca tu da gun zréaje na le'e, Dios gunne' le'e ájala gunle chee lale lu da na', chee séquele guchaga laule na.

¹⁴ Chee le na', bi bicha' nazri'ite lazra', québedxa gucá'ana szrenle bedáu' xiaj xaga ca'. ¹⁵ Dxuchálajleña' le'e ca dxuchálajleña' benne' dxeléajni'ine', na' lé'eqeze waca guchí'ale chee da dxapa' le'e. ¹⁶ Gate dxágadxu da dxucube na ca guca gate gute Xránadxu, dxápadxu ba lá'ana Dios. Gate dxí'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gulalaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza belá' dxen chee Cristo da bdeé' waláz cheedxu le'e xaga béguaj. ¹⁷ Lácala

naxandxu, xúguteḁdxu dxágudxu tu xeta xtílaqueze da naca na tuze, da na' dxulé'e na nácadxu ca tuze beḁa' dxen chee Cristo.

¹⁸ Le nna'xque ca zaj naca benne' Israel ca'. Benne' caní, benne' dxelawe' da dxuluzré'e lu cugu chee Dios dxelezi'e ba neza lu cugu na'. ¹⁹ Quebe dxennía' naca tu bedáu' xiaj xaga tu da zaca, na' beḁa' da dxuluzría bénneache lau bedáu' xiaj xaga quebe zácadxa ca bíteteze xetú beḁa'. ²⁰ Dxennía' da dxuluzría lau bedáu' xiaj xaga benne' ca' quebe zaj núnbe'e Dios, dxuluzríe' na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. ²¹ Quebe gaca xí'ajle da na' dxulé'e na nácale Xránadxu tuze, ne xí'ajtele da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. ²² ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

Da naca cheeḁdxu gundxu, ne ca naca xel-la zri'i lazre'

²³ Da li naca da na' dxelenná bénneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca chee nu benne' gune' ca dxaca lazre' san quegá xúgute gusegula na le' lu xel-la dxeajlí lazre' chee'. ²⁴ Dxa-la' gundxu da gaca chawe' chee benne' xula, ne quegá da gaca na chawe' cheeḁdxu.

²⁵ Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stebe xichaj lázrdaule, ²⁶ lawe' da zaj naca chee Xránadxu xezr la xu nigá, ne xúgute da ca' zaj zra' lu xezr la xu.

²⁷ Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute da guzríe' laule, ne quebe naba xúzrele chee na chee quebe sua stebe xichaj lázrdaule. ²⁸ Che nna nu benne' zúale le'e, na' xe'e le'e: “Beḁa' nigá bache guzría na lau bedáu' xiaj xaga”, quebe gágule na, chee quebe guzúale stebe bénnea' gunné' ca', ne chee quebe sua stebe xichaj lázrdaule. ²⁹ Dxennía' da nigá chee xichaj lázrdau benne' zúaleḁe' lue', ne quegá chee xichaj lázrdau' lué'queze.

Waca naba xuzre tu benne': “¿Bizr chee na' dxuchi'u da naca chia' lawe' da sua stebe xichaj lázrdau benne' xula? ³⁰ Che dxapa' Dios: Xcalenu' chee da dxawa', ¿bizr chee na' xelezí tizre' neda' chee da dxawa'?” ³¹ Chee le' na', che dxágule u dxí'ajle, u bíteteze da dxunle, le gun xúgute chee gaca ba Dios. ³² Quebe bi gunle da guzúa na stebe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios. ³³ Neda' dxuna' ba xuzre guna' da xelezaca ba lazre' xúgute bénneache ca naca xúgute da dxuna'.

Quebe dxuna' da gaca chawe' chee_za' san da gaca chawe' chee_zezícadxa bénneache chee_z xelexé'.

11

¹ Le gun ca dxuna' neda', ca neda' dxúnqueza' ca ben Cristo.

Da dxelún nu'ula naga zaj nazraga bi chee Cristo

² Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e. ³ Na'a dxaca lazra' chéajni'ile naca Cristo xíchaję chee tu tu benne' biu, na' benne' biu naque' xíchaję chee zru'ule', ca naca Dios, naque' xíchaję chee Cristo. ⁴ Che tu benne' biu gugácuę' xíchaję' gate dxuchálajłęne' Dios naga zaj nadupa bi chee Cristo, u gate dxuchálaję' waláz chee Dios, naca na tu xel-la stu' chee Bénnea' naque' xíchaję'. ⁵ Che tu nu'ula quebe gugácuę' xíchaję' gate dxuchálajłęne' Dios, u gate dxuchálaję' waláz chee Dios, naca na tu xel-la stu' chee', lawe' da dxun cuine' ca tu benne' biu. Lébezqueze naca na chugue' xíchaję'. ⁶ Che tu nu'ula quebe gugacu xíchaję', nácadxa xrlátaję chugue' tu chi'ize ca naca xicha xíchaję'. Na' che naca na tu xel-la stu' chee nu'ula che chugue' xíchaję', u che guzúę' zrígaze xíchaję' ca dxun tu benne' biu, dxal-la' gugacu xíchaję' naga zaj nazraga bi chee Cristo. ⁷ Benne' biu quebe dxal-la' gugacu xíchaję' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. ⁸ Gate ben Dios benne' biu, quebe bi guléaję' le' lu bęla' dxen chee nu'ula, san guléaję' lu bęla' dxen chee benne' biu da na' bexune' nu'ula na'. ⁹ Dios bene' nu'ula na' chee nna be'e benne' biu le', ne quegá bene' benne' biu chee nna be'e nu'ula le'. ¹⁰ Chee le' na' nu'ula dxal-la' guzúę' xíchaję' tu da dxulé'e na zua nu dxenná be'e le' chee quebe gun zréajęne' gubáz chee xabáa ca' chee Dios. ¹¹ Lu da nácadxu chee Cristo, benne' biu dxechinne' nu'ula, ne cá'anqueze dxechín nu'ula benne' biu. ¹² Da li Dios guléaję' nu'ula na' lu bęla' dxen chee benne' biu, na' cá'anqueze benne' biu dxálaję' chee nu'ula, na' xúgutedxu zadxu lu na' Dios.

¹³ Le nna'xque le'e che naca xrlátaję che tu nu'ula guchálajłęne' Dios, ne quebe gugacu xíchaję'. ¹⁴ Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaję', ¹⁵ na' naca tu da ba lá'ana chee nu'ula se na tunna, lawe' da nunna Dios le' xicha xíchaję' tunna chee gugacu na xíchaję'. ¹⁶ Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

Da dxelún benne', gate dxelawe' da naca chee Xránadxu

17 Ca naca chee da nigá quebe dxapa' le'e ba lá'ana lawe' da dxaca da calēla chee gate nazrágale, ne quegá da chawe'. 18 Da nédxuteca, dxulé'e neda' gate dxezrágale chee güe lá'anale Dios nácale chupa la'a. Dxéqueda' naca da li da dxelenné'. 19 Dxál-la'queze gácale chupa la'a chee gulé'e lawe' nu benne' ládujla le'e da li naque' bi chee Cristo. 20 Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. 21 Gate dxezrín zra dxágule, tu tule le'e dxebía lau chee dxecá'ale xel-la wagu cha chee, na' bál-lale le'e dxegá'anale dxedunle, na' xezícadxale dxezúzele. 22 ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¡Cabata'!

Da dxágudxu da naca chee Xránadxu
(Mt. 26.26-29; Mr. 14.22-25; Lc. 22.14-20)

23 XránaquezdXu bzéajni'ine' neda' da nigá bsédeda' le'e: Lu zre' ná'queze gate Judas bdee' Xránadxu Jesús lu na' benne' guledábague' Le', na' Jesús guqué'e xeta xtila, 24 na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bel-la' dxen chia' lu da na' saca zi'a waláz chee. Le gun da nigá chee cheajsá lázzele neda'." 25 Cá'anqueze, gudé gulawe', guqué'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezría cube da naca na dxen chia'. Tu tu lasa xí'ajle na, le gun na chee cheajsá lázzele neda'." 26 Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xí'ajle xrisa uva nigá.

Ca dxal-la' gágudxu da naca chee Xránadxu

27 Ca' naca na, núteteze benne' gawe' xeta xtila nigá, u xí'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzúa belá' dxen chee Xránadxu chalá'ala. 28 Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xí'ajdxu xrisa uva nigá, 29 lawe' da che xi'aj gágudxu, ne quebe dxéquedxu dxulé'e na ca naca belá' dxen chee Xránadxu, na' da xi'aj gágudxu gun na bágadxu zria. 30 Chee le na' benne' zan ládujla le'e quebe chawe' zaj zué', ne zaj nate ni'a ne'e, na' bal-la benne' ládujla le'e ba gulatíe'. 31 Che guxúe xanne' cuínadxu, quebe gun na ba xen guchi'a Xránadxu cheedxu caní. 32 Gate Xránadxu dxuchi'e cheedxu, dxudé'e dxi'u xel-la zi' chee quebe cuía xidxu nen benne' zaj zre'e xezr la xu nigá.

33 Ca' naca na, bi bicha'. Gate dxezrágale chee gágule da naca chee Xránadxu, le cueza ljuézzele tule xetule chee bi gágule.

34 Che núlale dxedunle, le gagu lu xu'u lízrquezle, chee quebe gun na ba xen guzría xi' Dios le'e gate na' nazrágale. Xezícadxa da ca' dxelaca chee le gucá'ana' chawe' gate xida' xedajnná'a le'e.

12

Xel-la waca ca' da dxunna Be' Lá'azxa tu tudxu dxi'u

¹ Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

² Ba nézquezle gate na' quebe ne chéajlele chee Xránadxu, be'e le lataj gulezrube xue' le'e chee xeajé lá'anale bedáu' xiaj xaga ca', da quebe dxelenné na. ³ Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

⁴ Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

⁵ Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

⁶ Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

⁷ Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutēdxu.

⁸ Ne chee Be' Lá'azxa dxunne' bal-la benne' xel-la waca xuluchálaje' dute xel-la sina, na' xebal-le' ne chee Be' ná'queze dxunne' le' xel-la waca xuluchálaje' dute xel-la naxéajni'i.

⁹ Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexunē' benne' we' ca'.

¹⁰ Xebal-le' dxelezi'e xel-la waca xelunē' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézene' nu be' dxuchalaj na lu dxu'a bénneache.

Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze', na' xebal-le' dxelezi'e xel-la waca xuluxuzájle'e dizra' nazrá' na'.

¹¹ Xúgutē da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

Xúgutēdxu nuchágadxu tuze bēla' dxen

¹² Zua cheedxu tu bēla' dxen da napa na zánete cue'. Dxi'u, dxéajlēdxu chee Cristo, nácadxu ca tuze bēla' dxen chee Cristo.

¹³ Xúguteḁdxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze bela' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

¹⁴ Tu bela' dxen quebe naca na tu cue'ze, san naca na zane' cue'. ¹⁵ Che ní'adxu nna na: Quebe naca' na'u, ne chee le na' quebe naca' chee bela' dxen chiu', quegá da ni gun na québedxa naca na chee bela' dxen na'. ¹⁶ Na' che nágadxu nna na: Quebe naca' lau', ne chee le na' quebe naca' chee bela' dxen chiu', quegá da ni gun na québedxa naca na chee bela' dxen na'. ¹⁷ Che dute bela' dxen cheedxu naca na laudxu, ¿ájazra gundxu xendxu? Che dute bela' dxen cheedxu naca na nágadxu, ¿ájazra gundxu lé'edxu? ¹⁸ Dios nuzúe' cha chee cue' bela' dxen na' naga dxaca lazre' Le'. ¹⁹ Che dute na' naca na tuze cue', ¿gazra zúaqueze bela' dxen na'? ²⁰ Ca naca na, lácala naca na zane' cue', tuze bela' dxen naca na.

²¹ Xia laudxu quebe dxal-la' xe na nadxu: Quebe nachinda' lue', ne quebe dxal-la' nna xíchajdxu, xe na ní'adxu: Quebe nachinda' le'e. ²² Da naca na, da zaj naca chee bela' dxen cheedxu da dxéquedxu quebe zaj nácateca na blau, zaj naca na da dxechínedxadxu, ²³ Da zaj naca na chee bela' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquedxadxu quebe dxal-la' gulé'edxu zaj naca na da dxucáchedxu, ²⁴ da quebe dxun na ba xen gundxu chee da ca' gaca gulé'edxu. Ca' naca na, Dios bene' bela' dxen cheedxu chee gápadxadxu ba lá'ana da ca' dxéquedxu quebe nácateca na da gápadxu ba lá'ana, ²⁵ chee quebe gaca chupa la'a bela' dxen cheedxu. Tu tu cue' chee bela' dxen cue' na gunne xue chee ljwezre na. ²⁶ Che dxedé xel-la zi' tu da naca na chee bela' dxen cheedxu, xúgute da ca' dxeledé na xel-la zi', na' che tu da na' gaca da ba neza chee na, na' xúgute da ca' dxelebé na tu zren.

²⁷ Ca' naca na, le'e nácale bela' dxen chee Cristo, na' tu tule nácale ca tu tu cue' chee bela' dxen chee' na'. ²⁸ Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédenē' bi chee' ca', na' gudé na' nuzré'e benne' dxelune' xel-la waca da za xabáa. Gudé na' nuzré'e benne' ca' dxelexune' benne' we' ca', ne benne' ca' dxelácalēne' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézene'. ²⁹ ¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxulusede xúgute' bi chee' ca'? ¿Dxelún

xúgute' xel-la waca chee xabáa? ³⁰ ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluxuzájla'a xúgute' dizra' nazrá' na'? ¡Cabí! ³¹ Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

13

Xel-la zri'i lazre' li

¹ Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. ² Che dxuchálaja' waláz chee Dios, ne che nezda' xúgute' da zaj nagache, ne dxéajni'ida' xúgute' da dxelaca, ne napa' xel-la dxeajlí lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. ³ Che quísia' xúgute' da de' chia', ne che guzúa' bēla' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

⁴ Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzé'cu'e.

⁵ Quebe dxune' da calela,

ne quebe naque' zre'e lazre'.

Quebe dxezre'e, ne quebe dxu'u lazre'.

⁶ Quebe dxebene' gate nu benne' dxeajcházie' lu dul-la, san dxebene' lu da li.

⁷ Dxuchaga lawe' xúgute' da dxaca nen duté xel-la dxeajlí lazre' chee',

ne duté xel-la dxebeza lazre' chee',

ne duté xel-la zren lazre' chee'.

⁸ Xel-la zri'i lazre' li quebe te chee na. Wazrín zra gate québedxa chínedxu nu benne' guchálajlene' dxi'u waláz chee Dios, ne benne' dxéajni'ine' xúgute'. ⁹ Na'a dxéajni'idxu látédauze, ne látédauze dxuchálajdxu waláz chee Dios. ¹⁰ Zrin zra gate na' chéajni'idxu duté ca naca, na' te chee da na' naca na látédauze.

¹¹ Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'. ¹² Cá'anqueze na'a quebe dxelé'edxu cátequeze, ne da dxelé'edxu ze' zrul-la, san lu zra na' lé'edxu cátequeze. Na'a látédauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'. ¹³ Ca' naca na, xel-la dxeajlí lazre', ne xel-la dxebeza lazre', ne xel-la zri'i lazre' li xelezúaqueze na chadía chacanna, san da blaudxa chee da caní naca na xel-la zri'i lazre' li.

14

Ca naca chee nu benne' dxuchálaje' dizra' nazrá' da quebe naca na xrtizre'

¹ Le gun ba xuzre gápale xel-la zri'i lazre' li, ne cá'anqueze le naba Dios gunne' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. ² Bénnea' dxuchálaje' dizra' nazrá' da quebe naca na xrtizre' dxuchálajlene' Dios, quegá nen bénneache, lawe' da quegá nu dxéajni'i da dxenné'. Dxuchálaje' ne chee Be' Lá'azxa da zaj nagache. ³ Bénnea' dxuchálaje' waláz chee Dios dxuchálajlene' bénneache chee gusegule' benne' ca' lu da naca chee Dios, ne chee ne xúene'-be', ne chee xue zrene'-be'. ⁴ Bénnea' dxuchálaje' dizra' nazrá' na' dxusegula cuine', san bénnea' dxuchálaje' waláz chee Dios dxusegule' bi ca' chee Cristo lu da naca chee Dios.

⁵ Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'e dizra' nazrá' na' chee xelegula bi chee Cristo lu da naca chee Dios. ⁶ Chee le na', bi bícha'dau', che xida' xedajnná'a le'e, ne guchálajlena' le'e dizra' nazrá', ¿bizra da ba neza gaca na chee che quebe guchálajlena' le'e tu da ba ble'e Dios neda', u tu da bzéajni'ine' neda', u tu da guchálaja' waláz chee Dios, u tu da guzéajni'ida' le'e?

⁷ Nná'xquedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na. ⁸ Gate dxaca wedil-la, che quebe dxebezre luzu da dxulucuezre' cátęqueze, quebe nu se lu wedil-la. ⁹ Cá'anqueze dxaca chee le'e. Che quebe guchálaja' dizra' da dxéajni'ile, ¿ájazra gaca nézele da dxennía'? Guchálaja' lu be'. ¹⁰ Da zantę dizra' nazrá' zaj de lu xezr la xu nigá, ne da li xúgute na zaj zéaje na. ¹¹ Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bénnea', na' le' gaque' ca tu benne' zitu' lawa' neda'. ¹² Chee le na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

¹³ Ca' naca na, bénnea' dxuchálaje' dizra' nazrá' dxal-la' naba lau Dios gunne' le' xel-la waca xuzájle'e dizra' nazrá' na'. ¹⁴ Che guchálajlena' Dios tu dizra' nazrá'la, da li dxuchálajlena' Le' lu be' nácaqueza', san quebe bi da ba neza naca na chee

xel-la dxéajni'i chia'. ¹⁵ ¿Bizra da dxal-la' guna' xca'? Dخال-la' guchálajlëna' Dios lu be' nácaqueza', ne cá'anqueze nen xel-la dxéajni'i chia'. Dخال-la' gul-la' chee Dios lu be' nácaqueza', ne cá'anqueze nen xel-la dxéajni'i chia'. ¹⁶ Che dxue la'anú' Dios tuze lu be' nácaquezu', na' benne' ljwezru' dxenne' chiu' quebe gaca gunë' tu zren lue' gate dxu'u Dios: Xcalenu', lawe' da quebe dxéajni'ine' da dxennáu'. ¹⁷ Da dxuchálajlënu' Dios nácale'e na chawe', san bënnea' dxenne' quebe dxegule' lu da naca chee Dios. ¹⁸ Dxapa' Dios: Xcalëne' lawe' da dxuchálajdxa' dizra' nazrá' ca xúgutele le'e, ¹⁹ san naga zaj nazraga bi chee Cristo dxaca lázredxa' guchálaja' gázxuze dizra' da xeléajni'ibe' chee gusédeda'-be', quézcala guchálaja' chi mila dizra' nazrá' da quebe gaca xeléajni'ibe'.

²⁰ Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da calela, san le gaca benne' wal-la chee gulaba lázrele cháwe'dau'. ²¹ Naxúaj lu xiche lá'azxa chee da dxenná bea Dios, da dxenná na: Guchálajlëna' benne' xëzr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná Xránadxu. ²² Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajle'e chee Dios, ne quegá lau benne' dxeléajle'e chee'. ²³ Na'a, gate nazrágale, che xúgutele dxuchálajle dizra' nazrá', na' che xelexú'u benne' quebe zaj nazédenë', u benne' quebe dxeléajle'e chee Dios, ¿quebe xelenné' zaj nadá xichaj lázrdaule? ²⁴ Na'a che dxuchalaj xúgutele waláz chee Dios, na' che chu'u tu benne' quebe dxéajle'e chee Dios, u tu benne' quebe nazédenë', na' guéquene' nabague' dul-la, na' léqueze' guchi'a cuine' gate xenne' da dxennale xúgutele. ²⁵ Ca' gaca na, da zaj nagache xichaj lázrdawe' xululé'e lau na, na' guzúa zribe', ne güe lá'angé' Dios, na' nne' da li zúale Dios le'e.

²⁶ Ca' naca na, bi bícha'dau', gate dxezrágale, bál-lale le'e nápale salmo ca', ne xebál-lale nápale da gusédele ljwézrele, ne xebál-lale nápale tu da ble'e Dios le'e, ne xebál-lale nápale tu dizra' nazrá' da guchálajle, ne xebál-lale nápale xel-la waca xuzájla'ale dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee Cristo lu da naca chee Dios. ²⁷ Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'e da dxennale. ²⁸ Na'a che quebe nu chilá' benne' xuzájle'e dizra' nazrá' na', gácadxa chawe' quebe bi da nne' naga nazrágale. Tu tule dxal-la' nnale lé'equezle, ne nen Dios. ²⁹ Cá'anqueze benne' dxuluchálaje' waláz chee Dios waca xelenné' chupa chúnnaze', na' xezícadxale dxal-la' guchí'ale da na' dxenné'. ³⁰ Che dxulé'e Dios xetú benne'

dxē'e na' tu dizra', na' bēnnea' dxuchálajē' dxal-la' gusanē' ca da dxuchálajē'. ³¹ Xúgutele le'e waca guchálajle waláz chee Dios tuwéaj tuwéajle chee chéajni'i xúgutele, ne sile da gun chacha na le'e. ³² Benne' ca' dxuluchálajē' waláz chee Dios dxun na ba xen nna bé'ene' be' nácaqueze', ³³ lawe' da naca Dios Bēnnea' dxunne' dxi'u xel-la dxebeza zri lazre', ne quebe dxun zrējajē' bēnneache.

Ca zaj xu'u lau xúgute cue' bi bíchedxu, bi chee Dios, ³⁴ dxal-la' xelezúa zrise nu'ula ca' naga nazrágale, lawe' da quebe naca chee' xuluchálajē'. Dخال-la' xuluzúē' dizra' ca naxúaj na lu da nadxixruj bea Dios. ³⁵ Che dxelaca lazre' bi xeléajni'ine', dxal-la' xuluchebe' benne' cha chee' lizre tu tue' lawe' da quebe dxulé'e na chawe' tu nu'ula guchálajē' naga nazrágale.

³⁶ Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazí' lu na'le na. ³⁷ Che nu benne' dxéquene' naque' benne' dxuchálajē' waláz chee Dios, u zúale Be' Lá'azxa le', dxal-la' gueque bé'ene' da nigá dxuzúaja' chee le naca na tu da gunná be'e Xránadxu. ³⁸ Che quebe dxaca lazre' gueque bé'ene' da nigá, quebe dxal-la' si' lu na'le bēnnea'.

³⁹ Ca' naca na, bi bícha'dau', le gun ba xuzre guchálajle waláz chee Dios, ne quebe guzágale bēnnea' dxuchálajē' dizra' nazrá'la. ⁴⁰ Xúgute da caní dxal-la' gunle dute ba lá'ana, ne ca dxal-la' gaca na.

15

Ca bebán Cristo ládujla benne' gate

¹ Na'a, bi bícha'dau', dxuzenda' le'e dizra' chawe' da ba bzenda' le'e, da na' guzí' lu na'le, ne da da'le le'e. ² Ne chee dizra' chawe' nigá nalale che dxéajle chee da bzenda' le'e, ne che quebe guca dácheze xel-la dxeajlí lazre' chee le.

³ Da naca blaudxa, bzéajni'ida' le'e da guzí' lu na'a, gute Cristo ne chee dul-la da nabágadxu ca naxúaj na lu dizra' lá'azxa, ⁴ na' bulucache' Le', na' bebane' zra guxunne' zra ca naxúajqueze na lu dizra' lá'azxa, ⁵ na' ble'e lawe' lau Pedro, na' gudé na' ble'e lawe' lau benne' gubáz chee' ca'. ⁶ Gudé na' ble'e lawe' lau bi bíchedxu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bane', láqueze benne' zan, benne' ca' ba gulatiē'. ⁷ Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

⁸ Bzébedxa, ca gudé chee xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudé beu' cheebe'. ⁹ Neda' naca' benne' bzébedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios. ¹⁰ Naca' da

naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. ¹¹ Quebe zácadxa na che naca neda', u che naca benne' ca', da nigá naca na dizra' bzénentu' bénneache, ne naca na da guxéajlele.

Ca xelexebán benne' gate

¹² Che da dxuzéentu' bénneache dxenná na bebán Cristo ládujla benne' gate, ¿ájazra naca na bál-lale le'e dxennale quebe xelexebán benne' gate? ¹³ Che quebe xelexebán benne' gate, Crístoqueze quebe bebane' ládujla benne' gate, ¹⁴ na' che quebe bebán Cristo ládujla benne' gate, dácheze naca da dxuzéentu' bénneache, ne dácheze naca da dxeajlí lázrele chee' Cristo. ¹⁵ Che caní naca na dxexechéentu' chee' Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. ¹⁶ Che quebe xelexebán benne' gate, Crístoqueze quebe bebane', ¹⁷ na' che quebe bebán Cristo, dácheze naca da dxeajlí lázrele chee', na' ne nabágale dul-la. ¹⁸ Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'. ¹⁹ Che da dxebeza lázrentu' da naca chee' Cristo naca na cheeze xezr la xu nigá, nácadxu baxáchedxa ca xúgute bénneache.

²⁰ Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. ²¹ Ca guca, bla' xel-la gute lu xezr la xu nigá ne chee' tuze benne', cá'anqueze ne chee' tuze benne' bla' xel-la dxexebán chee' benne' gate. ²² Ca naca dxelate xúgute bénneache lawe' da zaj naque' tuze nen Adán, cá'anqueze xúgute benne' zaj naca tuze nen Cristo xelape' xel-la nabán li lazre'. ²³ Xelexebán tu tue' gate xelexexale', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'. ²⁴ Nadxa cheajsé chee' xezr la xu nigá gate guzría xi' Cristo xúgute da dxelenná bea, ne xúgute da dxelixruj bea na, ne xúgute da zaj napa xel-la waca, na' gudé' xel-la dxenná bea chee' lu na' Xradxu Dios. ²⁵ Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', ²⁶ na' da bzébedxa da cuía xi' naca na xel-la gute. ²⁷ Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bénnea' bzue' xúgute zran ni'a Cristo. ²⁸ Gate ba zua xúgute lu na' Cristo, nadxa Crístoqueze, Bénnea' naque' Zrí'inequeze Dios guzúa cuine' lu na' Dios, Bénnea' bdee' xúgute lu na' Le'. Ca naca na, Dios gaque' blau lawe' xúgute da de.

29 Xetú da dxaca, zaj zua benne' dxeledxúe' nisa waláz chee benne' zaj nate. ¿Bizr chee na' dxelune' caní che quebe xelexebán benne' gate? ¿Bizr chee na' dxeledxúe' nisa waláz chee benne' gate?

30 Cá'anqueze, ¿bizr chee na' zúatequezdXu dxi'u lu da stebe? 31 Xúgute zra zua' lu da stebe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee lu da nácadxu nen Xránadxu Jesucristo. 32 Che ca tu bènneacheze gudíl-laleña' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bènneache, dxelenné': "Xi'aj gágudxu lawe' da wxre gátedxu."

33 Quebe güele lataj nu si xe le'e. Naca cáteze dxenná na: Che gácadxu tuze benne' ca' dxelune' da calela, tu zrénqueze gundxu da calela.

34 Le guxúe xanne' cuínale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

35 Guchebe nu benne' neda': Ájazra xelexebán benne' gate? ¿Ájazra gaca belá' dxen chee'? 36 Da nigá naca na tu da xálaze, lawe' da gate dxázadxu tu binne, dxun na ba xen cuía xi' binnedu na' chee gaca na tu xágadau'. 37 Da na' dxázadxu quebe naca na da xelá', san tu binnedauze naca na, che naca na zrua' xtila u xetú binnedau'. 38 Te na' gun Dios chee binnedu na' tu xágadau' cáteze dxaca lázrequeze', na' chee tu tu binnedau' dxune' tu tu xágadau' cáteze zaj naca binnedu ca'. 39 Quegá xúgute belá' dxen tuz ca zaj naca na. Tuze ca naca belá' dxen chee bènneache, ne xetuze ca naca belá' dxen chee be xixre' ca', na' xetuze ca naca belá' dxen chee bxinnedu ca', ne xetuze belá' dxen chee bela ca'. 40 Cá'anqueze zaj naca belá' dxen chee xabáa, ne belá' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu. 41 Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' ládujla belaj ca', xel-la naxaní' chee tu belaj nazrá' ca xel-la naxaní' chee xetú belaj. 42 Cá'anqueze dxaca chee benne' ca' xelexebane' ládujla benne' gate. Dxucáchedxu lu ba tu da guzru', na' xebán tu da québedxa gate. 43 Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lale'e. 44 Dxucáchedxu tu belá' dxen chee beniácheze, na' xebán tu belá' dxen da naca na chee be' nácaquezdXu. Che zua tu belá' dxen da naca na bènneacheze, cá'anqueze zua tu belá' dxen da naca na chee be' nácaquezdXu.

⁴⁵ Cá'anqueze caní naxúaj lu dizra' lá'azxa da dxenná na: Benne' nedxu Adán guque' bēnneache ban, na' Adán, benne' bzebe, naque' Be' da dxunna xel-la nabán. ⁴⁶ Bēnnea' naque' Be' quebe blē'ē nedxu, san bēnnea' naque' bēnneacheze. Gudé na' bla' Bēnnea' naque' Be'. ⁴⁷ Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. ⁴⁸ Bēla' dxen ca' chee xezr la xu nigá zaj naca na ca guca bēnnea' guque' xu bxrte, na' bēla' dxen ca' da zaj naca na chee xabáa zaj naca na ca Bēnnea' naque' chee xabáa. ⁴⁹ Ca naca, nácadxu ca bēnnea' guque' xu bxrte, cá'anqueze gácadxu ca Bēnnea' naque' chee xabáa.

⁵⁰ Dxaca lazra' xapa' le'e, bi bícha'dau', bēla' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chadía chacanna. ⁵¹ Dxapa' le'e tu da nagache nédxute: Quegá xúgutēdxu gátēdxu, san xúgutēdxu sidxu tu bēla' dxen cube. ⁵² Chaditē gaca na, ca dxun benne' guchudie' xexrate lawe', gate xendxu chi'i luzu da dxulucuezre' da bzebe. Cuézrequeze luzu da dxulucuezre', na' xelexebán benne' gate naga cabátadxa xelatie', na' dxi'u sidxu tu bēla' dxen cube. ⁵³ Bēla' dxen cheedxu da guzru dxal-la' xexaca na tu da québedxa guzru, na' bēla' dxen cheedxu da gate dxal-la' xexaca na tu bēla' dxen da québedxa gate. ⁵⁴ Gate bēla' dxen cheedxu da guzru ba bexaca na da québedxa guzru, ne bēla' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

⁵⁵ Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

⁵⁶ Da dxunna xel-la gute xel-la waca chee gun na dxi'u we' naca na dul-la, na' da nadxiruj bea da gula na' naca na da dxunna na dul-la xel-la waca chee gudé na dxi'u lu xel-la gute. ⁵⁷ Na'a, xcalén Dios, Bēnnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

⁵⁸ Chee le na', bi bícha' nazri'ite lazra', le se chacha, ne le súateze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

16

Dumí da gutúpale chee gácalele bíchedxu ca'

¹ Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgutē cue' bi chee Cristo zaj zra' xezre ca' zaj nababa Galacia. ² Tu tu zra nedxu chee da gazre

zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'.
 3 Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. 4 Che gata' lataj cha'a, na' sá'acalequeze' neda'.

Da dxugú'u bea Pablo guné'

5 Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'. 6 Wegá'analja' nen le'e tu chi'i, u che ba guca, na' sua' nen le'e dutē beu' zaga ca', na' le'e waca gácalēle neda' lu neza chia' naga dxal-la' cha'a. 7 Quebe dxaca lazra' xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. 8 Na'a xegá'ana' lu xezre Efeso nigá ca zrin zra Pentecostés, 9 lawe' da napa' lataj guna' tu zrin zren chee Xránadxu da gulé'etē lawe na, lácala naxán benne' ca' dxeledábague'.

10 Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'. 11 Chee le' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

12 Ca naca chee bíchedxu Apolos, guta' xúlele'eda' le' chee chéajleñe' bi bíchedxu ca' xedajlenné'e le'e, san quebe guca lazre' se'e na'a. Wide' gate gape' lataj.

Dxulugapa ljwezre' diuzre

13 Le sua ban lazre'. Le se chacha lu xel-la dxeajlí lazre' chee. Le se ca ze benne' biu. Le gaca benne' wal-la. 14 Dute xel-la zri'i lazre' le gun xúgute da dxunle.

15 Na'a, bi bícha'dau', ba nézquezle gulaca xrtía Estéfnas benne' nedxu naga nababa Acaya gulezí' lu ne'e dizra' chawe' chee Cristo, na' buluzúa cuine' chee xelácalēñe' bi bíchedxu ca', bi chee Cristo. 16 Dxaca lazra' guzúa cuínale lu na' benne' caní, ne lu na' xúgute benne' dxelácale ljwézredxu, ne dxelún zrin chee Cristo. 17 Zua' xel-la dxebé lawe' da belelá' Estéfnas, ne Fortunato, ne Acaico, lawe' da belune' chia' da quebe guzéquele gunle le'e lawe' da zrale zitu'. 18 Belún chúchue' be' nácaqueza', ne be' nácaquezle le'e. Dxun na ba xen si' lu na'le benne' caní.

19 Xúgute cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugapale'e le'e diuzre lu La Xránadxu. 20 Xúgute bíchedxu nigá dxulugape' le'e diuzre. Le gugapa diuzre ljwézrele tule xetule, ne le gunida ljwézrele.

21 Neda', Pablo, dxuzúaja' da dxugapa' le'e diuzre nen ná'aqueza'.

²² Che nu benne' quebe nazrí'ine' Xránadxu Jesucristo, cuía xi' bēnnea'. ¡Gudá Xránantu'!

²³ Dxenaba' Xránadxu Jesucristo gun cháwe'e le'e. ²⁴ Dxusella' chee xúgutele xel-la nazrí'i chia' lu La Jesucristo. ¡Ca'an gacana!

DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

Pablo dxuzúaje' chee bi bíchedxu zaj zre'e xezre Corinto

¹ Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá chee le'e, bi bícha'dau', zrágale chee Dios lu xezre Corinto. Cá'anqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya. ² Dxenaba' Xradxu Dios, ne Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Da ca' guz' guzaca' Pablo

³ Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. ⁴ Dios dxexúe zrenqueze' dxi'u ca naca xúgute xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé' xel-la zi', na' xue zrendxu le' cáteze da ba nun Dios cheedxu dxi'u. ⁵ Lawe' da dxededxu xel-la zi' zren ca da gudé Cristo, cá'anqueze ne chee Cristo zua Nu dxexúe zrenqueze dxi'u, Léqueze Dios. ⁶ Chee le' na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' chee le' xel-la zi' ca' da dxededxu dxi'u. ⁷ Dxuxrén lázrele'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

⁸ Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' québedxa guleza lázrentu' lantu'. ⁹ Gúquentu' ba zua gagu xelute benne' ca' netu'. Guca cheentu' da nigá chee bzéajni' na netu' guxrén lázrentu' Dios, ne quegá guxrén lazre' cuínantu'. ¹⁰ Dios bselé' netu', na' ne dxuselé' netu' lu da stebe zren nigá chee xel-la gute, na' dxebeza lázrentu' Le' guseláqueze' netu' ¹¹ che le'e gácalele netu', nábadxu Dios gácalene' netu'. Che benne' zan xelenabe' Dios gácalene' netu', na' benne' zan xel'é Dios: Xcalenu', chee da chawe' ca' da gun Dios cheentu'.

Bizr chee na' Pablo guzrene' chéaje' Corinto

¹² Naca tu da ba neza da nápantu' da zua na lawe' da dxé xichaj lázrdauntu' netu' ba gudantu' lu da lá'azxa, ne du lázrentu', lu xezr la xu nigá, ne ládujla le'e. Dios lu xel-la zri'i

lazre' chee' gúcalene' netu' chee bentu' caní, ne quebe bentu' na lu xel-la sina cheézquezentu'. ¹³ Lu da dxuzúajntu' chee quebe bi de da quebe gaca gulábale, ne chéajni'ile, na' dxaca lazra' chéajni'i xánnele ¹⁴ ca ba guxéajni'ile late', chee lu zra xelá' Xránadxu Jesús, gácantu' netu' tu da ba neza chee le'e, ca le'e gácale tu da ba neza cheentu'.

¹⁵ Lawe' da dxuxrén lazra' gaca caní, bechugu lazra' xida' nédxula xedajnná'a le'e chee gaca tu da ba neza chee, na' xedajnná'a le'e chupa lasa, ¹⁶ lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácale neda' cha'a xezre ca' zaj nababa Judea. ¹⁷ ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxennía': Awe', cabí, gate dxechugu lazra' da guna? ¹⁸ Dios nézquezne' neda', ne Silvano, ne Timoteo, quebe dxentu' le'e: Awe', cabí. ¹⁹ Naca na caní lawe' da Jesucristo, Zri'ine Dios, Bénnea' bzénentu' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, ²⁰ lawe' da ne chee Le' dxelaca li xúgutę da guchebe lazre' Dios. Chee le na', gate dxue lá'anantu' Dios, dxennantu': ¡Ca'an naca na! ne chee Jesucristo. ²¹ Dios naque' Bénnea' ba nuzé chúchue' netu', ne le'e lu da naca chee Cristo, ne ba guquéę dxi'u, ²² ne ba nuzúę cheedxu tu da dxulé'e na nácadxu bi chee Le', lawe' da ba nuzúę' Be' Lá'azxa lu xichaj lázrdaudxu, da dxunna bea na sidxu da naca chee'.

²³ Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xequéę xel-la nabán chia'. ²⁴ Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba ze cháchale lu da dxéajlele. Dxaca lázrentu' bédxale lu da naca chee Cristo.

2

¹ Chee le na' bechugu lazra' quebe xida' xedajnná'a le'e lu da baxache'. ² Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. ³ Chee le na' bzujaja' chee ca da bęna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. ⁴ Gate bzujaja' chee da na' guzúle'ęda' gunne xue, ne guzúa' lu da zi' da xa', ne cá'anqueze gudxézreleęqueza', san quebe bzujaja' da na' chee guzúa' le'e lu da baxache', san chee nézele nazrí'ile'ęda' le'e.

Ca dxal-la' xulunite lawe' chee' bénnea' bene' da calela

⁵ Che nu benne' ba bzue' neda' lu da baxache', quegá chia' néda'ze bene' na, san cá'anqueze waca nnadxu, bzue' xúgutele lu da baxache'. Dxennía': Waca nnadxu, chee' quebe gácateca' snia. ⁶ Ca xel-la zi' da bdele bénnea' gate na' bzrágale, ba nácale'equeze da na'. ⁷ Ca' naca na, na'a dxal-la' gunite laule chee' bénnea', ne xue zrenle le', chee' quebe gunitie' xel-la dxe-beza lazre' chee' ne chee' da baxache' zren da dxedé'. ⁸ Chee' le' na' dxata' xueda' le'e gulé'ele le' xecha lasa ca nazrí'ile'ele le'. ⁹ Bzuaja' nédxula chee'le ca naca da nigá chee' gulé'e lawe' che nácale wezúe dizra' lu xúgute da dxaca. ¹⁰ Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunite lawa', ba bnite lawa' na ne chee'le le'e lau Cristo ¹¹ chee' quebe seque' Satanás nna be'e na dxi'u, na' ba nézquezdxu ca da dxun na.

Pablo dxezé' gunne xue lu xezre Troas

¹² Gate bzrina' xezre Troas chee' guzenda' bénneache dizra' chawe' chee' Cristo, gutá'le'e lataj chia' guna' zrin chee' Xránadxu. ¹³ Guzúale'a gunne xue lawe' da quebe bezrelda' bi bíchedxu Tito ga na'. Chee' le' na' bzea' dizra' benne' ca' zaj zre'e na', na' guxá'a xezr la xu Macedonia.

Dxezrué'edxu ne chee' Cristo

¹⁴ Xcalén Dios, Bénnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne chee'dxu dxi'u dizra' chee' ca tu da dxelá zixre da dxezriluj gáteteze na. ¹⁵ Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xeelé', ne ládujla benne' ca' xelebía xi'e. ¹⁶ Lau benne' ca' xelebía xi'e da dxelá nigá naca na ca tu da dxute bénneache, san lau benne' ca' xeelé' naca na tu da dxunezruj na bénneache xel-la nabán. ¿Nu benne' naca chee' gaque' caní? ¹⁷ Netu' quebe dxedantu' dxútentu' dizra' chee' Dios, ne quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nase-la Dios, ne ca wen zrin chee' Cristo.

3*Dizra' chee' xel-la wezría cube*

¹ Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantu' chee'le tu xiche caní, ca dxelún bal-la benne'? ² ¡Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bénneache gaca xelexúnbe'e na, ne xululabe' na. ³ Le'e nácale ca tu xiche da nuzúaj Cristo, ne da dxulé'e launtu' netu'. Nácale

ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdauxu.

⁴ Ne chee Cristo dxuxrén lázrentu' Dios, ⁵ quegá chee bi gaca guntu' da naca cheézquezentu', san, ca naca da gaca guntu' naca na chee Dios. ⁶ Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

⁷ Da bdxixruj be'e Moisés na' bxuaj na le'e xiaj blaga', ne bla' nen tu da bsení'le'e, na' québedxa belezúe benne' Israel ca' xelené'e lau Moisés, lawe' da gúcatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, ⁸ da zréne'edxa naca xel-la naxaní' chee dizra' chawe' na' da nusá Be' Lá'azxa cheedxu. ⁹ Che da nadxixruj bea na da dxuzría xi na dxi'u guca na tu da xabáa zrente, na' tu da xabáa zréne'edxa naca dizra' chawe' na' da dxucá'ana na dxi'u xrlátaje lau Dios. ¹⁰ Lácala che da nadxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zréne'edxa. ¹¹ Che guca tu da xabáa chee da na' guzí bea na tu chí'idauze, napa na tu da xabáa zréne'edxa da na' si bea na chadía chacanna.

¹² Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. ¹³ Quebe dxuntu' ca ben Moisés, bgacu lawe' tu ladxe' chee quebe xeelé'e benne' Israel ca' xexul-la xel-la naxaní' na' da quebe guzí bea na. ¹⁴ Benne' Israel ca' quebe guléajni'ing'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ing', lawe' da quebe ne xedúa na, na' gaca xedúa na tuze ne chee Cristo. ¹⁵ Na'a zra, gate dxululabe' dizra' chee Moisés, zua ca tu ladxe' da dxucache na xichaj lázrdawe'. ¹⁶ Gate tu benne' xexaque' chee Xránadxu, xedúa ladxe' na' lu xichaj lázrdawe', ¹⁷ lawe' da naca Xránadxu Be' na', na' naga zua Be' chee Xránadxu, na' de xel-la weselá lu na' da nadxixruj bea na chee Moisés na'. ¹⁸ Chee le' na' xúgutedxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxí'unqueze, tu tu lasa gate dxelé'edxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdauxu.

4

¹ Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá

chee Cristo da dxuntu'. ² Ba nuzúantu' chalá'ala da dxelún bènneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na' caní dxuzúa cuínantu' lu na' xichaj lázrdau xúgute bènneache lau Dios. ³ Che dizra' chawe' da dxuzénentu' bènneache ne nagache na, naca na caní tuze lau benne' ca' xelebía xi'e. ⁴ Lawe' da quebe dxeléajle'e chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawe' chee quebe xelélé'ene' xel-la naxaní' chee dizra' chawe' chee xabáa chee Cristo, Bènnea' naque' lu'a lesaca Dios. ⁵ Quebe dxuzénentu' bènneache ca naca cheézquezentu', san ca naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin cheele lawe' da nazrí'intu' Jesús. ⁶ Dios ná'queze, Bènnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácatite legala na dxu'a lau Jesucristo.

Dxundxu xúgute ne chee xel-la dxeajlí lazre' cheedxu

⁷ Da xabáa nigá nápantu' lu bēla' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. ⁸ Chee le na':

Láqueze zúantu' lu da stébele'e, quebe dxezentu' gunne xue. Láqueze dxezentu' gunne xue, tu dxebeza lázrezquezentu' gácale Dios netu'.

⁹ Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebía xintu'.

¹⁰ Gáteteze dxéajntu' naca tuze bēla' dxen cheentu' nen xel-la gute chee Jesús chee gulé'e lau lu bēla' dxen cheentu' xel-la nabán chee Jesús. ¹¹ Dxácate naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu bēla' dxen cheentu' da gate. ¹² Ca' naca na, lácala tu zúazquezentu' lu da stēbe chee xel-la gute da nigá, dxun na sua tu xel-la nabán cube cheele.

¹³ Naxúaj lu dizra' lá'azxa da dxenná na: Guxéajle'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', ¹⁴ lawe' da nézentu' Dios, Bènnea' bsebanē' Xránadxu Jesús ládujla benne' gate, cá'anqueze gusebanē' dxi'u tu zren nen Jesús, na' tu zren nen le'e, xeché'e dxi'u lau Le'. ¹⁵ Xúgute da nigá guzaca zintu' chee gaca tu da ba neza cheele, chee gaca na, gate xelezí' benne' zante xel-la xrlátaje chee Dios, cá'anqueze benne' zante xel'é Le': Xcalenu', chee gaca ba chee Dios.

¹⁶ Chee le na', cabata' dxate ni'a nadxu. Láqueze dxexru bēla' dxen cheedxu, Dios dxuxucube' be' nácaquezdxu tu zra

tu zra. ¹⁷ Da dxezácadxu lu xęzr la xu nigá naca na tu da dauze, da teze cheę na, na' nusá na cheędxu tu xabáa chadía chacanna da szrente, ne da cháwedxa. ¹⁸ Quebe nná'adxu ca da dxelé'edxu, san nná'adxu da quebe nalá', lawe' da quebe dxelezi bea da ca' dxelé'edxu, san da ca' quebe dxelé'edxu dxelezi bea na chadía chacanna.

5

¹ Bela' dxen cheędxu naca na ca tu xu'u lizre be' nácaquezdxu. Bela' dxen cheędxu naca na ca tu xu'u da quebe si bea na, na' gate gátedxu Dios ba nucueze' cheędxu xabáa tu xu'u da zea jlí canna, da nun Diósqueze, ne quegá bėnneache. ² Da li dxácatę naca bandxu lu bela' dxen nigá dxebezre we'dxu lawe' da dxaca lázredxu cheajchú'udxu bela' dxen cube na' da gunna Dios dxi'u xabáa. ³ Quebe xegá'ana cá'aze be' nácaquezdxu xabáa. Cheajchú'u na bela' dxen cube na'. ⁴ Dxácatę ne naca bandxu lu xu'u nigá da naca na bela' dxen cheędxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gusandxu bela' dxen gula cheędxu nigá. Dxaca lázredxu cheajchú'udxu bela' dxen cube, na' ca'an gaca xenite bela' dxen cheędxu da dxal-la' gate, na' la' bela' dxen cube cheędxu da gaca ban na chadía chacanna. ⁵ Bėnnea' ba nune' dxi'u cheę gaca cheędxu caní naque' Dios, Bėnnea' ba nune' dxi'u Be' Lá'azxa ca tu da dxunna bea na dxal-la' sidxu tu bela' dxen cube xabáa.

⁶ Ca' naca na, dxuxrén lázretequezdxu Dios. Ba nezdxu dxácatę naca bandxu lu bela' dxen nigá zúadxu zítu'la naga zua lızredxu, da naca na, quebe zúaledxu Xránadxu, ⁷ na' dxedadxu ne cheę xel-la dxeajlí lazre' cheędxu, quegá ne cheę da dxelé'edxu. ⁸ Dxuxrén lázredxu Dios, ne dxaca lázredxadxu gusandxu xel-la nabán cheędxu lu bela' dxen nigá cheę chėjdxu cheajsúaledxu Xránadxu. ⁹ Cheę le na' dxundxu ba xuzre gúntequezdxu da xezaca ba lazre' Xránadxu, che nagá'anadxu lu bela' dxen cheędxu nigá, u che cheajchú'udxu bela' dxen cube, da zua na xabáa, ¹⁰ lawe' da xúgutędxu dxun na ba xen xezrindxu lau Cristo cheę guchi'e ca da nundxu tu tudxu, cheę si' lu nadxu ca da xáladxu, cáteze naca da xrlátaje, u da calela da ba bęndxu gate ne zúadxu lu bela' dxen cheędxu nigá.

Dizra' da dxexún dxi'u tuze nen Dios

¹¹ Cheę le na', lawe' da núnbeantu' ca dxal-la' zrėbedxu Xránadxu, dxuntu' ba xuzre guntu' xeledá bėnneache. Dios ba nézene' da nácantu', na' dxebeza lazra' cá'anqueze le'e nézele na. ¹² Quegá dxennęntu' xrlátaje cheızquezentu', san dxúnnantu' le'e lataj gápale netu' ba lá'ana, cheę gaca xechėbele cheę benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj

lázrdawę'. ¹³ Che dxeleque bėnneache nadá xichaj lázrdauntu' naca na cheę guntu' zrin cheę Dios, na' che quebe nadá xichaj lázrdauntu' naca na cheę gaca tu da ba neza cheęle le'e. ¹⁴ Xella zri'i lazre' cheę Cristo dxusebaga na netu' lawe' da nézentu' che tu benne' gutię' waláz cheę xúgute bėnneache, na' ba gulate xúgute'. ¹⁵ Cristo gutię' waláz cheę xúgute bėnneache, cheę benne' ca' zaj naca banę' québedxa xelaca banę' cheézqueze', san cheę Le', Bėnnea' gutię', ne bebanę' waláz cheę benne' ca'. ¹⁶ Cheę le na', québedxa nna'ntu' ca naca da nácaqueze tu benne' lu xęzr la xu nigá, na' láqueze nédxula gunna'ntu' Cristo cáteze gúcaqueze' lu xęzr la xu nigá, na'a québedxa nna'ntu' Le' caní. ¹⁷ Ca' naca, che tu benne' naque' tuze nen Cristo, naque' tu benne' cube. Da gula ca' cheę benne' nigá ba guledé cheę na, na' xúgute na zaj naca na cube.

¹⁸ Xúgute da caní dxun Dios, Bėnnea' bexunę' dxi'u tuze nen Léqueze' ne cheę Cristo, na' bsebage' dxi'u guzendxu bėnneache ca gaca xelexaque' tuze nen Dios. ¹⁹ Gate gute Cristo, Dios guzúalequeze' Le', ne bexunę' bėnneache cheę xęzr la xu nigá tuze nen Le', ne quebe gunné'e ca zaj naca dul-la zaj nabaga bėnneache ca', na' bsebage' dxi'u guzendxu bėnneache dizra' da dxexún dxi'u tuze nen Dios. ²⁰ Ca' naca na, nácantu' gubáz cheę Dios ne cheę Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. ²¹ Cristo netú dul-la ca benę', san ne cheędxu dxi'u, Dios bdeę' Le' cheę gutię' le'e xaga béguaj ca tu benne' dul-la, cheę xexácadxu benne' xrlátaje lau Dios ne cheę da ben Cristo.

6

¹ Ca' naca na, ca wen zrin tu zren nen Dios dxata' xuentu' le'e cheę quebe guzúale chalá'ala xel-la zri'i lazre' cheę Dios, ²lawe' da lu dizra' lá'azxa dxenné':
Tu zra dxezaca ba lazra' benda' chiu',
na' lu zra cheę xel-la weselá gúcalęna' lue'.
Na'a naca na zra dxezaca ba lazre' xenne' cheęle, ne guselé' le'e.

³ Quebe bi dxuntu' da gun na quebe xeléajle bėnneache cheę Cristo, cheę quebe nu nne calęla cheę zrin dxuntu'. ⁴ Ca naca xúgute da dxuntu', dxaca lázrentu' gul'entu' bėnneache nácantu' wen zrin cheę Dios,
ne cheę xel-la dxebeza zren lazre' cheęntu' gate dxuchaga launtu' da dxezácantu',
ne da dxexárzjentu', ne da zaj naca stębe cheęntu',
⁵ ca buluzálaje' netu', ne gulegu'e netu' lizre xia.
Guledábague' netu' san bėnle'entu' zrin.
Zane' lasa quebe gúsentu', ne quebe bi gudáguntu'.

6 Cá'anqueze blé'entu' da nácantu'
 ne chee tu xel-la nabán li lazre' cheentu',
 ne ne chee da li da núnbeantu',
 ne ne chee xel-la zren lazre' cheentu',
 ne xel-la zri'i lazre' cheentu',
 ne ne chee Be' Lá'azxa, Bénnea' zúalene' netu',
 ne ne chee xel-la nazrí'i cheentu' da naca na du lazre',
 7 ne ne chee dizra' li da dxuzénetu' bénneache,
 ne ne chee xel-la waca chee Dios da zúale na netu'.
 Bchínetu' da zaj naca ca xia chee wedil-la chee da xrlátaje
 chee gudíl-lantu', ne chee gudentu' chalá'ala da zaj naca ca xia
 chee wedil-la chee benne' ca' dxeledábage' netu'.
 8 Zua gate dxelape' netu' ba lá'ana',
 ne zua gate dxuluzé' netu' chalá'ala.
 Zua gate dxelenné' cheentu' da xrlátaje,
 ne zua gate dxelenné' cheentu' da calela.
 Zua gate dxelenné' nácantu' wen lazre',
 ne zua gate dxelenné' dxennentu' da li.
 9 Zua gate quebe nu dxuzé naga netu',
 ne zua gate dxuluzé naga xánnie' netu'.
 Zua gate zúantu' lu da stebe chee xel-la gute, san ne naca
 bantu'.
 Zua gate dxuludée' netu' xel-la zi', san quebe ne xelutie' netu'.
 10 Láqueze zúantu' lu da baxache', zúatequezentu' lu xel-la
 dxebe.
 Lácala nácantu' benne' xache', ba nuntu' benne' zan benne'
 gunní'a.
 Láqueze quebe bi núantu', xúgute nápanu'.

11 Bi bícentu', benne' Corinto, ba bchálajntu' du lázrentu'.
 Ba blé'entu' le'e ca nazrí'i lázrentu' le'e. 12 Tu zúazqueze xel-
 la zri'i lazre' cheentu', na' le'e na' quebe nazri'ile netu' du
 lázrele. 13 Dxata' xueda' le'e ca dxun tu benne' dxata' xuene' bi
 cheéqueze' chee gulé'ele neda' du lázrele xel-la nazrí'i da zua
 na lu xichaj lázrdaule cáteze bēna' neda'.

Nácadxu xudau' chee Dios ban

14 Quebe gunle tuze nen benne' quebe dxeléajle'e chee
 Cristo, da gaca na ca chacué' beze gu'una, be quebe zaj nadíl-
 leba'.

¿Ájazra gun da xrlátaje gaca na tuze nen da calela?

¿Ájazra gun xel-la naxaní' gaca na tuze nen da chul-la?

15 ¿Ájazra gun Cristo gaque' tuze nen Satanás?

¿Ájazra gun benne' dxéajle'e chee Cristo gaque' tuze nen
 benne'
 quebe dxéajle'e chee'?

16 ¿Ájazra gun xudau' chee Dios gaca na tuze nen bedáu' xiaj
 xaga?

Lé'equeze nácale xudau' chee Dios ban cáteze gunná Diósqueze: Súalena' le', ne tálena' benne' ca'.

Gaca' Dios chee benne' ca', na' le' xelaque' benne' xezre chia'.

17 Chee le na', cá'aqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e 18 ne gaca' Xrale le'e,

na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' dutę xel-la waca.

7

1 Ca' naca na, bi bícha'dau' nazri'ite lazra', da caní zaj naca na da guchebe lazre' Dios cheedxu. Chee le na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu bela' dxen cheedxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios dutę ca nácadxu.

Ca belexebí'i lazre' benne' Corinto

2 Le si' lu na'le netu'. Quebe bi da calela ne guntu' chee nu benne' ládujla le'e, ne quebe nu ne guchántu', ne quebe nu ne si xentu'. 3 Quebe dxennía' da nigá chee gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrentę nen le'e. 4 Du lazra' dxuchálajlena' le'e, ne zua' lu da ba neza ne chee le'e. Lu xúgute da dxezácantu' zua da dxexúe zrénele' neda', na' dxebéle'eda'.

5 Da lí, gate bzrintu' naga nababa Macedonia, quebe bezí' lázrentu'. Guzúantu' lu da stebe gáteteze, lawe' da gáteteze gudentu' guledábaga bénneache netu', na' lu lázrdauntu' bezrébentu'. 6 Nadxa Dios, Bénnea' dxexúe zrene' benne' zaj nate ni'a ne'e, bexúe zrene' netu' ne chee Tito lawe' da bezrinbe' naga zúantu', 7 ne quegá tuze lawe' da bla'be', san cá'aqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' chee le na' gubéle'edxeda'.

8 Láqueze da bzuaja' chee bzua na le'e lu da baxache', quebe dxebezre lazra' chee da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', 9 na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' chee quebe bi da calela ben na chee. 10 Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu chee ladxu, na' quebe dxal-la' cuezre lázredxu chee na. Che xegá'anadxu lu da baxache' ca dxelún bénneache chee xezr la xu nigá, na' tu chí'ize gátedxu.

¹¹ Le'e bchaga laule da baxache' da guca na cheēle ne cheē da bzujaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,

ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',

ne guzúale gudele xel-la zi' bénnea' ben da calela na'.

Ca naca xúgutē da nigá ble'ele quebe nabágate zria cheē dul-la nigá. ¹² Ca' naca na, gate bzujaja' cheēle da na', quebe guca na lawe' da gudxe'a gunne xue cheē bénnea' bene' da calela na', ne quegá lawe' da gudxe'a gunne xue cheē bénnea' guca na cheē, san bēna' na cheē gueque be'ele lau Dios ca dxele gunne xue cheentu'. ¹³ Cheē le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebé, lawe' da xúgutēle le'e bexúe zrenle-be'.

¹⁴ Láqueze bca'ana szrena' le'e lau Tito, quebe dxedué'eda', lawe' da cáteze naca da li ca naca xúgutē da bchálajlena' le'e, cá'aqueze guca da li da bēna' gate bca'ana szrena' le'e lau Tito.

¹⁵ Nazrí'idxabe' le'e gate dxajsá lázrebe' ca benle xúgutēle le'e, benle cáteze gunábabe' le'e, ne ca guzú' lu na'le lebe' lu duté xel-la dxexruj lazre', ne lu xel-la dxezrebe. ¹⁶ Dxebeda' lawe' da dxuxrén lazre' xánnia' le'e.

8

Da dxunézrujdxu du lázredxu

¹ Na'a, bi bicha', dxaca lazra' guzenda' le'e ca ble'e lau xel-la zri'i lazre' cheē Dios ne cheē xúgutē cue' bi cheē Cristo zaj nnita' lu xezr la xu Macedonia. ² Láqueze guledé' tu xel-la zi' zren gulebéle'equezne', na' láqueze zaj nácale'e benne' xache', du lazre' bulunézruje' da zaj de cheē, na' beluné' ca benne' gunní'a ca'. ³ Dxexecheba' du lazre' bulunézruje' xúgutē da gulezéquene', ne da zrendxa ca da gulezéquene'. ⁴ Gulata' xuene' netu' güentu' le' lataj xeluné' tu zren bēnneache dxelácalene' bi bíchedxu ca' dxelexázrjene'. ⁵ Belundxe' ca da guleza lázrentu', lawe' da belunna cúnaqueze', nédxula cheē Xránadxu, na' gudé na' cheentu' netu', cáteze dxaca lazre' Dios. ⁶ Ca' naca na, guta' xúentu' Tito gusexuzre' gutupe' da gunézrujle le'e, da na' guzú lawe' dxutupe' gate nate. ⁷ Le'e dxúnle'ele ca naca da dxunle, ca dxeajlí lázrele Dios, ne ca dxusédele bi cheē Cristo, ne ca naca da naxéajni'ile, ne ca du lázrele dxunle xúgutē, ne ca nazri'ile netu'. Ca' naca na, cá'aqueze dxal-la' gúnle'ele ca gunle zrin chawe' nigá.

⁸ Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezícadxa bēnneache zrin nigá, dxulunézruje' dumí, cheē gueque be'ele che naca li

lazre' xel-la zri'i lazre' cheeḷe. ⁹ Ba nézquezle ca naca xel-la zri'i lazre' cheeḷ Xránadxu Jesucristo. Naqueḷ' benne' gunní'a, san ben cuineḷ' benne' xache' lawe' da bzri'ineḷ' le'e, cheeḷ gácale le'e benne' gunní'a lu da naca cheeḷ Cristo lawe' da gudé Le' lu xel-la xache'.

¹⁰ Cheeḷ gaca da ba neza cheeḷe dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujle dumí. ¹¹ Na'a, le gúnteze na cheeḷ xexuzrteḷ gunle na, gunle na du lázrele cáteze guzú laule dxunle nédxuteḷ, gunézrujle ca da du de cheeḷe. ¹² Che da li dxaca lazre' tu benne' gunézruje', Dios xezaca ba lazre' na che gunézruje' ca da nape', ne quegá dxenabe' da quebe napa bénnea'.

¹³ Quebe dxennía' da nigá cheeḷ xexácale le'e xache' cheeḷ gácaleḷe benne' xula. ¹⁴ Naca na cheeḷ gápale lébeteḷ. Na'a nápaḷe cheeḷ gunézrujle ca da dxexazrje benne' xula ca', na' xetú lasa xelapa benne' ca' da xelunneḷ' cheeḷe gate bi xázrjele le'e. Caní gápale lébeteḷ ¹⁵ cáteze naxúaj na lu dizra' lá'azxa, dxenná na: Bénnea' nápaḷe'ḷe quebe bi begá'ana cheeḷ, na' bénnea' napeḷ' láteze quebe bi bexáazrjene'.

Tito ne bi ljwezre' ca'

¹⁶ Xcalén Dios, Bénnea' bzueḷ lu lázrdau Tito sueḷ gunne xue cheeḷe le'e ca zua' neda'. ¹⁷ Guzí' lu neḷe da bsebaga' le', na' lawe' da zúaquezeḷ' gunne xue cheeḷe le'e, ba bezé'ḷe cheeḷ xideḷ' xedajnné'ḷe le'e lawe' da dxaca lázrequeze le'.

¹⁸ Tu zren nen Tito nasél-lantu' tu bi bíchedxu, tu benne' dxelenné chawe' cheeḷ' xúguteḷ cue' bi cheeḷ Cristo, ca naca zrin xrlátaje da nuneḷ' cheeḷ dizra' chawe' cheeḷ Cristo. ¹⁹ Quegá tuze da nigá, san xúguteḷ cue' bi cheeḷ Cristo gulequé'ḷe bi bíchedxu níqueze cheeḷ sáḷeneḷ' netu' cheeḷ gácaleḷe netu' lu zrin nigá da dxuntu' dxutúbentu' dumí da gácaleḷ na benne' xache' ca' cheeḷ gaca ba Xránadxu, ne cheeḷ gulé'e lau du lázrele dxunle zrin chawe' nigá. ²⁰ Caní dxuntu' cheeḷ quebe nu benne' si tizreḷ' netu' ca dxuchínentu' dumí zrenteḷ nigá da dxulunezruj bi bíchedxu ca'. ²¹ Dxuntu' ba xuzre guntu' zrin nigá lu duté xel-la li lazre' cheentu', quegá tuze lau Xránadxu, san cá'anqueze lau xúguteḷ bénneache.

²² Tu zren nen benne' caní nasél-lantu' xetú bi bíchedxu, tu benne' da záneteḷ lasa ba blé'eneḷ' netu' du lazreḷ' dxuneḷ' zrin cheeḷ Cristo, na' na'a du lázredxeḷ' dxuneḷ' zrin nigá lawe' da dxuxrén lazreḷ' le'e. ²³ Che nu benne' gucheḷe le'e ca naca cheeḷ Tito, le xeḷe nácaḷe' bi ljwezra', ne dxunbe' zrin tu zren nen neda' cheeḷ gunbe' zrin cheeḷe. Che nu gucheḷe le'e ca naca cheeḷ xezícadxa bi bíchedxu ca' zeajzragueḷ' Tito, le xeḷe zaj naqueḷ' benne' gulesel-la xúguteḷ cue' bi cheeḷ Cristo, ne

dxelape' ba lá'ana Cristo. ²⁴ Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

9

Da dxulunézruje' chee bi bíchedxu ca'

¹ Ca naca chee dumí da gunézruje chee bi ca' chee Cristo, quebe dxun na ba xen guzúaja' chee, ² lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zře'e xezre ca' zaj nababa xezr la xu Macedonia, le'e zrale xezre ca' zaj nababa Acaya, gudú iza ba zúatequezle bi gunézruje, na' benne' zante benne' Macedonia du lazre' dxulunézruje' lawe' da dxunézruje le'e du lázrele. ³ Dxusella' bi bíchedxu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezle bi gunézruje, ca ba gucha' benne' caní, ⁴ ne che sa'aca bal-la benne' Macedonia tu zren nen neda' chee quebe xeelé'ene' quebe zúatequezle le'e bi gunézruje. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. ⁵ Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézruje. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

⁶ Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezí'ile'e. ⁷ Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dxezaca ba lazre', u xadíaze, lawe' da nazrí'i Dios benne' dxunézruje' duté xel-la dxebé. ⁸ Wazeque' Dios gúnnale'e le'e ca naca xúgute da chawe', chee gata' chee xúgute da nachínele, ne gápale bi gunézruje chee gunle xúgute zrin xrlátaje. ⁹ Naxúaj lu dizra' lá'azxa da dxenná na:

Du lazre' bnézruje' chee benne' xache' ca'.

Ca zaj naca zrin xrlátaje nune' xelegá'anatequeze na.

¹⁰ Dios, Bénnea' dxunézruje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnnale'equeze na lina chee zrin chawe' da gunle. ¹¹ Ca' gaca na, gáta'le'e chee xel-la gunnía' ca' chee séquele gunézruje du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. ¹² Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechínnene' san cá'anqueze dxundxu xelé'e Dios: Xcalenu'. ¹³ Xelúe lá'ane' Dios lawe' da da nigá dxunézruje gulé'e na dxuzúale dizra' chee

dizra' chawe' chee Cristo. Cá'aqueze xelúe lá'anę' Dios ne chee da gunézrujle du lázrele da gácale na le', ne xúgute cue' bi chee Cristo. ¹⁴ Chee le na' benne' ca' xelenabe' cheele lau Dios, ne xelezrí'ile'ęne' le'e ne chee xel-la zri'i lazre' zren da gulé'e lau Dios ne cheele le'e. ¹⁵ Xcalén Dios lawe' da nunne' dxi'u tu da zrente da quebe séquedxu xuzájla'adxu.

10

Xel-la dxenná bea napa Pablo lawe' da naque' gubáz chee Cristo

¹ Neda', Pablo, dxuzenda' le'e da nigá ne chee xel-la dxexruj lazre', ne xel-la zri'i lazre' chee Cristo. Dxelenné' naca' benne' zren lazre' gate zúale'na' le'e, na' gate zua' zitu' nácale'a benne' snia. ² Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxelenné' dxuntu' zrin chee Cristo lu be'la' dxenze cheentu', na' zúaqueza' tıl-laqueza' benne' ca'. ³ Láqueze nácantu' be'la' dxen quebe dxedıl-lantu' lu be'la' dxenze cheentu', ⁴ lawe' da quebe zaj naca chee be'la' dxenze da dxuchı'entu' lu wedilla cheentu', san zaj napa na xel-la waca chee Dios chee séquentu' guzrıa xintu' da wal-la ca' chee nu na' dxedábaga' netu'. ⁵ Ca'an naca, dxuzrıa xintu' da dxusebaga bė'nea' dxi'u, ne da dxuzúe' lu xel-la dxucá'ana szren cuina chee quebe xelúnbea bė'neache Dios. Xúgute da zaj xu'u lu xichaj bė'neache dxuzúantu' lu na' Cristo chee xuluzúe' dizra' chee'. ⁶ Zuátequezentu' gudentu' xel-la zi' xúgute benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

⁷ Le'e dxenna'le benne' ca' cáteze da zaj naque' cúzreze. Che nu benne' dxéqueę' da li naque' bi chee Cristo, dxal-la' gueque bé'ęe' cáteze na' naca le' bi chee Cristo, cá'aqueze nácantu' netu' bi chee Cristo. ⁸ Láqueze dxuchı'edxedada' ca dxal-la' guna' xel-la dxenná bea cheentu', quebe dxedué'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzrıa xintu' le'e. ⁹ Quebe dxaca lazra' guéquele le'e dxaca lazra' gucheba' le'e ne chee da dxuzúaja' cheele. ¹⁰ Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. ¹¹ Bė'nea' dxenné' da nigá dxal-la' gueque bé'ęe' cáteze naca' lu dizra' dxuzúaja' gate ne zua' zitu', cá'aqueze gaca' lu da guna' gate na' súde'na' le'e.

¹² Quebe dxexázrentu' gutıl-le lébentu', u gulé'e cuınantu' ca zaj naca bal-la benne' ca' dxulucá'ana szren cuine'. Dxelune' tu da xálaze gate dxelenné'ę ca da zaj nácaqueze', ne dxulutille lebe ljwezre'. ¹³ Quebe gucá'ana szren cuınantu' lu da quebe

naca cheentu'. Dios naque' Bénnea' gulé'ene' netu' naga ze lau guntu' zrin, na' Le' benne' netu' lataj blantu' naga zrale le'e lu xezre Corinto. ¹⁴ Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrale le'e nédxute. Netu' nácantu' benne' nedxu blantu' naga zrale le'e núantu' dizra' chawe' chee Cristo. ¹⁵ Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' chee, waca gúndxantu' zrin ládujla le'e gusegúlantu' xel-la dxeajlí lazre' chee, san guntu' na lu'ule da naca cheentu'. ¹⁶ Te na' dxebeza lázrentu' tédxantu' ca naga zrale chee guzénentu' bénneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezícadxa benne' ca', chee quebe gucá'ana szren cuínantu' lu da ba zaj nune'.

¹⁷ Che nu benne' dxaca lazre' nu gucá'ana szrene', dxalla' gucá'ana szrene' Xránadxu. ¹⁸ Bénnea' dxexedxúaj xrlátaje, quebe naque' benne' dxucá'ana szren cuine', san naque' bénnea' dxucá'ana szren Xránadxu le'.

11

Ca naca chee Pablo, ne benne' gubáz ca' quebe nase-la Cristo le'

¹ Le guchaga lau neda' chee nnia' late' da ca zeaje na. Ájatēze naca na, le guchaga lau neda', ² lawe' da dxé'le'a gunne xue chee le'e lu da nusebaga Dios neda', ne lawe' da ba nachebe lazra' chee gácale zru'ula Cristo, dxaca lazra' gudéa' le'e lau Le' ca tu nu'ula cuíde'dau' du lazre' súalebe' benne' cheebe'. ³ Ca ben bela' gula na' guzi xēba' Eva nen xel-la neze cheeba', dxezreba' güele lataj nu si xē le'e, na' cuásale lu xichaj lázrdaule chee québedxa gácale du lázrele chee Cristo. ⁴ Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxezí' lu na'le tu be' da nazrá' ca Be' na' da ba guzi' lu na'le, ne dxezí' lu na'le tu dizra' da nazrá' ca naca dizra' chawe' da ba guzi' lu na'le. ⁵ Dxéqueda' quebe zaca' neda' látezdxca ca benne' gubáz zren ca', benne' ca' zéajlele le'e. ⁶ Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúgutē da ba bentu'.

⁷ ¿Bena' tu da calela gate bzenda' le'e dizra' chawe' chee Cristo, ne quebe bi bchízruja' le'e, na' ben cuina' dxexruj lazre' chee xegá'ana szrenle le'e? ⁸ Guca na ca gudawa' dumí chee xezícadxa cue' bi chee Cristo gate guzi'a da belunne' neda' chee bēna' zrin ga zúale le'e. ⁹ Gate na' guzúalēna' le'e, ne bxázejda', quebe bi guzi' lu na'a da naca chee, san bi bíchedxu zá'aque' xēzr la xu Macedonia belunne' neda'

ca da guchínneda'. Bena' ba xuzre quebe bi gunábeda' le'e, na' cá'anqueze guna'. ¹⁰ Lawe' da núnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'. ¹¹ ¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

¹² Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelune' zrin cáteze dxuntu' netu'. ¹³ Benne' caní zaj naque' gubáz quebe nasel-la Cristo. Dxelezí xē'e bēnneache, ne dxululé'e cuine' ca gubáz chee Cristo. ¹⁴ Quebe naca da nigá da xebánedxu lawe' da Satanásqueze dxulé'e cuina na ca tu gubáz chee xabáa zue' lu xel-la naxaní' chee Dios, ¹⁵ na' chee le na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

Da guzaca Pablo lawe' da naque' gubáz chee Cristo

¹⁶ Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'. ¹⁷ Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. ¹⁸ Lawe' da zaj zra' benne' zante dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. ¹⁹ Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'. ²⁰ Dxuchaga laule benne' ca' dxelexune' le'e ca benne' zaj nada'u, ne benne' ca' dxuluchínene' le'e, ne benne' ca' dxelenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule. ²¹ Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca tu da ca zeaje da dxennía'.

²² ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

²³ ¿Zaj naque' wen zrin chee Cristo?

Nácadxa' neda' wen zrin chee' ca benne' ca', lácala dxuchálaja' ca tu benne' nadá xichaj lázrdawe' gate dxennía' da nigá.

Ba bēndxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.
 Ba gulegu'udxa bénneache neda' lizre xia ca belunē' chee
 benne' ca',
 na' zane' lásatē ba guzúa' lu da stēbe chee xel-la gute.
 24 Gazxu' lasa ba belúe benne' judío ca' neda' xide chēnu
 dxua weaj.
 25 Chunna lasa belinē' neda' xaga. Tu lasa belú'e neda' xiaj.
 Chunna lasa guxaze da dxedá lawe' nísadau' da xu'a lu nisa.
 Tu lasa, tu zra tu xēla guxu'a lu nísadau'.
 26 Zane' lásatē guxu'a neza, ne guzúa' lu da stēbe:
 Chee xēgu ca', ne chee gubán ca'.
 Chee benne' walázi chia' ca', ne chee benne' zitu' ca'.
 Guzúa' lu da stēbe lu xēzre, ne le'e xixre', ne lu nísadau',
 ne ládujla benne' wēn lazre' dxelenné' zaj naque' bi bíchedxu.
 27 Bēnle'a zrin, ne guzúa' lu da zi' da xa'.
 Zane' lásatē quebe gusia' dxēla.
 Gudúnle'a, ne gubílele'eda', na' zane' lásatē bēna' gubasa.
 Catitē bexaga', ne bexázrjeda' zra lana' gacua'.
 28 Da zrendxa ca da caní, ne xezícadxa da guzraca'.
 Xúgutē zra dxéqueda' zi' lawe' da zua' gunne xue chee
 xúgutē cue' bi chee Cristo.
 29 Che nu benne' nate ni'a ne'e lu xel-la dxeajlí lazre' chee',
 cá'aqueze neda' dxéqueda' nate ni'a ná'aqueza'.
 Che nu benne' dxelunē' dxeajchaze', néda'queze dxaca' tul-la.
 30 Che dxun na ba xen gucá'ana szren cuina',
 gucá'ana szren cuina' chee da ca' dxululē' na nate ni'a na'a.
 31 Dios, Xra Xránadxu Jesucristo, Bénnea' naca chee' güe
 lá'anatequezdxu Le', nézene' dxennía' da li. 32 Gate guzúa' xēzre
 Damasco, benne' wnná bea na' dxune' zrin chee wēnná bea
 Aretas bzre'e benne' dxuluxúe' dxa xu'u chee xēzre na', chee
 xelēl-le' neda'. 33 Na' bi bíchedxu ca' bululetje' neda' tu lu
 xcuite xia ga dxu'u lení' chee xu'u lu ze'e da naxechaj na xēzre
 na'. Ca' guca na, gulá' lu na' benne' ca'.

12

Da ca' Dios blé'ene' Pablo

1 Da li quebe dxal-la' gucá'ana szren cuina', san guchálaja'
 chee da ca' ble'e Xránadxu neda', ne da ca' ble'eda' ca naca
 chee'. 2 Neda', ca tu benne' dxéajle chee Cristo, ba zeaj chidá'
 iza guché Dios neda' xabáa guxunne'. Quebe nezda' che
 guxá'a na' dutē bēla' dxen chia', u che cabí. Dios nézene'.
 3 Nezda' néda'queza', che zua' lu bēla' dxen chia', u che cabí,
 quebe nezda', tuze Dios nézene'. 4 Guché Dios neda' tu
 xabáa chee', naga benda' dizra' bagache da quebe naca chee
 bénneache xelenné' ca zaj naca na. 5 Waca gucá'ana szrena' tu

benne' caní, san quebe gucá'ana szren cuínaqueza', che quebe naca na chee xel-la nate ni'a na' chia'. ⁶Láqueze che gaca lazra' gucá'ana szren cuina' quebe gaca na tu da xálaze, lawe' da gaca na tu da li. Quebe guna' na chee quebe nu guéquene' nácadxa' ca da gaca lé'ene' naca', u ca da gaca xenne' da dxennía'.

⁷Da caní ble'e Xránadxu neda' gulaca na da xebánele'edxu, na' chee quebe gucá'ana szren cuina', guca chia' ca tu xeche' naxaze lu beła' dxen chia' da dxuchine Satanás chee guzalaj na neda'. ⁸Chunna lasa guta' xueda' Xránadxu gucuase' da dzezaca'. ⁹Xránadxu guzre' neda': "Xela zri'i lazre' chia' naca na dute da dxechínenu' lawe' da dxulé'edxa lau xel-la waca chia' nen benne' nate ni'a ne'e." Ca' naca, dxebeda' lawe' da nate ni'a na'a chee gulé'e lau lu beła' dxen chia' xel-la waca chee Cristo. ¹⁰Chee le na' dxebeda' ca naca xel-la nate ni'a na' chia', ne ca naca dízra' schanni' ca' dxelenná bēneache chia', ne ca naca da ca' dxexáxrjeda', ne gate zaj nau zi' xuzre' bēneache neda', ne ca naca da ba xa' ca' da dxedéa' ne chee Cristo, lawe' da gate nátedxa ni'a na'a, dxéqueda' nácadxa' benne' wal-la.

Pablo dxe'e gunne xue chee bi chee Cristo zaj zre'e Corinto

¹¹Guca' ca tu benne' nadá xichaj lázrdawe' gate bca'ana szren cuina' caní, san le'e benle beña' na. Le'e na' dxal-la' gucá'anale neda' szren lawe' da quebe zaca' látezdxa ca benne' gubáz zren ca', benne' ca' dxéajlele, láqueze quebe bi zaca' neda'. ¹²Zrin beña' ládujla le'e lu dute xel-la zren lazre' chia' ble'e na da li naca' gubáz chee Cristo ne chee da dxelunna bea na, ne xel-la waca ca' chee xabáa, ne da ca' dxexebánedxu. ¹³¿Dxéquele le'e nácale látezdxa blau ca xezícadxa cue' bi chee Cristo lawe' da guzí' lu na'a da belunne' chia', na' quebe guzí' lu na'a da zaj naca chee? Le gunite lau neda' che naca tu da calela quebe beña' le'e lataj bi gúnnale chia'.

¹⁴Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexílaja' da nápile, san lé'equeze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézrujbe' xra xrnabe'. ¹⁵Du lazra' guchíneda' dumí chia' chee gaca chawe' chee bēne'du xu'ule, láqueze dxéqueda' gate nazrí'idxeda' le'e, látezdxa nazri'ile le'e neda'.

¹⁶Bal-la benne', láqueze zaj nézene' quebe bi guzí' lu na'a da zaj naca na chee, dxelenné' gudel-la' le'e lu da wen lazre'. ¹⁷¿Guzí xē'a le'e lu na' tu benne' gusel-la' chee? ¹⁸Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guzí xē Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

19 Bi bicha' nazri'ite lazra', ¿dxéquele dxucá'ana cuínantu' xrlátaje laule le'e? Dxuchálajlentu' le'e lau Dios, ne lu La Xránadxu Jesucristo. Xúgute da caní dxennantu' chee gúlale lu da naca chee Dios. 20 Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxezí tízrale ljwézrele, ne dxucá'ana szren cuínale, ne dxunle da calela. 21 Dxezreba' gate xida' xedajnná'a le'e, Dios gune' xedué'eda' ne chee le'e, da gucuezre na neda' ne chee zánele le'e, benne' ca' dxelúntequeze' dul-la, ne quebe dxulusane' dxelune' da sban, ne da dxulucá'ana sban ljwezre', ne da calela da tu dxelúnzqueze'.

13

Dizra' bzebe

1 Da nigá naca na da guxunne' lasa xida' xedajnná'a le'e. Xúgute dxulé'e lawe na naca na da li ne chee dizra' chee chupa u chunna benne' xelexechebe'. 2 Benne' ca' belune' dul-la nédxula, ne xúgutele le'e, dxácaté ne zua' zitu' naga zrale, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. 3 Nadxa lé'ele da gulé'e na dxenné Cristo lu dxu'a neda', na' Le' quebe nate ni'a ne'e lu da gune' chee, san naque' benne' wal-la ládujla le'e. 4 Da li gudé'e xaga béguaj ca tu benne' nate ni'a ne'e, san naca bané' ne chee xel-la waca chee Dios. Cá'anqueze netu' nate ni'a nantu' ca da guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin chee le'e.

5 Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'? 6 Dxebeza lazra' gueque be'ele quebe naca' neda' benne' wen lazre' lu da naca' chee Cristo. 7 Dxenábantu' lau Dios chee quebe bi da calela gunle, quegá chee gulé'entu' dxennantu' da li, san chee gunle le'e da xrlátaje, láqueze dxéquele le'e quebe dxennantu' da li. 8 Quebe bi gaca guntu' da dxedábaga na da li, san tuze da dxácale na da li. 9 Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gácale duté da dxal-la' xelaca bi chee Dios. 10 Dxuzúaja' chee da nigá nédxula ca xida' xedajnná'a le'e, chee quebe gun na ba xen gate xida', gácale'a benne' snia ca guchíneda' xel-la dxenná bea chia', da benna

Xránadxu neda' chee séqueda' gusegula' le'e lu da naca chee Dios, ne quegá chee guzría xi'a le'e.

¹¹ Na'a, bi bicha', le sua xel-la dxebé. Le gaca dute da dxal-la' xelaca bi chee Dios. Le xue zren ljuézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre', ne nazrí'ine' dxi'u súalene' le'e. ¹² Le gugapa diuzre ljuézrele tule xetule, ne le gunida ljuézrele. ¹³ Xúgutę bi bíchedxu, bi chee Cristo dxulugape' le'e diuzre.

¹⁴ Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!

DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

Dizra' da bzuaj Pablo chee bi chee Cristo zaj zre'e xezr la xu Galacia

¹ Neda', Pablo, naca' gubáz chee Cristo. Quebe gulesel-la bèneache neda', ne quegá buluzúa bèneache neda' gaca' gubáz. Caní bènqueze Jesucristo chia', ne Xradxu Dios, Bénnea' bsebanē' Jesús ládujla benne' gate. ² Xúgutē benne' bíchedxu zrálenē' neda' zaj naque' neda' tuze. Neda' dxuzúaja' dizra' nigá chee xúgutē cue' benne' bíchedxu zaj zre'e xezre ca' zaj nnita' xezr la xu Galacia. ³ Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. ⁴ Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calela. Bēne' da guca lazre' Xradxu Dios. ⁵ ¡Gaca báqueze Dios chadía chacanna! ¡Ca'an gaca na!

Quebe de xetú dizra' chawe' chee Dios

⁶ Dxexebánele'eda' chee le'e lawe' da dxebéaj xíchajtele Dios, Bénnea' gunné' le'e chee si' lu na'le da dxunna Cristo, na' dxezí' lu na'le tu dizra' nazrala ca naca dizra' chawe' chee Cristo. ⁷ Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. ⁸ Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bēnea' de', lácala naca neda', u naca tu gubáz chee xabáa. ⁹ Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzí' lu na'le, dxenaba' lau Dios cue'e bēnea' de'.

¹⁰ Gate dxennia' da nigá, ¿Dxaca lazra' xegá'ana' xrlátaje lau bèneache, u che lau Dios? ¿Dxaca lazra' guna' da xelezaca ba lazre' bèneache? Che ca'an dxaca lazra' guna' da dxelezaca ba lazre' bèneache, quebe naca' wēn zrin chee Cristo.

Ca bexaca Pablo gubáz chee Cristo

¹¹ Dxuzéajni'ida' le'e, bi bicha', dizra' chawe' da dxuzenda' bèneache, na' quebe naca na tu da gulaj na lu xichaj lázrdau bèneache. ¹² Quebe nu benne' bēne' na neda', ne quegá nu benne' bsédenē' neda' le na, san Léqueze Jesucristo bzenne' na neda'.

¹³ Ba bēnquezle ca bēna' neda' nédxula gate na' nazí' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne bēn zi' lazra' guzría xi'a-be'. ¹⁴ Lu xel-la benne' xudau' chee judío ca', neda' ba bzrué'edxeda' ca xúgute bi waláxr chia', bi ljwezra' ca', lawe' da bē lázredxa' gapa' ca da xjácale xra xrtawa' ca'. ¹⁵ Dios guqué'ē neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' Lē', ¹⁶ blé'eng' neda' Zri'ine', chee guzenda' benne' ca' quebe zaj naque' judío ca naca chee Zri'ine'. Gate guca da nigá, quebe nu benne' gunábeda', ¹⁷ ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xēzr la xu Arabia, na' gudé na' bezrina' xēzre Damasco.

¹⁸ Gudé chun iza guxá'a Jerusalén, chee xejchálajlēna' Pedro, na' begá'analēna' lē' xta' gubizra. ¹⁹ Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. ²⁰ Ne chee La Dios dxapa' le'e, da li naca da nigá dxuzúaja' cheele le'e.

²¹ Ca gudé na' guxá'a xēzre ca' zaj nababa xēzr la xu Siria, ne xēzre ca' zaj nababa xēzr la xu Cilicia. ²² Benne' bíchedxu ca', bi chee Cristo zaj zre'ē xēzr la xu Judea quebe zaj nunbe'ē neda'. ²³ Belénzene' nu dxenná: “Bēneea' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxeajlí lazre' Cristo, da na' guca lazre' guzría xi'ē nédxute.” ²⁴ Na'a dxelúe lá'anē' Dios ca da belenne' ca naca chia'.

2

Benne' gubáz ca' dxelezí' lu ne'ē Pablo

¹ Ca gudé chidá' iza guxá'a xecha lasa Jerusalén nen Bernabé, na' bēn bi Tito neda' tu zren. ² Guxá'a na' lawe' da ble'e Dios neda' dxal-la' cha'a na'. Na' cheézela bchálajlēna' benne' ca' zaj naque' blau ládujla bi chee Cristo, ne bzenda' lē' dizra' chawe' da dxuchálaja' ládujla benne' ca' quebe zaj naque' judío. Bēna' caní chee nezda' quebe guca dácheze zrin da ba bēna', ne da dxuna'. ³ Gulezí' lu ne'ē zrin nuna', na' quebe nu gunná be'e Tito, bi zálebe' neda', chugu lu bēla' chee'be' da gulé'e na nácabe' bi chee Dios, lácala quebe nácabe' judío. ⁴ Bal-la benne' quebe zaj naque' du lazre' benne' bíchedxu, benne' gulu'ē ládujla dxi'u lu da wēn lazre', gulaca lazre' chugu da gulé'e na lu bēla' chee Tito. Benne' caní gulu'ē ládujla dxi'u chee xelenézene' ájala xelegúe' lataj da nazidxu lu na' Jesucristo, chee xuluxuzúe' dxi'u ca benne' zaj nada'u lu da bdxixruj bea Moisés. ⁵ Ne chiteze quebe bēntu' lē' lataj

xelégú'u xel-le' netu' lawe' da guca lázrentu' xegá'analé le'e da li dizra' chawe' chee Cristo.

⁶ Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee bèneache. ⁷ Quebe bi bulusebague' neda', lawe' da belexúnbe'e Diósqueze bse-bague' neda' guzenda' benne' ca' quebe zaj naque' judío dizra' chawe', cáteze bsebague' Pedro guzenne' benne' judío ca' dizra' chawe'. ⁸ Léqueze Dios na', Bénnea' bzue' Pedro gubáz chee' ládujla benne' judío ca', cá'aqueze bzue' neda' gaca' gubáz chee' ládujla benne' quebe zaj naque' judío.

⁹ Chee le na', Jacobo, ne Pedro, ne Juan, benne' zaj naque' blaudxa, belexúnbe'e ben Dios neda' culuén nigá, na' gulezí' lu ne'e neda', ne Bernabé, na' belune' tuze dizra' cheajzentu' netu' benne' ca' quebe zaj naque' judío dizra' chawe', dxácate na' le' xuluzenne' na benne' judío ca'. ¹⁰ Túteze da gulenábene' netu' xexache lázrentu' benne' xache' ca', da na' dxue lazra' dxuna'.

Pablo dxedil-le' Pedro lu xezre Antioquía

¹¹ Gate bla' Pedro xezre Antioquía gudil-la' le' caníqueze lawe' da gunegue lazre'. ¹² Nédxute gudágulene' benne' ca' quebe zaj naque' judío cadxa belelá' bal-la benne' gusella Jacobo. Nadxa bebigue'e chalá'ala, ne bsane' québedxa gudágulene' benne' ca' lawe' da bzrebe' judío ca', benne' ca' zaj nadxugu lu bela' chee' da dxul'e na. ¹³ Nadxa xezícadxa judío ca' zaj naque' bi chee Cristo belune' tu zren Pedro lu da dxune' láweze. Caní belune', na' ca' bente Bernabé tu zren benne' ca' lu da na' dxelune' láweze. ¹⁴ Gate ble'eda' neda' quebe dxelune' cáteze naca chee da li chee dizra' chawe' chee Cristo, na' gucha' Pedro lau xúgutē benne' ca': Lue' nacu' judío, na' benu' ca tu benne' quebe naque' judío, ne quebe benu' ca tu benne' judío. ¿Bizr chee na' dxenná be'enu' benne' quebe zaj naque' judío xelune' ca dxelún benne' judío?

Benne' judío xeelé' che dxeajlí lazre' Cristo ca dxaca chee xezícadxa benne'

¹⁵ Cá'aqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezícadxa xezr la xu ca'. ¹⁶ Nézedxu netú benne' quebe xegá'ane' xrlátaje lau Dios lawe' da nune' da bdxixruj be'e Moisés, san tuze che dxeajlí lazre' Jesucristo. Chee le na' cá'aqueze dxi'u dxeajlí lázredxu Cristo chee xegá'anadxu xrlátaje lau Dios ne chee xel-la dxeajlí lazre' cheedxu Cristo, ne quegá lawe' da bendxu ca nadxixruj bea na. Netú benne' quebe xegá'ane' xrlátaje lau Dios lawe' da nune' da nadxixruj bea na.

17 Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxulé'e na ne nácadxu benne' dul-la, ¿nnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¡Cabata! 18 Che dxuchínnaja' tu, na' che te na' xexuna' na, na' nabaga' zria. 19 Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee da nun Dios. 20 Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee le na', québedxa naca bana' neda'. Cristo naca bané' lu xichaj lázrdawa'. Xel-la nabán da napa' lu bela' dxen chia', napa' na ne chee xel-la dxeajlí lazre' chia' Zri'ine Dios, Bénnea' bzri'ine' neda', ne bzane cuine', gutie' waláz chia' neda'. 21 Quebe dxaca lazra' guzúa' chalá'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nune' da nadxixruj bea na, na' dácheze guca da ben Cristo gate gutie'.

3

Dxezidxu Be' Lá'azxa ne chee xel-la dxeajlí lazre'

1 Bi bicha', zrale Galacia, nácale le'e benne' xala ca'. ¿Zua nu benne' dxezí xe'e le'e chee québedxa guzúale dizra' chee da li? Ba blé'entu' le'e caníqueze Jesucristo, ca gudé'e le'e xaga béguaj. 2 Le xexque neda': ¿Guzile Be' Lá'azxa lawe' da benle da bdxixruj be'e Moisés, u lawe' da guxéajlele chee da bennele? 3 ¿Ájala chee na' nácale benne' xala? ¿Dxéquele gunle gácale duté da na' guzú laule gácale ne chee Be' Lá'azxa? 4 ¿Dácheze gudete zánete xel-la zi' ca'? Dxaca lazra' quebe guca na níteze. 5 Gate Dios dxunne' le'e Be' Lá'azxa chee', ne dxune' xel-la waca ca' chee xabáa ládujla le'e, ¿dxune' na lawe' da dxunle ca nadxixruj bea na, u lawe' da guxéajlele chee dizra' chawe' da bennele?

6 Abraham guxeajlí lazre' Dios, na' Dios guzú' lu ne'e da nigá ca tu da bca'ana le' xlátaje. 7 Chee le na' dxal-la' nézele, benne' ca' da li zaj naque' zri'ine zre sua Abraham zaj naque' benne' dxeleajlí lazre' Dios. 8 Naxúaj na lu dizra' lá'azxa ca naca da nigá. Lawe' da neze Dios nédxute gucá'ane' xlátaje benne' quebe zaj naque' judío, benne' xeleajlí lazre' Le', na' guzre' Abraham nédxute dizra' chawe' nigá, gunné': "Gaca chawe' chee benne' duté xezr la xu ne chiu' lue'." 9 Ca'an naca, dxaca chawe' chee benne' dxeleajlí lazre' Dios tu zren nen Abraham, bénnea' guxeajlí lazre' Dios.

10 Benne' ca' dxuluxrén lazre' zaj nagá'ane' xrlátaje lau Dios lawe' da zaj nune' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de'

xúgute benne' quebe dxelúnqueze' xúgute da nadxixruj bea na, da na' naxúaj na lu xiche lá'azxa. ¹¹ Dxunna bea na netú benne' quebe xegá'ane' xrlátaje lau Dios lawe' da nune' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ane' xrlátaje lau Dios gata' chee' xel-la nabán li lazre' che dxeajlí lazre' Dios. ¹² Bénnea' dxune' ca bdxixruj be'e Moisés quebe dxune' na ne chee' xel-la dxeajlí lazre' chee' lawe' da naxúaj da dxenná na: Benne' dxune' xúgute da caní gaca bane' ne chee' le na.

¹³ Cristo bselé' dxi'u lu de' da xu'u nu quebe dxun da nadxixruj bea na lawe' da guxú'uqueze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. ¹⁴ Da nigá guca na chee' gaca gun Dios xrlátaje benne' ca' quebe zaj naque' benne' judío, da na' guchebe lazre' guné' lau Abraham ne chee' Jesucristo, na' chee' si' lu nnadxu xúgutedxu Be' Lá'azxa ne chee' xel-la dxeajlí lazre' cheedxu ca da guchebe lazre' Dios.

Da naca chee' da nadxixruj bea na, ne da naca chee' da guchebe lazre' Dios

¹⁵ Bi bicha', dxulé'eda' le'e ca da dxaca chee' bénneache. Gate tu benne' dxune' tu xel-la wezría, ne ba bzuajte' láqueze' lawe na, netú benne' quebe gaca guchinnaje' na, ne quebe bi gaca gudé'e chee' na. ¹⁶ Dios guchebe lazre' da guné' chee' Abraham, ne chee' zri'ine zre sue'. Quebe dxenná na: Chee' zri'ine zre sue' ca', da naca na chee' benne' zan, san dxenná na: Chee' zri'ine zre su', da naca na chee' tuze benne', bénnea' naque' Cristo. ¹⁷ Da dxennia' naca na da nigá: Dios bene' tu xel-la wezría nen Abraham, ne bca'ana chawe' na. Chee' le na', da bdxixruj be'e Moisés da bla' na ca gudé tapa gaxúa chi dxua iza quebe gaca guchinnaj na xel-la wezría na', u xucá'ana na dácheze da guchebe lazre' Dios. ¹⁸ Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' gunézruje' na cá'aze chee' Abraham.

¹⁹ Na'a xca', ¿bizra dxun da bdxixruj be'e Moisés? Dios bnézruje' da na' gudé na' chee' gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios guné' da xrlátaje chee'. Dios gusel-le' da gunná bé'ene' lu na' gubáz chee' xabáa chee', na' Moisés guque' benne' dxudé dizra' cheen. ²⁰ Quebe dxun na ba xen nu benne' gudé dizra' gate naca na chee' tuze benne', na' Dios naque' tuze, Bénnea' guchebe lazre' chee' Abraham ca da guné'.

Da dxun da bdxixruj be'e Moisés

²¹ ¿Nnadxu dxedábaga da bdxixruj be'e Moisés da na' guchebe lazre' Dios? ¡Cabata'! Che da nadxixruj bea na da bnezruj Dios gaca gunna na xel-la nabán chee Bénneache, na' gaca xegá'ana xrlátaje lau Dios tu benne' che gunē' ca da nadxixruj bea na na'. ²² Dxenná na lu dizra' lá'azxa, xúgute Bénneache zaj nabague' dul-la chee gaca xelezí' lu ne'e da guchebe lazre' Dios gunne' benne' ca' xeleajlí lazre' Jesucristo.

²³ Nédxudxa ca bzrin zra gaca nu cheajlí lazre' Cristo, ne chee da nadxixruj bea na, xúgutedxu, benne' judío, gúcadxu ca benne' zaj xu'e lizre xia, lawe' da xadíaze bendxu ca dxenná da nadxixruj bea na, na' guléxadxu ca bzrin zra guca cheajlí lázredxu Cristo. ²⁴ Da nadxixruj bea na gunná be'e na dxi'u, ca dxun tu benne' dxusegule' bidau' chee benne' xula cadxa bzrin zra bla' Cristo, chee xegá'anadxu xrlátaje lau Dios gate guxeajlí lázredxu Cristo. ²⁵ Na'a lawe' da ba bzrin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

²⁶ Xúgutele na' dxeajlí lázrele Jesucristo nácale tuze nen Le'. Chee le na' nácale bi chee Dios. ²⁷ Xúgutele le'e na' gudxúale nisa chee gácale tuze nen Cristo, Le' naque' chee ca tu ladxe' nácale. ²⁸ Québedxa dxelé'e Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxelé'eng' le'e, naca xúgutele ca tuze bel-la' dxen lawe' da nácale tuze nen Jesucristo. ²⁹ Che nácale bi chee Cristo, da li nácale zre sua Abraham, na' gaca chee da guchebe lazre' Dios gunē'.

4

¹ Da dxaca lazra' nnia' naca na da nigá: Dxácate ne naca bidau' bi na' gaca cheebe' da naca chee xrabe', nácabe' ca bi nada'u xu'ube' lu na' xránabe', lácala da li gácabe' xrane xúgute da de lizre xrabe'. ² Xu'ube' lu na' benne' dxulusédene'-be', ne lu na' benne' ca' xu'u lu ne'e da naca cheebe', cadxa zrin zra gulé'e xrabe' da li nácabe' zrí'ine'. ³ Cá'anqueze dxaca cheedxu. Gate ne nácadxu ca bidau', xú'udxu lu na' xúgute da dxelenná bea na lu xezr la xu nigá. ⁴ Gate bzrin zra ba ble'e lau Dios, na' gusel-le' Zrí'ine', gúlajbe' ne chee tu nu'ula, na' guxú'e lu na' da bdxixruj be'e Moisés. ⁵ Ble'e bselé' benne' zaj xu'e lu na' da nadxixruj bea na, chee gaca si' lu na' Dios dxi'u ca zrí'inequeze'.

⁶ Lawe' da ba nácale bi chee Dios, Le' gusel-le' Be' Lá'azxa chee Zrí'ine' lu xichaj lázrdaule, na' dxenná Be' na': "Abba", da zéaje na: Xrae. ⁷ Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e

Moisés. Na' lawe' da nácadxu bi chee', Dios gunne' dxi'u da de cheen'. Caní naca lawe' da nácadxu Cristo tuze.

Pablo dxe'e gunne xue chee bi ca' chee Cristo

⁸ Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios. ⁹ Na'a gate ba núnbeale Dios, u nnadxu, Dios na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xezr la xu nigá, da ca' quebe zaj zaca? ¹⁰ Le'e ne dxapa ba lá'anale bal-la zra ca', ne bal-la beu' ca', ne tu tu iza ca'. ¹¹ Dxezrébele'a bena' zrin níteze ládujla le'e gate bzenda' le'e dizra' chawe' chee Cristo.

¹² Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calela benle chia' neda'. ¹³ Ba nézquezle gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'. ¹⁴ Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guzú' lu na'le neda' ca tu gubáz chee xabáa chee Dios, u ca náqueza' Jesucristo. ¹⁵ ¿Bizra guca chee xel-la dxebé da guzúale? Waca nnia' tu da xecá'ana le'e chawe', la naca da guzéquele gunle, bebéajtele xiaj láuquezle, chee gúnnale na neda'. ¹⁶ Na'a, ¿bexaca' ca tu benne' dxecuídenē' le'e lawe' da gucha' le'e da li?

¹⁷ Benne' ca' dxelaca lazre' chugu lu belá' chee le da na' dxulé'e na, dxe'e gunne xue chee le le'e, san quegá chee xegá'anale chawe'. Da dxelaca lazre' naca na xulucuase' le'e nen netu' chee cuele gunne xue chee le'. ¹⁸ Naca chawe' cuedxu gunne xue chee benne' xula chee xegá'ane' chawe', ne quegaze gate zúalēna' le'e. ¹⁹ Zrí'ina'dau', naca chia' ca zua' lu xel-la dxudía ne chee le ca dxaca chee tu nu'ula ba zua sane' bidau', ne wabédxequeza' gunne xue chee le cadxa gulé'e lau da li dxenná bea Cristo lu xichaj lázrdaule. ²⁰ Dxezé lazra' súalēna' le'e ná'aqueze chee gaca guchálajlēna' le'e xezícadxa dizra' lawe' da dxezí'alē'a gunne xue.

Da dxusede dxi'u ca guca chee Sara, ne chee Agar

²¹ Le'e na', dxaca lázrele chu'ule lu na' da bdxixruj be'e Moisés, le xeché bexque da nigá: ¿Quebe ne xénnele ca dxenná da nadxixruj bea na? ²² Dxenná na gulezrá' chupa zri'ine Abraham. Tube' gúcabe' zri'ine zrú'ulaqueze', nu'ula quebe nada'u. ²³ Zri'ine nu'ula nada'u gúlajbe' cáteze dxelalaj xúgute bidau', na' zri'ine nu'ula quebe nada'u gúlajbe' chee guca li ca da guchebe lazre' Dios. ²⁴ Da nigá naca na ca tu da dxulé'e na. Dxúpatē nu'ula caní dxululé'ene' ca zaj naca chupa xel-la wezríá. Tu xel-la wezríá nigá naca na da bnezruj Dios Moisés

lu xi'a Sinaí, da na' dxulé'e Agar. Benne' ca' zaj xu'e lu na' xel-la wezría nigá dxelálaje' ca benne' zaj nada'u. ²⁵ Cá'anqueze dxulé'e Agar da naca chee xi'a Sinaí da zua na ga nababa Arabia, Cá'anqueze xi'a nigá dxulé'e na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zrí'ine' ca'. ²⁶ Benne' zaj nababe' Jerusalén chee xabáa quebe zaj naque' benne' zaj nada'u, na' dxi'u nácadxu ca zrí'ine benne' ca'. ²⁷ Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na:

Gubé lue', nu'ula wizre, lue' quebe nu chilá' zrí'inu'.

Gudxezre xa'a lu xel-la dxebé, lue' quebe númbe'u xel-la dx-
udía

chee xel-la dxezán bidau'.

Nu'ula quebe guzán bidau' gate guque' cuide' waxandxa
zrí'ine'

quézcala zrí'ine nu'ula zúalene' benne' chee'.

²⁸ Le'e, bi bícha'dau', nácadxu ca Isaac. Nácadxu zrí'ine Abraham, bi ca' guchebe lazre' Dios gunézruje' le'. ²⁹ Na'a ca guca lu zra na', Ismael, zrí'ine Abraham na', bi gúlajbe' ca dxelalaj xúgute bidau', gudáu zi' xúzrebe' Isaac, zrí'ine Abraham na', bi gúlajbe' ne chee Be' chee Dios, cá'anqueze dxaca na na'a. ³⁰ Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zrí'ine' lawe' da quebe gaca chee zrí'ine nu'ula nada'u sibe' da dxal-la' si' zrí'ine nu'ula quebe nada'u. ³¹ Ca' naca na, bi bicha', quebe nácadxu ca Ismael, zrí'ine nu'ula nada'u, san nácadxu ca Isaac, zrí'ine zru'ula Abraham, nu'ula quebe nada'u.

5

Le sua chuchu lu xel-la weselá

¹ Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

² Le xene da dxapa' le'e. Neda', Pablo, dxapa' le'e, che güele lataj chugu lu bēla' chee da na' dxulé'e na, quebe bi da ba neza gaca chee da naca chee Cristo. ³ Dxaca lazra' xapa' le'e xecha lasa, che nu benne' chugu lu bēla' chee' da na' dxulé'e na, dxun na ba xen gun bēnea' xúgute da bdxixruj be'e Moisés. ⁴ Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee Cristo, ne dxexebéaj cuínale lu xel-la zrí'i lazre' chee Dios.

⁵ Dxi'u, ne chee Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios. ⁶ Che nácadxu tuze nen Cristo, quebe bi da ba neza gaca na cheedxu che

chugu lu bēla' cheēdxu da na' dxul'é na, u che quebe chugu na. Da ba neza naca na cheēdxu che dxeajlí lázredxu Cristo, na' xel-la dxeajlí lazre' cheēdxu dxuzúa na dxi'u lu xel-la zri'i lazre'.

⁷ Da xrlátaje bēnquezele. ¿Nuzra gulú'u xel-la le'e chee québedxa guzúale dizra' da li? ⁸ Quegá Dios bēne' da na'. Nácaqueze Le' Bēneea' bláwizre' le'e. ⁹ Quebe gal-la lázrele da dxenná na: Láteze cua zichaj dxuchazra na ca naca cua. ¹⁰ Dxuxrén lazra' Xránadxu ca naca cheēle le'e, quebe guzúale chalá'ala da nigá dxuchálaja'. Dios gudé' lu da ba xa' bēneea' dxun zréajene' le'e, núteteze naque'.

¹¹ Da naca chia', bi bicha', la xapa' neda' bēneache dxal-la' chugu lu bēla' cheē' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee xaga béguaj chee Cristo. ¹² Na'a ca naca chee benne' ca', benne' dxelún zréajene' le'e, ne dxelenné' dxal-la' chugu lu bēla' cheēle da na' dxulé'e na, dxaca lazra' chugu ca da zaj naca benne' ca' chee québedxa xelún zréajene' le'e.

¹³ Bi bícha'dau', Dios bláwizre' le'e chee gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee gunle ca da dxezá lázrele. Le gun cuínale ca benne' zaj nada'u, chee gunle zrin chee le sa' ljwézrele tule xetule lu xel-la zri'i lazre' cheēle. ¹⁴ Xúgutē da nadxixruj bea na dxun bēneea' dxuzúe' dizra' da na' dxenná na: Bzri'i le sa' ljwezru' cáteze nazrí'i cuinu'. ¹⁵ Che dxunle ca dxelún bē xixre' ca', ne dxun zi' ljwézrele, ne dxasa ljwézrele tule xetule, le guxúe ga guzrí xi' cuínale.

Da dxundxu cáteze dxezá lazre' bēla' dxen cheēdxu, ne da dxundxu cáteze dxezá lazre' Be' Lá'azxa

¹⁶ Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' bēla' dxen cheēle. ¹⁷ Da dxezá lazre' bēla' dxen cheēdxu dxedíl-lalē na da dxezá lazre' Be' Lá'azxa, na' da dxezá lazre' Be' Lá'azxa dxedíl-lalē na da dxezá lazre' bēla' dxen cheēdxu. Dxúpatē da caní dxeledíl-lalē ljwezre na, na' chee le na' quebe gaca gunle da dxaca lázrele gunle. ¹⁸ Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

¹⁹ Zaj nulé'e láuqueze da dxelún benne' ca' dxelunē' cáteze da dxezá lazre' bēla' dxen chee':

Deledálēne' nu'ula xula.

Dulucá'ana dítaje' le sa' ljwezre'

Dxelunē' da sban, ne da schanni'.

²⁰ Dxelúe szrene' bedau' xiaj xaga, ne dxelunē' xel-la wazrá'.

Dxelecuídenē' le sa' ljwezre', ne dxelezzré'ē.

Dxelaque' wide', ne dxelezá'a xíchajé'.

Dxelenné' chee ljwezre'.

Dxelebéaj xichaj ljwezre' tue' xetue', ne dxelaque' chupa la'a.

²¹ Dxelaque' xa lazre', ne dxelutie' benne'.

Dxelezúzrene', ne dxeledanne' da calela da dxelune' lu laní ca'.

Zánete da dxelundxe' bi chee da caní. Che le na' dxapa' le'e ca bénqueza' nédxute, benne' dxelune' da caní quebe xelexú'e naga dxenná bea Dios.

²² Da dxelún benne' ca' dxelune' cáteze da dxulé'e Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebe'.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelune' da zri'a chawe'.

Zaj naque' li lazre'.

²³ Zaj naque' dxexruj lazre', ne dxelenná be'e cuine'.

Quebe de da nadxixruj bea na da dxé na dxi'u quebe gundxu

da caní. ²⁴ Benne' ca' zaj naque' bi chee Cristo ba buludé'e le'e xaga béguaj bela' dxen chee' nen xúguté da dxezá lazre na.

²⁵ Che naca bandxu ne chee Be' Lá'azxa, dxal-la' gundxu ca da dxulé'e Be' Lá'azxa dxi'u.

²⁶ Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

6

Le gácale le sa' ljwézrele tule xetule

¹ Bi bícha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bénnea' chee xezé chúchue'. Dخال-la' gácale dxexruj lazre' gunle da nigá chee quebe güele lataj da xriwe' cu'u xel-la na le'e. ² Le gácale le sa' ljwézrele tule xetule lu da naca xua cheele, na' caní gunle ca nadxixruj be'e Cristo.

³ Che nu benne' dxéque' naque' benne' blau, ne quebe nu naque', dxezi xézqueze cuine'. ⁴ Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetu' benne'. ⁵ De tu xua da nabágadxu chee Cristo, da dxal-la' gua tu tu benne'.

⁶ Benne' zua nu dxusede le' ca naca xrtizra Dios dxal-la' gunézruje' late' da naca chee' chee' bénnea'.

⁷ Quebe si xe cuínale: Netú benne' gaca quítajlene' Dios. Da dxaza bénneache, léqueze na xelape'. ⁸ Che dxune' da dxezá lazre' bela' dxen chee', da xezi'e naca na xel-la gute, na' che dxune' da dxezá lazre' Be' Lá'azxa, da xezi'e naca na xel-la nabán zeajlí canna. ⁹ Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizrux Dios dxi'u, na' xezidxu lazruj cheedxu. ¹⁰ Chee le

na', gate nazidxu lataj, dxal-la' gundxu da xrlátaje chee le sa' ljuézredxu, ne da dxundxa na ba xen, gundxu da xrlátaje chee le sa' ljuézredxu dxeleajlí lazre' Cristo.

Da bzuaj Pablo nen ná'queze'

¹¹ Le nna'xque cadite da zri'a naca da nigá dxuzúaja' chee le nen ná'queza'. ¹² Benne' ca' dxelaca lazre' chugu lu belá' chee le da na' dxulé'e na, dxelune' na chee xelexegá'ane' chawe' lau benneache, ne chee quebe xeláu zi' xuzre' le' lawe' da dxuluchálaje' dizra' chee da ben Cristo le'e xaga béguaj. ¹³ Benne' caní, benne' zaj nadxugu lu belá' chee' da na' dxulé'e na quebe dxelune' xúgute ca da nadxixruj bea na. Dxelaca lazre' chugu lu belá' chee le da na' dxulé'e na chee gaca xulucá'ana szren cuine' ca naca da belune' chee le. ¹⁴ Quebe dxaca lazra' xucá'ana szren cuina' chee tu da bena', san tuze chee da ben Xránadxu Jesucristo le'e xaga béguaj. Ne chee Le' naca xezr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu. ¹⁵ Che nácadxu tuze nen Cristo, quebe bi da ba neza gaca na cheedxu che nadxugu lu belá' cheedxu da na' dxulé'e na, u che quebe nadxugu na. Da ba neza naca na cheedxu che nácadxu benne' cube lu xichaj lárdaudxu. ¹⁶ Dxenaba' lau Dios gunézruje' xel-la dxebeza zri lazre' chee xúgute benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

¹⁷ Lawe' da zaj zria lu bel-la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

¹⁸ Le'e, bi bícha'dau', dxenaba' lau Xránadxu Jesucristo gune' chawe' chee xúgute le. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO

Pablo dxugape' diuzre bi chee Cristo zaj zre'e xezre Efeso

¹ Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá chee le'e, nácale bi chee Dios, ne dxeajlí lázrele Jesucristo, na' zrale xezre Éfeso. ² Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

Ca naca da chawe' da dxezi' lu nnadxu ne chee Cristo

³ Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'azxa da zá'aca xabáa lawe' da nácadxu bi chee Cristo. ⁴ Dios guqu'é dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'azxa, ne du lazre' lau Le'. ⁵ Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' guné'. ⁶ Chee le na', tu dxue lá'anazquezdxu Dios ne chee xel-la xrlátaje chee' da naca na szrente. Lu xel-la xrlátaje chee' na' gúcalene' dxi'u lawe' da nácadxu tuze nen Zrí'ine', bi nazri'ite lazre'. ⁷ Ne chee Zrí'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. ⁸ Dios nazrí'ile'ene' dxi'u, ne dxunne' dxi'u xel-la sina, ne xel-la dxéajni'i, ⁹ na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' ba núnqueze' guné' ne chee Cristo. ¹⁰ Nuchague' xúgute da zaj zua na xabáa, ne xezr la xu, chee xelú'u na lu na' Cristo, da gusexúzre' guné' gate zrin zra chee na.

¹¹ Ne chee Cristo Dios guqu'é dxi'u chee' gate nate, chee si' lu nnadxu da xáladxu da gunna Le', ca da ba núnqueze Dios, Bénnea' dxune' xúgute da dxeque Le' xrlátaje. ¹² Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. ¹³ Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi chee', ca guchebe lazre' guné'. ¹⁴ Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee güe lá'anaquezdxu Le' ca naca xel-la szren chee'.

Dxenaba Pablo gunezruj Dios xel-la sina chee bi ca' chee Cristo

¹⁵ Chee le na' gate benda' ca dxeajlí lázrele Cristo, ne ca nazrí'ile xúgute bi ca' chee Dios, ¹⁶ dxápaqueza' Dios; Xcalenu', ca naca chee le'e gate dxuchálajle'na' Dios, ne dxeajsá lázrqueza' le'e. ¹⁷ Dxenaba' Dios chee Xránadxu Jesucristo, naque' Xradxu zue' xabáa, gunne' le'e xel-la sina lu be' nácaqueze da gulé'e na le'e gúnbea xánnele Le'. ¹⁸ Dxenaba' lau Dios guzáajni'ine xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a chee xel-la szren da gunezruj Dios bi chee ca', ¹⁹ ne ca naca xel-la waca zrente chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' ²⁰ gate bsebané' Cristo ládujla benne' gate ca', ne guleche' Le' chalá'a xabéla chee' xabáa, ²¹ ne bzue' Le' chee nna bé'ene' xúgute benne' blau xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. ²² Bzue' xúgute da zaj zua lu na' Cristo, ne bzue' Le' gaque' benne' xichaje chee bi chee ca' ca naca xúgute da dxelune'. ²³ Benne' caní zaj naque' ca bēla' dxen chee Cristo, da dxulé'e na duté ca nácaqueze Le', Bēne' dxusexuzre' dxucá'ana chawe' ca naca xúgute da zaj zua.

2

Naca bandxu lawe' da nazrí'i Dios dxi'u

¹ Gate nate gúcale ca benne' gate lu xichaj lázrdaule ne chee da caléla ca', ne dul-la ca' ² da benle gate ne dxunle ca dxelún bēneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios. ³ Cá'anqueze dxi'u, xúgutedxu bēndxu caní gate nate, gate bēndxu cáteze da guzá lázredxu, ne bēndxu ca da gunná bēla' dxen cheedxu, ne ca da gunná xichaj lázrdaudxu. Chee le na' guca na cheedxu sidxu da zi' da xa' chee Dios ca guné' chee xezícadxa benne' ca', ⁴ san Dios bexache lázrele' dxi'u, ne bzrí'ile'ene' dxi'u, ⁵ na' bēne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. ⁶ Cá'anqueze bsebán Dios dxi'u tu zren nen Jesucristo, ne guleche' dxi'u tu zren nen Le' xabáa. ⁷ Bēne' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e bēne' cheedxu ne chee Jesucristo. ⁸ Lu xel-la xrlátaje chee Dios bselé' le'e lawe' da guxeajlí lázrele Cristo.

Quebe naca na ne chee bi da benle le'e, san naca na tu da ben Dios cá'aze ne chee. ⁹ Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. ¹⁰ Dios bene' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

Nácadxu tuze ne chee Cristo

¹¹ Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bel-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' chee nácale benne' quebe zaj nadxugu. ¹² Lu zra ca' quebe guzúale Cristo le'e. Quebe benle tuze benne' Israel ca', ne quebe bēnbeale ca naca xel-la wezría da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bēnbeale Dios. Gate nate guzrale zítu'la naga zua Dios. ¹³ Na'a ne chee Cristo Dios ba bzué' le'e gágutę lawe' da gute Cristo waláz chee. ¹⁴ Léqueze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. ¹⁵ Gate gute Jesús waláz cheedxu guchugue' da nadxixruj bea na da naca na da gunná Dios gundxu, ne da ca' dxelenná bea na, na' bexune' dxúpatę xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. ¹⁶ Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpatę xezr ca', na' bexune' dxúpatę tuze bel-la' dxen, ne bexune' le' tuze nen Dios.

¹⁷ Bla' Cristo, ne bzenne' le'e dizra' chawe' chee', le'e quebe nácale judío, na' guzrale zitu' naga zua Dios, ne le'e nácale judío, na' guzrale gagu naga zua Dios, ¹⁸ na' ne chee Cristo, xúgutędxu, benne' judío ca', ne benne' quebe zaj naque' judío, dxebígadxu lau Xradxu Dios ne chee Be' Lá'azxa. ¹⁹ Chee le' na' le'e, benne' quebe nácale judío, québedxa nácale ca benne' zitu' tu lu xezr la xu da quebe naca na chee, san nácale benne' walazre' ca xúgutę benne' ca' zaj nababa chee Dios. Nabábale Zri'ine Dios. ²⁰ Nácale ca tu xu'u zren da zria na lawe' lane da gulixruj benne' gubáz ca' chee Cristo, ne benne' ca' buluchálaje' waláz chee Dios, na' Jesucristo nácaqueze' xiaj blau chee lane xu'u na'. ²¹ Lawe' lane nigá da naca Cristo, dute xu'u na' dxegula na tu li chee gaca na tu xudau' lá'azxa chee Xránadxu. ²² Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

3

Pablo dxuzenne' benne' quebe zaj naque' judío dizra' chawe'

¹ Chee le na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo chee gaca chawe' chee le'e, quebe nácale judío. ² Ba nézele ca ben Dios lu xel-la xrlátaje chee', bsebage' neda' guchálaja' dizra' chawe' chee Cristo ládujla le'e. ³ Lu da ble'e Dios neda' bzéajni'ine' neda' tu da nagache chee' ca da bzuaja' chee le nedxu. ⁴ Gate gulábale na weque bé'equezle núnbe'a da nagache ca naca chee Cristo. ⁵ Guca na tu da nagache gate nate. Dios quebe bzéajni'ine' na bénneache, san na'a ne chee Be' Lá'azxa chee' ba blé'ene' na benne' gubáz lá'azxa ca', na' benne' ca' dxuluchálaje' waláz chee'. ⁶ Caní naca da nagache na': Ne chee dizra' chawe' chee Cristo benne' quebe zaj naque' judío welezí' queze' da gunezruj Dios le' ca da xelezí' benne' judío ca', ne zaj naque' tuze bel-la' dxen, ne xelezí' queze' tu zren da nachebe lazre' Dios ne chee Jesucristo.

⁷ Dios bene' neda' wen zrin chee dizra' chawe' na' ne chee tu da bénnaze' neda', bchínene' xel-la waca zren chee'. ⁸ Neda' nácadxa' benne' baxáche ca xúgute benne' zaj naca bi chee Dios. Bene' neda' tu culuén zren chee guzenda' benne' quebe zaj naque' judío dizra' chawe' ca naca xel-la gunní'a zrente chee Cristo. ⁹ Bsebage' neda' guzéajni'ida' xúgute bénneache ca da nun Dios gune' da bgache gate nate, na' naca Dios Bénnea' bene' xúgute da zaj zua, ¹⁰ chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrente chee Dios. Xelúnbe'e na ne chee benne' ca' zaj naca bi chee Cristo. ¹¹ Da nigá ben Dios ca da nune' gate nate gusexuzre' ne chee Xránadxu Jesucristo. ¹² Ne chee Cristo waca bígadxu lau Dios du lázredxu, ne duté xel-la dxuxrén lazre' cheedxu lawe' da dxeajlí lázredxu Le'. ¹³ Chee le na' dxata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na chee le tu da ba neza.

Xel-la zri'i lazre' chee Cristo

¹⁴ Chee le na' dxuzú zriba' lau Xra Xránadxu Jesucristo, ¹⁵ Bénnea' dxuzúe' la cha chee benne' zaj zre'e xabáa, ne xezr la xu. ¹⁶ Dxenaba' lau Xradxu, ca naca xel-la gunní'a zrente chee' guzé tipe' le'e nen xel-la waca chee' lu xichaj lázrdaule ne chee Be' Lá'azxa chee', ¹⁷ chee sua Cristo lázrdaule ne chee xel-la dxeajlí lazre' chee le, ne se cháchale lu xel-la zri'i lazre', ca tu xaga da nudé lue na sítujla, ¹⁸ chee seque' chéajni'ile tu zren nen xúgute bi chee' ca nazriluj, ne ca natunna, ne ca nasituj, ne ca nasibe xel-la zri'i lazre' chee Cristo. ¹⁹ Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu duté ca naca na. Caní dxenaba' Le' chee suale le'e duté da nácaqueze Dios.

20 Na'a, gaca báqueze Dios, Bénnea' nape' xel-la waca gúnle'equeze' da zrendxa ca da dxenábadxu, u ca da dxéquedxu, ne chee xel-la waca chee' da dxun na zrin lu xichaj lázrdaudxu. 21 Gaca ba Dios ládujla benne' zaj naque' bi chee Cristo ne chee Jesucristo xúgute iza chadía chacanna. ¡Ca'an gaca na!

4

Nácadxu tuze ne chee Be' Lá'azxa

1 Chee le na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bénneache ba gucá'a Dios le', ca gucá'aqueze' le'e. 2 Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee. 3 Le gun ba xuzre gácaquezle tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

4 Tuze naca bela' dxen chee Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sídxu lu na' Dios.

5 Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

6 Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaqueze' lu xichaj lázrdau xúgutedxu.

7 Tu tudxu nasídxu tu xel-la waca cha cheedxu ca da nunna Cristo dxi'u.

8 Naca na ca naxúaj na lu dizra' lá'azxa, dxenná na:

Begüene' xabáa, gate gudé bzétaje' benne' guledábage' Le'.

Na' bnézruje' bénneache xel-la waca ca'.

9 ¿Bi zéaje na, dxenná na: Begüene'? Zéaje na nédxula bétaje' lu xezr la xu nigá. 10 Bénnea' bétaje' nácaqueze' Bénnea' begüene' lu da blaudxa lu xabáa chee gaca bea na xu'u lu ne'e xúgute da de, 11 na' benne' cha cheedxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusédedxu-be' xezícadxu.

12 Ca'an bene' chee bpa'adxé' bi chee' ca' chee xelunbe' zrin xulucá'anabe' xrlátaje bénneache ca' zaj naque' zruza ní'a na' Cristo:

13 Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

¹⁴ Caní nacan chee québedxa gácadxu ca bidu ca', bi ca' dxelez-ibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wen da zrinnaj ca' dxi'u, chee quebe xelezí xē'e dxi'u chee gundxu da calela.
¹⁵ Lu xel-la zri'i lazre' dxal-la' guchálajdxu da li chee gácadxu cáteze nácaqueze Cristo, Bénnea' naque' xichaj bel-la' dxen da nácadxu dxi'u. ¹⁶ Le' dxunē' tuze xúgute ni'a na' zaj zria bel-la' dxen chee' chee gaca na tu bel-la' dxen nazá'ate chee na, ne chee xelún zrin xúgute ni'a na' ca' chee gula bel-la' dxen na', ne gaca na chawe' lu xel-la zri'i lazre'.

Xel-la nabán cube da dxunna Cristo dxi'u

¹⁷ Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bénneache quebe zaj núnbe'e Dios, benne' ca' dxelunē' cáteze dxeléquene' xrlátaje, ¹⁸ benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bénneache: Zaj nachul-la nanítene', ne zaj naca zide' lázrdawe'.

¹⁹ Québedxa dxelexedué'ene'.

Belezanne cuine' dxelunē' da schanni'.

Du lazre' dxelunē' xúgute da sban.

²⁰ Quegá caní nazédele le'e chee Cristo, ²¹ che da li xca' bénele da dxuchalaj Le', ne nusédene' le'e ca naca da li da zúale Jesús.

²² Ca naca da benle nédxula, le guzúa chalá'ala da gúcale lawe' da guzrínajle lu da sban da guzá lázrele.

²³ Dخال-la' gácale benne' cube lu xichaj lázrdaule.

²⁴ Dخال-la' gunle da naca chee benne' cube na' da ben Dios le'e chee gunle da naca na xlátaje, ne da li da naca na lá'azxa.

²⁵ Chee le na' québedxa gun lázrele.

Le nne da li tule xetule lawe' da nácadxu ni'a na' tuze bel-la' dxen chee Cristo.

²⁶ Che dxezrá'ale, quebe dxal-la' gunle dul-la, ne quebe zrá'ale scha'.

²⁷ Quebe güele da xriwe' lataj guchixre chee na le'e.

²⁸ Bénnea' guque' gubán québedxa dxal-la' cuane'. Dخال-la' gunē' tu zrin chawe' nen ni'a ná'queze' chee gape' da gunēzruje' benne' dxelexázejene'.

²⁹ Quebe nnele dizra' calela. Le guchalaj da naca na xrlátaje chee xelezé tipa benne' xelenne', ne xelezí'e na ba neza.

³⁰ Quebe guzúa xáchele Be' Lá'azxa chee Dios, lawe' da zúale Be' le'e chee gaca bea na nácale bi chee Dios ca zrindxa zra xezí' lu ne'e dxi'u.

³¹ Le guzúa chalá'ala:

Xel-la dxecuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgute da zrinnaj.

³² Dخال-la' gácale du lazre', ne xache lázrele tule xetule, ne gunite laule chee tule xetule ca ben Dios, bnite lawe' chee le'e lawe' da nácale bi chee Cristo.

5

Ca dxal-la' xelaca bi ca' chee Dios

¹ Lawe' da nácale bi cheequeze Dios, bi nazri'ine', le gun ba xuzre gácale cáteze nácaqueze Le'. ² Le zri'i le sa' ljuwézrele tule xetule cáteze ben Cristo, bzri'ine' dxi'u, ne bzanne cuine' waláz cheedxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'e xaga béguaj, guca ca tu da dxelá zixre lau Dios da dxelegú'u bénneache lau Le'.

³ Lawe' da nácale bi chee Dios, québedxa dxal-la' guchálajle chee da dxucá'ana ditaj na bénneache, ne chee da sban ca', ne chee xel-la wecude' da de. ⁴ Quebe guchálajle dizra' schanni', ne dizra' bize, ne dizra' caleła, da quebe dxulucá'ana na chawe' bénneache, san dxal-la' xéquezele Dios: "Xcalenu'." ⁵ Ba nézquezele quebe chu'u naga dxenná bea Cristo nen Dios netú benne' dxucá'ana dítajé' bénneache, u tu benne' dxune' da sban, u tu benne' dxucúdie' da de, da naca na ca dxucá'ana szrene' bedau' xiaj xaga. ⁶ Quebe güele lataj nu si xe le'e nen dizra' xala, lawe' da ne chee da nigá dxesel-la Dios da dxusaca zi na benne' ca' quebe dxuluzúe' dizra' chee'. ⁷ Quebe gunle tu zren benne' dxelune' da caní.

⁸ Nédxute güzúale lu da chul-la, na' na'a zragale xel-la naxaní' lawe' da nácale bi chee Xránadxu. Chee le na', le gun da naca na chee xel-la naxaní', ⁹ da na' naca xel-la dxucá'ana chawe' ljuwézredxu, ne da xlátaje, ne da li. ¹⁰ Le gun zi' lázrele nézele gunle da dzezaca ba lazre' Xránadxu. ¹¹ Quebe gunle tu zren benne' dxelune' da caleła, da ca' naca chee da chul-la, san le til-la da ca' ¹² lawe' da naca na tu da xedué'edxu guchálajzedxu chee da dxelún benne' ca' bagácheze. ¹³ Gate dxeledxúaj da caní lu da chul-la, ne zaj xu'u na lu xel-la naxaní', gulé'e lawe' ca zaj naca xúgute' da caní, lawe' da dxulé'e lawe' xel-la naxaní' xúgute'. ¹⁴ Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazrda'u.

¹⁵ Chee le na', le guxúe xanne' ca da dxunle. Quebe gunle ca dxelún benne' zaj nachul-la nanítene', san le gun ca dxelún benne' zaj naxéajni'ine'. ¹⁶ Le guchine chawe' zra caní lawe' da dxácale'e da zrinnaj lu zra na'a zra. ¹⁷ Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. ¹⁸ Quebe súzrele, da na' dxuxrinnaj na bénneache, san du lázrele le si' Be' Lá'azxa. ¹⁹ Le guchálajle le sa' ljuwézrele tule

xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. ²⁰ Le xéqueze Xradxu Dios: "Xcalenu", chee xúgute lu La Xránadxu Jesucristo.

Ca dxal-la' xelún bi chee Cristo nen lwézrebe'

²¹ Le gaca dxexruj lazre' tule xetule, ne le gapa ba lá'ana Dios.

²² Nu'ula dxal-la' gaque' dxexruj lazre' lau benne' chee', cáteze dxal-la' gaque' lau Xránadxu, ²³ lawe' da naca benne' biu xíchaje chee zru'ule', cáteze naca Cristo xíchaje chee bi chee' ca'. Cristo naque' Benne' weselá chee bi chee' ca', bi zaj naca be' ca bel-la' dxen cheéqueze'. ²⁴ Cáteze zaj naca dxexruj lazre' bi chee' ca' lau Cristo, cá'aqueze nu'ula dxal-la' gaque' dxexruj lazre' lau benne' chee' lu xúgute.

²⁵ Benne' biu dxal-la' zrí'ine' zru'ule' cáteze ben Cristo, bzrí'ine' bi chee' ca', ne bzánene' xel-la nabán chee' ne cheebe'. ²⁶ Caní bene' chee bebéaje'-be' cheéqueze', ne ben chí'e-be' ne chee dizra' chee', da guca na ca dxun benne' dxexibe' bi chee' nen nisa, ²⁷ chee guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'. ²⁸ Cá'aqueze benne' biu dxal-la' zrí'ine' zru'ule' cáteze nazrí'ine' bel-la' dxen cheéqueze'. Benne' nazrí'ine' zru'ule' nazrí'i cuine'. ²⁹ Netú benne' quebe dxecuídene' bel-la' dxen cheéqueze', san dxugawe' na, ne dxuxúe' na, ca dxúnqueze Cristo chee bi chee' ca' ³⁰ lawe' da zaj nácabe' ca bel-la' dxen cheéqueze', na' dxi'u nácadxu ca ni'a na' bel-la' dxen chee', ne nácadxu ca bel-la' dxen chee', ne zrita chee'. ³¹ Chee le na' tu benne' biu dxal-la' gusané' xra xrne'e chee gaque' tuze nen zru'ule', na' dxúpaté' xelaque' ca tuze benne'. ³² Da nigá naca na tu da zren da nagache, na' dxennía' da caní ca naca chee Cristo nen bi chee' ca'. ³³ Cá'aqueze tu tule le'e dxal-la' zrí'ile zru'ulale cáteze nazrí'i cuínale, na' nu'ula dxal-la' gape' ba lá'ana benne' chee'.

6

¹ Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee, da naca na xlátaje. ² Da nadxixruj bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, ³ chee gaca chawe' chiu', ne chee su' scha' lu xezr la xu.

⁴ Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

⁵ Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le

zrebe le', ne du lázrele le gaca chee', cáteze dxuzúale dizra' chee Cristo. ⁶ Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bénneache chee'. Le gun zrin na' cáteze dxunle zrin chee Cristo, gunle du lázrele da dxaca lazre' Dios. ⁷ Le gun zrin chee xránale du lázrele, cáteze dxunle zrin chee Xránadxu, ne quegaze chee bénneache. ⁸ Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

⁹ Le'e, xrana benne' ca', cá'anqueze le gun le'e nen benne' wen zrin chee le ca', ne quebe guzálajle le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bénneache.

Zra lana bi chee Cristo da dxácale lebe' lu wedil-la

¹⁰ Na'a, bi bícha'dau', le gaca chuchu ne chee Xránadxu nen xel-la wala zren chee'. ¹¹ Le gaca ca benne' zjaque' wedil-la zaj nácue' zra lané' xia da na' dxunna Dios le'e, chee gaca se chúchule lau xúgute' da dxuzé da xriwe' laule chee si xe na le'e. ¹² Quegá dxedíl-lalédxu bénneache zaj naque' belá' dxen. Dxedíl-lalédxu xel-la dxenná bea chee da xriwe' da dxeledá na lu be', ne dxedíl-lalédxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. ¹³ Chee le na', le gaca ca benne' zjaque' wedil-la zaj nacue' zra lané' xia da dxunna Dios le'e, chee séquele súale wedil-la lu zra che da xriwe', na' ca te na' xegá'ana chúchule. ¹⁴ Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. ¹⁵ Le gaca sina chee guchálajle dizra' chawe' chee xel-la dxebeza zri lazre', da gaca na chee ca tu cue' zréale. ¹⁶ Da dxun na ba xen, le gapa xel-la dxeajlí lazre', da gaca na chee ca tu da xegapa na, da xusula na xúgute' da zaj nalá na zaj zua na xi' da dxuzala da xriwe'. ¹⁷ Xel-la weselá gaca na chee ca tu lapa xia da gucache xíchajle, na' xrtizra Dios gaca na chee ca tu xia da gunna Be' Lá'azxa le'e. ¹⁸ Gate ne dxunle da caní dxal-la' guchálajlele Dios, gata' xúele, ne nábale lau Le' ne chee Be' Lá'azxa. Chee gaca gunle da caní dxal-la' súale ban lazre', ne quebe gate ni'a na'le, na' nábale Dios chee gácalene' xúgute' bi chee' ca'. ¹⁹ Cá'anqueze le naba Le' waláz chia' neda' chee gunne' neda' dizra' da guchálaja', chee xazrda' guzenda' bénneache dizra' chawe' chee'. ²⁰ Dios bene' neda' gubáz chee dizra' chawe' chee', na' chee le na' xu'a lizre xia na'a. Le naba Le' gácalene' neda' chee xazrda' guchálaja' dizra' chawe' chee' ca dxal-la' guna'.

Pablo dxugape' diuzre le sa' ljwezre'

²¹ Tíquico, bi bíchedxu nazri'ite lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'.

²² Chee le na' dxusel-la'-be' lau le'e chee guzenbe' le'e ca zúantu', ne chee gutípabe' lázrele.

²³ Dxenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'e na' xel-la dxebeza zri lazre', ne xel-la zri'i lazre', ne xel-la dxeajlí lazre', ²⁴ na' gunę' chawe' xúgute benne' ca' du lazre' zaj nazri'ine' Xránadxu Jesucristo. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS

Pablo dxugape' diuzre bi bíchedxu ca' zaj zre'e xezre Filipos

¹ Neda' Pablo, ne Timoteo nácantu' wen zrin chee Jesucristo. Dxuzúaja' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na'le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. ² Dxenábantu' lau Xradxu Dios, ne lau Xránadxu Jesucristo gunē' chee da xrlátaje, ne gunne' le'e xel-la dxebeza zri lazre'.

Da dxenaba Pablo gun Dios chee bi ca' chee Cristo

³ Tu tu lasa dxajsá lazra' le'e dxapa' Dios chia': Xcalenu'. ⁴ Gate dxuchálajlena' Dios, dutē xel-la dxebe dxenábaqueza' bi gun Le' chee xúgutele le'e. ⁵ Caní dxuna' lawe' da dxundxu zrin tu zren chee dizra' chawe' chee Cristo gate guzú lau núnbe'tu' na bzrintē lu zra na'a zra. ⁶ Dxuxrén lazra' Dios, Bénnea' guzú lawe' dxune' tu zrin chawe' lu xichaj lázrdaule le'e, gúnqueze' na ca zrintē zra xelá' Jesucristo. ⁷ Naca xrlátaje dxéqueda' neda' caní chee xúgutele le'e, lawe' da nazrí'ile'eda' le'e, ne dxezidxu tu zren da chawe' ca' dxunna Dios dxi'u. Dxácatē ne xu'a lizre xia nigá, ne gate na' gudíl-lalēna' bénneache ca' dizra', benne' ca' guledábage' dizra' chawe' chee Cristo, ba ble'eda' benne' ca' naca na da li. ⁸ Dios nézquezenē' nazrí'ile'eda' le'e, lu dutē xel-la zri'i lazre' da dxunna Jesucristo neda'. ⁹ Dxenaba' lau Dios gunē' zrí'idxa ljwézrele, ne gápale'equezele xel-la sina, ne xel-la dxéajni'i lu xúgute da dxunle, ¹⁰ chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo. ¹¹ Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

Dxenná Pablo: Che naca bana', Cristo dxuchínene' neda'

¹² Le'e, bi bícha'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo. ¹³ Caní guca, xúgute benne' xra'aga xu'u lawe', ne xezícadxa benne' ca' zaj zre'e xu'u lawe' na' zaj nézenē' xu'a lizre xia lawe' da dxuna' zrin chee Cristo. ¹⁴ Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' chee Dios, ne quebe dxelezrebe'.

15 Da li bal-la benne' ca' dxuluchálaje' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezícadxa benne' caní dxuluchálaje' na dutę xel-la li lazre' chee'. 16 Benne' nedxu ca' dxuluchálaje' da naca chee Cristo chee xulucá'ana szren cuine', ne quegá du lazre', lawe' da dxelaca lazre' súadxa da guzúa na neda' stebe dxácatę xu'a lizre xia nigá. 17 Xezícadxa benne' ca' dxelune' na dutę xel-la zri'i lazre' chee', lawe' da zaj nézene' nuzúa cuina' guzėjni'ida' benne' ca' dxeledábague' dizra' chawe' chee Cristo. 18 ¿Bizra xca? Ájatezla dxelune', che dxuluchálaje' du lazre', u quebe dxuluchálaje' du lazre', dxuluchálaje' chee Cristo, na' dxebeda', ne wabéquezda' 19 lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'azxa neda', Bénnea' gusel-le' Jesucristo cheedxu. 20 Dxaca lazra', ne dxuxrén lazra' quebe xedué'eda' neda', séqueda' guchálaja' du lazra' chee xeledé'e bénneache zúaledxa xel-la szren chee Cristo neda' na'a, ca zúalequeze na neda', che gaca bana', u che gatia'. 21 Chia' neda', che naca bana', Cristo dxuchínene' neda', ne che gatia' wazrue'eda' da cháwedxa. 22 Che xedxúaj na chawe' chee zrin chee Xránadxu che naca bana', quebe nezda' bila na ca'a. 23 Naca na stebe chia' neda' bila da caní ca'a. Dxaca lazra' gatia' chee cheajsúalęna' Cristo, da gácadxa chawe' chia' neda', 24 san che naca bana' nácadxa chawe' chee le'e. 25 Lawe' da nuxrén lazra' naca caní, nezda' wazúaledxa' le'e chee se cháchadxale lu da naca chee Cristo, ne chee béquezdxale. 26 Chee le' na' bédxale lu da naca chee Cristo ne chia' neda' gate súalęna' le'e.

27 Dxun na ba xen gunle da dxuzėjni'i dizra' chawe' chee Cristo le'e, na' che xedajnná'a le'e, u che sua' zitu', wenda' ze cháchale, ne nácale tuze, dxunle tu zren zrin chee Cristo chee xeleajlí lazre' bénneache dizra' chawe' chee'. 28 Quebe zrébele benne' ca' dxeledábague' le'e. Ca dxunle gulé'e na le' xelebía xi'e, na' nalale le'e lawe' da bselá Dios le'e. 29 Tu da zrente naca da dxunna Dios le'e gate gunle zrin chee Cristo, quegaze chėjle chee', na' cá'anzeze che tele xel-la zi' ne chee Le'. 30 Le'e dxunle neda' tu zren dxedíl-laledxu da zaj naca da calęla. Blé'equeze gate nate ca gudíl-lalęna' na, na' na'a dxenle ca dxedíl-lalęna' na.

2

Xel-la dxexruj lazre', ne xel-la szren chee Cristo

1 Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'azxa chee' zúalęne' le'e, na' nápale xel-la zri'i lazre', ne xel-la dxexache lazre' chee'. 2 Chee le' na'

le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee, ne gunle tuze lu xichaj lázrdaule.
³ Quebe bi gunle chee xulucá'ana szren bénneache le'e, ne chee gaca gucá'ana szren cuínale, san dutę xel-la dxexruj lazre' chee dxal-la' guéquele nácadxa blau le sa' ljwézrele ca le'e.
⁴ Netule le'e quebe dxal-la' gunle ca da gácalęn le'eze. Le gun da gácalęn na xezícadxa bénneache.

⁵ Dخال-la' si' lu na'le da gaca na chee ca ben Jesucristo.
⁶ Lácala naque' ca nácaqueze Dios, quebe gúquene' dxal-la' gunę' ba xuzre xegá'anaqueze' ca Dios. ⁷ Bzue' chalá'ala da nápaqueze', ne ben cuine' ca tu benne' nada'u, guque' bénneache. ⁸ Gate ba naque' bénneache, guque' dxexruj lazre', na' bzue' dizra' chee Dios ca bzrintę gutię', lácala gutię' ca tu benne' wen da caleła le'e xaga béguaj. ⁹ Chee le na' Dios bca'ana szrénle'e Le', ne bzue' tu Le' da naca szrendxa ca xúgute la xezícadxa, ¹⁰ chee gate xellenę' La Jesús, na' xuluzú zribe lau Le' xúgute benne' zaj zře'e xabáa, ne xęzr la xu nigá, ne zran xęzr la xu nigá, ¹¹ ne chee xelexechebe xúgute' naca Jesucristo Xránadxu, chee gaca ba lá'ana Xradxu Dios.

Bi chee Cristo zaj nácabe' ca xi' da dxulusení na

¹² Chee le na', le'e, bi bicha' nazri'itę lazra', ca na' benle le'e, bzúaquezle dizra' chee Dios gate na' zúalęna' le'e, le guzúadxa dizra' chee Dios na'a gate zua' zitu'. Dute xel-la dxexruj lazre', ne dutę xel-la dxezrebe le gun zrin chee zru'é'ele dutę ca naca xel-la weselá chee, ¹³ lawe' da dxun Dios zrin lu xichaj lázrdaule chee sa lázrele gunle da xrlátaje da dxaca lazre' Le', ne chee séquele gunle na.

¹⁴ Le gun xúgute da dxunle, ne quebe gáchajele, ne quebe gutil-la dizra' ljwézrele ¹⁵ chee gácale li lazre', ne quebe nu nę chee. Gácale bi chee Dios du lazre' ládujla bénneache zaj naque' benne' dxelún da caleła, ne gácale ca belaj ca' dxulusení na lu xęzr la xu naga nachul-la na, ¹⁶ ne guchálajlele benne' ca' dizra' da nua na xel-la nabán. Che gunle caní, neda' wezaca ba lazra' chee gate xelá' Cristo, lawe' da wanezda' quebe ben zi' lazra' dácheze, ne quebe bena' zrin níteze. ¹⁷ Béle'eda' lácala gun na ba xen gatia' chee gaca li lazre' xel-la dxejlí lazre' chee lau Dios. Bzua cuínale lu na' Dios ca tu guna' da gúnnale chee', na' chee le na' béle'equezda' tu zren nen xúgutele le'e. ¹⁸ Le béquezle le'e, ne le gun tuze neda' lu xel-la dxebé chia'.

Ca naca chee Timoteo, ne Epafrodito

¹⁹ Che naca da dxaca lazre' Xránadxu Jesús, dxebęza lazra' sél-lazeęqueza' Timoteo xedajnná'abe' le'e, chee beda' gate xelabe', ne guzenbe' neda' chee le'e. ²⁰ Quebe nu chilá' xetú

benne' guéqueṅ' cheeḷe ca da dxéqueda' neda'. Tuze Timoteo dxe'ebe' gunne xue chee gaca chawe' cheeḷe le'e. ²¹ Xúgute benne' ca' xezícala zaj dxe'e gunne xue da zaj naca cheeḷe', ne quebe zaj dxe'e gunne xue da naca chee Jesucristo. ²² Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee Cristo, na' dxunbe' ca dxun tu bi dxácalebe' xrabe'. ²³ Caní naca, dxebeza lazra' sel-la'-be' gate nezda' ca gaca chia'. ²⁴ Dxuxrén lazra' Xránadxu, néda'queza' xida' xedajnná'a le'e.

²⁵ Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedíl-lalentu' da caleḷa. Lé'eequeze gusél-lale bi nigá chee gácalenbe' neda', ne xu'a lizre xia nigá. ²⁶ Dxezá lázreḷe'be' xedajnná'abe' le'e, ne zúale'be' stebe lawe' da nézebe' bénele quebe chawe' guzúabe'. ²⁷ Da li quebe chawe' guzúabe', ne bache gátebe', san Dios bexache lazre'lebe', ne quegá tuze lebe', cá'anqueze neda' chee quebe xewine lázredxa' ca da dxaca chia' na'a. ²⁸ Chee le na' dxezá lázredxa' sel-la' lebe' chee bele le'e gate xelé'ele lebe', ne chee québedxa xewine lazra' neda'. ²⁹ Le xezi' lu na'le lebe' dutē xel-la dxebé, ca bi bíchele lu da naca chee Xránadxu, ne le gápaqueze ba lá'ana benne' ca' zaj naque' ca lebe', ³⁰ lawe' da guzúa gátebe' dxunbe' zrin chee Cristo. Bzuabe' lu da stebe xel-la nabán cheebe' chee gunbe' zrin chia' da quebe guzéquele le'e gunle.

3

Da naca chawe' da naca na du lazre'

¹ Na'a, bi bicha', le be lu da naca chee Xránadxu. Quebe naca na zede chia' neda' guzúaja' cheeḷe xecha lasa ca da ba bzúajqueza', lawe' da dxun na ba xen guna' da nigá cheeḷe. ² Le guxúe cuínale chee benne' ca' dxelunē' da caleḷa, ne zaj naque' ca becu', benne' ca' dxelechugue' lu bel-la' dxen da na' naca bea na benne' zaj naque' chee Dios. ³ Dxi'u nácadxu benne' nápaquezdxu da dxunna bea na nácadxu chee Dios, ne dxue lá'anadxu Dios ne chee Be' Lá'azxa, ne dxebedxu lawe' da nácadxu bi chee Jesucristo. Quebe dxuxrén lázredxu da dxundxu, ⁴ lálcala neda' wazéqueda' guxrén lazra' da ca' nuna'. Che nu benne' dxéqueṅ' waca guxrén lazre' ca da ba nune', wazéquedxada' neda'. ⁵ Gate gúqueda' xrunu' zra gulechugue' lu bel-la' dxen chia' da na' dxulé'e na naca' chee Dios lawe' da naca' benne' Israel, ne xrtia Benjamín. Naca' da li benne' hebreo. Guca' benne' fariseo ca buzájla'a da bdxixruj be'e Moisés. ⁶ Gudxéle'a gunne xue da naca chee Dios ca bzrinte gudáu zi' xuzra' benne' ca' zaj nácabe' bi chee Jesús. Ca naca da xlátaje da napa tu benne' dxunē' ca dxenná da nadxixruj bea

na, quebe nu benne' guzéquene' bi nnię' chia'. ⁷ Xúgute da ca' gúqueda' gate nate zaj zácále'e na, na'a dxéqueda' da ca' quebe bi zaj zaca na, lawe' da nazrí'idxada' Cristo. ⁸ Da li dxéqueda' xúgute da ca' ca tu da nite lawe' da zácadxa Xrana' Jesucristo. Lawe' da nazrí'ida' Le' ba bzua' chalá'ala xúgute da gudapa', ne dxéqueda' da ca' ca tu da níteze cheę si'a da ba neza da dxunna Cristo, ⁹ cheę gaca' tuze nen Le', quegá lawe' da guca' xlátaje ne cheę da nadxixruj bea na na', san lawe' da ble'e Dios neda' xlátaje lawe' da dxeajlí lazra' Cristo, na' Dios dxel'é'eng' xlátaje xúgute benne' dxeleajlí lazre' Cristo. ¹⁰ Da dxaca lazra' naca na gúnbeadxá' Cristo, ne súalę xel-la waca neda' da bsebán na Le', ne tea' xel-la zi' ca da gudé'e Le', ne gudé cuina' lu na' Dios lácala dxal-la' gatia' ca gute Cristo, ¹¹ na' dxebeza lazra' xebana' ládujla benne' gate ca'.

Pablo dxun zi' lazre' gusexuzre' gune' zrin cheę Cristo

¹² Quebe dxennía' ba bzrué'eda' xúgute da caní, u ba naca' dutę xlátaje, san dxun zi' lazra' cheę zrué'eda' da na' bláwizra Jesucristo neda' cheę zrué'eda'. ¹³ Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' cheę zrué'eda' da za za', ¹⁴ cheę gusexuzra' guna' zrin da dxuna', cheę zrué'eda' da na' bláwizra Dios dxi'u sidxu lu xabáa cheę' lawe' da nácadxu bi cheę Jesucristo.

¹⁵ Caní dxal-la' guéquedxu dxi'u, ze cháchadxu ca naca da dxeajlí lázredxu. Che quebe dxéquele caní cheę bíteteze da caní, Dios guzéajni'ine' le'e ca naca cheę na. ¹⁶ Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

¹⁷ Le'e, bi bícha'dau', le gun ca dxuna' neda', ne le nna' ca dxelún benne' ca', dxelunę' ca da blé'entu' le'e. ¹⁸ Zane' lasa ba gucha' le'e, ne na'a dxebértea' dxapa' le'e, zrále'e bi bíchedxu dxelunę' ca dxelún benne' dxuluzúę' chalá'ala da ben Cristo le'e xaga béguaj. ¹⁹ Ca gaca cheę benne' ca' lu zra bzebe, xelebía xi'e. Zaj nune' dios cheę da dxel'é'aj dxelawe', ne dxulucá'ana szren cuine' cheę da na' dxal-la' xelapa stu'e. Zaj dxe'e gunne xue da naca cheę xezr la xu nigaze. ²⁰ Dxi'u nácadxu benne' zaj nababę' xabáa, ne dxebéxadxu zra xelá' benne' weselá cheędxu, Xránadxu Jesucristo, ze'e xabáa. ²¹ Le' xegüę' bel-la' dxen cheędxu da dxeledé cheę na, ne gune' na ca naca bel-la' dxen xabáa cheę', guchínene' xel-la waca cheę' da nape' cheę nna bé'ene' xúgute da zaj zua.

4

Dxal-la' béquezdxu lu da naca cheę Xránadxu

¹ Cheę le na' le'e, bi nazri'ite lazra', le se chacha lu da naca cheę Xránadxu. Le'e, bi bícha'dau' nazri'ite lazra', dxezá

lázrele'a le'eda' le'e, lawe' da dxebeda' ca nácale le'e, na' lawe' da bēna' neda' nácale bi chee Cristo dxal-la' si'a tu da gunna Dios neda'.

² Dxata' xueda' Evodia, ne Síntique xelaque' tuze, lawe' da zaj naque' bila ne chee Xránadxu. ³ Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnleñe' neda' zrin chee dizra' chawe' chee Cristo. Belune' zrin na' tu zren nen Clemente, ne xezícadxa benne' ca' belúnleñe' neda' zrin. La benne' caní zaj naxúaj na lu xiche chee xel-la nabán zeajlí canna.

⁴ Le béqueze lu da naca chee Xránadxu. Xecha lasa dxennía': Le be. ⁵ Dxaca lazra' xeleque be'e xúgute bēneache nácale zren lazre'. Ba zua bagu zra xelá' Xránadxu.

⁶ Quebe bi cuele gunne xue, san le guchálajlequeze Dios ca naca chee da ca'. Le naba na lau Dios, na' le xē'e: Xcalenu'. ⁷ Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bēneache, na' guzúa chuchu na xichaj lázrdaule ne chee Jesucristo.

Le gulaba lazre' ca naca da xrlátaje

⁸ Na'a, bi bicha', le gulaba lazre' ca naca

xúgute da zaj naca li, ne

xúgute da zaj napa na ba lá'ana, ne

xúgute da zaj naca na li lazre', ne

xúgute da zaj naca na du lazre', ne

xúgute da dxezaca ba lazre' Dios, ne

xúgute da dxulucá'ana na bēneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

⁹ Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale Dios le'e, Bēnea' dxunne' dxi'u xel-la dxebeza zri lazre'.

Da gulesel-la benne' Filipos ca' chee Pablo

¹⁰ Dxebéle'eda' ne chee Xránadxu, lawe' da dxajsá lázrele neda'. Quebe dxennía' ba gul-la lázrele neda', san quebe guta' lataj gácalele neda'. ¹¹ Quebe dxennía' da nigá lawe' da bi dxexájrjeda', lawe' da ba bsede Xránadxu neda' sua' xel-la dxebé ájateze dxaca chia'. ¹² Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgute da dxaca chia', che néljada', u che dxeduna', che nápalē'a, u che quebe bi napa'. ¹³ Xúgute wazéqueda' guchaga lawa' lawe' da dxuzé tipa Cristo neda'. ¹⁴ Benle da xrlátaje, gúcalele neda' ne chee da gusél-lale chia'.

¹⁵ Ba nézquezle le'e, benne' Filipos, ca guca gate guzú lawa' dxuchálaja' dizra' chawe' chee Cristo nigá. Gate bezá'a

xɛzre ca' zaj nababa xɛzr la xu Macedonia, le'eze gusél-lale chia' dumí chee da guzǐ' lu na'le. ¹⁶ Gate guzúa' xɛzre Tesalónica, chupa chunna lasa gusél-lale dumí chia' chee quebe bi xáxrjeda'. ¹⁷ Quebe dxennía' da nigá lawe' da dxaca lazra' bi gúnnale chia', san dxaca lazra' gácadxa da ba neza chee le'e lau Dios. ¹⁸ Ba guzi'a xúgute da gusél-lale, na' dele'e chia'. Ca naca da gusélal-le chia' lu na' Epafrodito, da zrendxa guca na ca da bexáxrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dxezaca ba lazre'. ¹⁹ Dios chia' gunne' le'e xúgute da dxexáxrjele, chee xel-la gunní'a chee xabáa chee' ne chee Jesucristo. ²⁰ Gaca ba Xradxu Dios chadía chacanna. ¡Ca'an gaca na!

Pablo dxuzé dizra' benne' Filipos ca'

²¹ Waláz chia' neda' le gugapa diuzre lu La Jesucristo xúgute benne' zaj nababe' chee Dios. Bi bíchedxu ca' zaj zúale neda' dxulugape' le'e diuzre. ²² Xúgute bi bíchedxu zaj zre'e nigá, benne' zaj nababe' chee Dios, ne bi bíchedxu zaj zre'e lizre bénnea' dxenná bé'ene' xɛzr la xu Roma, dxulugape' le'e diuzre.

²³ Dxenaba' lau Xránadxu Jesucristo guné' da chawe' chee xúgute le'e. Ca'an gaca na.

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

Pablo dxugape' diuzre bi bíchedxu zaj zre'e xezre Colosas

¹ Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'.
² Dxuzúaja' da nigá chee le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne gunné' le'e xel-la dxebeza zri lazre'.

Da dxenaba Pablo lau Dios chee bi bíchedxu ca'

³ Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajlentu' Le'.
⁴ Ba bémentu' ca dxeajlí lázrele Cristo, ne ca nazri'ile xúgutę bi ca' chee Dios.
⁵ Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li.
⁶ Dizra' chawe' nigá bla na ládujla le'e ca bla na dutę xęzr la xu nigá, na' dxezriluj na, ne dxun na zrin dutę xęzr la xu ca dxun na ládujla le'e, gate bęntęle ca nazrí'i Dios bęnneache, ne gunézele naca na da li.
⁷ Da nigá ble'e Epafras le'e. Naque' bi bíchedxu nazrí'i lázredxu, ne ba bęnqueze' zrin nen netu', ne naque' chee le'e tu benne' węn zrin li lazre' chee Cristo.
⁸ Epafras nigá bzenne' netu' ca dxaca chee le'e, ne ca nazrí'i ljwézele ne chee Be' Lá'azxa.

⁹ Chee le' na', zra gunézentu' da nigá, dxuchálajlequezentu' Dios chee le'e, ne dxenábantu' Le' guzėjni'ine' le'e ca naca da dxaca lazre', ne gunné' le'e dutę xel-la sina, ne dutę xel-la dxėjni'i da dxunna Be' Lá'azxa dxi'u.
¹⁰ Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Le', gunle xúgutę da naca da xrlátaje, ne gúnbeadxaquezle Dios.
¹¹ Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgutę da dxaca chee lu dutę xel-la zren lazre' chee, ne dutę xel-la dxebe. ¹² Dخال-la' xęle Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxaní' chee', lawe' da nácadxu bi chee Le'.
¹³ Dios bselé' dxi'u lu xel-la dxenná bea chee da chul-la, na' bzue' dxi'u naga dxenná bea Zrí'ine' nazri'ite lazre'.
¹⁴ Zrí'ine' nácaqueze' Bęnnea' bselé' dxi'u gate gutie' waláz cheedxu, chee bnite lau Dios dul-la gubágadxu.

Bexácadxu tuze nen Dios lawe' da gute Cristo

15 Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácadxabe' blau ca xúgute da ben Dios. 16 Ne chee Le' ben Dios xúgute da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute na ben Dios ne chee Le', na' chee Le' zaj naca na. 17 Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na. 18 Xúgute benne' zaj naque' bi chee Cristo zaj naque' ca tuze bel-la' dxen, na' Crístoqueze naque' xichaj bel-la' dxen na' da nácadxu. Le' bzue' bel-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua. 19 Caní naca na lawe' da guca lazre' Dios súale Cristo dute da nácaqueze Dios. 20 Cá'anqueze guca lazre' Dios ne chee Cristo xexune' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

21 Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute da calela, san na'a Dios ba bexune' le'e tuze nen Le', 22 ne chee da ben Cristo gate gutie' le'e xaga béguaj lu bel-la' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. 23 Chee gaca caní dxalla' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajlele dizra' chawe' chee Cristo. Dizra' chawe' nigá nene na dute xezr la xu, na' nuzúa Dios neda', Pablo, benne' wen zrin chee', chee guchálaja' dizra' chawe' nigá.

Zrin dxun Pablo chee bi ca' chee Cristo

24 Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. 25 Bzua Cristo neda' ca benne' wen zrin chee bi chee' ca', ne chee da bláwizra Dios neda' guna', gácalena' le'e, na' guchálaja' dutequeze da naca dizra' chee Dios, 26 ne chee guzéajni'ida' bénneache ca da nagache, da na' nagache nédxute, san na'a Dios ba blé'ene' bi chee' ca' ca naca na. 27 Guca lazre' Dios gulé'ene' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee le na' dxebeza lázredxu súadxu xabáa chee'.

28 Netu' dxuchálajntu' ca naca chee Cristo. Dxuzéajni'intu' xúgute bénneache, ne dxusédentu' xúgute', chee xeleajni'i

xánneneḡ cheḡ xelaca xúguteḡ bēnneache du lazre' lau Dios ne cheḡ Jesucristo. ²⁹ Cheḡ gaca caní dxuna' neda' zrin, dxuchíneda' dutḡ xel-la waca cheḡ Cristo, da dxun na zrin lu xichaj lázrdawa'.

2

¹ Dxaca lazra' nézele le'e dxúnḡ'a zrin, dxe'a gunne xue ḡen Dios da naca cheḡle le'e, ne da naca cheḡ bi bíchedxu ca' ca' zaj zreḡ Laodicea, ne da naca cheḡ xúguteḡ bi bíchedxu ca' quebe ne xeledé'eneḡ neda' caníqueze. ² Dxaca lazra' xeledipa lazre', ne xelaqueḡ tuze lu xel-la zri'i lazre', ne xelaqueḡ benne' gunní'a lu xichaj lázrdawe', cheḡ xelúnbeḡ da nagache cheḡ Xradxu Dios da nácaqueze Cristo. ³ Lu na' Le' zaj de ca naca xel-la gunní'a cheḡ xel-la sina, ne xel-la dxéajni'i. ⁴ Dxapa' le'e da nigá cheḡ quebe xelezí xḡ le'e benne' ca' zaj neze xrgúe' ca dxuluchálaje'. ⁵ Lácala quebe zúaleḡtea' le'e caníqueze, naca na cáteḡe zúaleḡna' le'e lu be' nácaqueza', na' dxebéleḡeda' dxenda' dxunle da xlátaje, ne ze cháchale ca dxeajlí lázrele Cristo.

⁶ Cheḡ ḡe na', ca beḡle, guzí' lu na'le Xránadxu Jesucristo, cá'anqueze dxal-la' gunle súaleḡle Le'. ⁷ Dخال-la' gácale ca tu xaga da dxudé lue na síujla lu da naca cheḡ Cristo. Cá'anqueze dxal-la' gácale ca tu xu'u da dxe' lane lu da naca cheḡ Le', cheḡ se cháchale ca dxeajlí lázrele Le', ca blé'entu' le'e, na' dxál-la'queze xeḡle Dios: Xcalenu'.

Xel-la nabán cube da dxunna Cristo dxi'u

⁸ Le guxúe cuínale. Quebe güele lataj xelezí xḡ benne' ca' le'e, xuluchíneneḡ xel-la sina cheḡ bēnneache, ne dizra' caleḡla, ca naca da dxulusédequeze bēnneache, ne ca zaj naca da ca' dxácaqueze lu xezr la xu nigá, ne quegá ca naca cheḡ Cristo.

⁹ Dutḡ ca naca Dios nácaqueze Cristo.

¹⁰ Nápaḡle le'e xúguteḡ da naca cheḡ'

lawe' da nácaquezeḡ beḡ-la' dxen cheḡ Le'.

Le' dxenná be'eneḡ xúguteḡ be' da dxelenná bea na,

ne xúguteḡ be' da zaj napa na xel-la waca.

¹¹ Cá'anqueze, lawe' da nácale tuze nen Cristo nácale bi cheḡ Dios. Quebe guca cheḡle ca da na' belúnqueze benne' judío ca', gulechugueḡ late' beḡ-la' dxen cheḡ bi biu cheḡ' ca', da na' dxulé'e na zaj nácabe' cheḡ Dios. Bedúa dutḡ da naca cheḡ beḡla' dxen cheḡle da naca sban, da guca na ne cheḡ da beḡn Cristo lu xichaj lázrdauḡe. Beḡne' nácale bi cheḡ Dios. ¹² Gate gudxúale nisa guca cheḡle ca guca cheḡ Cristo gate bgacheḡ' lu xedxu ba, na' cá'anqueze guca cheḡle ca guca cheḡ Le' gate bebane' ládujla benne' gate. Caní guca cheḡle lawe' da guxeajlí lázrele xel-la waca cheḡ Dios, Bēnnea' bsebaneḡ Cristo ládujla benne' gate ca'. ¹³ Gate nate gúcale le'e ca benne' gate lu dul-la da

gubágale, ne lu belá' dxen sban cheeḷe da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúguteḷ dul-la da gubágale. ¹⁴ Dios bzria xi'e ca naca da nabágadxu chee xúguteḷ da nadxixruj bea na da gula da buluzría xi na dxi'u. Bebéaje' na chalá'ala, ne bde'e na le'e xaga béguaj ca tu da gubaga' Cristo. ¹⁵ Gate gute Cristo le'e xaga béguaj begüe' ca naca xel-la dxenná bea, ne xel-la waca chee be' xriwe' ca', na' blé'ene' da ca' lówela gubáz chee xabáa ca' lawe' da gunná bé'ene' na.

Le sa lazre' da ca' zaj de na xabáa

¹⁶ Chee le na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee beu' dxe'ene, ne ca zaj naca zra dxupá'ana. ¹⁷ Xúguteḷ da caní zaj naca na ca tu zrúl-laze chee da zaj zéaje da ca'. ¹⁸ Quebe güele lataj nu cua da nucueza Dios cheeḷe le'e, ne chee da dxululé'e benne' ca', benne' dxeléquene' zaj naque' dxexruj lazre' lawe' da dxulucá'ana szrene' gubáz chee xabáa ca', ne dxuluchálaje' chee da quebe ne xelélé'ene', ne dxulucá'ana szren cuine' ca naca xel-la sina chee bénneacheze da zaj nape'. ¹⁹ Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' duteḷ bel-la' dxen na', ne dxugawe' na, ne dxune' na tuze du ca naca na, chee gaca na ca dxaca lazre' Dios.

²⁰ Naca cheele ca naca chee tu benne' ba nate lawe' da nácale bel-la' dxen chee Cristo, chee québedxa gunle ca zaj naca da ca' dxácaqueze lu xezr la xu nigá. Na'a, ¿bizr chee na' dxedale ca benne' ne zaj nácaqueze' chee xezr la xu nigá, ne dxunle ca da dxelenná bea bénneache. ²¹ Dxelenné': Quebe guchínenu' da nigá. Quebe gagu' da ca'. Quebe chajtáu' da na'. ²² Xúguteḷ da nadxixruj bea caní dxuluchalaj na chee da ca' dxeledé chee na gate dxuchínedxu na, ne zaj nácaze na da dxelenná bea bénneache, ne da dxuluseḷe bénneache. ²³ Da li dxeleque bénneache zaj naca na sina da nadxixruj bea caní, lawe' da dxuluseḷe na bénneache xelúe lá'ane' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

3

¹ Le'e nácale ca benne' ba belexebán tu zren nen Cristo. Chee le na' le sa lazre' da zaj zua xabáa, naga dxe' Cristo chalá'a xabela chee Dios. ² Le gulaba lazre' chee da zaj de xabáa, quegá chee da zaj de lu xezr la xu. ³ Nácale ca benne' ba zaj nate, na' xel-la nabán cheeḷe nuzúa chawe' Dios naga zua

Cristo. ⁴ Cristo nácaqueze xel-la nabán cheeḏxu, na' gate xelá' Le', cá'anqueze le'e gunle tu zren Le' lu xel-la szren chee'.

Xel-la nabán gula ne xel-la nabán cube

⁵ Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da calęla ca', ne xel-la dxucude', lawe' da naca da dxucude benneache ca dios cheequeze'. ⁶ Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. ⁷ Cá'anqueze le'e benle xúgute da caní gate nate. ⁸ Na'a, québedxa gunle xúgute da caní:

Xel-la dxezrá'a, ne xel-la xichaj zra'a, ne xel-la dxecuide ljwezre.

Québedxa nnele dizra' schanni'.

Québedxa gucháchale ljwézrele.

⁹ Quebe si xę ljwézrele tule xetule, lawe' da ba bzúale chalá'ala da gúcale nédxute, ne ca naca da benle. ¹⁰ Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bene' le'e, ca zrindxa gúnbea xánnele Le'. ¹¹ Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xęgu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

¹² Dios nazri'ine' le'e, ne guqué'e le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',
ne benne' dxexruj lazre', ne benne' chawe' lazre',
ne benne' zren lazre'.

¹³ Le gácale ljwézrele tule xetule,
ne le gunité lau chee tule xetule,
che núlale dxezrá'a ljwézrele.

Ca ben Cristo, bnite lawe' chee,
cá'anqueze le gun le'e chee ljwézrele.

¹⁴ Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. ¹⁵ Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xele Dios: Xcalenu'.

¹⁶ Dizra' chee Cristo dxal-la' guzúa xánnele lu xichaj lázrdaule chee séquele guzėjni'ile, ne gusízre ljwézrele nen dutę xel-la

sina chee Dios. Lu dutę xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. ¹⁷ Bíteteze da gunle, u da nnale, le gun xúgute na lu La Xránadxu Jesús, ne xełe Xradxu Dios: Xcalenu', ne chee Le'.

Ca dxal-la' xelún benne' ca' zaj naque' bi chee Cristo

¹⁸ Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

¹⁹ Le'e, benne' biu, le zri'i zrú'ulale, ne quebe xexitaj lázrele le'.

²⁰ Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

²¹ Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

²² Le'e, benne' zaj nada'u, le guzúa dizra' xúgute da xelenná xránale lu xezr la xu nigá, quegaze gate dxelenná'tee', chee xeléquene' le'e xrlátaje, san le gun da ca' du lázrele, ne le zrebe Dios. ²³ Bíteteze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. ²⁴ Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. ²⁵ Nu benne' dxune' da caleła, wazi'e lazruj chee da caleła nune' lawe' da quebe dxuchá Dios ca da dxune' chee tu xetú benne'.

4

¹ Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

² Le'e, bi bícha'dau', le guchálajlequeze Dios, súale ban lazre', ne xełe Dios: Xcalenu'. ³ Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzėjni'intu' bénneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. ⁴ Le naba lau Dios chee séqueda' guzėjni'i xánnea' bénneache ca dxal-la' guna'.

⁵ Le gaca sina ca dxunle chee benne' ca' quebe dxelejli lazre' Cristo, guchine xánnele zra ca' dxunna Dios le'e. ⁶ Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

Dxulugapa diuzre bi bíchedxu ca' ljwezre'

⁷ Tíquico, bi bíchedxu nazrí'i lázredxu guzenbe' le'e ca naca da dxaca chia'. Nácabe' tu bi li lazre' dxácalenbe' neda', ne dxunbe' zrin chee Xránadxu tu zren nen neda'. ⁸ Chee le na',

dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. ⁹ Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' waláZR cheele. Benne' caní xuluzenne' le'e ca naca da dxaca nigá.

¹⁰ Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'. ¹¹ Cá'anqueze bènea' le' Jesús dxugape' le'e diuzre, bènea' léqueze' Justo. Benne' zan benne' judío dxelejli lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzéntenú' bèneache ca xezeque' xelu'e naga dxenná'bea Dios, na' dxuluzúe' neda' tu lu da ba neza zrente. ¹² Dxugapa Epafras le'e diuzre. Naque' wen zrin chee Cristo, ne benne' waláZR cheequezele. Dxenábaqueze' lau Dios cheele le'e chee se cháchale, ne gúzua cuínale du lázrele chee gunle da dxaca lazre' Dios. ¹³ Neda' dxexecheba' chee Epafras, dxe'e gunne xue cheele le'e, ne chee bi bíchedxu zaj zre'e xezre Laodicea, ne xezre Hierápolis. ¹⁴ Dxugapa le'e diuzre Lucas, bènea' dxexune' benne' we' ca', ne naque' benne' nazrí'i lazra'. Cá'anqueze dxugapa Demas le'e diuzre.

¹⁵ Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'. ¹⁶ Ca te gulábale le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea. ¹⁷ Le xe Arquipo da nigá: Bxue xanne' gunu' cháwe'dau' ca naca zrin chee Xránadxu da bzu'e lu na'u.

¹⁸ Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios guné' cheele da chawe'. ¡Ca'an gaca na!

DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

¹ Neda', Pablo, ne Silvano, ne Timoteo dxugápantu' le'e diuzre. Dxuzúaja' da nigá chee le'e, bi bicha', nazrágale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo guné' chee da xrlátaje, ne gunné' le'e xel-la dxebeza zri lazre'.

Ca dxelejli lazre' benne' Tesalónica Cristo

² Dxequezentu' Dios xcalenu' ca naca chee xúgute le'e, ne dxenábantu' gaca da chawe' chee le'e gate dxuchálajntu' Le'. ³ Lau Xradxu Dios dxeajsá lázrentu' ca benle zrin duté lu xel-la dxeajli lazre' chee, ne ca benle zrin chee Cristo lu duté xel-la zri'i lazre' chee, ne ca ze cháchale ca dxebeza lázrele súale Xránadxu Jesucristo. ⁴ Le'e, bi bicha', Dios nazri'ine' le'e, na' nézentu' gucá'a Le' le'e. ⁵ Gate bchálajntu' dizra' chawe' chee Cristo naga zúale, quebe bentu' na nen dízra'ze, san nen duté xel-la waca chee Be' Lá'azxa bchálajntu', ne lu duté xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazrí'ile'entu' le'e.

⁶ Le'e bénquezle ca bentu' netu', ne ca ben Xránadxu, na' guzile dizra' na' lu duté xel-la dxebé chee da benna Be' Lá'azxa le'e, lácala gudéle'ele xel-la zi'. ⁷ Caní guca, nácale tu da dxulé'e na ca dxal-la' xelaca xúgute benne' dxelejli lazre' Cristo naga nababa Macedonia, ne naga nababa Acaya. ⁸ Caní guca, bzenle le'e benne' ca' dizra' chee Xránadxu. Na'a quegá tuze benne' zaj zre'e Macedonia, ne Acaya, san cá'anqueze benne' ca' zaj zre'e xúgute xezre zaj nézene' ca dxeajli lázrele Dios, na' québedxa dxun na ba xen guzénentu' le'. ⁹ Benne' caníqueze dxuluchálaje' ca guca gate bedajnná'antu' le'e ne ca guz' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. ¹⁰ Cá'anqueze dxuluchálaje' ca dxebézale zra xelá' Jesús, ze'e xabáa. Le' naque' Zri'ine Dios, na' Dios bsebané' Le' ládujla benne' gate ca'. Léqueze' guselé' dxi'u lu da ba xa' zrenté da za za' da sel-la Dios lu duté xel-la dxezrá'a chee'.

2

Zrin ben Pablo lu xezre Tesalónica

1 Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. 2 Nézquezle ca belún benne' zaj zre'e xezre Filipos, bulucháchalene' netu', ne buluzalje' netu' gate na' za xedajnná'antu' le'e, na' Dios bexru chache' netu' chee bchálajntu' dizra' chawe' chee Cristo naga zúale, lácala buluzaga benne' zan netu'. 3 Quebe guque zréajentu' ca bchálajntu', ne quegá bi da calęla guca lázrentu' guntu', ne quegá guca lázrentu' si xentu' le'e. 4 Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Caní dxuchálajntu', quegá chee xelexezaca ba lazre' bėnneache san chee xezaca ba lazre' Dios, Bėnnea' dxenná'tee da zua xichaj lázrdaudxu. 5 Nézquezle le'e cabata' ne xentu' le'e dizra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezenę' naca na da li. 6 Cabata' ne gaca lázrentu' xelapa bėnneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. 7 Bentu' le'e xrtandau' ca dxun tu nu'ula dxusegule' zrí'ine'. 8 Nazrí'ilę'entu' le'e, la guzréntu' gúnnatęntu' le'e, quegaze dizra' chee Dios, san cá'anqueze xel-la nabán cheęntu'. Caní nazrí'ilę'entu' le'e. 9 Le'e, bi bicha', nézquezle ca bentu' zrin du lázrentu' chee gata' da xe'aj gáguntu'. Bentu' zrin te zra ne chizrela chee quebe bi gusaca zi'ntu' le'e dxácatę bchálajęntu' le'e dizra' chee Dios.

10 Le'e dxexechębequezle, ne cá'anqueze Dios nézenę' ca bentu' gate na' zúalęntu' le'e, gúcantu' li lazre', ne xlátaje, na' quebe nu guzeque' nu nne cheęntu'. 11 Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zrí'ine'. 12 Gunná bé'entu' le'e gunle ca dxal-la' xelún benne' zaj naque' bi chee Dios, Bėnnea' dxuláwizre' le'e chee chu'ule naga dxenná be'e lu dutę xel-la szren chee'.

13 Chee le na' dxęquezentu' Dios xcalenu' lawe' da bęnle ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajlí lázrele Le' chee gácale chee Dios dutę ca nácale. 14 Le'e, bi bicha', gate gudele xel-la zi' chee da belún benne' waláZR chee le, guca chee le ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'anqueze guledę' xel-la zi' chee da belún benne' waláZR chee' ca', benne' judío. 15 Benne' judío caní belutię' Xránadxu Jesús, ca belún benne' judío ca' gate nate, belutię' benne' ca' gulennę' waláz chee Dios, na' benne' caní gulebeaje' netu' lázrentu'. Quebe dxelunę' da dxezaca ba lazre' Dios, ne dxeledábague' xúgute bėnneache, 16 na' gate

dxaca lázrentu' guchálajlentu' benne' quebe zaj naque' judío chee xelee', quebe dxelunne' netu' lataj. Caní dxelune', dxuluzandxe' dul-la da zaj nabague'. Na'a, ba be' Dios lataj dxaca da ba xa' zrente chee benne' ca'.

Pablo dxezá lazre' cheajnné'e bíchedxu zaj zre'e xezre Tesalónica

¹⁷ Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xedajnná'antu' le'e. ¹⁸ Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. ¹⁹ ¿Bizra da na' dxunna na netu' xel-la dxebeza lazre', ne xel-la dxebé, ne da dxuzúa na netu' lu da ba neza, ne da dxunna bea na zua da si'ntu' lu na' Dios? Lé'eequeze gácale da caní lu zra xelá' Xránadxu Jesucristo. ²⁰ Awe'. Da nácale le'e gun na si'ntu' da xabáa lau Dios, ne súantu' lu da ba neza.

3

¹ Nadxa gate québedxa guca guchaga launtu' lawe' da quebe bi bémentu' ca dxaca cheele, na' gúquentu' xegá'ana chúpantu' lu xezre Atenas, ² na' sél-lantu' bi bíchedxu Timoteo xedajnná'abe' le'e, lawe' da naca lebe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzé cháchabe' le'e, ne gutípabe' lázrele ca dxeajlí lázrele Cristo, ³ chee quebe gate ni'a na'le lawe' da dxedentu' lu da stebe caní. Le'e nézquezle dxal-la' tedxu xel-la zi' caní. ⁴ Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca, ca ba nézquezle. ⁵ Chee le' na', gate québedxa bzúeda' guchaga lawa' lawe' da quebe bi benda' cheele, na' gusel-la' nu bedajnaba le'e ájala dxaca cheele lu xel-la dxeajlí lazre' cheele Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

⁶ Na'a ba belá' Timoteo ga ni zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' cheele. Dxebé' netu' dxeajsá lázrquezle le'e netu' nen duté xel-la zri'i lazre', ne dxezá lázrele'ele lé'ele netu', ca netu' dxaca lázrentu' le'entu' le'e. ⁷ Chee le' na', bi bicha', dxácate dxedentu' lu da stebe caní, ne lu da zi' da xa', zúantu' xel-la dxebé lawe' da nézentu' zé cháchale ca dxeajlí lázrele Cristo. ⁸ Na'a naca cheentu' ca naca chee tu benne' bezúateg' chawe' lawe' da nézentu' zé cháchale lu da naca chee Xránadxu. ⁹ ¿Ájazra guntu' xéle'entu' Dios: Xcalenu' ca dxal-la' guntu' waláz cheele le'e, ne ca naca xel-la dxebé nápantu' lau Dios ne cheele le'e? ¹⁰ Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

¹¹ Dxenábantu' lau Xradxu Dios, ne lau Xránadxu Jesucristo gácalęę' netu' cheę séquentu' xedajnná'antu' le'e.
¹² Dxenábantu' Le' cheę zrí'idxa lįwézrele tule xetule, ne cheę zrí'idxale xúgute bėnneache ca nazrí'intu' netu' le'e.
¹³ Dxenábantu' Le' guzúa chúčhue' lázrdaule, cheę gácale benne' li lazre', ne benne' lá'azxa lau Xradxu Dios lu zra na' gate xelá' Xránadxu Jesús nen xúgute bi cheę Le'.

4

Dxal-la' gundxu da dxezaca ba lazre' Dios

¹ Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaqueze da blé'entu' le'e gunle, da na' dxezaca ba lazre' Dios.

² Nézquezle le'e da bzéajni'intu' le'e ne cheę Xránadxu Jesús.
³ Da dxaca lazre' Dios naca na guzúa cuínale lu na' Le', ne québedxa gunle da sban, ⁴ na' súalele zrú'ulaquezle tu tule le'e lu xel-la lá'azxa cheę Xránadxu, ne gápale le' ba lá'ana, ⁵ ne quebe súale lu xel-la dxezá lazre' cheę da sban ca dxelún benne' quebe zaj nunbe'e Dios. ⁶ Ca naca cheę da nigá, netule le'e quebe dxal-la' si xele bi bíchele, quebe gunle da sban cheę', lawe' da xebéaj lazre' Xránadxu cheę xúgute benne' dxelune' da caní, ca ba bzéajni'intu' le'e. ⁷ Dios bláwizre' dxi'u cheę gundxu da xrlátaje, ne quegá gundxu da sban. ⁸ Caní naca, che nu benne' dxuzúe' chalá'ala ca naca da nigá, quegá tuze bėnneache dxuzúe' chalá'ala, san Diósqueze dxuzúe' chalá'ala, Bėnnea' nunne' dxi'u Be' Lá'azxa.

⁹ Ca dxal-la' zri'i lįwézrele quebe dxun na ba xen guzúaja' cheęle, lawe' da ba blé'equeze Dios le'e cheę zri'i lįwézrele tule xetule. ¹⁰ Caníqueze dxal-la' zri'ile xúgute bi bíchedxu zaj zre'e xezre ca' zaj nababa xezr la xu Macedonia. Dxata' xuentu' le'e, bi bicha', cheę zrí'idxa lįwézrele. ¹¹ Le gun ba xuzre súale lu xel-la dxebeza zri lazre', ne gunle da naca cheézquezle, ne gunle zrin nen ni'a na'le ca ba guzrentu' le'e, ¹² cheę xelapa benne' xula le'e ba lá'ana, ne cheę quebe bi xázrjele le'e.

Ca gaca zra xelá' Xránadxu

¹³ Le'e, bi bicha', dxaca lázrentu' nézele ca naca cheę bi bíchele zaj nate, cheę quebe xewine lázrele ca dxelún xezícadxa benne' ca' quebe bi dxelebeza lazre'. ¹⁴ Dxéajłdxu gute Jesús, ne bebane' ládujla benne' gate, ne cá'anqueze dxéajłdxu Dios gusebane' benne' gate ca' guleajlí lazre' Jesús, cheę xelezúalęę' Le'.

¹⁵ Cheę le' na' dxentu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajsúalędxu Le' nédxula ca benne' ca' zaj nate. ¹⁶ Xránaquezdxu ze'e xabáa, na' cuezre xe'e nen dutę xel-la dxenná bea cheę, na' xendxu

chi'i gubáz blau chee xabáa, ne chi'i luzu da dxulucuezre' waláz chee Dios. Nadxa benne' gate ca', benne' guléajle'e chee Cristo xelexebánqueze' za'a le'. ¹⁷ Te na', dxi'u na' naca bandxu xeché'e dxi'u tu zren nen benne' ca' ládujla beuj chee xezrágadxu Xránadxu lu be'. Ca'an gaca súaledxu Xránadxu chadía chacanna. ¹⁸ Chee le' na' le gutipa lázrele tule xetule nen dizra' caní.

5

¹ Na'a, ca naca chee bi zra, u bi iza xelá' Xránadxu, quebe dxun na ba xen guzúaja' chee, bi bicha'. ² Ba nézquezle le'e zrin zra xelá' Xránadxu gate québela nu dxebeza Le', ca za tu benne' gubán chizrela. ³ Gate dxelenná bénneache: Cháwelle'e dxaca cheedxu, ne quebe bi dxuchixre chee, nadxa za da guzría xi na benne' ca', ca za xel-la dxudía chee tu nu'ula gate zue' zi'i, ne quebe xelexé' lu da na'. ⁴ Le'e, bi bicha', quebe zúale lu da chul-la, chee quebe gaca chee lu zra na' xelá' Xránadxu ca dxaca chee tu benne' dxu'u gubán lizre'. ⁵ Xúgutele le'e dxunle xrlátaje, da naca chee xel-la naxaní', ne chee te zra. Quebe dxundxu da calela, da naca chee chizrela, ne chee da chul-la. ⁶ Chee le' na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. ⁷ Benne' dxelase, chizrela dxelásie', ne benne' dxelezuzre, chizrela dxelezúzrequeze'. ⁸ Nácadxu dxi'u chee te zra, na' dxal-la' guzéajni'i cuínaquezdxu. Che dxeajlí lázredxu Xránadxu, ne zri'idxu Le', da nigá gaca na cheedxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheedxu ca tu lapa xia ca da dxuzúa tu benne' zeje' wedil-la xíchaje'. ⁹ Dios quebe bene' cheedxu tedxu lu da ba xa' da sel-le' lu xel-la dxezrá'a chee. Bene' cheedxu zrué'edxu xel-la weselá ne chee Xránadxu Jesucristo. ¹⁰ Jesucristo gutie' waláz cheedxu chee gaca bandxu tu zren nen Le', che naca bandxu, u che ba nátedxu gate zrin zra na'. ¹¹ Chee le' na' le gutipa lázrele, ne le guzé chacha ljwézrele tule xetule, ca ba dxúnquezle.

Pablo dxuzéajni'ing' bi bíchedxu ca'

¹² Le'e, bi bicha', dxata' xúentu' le'e gápale ba lá'ana benne' dxelune' zrin ládujla le'e, benne' ca' gucá'a Xránadxu chee xelenná be'ene' le'e, ne xulusédene' le'e. ¹³ Dخال-la' gápale benne' ca' ba lá'ana, ne zri'ile le' lawe' da dxelune' zrin chee Dios. Le sua lu xel-la dxebeza zri lazre' tule xetule.

¹⁴ Cá'anqueze dxusebágantu' le'e, bi bicha', gusízrele benne' ca' quebe dxelaca lazre' xelune' zrin, ne gutipa lázrele benne' ca' dxelate ni'a ne'e, ne gácalele benne' quebe zaj ze' chacha, ne gácale zren lazre' nen xúgute bénneache.

15 Le guxúe xanne' cuínale chee quebe gunle da calëla chee nu benne' dxune' chee da calëla, san le gun ba xuzre gúnquezle da xrlátaje, tule xetule, ne chee xúgute bënneache.

16 Le béquezle.

17 Le guchálajlequezle Dios.

18 Le xe Dios: Xcalenu' ca naca xúgute da dxaca chee.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi chee Jesucristo.

19 Quebe guzágale da dxun Be' Lá'azxa.

20 Quebe guzúale chalá'ala dizra' da nunezruj Be' Lá'azxa nu bi bíchedxu ca'.

21 Le guchi'a xanne' xúgute da ca', na' le si' da naca na xrlátaje.

22 Le cuasa lu xúgute da quebe naca na xrlátaje.

23 Dios dxunne' dxi'u xel-la dxebeza zri lazre'. Dxenaba' lau Le' gunë' le'e benne' lá'azxaqueze, ne guxúe' be' nácaquezle, ne bënne'du xu'ule, ne bel-la' dxen chee chee gácale du lazre' lu zra na' xelá' Xránadxu Jesucristo. 24 Bénnea' bláwizre' le'e naque' li lazre', na' Le' gunë' xúgute da caní.

Pablo dxuzé dizra' bi bíchedxu ca'

25 Le'e, bi bicha', le naba lau Dios gácal-lene' netu'.

26 Le gugapa diuzre xúgute bi bíchedxu ca', ne gunídale le'.

27 Lau Xránadxu dxusebaga' le'e gulábale xiche nigá lávela xúgute bi bíchedxu ca'.

28 Dxenaba' lau Xránadxu Jesucristo gunë' chee da chawe'. ¡Ca'an gaca na!

DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

Pablo dxugape' diuzre bi bíchedxu ca'

¹ Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá cheele le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo. ² Dxenaba' lau Xradxu Dios, ne lau Xránadxu Jesucristo gunę' cheele da chawe', ne gunnę' le'e xel-la dxebeza zri lazre'.

Dios guchi'e da belún benne' dul-la ca' gate xelá' Cristo

³ Le'e, bi bícha'dau', dxal-la' xéquezentu' Dios: Xcalenu' ca naca cheele, da dxal-la' guntu' lawe' da ba dxegula xel-la dxeajlí lazre' cheele, ne ba zúadxa xel-la nazrí'i lazre' len ljuwézrele tule xetule. ⁴ Chee le na' dxuchálajntu' ca naca cheele le'e lówela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. ⁵ Da nigá dxulé'e na xlátaje naca Dios ca dxuchi'e da dxelún bénneache, dxenné' naca cheele chu'ule naga dxenná bea Le' lawe' da dxedele xel-la zi' chee la' xel-la dxenná bea chee'.

⁶ Xlátaje naca gudé Dios benne' ca' xel-la zi', benne' ca' dxuludé'e le'e xel-la zi' na'a, ⁷ na' guzúe' le'e naga xezí lázrele chee xel-la zi' da dxedele na'a. Xezí lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'. ⁸ Ze'e nu'e xi' chee gudée' lu da ba xa' benne' ca' quebe dxelexúnbe'e Dios, ne quebe dxuluzúe' dizra' ca dxenná dizra' chawe' chee Xránadxu Jesucristo. ⁹ Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé'e xel-la zi' chee da ba xa' chadía chacanna. ¹⁰ Caní gaca gate xelá' Xránadxu lu zra na' chee xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba lá'ana. Le'e gunle benne' ca' tu zren lawe' da guxéajlele chee da bechébentu'.

¹¹ Chee le na' tu dxuchálajlequezentu' Dios ca naca cheele, ne dxenábantu' Le' gaca cheele sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee gaca gunle ca naca xúgute da xrlátaje da dxezá lázrele, ne xúgute zrin dxunle ne chee xel-la dxeajlí lazre' cheele. ¹² Caní gunle, gucá'ana szrenle La Xránadxu Jesucristo, na' Le' gape'

le'e ba lá'ana ne chee xel-la xrlátaje chee Dios cheedxu, ne chee Xránadxu Jesucristo.

2

Benne' xriwe'

¹ Le'e, bi bicha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e ² chee quebe guchale ca dxéquele, ne quebe súale stēbe chee bi dizra' xuluchalaj bēnneache lácala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusél-lantu' netu', che dxenná na ba belá' Xránadxu. ³ Quebe güele lataj nu si xē le'e, lawe' da xelélá' bēnneache xelebéaj xíchaje' Dios, ne la' bēnnea' dxedábage' Dios nédxula gate zrin zra xelá' Xránadxu. Bēnnea' dxedábage' Dios, na' ba naca chee' cuía xíqueze', ⁴ na' tábage' xúgute' da naca chee Dios, ne xúgute' da dxulucá'ana szren bēnneache. Gucá'ana szren cuine' ca zrinte' cheajché'e lu xudau' chee Dios, ne gun cuine' ca Diósqueze.

⁵ ¿Quebe dxeajsá lázrele gúchequeza' le'e da nigá gate na' zúaleña' le'e? ⁶ Le'e ba nézele Nu Benne' nuzague' bēnnea' dxedábage' Dios chee quebe le'e gate quebe ne zrin zra le'e. ⁷ Ba dxun zrin xel-la waca da nagache chee da calela, san zua Nu Benne' nuzague' le' na na'a, ca zrin zra xecuasa Bēnnea' nuzague' le' na. ⁸ Nadxa la' bēnnea' dxedábage' Dios, na' Xránadxu Jesús gutie' le', guchínene' be' da dxuaj na dxu'e, ne guzría xi'e le', guchínene' xel-la naxaní' chee zra ze'e. ⁹ Benne' xriwe' na' ze'e ne chee xel-la dxenná bea chee Satanás, na' lu dutē xel-la waca chee na gunē' da ca' xelunna bea na, ne xel-la waca ca' da zaj naca na wēn lazre', ¹⁰ ne guchínene' xúgute' da calela ca' chee si xē'e benne' ca' xelebía xi'e, benne' ca' quebe gulaca lazre' xelezí'e da li chee xelélé'. ¹¹ Chee le' na' Dios dxu'e lataj si xē da calela benne' ca' chee xeléajle'e chee da wēn lazre', ¹² chee xelebía xi' xúgute' benne' ca' quebe gulaca lazre' xeléajle'e chee da li, san dxeledánedxene' da naca da calela.

Dios guqu'é dxi'u chee ladxu

¹³ Netu' tu dxál-la'queze xentu' Dios: Xcalenu' ca naca chee le'e, bi bicha'dau', nazrí'i Xránadxu le'e, lawe' da gucá'a Dios le'e nédxute' chee lale. Be' Lá'azxa ba nune' le'e chee Dios lawe' da dxéajlele chee da li. ¹⁴ Chee gaca chee da nigá Dios ba bláwizre' le'e ne chee dizra' chawe' da dxuchálajntu', chee zrué'ele xel-la szren chee Xránadxu Jesucristo.

¹⁵ Chee le' na', bi bicha'dau', le se chacha, ne quebe gal-la lázrele da ca' bzéajni'intu' le'e caníqueze, ne cá'anqueze lu xiche. ¹⁶ Dxenaba' lau Xránadxu Jesucristo, ne lau Xradxu Dios, Bēnnea' lu dutē xel-la xrlátaje chee' bzri'ine' dxi'u, ne ba

benne' dxi'u xel-la dxexúe zren chee' tu chi'i gaze, ne tu xel-la dxebeza lazre' li. ¹⁷ Dxenaba' Le' gutipe' lázrele, ne guzé chúchue' le'e chee' nnaale, ne gunle xúgute' da xrlátaje.

3

Pablo dxenné xúene' bíchedxu ca' xelenabe' Dios gácalene' le'

¹ Na'a, bi bícha'dau', le naba Dios gácalene' netu', chee' zrinzega dizra' chee' Xránadxu xúgute' xezre ca', ne chee' xezezí'e na duté lu xel-la ba lá'ana, ca guca ládujla le'e. ² Le nábaquezle chee' ladxu lu na' benne' ca' dxelune' da calela, ne lu na' benne' sban ca', lawe' da quegá xúgute' benne' dxeleajlí lazre' Cristo. ³ Xránadxu naque' li lazre', na' Le' guzé chache' le'e, ne guxúe' le'e chee' quebe bi da calela gaca na chee'. ⁴ Dxuxrén lázrentu' Xránadxu gácalene' le'e chee' gunle ca da dxénentu' le'e, ca ba dxúnquezle. ⁵ Dxenábantu' lau Xránadxu gácalene' le'e chee' gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

Dxal-la' gundxu zrin

⁶ Le'e, bi bícha'dau', lu La Xránadxu Jesucristo dxénentu' le'e quebe gunle tuze núteteze bi bíchedxu quebe dxaca lazre' guné' zrin, ne quebe dxune' ca da bsédentu' le'e. ⁷ Ba nézele dxal-la' gunle zrin ca bentu' netu' gate na' zúalentu' le'e. ⁸ Quebe nu chee' gudáguntu' cá'aze che nadxu quebe gudízrujntu' na. Bénle'equezentu' zrin te zra, ne chizrela chee' quebe bsaca zi'ntu' le'e da gáguntu'. ⁹ Nácaqueze cheentu' nábantu' le'e da gáguntu', san bentu' zrin chee' blé'entu' le'e dxal-la' gunle ca bénquezentu' netu'. ¹⁰ Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' guné' zrin ca'an guné' quebe gawe'. ¹¹ Ba bémentu' bál-lale le'e quebe dxunle zrin, na' dxedázele dxuchixre chee' da dxaca chee' benne' xula. ¹² Benne' caní dxixruj be'entu', ne dxusebágantu' le' lau Xránadxu Jesucristo chee' xelune' zrin du lazre' chee' gata' da xe'le'aj xelawe'.

¹³ Le'e, bi bicha', le gun da xrlátaje, ne quebe cheajtá lázrele. ¹⁴ Che nu benne' quebe dxuzúe' dizra' ca da dxennantu' lu xiche nigá, le nna' nu bénnea', ne quebe gunle le' tuze, chee' gapa stue'. ¹⁵ Quebe zrá'ale le', san le guzéajni'i le' ca bi bíchele.

Pablo dxuzé' dizra' bi bíchedxu ca'

¹⁶ Xránadxu naque' Bénnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgute' da dxunle, ne súalene' xúgutele le'e.

¹⁷ Neda', Pablo nen ná'aqueza' dxuzúaja' chee' da nigá. Da nigá dxunna bea na xúgute' xiche da dxuzúajqueza' neda'.

Caní dxuzúaja'. ¹⁸ Dxenaba' lau Xránadxu Jesucristo gunę' da chawe' cheę xúgutele le'e. Ca'an gaca na.

DIZRA' NEDXU BZUAJ SAN PABLO CHEE TIMOTEO

Pablo dxugape' diuzre Timoteo

¹ Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá chee dxu, Bénnea' dxebeza lázredxu xelá'tee'. ² Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gunē' chiu' da chawe', ne xexache lazre' lue', ne gunne' lue' xel-la dxebeza zri lazre'.

Pablo dxusízrene' Timoteo ca naca chee benne' ca' dxulusedene' da wen lazre'

³ Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédene' da wen lazre', ⁴ ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutil-la na bénneache. Quebe naca na da xelácale na bénneache chee xelezé chache' ca dxeleajlí lazre' Dios. Caní dxenné xúeda' lue' xecha lasa.

⁵ Dxenné xúeda' lue' gunu' caní chee xelezrí'i ljwezre' dute lázrdawe', chee quebe bi sua da gagu na zria lázrdawe' ca', ne gaca du lazre' ca dxeleajlí lazre' Cristo. ⁶ Bal-la benne' ca' belexecuase' lu da caní, na' ba zaj nazi'e dizra' xálaze. ⁷ Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

⁸ Nezdxu da nadxixruj bea na naca na xrlátaje che nu benne' dxuchínene' na ca naca chee na. ⁹ Dخال-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelune' da calela, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxelutie' benne', ¹⁰ ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da li. ¹¹ Caní naca da dxulé'e dizra' chawe' da bsebagá Dios neda'. Naque' Dios xabáa, Benne' szrente.

Pablo dxę'e Dios: Xcalenu'

¹² Dxapa' Xránadxu Jesucristo: Xcalenu'. Naque' Bénnea' benne' neda' xel-la waca cheę guna' da nigá, lawe' da dx-elé'ene' neda' xlátaje, na' nuzúę' neda' lu zrin cheę'. ¹³ Xúgute da caní ba bene' chia' lácala gunnía' schanni' cheę Cristo gate nate, ne gudáu zi' xuzra' bi cheę' ca', ne ben la' cheę benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bęna'. ¹⁴ Cheę le na' Xránadxu, dute lu xel-la zri'i lazre' zren cheę' bnite lawe' chia', ne benne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi cheę Jesucristo.

¹⁵ Da nigá naca na da li, na' xúgute bęnneache dxal-la' xelajle'e cheę na. Caní dxenná na: Jesucristo ble'e lu xęzr la xu nigá cheę guselé' benne' dul-la ca', na' neda' nácadxu' benne' dul-la ca xúgute benne' ca'. ¹⁶ Cheę le na' Dios bexache lazre' neda' cheę gulé'e Cristo ca szren naca xel-la zren lazre' cheę' nen neda', nácale'a benne' dul-la, cheę gaca' neda' tu da gulé'e na lau xúgute benne' ca' xeleajlí lazre' Cristo, na' xelape' xel-la nabán chadía chacanna. ¹⁷ Cheę le na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatię', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

¹⁸ Lue', bi chia', Timoteo, dxusebaga' lue' su' wedil-la cheę tıl-lalęnu' da naca cheę da calela, ca da buluchalaj nédxute benne' ca', benne' gulenné' waláz cheę Dios ca dxal-la' gunu' lue'. ¹⁹ Bęxru tipa xel-la dxeajlí lazre' chiu', cheę quebe bi sua da gulale na lu xichaj lazrda'u. Bal-la benne' ca' quebe belunę' caní, na' buluzúę' chalá'ala xel-la dxeajlí lazre' cheę'. ²⁰ Caní guca cheę Himeneo, ne cheę Alejandro, benne' ca' bdea' neda' lu na' Satanás cheę xulusédie' quebe xelenné' schanni' cheę Dios.

2*Ca dxal-la' guchálajle dxu Dios*

¹ Da dxundxa na ba xen dxenné xúeda' lue', dxal-la' nábale lau Dios gácalęne' bęnneache, ne guchálajlele Dios, ne gucá'ana szrenle Le', ne nábale Dios gunne' le'e da dxexázrjele, ne xele Dios: Xcalenu'. Dخال-la' gunle caní, guchálajlele Dios da naca na cheę xúgute bęnneache. ² Cá'anqueze dxal-la' nábale Le' gácalęne' benne' xichje ca', benne' dxelenná be'ene' bęnneache, ne benne' xu'u lawe' ca' cheę chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bęnneache. ³ Da nigá naca na xrlátaje, ne da dzezaca ba lazre' Dios, weselá

cheeḏxu, ⁴ lawe' da dxaca lazre' Le' xeledá xúgute bēneache, ne xelúnbe'e da li. ⁵ Zua tuze Dios, ne zua tuze wenaba chee bēneache lau Dios, Bēnea' naque' Jesucristo, ne cá'aqueze ben cuine' bēneache. ⁶ Jesucristo bzua cuine' lu xel-la gute chee bexá'awe' xúgute bēneache, na' blé'ene' da na' ca bzrin zra chee na. ⁷ Chee le na' bzue' neda' gubáz chee' chee cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexecheba', ne quebe dxun lazra'.

⁸ Chee le na' dxaca lazra' xuluchálajle xúgute bēneache Dios gáteteze na', ne xelechisa ne'e dute xel-la li lazre' chee' lau Dios, ne quebe xelezré'e ljwezre', ne quebe xeledíl-lalene' ljwezre' ca'. ⁹ Nu'ula ca' dxal-la' xelácue' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lane' da zácále'e na. ¹⁰ Dخال-la' xelune' da gácale na bēneache, ca dxal-la' xelún nu'ula ca' ba zaj nuzúa cuine' lu na' Dios. ¹¹ Nu'ula ca' dute lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee na. ¹² Quebe dxunna' lataj nu'ula gusédene' benne' biu ca', ne quebe nna be'ene' le', san dxal-la' sue' zrize. ¹³ Caní naca na lawe' da ben Dios teca Adán, na' gudé na' bene' Eva, nu'ula chee Adán na'. ¹⁴ Adán, quebe guzı xę da xriwe' le', san guzı xę na Eva, nu'ula na', na' gudé guzı xę na le', na' bene' dul-la. ¹⁵ Tu nu'ula gapę' xel-la weselá che dxezane' bidu ca', ne cheajlí lazre' Dios, ne nazri'ine' Le', ne nuzúa cuine' lu na' Dios, ne gaque' dxexruj lazre'.

3

Ca dxal-la' xelaca benne' ca' dxulusédene' bi ca' chee Cristo

¹ Da líqueze naca da nigá: Che nu benne' dxezá lazre' gaque' benne' gusédene' bi ca' chee Cristo, tu zrin xrlátaje dxaca lazre' gune'. ² Tu benne' dxusédene' bi ca' chee Cristo:

Dخال-la' gaque' benne' quebe bi zua da dxunite na le'.

Dخال-la' súalene' tuze nu'ula.

Dخال-la' gaque' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dخال-la' si' lu ne'e benne' xelezrine' lizre'.

Dخال-la' gaque' benne' dxaca dxusédene' bēneache.

³ Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dخال-la' gaque' benne' dxexruj lazre', ne zren lazre'.

⁴ Dخال-la' nézene' nna be'ene' benne' zaj zře'e lizre',
ne gulé'ene' zrí'ine' ca' xelácabe' wezúa dizra',
ne xelápabe' ba lá'ana xra xrnabe'.

⁵ Che nu benne' quebe nézene' ájala nna be'ene' benne' zaj
zře'e lizre', ¿ájazra gunē' gusédene' bi ca' chee Dios? ⁶ Benne'
dxusédene' bi ca' chee Cristo quebe dxal-la' gaque' benne'
za dxúnbeate dizra' chee Cristo, chee quebe gucá'ana szren
cuine', chee quebe cuía xi'e ca guzría xi' da xriwe'. ⁷ Cá'anqueze
dxal-la' gaque' benne' nape' ba lá'ana lávela benne' quebe
zaj naque' chee Cristo, chee quebe gata' lataj nu guzúa le'
chalá'ala, na' chee quebe chu'e lu na' da xriwe'.

Ca dxal-la' xelaca benne' dxelácalene' bi ca' chee Cristo

⁸ Cá'anqueze benne' ca' dxelácalene' bi ca' chee Cristo:
Dخال-la' xelaque' benne' zaj nape' ba lá'ana, ne benne' li lazre'.
Quebe dxal-la' xelé'aje' da guzuzre na le',
ne quebe xelaque' benne' dxulucudee'.

⁹ Dخال-la' xelapa xánnie' da zácále'e chee da dxeajlí lázredxu,
ne quebe bi sua da gagu na zría chee' lu xichaj lázrdawe'.

¹⁰ Dخال-la' guxúe xánnele ca dxeledé'.

Te na', che quebe bi zua da dxagu na zria chee', waca
xelácalene' bi ca' chee Cristo. ¹¹ Zru'ula benne' caní:

Dخال-la' xelaque' benne' zaj nape' ba lá'ana,
ne quebe xelaque' wetupa dizra' bizruj.

Dخال-la' xelaque' du lazre', ne li lazre' ca naca xúgute da
dxelune'.

¹² Tu benne' dxácalene' bi ca' chee Cristo dxal-la' súalene' tuze
nu'ula, ne dxal-la' nézene' nna be'ene' zrí'ine' ca', ne benne' zaj
zře'e lizre'. ¹³ Benne' ca' dxelácalene' bi ca' chee Cristo, che
dxelune' cháwedau' zrin chee', welezrué'ene' xel-la ba lá'ana,
na' xelezéquedxene' xuluchálaje' du lazre' ca dxeajlí lázredxu
Jesucristo.

Tu da ble'e Dios dxi'u ca naca da zéajlędxu

¹⁴ Dxebeza lazra' xídazequeza' xedajnná'a lue', na' dxuzúaja'
chiu' da nigá ¹⁵ chee chéajni'inu' che dxezreda', ca dxal-la'
gunu' ládujla benne' ca' zaj nababe' chee Dios, benne' ca' ba
bláwizra Dios ban, ne zaj nuxru chache' da li, ne dxuluxúe
xánnie' na. ¹⁶ Da li tu da zrentę naca da nigá ble'e Dios dxi'u ca
naca da zéajlędxu:

Dios ble'e nigá, ne guque' bėnneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' dute xęzr la xu belenne' ca naca chee'.

Guleajlí lazre' benne' zaj zře'e dute xęzr la xu nigá Le'.

Dios bezi'e Le' xabáa.

4

Ca naca chee benne' ca' dxuluzúe' chalá'ala xel-la dxeajlí lazre' chee'

¹ Be' Lá'azxa ba bdxixruj lié' wazrín zra xulusán bal-la benne' xel-la dxeajlí lazre' chee', na' chjácalene' be' ca' xelezí xē na lē', ne xelezí'e ca da xululé'e be' xriwe' ca'. ² Xuluzé nague' ca da xulusede benne' wēn lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la stu' gate dxelún lazre'. ³ Benne' caní quebe dxelu'e latja nu guchaga na', ne cá'anqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxeleajlí lazre' Le', ne benne' ca' zaj núnbe'e da li, ne xelé'e Le'; Xcalenu'. ⁴ Xúgutē da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xēdxu Dios; Xcalenu', ⁵ lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gunē' gaca na da chawe'.

Benne' wēn zrin xrlátaje chee Jesucristo

⁶ Che dxusédenu' bi bíchedxu ca' da caní, nacu' bi wēn zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlenu'. ⁷ Quebe gulapa na'u da dxuluzaze bēnneache, ne dizra' xálaze. Bzazraj cuinu' lu da naca chee Dios. ⁸ Che dxuzazraj cuinu' ca naca lu beł-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgutē da dxunu', na' naca na da sidxu ba neza lu xēzr la xu nigá, ne cá'anqueze lu xēzr la xu da za za'. ⁹ Da li naca da nigá, na' xúgutē bēnneache dxal-la' xeléajlē'e chee na. ¹⁰ Chee lē na' dxudé xel-la zi' cuínadxu dxundxu zrin lawe' da dxebeza lázredxu Dios ban, Bēnea' naque' weselá chee xúgutē bēnneache, na' dxuselé' benne' ca' dxeajlí lazre' Le'.

¹¹ Da caní dxal-la' gusédenu' bēnneache, ne nne xuenu' lē' xelunē' na. ¹² Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeleajlí lazre' Cristo ca dxal-la' xelunē'. Gulé'e na lē':

Nē chee da dxuchálaju',
ne nē chee da dxunu',
ne ca nazri'inu' le sa' ljwezru',
ne ca naca Be' Lá'azxa zúalene' lue',
ne ca dxeajlí lazru' Cristo,
ne ca nacu' du lazre'.

¹³ Dxácatē xida' neda', ben zi' lazru' gulabu' xiche lá'azxa lówela bēnneache, ne gutipu' lazre' bi bíchedxu ca', ne guzéajni'inu' lē'.

¹⁴ Quebe gusanu' xel-la waca da bēna Dios lue' gate buluzé

na' benne' gula ca' xichju', ne gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

¹⁵ Ben da caní du lazru' chee xeledé'e xúgute bènneache nápaquezu' da naca chee Dios. ¹⁶ Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

5

Ca dxal-la' xelaca benne' ca' dxelejli lazre' Cristo

¹ Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'. ² Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', duté lu xel-la dxapa ba lá'ana chiu'.

³ Gúcale nu'ula ba nate benne' chee', nu'ula' quebe nu xrtie' zradxa. ⁴ Che tu nu'ula ba gute benne' chee' ne zaj zra' zrí'ine', u zre sue', lebe' dxal-la' xelunbe' ca da zaj nabágabe' chee xelácalebe' benne' zaj naca xrtíaquezebe', ne xelunbe' ca da zaj nabágabe' chee xra xrnabe', lawe' da naca na xrlátaje, ne da dzezaca ba lazre' Dios. ⁵ Nu'ula da li québedxa nu chilá' chee' dxebeza lazre' Dios, ne dxuchálajle' Dios te zra, ne chizrela. ⁶ Nu'ula caní, che dxune' ca da dzezaca ba lazre' léqueze', naque' ca benne' ba nate. ⁷ Bdxixruj be'e benne' ca' xelune' caní, chee quebe gun na ba xen nu til-la le'. ⁸ Che nu benne' quebe dxebé'e gunne xue chee benne' ca' zaj naque' tuze, ne da dxun na ba xen che quebe dxácale' xrtíaqueze', ba bsane' xel-la dxeajli lazre' chee', ne nácadxe' benne' wen da zrinnaj ca tu benne' quebe ne chéajle'e chee Dios.

⁹ Lu xiche naga zria la nu'ula ca' quebe nu chilá' chee', benne' dxácale, dxal-la' guzúajle la nu'ula caní, nu'ula na' ba gudé' ga xun iza, ne guzúa tuze benne' chee'. ¹⁰ Dخال-la' gaque' nu'ula ba bènle'e da xrlátaje ca da caní:

Che ba bsegule' zrí'ine' ca'.

Che ba guzú' lu ne'e benne' bíchedxu belezrín lizre'.

Che ba gúcale' benne' caní duté lu xel-la dxexruj lazre' chee'.

Che ba gúcale' benne' dxedé' xel-la zi'.

Che bi xetú da xrlátaje ba bene'.

¹¹ Quebe guzríale lu xiche na' nu'ula caní che quebe ne xelezrí' ga xun iza lawe' da gagaze xucuasa xel-la dxelezá lazre' chee' le' lu da naca chee Cristo, na' xelaca lazre' xuluchaga ne'e xecha lasa, ¹² na' xelebague' zria lawe' da bulusane' ca da gulechebe lazre' chee Cristo. ¹³ Cá'anqueze che dxeledé' tu tu xu'u, xelaque' zrawede, ne quegaze zrawede, san cá'anqueze xelaque' wetupa dizra' bizruj, na' xuluchixre

chee' lu xúgute da xelenne', ne xelenné' da quebe dxal-la' xelenné'. ¹⁴ Chee le na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxúe' lizre', chee quebe xelezí lataj xelezí tizra benne' ca' dxelezre'e dxi'u. ¹⁵ Bal-la nu'ula caní ba belexeuase' chee Cristo, ne zjálalene' da xriwe'.

¹⁶ Che nu benne' dxeajlí lazre' Cristo, benne' biu, u nu'ula, che zua xrtie' naque' nu'ula ba gute benne' chee', dxal-la' gácalene' le' chee quebe xelebaga bi ca' chee Cristo da nigá, na' benne' caní welezeque' xelácalene' nu'ula caní québedxa nu chilá' chee'.

¹⁷ Che zaj zra' benne' gula ca' dxulusédené' cháwedau' bi ca' chee Cristo, dxal-la' gápale'e benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' chee Dios, ne dxulusédené' le'e. ¹⁸ Lu xiche lá'azxa dxenná na: Quebe cu'ule xixruj dxu'a beze, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

¹⁹ Quebe guzé nagu' che nu gagu zria chee tu benne' gula chee xudau' che quebe xeledá' chupa u chunna benne' xelexechebe'. ²⁰ Benne' ca' dxelúnqueze' dul-la, dxal-la' til-lu' benne' ca' lálwela xúgute bi ca' chee Cristo, chee xelezrebe xezícadxa benne' ca'. ²¹ Lau Dios, ne lau Xránadxu Jesucristo, ne lau gubáz blau ca' chee xabáa chee', dxusebaga' lue' chee gunu' da caní. Dxenné xueda' lue' quebe cueu' ca zaj naca benne', ne quebe gucha'u ca gunu' chee tu tu benne'. ²² Quebe xexúbenu' nu la guzúateu' lu zrin chee Cristo chee quebe bagu' dul-la chee benne' xula. Quebe gulapa na'u ne tu da caléla.

²³ Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

²⁴ Zaj nalá' dul-la chee bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululé'e lawe na te na'. ²⁵ Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

6

¹ Benne' zaj nada'u dxal-la' xelápale'e ba lá'ana xrane' ca' chee quebe nu nne schanni' chee Dios, ne chee da dxusédedxu. ² Che benne' zaj nada'u, zaj zra' xrane' ca' dxeleajlí lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelune' zrin da nácadxa xrlátaje chee xrane' ca' dxelezi'e ba neza zrin na, lawe' da dxeleajlí lazre' Cristo, ne zaj naque' benne' biche' zaj nazrí'ine'. Bzéajni'i benne' ca' da nigá ne bsizre le'.

Da caleļa da dxuluseđe benne', ne xel-la gunnı́a li

³ Che nu benne' dxusédenē' da zaj naca caleļa da quebe zaj naca na tuze ca da bsēde Xránadxu Jesucristo, ne ca da dxuseđe da dxéajlędxu cheę Dios, ⁴ benne' nigá dxucá'ana szren cuine', ne quebe bi nézene'. Dxezá lázreļe'ę gutil-le' benne' dizra' ca naca cheę tu tu dizra' ca'. Benne' dxelún canı́: Dxelaque' benne' xre lazre', ne dxeledil-le', ne dxulucháchale ljwezre', ne dxeléquene' dxun le sa' ljwezre' da caleļa, ⁵ ne tu lize dxulutil-la dizra' ljwezre', ne zaj naque' benne' zaj nazrinnaj lu xichaj lázrdawe', ne quebe zaj nunbe'e da li.

Dxeléquene' zrin dxundxu cheę Cristo naca na tu da waca xuluchínene' cheę xelaque' benne' gunnı́a. Quebe gunu' tuze benne' canı́. ⁶ Da li da zéajlędxu cheę Cristo naca na tu da gunnı́a zren, na' canı́ nácaqueze cheę tuze bēnnea' dxezaca ba lazre' ca da nape'. ⁷ Quebe bi núadxu gate gúlajdxu lu xęzr la xu nigá, ne quebe bi xexúadxu gate xezá'adxu nigá, ⁸ san che de da gágudxu, ne zra lánadxu, dxal-la' xezaca ba lázredxu nen da ca'. ⁹ Benne' ca' dxelaca lazre' xelaque' gunnı́a, cheajlecházie' lu na' da xriwe', na' cheajlechu'e lu xralaj cheę le na, cheę xelezá lazre' da xálaze, da dxulucá'ana ditaj na bēnneache, ne dxelegú'u na bēnneache lu da ba xa' naga xelebı́a xi'e. ¹⁰ Benne' nazri'ine' dumı́ dxune' xúgute da caleļa, na' zaj zra' bal-la benne' gulezá lazre' na, na' bulusanē' xel-la dxeleajlı lazre' cheę', na' ba gulezı́' lataj xel-la dxudı́a lu lázrdawe'.

Da dxusizre Pablo Timoteo

¹¹ Lue', wen zrin cheę Dios, gucuasa lu da canı́. Ben da naca xlátaje, ne bzua cuinu' lu na' Dios, ne guxeajlı lazre' Cristo, ne bzri'i Le', ne guca zren lazre', ne dxexruj lazre'. ¹² Gudıl-lale da xriwe', guchínenu' xel-la dxeajlı lazre' chiu'. Bęxru tipa xel-la nabán da chadı́a chacanna lawe' da bláwızra Dios lue' cheę gapu' da nigá, na' ba blé'enu' ca dxeajlı lazru' Cristo láwela zane' benne' dxelexechebe' cheę na. ¹³ Na'a, lau Dios, Bēnnea' nuzúe' xel-la nabán cheę xúgute da naca ban, ne lau Jesucristo, Bēnnea' cá'anqueze blé'ene' da naque', ne bechebe' cheę na lau Poncio Pilato, dxenné xueda' lue'. ¹⁴ Guzú' dizra' ca da dxapa' lue', ne quebe gucha'u na. Dخال-la' gunu' na cheę quebe nu seque' bi nne' chiu' ca zrin zra xelá' Xránadxu Jesucristo. ¹⁵ Ca zrin zra cheę na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bēnneache. ¹⁶ Tuze Dios quebe gatie', ne zue' lu xel-la naxanı' naga quebe nu seque' cheaj. Netú bēnneache quebe ne lé'ene' Le', ne quebe nu gaca le'e Le'.

Cheḗ Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

¹⁷ Gunné xue benne' zaj naque' gunní'a lu xezr la xu nigá cheḗ quebe xulucá'ana szren cuine', ne quebe xuluxrén lazre' xel-la gunní'a cheḗ', lawe' da quebe naca na da chadía chacanna. Dخال-la' xuluxrén lazre' Dios ban, Bénnea' dxúnnale'ḗ dxi'u xúgute' da dxechínedxu cheḗ sidxu da ba neza. ¹⁸ Gunné xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézrujle'ḗ na. ¹⁹ Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajlí canna.

²⁰ Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze cheḗ xezr la xu nigá, da na' dxelenná bal-la benne' naca na xel-la sina. Da nigá naca na da wen lazre'. ²¹ Bal-la benne' gulezí'ḗ na, na' bulusanḗ' xel-la dxeleajlí lazre' cheḗ'. Dxenábeda' Dios gunḗ' da chawe' chiu'. ¡Ca'an gaca na!

DIZRA' GUDXUPE' DA BZUAJ SAN PABLO CHEE TIMOTEO

Pablo dxugape' diuzre Timoteo

¹ Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchebe lazre' Dios gunne' chee benne' ca' zaj naque' bi chee Jesucristo. ² Dxuzúaja' da nigá chiu' lue' Timoteo, bi chia' nazrí'i lazra', na' dxenaba' Xradxu Dios, ne Xránadxu Jesucristo guné' da chawe' chiu', ne xexache lazre' lue', ne gunne' chiu' xel-la dxebeza zri lazre'.

Pablo dxusízrene' Timoteo chee gunbe' zrin chee Cristo

³ Te zra ne chizrela gate dxuchálajlëna' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. ⁴ Dxeajsá lázrqueza' ca gudxezru' gate na' bezá'a naga zu', ne dxaca lázrele'a xelé'eda' lue' chee gápale'a xel-la dxebé. ⁵ Cá'anqueze dxeajsá lazra' xel-la dxejlí lazre' li da napu'. Xrna'u gula, Loida, ne xrna'u, Eunice gulape' xel-la dxejlí lazre' caní, na' nuxrén lazra' lue' nápaquezu' na.

⁶ Chee le' na' dxuzéajni'ida' lue' guchínenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'. ⁷ Be' Lá'azxa benna Dios dxi'u quebe dxuné' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxuné' dxi'u benne' dxenná be'e cuina. ⁸ Chee le' na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálajé' dizra' chawe' chee Jesús, na' Dios gutípaqueze' lazru'. ⁹ Dios bselé' dxi'u, ne bláwizre' dxi'u chee guzúa cuínadxu lu na' Le', quegá lawe' da bendxu tu da xrlátaje, san lawe' da guca lázrequeze Le' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr la xu nigá, ¹⁰ na' blé'ene' xel-la zri'i lazre' nigá na'a, lawe' da gusel-le' Jesucristo, weselá cheedxu, na' bzria xi'e xel-la dxenná bea chee xel-la gute, ne blé'ene' bénneache ca gaca xelezí' lu ne'e xel-la nabán chadía chacanna, ca dxennáqueze dizra' chawe' da dxuchálajdxu.

¹¹ Dios bzue' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusédeda' benne' quebe zaj naque' judío. ¹² Chee le' na' dxedéa' xel-la zi' caní.

Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' nape' xel-la waca cu'u chawe' da nuzúa' lu ne'e ca zrindxa zra na'.

¹³ Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo. ¹⁴ Ne chee xel-la waca chee Be' Lá'azxa, Bénnea' zue' xichaj lázrdaudxu, bexru tipa da na' nuzúa Dios lu na'.

¹⁵ Ba nézenu' ca belún xúgute bi bíchedxu zaj zre'e naga nababa Asia. Gulebéaj xíchaje' neda'. Cá'anqueze Figelo, ne Hermógenes belune' tu zren benne' ca'. ¹⁶ Dxenaba' Xránadxu xexache lazre' benne' zaj zre'e lizre Onesíforo. Gúcale le' neda' zane' lásaqueze, ne quebe gudapa stue' chia' neda', xu'a lizre xia. ¹⁷ Gate ble'e xezre Roma, bexílaje' neda', na' bezrélene' neda'. ¹⁸ Dxenaba' Xránadxu xexache lazre' le' lu zra ná' gate xelá' Le'. Ba nézenu' ca gúcalele'ene' dxi'u lu xezre Efeso.

2

Benne' wen zrin du lazre' chee Jesucristo

¹ Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. ² Ca da bennu' bchálaja' lávela benne' zan, benne' belexechebe' naca na da li, bzua na lu na' benne' zaj naque' li lazre', benne' xelezéquene' xulusédene' na benne' xula.

³ Lue' dxal-la' gacu' benne' wen zrin du lazre' chee Jesucristo, guchaga lau' xel-la zi' ca tu benne' zeje' wedil-la. ⁴ Netú benne' zeje' wedil-la, benne' xu'e lu zrin chee xrané', quebe dxune' zrin xula, lawe' da dxaca lazre' xezaca ba lazre' xrané' chie'. ⁵ Cá'anqueze, benne' xu'e lu witaj quebe zruene' da xexale' che quebe quítaje' ca naca chee na. ⁶ Cá'anqueze benne' dxaza dxa'ana, benne' dxúnle'e zrin, dxal-la' xezí' lu ne'e lina chee'. ⁷ Blaba lazre' ca da dxapa' lue', na' Xránadxu guzéajni'ine' lue' xúgute na.

⁸ Bsa lazre' ca naca chee Jesucristo, guque' xrtia David, ne bebané' ládujla benne' gate, ca dxenná dizra' chawe' da dxuchálaja' neda'. ⁹ Ne chee dizra' chawe' nigá dxedéa' xel-la zi', ne xu'a lizre xia nigá ca tu benne' wen da zrinnaj, san dizra' chee Dios quebe nu seque' cu'u le' na lizre xia. ¹⁰ Chee le' na' xúgute da ca' dxuchaga lawa' ne chee benne' ca' ba gucá'a Dios le', chee cá'anqueze benne' ca' xelelé' ne chee Jesucristo, ne xellexú'e lu xabáa chadía chacanna.

¹¹ Da nigá naca na da li:

Che nuzúa cuínadxu gátedxu ca bzua cuina Le',
cá'anqueze waca bandxu nen Le'.

¹² Che dxededxu xel-la zi',
na' nna béaquezdxu tu zren nen Le'.

Che quebe xechébedxu nácadxu bi chee Le',
 cá'anqueze Le' quebe xechébe' nácadxu bi chee'.

¹³ Che dxi'u quebe nácadxu li lazre',

Le' nácaqueze' li lazre'.

Dios québequeze guché'e ca naque'.

Tu benne' wen zrin du lazre'

¹⁴ Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra' ljwezre quebe bi culuén napa na, san dxuxrinnaj na xichaj lázrdau benne' ca' dxelénne' na. ¹⁵ Ben ba xuzre gacu' wen zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. ¹⁶ Quebe gulapa na'u dizra' xálaze, ne dizra' sban da dxuluchálajze bénneache, da ca' dxulucuaasa na bénneache lu da naca chee Dios. ¹⁷ Dizra' sban caní dxuluxrinnaj na xichaj lázrdau bénneache ca dxun tu we' da dxuzru na lu bel-la' dxen cheedxu. Caní guca chee Himeneo, ne Fileto, ¹⁸ benne' ca' gulecuase' lu xel-la li, na' dxelenné' ba belexebán benne' gate, na' dxuluxrinnaje' xel-la dxeajlí lazre' chee bal-la benne'. ¹⁹ Dios ba gudixruj bi'e xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'e bi chie' ca' Cá'anqueze dxenná na: Xúgute bi ca' chee Cristo québedxa dxal-la' xelune' da calela.

²⁰ Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' xezícadxa da ca' dxuluchínene' ájateze. ²¹ Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxe' ca naca da calela ca'.

²² Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'inu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu. ²³ Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

²⁴ Benne' wen zrin chee Xránadxu:

Quebe dxal-la' tíl-lalene' benne'.

Dxal-la' gaque' zri'i lazre' nen xúgute bénneache.

Dxal-la' gaque' benne' dxezeque' gusédene' bénneache.

Dxal-la' gaque' zren lazre',

²⁵ ne duté xel-la dxexruj lazre' gusízrene' benne' dxelune' da calela.

Caní dxal-la' gunē' che ba benla Dios xelexexéaje lazre' benne' ca chee xelúnbe'e da li, ²⁶ na' xelexé' lu xralaj chee da xriwe', naga nuzrá na le', na' dxelune' ca da dxenná le' na.

3

Ca xelaca bénneache lu zra bzebe

¹ Cá'anqueze dxal-la' nézele lu zra bzebe ni' gaca na stebe chee bénneache. ² Bénneache ca' xelaque':

Benne' xelexrí'ize cuina, ne xelexrí'ine' dumí.

Xulucá'ana szren cuine',

ne xulucá'ana cuine' ca benne' blau ca'.

Xelenné' schanni' chee Dios,

ne quebe xuluzúe' dizra' chee xra xrne'e.

Xelaque' benne' quebe dxelezí le,

ne benne' quebe dxelapa ba lá'ana Dios.

³ Quebe xelaque' zri'i lazre',

ne quebe xelexexache lazre' ljwezre'.

Xelenné' chee ljwezre', ne quebe xelenná be'e cuine'.

Xelaque' benne' snia ca', ne xuluzúe' chalá'ala da naca xrlátaje.

⁴ Quebe xelaque' li lazre' nen ljwezre'.

Xelaque' benne' dxelexube.

Xeléquene' zaj naque' benne' szrente'.

Xelexezaca ba lázredxene' da ca' dxeledánene' quézcala da naca chee Dios.

⁵ Lácala xululé'e cuine' ca benne' zaj naque' chee Dios,

quebe súale le' xel-la waca chee Dios.

Quebe gunu' tu zren benne' ca'. ⁶ Ca zaj naca benne' caní

zaj naca benne' ca' zjaque' tu tu xu'u, ne dxelezí xe'e nu'ula

quebe zaj zie' du lazre', ne zaj zua da dxagu na zria lázrdawe'

da naca chee xtul-le'. Xel-la dxelezá lazre' chee nu'ula caní

nazrube xu na le'. ⁷ Lácala tu dxulusédezqueze' chee xel-la

li, cabata' dxeléajni'iquezne' na. ⁸ Ca belún Janes ne Jambres,

benne' wazrá' ca', benne' ca' guledábage' Moisés, cá'anqueze

dxelún benne' caní, dxeledábage' xel-la li. Zaj nazrinnaj

xichaj lázrdawe', ne belexecuase' lu xel-la dxeajlí lazre' chee

Dios. ⁹ Quebe bi xelexrué'e benne' caní, lawe' da xelege

bé'equeze xúgute' bénneache zaj naque' benne' xálaze, ca gulaca

benne' chupa ca' guledábage' Moisés.

Da bzebe da dxusebaga Pablo Timoteo

¹⁰ Ba benu':

Ca da bzéajni'ida' bénneache, ne blé'equeznu' ca' bénqueza'.

Nézenu' da dxaca lazra' guna', ne ca dxeajlí lazra' Cristo.

Bchaga lawa' da guxzaca', ne nazrí'ida' xúgute' bénneache.

Nézenu' ca naca xel-la zren lazre' chia'.

¹¹ Blé'enu' ca guláu zi' xuzre' neda', ne ca gudéa' xel-la zi'.

Nézenú' xúgute da guzraca' lu xezre Antioquia, ne xezre Iconio, ne xezre Listra.

Guláu zi' xuzre benne' ca' neda', na' Xránadxu bselé' neda' lu xúgute da ca'.

¹² Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bēneache le'.

¹³ Benne' ca' dxelune' da calela, ne benne' dxelezí xē'e welúndxaqueze' da calela. Xelezí xē'e bēneache, na' benne' xula xelezí xē'e benne' caní.

¹⁴ Lue', guzē chacha ca da ba naxéajni'inu', da na' nuxrén lazru'. Nézqueznu' nu bsede lue', ¹⁵ na' ne nácateu' bídau'te ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo. ¹⁶ Xúgute da naxúaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxi'u, ne da dxedil-la na benne' dxelune' da calela, ne da dxusizre na dxi'u, ne da dxulé'e na dxi'u ca dxal-la' gundxu da xrlátaje, ¹⁷ chee gaca du lazre' bi chee Dios, na' gácabe' bi nazēde xanne chee gunbe' xúgute da xrlátaje.

4

¹ Lau Dios, ne lau Xránadxu Jesucristo, Bēne' guchi'e chee benne' ban ca', ne chee benne' gate ca' gate zē'e xedajnná be'e, dxusebaga' lue' ² guchálaju' dizra' chee Dios, ne gunu' ba xuzre guchálaju' che xuluzé naga bēneache, ca xuluzé nague'. Bzéajni'i benne' ca' dute xel-la zren lazre' chiu', ne ble'e le' ca da zaj nabague'. Gudil-la, ne bsizre benne' ca'. ³ Caní dxal-la' gunu' lawe' da wazrín zra québedxa xuluzé naga bēneache chee xel-la li da dxusédedxu. Ca dxelezá lázrqueze le', xulunné' zane' benne' xulusédene' le' ca da dxelaca lázreze le' xelenne'. ⁴ Québedxa xuluzé nague' da li. Wuluzé nague' dizra' da dxuluzaze bēneache. ⁵ Na' lue', bzéajni'i cuinu' lu xúgute da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne ben zrin da nabagu' chee Cristo.

⁶ Ba bzin zra guzúa' xel-la nabán chia' lu na' Dios, lawe' da ba zua bagu xelutie' neda'. ⁷ Du lazra' gudábaga' benne' ca' guledábague' da naca chee Cristo. Tu bēnzqueza' ca naca da li chee', ne ba bexuzre bēna' da bsebaga Cristo neda' guna'. ⁸ Lawe' da bēna' da xrlátaje, na'a ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunne' na. Cá'anqueze gunézruje' na chee benne' ca' dute xel-la zri'i lazre' chee' dxelebeze' zra xelé'e.

Pablo dxulé'ene' Timoteo ca dxal-la' gunbe'

⁹ Ben ba xuzre xídazeu' xedajnná'u neda'. ¹⁰ Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. ¹¹ Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. ¹² Tíquico gusel-la'-be' lu xezre Efeso. ¹³ Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

¹⁴ Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da bene'. ¹⁵ Bxue xanne cuinu' chee benne' nigá lawe' da ba gudábagale'e dizra' da dxuchálajdxu.

¹⁶ Da nedxu lasa gate becheba' ca naca chia' lau benne' xu'u lawe' ca, netú benne' quebe gúcalene' neda'. Xúgute' buluzá' xíchaje' neda'. ¹⁷ Gúcale Xránadxu neda', ne btipe' lazra' chee guzéqueda' bchálaja' dizra' chawe' lau xúgute' benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre xixre', ¹⁸ na' guseláqueze' neda' lu xúgute' da calela, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

Benne' chee Cristo dxulugapa diuzre ljwezre'

¹⁹ Dxugapa' diuzre Priscila, ne Aquilo, ne benne' zaj zra' lizre Onesíforo. ²⁰ Erasto begá'anabe' xezre Corinto, na' bcá'ana' Trófimo lu xezre Mileto lawe' da quebe chawe' zúabe'. ²¹ Ben ba xuzre xidu' nigá dxácatę quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute' bi bíchedxu zaj zre'e nigá dxulugape' lue' diuzre.

²² Dxenaba' Xránadxu Jesucristo súalene' lue', ne dxenaba' Dios gunę' da chawe' chee xúgutele le'e. ¡Ca'an gaca na!

DIZRA' DA BZUAJ SAN PABLO CHEE TITO

Pablo dxugape' Tito diuzre

¹ Neda', Pablo, naca' wən zrin chee Dios, ne gubáz chee Jesucristo chee guzėjni'ida' benne' ca' ba gucá'a Dios chee xeleajlí lazre' Cristo, ne xelúnbe'e da naca li lazre' chee da naca chee Dios, ² ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', ³ na' na'a, ca ba bzrin zra chee na, ba bzėjni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. ⁴ Dxuzúaja' da nigá chiu', Tito. Nacu' ca zrí'inequeza' lawe' da dxeajlí lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, gunē' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

Zrin da dxun Tito lu xezr la xu Creta

⁵ Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xézredu ca', cáteze bxriseda' lue' gunu'. ⁶ Tu benne' gula chee xudau': Dخال-la' gaque' benne' quebe bi zua da gagu na chie'.

Dخال-la' súalene' tuze nu'ula.

Zrí'ine' dxal-la' xelácabe' bi ba dxėjlí lázrebe' Cristo.

Quebe bi da zrinnaj dxelún zrí'ine' ca',

ne quebe gaca nu gagu zria chee da dxelunbe'.

⁷ Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dخال-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bėnneache.

Quebe dxal-la' gaque' benne' dxucúdee'.

⁸ Dخال-la' súateze' si' lu ne'e benne' zjaque' lize'.

Dخال-la' gunē' da naca cháwedau'.

Dخال-la' gaque' benne' nna be'e cuine'.

Dخال-la' gaque' benne' xrlátaje.

Dخال-la' gaque' benne' nuzúa cuine' chee Dios.

Dخال-la' gaque' benne' dxuzėjni'i cuine'.

⁹ Dخال-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' gusízrene' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

¹⁰ Caní dxal-la' gune' lawe' da zrále'e benne' dxelenné' chee dizra' li, benne' dxelezí xe'e benne' xubla lu da xala da dxlenné'. Zane' benne' Israel dxelune' caní. ¹¹ Dخال-la' guzúa zriu' benne' dxelune' da caní lawe' da dxuluxrinnaje' xichaj lázxdau xúgute benne' zaj zra' tu tu xu'u naga dxelú'e chee xulusédene' da quebe naca xrlátaje. Dxelune' caní chee xelezí' lu ne'e dumí. Da nigá da dxelune' naca na da calela.

¹² Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wen lazre', ne zaj naque' ca be snia ca', ne zaj naque' benne' wagu xrata', ne zrawede." ¹³ Da li gunné'. Chee le' na' gudíllaqueze benne' ca' chee xelaque' li lazre' ca dxeleajlí lazre' Cristo, ¹⁴ ne chee quebe xuluzé nague' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzúe' chalá'ala dizra' li.

¹⁵ Xúgute naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxelune' da sban, ne québedxa dxeléajle'e chee Cristo, quebe bi de da naca xrlátaje. Zaj nazrinnaj xichaj lázrdawe'. ¹⁶ Benne' caní dxelenné' zaj núnbe'ene' Dios, san da dxelune' dxulé'e na quebe naca da li da dxelenné'. Zaj naque' benne' wen da sban, ne benne' wen da calela, ne quebe xelezéquene' xelune' tu da xrlátaje.

2

¹ Dخال-la' guchálaju' da ca' dxusede na dxi'u da naca li.

² Benne' gula chee xudau':

Dخال-la' xelaque' benne' dxelenná bé'e cuine'.

Dخال-la' xelaque' benne' du lazre'.

Dخال-la' xelaque' benne' dxuluzéajni'i cuine'.

Dخال-la' xelaque' li lazre' ca dxleajlí lazre' Cristo,

ne ca zaj nazrí'ine' Le',

ne ca naca xel-la zren lazre' chee'.

³ Cá'anqueze nu'ula gula ca' chee xudau':

Dخال-la' dxelapa ba lá'ana Dios ca naca xúgute da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dخال-la' xulusédene' da naca xrlataje

⁴ chee gaca xulusédene' nu'ula cuide' ca'

chee xelezrí'ine' benne' chee' ca', ne zrí'ine' ca',

⁵ ne chee xelenná be'e cuine',

ne xelaque' du lazre',

ne xulupe'e lizre',

ne xuluzúe' dizra' chee benne' chee'.

Caní dxal-la' xelunę' cheę quebe nu nne' schanní' cheę xrtizra' Dios.

⁶ Cá'anqueze bsizre bi cuide' ca' cheę xelenná be'e cuínabe'.

⁷ Ca naca da xrlátaje dxunu' lue' dxal-la' gulé'e na benne' ca' ca dxal-la' xelunę'. Gate dxusédenu' benne' ca' dxal-la' gacu' li lazre', ne du lazre'. ⁸ Dخال-la' guchálaju' da naca li lazre' cheę quebe nu seque' si tizra le na. Che gunu' caní, na' che nu benne' nnię' cheęle, wedué'eqezne', lawe' da quebe sua tu da caleļa da dxunle.

⁹ Bzėjni'i benne' ca' zaj nada'u cheę xuluzúę' dizra' cheę xranę' ca naca xúgutę da xelę xranę' le'. Dخال-la' xelunę' da xelexezaca ba lazre' xranę', ne quebe xelexennę' lau xranę'.

¹⁰ Quebe dxal-la' xelebanę' da naca cheę xranę', san dxal-la' xelaque' li lazre', cheę xelexé'e benne' ca da dxelún benne' caní, na' xelennę' chawe' cheę xrtizra' Dios, Benne' weselá cheędxu.

¹¹ Dios ba blé'ene' ca naca da chawe' cheę' cheę xelexá xúgutę bėnneache. ¹² Da xrlátaje cheę Dios dxusede na dxi'u cheę québedxa gundxu da caleļa, ne ca naca xel-la dxezá lazre' da caleļa, san cheę nna be'e cuínadxu, ne gácadxu du lazre', ne gápadxu ba lá'ana Dios lu xęzr la xu nigá ¹³ dxácatę ne dxebézadxu zra xelá' Dios szren, ne weselá cheędxu Jesucristo nen xel-la szren cheę', da na' dxebeza lázredxu. ¹⁴ Le' bzua cuine' lu na' benne' ca' belútię' Le' waláz cheędxu dxi'u cheę bselé' dxi'u lu xúgutę da zrinnaj, na' bca'ana chawe' dxi'u cheę gácadxu bi cheęqueze', ne cheę gundxu da xrlátaje du lázredxu.

¹⁵ Da caní dxal-la' gusédenu' benne' ca'. Gudil-la benne' ca', ne bsizre-ne' dutę xel-la dxenná bea chiu'. Quebe bi da caleļa gunu' cheę quebe nu si tizra lue'.

3

Da dxal-la' xelún benne' zaj nababe' cheę Cristo

¹ Bsa lazre' benne' bíchedxu ca' cheę xelunę' ca dxuluchixruj benne' ca' dxelenná bé'ene', ne benne' xu'u lawe', ne cheę xuluzúę' dizra' cheę benne' ca', ne cheę xelexúę' xelunę' xúgutę da xrlátaje. ² Quebe dxal-la' xelennę cheę nu benne', san dxal-la' xelaque' zren lazre', ne zri'i lazre', ne dxexruj lazre' lau xúgutę bėnneache. ³ Cá'anqueze dxi'u gate nate gúcadxu benne' xala, ne quebe bzúadxu dizra' cheę Dios. Gudadxu caleļa, na' gunná be'e bela' dxen cheędxu dxi'u, cheę bėndxu ca naca xúgutę da guzá lázredxu, ne da bezaca ba lázredxu. Bėndxu da zrinnaj, ne gúcadxu xa lazre'. Belecuide bėnneache dxi'u, na' bzrá'adxu ljwézredxu tudxu xetudxu. ⁴ Gate Dios, weselá cheędxu, blé'ene' da naca chawe' cheę', ne xel-la zri'i lazre' cheę', ⁵ na' bselé' dxi'u, quegá lawe' da bėndxu dxi'u tu da xrlátaje, san lawe' da bexache lazre' dxi'u. Bselé' dxi'u ne

chee da gudibe na dxi'u gate na' bexálajdxu, na' bucube Be' Lá'azxa chee' dxi'u. ⁶ Ne chee Jesucristo, weselá cheedxu, Dios ba núnnale'e dxi'u Be' Lá'azxa chee', ⁷ chee ne chee da naca chawe' chee' gácadxu xrlátaje lau Le', ne zrué'edxu xel-la nabán chadía chacanna da dxebeza lázredxu. ⁸ Da caní zaj naca na da li. Dxaca lazra' gusízrequeznu' benne' ca' ca naca da caní chee xelebé' gunne xue xelún benne' ca' da chawe', benne' ca' dxeléajle'e chee Dios. Da caní zaj naca na da xrlátaje, ne da gaca xuluchine xúgute bénneache. ⁹ Quebe gulapa na'u dizra' xala ca', ne dizra' dxuluzaze bénneache ca naca chee zra xrtawe', ne dizra' da dxun na bénneache chupa la'a, ne da dxulutil-la bénneache da naca chee da bchixruj be'e Moisés. Da caní quebe culuén zaj napa na. Dácheze naca na.

¹⁰ Che nu benne' dxune' le'e chupa la'a, bsizre-ne' tu chupa lasa, ne che quebe dxenne' ca dxu'u le', bebéaje' ládujla le'e ¹¹ lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzría xi na le'.

Da dxal-la' gun Tito

¹² Gate sel-la' Artemas u Tíquico naga zu', ben baxuzre xidu' xedajna'u neda' lu xezre Nicopolis lawe' da bache nuna' sua' nigá beu' zaga ca'. ¹³ Gúcalé Zenas, benne' wedé dizra', ne Apolos, ca da séquenu'. Bnezruj benne' ca' ca da zaj nachíne'e chee chjaque' lu neza chee', na' quebe bi xelexázejne'. ¹⁴ Cá'anqueze benne' zaj nabábalene' dxi'u dxal-la' xulusédie' xelune' da chawe', chee xelácalene' benne' dxelexázejne', chee xelaque' benne' guchine Cristo.

Pablo dxuzé' Tito dizra'

¹⁵ Xúgute benne' zrálene' neda' dxulugape' lue' diuzre. Bgape diuzre benne' ca' zaj nazrí'ine' dxi'u lu da naca chee Cristo. Dxenaba' Dios gun chawe'e xúgutele le'e. ¡Ca'an gaca na!

DIZRA' BZUAJ SAN PABLO CHEE FILEMÓN

Pablo dxugape' diuzre Filemón

¹ Neda', Pablo, xu'a lizre xia lawe' da dxuna' zrin chee Jesucristo, nen bi bíchedxu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. ² Dxugapa' diuzre benne' bíchedxu ca' dxelezrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. ³ Dxenaba' Xradxu Dios ne Xránadxu Jesucristo gunē' da chawe' chee, ne gunne' le'e xel-la' dxebeza zri lazre'.

Ca naca chee Filemón

⁴ Dxápequeza' Dios xcalenu' gate dxuchálajleña' Le' ne dxeajsá lázrqueza' lue', ⁵ lawe' da ba benda' ca nazri'inu' Xránadxu Jesucristo ne ca dxeajlí lazru' Le', ne ca nazri'inu' xúgute' bi ca' chee Dios. ⁶ Dxenaba' lau Dios guzējajni'ine' benne' ca' dxeleajlí lazre' Le' ne chee xel-la' dxeajlí lazre' chiu', ca naca xúgute' da chawe' ca' da nápadxu ne chee Jesucristo. ⁷ Xel-la' zri'i lazre' chiu', bi bicha', dxúnna'le'e na neda' xel-la' dxebe', ne dxutipa na lazra', ca dxutipa na lazre' xúgute' bi chee Dios.

Pablo dxenabe' Filemón tu da gunē' chee Onésimo, bi na'u Filemón

⁸ Chee le' na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, ⁹ dxata' xúeda' lue' lu xel-la' zri'i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. ¹⁰ Dxata' xúeda' lue' tu da gunu' chee Onésimo, bi nácabe' ca zrí'inequeza' lu da naca chee Cristo, neda', xu'a lizre xia nigá.

¹¹ Gate nate Onésimo, bi na'u lue' gúcabe' tu bi wen da calela, san na'a nácabe' wen zrin li lazre' chiu' lue', ne chia' neda'. ¹² Dxesel-la'-be' naga zu'. Bezí' lu na'u-be', nácabe' bi nazrí'ite lazra'. ¹³ Guzá lazra' neda' xegá'analebe' neda' nigá chee gunbe' zrin chia' neda' waláz chiu' lue' dxácatē ne xu'a lizre xia lawe' da dxuna' zrin chee dizra' chawe'. ¹⁴ Quebe dxaca lazra' bi guna' che quebe naca na da nnau' lue', chee gácalēnu' neda' lawe' da naca na ca dxaca lazru' lue', ne quegá lawe' da dxenná be'eda' lue'. ¹⁵ Becuasa Onésimo nen lue' tu chí'idau', san na'a súaletequezebe' lue', ¹⁶ quegá ca tu bi na'u lue', san gácabe' tu bi cháwedxa ca tu bi na'u lue', da zéaje' na, gácabe' tu

bi bichu' nazri'ite lazru'. Neda' nazrí'ile'eda'-be', san lue' dxalla' zrí'idxenu'-be', quegaze ca bènneacheze, san cá'aqueze ca bi bíchedxu, bi chee Cristo.

¹⁷ Chee le na', che dxéquenu' neda' ca bi ljwezru', bezí' lu na'u-be' ca dxezí' lu na'u neda'. ¹⁸ Che bi da calela ba benbe' chiu', u che bi dxál-labe' chiu', neda' quízruja' na. ¹⁹ Neda', Pablo, dxuzúaja' da nigá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. ²⁰ Lue', bi bicha', dxata' xúeda' lue' lu La Xránadxu, ben da guzúa na neda' lu da ba neza.

²¹ Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'. ²² Cá'aqueze bcueza latja naga sua' neda' lawe' da dxebeza lazra' gun Dios da dxenábale Le', gunne' neda' lataj xida' xedajnná'a le'e.

Bi chee Cristo dxulugápabe' diuzre Filemón

²³ Epafra, bi ljwezra', xú'ulebe' neda' lizre xia lawe' da dxunbe' zrin chee Jesucristo, ²⁴ ne Marcos, ne Aristarco, ne Demas, ne Lucas, bi ca' dxelácalebe' neda' lu zrin chee Cristo dxulugápabe' lue' diuzre.

²⁵ Dxenaba' lau Xránadxu Jesucristo gunē' da chawe' chee le'e. Ca'an gaca na.

DIZRA' DA NAZÚAJ CHEE BENNE' HEBREO CA'

Dios ba bchálajleṅe' dxi'u lu dxu'a Zrí'inequeze'

¹ Dios bchálajleṅe' xra xrtáudxu ca' gate nate zane' lasa, ne zane' ca bchálaje' lu dxu'a benne' ca' buluchálaje' waláz chee'. ² Na'a, lu zra caní, Dios ba bchálajleṅe' dxi'u lu dxu'a Zrí'inequeze'. Dios bene' xezr la xu nigá lu na' Zrí'ineṅe' nigá, ne ba bene' naca chee' xúgute da ca' bene'. ³ Zrí'ine Dios nigá naque' Benne' dxulé'ene' ca naca xel-la' szren chee Dios, ne naque' ca da nácaqueze Dios, na' nuxre' xúgute da ca' nune', dxuchínene' dizra' chee' da nápaḷeḷe na xel-la' waca. Gate ba gudúe' dul-la da nabágadxu xeajxedxe'ḷe chalá'a xabēla chee lataj blau chee Dios xabáa.

Zrí'ine Dios nácadxe' blau ca gubáz chee xabáa ca'

⁴ Zrí'ine Dios nácadxe' blau ca gubáz chee xabáa ca' chee Dios, ca naca La Cristo da bzua Dios, nácadxa na blau ca la gubáz chee xabáa ca'. ⁵ Dios cabata' guzre' tu gubáz chee xabáa ca guzre' Cristo, gunné':

Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee xabáa ca gunné' chee Cristo:

Neda' gaca' Xre',

na' Le' gaque' Zrí'ina'.

⁶ Gate bzue' Zrí'ineṅe' lu xezr la xu nigá, gunné':

Xúgute gubáz chee xabáa ca' xelue lá'ane' Le'.

⁷ Ca naca chee gubáz chee xabáa ca', Dios gunné':

Dsel-le' gubáz chee' ca' ca tu be' da dxaca,

ne dxuchínene' gubáz wen zrin chee' ca' ca tu xi'.

⁸ Ca naca chee Zrí'ineṅe', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátaje.

⁹ Nazri'inu' da xlátaje, ne dxezra'u da calela.

Chee le' na' Dios chiu' ba bēnnadxe' Lue'

xel-la dxebe' ca da bnézruje' bi ljwezru' ca'.

¹⁰ Cá'anqueze guzre' Le':

Lue', Xran, nédxudaute' benu' xezr la xu.

Nen xel-la' waca chiu' benu' xabáa.

¹¹ Da caní weledé chee na, san Lue' súatequezu'.

Xúgute da caní welaca gula ca zra lana bēneache.

¹² Na' xutubu' na ca tu ladxe',

ne gucha'u na ca dxun tu benne' dxuché'ḷe zra lané'.

Lue' zúaquezu' chadía chacanna,
 na' xel-la' nabán chiu' quebe téqueze chee na.
 13 Dios cabata' guzre' tu gubáz chee xabáa ca guzre' Zrí'ine',
 gunné':
 Gudxe'e chalá'a xabəla chia',
 cadxa guzúa' benne' ca' dxeledábague' Lue' zran ni'u.
 14 Xúgute gubáz chee xabáa ca' zaj naque' be' ca' dxelún zrin
 chee Dios, na' dxesel-le' gubáz chee xabáa ca' chee xelácaləne'
 benne' ca' dxelezi'e xel-la' weselá.

2

Quebe dxal-la' guzúadxu chalá'ala xel-la' weselá

1 Chee le' na' dxal-la' nna' xánnedxu dizra' da ba bendxu chee
 quebe cuásadxu lu neza chee xel-la' li. 2 Dizra' da gusel-la
 Dios gate nate lu na' gubáz chee xabáa ca' guca na li lazre',
 na' xúgute benne' ca' buluzúe' na chalá'ala, ne quebe buluzúe'
 dizra' ca da gunná Dios, Dios bdee' le' xel-la' zi' ca da dxal-la'
 xezezi'e. 3 ¿Ájazra gaca ladxu che guzúadxu chalá'ala tu xel-la'
 weselá zren caní? Xránaquezdxu bchálaje' chee xel-la' weselá
 nigá nédxute, na' gudé na' buluchálaj benne' ca' belenne' na,
 na' gulenné' naca na da li laudxu dxi'u. 4 Cá'anqueze ba bzua
 chacha Dios na ne chee da dxelunna bea na, ne ne chee da
 zren ca' ben Dios, ne ne chee xel-la' waca zan ca', ne ne chee
 Be' Lá'azxa, Bénnea' benne' dxi'u xel-la' waca ca', ca da guca
 lázrequeze Le'.

Jesucristo ben cuine' ca nácadxu dxi'u

5 Dios quebe bzu'e' lu na' gubáz chee xabáa ca' xezr la xu da
 za za', chee da na' dxuchálajdxu na'a. 6 Naca na ca naxúaj na lu
 xiche lá'azxa, ca da gunná tu benne':

¿Ájazra naca bénneache che Lue', Dios, dxeajsá lazru' chee'?

¿Ájazra naca bénneache, che Lue' dxe'u gunne xue chee le'?

7 Tu chí'idau'ze bzu' bénneache látezdxu ca gubáz chee xabáa ca'.
 Nunu' chee' si'e xel-la' szren, ne xel-la' ba lá'ana,
 ne bzu' lu ne'e xúgute da benu'.

8 Xúgute ba bzu' na zran ni'a le'.

Caní naca, gate Dios bzu'e' xúgute zran ni'a bénneache, quebe
 bi de da quebe guzúa na dizra' chee bénneache, na' quebe ne
 xuluzúa ca naca da ca' dizra' chee'. 9 Na'a dxelé'edxu Jesús,
 Bénnea' bzua Dios guque' tu chí'idau' látezdxu ca gubáz chee
 xabáa ca'. Dios gúnene' gate Jesús waláz chee xúgute bénneache
 lawe' da nazri'ine' bénneache, na' na'a nunézruje' Le' xel-la'
 szren, ne xel-la' ba lá'ana lawe' da gudé'e' lu xel-la' gute zi xa'.

10 Dios benne' xúgute da zaj zua, na' zaj zua na chee gaca ba
 Le'. Le' dxaca lazre' xezezi' xúgute bi chee' ca naca xel-la' szren

chee'. Chee le na' ben na ba xen ben Dios naca Jesucristo dute weselá cheedxu, ne chee da zi' da xa' da gudée' chee séquene' guselé' bènneache chadía chacanna. ¹¹ Benne' caní dxegúa Jesús dul-la da zaj nabague', na' benne' caní, ne Léqueze' zaj naque' bi ca' chee tuze Xradxu. Chee le na' quebe dxedué'e Jesús nne' chee benne' ca', zaj naque' bi biche'. ¹² Naca na ca dxenná lu xiche lá'azxa:

Guchálajqueza' da naca chiu' Lue' lálwela bicha' ca',
na' gúl-laqueza' da güe lá'ana' Lue' ládújla benne' ca' zaj
nazrague' lau Lue'.

¹³ Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benna Dios neda'.

¹⁴ Lawe' da zaj naca belá' dxen benne' ca' zaj naque' bi chee', Le' ben cuine' belá' dxen chee guzéquene' gutie', ne caní bene' chee séquene' guzría xi'e da xriwe', da na' napa na xel-la' dxenná bea gute na bènneache. ¹⁵ Caní guca bselé' xúgute benne' gulaque' ca benne' zaj nada'u xúgute iza zaj naca bané' lawe' da belezrebe' xel-la' gute. ¹⁶ Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham. ¹⁷ Chee le na' ben na ba xen guque' dute ca zaj naca bi biche' ca', chee séquene' gaque' lau Dios tu bxruze blau naque' li lazre', ne dxexache lazre' bènneache, ne chee séquene' gun cuine' tu da dxegúa na dul-la zaj nabaga bènneache. ¹⁸ Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na'a gácalene' benne' ca' dxun zréaje da xriwe' le'.

3

Jesús nácadxe' blau ca Moisés

¹ Le'e, benne' bícha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bénnea' gusel-la Dios chee gaque' bxruze blau chee da dxéajledxu.

² Jesús nigá guque' li lazre' lau Dios, Bénnea' bzue' Le' lu zrin na' da ba bene', ca guca Moisés, guque' li lazre' lu zrin na' bene' lau benne' ca' gulaque' bi chee Dios. ³ Jesús dxal-la' sidxe' xel-la' ba lá'ana ca da si' Moisés, ca dxaca chee benne' dxune' tu xu'u, dxezidxe' xel-la' ba lá'ana ca da dxezí' xu'u ná'queze. ⁴ Tu tu xu'u naca na da ben benne', san Dios nune' xúgute da zaj zua. ⁵ Ca wen zrin chee Dios guca Moisés li lazre' lu zrin na' bene' lau benne' ca' gulaque' bi chee Dios, na' bchálaje' ca naca da nne Dios ca te na'. ⁶ Cristo naque' li lazre' ca Zrí'inequeze Dios laudxu dxi'u. Nácadxu ca lizre Dios

che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

Bi ca' chee Dios xelexezí' lazre' naga zua Dios

⁷ Caní naca, naca na ca da dxenná Be' Lá'azxa lu xiche lá'azxa, dxenné':

Na'a, che le'e dxenle ca da dxenná Dios,

⁸ quebe gácale lázrdau zide' ca gulaca benne' ca' guledábague' Dios,

na' belune' Dios zeđe le'e xixre' lawe' lataj.

⁹ Belún xra xrtaule ca' neda' zeđe chee guna' ca gunnía', lácala belelé'ene' da bēna' lávela chua iza.

¹⁰ Chee le' na' bzra'a xichja' benne' ca',

na' gunnía': Tu dxelebéaj xíchajzqueze benne' caní neda', ne dxeledábague' ca naca da bdxíxruja'.

¹¹ Chee le' na' bzra'a xichja' benne' ca', ne bzua chúchua' da gucha' benne' ca',

gunnía' quebe xelexú'e naga xelexezí' lazre' naga zúaqueza' neda'.

¹² Le'e, benne' bícha'dau', le guxúe cuínale chee quebe gaca lázrdau zide' netule le'e, quebe cuásale lau Dios ban lawe' da quebe dxéajle chee Le'. ¹³ Le gutipa lázrele tule xetule tu zra tu zra, dxácate ne zúadxu lu zra da nunna Dios dxi'u, chee quebe si xe dul-la netule le'e, na' gácale lázrdau zide'. ¹⁴ Che se cháchadxu ca zrin zra cheajsé cheedxu ca naca da dxuxrén lázrequezdxu nédxute, na'a nácadxu bi chee Cristo.

¹⁵ Naca na ca dxenná na lu xiche lá'azxa:

Na'a, che le'e dxenle ca da dxenná Dios,

quebe gácale lázrdau zide' ca gulaca benne' ca' guledábague' Dios.

¹⁶ ¿Nuzra benne' ca' belenne' dizra' chee Dios, na' ca gudé na' guledábague' Dios? Zaj naca xúgute benne' ca' bebéaj

Moisés lu xezr la xu Egipto. ¹⁷ ¿Nuzra benne' ca' bzra'a Dios le' lávela chua iza? Zaj naca benne' ca' belún dul-la, na'

gulátie' le'e xixre' lawe' lataj. ¹⁸ ¿Nuzra benne' ca' bzua chuchu Dios xrtizre' gate guzre' le' quebe xelexú'e naga xelexezí'

lazre' naga zua Le'? Zaj naca benne' ca' guledábague' xrtizra Dios. ¹⁹ Na'a dxelé'edxu quebe guca xelexú'e lawe' da quebe

guléajle'e chee Le'.

4

¹ Caní naca, dxácate ne zua cheedxu da nachebe lazre' Dios chee xexú'udxu naga xezí' lázredxu naga zua Dios, dxal-la' guxúe cuínadxu gagáze nule le'e quebe xexú'ule. ² Cá'anqueze dxi'u ba bendxu dizra' chawe' chee Dios ca da belén benne' ca', san benne' ca' quebe bi da ba neza gulezú'e chee dizra' da belenne' lawe' da quebe guléajle'e chee na. ³ Dxi'u ba

guxéajlédxu, na' chú'udxu naga xezí' lázredxu, ca da gunná Dios gate gunné':

Cheē lē na' bzra'a xichja' benne' ca',

na' bzua chúchua' da gucha' benne' ca', gunniá':

Quebe xelexú'ē naga xelexezí' lazre' naga zua neda'.

Caní gunná Dios lácala ba bsexuzre' zrin cheē' gate na' bente' xēzr la xu, ⁴lawe' da naxúaj na lu xiche lá'azxa ca naca cheē zra gazre', dxenná na:

Lu zra gazre bezí' lazre' Dios lu zrin da bene'.

⁵Xetú dizra' da naxúaj na lu xiche lá'azxa dxenná na:

Quebe xelexú'ē naga xelexezí' lazre' naga zua neda'.

⁶Benne' ca' belenne' dizra' chawe' nigá cheē Dios nédxute quebe belexú'ē lawe' da quebe buluzúe' dizra' ca naca da gunná Dios. Na'a ne zaj zra' benne' dxal-la' xelexú'uqueze' naga xelexezí' lazre'. ⁷Cheē lē na' Dios ba guléaje' xetú zra, gunné': Na'a zra. Caní naca lawe' da dxuchálajlē Dios dxi'u dxuchínene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios,

quebe gácale lázrdau zide'.

⁸Chela belexezí' lazre' benne' ca' bē Josué lataj gulu'ē xēzr la xu na', quegá guchálajdxa Dios cheē xetú zra. ⁹Caní naca na, dē lataj xelú'u bi ca' cheē Dios naga xelexezí' lazre' naga zua Dios, ¹⁰lawe' da xezí' lazre' lu zrin dxun nu benne' chu'ē naga xezí' lazre' naga zua Dios, ca ben Dios, bezí' lazre' lu zrin ben Le'. ¹¹Dxal-la' gun zi lázredxu séquedxu chú'udxu naga xezí' lázredxu gagáze nu benne' gune' ca belún benne' ca' quebe guléajle'ē.

¹²Dizra' cheē Dios naca na da bane, ne napa na xel-la' waca. Naládx na ca tu xia da nalá na dxupa la'ate, ne dxaze na naga dxelezraga bēne'du xú'udxu, ne be' nácaquezdxu, ne dxaze na lu xichaj lázrdau bēneache, na' dxuchi'a na ca naca da dxugú'u bea bēneache ne ca da dxéquene' gune'. ¹³Quebe bi dē da ben Dios da seque' gucache cuina na lau Dios. Xúgutē zaj nalá na, ne zaj naxalaj na lau Bēnea' dxal-la' xulé'edxu Le' ca da bēndxu.

Jesús naque' bxruze blau zrente

¹⁴Jesús, Zri'ine Dios naque' bxruze blau zrente cheēdxu, Bēnea' ba bexu'ē lau Dios. Cheē lē na' dxal-la' sē típadxu lu da dxéajlédxu cheē Dios. ¹⁵Bxruze blau cheēdxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheēdxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bene' dul-la. ¹⁶Cheē lē na' dxal-la' bígadxu du lázredxu lu lataj blau cheē Dios cheēdxu, Bēnea'

nazri'ine' dxi'u, chee xexache lazre' dxi'u, ne dute xel-la' xrlátaje chee' gácalene' dxi'u gate nachínedxu nu gácalé dxi'u.

5

¹ Tu tu bxruze blau dxecá'a Dios ládujla bènneache, ne dxuzúe' le' chee gune' zrin lau Dios waláz chee bènneache ca', ne cu'e guna' lau Dios, ne gutie' béadu ca' ne chee dul-la zaj nabaga' bènneache. ² Cá'anqueze bxruze blau nigá dxate ni'a ne'e lu da ca' dxune' ca da dxaca cheedxu dxi'u. Chee le' na' wape' xel-la' zren lazre' chee benne' ca' quebe dxeléajni'ine', ne dxelune' da calela, ³ na' lawe' da dxate ni'a ne'e, dxal-la' gutie' béadu ca' ne chee dul-la da nabáaqueze', cáteze dxune' ne chee dul-la da zaj nabaga xezícadxa bènneache.

⁴ Quebe nu gaca gun cuina bxruze blau, san Diósqueze dxenné' bènnea', ne dxunézruje' le' xel-la' szren na', ca bene' chee Aarón. ⁵ Cá'anqueze naca na chee Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le':

Lue' nacu' Zri'ina'.

Neda' nácaqueza' Xrau' na'a.

⁶ Cá'anqueze naxúaj na lu xiche lá'azxa ca guzre' Le':

Lue' nacu' bxruze blau chadía chacanna

ca gúcaqueze Melquisedec.

⁷ Gate zua Cristo lu xezr la xu nigá, bchálajlene' Dios, ne guta' xuene' Dios nen chi'e zizraj, ne gudxézrele'e, lawe' da napa Dios xel-la' waca guselé' Le' lu xel-la' gute, na' Dios benne' chee' lawe' da gudape' Xre' ba lá'ana. ⁸ Ca'an guca, lácala naca Cristo Zri'ine Dios, bsédie' guque' wezúa dizra' ne chee xel-la' zi' da gudé', ⁹ na' gate guque' dute Weselá cheedxu ne chee da caní, nadxa guzéquene' bselé' bènneache chadía chacanna, benne' ca' dxuluzúe' dizra' chee', ¹⁰ na' Dios bzue' Le' bxruze blau ca gúcaqueze Melquisedec.

Quebe dxal-la' gusandxu xel-la' dxeajlí lazre' cheedxu

¹¹ Déle'e da dxal-la' guchálaja' ca naca chee da nigá, san naca na stébe guzéajni'ida' le'e na'a, lawe' da quebe ne gaca chéajni'ile na. ¹² Zane' iza ba guca dxéajlele chee Cristo, na' ba gul-la' gusédele benne' xula ca naca chee Le', san dxun na ba xen nu guzéajni'i le'e da xula da quebe nácateca stébe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca. ¹³ Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchínene' dizra' chee xel-la' li. ¹⁴ Xel-la' wagu chee benne' waca naca na chee benne' ca' ba zaj nézene' xelexúnbe'e da naca da xrlátaje, ne da naca da calela.

6

¹ Cheē lē na' québedxa dxal-la' gusédedxu ca da bsédedxu nédxutē ca naca cheē Cristo, san chéajtēzedxu gusédedxu da naca cheē' cheē gácadxu benne' waca. Québedxa bi dxal-la' guchálajdxu cheē da du ca' da bsédedxu nédxutē, ca dxal-la' xexéaje lázredxu cheē da ca' bēndxu da zaj nua na xel-la' gute, ne ca dxal-la' chéajlēdxu cheē Dios, ² ne ca dxal-la' xedxúadxu nisa, ne ca dxal-la' xuluzé̄ ne'ē xíchajdxu, ne ca xelexebán benne' gate, ne ca gun Dios, guchi'ē da nun tu tu bēnneache cheē gudéē' benne' ca' dxelunē' da calela lu lataj ba xa' chadíá chacanna. ³ Cheē lē na' chéajtēdxu lu da naca cheē Cristo, che Dios gunne' dxi'u lataj.

⁴ Benne' ca' ba gulezí'ē ca naca xel-la' naxaní' cheē Dios, ne ba gulezú lawe' xelúnbe'ē da dxunna Dios, ne ba gulezí'ē Be' Lá'azxa, ⁵ ne ba gulezú lawe' xelúnbe'ē da xrlátaje ca' cheē Dios ca naca da xezezí'ē lu xēzr la xu da za za', ⁶ na' te na' che xuluzúē' Dios chalá'ala, québedxa gaca xelexexéaje lazre' lawe' da gaca na ca xuludé'ē Cristo lē'ē xaga begúaj da xula, ne dxelún lē' cheē' lávela xúgutē bēnneache. ⁷ Zaj naque' ca xēzr la xu da dxezí na nisa xiuj. Che xēzr la xu na' dxunna lina chawe' cheē benne' dxelunē' na zrin, naca na da dxun chawe' Dios, ⁸ san che dxachuj na xeche', ne xixre' da quebe bi culuén napa na, quebe bi zaca xēzr la xu na', san naca na tu da xu'u de', na' naga chéajsetē chezxe na.

Xel-la' dxebeza lazre' da nápadxu

⁹ Le'e, benne' bícha'dau', lácala dxuchálajntu' caní, dxuxrén lázrentu' ca naca cheēle le'e wazile le'e da chawe' cheē xel-la' weselá. ¹⁰ Dios dxunē' da xlátaje, ne quebe gal-la lazre' ca naca zrin da ba bēnle, ne ca bzri'ile Lē' gate gúcalele benne' bíchedxu ca', ne ca da tu dxúnzquezle. ¹¹ Dxaca lázrentu' chéajtēze tu tule gunle da caní dutē lázrdaule ca zrin zra cheajsé cheēle, cheē zrué'ele da dxebeza lázrele. ¹² Quebe dxaca lázrentu' xewédele. Dxaca lázrentu' gunle le'e ca belún benne' ca' guleajlí lazre' Dios, ne gulaque' zren lazre', na' gulezí'ē ca da guchebe lazre' Dios gunézruje' cheē'.

¹³ Gate guchebe lazre' Dios bi gunézruje' cheē Abraham, na' bzétajqueze cuine' lawe' da québedxa nu zua nácadxa szren ca Lē', nu guzétaje', ¹⁴ gunné': "Da li gúnqueza' da chawe' chiu' lue', ne guzánqueza' zri'ine zre su'." ¹⁵ Abraham guleze' dutē xel-la' zren lazre', na' cheē lē na' guzi'ē da guchebe lazre' Dios gunézruje' cheē'. ¹⁶ Gate nu dxuluzetaj bēnneache, dxuluzétaje' benne' nácadxe' szren ca léqueze', ne gate bi dxuluzúa chúchue', ne dxuluzétaje' Dios, québedxa bi de' da bi xelenné'. ¹⁷ Cheē lē na' Dios bzua chúchue' da guchebe lazre', ne bzetaj cuine', lawe' da guca lazre' gulé'ene' benne'

ca' xelezí'ę da guchebe lazre', Le' gune' ca naca da guchebe lazre', ne quebe guché'ę ca gune'. ¹⁸ Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee da ca' Dios ba nunne' dxi'u tu da gun na dxi'u dipa lazre', dxi'u na' ba nézedxu dxuxúe Le' dxi'u, ne nuxrén lázredxu si' lu nnadxu da dxebeza lázredxu ca naca da gunne' dxi'u. ¹⁹ Da nigá dxebeza lázredxu nuxru chacha na bénne'du xú'udxu ca dxun tu xia da dxuxru chacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúale na Cristo cuzru ladxe' da ze lu xudau' da zua xabáa, ²⁰ naga guxú'u Jesús waláz cheedxu chee gusalaje' neza naga tedxu, na' Le' naque' tu bxruze blau chadía chacanna ca guca Melquisedec.

7

Jesús naque' bxruze blau ca guca Melquisedec

¹ Melquisedec nigá guque' wenná bea chee xezre Salem, ne bxruze chee Dios szrentę. Gate ze za' Abraham lu wedil-la gate bzétaje' benne' wenná bea ca', na' Melquisedec nigá xeajchague' le', ne gunabe' lau Dios gune' da chawe' chee Abraham, ² na' Abraham bnézruje' chee le' tu cue' chee da chi cue' ca' ca naca da bzrué'ene' lu wedil-la na'. La Melquisedec zéaje na wenná bea xlátaje, ne lawe' da guque' benne' wenná bea chee xezre Salem, da zéaje na xel-la' dxebeza zri lazre', le' zéajequeze na wenná bea chee xel-la' dxebeza zri lazre'. ³ Quebe naxúaj na zua xre', ne xrne'ę, ne xra xrtawe', ne quebe naxúaj na che gúlaje', ne che gutie'. Caní naca na, da guca Melquisedec dxulé'e na ca naca chee Zri'ine Dios, naque' bxruze blau chadía chacanna.

⁴ Le na' xque na'a ca szren guca Melquisedec, che bnezruj xra xrtáudxu Abraham chee le' tu cue' chee da chi cue' chee da guque'ę lu na' wenná bea ca' lu wedil-la na'. ⁵ Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xelezí'ę tu cue' chee da chi cue' ca' da xelizruj benne' Israel ca', benne' zaj naque' xrtia ljwezre', lácala zaj naque' zri'ine zre sua Abraham ca zaj nácaqueze benne' ca'. ⁶ Melquisedec, benne' quebe naque' xrtia Leví guzi'ę tu cue' chee da chi cue' ca' da gudizruj Abraham, bénnea' dxal-la' si'ę da guchebe lazre' Dios. Cá'anqueze Melquisedec gunabe' lau Dios gune' da chawe' chee Abraham, ⁷ na' dxelenná xúgute bénneache nácadxa blau bénnea' dxenabe' lau Dios gune' chawe' chee benne' xula ca' quézcala bénnea' si'ę da chawe' na' dxenabe'. ⁸ Na'a benne' ca' dxelezi'ę tu cue' chee da chi cue' ca' zaj naque' benne' dxelate, san ca naca chee Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutie'. ⁹ Ca naca chee Leví, ne ca naca

chee xúgute bxrúze ca' zaj naque' zri'ine zre sua Leví na', benne' ca' dxelezí'e na'a tu cue' chee da chi cue' ca', wácaqueze nnadxu cá'anqueze benne' caní gulíruje' chee Melquisedec tu cue' chee da chi cue' gate na' bezrague' Abraham, ¹⁰ lawe' da wazeque' nnadxu ne zaj zua zri'ine zre sua Abraham lu bel-la' dxen chee', benne' quebe ne xelalaj gate na' bdxuaj Melquisedec xejchague' Abraham na'.

¹¹ Benne' Israel ca' gulezí' lu ne'e da bdxixruj bea Dios lu na' bxrúze ca' zaj naque' xrtia Leví. Chela guzeque' da belún bxrúze ca' gun na li lazre' benne' ca' buluzúe' dizra' chee da bdxixruj bea Dios na', na' quebe ben na ba xen la' xetú bxrúze ca guca Melquisedec, ne quegá ca guca Aarón. ¹² Che xezrá' ca dxal-la' gaca bxrúze na', na' dxál-la'queze xezrá' da nadxixruj bea na'. ¹³ Xránadxu, Bénnea' naxúaj na chee' gaque' bxrúze ca guca Melquisedec, nababe' xetú cue' xrtia Israel ca', benne' ca' netue' quebe ne gaque' bxrúze. ¹⁴ Naca bea na nababa Xránadxu xrtia Judá, na' Moisés quebe gunné' xelaca benne' caní bxrúze.

¹⁵ Da nigá naca béadxa na che bxrúze cube na' dxal-la' gaque' ca guca Melquisedec, ¹⁶ ne bxrúze cube nigá quebe gaque' bxrúze ne chee tu da nadxixruj bea da dxenná na nu xrtia dxal-la' gaque'. Gaque' bxrúze lawe' da nape' xel-la' waca chee tu xel-la' nabán da quebe te chee na. ¹⁷ Naca chee' ca da dxenná Dios:

Lue' nacu' bxrúze chadíá chacanna ca da guca Melquisedec.

¹⁸ Caní guca, bedxúaj chalá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, ¹⁹ lawe' da quebe guca da gunná bea Moisés gun na bénneache li lazre'. Na'a nápadxu tu xel-la' dxebeza lazre' da cháwedxa, na' ne chee na dxebígadxu lau Dios.

²⁰ Gate Dios bene' Jesús bxrúze, bzetaj cuine'. ²¹ Quebe bzetaj cuine' gate bzue' xezícadxa bxrúze ca'. Gate bene' Jesús bxrúze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'e xrtizre'.

Gunné': "Lue' nacu' bxrúze chadíá chacanna ca da guca Melquisedec."

²² Chee le' na' Jesús dxun chúchue' tu xel-la' wezría da nácadxa chawe' ca da nedxu. ²³ Xezícadxa bxrúze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledíe'. ²⁴ Jesús naque' tu bxrúze chadíá chacanna lawe' da quebe gatie'. ²⁵ Chee le' na' dxezéquene' guselé' chadíá chacanna benne' ca' xelebigue' lau Dios ne chee Le', lawe' da naca ban Le' chadíá chacanna chee gudé' dizra' chee benne' ca' lau Dios.

²⁶ Jesús naque' bxruze blau, bxruze na' dxechínedxu. Naque' lá'azxa, ne quebe bi da calela bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute' da zaj zua xabáa. ²⁷ Quebe naque' ca xezícadxa bxruze ca', benne' ca' ben na ba xen belutie' béadu ca' tu zra tu zra, béadu ca' buluzúe' nedxu ne chee xtúl-laqueze', na' ca gudé na' buluzúe' béadu xula ca' ne chee xtul-la bènneache. Jesús tu lásaze bzua cuine' ne chee dul-la zaj nabaga xúgute' bènneache. ²⁸ Da bdxixruj bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé bla' da nadxixruj bea na', bzue' tu bxruze blau naque' Zrí'inequeze', Bénnea' ben Dios naque' tu bxruze blau li lazre' chadía chacanna.

8

Jesús naque' bxruze blau cheedxu

¹ Da naca blaudxa chee da caní dxennantu' naca na da nigá: Zua tu bxruze blau cheedxu caní, Bénnea' dxe'e chalá'a xabéla chee lataj blau chee Dios xabáa, ² ne naque' bxruze blau dxune' zrin lu lataj lá'azxa li, da ben Xránadxu, quegá bènneache. ³ Xúgute' bxruze blau nuzúa Dios le' chee xelegú'e guna' lau Dios, ne xelútie' béadu ca' lau Dios. Chee le' na' dxun na ba xen bi guzúa Cristo lau Dios. ⁴ La zua Cristo xezr la xu nigá, quebe gague' bxruze lawe' da ne zaj zra' bxruze ca' dxelegú'e guna' ca nadxixruj bea da bde Moisés. ⁵ Zrin dxelún bxruze caní naca na ca tu da dxulé'eze na, ne ca tu zrúlaze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zue' gune' lataj lá'azxa: "Bxue xanne' gunu' xúgute' na cáteze naca da ble'eda' lue' lu xi'a na'." ⁶ Na'a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchebe lazre' da zaj naça na cháwedxa.

⁷ La guca li lazre' xel-la' wezría da bene' nedxu, quebe ben na ba xen gune' xel-la' wezría gudxupe' na'. ⁸ Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra gate guna' tu xel-la' wezría cube nen benne' Israel ca', ne benne' Judá ca'.

⁹ Quebe gaca na ca guca xel-la' wezría da bena' nen xra xrtaule ca' gate becá'a ne'e, ne bebéaja' benne' ca' lu xezr la xu Egipto. Caní guna' lawe' da quebe buluzúe' dizra' xel-la' wezría da nuna', na' chee le' na' guleaj xichja' benne' ca'. Da ni dxenná Xránale.

¹⁰ Xel-la' wezríá guna' nen benne' Israel ca' ca te chee lu zra caní gaca na caní, dxenná Xránale: Guzúa' da gudxixruj be'a lu xichaj lázrdau benne' ca', ne guzúaja' na lu lázrdawe'.

Nadxa gaca' neda' Dios chee benne' ca', na' le' xelaque' bi chia' ca'.

¹¹ Quebe gun na ba xen xulusede ljwezre', ne quegá nu benne' xe'e bi biche': Benbea Xránadxu. Xúgute' xelúnbe'e neda', benne' cá'aze, ne benne' blau.

¹² Gunité lawa' chee benne' ca' ca naca da calela da zaj nune', ne québedxa cheajsá lazra' chee dul-la da zaj nune'.

¹³ Gate dxuchalaj Dios chee tu xel-la' wezríá cube, naca na lawe' da ba gunné' chee da nedxu naca na da gula, na' da ba dxaca na da gula, ne da gulasa la xenítete na.

9

Lataj lá'azxa da zua lu xezr la xu, ne da zua xabáa

¹ Gate ne zua xel-la' wezríá nedxu, zaj de da nadxixruj bea ca dxal-la' xelún bxruze ca' tu lu xudau' da zua xezr la xu nigá. ² Xudau' nedxu caní guca na tu xu'u xide zren. Lu lataj nedxu chee xudau' na' da nazí le na Lataj Lá'azxa zaj zua da dxusa'ní', ne tu ta'a naga zria xeta xtila lá'azxa. ³ Cuzre naga ze ladxe' gudxupe' zua xetú lataj da nazí le na Lataj Lá'azxa Blau. ⁴ Lu lataj nigá zaj zua tu tá'adau' naga xezxe xala, ne tu xi'ina chee xel-la' wezríá da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta maná. Cá'anqueze lu'ule na xu'u xágadau' da bexru Aarón da na' bezríá na, ne zaj xu'u na xiaj ca' naga zaj naxúaj dizra' chee xel-la' wezríá. ⁵ Lawe' xi'ina nigá zaj zua gubáz chee xabáa ca' zaj naca na oro, da dxululé'e na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bènneache. Québedxa séquentu' guchálajntu' ca naca chee da caní na'a.

⁶ Gate ba nagá'ana chawe' da caní, na' bxruze ca' dxelú'unqueze' lu lataj nedxu chee lataj lá'azxa chee xelune' zrin chee xel-la' bxruze chee'. ⁷ Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bènneache ca'. ⁸ Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácate dxelune' zrin chee xel-la' bxruze chee' lu lataj nedxu chee lataj lá'azxa na'. ⁹ Xúgute' da caní zaj naca na da dxululé'eze, da dxaca lu zra na'a zra, lawe' da

guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bèneache dutē li lazre'. ¹⁰ Da caní zaj naca na chee da dxelé'aj dxelawē', ne chee da dxulucá'ana chawe' cuine', ne chee da nadxixruj bea ca naca chee belá' dxen chee bèneache, da ca' bzua Dios ca zrindxa zra guché'e da ca'.

¹¹ Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lázredxa. Quebe naca na tu da zaj nun bèneache, da zéaje na, quebe naca na chee xezr la xu nigá. ¹² Cristo ba guxú'e Lataj Lá'azxa Blau, quegá chee guzú'e dxen chee béadu ca', ne chee medu ca', san chee guzú'e dxen cheéqueze', na' guxú'e ga na' tu lásaze lawe' da ba bene' xel-la' weselá chadía chacanna cheedxu dxi'u. ¹³ Da li dxen chee bezre, ne chee béadu ca', ne de chee bézredu ca', bea ca' dxuluzezxe' lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios. ¹⁴ Che caní naca na, wazéquedxa dxen chee Cristo, Bénnea' bzua cuine' lau Dios ne chee Be' Lá'azxa dutē xel-la' li lazre' chee', na' dxen chee' na' dxibe na xichaj lázrdaudxu chee da bendxu da nua na xel-la' gute, chee séquedxu gundxu zrin chee Dios ban.

¹⁵ Chee le' na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunite lau Dios cheedxu ca naca dul-la da bendxu gate ne zúadxu lu xel-la' wezría nedxu, na' na'a benne' ca' ba gunné Dios waca xelezí'e ca naca da ca' guchebe lazre' Dios, da zaj naca na chadía chacanna. ¹⁶ Gate tu benne' dxune' tu xiche da dxelá'a na da de chee', dxun na ba xen gulé'edxu ba nate bénnea' chee gundxu ca dxenná xiche na'. ¹⁷ Xiche na' quebe bi seque na dxácatē ne naca ban benne' bene' na, san gate ba gute bénnea', na' seque na. ¹⁸ Chee le' na', xel-la' wezría nedxu na' guzúa chuchu na ne chee dxen da buluzrí'e na. ¹⁹ Moisés blabē' xúgute da nadxixruj bea da zaj naxúaj na lu dizra' chee Dios lau xúgute bèneache, na' ca gudé na' guqu'é'e zrila' da nadxé na da xrna, ne tu zruze xaga hisopo, na' gusebise' na dxen chee medu ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bèneache ca'. ²⁰ Nadxa guzre' benne' ca': "Dxen nigá naca na da dxuzúa chuchu na xel-la' wezría da nun Dios nen le'e." ²¹ Cá'anqueza bzra Moisés dxen lu lataj lá'azxa, ne lu xúgute da dxuluchíne'e lu zrin da dxelún bxruze ca'. ²² Ca naca da bdxixruj bea Dios, dxal-la' xulucá'ana chawe' xúgute da ca' nen dxen, na' che quebe nu gulalaj dxen, Dios quebe gunite lawe' chee bèneache ca naca dul-la da zaj nabague'.

Dxen chee Jesucristo dxegúa na dul-la

²³ Caní ben na ba xen xulucá'ana chawe' da ca' zaj naca na da dxululé'eze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. ²⁴ Cristo quebe guxú'ē lu lataj lá'azxa da zaj nun bēneache, da na' naca na tu da dxulé'eze ca naca lataj lá'azxa li da zua xabáa, san guxú'ē xabáqueze, naga zue' na'a lau Dios, dxudé' dizra' cheēdxu dxi'u. ²⁵ Bxruze blau chee benne' judío ca' dxu'ē lu lataj lá'azxa blau tu iza tu iza chee guzú'ē ga na' dxen da quebe naca cheéqueze'. Na'a Cristo quebe dxuzúa cuine' zane' lasa. ²⁶ La ben na ba xen guzúa cuine' zane' lasa, cá'anqueze zane' lasa gatiē' ca gudé bene' xezr la xu nigá. Na'a, gate ba bzrin zra dxaca li ca da guchebe lazre' Dios, Cristo ba blē'ē tu lásaze, na' bzua cuine' chee cue' dul-la zaj nabaga bēneache. ²⁷ Ca dxun na ba xen xelate xúgute bēneache tu lásaze, na' te na' Dios guchi'ē da zaj nun tu tuē', ²⁸ cá'anqueze Cristo bzua cuine' chee gutiē' tu lásaze chee gudú'ē dul-la zaj nabaga' benne' zantē. Te nigá xelē'ē da gudxupe', quegádxa chee cue' dul-la, san chee xedajselé' xúgute benne' dxelebeze' Le'.

10

¹ Da nadxixruj bea da bde Moisés guca na ca tu zról-laze chee da chawe' ca' da dxal-la' xeledá', ne quegá naca na léqueze na. Chee le na' da ca' buluzúa bxruze ca' lau Dios ca nadxixruj bea na', da ca' buluzú'ē tu iza tu iza, quebe gulezeque na xelún na benne' ca' li lazre', benne' ca' gulebiguē' lau Dios. ² La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladxē benne' ca' lu dul-la zaj nabaguē', québedxa zaj nabaguē' dul-la. ³ Na'a da ca' buluzú'ē lau Dios tu iza tu iza bulusá na lazre' chee dul-la da zaj nabaguē', ⁴ lawe' da quebe guzeque' dxen chee bezre ca', ne dxen chee béadu ca' cua na dul-la zaj nabaga bēneache.

⁵ Chee le na', gate bla' Cristo lu xezr la xu nigá, guzre' Dios: Quebe dxaca lazru' guna', ne béadu ca' nu gute lēba' lau'. Na'a ba bēnu' bēl-la' dxen chia' nigá.

⁶ Quebe dxezaca ba lazru' béadu ca' dxuluzezxē' lau', ne béadu ca' dxelutiē' lau' chee cua na dul-la zaj nabaguē'.

⁷ Nadxa gunnía': "Nigá za'a neda' chee guna' ca da nnau' Lue', Dios,
ca naxúaj na chia' neda' lu xiche lá'azxa."

⁸ Nédxula gunné': "Quebe dxaca lazru', ne quebe dxezaca ba lazru' guna', ne béadu ca' nu gute lēba' lau', ne béadu ca' dxuluzezxē' lau', ne béadu ca' dxelutiē' lau' chee cua na dul-la zaj nabaga bēneache." Caní gunné' lácala zaj naca na da

nadxixruj bea na xuluzúe' na lau Dios. ⁹ Ca gudé na' gunné': "Nigá za'a neda' chee guna' ca da nnau' Lue', Dios." Da nigá zéaję na gudée' lu waláz chee da ca' buluzúa bxruze ca' lau Dios, gate bzua cuine' lau Dios ne chee dul-la zaj nabaga bėnneache. ¹⁰ Dios ba bca'ana chawe' dxi'u lu dul-la nabágadxu lawe' da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

¹¹ Xúgutę bxruze judío dxelune' zrin lau Dios tu zra tu zra, ne zane' lasa dxuluzrię' lau Dios da cá'anqueze lácala da ca' cabata' xezezeque na xelegúa na dul-la chee bėnneache.

¹² Jesucristo bzrie' lau Dios tuze da dxugúa na dul-la, na' gudé na' gudxé'e chalá'a xabela chee Dios. ¹³ Zue' na'a dxebeze' zra gate guzúa Dios benne' ca' dxeledábague' chee' zran ni'e.

¹⁴ Caní dxune' lawe' da bca'ana chawe' chadía chacanna benne' ca' zaj naque' bi chee Dios. Caní bene' gate bzua cuine' lau Dios tu lásaze. ¹⁵ Caníqueze dxenná Be' Lá'azxa lawe' da gunné' nédxula:

¹⁶ Caní naca xel-la' wezríá guna' nen benne' Israel ca' ca te chee lu zra caní, dxenná Xránale:

Guzúa' da nadxixruj bea na' lu xichaj lázrdau benne' ca', ne guzúaja' na lu lázrdawe'.

¹⁷ Ca gudé na' dxenné':

Cabátadxa cheajsá lazra' chee dul-la da zaj nabague', ne chee da calęla ca' da zaj nune'.

¹⁸ Ca'an naca, gate Dios ba bnite lawe' chee bėnneache ca naca dul-la da zaj nabague', québedxa dxun na ba xen bi xuluzúe' lau Dios chee cua na dul-la ca'.

Dxal-la' bígadxu lau Dios

¹⁹ Chee le na', benne' bícha'dau', waca chú'udxu lu lataj lá'azxa blau dutę lázrdaudxu ne chee dxen chee Jesucristo da blalje'. ²⁰ Dxezrindxu lau Dios, dxededxu tu neza cube, da quebe naca na ca da xjácale bxruze ca' lu lataj lá'azxa. Dxededxu neza da naca Cristoqueze, Bėnnea' zúale Dios xabáa.

²¹ Jesús naque' bxruze blau cheedxu, ne zaj xu'u lu ne'e bėnneache chee Dios. ²² Chee le na' dxal-la' bígadxu lau Dios dutę lázrdaudxu ne dutę xel-la' dxeajlí lazre' li, lawe' da bca'ana chawe' Le' lázrdaudxu chee québedxa sua da stębe lu xichaj lázrdaudxu ca naca chee dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'.

²³ Dxal-la' sua cháchadxu ca naca da dxebeza lázredxu chee da dxéajledxu, ne quebe guchadxu ca dxundxu, lawe' da gun Dios ca da guchebe lazre' gunę cheedxu. ²⁴ Dxal-la' quilaj lázredxu ca gundxu gácale ljwézredxu tudxu xetudxu chee zri'i ljwézredxu, ne gundxu da xrlátaje. ²⁵ Quebe dxal-la' gusandxu zezragadxu lau Dios ca dxelún bal-la benne'. Dxal-la' gutipa

lazre' l'jwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

²⁶ Che núnbeadxu ca naca xel-la' li chee Dios, ne chéajdxadxu gundxu dul-la, québedxa bi de da cua na dul-la bágadxu. ²⁷ Lu xel-la' dxezrebe súadxu da naca chee zra guchi'a Dios, ne chee xi' da guzrí'a xi na benne' ca' dxeledábague' chee Dios. ²⁸ Gate nu benne' bzue' chalá'ala da gunná bea Mnoisés, ne gulezrá' chupa u chunna benne' belexechebe' chee da ben bénnea', na' belutié' bénnea', ne quebe belexache lazre' le'. ²⁹ Tu da stebe zrendxa dxal-la' xelezí' benne' ca' dxuluzúe' chalá'ala Zrí'ine Dios, ne dxulucá'ana dí'taje' dxen chee', da blalje', dxen na' dxuzú'a chuchu na xel-la' wezrí'a chee Dios, ne dxucá'ana chawe na benne' ca', na' dxelenné' schanni' chee Be' Lá'azxa chee Dios, Bénnea' nazri'ine' le'. ³⁰ Ba núnbeadxu Xránadxu, Bénnea' gunnáqueze': "Neda' xebéaj lazra' bénneache. Neda' gunézuja' lazruj chee benne' ca'." Cá'aqueze gunné': "Xránale guchi'e chee bénneache chee'." ³¹ Da dxal-la' xelezrebe bénneache naca da stebe da gun Dios benne' ca'. ³² Le gusá lázrele le'e iza da ba guledé, gate za guzítele xel-la' naxaní' chee Dios, na' dute xel-la' zren lazre' bchaga laule xel-la' zi' da gudele. ³³ Bál-lale le'e bulucháchalene', ne belú'e le'e lávela bénneache, na' xebál-lale le'e guzáca'le gate guná'ale benne' ca' guledé'e xel-la' zi' caní. ³⁴ Bexache lázrele benne' gulezrá' lizre xia, ne dute xel-la' dxebé bchaga laule da belune' gate gulequé'e ca da ná'pale, lawe' da nézele ná'pale xabáa da zácadxa na, ne da naca na da chadí'a chacanna. ³⁵ Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da si'le. ³⁶ Le'e dxal-la' gácale zren lazre' chee gunle ca da nna Dios, na' sile ca da guchebe lazre' Dios gunne' chee. ³⁷ Naca na ca dxenná xiche lá'azxa:

Xátedauze de,

na' xelá' Bénnea' dxal-la' xelá', ne quebe chene'.

³⁸ Benne' naque' xlátaje lawa' neda',

gata' chee' xel-la' nabán li lazre' lawe' da dxéajle'e chia',

na' che cueaj xíchaje' neda' quebe xezaca ba lazra' nen bénnea'.

³⁹ Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebí'a xi'e. Nácadxu tuze nen benne' dxeléajle'e chee Dios, na' xelelá bénne'du zaj xu'e.

11

Xel-la' dxeajlí lazre'

¹ Che nápadxu xel-la' dxeajlí lazre' dxuxrén lazrdxu sidxu da dxebézadxu, ne nézquezdxu naca da li da quebe dxelé'edxu.

² Xra xrtáudxu ca' belexegá'ane' xrlátaje lau Dios lawe' da guléajle'e chee'.

³ Lu xel-la' dxeajlí lazre' cheeđxu nezdxu ben Dios xęzr la xu nigá, bchínene' dizra' chee', na' ca naca da dxelé'edxu na'a ben Dios le na nen da quebe nalá' gate nate.

⁴ Abel, lu xel-la' dxeajlí lazre' chee', bzue' lau Dios tu guna' da zácadxa na ca da bzua Caín, na' chee le na' Dios gunné' naca xlátaje Abel, ne guzi'e guna' chee'. Ca'an naca, lácala ba gute Abel, ne dxusédenę' dxi'u ne chee da bene' lawe' da gudape' xel-la' dxeajlí lazre'.

⁵ Enoc, lu xel-la' dxeajlí lazre' chee', Dios beche'e le'. Quebe gutie', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios. ⁶ Quebe gaca nu gun da xezaca ba lazre' Dios che quebe dxeajlí lazre' Le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexílaje' Le'.

⁷ Noé, lu xel-la' dxeajlí lazre' chee', gate Dios guzre' le' nédxula ca da dxal-la' gaca, bzue' dizra' chee Dios, ne bene' tu da zren da dxedá lawe' nísadau' chee xeledá xrtie' ca'. Guxeajlí lazre' Noé Dios, san gulebía xi' bénneache zaj zre'e xęzr la xu na', lawe' da quebe guleajlí lazre' Dios. Dios bca'ane' Noé xrlátaje lawe' da guxeajlí lazre' Le'.

⁸ Abraham, lu xel-la' dxeajlí lazre' chee', gate Dios gunné' le', bzue' dizra', ne guz'e zéaje' tu lu xęzr la xu da guchebe lazre' Dios gunézruje' chee'. Bdxuaje' lázrie', ne quebe nézene' naga zéaje'. ⁹ Lawe' da guxeajlí lazre' Dios, guzúa Abraham lu xęzr la xu na' da guchebe lazre' Dios gunézruje' chee', naga naca xęzr la xu chee benne' zitu' ca'. Guzúe' tu lu xu'u ladxe', ne cá'aqueze ben Isaac, ne Jacob, benne' ca', cá'aqueze Dios guchebe lazre' xelezí'e da na' gunezruj Dios le'. ¹⁰ Caní ben Abraham lawe' da guleza lazre' chu'e lu xęzre na' da quebe te chee na, da na' guleche Dios, ne da ben Léqueze'.

¹¹ Cá'aqueze Sara, lácala ba nácale'e benne' gula, ne quebe nu bi chee' dxalaj, san xel-la' dxeajlí lazre' chee' guque' xrna bidau'. Guzúa tu bi biu chee' lawe' da guxeajlí lazre' Dios gunę' ca da guchebe lazre'. ¹² Caní guca, Abraham, lácala ba gúxrule'e, guxánle'e zri'ine zre suę' ca naxán xuzre' da zaj dxe' dxu'a tu yegu zren, da quebe nazeque' gulábadxu.

¹³ Xúgute benne' caní gulatie', ne quebe ne xelezí'e da ca' nachebe lazre' Dios, san lawe' da guleajlí lazre' Dios, beledé'ene' na zítu'la, na' belexezaca ba lázrele'ne' na. Caní bululé'ene' gulaque' ca benne' zitu', benne' guledeze lu xęzr la xu nigá. ¹⁴ Benne' dxuluchálaje' caní dxululé'ene' dxeledé' dxelexílaje' tu lazrie'. ¹⁵ La buluwía lazre' ca naca xęzr la xu naga gusá'aque', na' waca xelexezrine' na'. ¹⁶ Gulaca lazre' tu lazrie' da naca na cháwe'dxa, da na' naca na lazrie' da zua

xabáa. Chee le na' Dios quebe dxexedué'ene' gate dxelenná benne' ca' naque' Dios chee', na' nucueze' tu xezre naga xelezúa benne' ca'.

¹⁷ Gate guca lazre' Dios nézene' ca naca xel-la' dxeajlí lazre' chee' Abraham, na' lu xel-la' dxeajlí lazre' chee' guché'e Isaac chee' gutie'-be' lau Dios. Ba zue' gutie' bi tu licha' chee' lácala ba nachebe lazre' Dios, gunné': ¹⁸ "Ne chee' Isaac wazrále'e zri'ine zre su'." ¹⁹ Abraham bxren lazre' Dios wazéquene' gusebané' benne' gate, na' waca nnadxu bezí' lu ne'e zrí'ine' Isaac ládujla benne' gate.

²⁰ Isaac, lu xel-la' dxeajlí lazre' chee', guchebe lazre' xelezí' zrí'ine' Jacob, ne Esaú da xrlátaje ca'. ²¹ Jacob, lu xel-la' dxeajlí lazre' chee', gate zua gatie', guchebe lazre' xelezí' tu tu zri'ine José da xrlátaje ca', ne be lá'ane' Dios, nuchiche tipe' xágadu nuxre'. ²² José, lu xel-la' dxeajlí lazre' chee', gate ba zua gatie' gunné' welexedxúaj benne' Israel ca' lu xezr la xu Egipto, ne bdxixruj be'e ca dxal-la' xelune' chee' zrita xu'e.

²³ Gate gulaj Moisés, xra xrne'e, lu xel-la' dxeleajlí lazre' chee' bulucache' lebe' lawe' chunna beu', lawe' da belelé'ene' naca bidu na' xrtanle'e, ne quebe belezrebe' benne' wenná bea, bēneea' bdxixruj be'e xelate bidu ca'. ²⁴ Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, ²⁵ san guca lázredxe' té'e' xel-la' zi' nen bi ca' chee' Dios quézcala sue' tu chí'idau' lu da ba neza chee' da naca dul-la. ²⁶ Gúquene' nácadxa chawe' gate belún lala bēneache chee' ca da guca chee' Cristo, quézcala gape' ca naca da gunní'a chee' xezr la xu Egipto, lawe' da dxenné'e da gunezruj Dios le'. ²⁷ Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee' benne' wenná bea, na' guzúa chúchue' ca tu benne' dxelé'ene' Dios, Bēneea' quebe gaca nu le'e.

²⁸ Moisés, lu xel-la' dxeajlí lazre' chee', bene' Laní Pascua gate na' bdxixruj be'e xuluzrá benne' Israel ca' dxen le'e xaga dxa xu'u chee' quebe gute gubáz chee' xabáa chee' xel-la' gute netú zri'ine benne' Israel ca', bi biu nedxu. ²⁹ Benne' Israel ca', lu xel-la' dxeleajlí lazre' chee', beledé'e lu Nísadau' Xrna ca benne' dxeledé lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chi'i benne' Egipto ca', na' gultatie'.

³⁰ Benne' Israel ca', lu xel-la' dxeleajlí lazre' chee', guzré'e ze'e da naxechaj na xezre Jericó ca gudé guledé benne' Israel ca' bezúate xezre na' tu tu lasa du gazre zra. ³¹ Rahab, nu'ula dxezí' lu ne'e benne' zaj xu'e neza, lu xel-la' dxeajlí lazre' chee', quebe gutie' tu zren nen benne' Jericó ca', benne' quebe

buluzúa dizra' chee Dios, lawe' da gudapa le' ba lá'ana benne' Israel ca', benne' xeajlenná' lane' xezre na'.

³² ¿Bíradxa nnia'? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefté, ne ca ben David, ne ca ben Samuel, ne ca belún benne' ca' gulenné' waláz chee Dios. ³³ Benne' ca' lu xel-la' dxelejli lazre' chee' gulezi'e xezr la xu ca' chee benne' xula, ne gulenná be'ene' cháwe'dau' benne' waláwr chee' ca', na' gulezi'e da guchebe lazre' Dios, lawe' da gúcalene' le'.

Belelé' lu dxu'a bezre xixre' ca'.

³⁴ Buluxusule' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulaca lu ne'e da guta' chee benne' ca' guledábague' le'.

³⁵ Nu'ula ca' belezi' lu ne'e benne' gate chee' ca', benne' belexebáne'.

Xebal-le' guláti'e gate buludé'e le' ba xa',

lawe' da quebe belú'e lataj nu gusán le',

chee xelezrué'ene' xel-la' dxexebán

chee xezezi'e xetú xel-la' nabán da naca na da li.

³⁶ Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

³⁷ Beluti'e xebal-le' nen xiaj,

na' xebal-le' gulecheze' le' nen xia.

Xebal-le' buludé'e le' lu da stebe ca',

na' xebal-le' beluti'e nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.

Baxache' gulaque', na' guledé'e lu da zi' da xa',

na' buluzalje' le'.

³⁸ Bénneache zaj zra' lu xezr la xu nigá quebe zaj naca chee' xezezi'e ba neza chee benne' caní. Tu guledázqueze' le'e xixre', ne lu xi'a ca', ne lu bluaj ca', ne lu bluaj xu ca'. ³⁹ Xúgute benne' ca' bca'ana chawe' Dios le' lawe' da guleajli lazre' Le', san quebe ne xezezi'e ca naca da guchebe lazre' Dios, ⁴⁰ lawe' da nucueza Dios tu da nácadxa chawe' cheedxu dxi'u, chee xelexaca benne' ca' li lazre' tu zren nen dxi'u.

12

Dxal-la' nna'dxu Jesús

¹ Lawe' da zaj naxéchaj benne' zante dxi'u, benne' ca' ba bululé'ene' ca guléajle'e chee Dios, dxal-la' guzúadxu chalá'ala xúgute da dxululale na dxi'u, ne dul-la da naxel-la na dxi'u, na' lu duté xel-la' zren lazre' cheedxu gundxu zrin chee Dios, da

naca na ca dxezá' chégudxu chee zrué'eledxu da dxelé'edxu tu chi na'. ² Dخال-la' nna'dxu Jesús, Bénnea' dxuné' nápadxu xel-la' dxeajlí lazre', ne dxuné' li lazre' xel-la' dxeajlí lazre' na'. Jesús gudé'e xel-la' zi' le'e xaga begúaj, ne quebe bedué'ene' lawe' da guné'e xel-la' dxebé na' da dxebeza na Le', na' gudxé'e chalá'a xabēla chee lataj blau chee Dios.

³ Le nna' xanne' ca da ben Jesús, gudéle'e xel-la' zi' da bulusaca benne' dul-la ca' Le'. Chee le na' quebe chajxréquele gunle zrin chee', ne quebe gute lázrele. ⁴ Ba gudíl-lalēle dul-la, na' quebe ne gátele lu wedil-la na'. ⁵ Quebe gal-la lázrele le'e ca dxun Dios, dxuzéajni'ine' le'e ca zrí'inequeze', gate dxenné':

Zrí'ina', quebe guzú' chalá'ala da dxun Xranu' gate dxusízrene' lue',

ne quebe gate lazru' gate dxedil-le' lue'.

⁶ Xránadxu dxusízrene' bi ca' nazri'ine',

na' xúgute bi dxezí' lu ne'e ca zrí'inequeze' dxudé'-be' xel-la' zi'.

⁷ Le guchaga lau le'e xel-la' zi' da dxedele, lawe' da dxuxúe Dios le'e ca zrí'inequeze'. ¿Zra bi quebe dxusizre xrabe' lebe'?

⁸ Che Dios quebe dxusízrene' le'e ca dxusízrene' xúgute bi chee' ca', quebe nácale zrí'inequeze Le'. Nácale ca bi lan ca'. ⁹ Gate ne nácadxu bidau', bulusizre xra xrnadxu dxi'u, na' gudápadxu le' ba lá'ana. Dخال-la' guzúadxadxu dizra' Xradxu zue' xabáa, na' gaca bandxu. ¹⁰ Xra xrnadxu bulusízrene' dxi'u tu chí'idauze ca da guléquene' chawe', san Dios dxusízrene' dxi'u chee gaca tu da ba neza cheedxu da naca na li lazre', chee gácadxu lá'azxa ca naca lá'azxa Léqueze'. ¹¹ Da li quebe dxedánnedxu da dxusizre xradxu dxi'u, san dxéquedxu zi', na' dxedé na', che dxéajni'idxu ca da dxusízrene' dxi'u, na' gundxu da xrlátaje ca', ne cueza zri lázredxu lau Dios.

Quebe dxal-la' guzúadxu chalá'ala da dxenná Dios

¹² Chee le na' le guzazraj na'le, ne zríbele da ba dxelate ni'a na', ¹³ ne le sa' lu neza da zaj naca na li, chee quebe chegu ní'ale da quebe zaj zua chacha, ne chee xelexaca chacha na.

¹⁴ Le gun ba xuzre suale lu xel-la' dxebeza zri lazre' nen xúgute bénneache, ne le gaca li lazre' lau Dios. Che quebe gunle caní, quebe gaca lé'elele Xránadxu. ¹⁵ Le guxúe xanne' chee quebe gusanle da chawe' ca' dxunna Dios le'e, ne chee quebe gaca netule le'e ca tu xixre' sla' da dxulala na, ne dxuxrinnaj na da xezícala. ¹⁶ Le guxúe xanne' chee quebe gunle da sban, ne quebe guzúale chalá'ala ca da dxunna Dios, ca ben Esaú, bénnea' bsane' xúgute da gunezruj xre' le' chee guzi'e tu cueze xel-la' wagu. ¹⁷ Ba nézele ca da guca gudé na', gate guca lazre' Esaú na' si'e da chawe' da naba xre' lau Dios, na' xre' bzue' le'

chalá'ala, ne lácala gudxézrele'e, quebe guca xuché'e ca da ba bene'.

¹⁸ Quebe dxaca chee le ca da guca chee benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bdunu'. ¹⁹ Belenne' gudxezre luzu da dxulucuezre', ne chi'i Dios bchálajlene' le'. Benne' ca' belenne' chi'i Dios na' gulata' xúene' québedxa guchálajlene' le'. ²⁰ Ca'an guca lawe' da quebe gulezéquene' xuluchaga lawe' ca naca da bdxixruj be'e Dios, gunné': "Che tu béadauze guléajba' lu xi'a na', dxal-la' xelútié'-ba' nen xiaj u nen tu xia nalá xéche'ze." ²¹ Da na' belelé'ene' bchébele'e na le', na' Moisés gunné': "Dxezrízetea' xel-la' dxezrebe."

²² Na'a le'e ba nabígale naga zua xi'a lá'azxa da nazí le na Sión, ne lu xezre chee Dios ban, da naca na Jerusalén da zua xabáa, ne naga zaj zra' gázxue gázxue gubáz chee xabáa, ²³ ne naga zaj nazraga benne' ca' gulaca bi chee Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee xúgute Bénneache, ne naga zaj zra' be' gulácaqueze benne' ca' ba nun Dios le' li lazre', ²⁴ ne lau Jesús, Benne' wedé dizra' chee xel-la' wezría cube, ne naga bzre'e dxen da dxuchalaj na da cháwedxa ca da bchalaj dxen chee Abel.

²⁵ Chee le na', le guxúe xanne' cuínale chee quebe guzúale chalá'ala Bénnea' dxuchálajlene' dxi'u. Quebe belegache benne' ca' buluzúe' chalá'ala Dios gate na' bchálajlene' le' lu xezr la xu nigá, ne quebe gáchedxu dxi'u che guzúadxu chalá'ala Bénnea' dxuchálajlene' dxi'u, zue' xabáa. ²⁶ Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'anqueze xabáa." ²⁷ Gate gunné': "Xetú lásaze", zéaje na xecá'a Dios ca naca da dxeledá, da ca' bene', na' xegá'ana da quebe seque' nu gutá. ²⁸ Dxal-la' xedxu Dios: Xcalenu' lawe' da gunné' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios du lázredxu ne dute xel-la' ba lá'ana, ca da dxezaca ba lazre', ²⁹ lawe' da naca Dios cheedxu ca tu xi' da guzría xi na da sban.

13

Da dxezaca ba lazre' Dios

¹ Quebe gusanle ca nazrí'i ljwézrele tule xetule ca bíchequezle. ² Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezí' lu ne'e gubáz chee xabáa ca', ne quebe guleque be'ene'.

³ Le gusá lázrele gácalele benne' zaj xu'e lizre xia, gun cuínale ca benne' xú'ueze lizre xia nen benne' ca'. Le gusá lázrele

gácalele benne' ca' dxeledéé' xel-la' zi', gun cuínale ca benne' dxeledéqueze' xel-la' zi'.

⁴ Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' chee, lawe' da guchi'a Dios chee benne' ca' dxuluzúe' chalá'ala xel-la' wechaga na' chee', ne chee benne' ca' dxelune' da sban.

⁵ Quebe sa lázrele xel-la' gunní'a. Le xezaca ba lázrele ca da nápane lawe' da ba gunná Dios: "Cabata' gusana' lue', ne quebe cueaj xíchajqueza' lue'." ⁶ Caní naca, du lázredxu waca nnadxu: Xrana' Dios dxácale' neda'.

Quebe zreba' bi da gusaca bèneache neda'.

⁷ Le gusá lázrele gácalele benne' ca' dxuluxúe' le'e, ne dxuluchálajle' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

⁸ Túzqueze ca naca Jesucristo neaje, ne na'a zra, ne chadía chacanna. ⁹ Quebe sile ca da dxuluchalaj benne' dxulusédené' da quebe naca na ca da naxúaj na lu xiche lá'azxa chee Dios. Cháwedxa naca guzúa chuchu lázrdaudxu lu xel-la' zri'i lazre' chee Dios, ne quebe chéajledxu da dxeledxixruj bea benne' ca naca da dxal-la' xi'aj gágudxu, lawe' da benne' ca' zjácále' da ca' cabata' ne xelezí' ba neza ne chee da ca'.

¹⁰ Bxruze judío ca' gulawe' béadu ca' belutié' lataj lá'azxa. Quebe zaj naca chee' xelawe' guna' da dxugú'udxu dxi'u chee Dios. ¹¹ Bxruze blau judío bzrie' dxen chee béadu ca' lu lataj lá'azxa blau ca tu guna' da dxegúa na dul-la. Buluzexé' da nagá'ana chee béadu ca' cúzrela xezre. ¹² Cá'aqueze gute Jesús cúzrela xezre na' chee bca'ana chawe' bèneache ne chee dxen cheéqueze'. ¹³ Le dxuaj, gundxu tu zren Cristo, lácala xuluzúa bèneache dxi'u chalá'ala ca belune' chee Le'. ¹⁴ Lu xezr la xu nigá quebe de cheedxu tu xezre da súatequeze. Dxebéxadxu tu da za za'. ¹⁵ Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios. ¹⁶ Dخال-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj nape', lawe' da dxezaca ba lazre' Dios le na.

¹⁷ Le guzúa dizra' chee benne' ca' dxuluxúe' le'e, ne le gun ca da dxelenné'. Benne' caní dxuluxúe' bène'du xu'ule, ne xuluxudé' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xelezúa xache', lawe' da che quebe gunle caní, quebe bi da ba neza gaca na chee.

¹⁸ Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúgute da dxuntu'. ¹⁹ Dxenaba' le'e

nábale lau Dios gunne' neda' lataj xídazega' súalēna' le'e naga zúale.

²⁰ Dxenaba' lau Dios, Bénnea' dxunne' dxi'u xel-la' dxe-beza zri lazre', ne bsebanē' Xránadxu Jesucristo ládujla benne' gate. Léqueze' naque' Benne' Blau Dxuxúe' Dxi'u, nácadxu zri-la' chee', na' caní naque' lawe' da blajē' dxen chee' da bzua chuchu na xel-la' wezría chadía chacanna da bene'.

²¹ Dxenaba' Dios gunē' le'e li lazre' chee séquele gunē da xrlátaje ca da dxaca lazre' Le', ne gunē' cheentu' ca da dxaca lazre' ne chee Jesucristo. ¡Gaca ba Cristo chadía chacanna! ¡Ca'an gaca na!

²² Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' látega da du nigá dxuzúaja' chee. ²³ Dxuzenda' le'e ba bedxúaj bi bíchedxu Timoteo lizre xia, ne che xelá' zé'ēbe', na' che'a-be' gate xedajnná'a le'e.

²⁴ Le gugapa diuzre xúgutē benne' ca' dxuluchálajlēne' le'e dizra' chee Dios, ne le gugapa diuzre xúgutē benne' bíchedxu ca'. Benne' zaj zre'e xezr la xu Italia nigá dxulugape' le'e diuzre.

²⁵ Dxenaba' lau Dios gunē' da chawe' chee xúgutēle le'e. ¡Ca'an gaca na!

DIZRA' CHEE DIOS DA BZUAJ SANTIAGO

Santiago dxuzuaje' chee benne' ca' zaj nadxúaje' lazre'

¹ Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gabí'i xezr la xu nigá.

Xel-la' sina da za lu na' Dios

² Benne' bícha'dau', dxal-la' béle'ele gate dxedele zane cue' da stēbe ca', ³ lawe' da nézele gate dxedé xel-la' dxeajlí lazre' chee lu da stēbe, da nigá dxundxa na le'e zren lazre'. ⁴ Le gun ba xuzre gaca li lazre' xel-la' zren lazre' chee chee gácale benne' xrlátaje ne li lazre', ne quebe bi xáxrjele.

⁵ Che núlale le'e dxexáxrjele xel-la' sina, le naba na lau Dios, na' Le' gunne' na le'e, lawe' da dxunézrujle'e Dios chee xúgute bénneache, ne quebe dxexezúene' zi'. ⁶ Dxal-la' nábale nen dutē xel-la' dxeajlí lazre' chee, ne quebe gun chupa lázrele. Benne' dxun chupa lazre' naque' ca xejxruza chee nísadau' da dxua be' nila na'la. ⁷⁻⁸ Benne' dxune' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéquene' bi da xunezruj Xránadxu chee'.

⁹ Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. ¹⁰ Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezí béateca na. ¹¹ Gate dxalaj gubizra, ne dxennále'e na, na' dxebizre xixre' na', na' dxexruj xiaj chee na, na' dxedé xel-la' xrtan chee na. Cá'anqueze gaca chee benne' gunní'a, xenitie' dxácate na' dxezí' lu ne'e xel-la' gunní'a.

Ca naca chee da stēbe ca' da dxededxu

¹² Ba neza naca na chee benne' dxuchaga lawe' da stēbe ca' dutē xel-la' zren lazre' chee', lawe' da che ba bedxúaje' chawe' lu da stēbe da dxedé', na' si' lu ne'e da nachebe lazre' Dios gunézruje' chee benne' ca' zaj nazri'ine' Le'. ¹³ Gate nu benne' zua da dxegú'u xel-la' na le' chee gunē' da calela, quebe dxal-la' guéquene' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee gunē' da calela, ne quebe bi guzúa Dios da xegú'u xel-la' na dxi'u chee gundxu da calela. ¹⁴ Tu benne' zua da dxegú'u xel-la' na le' chee gunē' da calela gate xel-la' dxezá lazre' da calela chee'

dxecá'a na le', ne dxenná be'e na le'. ¹⁵ Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la ná', na' dxute na bénnea'.

¹⁶ Benne' bícha'dau' nazri'ite lazra', quebe güele lataj nu si xe le'e. ¹⁷ Xúgute da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bénnea' bene' da ca dxulusení na zran xabáa. Dios quegá dxuchá cuine', ne quebe dxuché'e ca dxune'. ¹⁸ Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee gácadxu ca tu lina nedxu chee', chee da ba ben Le'.

Xel-la' dxucá'ana szren Dios da naca na li lazre'

¹⁹ Chee le na', benne' bícha'dau' nazri'ite lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrá'atele. ²⁰ Tu benne' xichaj zra'a quebe dxune' da dxezaca ba lazre' Dios. ²¹ Chee le na', le gusán xúgute da sban ne ca naca da calela da dxanle'e na, na' dute xel-la' dxexruj lazre' cheele le si' ca naca dizra' chee Dios da ba naxaza na lu xichaj lázrdaule, lawe' da wazeque' dizra' na' guselá na bénne'du xu'ule.

²² Le gun ca da dxulé'e dizra' na' le'e, ne quegá xénezele na. Benne' dxénzene' na dxezí xeze cuine'. ²³ Bénnea' dxénzene' dizra' na', ne quebe dxune' ca dxenná na, naque' ca tu benne' dxenné'e lawe' tu lu wana'. ²⁴ Dxenné'e ca naque', na' gate ze xeajze' na', na' dxal-la lazre' ca naque'. ²⁵ Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazrte' na. Che dxune' ca naca na, benne' nigá gaca tu da ba neza chee' lu xúgute da dxune'.

²⁶ Che nu benne' dxéqueñe' naque' benne' dxucá'ana szren Dios, ne quebe dxezéqueñe' nna be'ene' luzre', benne' nigá dxezí xeze cuine', na' ca naca xel-la' dxucá'ana szren Dios chee' dácheze naca na. ²⁷ Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gácale dxu bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee' xezr la xu nigá.

2

Quebe guchale ca gunle chee tu tu benne'

¹ Benne' bícha'dau', le'e dxéajlele chee Xránadxu, Benne' xabáa Jesucristo, quebe dxal-la' guchale ca gunle chee tu tu benne'. ² Che chu'u tu benne' naga nazrágale, ne nácu'e zra lane' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácu'e zra lane' tuzruj, ³ na' che dxelé'ele cháwedau' bénnea' nácu'e zra lane' da

zaca, ne dxęle le': "Gudxe'e nigala naga nácadxa na chawe'", na' dxęle benne' xache' na': "Xeajsé na'la, u gudxe'e lu xu ná'teze." ⁴ Che dxunle caní, dxuchale ca dxunle cheę tu tu benne', ne dxuchí'ale ca zaj naca bėnneache, quebe naca xrlátaje xichaj lázrdaule.

⁵ Benne' bícha'dau' nazri'iteę lazra', le xen da nigá: Dios ba guquę'ę benne' ca' zaj naquę' benne' xache' lu xęzr la xu nigá cheę xelaquę' benne' gunnía' lu xel-la' dxeajlí lazre', ne cheę xezezi' lu ne'ę da nucueza Dios naga dxenná bea Le', da na' guchebe lazre' Le' gunézruje' cheę benne' ca' zaj nazri'ine' Le'. ⁶ Le'e dxuzúale chalá'ala benne' xache' ca'. ¿Quegá benne' gunnía' ca' benne' dxuluchínene' le'e, ne dxeleché'ę le'e lau benne' xulawe' ca'? ⁷ ¿Quegá benne' gunnía' ca' benne' dxelenné' schanni' cheę da xrlátaje ca nazi' lale, dxennale nácale bi cheę Cristo?

⁸ Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazrí'i cuinu', xrlátaje dxunle. ⁹ Na'a che dxuchale ca dxunle cheę tu tu benne', dul-la dxunle, ne nabágale zria lawe' da quebe dxunle du ca bdxixruj be'e Dios. ¹⁰ Che tu benne' dxunę' ca zaj naca da nadxixruj be'e Dios, san che dxenęguenę' ca naca tuze da nadxixruj be'ene', naca na cáteze nabague' zria ca zaj naca xúgutę da nadxixruj be'e Dios. ¹¹ Léqueze Dios gunné': "Quebe gunle dul-la da dxichaj na xrba cheę xel-la' wechaga na'", cá'anqueze gunné': "Quebe gútele benne'." Caní naca, che tu benne' quebe dxunę' dul-la da dxichaj na xrba cheę xel-la' wechaga na', san che dxutie' benne', ba gunęguenę' ca da nadxixruj be'e Dios. ¹² Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxelunę', benne' ca' zaj nalá lu na' da gunná bea Le'. ¹³ Benne' ca' quebe dxelexexache lazre' cheę benne' xula, Dios guchi'ę ca da dxelún benne' ca', ne quebe xexache lazre' cheę benne' ca', san benne' ca' dxelexexache lazre' cheę benne' xula quebe bi zria xelebague' gate Dios guchi'ę ca da zaj nun benne' caní.

Ca naca cheę xel-la' dxeajlí lazre', ne cheę zrin dxundxu

¹⁴ Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxunę' da dxácalę nu benne' dxexázrjene'? ¿Wazeque' xel-la' dxeajlí lazre' na' guselá na le'? ¹⁵ Che zra' benne' bíchedxu u nu'ula zandxu, benne' quebe bi zaj de zra lanę' u da xelawe', ¹⁶ na' che núlale le'e xele benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézruje ca da dxexázrjene', ¿bizra culuén gapa da na' gunnále? ¹⁷ Caní naca na cheę xel-la' dxeajlí lazre'. Che quebe bi zaj de da chawe' da xululé'e na che

dxeajlí lazre' bēnnea' Cristo, xel-la' dxeajlí lazre' chee' naca na ca tu da gate.

¹⁸ Wannalja nu benne': Lue' dxennáu' dxéajlę'u chee' Cristo, na' neda' dxuna' da chawe' ca'. Ble'e neda' dxéajlę'u chee' Cristo ne quebe dxunu' da chawe' ca', na' neda' gulé'eda' lue' dxeajlí lazra' Cristo ne chee' da chawe' ca' da dxuna'.

¹⁹ Dxéajlę'u lue' zua tuze Dios. Nácaqueze na ca'. Cá'aqueze da xriwe' ca' dxeléajlę na, ne dxelezrize na lu xel-la' dxelezrebe.

²⁰ Lue', benne' xala, ¿dxaca lazru' gulé'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? ²¹ ¿Ájazra guca chee' xra xrtáudxu Abraham guque' benne' xrlátaję lau Dios? Guca na ne chee' da bene' gate guxúę' zrí'ine' Isaac lu bdupa xiaj chee' guzezxe'-be'. ²² ¿Quebe dxele'enu'? Ca da ben Abraham dxulé'e na guxeajlí lazre' Dios, na' xel-la' dxeajlí lazre' chee' guca na du lazre' ne chee' da bene'. ²³ Caní guca li ca da dxenná na lu xiche lá'azxa: Abraham guxéajlę'e chee' Dios, na' Dios blé'ene' le' benne' xrlátaję. Na' bchálaję' ca naca chee' Abraham, gunné': "Bi zrágaqueza', Abraham."

²⁴ Na'a dxelé'ele Dios dxezi' lu ne'e tu benne' ne chee' da chawe' da dxune', ne quegá tuze lawe' da dxeajlí lazre' Le'.

²⁵ Cá'aqueze guca chee' Rahab, nu'ula wen da sban. Nu'ula nigá gulu'e lizre' benne' ca' gusel-la Josué, na' bsi'e benne' ca' neza xula chee' belelé' lu na' benne' ca' dxjaque' wedil-la, na' ne chee' da bene', Dios guzı' lu ne'e nu'ula na'. ²⁶ Ca naca chee' bęla' dxen cheedxu, che ba bedxúaj be' chee' na, ba nate na, cá'aqueze naca chee' xel-la' dxeajlí lazre' cheedxu. Che quebe bi zaj de da chawe' da xululé'e na dxeajlí lazrdxu Cristo, naca na ca tu da gate.

3

Ca naca chee' lúzredxu

¹ Benne' bícha'dau', quebe dxal-la' gun cuínale benne' dxu-lusęde dizra' chee' Dios, lawe' da nézele ca gun Dios, guchi'a xánnedxe' chee' da dxundxu dxi'u, dxuchálajdxu xrtizre'.

² Xúguteđxu dxúnle'ędxu da caleļa. Che nu benne' quebe bi da caleļa dxune' ca naca da dxuchálaję, naque' benne' li lazre', na' wazéquene' nna be'ene' ca nácaqueze bęla' dxen chee'.

³ Gate dxugú'udxu xia dxu'a bzrina' chee' gunba' da dxaca lazrdxu, wazéquedxu nna be'edxu duteba'. ⁴ Le na' xque ca naca chee' da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxácale'ę na, benne' dxusé'ę na dxuchínene' tu xágadauze, na' dxenná be'ene' na chee' cheaj na naga dxaca lazre' le'.

⁵ Cá'aqueze naca chee' lúzredxu. Naca na tu da dauze da naca chee' bęla' dxen cheedxu, na' da zrente

da dxenná na. Tu xí'dauze waca guzezxe na tu xi'a zren.
⁶ Lúzredxu naca na ca tu xi'. Lúzredxu naca na ca tu xezr la xu sban da zua lu belá' dxen cheedxu, ne dxuxrinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgute da dxundxu. ⁷ Wazeque' nu benne' nna bé'ene' xúgute be xixre' ca', ne be zaj zua xrila, ne be snia ca', ne be zaj zra' lu nísadau', ne ba gunná bé'ene'-ba'.
⁸ Quebe nu benne' dxezéque' nna bé'ene' duté da dxenná luzre'. Naca na tu da calela da quebe dxue na lataj nu nna be'e le na, ne naca na ca tu be snia, be dxúteba' bénneache ca'. ⁹ Nen lúzredxu níqueze dxue lá'anadxu Xradxu Dios, ne nen le na dxennéquezdxu da calela chee bénneache, benne' ca' nun Dios na' lu'a le saca Léqueze'. ¹⁰ Lu dxú'adxu ná'queze dxeledxúaj da xrlátaje ne da calela. Benne' bícha'dau', da nigá quebe dxal-la' gaca na ca'. ¹¹ ¿Waca galaj nisa chawe' ne nisa sla' lu tuze beaj? ¹² Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

Xel-la' sina da naca li lazre'

¹³ Che zua tu benne' ládujla le'e naque' benne' sina, ne dxéajni'ine', dxal-la' gulé'ene' na ne chee da chawe' da dxune' duté xel-la' dxexruj lazre' chee' da dxunexruj xel-la' sina le'. ¹⁴ Che zua lu lárdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee lawe' da caní nnele da wen lazre' chee da naca da li. ¹⁵ Xel-la' sina caní quebe naca na chee Dios. Naca na chee xezr la xu nigá, ne chee bénneache, ne za na lu na' da xriwe'. ¹⁶ Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute da calela. ¹⁷ Benne' zaj nape' xel-la' sina da dxunna Dios zaj naque' du lazre', ne zren lazre', ne dxé'ene lazre', ne dxexruj lazre'. Dxelexache lazre' ljwezre', ne dxelune' da chawe'. Zaj naque' li lazre' ne quebe dxelune' cúzreze da chawe'. ¹⁸ Benne' dxelebeche zrie' da ba xa' dxelune' tu zrin da naca ca tu binne da dxunna na da chawe'.

4

Ca naca chee benne' zaj nazri'ine' da zaj naca chee xezr la xu nigá

¹ ¿Bizr chee na' dxedíl-lale ne dxé' da ba xa' ládujla le'e? Dxaca caní lawe' da dxezá lázrele da zaj naca chee da calela, da dxuluzúa na le'e lu da ba xa'. ² Le'e dxaca lázrele bi gápale, na' lawe' da quebe dxezrué'ele na, na' dxútele benne'. Dxezá lázrele tu da sile, na' lawe' da quebe dxezéquele sile na, na'

dxedíl-lalę lĵwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. ³ Che dxenábale na, quebe dxezile na lawe' da dxenábale na calęla, lawe' da dxedánele na cheę guchínele na ca da dxaca lázrele. ⁴ Le'e, benne' quebe nácale li lazre', ¿quebe nézele che nu benne' dxedánnenę' da calęla da de lu xęzr la xu nigá, benne' nigá dxecuđenę' Dios? Núteteze benne' dxaca lazre' si'e ba neza ca da dxaca lu xęzr la xu nigá naque' benne' dxecuđenę' Dios. ⁵ Cheę le na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheędxu. ⁶ Dios dxácalędxene' dxi'u lu xel-la' xrlátaje cheę', ca dxenná xiche lá'azxa: Dios dxezré'e benne' ca' dxulucá'ana szren cuina, na' dute xel-la' xrlátaje cheę' dxácalęne' benne' dxexrui lazre' ca'. ⁷ Le guzúa dizra' cheę Dios.

Le til-la da xriwe', na' le na xuzrunuj na naga zrale.

⁸ Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale cheę dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

⁹ Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

¹⁰ Le gaca dxexrui lazre' lau Xránadxu, na' Le' gucá'ana szrenę' le'e.

Quebe dxal-la' guchí'adxu ca da dxun tu benne' bíchedxu

¹¹ Le'e, benne' bícha'dau', quebe nnele cheę lĵwézrele tule xetule. Benne' dxennę' cheę tu benne' bíchedxu, u dxuchi'e ca da dxun bėnnea', naque' benne' dxennę' calęla cheę da bdxixrui be'e Dios, ne dxebéę' ca zaj naca da bdxixrui be'e Dios. Che dxebéu' ca zaj naca da bdxixrui be'e Dios, dxun cuinu' ca benne' dxuchi'e da dxaca, ne quebe dxuzú' dizra' da bdxixrui be'e. ¹² Zua tuze Dios, Bėnnea' bdxixrui be'e da ca', ne dxuchi'e da dxaca, na' Léqueze' wazéquenę' guselę' dxi'u, ne guzria xi'e dxi'u. Lue', ¿núzraqueze nacu', dxuchi'u da dxun benne' xula?

Quebe nezdxu bi gaca wxre

¹³ Na'a, le xene da nigá, le'e dxennale: Na'a u wxre chéajdxu tu xęzre ne cheajsúadxu na' tu iza. Gá'udxu, ne gútedxu cheę gucúdedxu dumí. ¹⁴ Quebe nézele ca da gaca wxre. ¿Ájazra naca cheę xel-la' nabán cheędxu? Naca na ca tu beuj da dxebé' tu chi'i, na' chadí dxenite na. ¹⁵ Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. ¹⁶ Le'e dxucá'ana szren cuínale ca da dxuchálajle. Xel-la' dxucá'ana szren cuina caní naca na da calęla. ¹⁷ Che

nu benne' ba nézenē' ca da chawe' da dxal-la' gunē', na' quebe dxunē' na, na' bágale'e dul-la.

5

Santiago dxusízrenē' benne' gunnía' ca'

¹ Le xene da nigá, le'e, benne' gunnía'. Le cuezre ne le xewine lazre' ca naca da zi' da xa' da lé'ele. ² Ca naca xel-la' gunnía' cheeḷe ba zaj nuzru na, na' zra lánale zaca ba zaj nagu béadu ca' le na. ³ Ca naca oro cheeḷe ne plata cheeḷe, ba gulezén xrche'e na, na' lawe' da quebe bchínele da gunnía' cheeḷe lu da xrlátaje, da caní dxululé'e na nabágale zria lau Dios, na' Le' gudéē' le'e lu da ba xa'. Caní gaca cheeḷe lawe' da btúbele xel-la' gunnía' cheeḷe gápale na gate ba dxérule. ⁴ Quebe gudízrujle ca naca cheeḷe na benne' ca' belexelape' lina cheeḷe, na' dxelawe' zria cheeḷe da quebe gudízrujle, na' Xránadxu, Bénnea' nape' dutē xel-la' dxenná bea, ba benne' ca' naca zria da dxelagu benne' ca' cheeḷe le'e. ⁵ Lu xēzr la xu nigá ba guzile ba neza xel-la' gunnía' cheeḷe ne xúgute da zaca ca', ne guzrenle ca tu bezre dxánnele'e, na' ba dxezrín zra xelútiē'-ba'. ⁶ Le'e ba bzria xile, ne ba bétele benne' quebe bi da caleḷa zaj nunē', na' benne' ca' quebe guledábage' le'e.

Dxal-la' gácadxu benne' zren lazre' ne guchálajlēdxu Dios

⁷ Cheeḷe na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' dutē xel-la' zren lazre' cheeḷe ca zrindxa zra xelá' xiuj ba ne xiuj lina, cheeḷe xezí' lu ne'e lina chawe' cheeḷe'. ⁸ Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. ⁹ Le'e, benne' bícha'dau', quebe gágule zria cheeḷe ljwézrele, cheeḷe quebe guchi'a Dios cheeḷe da dxunle, lawe' da zua gágute zra xelá' Dios, Bénnea' dxuchi'e da dxaca. ¹⁰ Le'e, benne' bícha'dau', le gusá lázrele ca guca cheeḷe benne' ca' gulenné' waláz cheeḷe Dios, gulaque' zren lazre' lácala guledé' xel-la' zi'. ¹¹ Dxennadxu guca da ba neza zren cheeḷe benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios cheeḷe ca gudé na'. Xránadxu naque' zri'i lazre', ne dxexache lazre' dxi'u.

¹² Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xēzr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, cheeḷe quebe guzría xi' Dios le'e.

¹³ Che núlale dxedele lu da zi' da xa', dxal-la' guchálajlenle Dios. Che nu benne' zue' xel-la' dxebé, dxal-la' gul-le' da güe lá'ane' Dios. ¹⁴ Che nu benne' quebe chawe' zue', dxal-la' nne' benne' gula ca' dxuluxúe' bi cheeḷe Cristo, cheeḷe xelenabe'

lau Dios xexunē' benne' wē' na', ne xelegú'e lē' da za lu La Xránadxu. ¹⁵ Gate dxuluchálajlēne' Dios dutē xel-la' dxelejli lazre' cheē', na' xexaca benne' wē' na', na' Xránadxu xechise' lē', ne che bi dul-la nune', na' gunite lau Dios cheē bēnnea'. ¹⁶ Cheē lē na', le xrúalepe lau ljuwézrele tule xetule dul-la da nunle, ne le guchálajlē Dios cheē tule xetule, cheē xexunē' le'e. Da dxenaba benne' xrlátajē du lazre' lau Dios wazrué'ene' na. ¹⁷ Elías, bēnnea' gunné' waláz cheē Dios, guque' tu bēnneache ca dxi'u, na' gate gunabē' lau Dios cheē quebe gaca xiuj, na' quebe guca xiuj lu xēzr la xu dutē chun iza xugachaj. ¹⁸ Gudé na', gate gunabē' lau Dios da xula, na' belá' xiuj, na' xēzr la xu na' bēnna na lina.

¹⁹ Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule lē' lu xel-la' li, ²⁰ dxal-la' nézele, núteteze benne' xucuase' tu benne' dul-la lu neza calela da zeajlēne', guselé' bēnne'du xu'u benne' dul-la na' lu xel-la' gute, na' xunite lau Dios dul-la zan da nabaga bēnnea'.

DÍZRA'DAU' NEDXU DA BZUAJ SAN PEDRO

Dizra' gusel-la Pedro chee benne' ca' gucá'a Jesús, ne zaj nase dínnaje'

¹ Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. ² Xradxu Dios ba guqu'é le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnalé'e le'e da chawe', ne xella' dxebeza zri lazre'.

Ca da dxebeza lázredxu

³ Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, ⁴ ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. ⁵ Lawe' da dxéajle chee Dios, Le' guxre' le'e nen xella' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

⁶ Chee le na' dxebéle'ele lácala dxun na ba xen tele xel-la' zi' tu chí'idau'. ⁷ Xel-la' dxeajlí lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

⁸ Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xelé'ele Le', dxebéle'ele. Ca naca xel-la' dxebé chee naca na da zrenté da quebe séquentu' xuzájla'antu' ⁹ lawe' da nalá bénne'du xu'ule lawe' da dxéajle chee Dios. ¹⁰ Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e. ¹¹ Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. ¹² Dios bzéajni'ine' benne' ca' ca naca chee da na' dxuluchálaje', gunné' quebe naca na chee léqueze', san naca na cheedxu dxi'u. Na'a, da

nigá naca dizra' chawe' da ba bénquezle, da buluchalaj benne' ca' nę cheę Be' Lá'azxa, Bénnea' zęę xabáa. Da caní gulaca lazre' gubáz cheę xabáa xelájni'ine'.

Dios dxenné' dxi'u cheę gácadxu bi lá'azxa cheę'

¹³ Cheę le na', le guxúe xanne' ca da gunle. Tu dxál-lazqueze gunle da xrlátaje. Dutę lázrdaule le guxrén lazre' xel-la' chawe' cheę Dios, ne le cueza da gunnę' le'e lu zra na' gate xelá' Jesucristo. ¹⁴ Lawe' da nácale bi cheę Dios, le guzúa dizra' cheę', ne québedxa gunle ca da guzá lázrele gate quebe ne gúnbeale Dios. ¹⁵ Na'a, le ta lu xel-la' lá'azxa cheę' lawe' da naca Dios lá'azxa, Bénnea' gunnę' le'e. ¹⁶ Cá'anqueze naxúajqueze na lu xiche lá'azxa cheę', dxenné': "Le gaca lá'azxa, lawe' da naca' neda' lá'azxa."

¹⁷ Che dxennale le'e naca Dios Xrale, na' Le' dxuchi'e ca da dxelún bėnneache, dxal-la' zrėbele Le' dxácatę ne zúale lu xęzr la xu nigá. ¹⁸ Dios ba bselé' le'e lu da benle gate na' guxíajlele ca da belún xra xrtauale, da caleła, na' ba nėzquezle quebe guca na nę cheę tu da dxuzru na ca oro, ne plata. ¹⁹ Bselé' le'e nę cheę dxen zácale'ę cheę Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', bę dxelutię' cheę xunite lau Dios dul-la zaj nabague'. ²⁰ Cristo ba nácaqueze cheę' gate nate saque' da nigá, na' ble'ę lu zra caní cheę gaca chawe' cheęle. ²¹ Nę cheę Cristo dxéajlele cheę Dios, Bénnea' bsebanę' Le' ládujla benne' gate, ne bca'anę' Le' szren. Cheę le na' dxéajlele cheę Dios, ne dxuxrén lázrele Le'.

²² Na'a, ba bzúale dizra' cheę xel-la' li nę cheę Be' Lá'azxa, cheę zri'ile dutę lázrdaule benne' zaj nababę' dxi'u. Cheę le na' dxal-la' zri'ile lįwėzrele tule xetule dutę lázrdaule, ne dutę xel-la' wala cheęle. ²³ Caní naca na lawe' da ba bexálajle, quegá cheę bėnneache, benne' dxelate. Nálajle nę cheę dizra' cheę Dios, da naca ban na, ne da zua na chadía chacanna. ²⁴ Caní naca na lawe' da naxúaj na lu xiche lá'azxa, da dxenná na: Xúgute bėnneache zaj naque' ca xixre', na' xel-la' szren cheę' naca na ca xiaj cheę xixre'du ca'. Xixre' na' dxebizre na, na' xiaj cheę na dxexruj na.

²⁵ Dizra' cheę Xránadxu zúatequeze na chadía chacanna. Dizra' nigá ba benle le'e nę cheę dizra' chawe' da dxuchálajntu'.

2

¹ Cheę le na', québedxa gunle da caleła. Québedxa nu si xęle, ne quebe gunle láweze da xrlátaje. Québedxa gácale xa lazre', ne quebe bi nęle cheę lįwėzrele. ² Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', cheę gun na sę cháchale, ne lale lu na' dul-la. ³ Che da li ba

guzú laule nézele naca Xránadxu chawe', na' gaca lázrele sídxale xrtizre'.

Cristo naque' ca xiaj xre ban

⁴ Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácále'e na. ⁵ Cá'anqueze le'e nácale ca xiaj ban ca'. Le güe Dios lataj guchínene' le'e chee guné' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. ⁶ Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne'

naque' ca tu xiaj blau chee xu'u,

da naca na tu xiaj du lazre',

ne da zácále'e na,

na' nu benne' chéajle'e chee Le'

quebe gaca xel-la' stu chee'.

⁷ Chee le'e dxéajle chee', xiaj nigá zácále'e na, san chee benne' ca' quebe dxéajle'e naca na ca da dxenná xiche lá'azxa: Xiaj na' buluzúa benne' wen xu'u ca' chalá'ala, le na' naca na xiaj blau.

⁸ Cá'anqueze naca na ca dxenná xiche lá'azxa:

Naque' tu xiaj da dxehegu bénneache,

na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

Benne' zaj naque' bi chee Dios

⁹ Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxaní' li lazre' chee'. ¹⁰ Gate nate quebe nu bexache lazre' le'e, san na'a Diósqueze' dxexache lazre' le'e.

Zúale chee gunle zrin chee Dios

¹¹ Bi bicha' nazri'ite' lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná bela' dxen chee, da dxedíl-lale na benne' du xu'ule. ¹² Ca da dxunle, dxal-la' gaca na xrlátaje lau bénneache quebe zaj núnbe'e Dios. Caní gaca na, lácala na'a dxelenné' chee, dxelenné' nácale benne' ca' dxelune' da zrinna, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

¹³ Lawe' da nácale bi chee Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre

ca'. Le guzúa dizra' chee benne' nape' xel-la' dxenná bea zren, ¹⁴ ne chee benne' dxelenná bea, benne' ca' nase-la le' chee xuludé' xel-la' zi' benne' ca' dxeluné' da zrinnaj, ne xelu'e ba lá'ana benne' ca' dxeluné' da xrlátaje. ¹⁵ Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxelenné' calela chee dizra' chawe' da nazile.

¹⁶ Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. ¹⁷ Le gapa ba lá'ana xúgute bènneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

Ca da guzaca zi' Cristo dxuzéajni'i na dxi'u

¹⁸ Le'e, bi wen zrin, le guzúa dizra' chee xránale duté xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue chee, san cá'anqueze gunle chee benne' snia ca' zaj naque' xránale. ¹⁹ Naca na tu da xrlátaje che guchaga laudxu xel-la' zi' da dxulusaca bènneache dxi'u gate dxundxu da nezdxu naca na da dxezaca ba lazre' Dios. ²⁰ Che dxunle tu da calela, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na duté xel-la' zren lazre' chee, da nigá naca na xrlátaje lau Dios. ²¹ Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da ben Le'.

²² Le' quebe bene' dul-la, ne quebe nu guzú xe'e.

²³ Gate bulucháchalene' Le', quebe bi dizra' schanni' bechebe'. Gate buludé' Le' xel-la' zi', Le' quebe bexéchaje'.

Bzua cuine' lu na' Dios, Bènnea' dxuchi'e ca da naca na. ²⁴ Biá'queze Cristo na' lu bela' dxen chee' ca naca dul-la cheedxu gate gude'e le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzrié' we' chee xexácale le'e chawe'.

²⁵ Le'e gudale gate nate ca zrila' zaj naníteba'.

Na'a ba bela'le lau Cristo, Bènnea' dxuxúe' le'e ca dxun tu benne' dxuxúe' zrila'du ca', ne dxe'e gunne xue chee bènne'du xú'ule.

3

Ca dxal-la' xelún benne' zaj nuchaga na'

¹ Cá'anqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'ene' da xrlátaje da dxun zru'ule', ne quebe gun na ba xen bi guchalaj

zru'ule', ² lawe' da lé'ezenē' da xrlátaje dxune' lawe' da naque' xrlátaje, ne dxape' le' ba lá'ana. ³ Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchaje', ne lechítaje da naca na oro, ne zra lanē' da zácale'e. ⁴ Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexruj lazre', ne zren lazre', da na' zácale'e na lau Dios. ⁵ Cá'anqueze guca lechítaje chee nu'ula ca' gulaque' bi chee Dios gate nate. Nu'ula ca' buluxrén lazre' Dios, ne buluzúe' dizra' chee benne' chee'. ⁶ Cá'anqueze guca Sara, bzue' dizra' chee Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

⁷ Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e dutē xel-la' chawe' chee'. Dخال-la' gunle caní chee quebe bi guzaga na le'e gate guchálajlele Dios.

Benne' dxeledé' xel-la' zi' lawe' da dxelunē' da chawe'

⁸ Na'a:

Le gaca tuze

Le xexache lazre' ljuwézrele, ne le zri'i ljuwézrele.

Le gaca benne' zri'i lazre', ne zren lazre'.

⁹ Quebe gunle da calela chee benne' dxunē' chee da calela, ne quebe gucháchalele benne' dxulucháchalene' le'e. Le gun da chawe' chee benne' ca' lawe' da gunné' Dios le'e chee sile da chawe'. ¹⁰ Caní naca na lawe' da dxenná xiche lá'azxa: Benne' dxaca lazre' gaca tu da ba neza chee',

ne suē' xel-la' dxebe

dxal-la' guxúe' luzre' chee quebe nne' dizra' schanni',

ne guxúe' dxu'e chee quebe nne na da wen lazre'.

¹¹ Dخال-la' gusanē' ca da calela bene',

ne québedxa gunē' na, chee gunē' da chawe'.

Dخال-la' cueche zriē' da ba xa',

ne gaque' benne' zren lazre'.

¹² Xránadxu dxuxúe' benne' chawe' ca',

ne dxenne' ca da dxelenaba benne' ca'.

Dxuzúe' chalá'ala benne' wen da zrinnaj ca'.

¹³ ¿Núzraqueze benne' gunē' chee da zrinnaj che le'e cuele gunne xue gunle da chawe'? ¹⁴ Lácala tele xel-la' zi' lawe' da dxunle da chawe', gaca na da ba neza chee. Quebe nu zrébele, ne quebe xrúsale. ¹⁵ Le gapa ba lá'ana Cristo ca Xránale lu xichaj lázrdaule. Le súateze ban lazre' xechébele lau benne' ca' dxelenabe' le'e bizr chee na' dxuxrén lázrele Le'. Le gun na lu xel-la' dxexruj lazre', ne le gapa ba lá'ana benne' ca'. ¹⁶ Le gun da chawe' chee quebe bi sua da gagu na zria lu xichaj

lázrdaule, na' benne' ca' dxelenné' schanni' chee da chawe' da dxunle lawe' da dxéajlel-le chee Cristo, xelapa stu'e ca dizra' da dxelenné'. ¹⁷ Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

¹⁸ Caní naca na lawe' da gudé Cristo tu lásaze lu xel-la' gute zi xa' ne chee dul-la da nabágadxu. Le' guque' benne' xrlátaje, na' gudé' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'. ¹⁹ Cá'anqueze lu be' nácaqueze' guxiáje' lataj chul-la naga xeajchálajlene' be' zaj nácaqueze benne' ca' nuzaga xel-la' gute lu lataj na'. ²⁰ Benne' caní quebe buluzúe' dizra' ca da bchalaj Noé gate nate, gate na' guleza Dios duté xel-la' zren lazre' chee' dxácaté na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bènneache. ²¹ Nisa xiuj na' dxulé'e na ca naca nisa naga dxelexedxúa benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate, ²² ne begüene' xabáa, ne zue' chalá'a xabela chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

4

Dxal-la' gundxu zrin chee Dios guchínedxu ca da ba nunna Dios dxi'u

¹ Chee le na', ca ben Cristo, gudé' xel-la' zi' lu belá' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu belá' dxen chee', ba bzua bènnea' chalá'ala da naca dul-la, ² chee guné' ca da dxaca lazre' Dios dxácaté naca bane', ne quebe guné' ca da dxenná belá' dxen chee'. ³ Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzrele, ne benle laní sban ca'. Güé'ele'ele, ne bca'ana szrenle bedau' xiaj xaga ca' da na' dxecuide Dios. ⁴ Benne' ca' quebe zaj núnbe'e Dios dxelexebánene' lawe' da québedxa dxunle le' tuze ca naca da sban da dxelune', na' chee le na' dxelenné' schanni' chee'e. ⁵ Benne' ca', dxun na ba xen xululé'ene' ca da zaj nune' lau Bènnea' naca chee' guchi'e chee benne' ban ca', ne chee benne' gate ca'. ⁶ Benne' ca' zaj nate belenne' ca naca dizra' chee Dios chee xelexaca bane' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da belune' ca guchi'e chee xúguté bènneache.

⁷ Ba za cheajsé chee xúgute da dxelédxu. Chee le na', le sua ban lazre', ne le guchálajlequeze Dios. ⁸ Da nácadxa blau, le zrí'ile'e ljwézrele. Che nazrí'idxu benne' bíchedxu ca', na' gunite laudxu da calela da beluné' cheedxu. ⁹ Le guzúa lízrele ljwézrele tule xetule, ne quebe nnele chee ljwézrele. ¹⁰ Tu tule le'e dxal-la' gunle zrin chee ljwézrele ca da nunna Dios chee, ca benne' dxuluchínene' chawe' ca da chawe' da dxunezruj Dios chee'. ¹¹ Che nu benne' dxuchálaje', dxal-la' guchálaje' da gunezruj Dios le'. Che nu benne' guné' zrin chee, dxal-la' guné' na guchínene' xel-la' waca chee' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

Wadedxu xel-la' zi' lawe' da nácadxu bi chee Cristo

¹² Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. ¹³ Le be lawe' da tele xel-la' zi' ca xel-la' zi' da gudé Cristo chee cá'anqueze béle'ele gate lé'ele xel-la' szren chee Cristo gate zezé'e. ¹⁴ Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bénnea' ze'e xabáa. Dxelenné bénneache schanni' chee Le', san le'e dxápale Le' ba lá'ana. ¹⁵ Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. ¹⁶ Che nu benne' dxedé'e xel-la' zi' lawe' da naque' bi chee Cristo, quebe dxal-la' xedu'é'ene', san dxal-la' güe lá'ane' Dios lawe' da nazí le' bi chee Cristo. ¹⁷ Ba bzin zra su lau Dios guchi'e ca da zaj nun tu tu bi nácabé' chee Le'. Che Dios su lawe' guchi'e ca da nundxu dxi'u, ¿ájala gaca chee benne' ca' quebe dxeluné' ca dxenná dizra' chawe' chee Dios? ¹⁸ Che benne' xrlátaje ca' cánnaze xeledé' ¿ájazraqueze gaca chee benne' wen da zrinnaj ca', ne chee benne' wen dul-la ca'? ¹⁹ Caní naca, benne' dxeledé'e xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzú'e' bénne'du zaj xu'e lu na' Dios, Bénnea' bene' le', lawe' da naca Le' li lazre'.

5

Pedro dxuzéajni'ine' bi ca' chee Cristo

¹ Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca neda' benne' gula ca le'e, ne dxexecheba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gulé'ene' te chee zra caní. ² Ca dxelún benne' dxuluxúe' zrila'

ca', le guxúe bidu ca' chee Dios, bénne'du ca' nabágale. Le gun na dutē lázrdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele, ³ ne quebe gun cuínale ca xrane bénne'du ca' nabágale. Le gun ba xuzre gácale tu da gulé'e na ca dxalla' xelún bénne'du ca'. ⁴ Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na. ⁵ Cá'anqueze le'e, benne' cuide', le gun ca da dxeleenná benne' gula ca'. Xúgutele dxal-la' guzúale dizra' chee ljwézrele tule xetule lu xel-la' dxexruj lazre' chee lawe' da dxenná xiche lá'azxa:

Dios dxezré'e benne' ca' dxulucá'ana szren cuine'.

Dutē xel-la' chawe' chee' dxácale' benne' dxexruj lazre' ca'.

⁶ Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na. ⁷ Le guzúa lu na' Dios xúgute da dxele gunne xue, lawe' da dxe' Le' gunne xue da naca chee.

⁸ Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'. ⁹ Le tíl-lalē da xriwe', ne le se chacha lu xel-la' dxeajlí lazre' chee, lawe' da nézquezle dxeledéqueze xúgute bíchele zaj zré'e lu xezr la xu nigá xel-la' zi' ca da dxedele le'e. ¹⁰ Gate bache gudele xel-la' zi' tu chi'i, Dios gunē' le'e li lazre', ne guzúa chawe'e le'e. Dios ná'queze dxunne' dxi'u xúgute da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo. ¹¹ Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

Pedro dxugape' diuzre bi bíchedxu ca'

¹² Silvano, benne' nigá dxéqueda' naque' tu bi bíchedxu li lazre', ba bzuaaje' dizra' caní chee le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

¹³ Bi chee Cristo zaj zré'e Babilonia nigá, benne' ca' gucá'a Dios ca guqu'é'e le'e, dxulugape' le'e diuzre. Cá'anqueze Marcos, bi na' nácabe' ca bi cheéqueza dxugápabe' le'e diuzre. ¹⁴ Le gugapa diuzre ljwézrele tule xetule, ne le gunida' ljwézrele lu xel-la' zri'i lazre'.

Dxenaba' lau Dios gunne' le'e xel-la' dxebeza zri lazre', le'e nácale bi ca' chee Jesucristo. ¡Ca'an gaca na!

DIZRA' GUDXUPE' DA BZUAJ SAN PEDRO

Dizra' da gusel-la San Pedro chee bi ca' chee Jesús

¹ Neda', Simón Pedro, naca' wën zrin chee Jesucristo, ne benne' gubáz chee'. Dxuzúaja' da nigá chee le'e, ba nápale xel-la' dxeajlí lazre' da zácale'e, ne naca tuze ca da nápantu' netu'. Caní naca lawe' da naca li lazre' Dios cheedxu, ne Benne' Weselá cheedxu Jesucristo. ² Dxenaba' lau Dios gúnnale'e le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

Ca dxal-la' gaca bi chee Cristo

³ Dios lu xel-la' waca chee' ba nunne' dxi'u xúgute da nachínedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gunné' dxi'u chee gápadxu da xabáa chee Le', ne xel-la' szren chee'. ⁴ Caní naca na, ba nunne' dxi'u ca da nachebe lazre', da zaj naca na szrénle'e, ne da zaj zácale'e na, chee ne chee da guchebe lazre' wazrué'ele le'e gácale ca nácaqueze Dios, ne chee lale lu da sban da dxaca lu xezr la xu nigá ne chee da dxezá lazre' belá' dxen chee bénneache. ⁵ Chee le na' dxal-la' cue'le gunne xue gun xel-la' dxeajlí lazre' chee gunle da xrlátaje, ne chee gun da xrlátaje da dxunle gácale benne' sina. ⁶ Xel-la' sina chee dxal-la' gun na nna be'e cuínale, na' xel-la' dxenná be'e cuina chee dxal-la' gun na gácale benne' zren lazre', na' xel-la' zren lazre' chee dxal-la' gun na zri'ile Dios. ⁷ Xel-la' zri'i lazre' chee nen Dios dxal-la' gun na zri'ile benne' bíchedxu ca', na' xel-la' zri'i lazre' chee nen bíchele ca' dxal-la' gun na gácale zri'i lazre'.

⁸ Che le'e dxunle da caní, ne dxelepe ban na, quebe xegá'ana cá'aze xel-la' nabán chee, ne quebe naca na níteze núnbeale Xránadxu Jesucristo. ⁹ Benne' quebe dxune' da caní naque' ca benne' la chul-la, u ca benne' quebe dxenné'e ca da za za'. Ba gul-la lazre' guxádxie' ca naca chee dul-la ca' da bene' gate nate. ¹⁰ Chee le na', benne' bícha'dau', le gun ba xuzre nézele Dios gunné' le'e, ne ba guqué'e le'e, na' che gunle da nigá, cabata' cheajházele. ¹¹ Caní gun Dios, gúnnale'e le'e lataj chu'ule naga nna bea Xránadxu, ne weselá cheedxu Jesucristo chadía chacanna.

¹² Chee le na' tu dxusá'azqueza' lázrele da caní, lálala ba nézele na, ne ba ze cháchale lu xel-la' li da ba nápale. ¹³ Dxácate naca bana' dxéqueda' dxun na ba xen gusá'a lázrele chee da caní ¹⁴ lawe' da ba nezda' wátezea' ca ba gunná Xránadxu

Jesucristo, guzre' neda'. ¹⁵ Na'a guna' ca da séqueda' chee gate te gatia' neda', cheajsá lázrquezle chee da caní.

Benne' belelé'ene' xel-la' szren chee Cristo

¹⁶ Da bsédentu' le'e ca naca chee xel-la' szren chee Xránadxu Jesucristo, ne ca xelé'e xecha lasa quebe naca na ca da dxenná xichaj lázrdau bènneache. Netu' blé'equezentu' ca naca xel-la' szren chee Xránadxu. ¹⁷ Blé'entu' Le' gate Xradxu Dios be'e Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite lazra', ne dxezaca ba lazra' nen Le'." ¹⁸ Nétu'queze bènentu' chi'i na' da za na xabáa gate zúantu' nen Xránadxu lu xi'a lá'azxa na'. ¹⁹ Chee le na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxusení na tu lataj naga naca chul-la ca zrin zra chaní', na' Cristo, Bénnea' naque' ca belaj zila súalene' le'e chee gusení'e lu xichaj lázrdaule. ²⁰ Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'e na lu xel-la' dxéajni'i cheeze'. ²¹ Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lá'azxa le'.

2

Ca naca chee benne' ca' dxulusédené' da wen lazre' (Judas 4-13)

¹ Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédené' bènneache dizra' chee Dios. Benne' caní wuluzéajni'ine' bènneache bagácheze ca naca dizra' wen lazre' da guxrinnaj na, na' caní xeledábague' Xránadxu, Bénnea' bselé' dxi'u, na' lawe' da dxulusédené' da caní xelebía xi' zéqueze'. ² Benne' zan chjácalene' ca da sban dxuluséde benne' ca', na' ne chee benne' caní xelenné' bènneache schanni' chee dizra' li chee xel-la' weselá. ³ Lawe' da dxelezá lazre' xelezí'e dumí, xelebéaje' le'e dumí ne chee da wen lazre' da dxuluzéajni'ine' le'e. Dios ba nucueze' da guzría xi na benne' caní, lawe' da ba guchugue' gate nate ca da gaca chee benne' ca'.

⁴ Dios quebe bnite lawe' chee gubáz chee xabáa ca' belún dul-la. Bdee' gubáz chee xabáa ca' lu lataj ba xa', ne bzre'e le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee gubáz chee xabáa ca'.

⁵ Cá'anqueze Dios quebe bnite lawe' chee benne' ca' gulezrá'

gate nate. Gusel-le' nisa xiuj da bzria xi na benne' ca' belune' da caleła. Bselé' Noé, bēneea' bchálaje' ca' naca da xrlátaje da dxal-la' xelún bēneache. Bselé' gázreze benne'. ⁶ Cá'anqueze guchugu Dios chee xezre Sodoma, ne xezre Gomorra chee xelebia xi na. Bzézxié' dxúpatę xezre ca', na' belexegá' anatę na de. Caní dxuluzéajni'i na benne' ca' xelune' da caleła, benne' xelezrę'ę te na'. ⁷ Dios bselé' Lot lu xezre Sodoma na' lawe' da guque' tu benne' xrlátaje, ne bexíajele'ęne' gate blé'ęne' ca' naca da sban da dxelún benne' ca' dxelune' da caleła. ⁸ Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca' dxennę'ę, ne dxenne' ca' da caleła da dxelún benne' ca'. ⁹ Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da caleła, ca' tu lizre xia, ca' zrin zra chugue' chee' chjaque' lataj ba xa'.

¹⁰ Dios xudé' xel-la' zi' zrendxa benne' ca' dxelune' cáteze da sban da dxelezá lazre', ne dxuluzúe' chalá'ala xel-la' dxenná bea chee Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee gubáz chee xabáa ca'. ¹¹ Gubáz ca' zaj nápadxe' xel-la' dxenná bea, ne xel-la' szren ca' benne' caní, quebe dxelenné' da caleła chee benne' ca' gate dxelawe' zria chee' lau Xránadxu.

¹² Benne' caní zaj naque' ca' bea ca' quebe zaj naxéajni'iba', be dxelunba' ca' da zaj nézezeba', ne zraba' chee xelél-le'-ba', ne xelutię'-ba'. Benne' caní dxelenné' schanni' chee da quebe dxeléajni'ine', na' xelátequeze' ca' dxelate bea ca', ¹³ ne xeledé' xel-la' zi' ca' xel-la' zi' buludé' benne' xula. Dxeléquene' zaj zre'ę lu da ba neza gate dxelebene' ca' da dxaca tu zra tu zra. Zaj naque' ca' tu da sban da dxusi'i na le'e xel-la' stu' gate zaj zre'ę nen le'e lu laní chee, dxácatę ne dxelezúe' lu xel-la' dxebe' lu da caleła da dxelune'.

¹⁴ Dxelezá lazre' xúgute' nu'ula dxelelé'ęne', ne quebe dx-elálene' dxelune' dul-la. Dxulusi'ę neza xula benne' bíchedxu quebe zaj zę chache'. Dxulucúdequeze', ne zaj naque' benne' zaj xu'ę de'. ¹⁵ Zaj nanítię' lawe' da gulecuase' lu neza li chee Dios. Dxelune' ca' da beñ Balaam, zri'ine Beor. Balaam nigá bene' ba chee dumí, ne gudé' dxune' da caleła, ¹⁶ na' bea na', be dxua xua', gunneba' ca' benne', ne gudíl-laba' Balaam ca' naca dul-la da dxune', na' guchúguba' da xala da dxun Balaam.

¹⁷ Benne' caní zaj naque' ca' tu beaj bizre, ne ca' tu beuj da dxua be' bdunu'. Ba zaj naca chee benne' ca' xelexegá'ane' chadía chacanna lu da chul-la. ¹⁸ Dxelenné' dizra' da dxulucá'ana szren na le', ne da zaj naca na dácheze. Dxuluchínene' da sban ca', ne da dxezá lazre' beła' dxen chee bēneache chee dxulusi'ę chalá'ala benne' ca' za dxelexedxúajteque' ládujla

benne' ca' dxelunē' da calēla. ¹⁹ Dxelechebe lazre' xulúnēzruje' benne' ca' tu xel-la' weselá, san léqueze benne' ca' zaj naque' wēn zrin chee da sban. Tu tu bēnneache naque' benne' nada'u chee da dxenná be'e na le'. ²⁰ Benne' ba zaj núnbe'e Xránadxu, ne Weselá cheedxu Jesucristo, ne ba gulelé' lu da sban chee xēzr la xu nigá, na' te na' che xelexexu'e xecha lasa lu da sban na', ne xelu'e lataj xenná be'e na le', na' gácadxa da ba xa' chee benne' ca' ca da guca chee' gate nate. ²¹ Cháwe'dxela gaca na chee benne' caní la quebe zaj núnbe'e Cristo, quegala gate ba belúnbe'e Le', na' xelexecuase' ca naca xel-la' dxixruj bea lá'azxa da guzre Dios le' xelunē'. ²² Ca da guca chee benne' caní dxulé'e na naca da li dizra' nigá da dxenná na:
 Becu' dxexáguba' ca da ba bexébeba',
 na' cuche za bexíbeba' bexú'uba' xecha lasa lu guzra' cheeba'.

3

Ca naca chee zra xelá' Xránadxu

¹ Benne' bícha'dau' nazri'itē lazra', da nigá naca na dizra' gudxupe' da dxuzúaja' chee. Lu dxúpatē xiche caní guca lazra' guzájni'ida' le'e chee gulaba lázrele chee da caní. ² Le gusá lazre' ca da gulenná benne' lá'azxa ca', benne' buluchálaje' waláz chee Dios, ne ca naca da gudixruj be'e Xránadxu, Benne' Weselá cheedxu, da na' bulusede benne' gubáz chee' ca' le'e.

³ Dxunna ba xen gúnbeale, lu zra da za zá'aca welelá' benne' xelún le' chee da zaj naca na da lá'azxa, ne xelunē' cáteze da dxelezá lazre', ⁴ ne xuluchēbe' bēnneache: ¿Bizra guca chee da guchebe lazre' Cristo, gunné': Welá'a? Xra xrtáudxu ca' ba gulate', na' túzqueze ca guca, gaca na gate guzrete xēzr la xu. ⁵ Benne' caní quebe dxeleque be'ene' gulezúa xabáa, ne xēzr la xu gate nate, Dios gunné' bedxúaj na lu nisa, na' guzúa chacha na lu nisa, ⁶ na' xēzr la xu da zua gate nate guzría xi na ne chee nisa xiuj, ⁷ na' xabáa, ne xēzr la xu da zaj zua na na'a, ba naca chee na xelexxe na ca ba núnqueze Dios chee na. Xi' na' guzezxe na da caní lu zra guchi'a Dios, gate xelebía xi' benne' ca' dxelunē' da calēla.

⁸ Benne' bícha'dau' nazri'itē lazra', quebe gal-la lázrele da nigá: Lau Xránadxu tu zraze naca na ca chi gaxúa iza, na' chi gaxúa iza zaj naca na ca tu zraze. ⁹ Quebe dxezré Xránadxu gunē' da nachebe lazre' ca dxeleque bēnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexexíaje lazre' xúgutē bēnneache.

¹⁰ Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelé'edxu, na'

gunle'e na schaga, ne ca naca da dxelé'edxu zran xabáa xelebía xi na lu xi', na' xęzr la xu nigá chezxe na tu zren nen da de lawe na.

¹¹ Che ba nézele xelebía xi' xúgutę da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios ¹² dxácate ne dxebézale zra na', ne dxal-la' gunle ca da séquele zrintę zra na'. Lu zra na' cuia xi' xabáa lu xi', na' da zaj zria zran xabáa xelexuna na lu xi' na'. ¹³ Dxi'u dxebézádxu tu xabáa cube, ne tu xęzr la xu cube da ba guchebe lazre' Dios naga gaca xlátaję xúgutę.

¹⁴ Cheę le na', benne' bícha'dau' nazri'ite lazra', dxácate dxebézale dá caní, le gun ca da séquele cheę quebe bi bágale, ne quebe bi nadxenle cheę dul-la lau Dios, ne suale lu xel-la' dxebeza zri lazre'. ¹⁵ Le gusá lázrele naca Xránadxu zren lazre' nen dxi'u cheę ladxu. Cá'ancheze Pablo, benne' bíchedxu nazri'ite lázredxu, bzujaję cheęle, bchínene' ca naca xel-la' sina da bnezruj Dios le'. ¹⁶ Lu xúgutę xiche da ba bzujaję, ba bchálajlene' le'e ca naca cheę da caní, lácala bal-la na nácale'e na stębe chéajni'idxu na, na' benne' ca' quebe dxelėjni'ine' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' cheę le na' Dios guzría xi'e benne' ca'.

¹⁷ Cheę le na', benne' bícha'dau' nazri'ite lazra', che le'e ba nézele da nigá nédxula, le guxúe cuínale cheę da węn lazre' cheę benne' ca' dxelune' da calela cheę quebe xeleché le'e chalá'ala, ne quebe nite xel-la' li lazre' cheęle lau Dios. ¹⁸ Le gúnbea xanne' Xránadxu, Benne' Weselá cheędxu, Jesucristo, ne le gula lu xel-la' zri'i lazre' cheę'. ¡Gaca ba Le' na'a, ne chadía chacanna! ¡Ca'an gaca na!

DIZRA' NÉDXUDAU' DA BZUAJ SAN JUAN

Xtizra Dios da dxunna na xel-la' nabán li lazre'

¹ Dxuzúaja' cheeḷe da nigá ca naca chee Bénnea' zúaqueze' gate guzú lau zua xúgute da dxelé'edxu. Dxuzúaja' ca naca chee Bénnea' ba bémentu' chee', ne ca naca da ba blé'equezentu' bene', neda' ne xezícadxa benne' ca' bseḷe Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'. ² Bénnea' dxunne' xel-la' nabán zeajlí canna ba ble'e, na' netu' blé'entu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúalene' Xradxu Dios, na' ble'e naga zúadxu. ³ Da blé'entu', ne da bémentu' dxuzentu' le'e chee gácale tuze nen netu'. Da lítegaze, nácadxu tuze nen Xradxu Dios, ne nen Jesucristo, Zri'ine Dios. ⁴ Ca naca da caní dxuzúaja' cheeḷe chee gaca du lazre' xel-la' dxebe cheeḷe.

Dios naque' lení' chee xichaj lázrdau bénneache

⁵ Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení', ne quebe bi zúale Le' da naca chee da chul-la. ⁶ Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li. ⁷ Che dxundxu da li da naca chee xel-la' naxaní', ca naca Dios, Bénnea' naque' li lazre', ne zu'e lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágadxu.

⁸ Che dxennadxu quebe nabágadxu dul-la, dxezí xéqueze cuínadxu, na' da li quebe zúale na dxi'u. ⁹ Che xrúalepedxu ca naca dul-la da nabágadxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágadxu, ne quibe' dxi'u ca naca xúgute da sban da ba bendxu. ¹⁰ Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' chee'.

2

¹ Le'e, bi nazri'ite lazra', dxuzúaja' da nigá cheeḷe chee quebe gunle dul-la. Che nu benne' gune' dul-la, zua wenaba cheedxu lau Dios, Jesucristo, Benne' xlátaje. ² Le' gutie' waláz cheedxu chee gudúe' da nabágadxu lau Dios ca naca dul-la

cheędxu, ne quegaze da nabágadxu dxi'u, san gudúę' da zaj nabaga xúgute bėnneache.

³ Che dxuzúadxu dizra' ca naca da bdxixruj be'e Dios, nezdxu ba núnbeadxu Le'. ⁴ Che nu dxenná: Neda' núnbe'a Le', ne che quebe dxuzúę' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. ⁵ Che nu benne' dxuzúę' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdxu ba zúadxu tuze nen Le'. ⁶ Bėnnea' dxenné' naque' tuze nen Dios dxal-la' gaque' ca guca Jesús.

Tu da cube da bdxixruj be'e Jesús

⁷ Le'e, bi nazri'ite lazra', dxuzúaja' cheęle ca naca da dxenná na dxal-la' zri'idxu le sa' ljwėzredxu. Quebe naca na tu da cube da bdxixruj bea Dios. Naca na da gula na' da ba guzile nédxudaute. Da gula da bdxixruj bea Dios naca na dizra' da ba bėnequezle. ⁸ Naca na ca dxuzúaja' cheęle tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li cheę xel-la' zri' ilazre' lu xichaj lázrdaudxu, da dxegúa na da naca na cheę da chul-la.

⁹ Che nu benne' dxenné' dxunę' da naca na cheę xel-la' naxaní', ne che dxecuıdene' le sa' ljwezre', benne' nigá ne dxedé' lu da naca na cheę da chul-la. ¹⁰ Benne' nazri'ine' le sa' ljwezre' dxunę' da naca cheę xel-la' naxaní', ne quebe dxunę' da guzrıa xi na le sa' ljwezre'. ¹¹ Bėnnea' quebe chawe' dxelé'eng' le sa' ljwezre', lu da naca na cheę da chul-la zua bėnnea', ne lu da na' dxedé', ne quebe nézenę' ga zéaje' lawe' da dxucá'ana da chul-la le' ca tu benne' la chul-la.

¹² Le'e, bi nazri'ite lazra', dxuzúaja' cheęle lawe' da ba bnite lau Dios cheęle ca naca dul-la cheęle, lawe' da gute Jesucristo waláz cheędxu. ¹³ Le'e, benne' nazri'ite lazra', dxuzúaja' cheęle lawe' da ba núnbeale Bėnnea' zúaqueze' nédxudaute.

Le'e, benne' cuide', dxuzúaja' cheęle lawe' da ba bsanle da dxenná da xriwe'.

Le'e, bi nazri'ite lazra', dxuzúaja' cheęle lawe' da ba núnbeale Xradxu Dios.

¹⁴ Le'e, xruze xrna', dxuzúaja' cheęle lawe' da ba núnbeale Bėnnea' zúaqueze' nédxudaute.

Le'e, benne' cuide', dxuzúaja' cheęle lawe' da nácale benne' wal-la, ne dizra' cheę Dios nápane, ne bsanle da dxenná da xriwe'.

¹⁵ Quebe sa lázrele da caleła ca' da zaj naca na cheę xęzr la xu nigá, ne quegá da zaj de lu xęzr la xu nigá. Che nu benne' dxezá lazre' da zaj de lu xęzr la xu nigá, quebe nazri'ine' Xradxu Dios. ¹⁶ Da caní zaj naca na cheę xęzr la xu nigá, da

dxezá lázredxu da dxezaca ba lazre' bēla' dxen cheēdxu, ne da dxezaca ba lazre' xiaj laudxu, ne ca naca xel-la' dxucá'ana szren cuina cheē da nápadxu. Xúgute da caní quebe zaj naca na da dxunna Dios, san zaj naca na cheē xēzr la xu nigá. ¹⁷ Ba zra xuzre lazre' xēzr la xu nigá, ne ca naca da dxezá lázredxu da naca na cheē xēzr la xu nigá. Bénnea' dxune' da dxaca lazre' Dios wazúatecaze'.

Ca naca da li, ne da wēn lazre'

¹⁸ Le'e, bi nazri'ite lazra', zra caní zaj naca na zra bzebe. Ba bénele gulé'e lawē' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Cheē lē na' nezdXu ba zúadxu zra bzebe. ¹⁹ Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'anałequeze' dxi'u. Caní guca cheē nezdXu quebe zaj naca xúgute' tuze nen dxi'u.

²⁰ Ca naca cheēle le'e, ba zúale Be' Lá'azxa le'e, Bénnea' gusel-la Xradxu Lá'azxa. Cheē lē na' ba nézele xúgute da caní. ²¹ Dxuzúaja' cheēle da nigá lawe' da ba nézele da li, ne quegá dxennia' quebe nézele da li. Ba nézquezle le'e quebe dxun lazre' Bénnea' naque' da li.

²² ¿Nuzra' naca benne' wēn lazre'? Naca bénnea' dxenné' Jesús quebe naque' Cristo, Benne' nasele-la Dios. Benne' wēn lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. ²³ Xúgute benne' dxelenné' Jesús quebe naque' Zri'ine Dios, Dios quebe zúaleñe' benne' ca'. Bénnea' dxexechebe' Jesús naque' Zri'ine Dios, Dios zúalequeze' bénnea'.

²⁴ Cheē lē na', le cu'u lu xichaj lázrdaule dizra' da ba bénele nédxudaute. Che da ba bénele nédxudaute zua na lu xichaj lázrdaule, le'e súdequezele tuze nen Zri'ine Dios, ne nen Xradxu Dios. ²⁵ Da nigá naca na da nachebe lazre' Dios, gunne' dxi'u xel-la' nabán zeajlí canna.

²⁶ Ba bzuaja' cheēle da nigá ca naca cheē benne' ca' dxelezi xe'e le'e. ²⁷ Na'a zúale Be' Lá'azxa le'e, Bénnea' gusel-la Jesucristo cheēle, na' Be' Lá'azxa nigá zue' xichaj lázrdaule. Cheē lē na' quebe nachínele nu gusede le'e lawe' da dxusede Be' Lá'azxa le'e ca naca xúgute da caní, na' da dxusedene' le'e naca na da li, ne quebe naca na da wēn lazre'. Cheē lē na', le súdequeze tuze nen Cristo ca naca da ba bsede Be' Lá'azxa le'e.

Ca naca cheē benne' zaj naque' zri'ine Dios

²⁸ Na'a, bi nazri'ite lazra', le súdequeze tuze nen Cristo, cheē súadxu li lazre' gate xelá' Le', ne quebe xedué'edXu lau Le' gate xelé'e. ²⁹ Ba nézele naca xlátaje Dios. Cheē lē na' dxal-la' nézele

xúgute benne' ca' dxelúnqueze' da naca na xlátaje zaj naque' zri'ine Dios.

3

¹ Le nna' xque ca nazrí'tile'e Dios dxi'u lawe' da nazí ladxu bi chee Dios, ne caní nácadxu. Chee le na' quebe zaj neze bénneache lu xezr la xu nigá da nácadxu lawe' da quebe belúnbe'e Jesús. ² Le'e, bi nazrí'ite lazra', na'a nácadxu bi chee Dios. Quebe ne gulé'e lawe' da gácadxu. NezdXu gate xelá' Le', gácadxu ca naca Le' lawe' da lé'edxu Le' ca nácaqueze Le'. ³ Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

⁴ Nu benne' dxune' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. ⁵ Ba nézele bla' Jesucristo chee gudúe' dul-la nabágadxu, ne Le' quebe bi dul-la bene'. ⁶ Xúgute benne' zaj zúatequeze' tuze nen Jesús quebe dxelune' dul-la, na' xúgute benne' dxelune' dul-la quebe ne xelélé'ene' Cristo, ne quebe ne xelúnbe'e Le'. ⁷ Le'e, zrí'ina'dau', quebe güele lataj nu si xe le'e. Bénnea' dxune' da xlátaje, xlátaje naque', ca naca Dios, naque' xlátaje. ⁸ Benne' dxune' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zri'ine Dios, chee bzria xi'e xúgute da nun da xriwe' lu xezr la xu nigá.

⁹ Xúgute benne' zaj naca bi chee Dios quebe dxelune' dul-la lawe' da zúalētequeze Be' chee Dios benne' ca'. Chee le na' québedxa gaca xelezúe' xelune' dul-la lawe' da zaj naque' bi chee Dios. ¹⁰ Naca bea nu naca bi chee Dios ne nu naca bi chee da xriwe'. Bénnea' quebe dxune' da xrlátaje ne quebe nazri'ine' le sa' ljwezre' quebe naque' bi chee Dios.

Dxal-la' zri'idxu tu xetudxu

¹¹ Da nigá naca na dizra' da ba bénequeze nédxudaute, da dxenná na: Dxal-la' zri'idxu tudxu xetudxu. ¹² Quebe gundxu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

¹³ Le'e, benne' bícha'dau', quebe xebánele che bénneache lu xezr la xu nigá dxuluzúe' le'e chalá'ala. ¹⁴ NezdXu ba bdxúajdxu lu na' xel-la' gute, ne ba guxú'udxu lu xel-la' nabán lawe' da nazri'idxu bíchedxu ca'. Bénnea' quebe nazri'ine' bíchedxu ca' zúaqueze' lu xel-la' gute. ¹⁵ Bénnea' dxuzúe' chalá'ala bíchedxu ca' naque' ca tu benne' dxute benne', na' ba nézqueze le'e nu benne' dxute benne' quebe nape' xel-la' nabán zeajlí canna. ¹⁶ Ba nezdXu da naca xel-la' zri'i

lazre' lawe' da bzanne Jesucristo xel-la' nabán chee', na' gutie' waláz cheedxu. Cá'anqueze dxi'u dxal-la' guzúadxu xel-la' nabán cheedxu chee gácaleđxu bíchedxu ca'. ¹⁷ Che tu benne' nape' xel-la' gunní'a da naca na chee xezr la xu nigá, ne che dxelé'ene' le sa' ljwezre' dxexázejene', na' che quebe xexache lazre' le', benne' nigá quebe nazri'ine' Dios. ¹⁸ Le'e, zrí'ina'dau', dxal-la' zri'idxu tudxu xetudxu, quegá nen dízra'ze, ne quegá nen da nnézedxu. Dxal-la' gúntequezdxu na, na' gaca bea na da li nazrí'idxu bíchedxu ca'.

Zua zri lázrdaudxu lau Dios

¹⁹ Che gundxu caní ba nezdXu nácadXu chee da li, na' sua zri lázrdaudxu lau Dios, ²⁰ gate zua tu da dxagu na zria lu lázrdaudxu, lawe' da nezdXu naca Dios zrendxa ca lázrdaudxu. Le' nézquezne' ca naca da dxundxu. ²¹ Ca'an naca, bi nazrí'ite lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, ²² na' Le' gunne' dxi'u xúgute da nábaxu lawe'. Ca'an gaca lawe' da dxuzúadxu dizra' da bdxixruj be'e Dios, ne dxundxu da dxezaca ba lazre' Le'. ²³ Da bdxixruj be'ene' dxi'u naca na chéajleđxu chee Jesucristo, Zri'ine Dios, ne zri'idxu tudxu xetudxu ca bdxixruj be'e Le'. ²⁴ Bénnea' dxuzúe' dizra' da bdxixruj be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache benne' dxi'u Be' chee'.

4

Naca bea Be' chee Dios

¹ Le'e, bi nazrí'ite lazra', quebe chéajle chee xúgute benne' dxelenne' zúale Be' chee Dios le'. Le nna' xque ca naca da dxulusédené' chee nézele che zúale Be' chee Dios le'. Caní dxal-la' gunle lawe' da ba belelá' benne' zante, benne' wen lazre', dxelenne' dxuluchálaje' waláz chee Dios. ² Caní gaca nézele che zúale Be' chee Dios tu benne'. Xúgute benne' dxelexechebe' ba bla' Jesucristo, ne guque' bénneache, benne' caní zaj naque' chee Dios. ³ Xúgute benne' quebe dxelexechebe' ca guca Jesucristo quebe zaj naque' chee Dios. Zaj naque' chee bénnea' dxedábague' Jesucristo. Ba bénele gulé'e lawe' bénnea', na' na'a ba zue' lu xezr la xu nigá.

⁴ Le'e, bi nazrí'ite lazra', nácale chee Dios, ne bache bzúale chalá'ala benne' ca' dxelezí xe'e lawe' da szrendxa naca Be' zúale na le'e ca be' zua na lu xezr la xu nigá. ⁵ Benne' ca' zaj naque' chee xezr la xu nigá. Chee le' na' dxuluchálaje' chee da naca na chee xezr la xu nigá, na' benne' zaj zre'e xezr la xu nigá dxelenne' da dxuluchalaj benne' ca'. ⁶ Dxi'u nácadXu chee Dios. Benne' zaj núnbe'e Dios dxuluzé nague' cheedxu. Benne' quebe zaj naque' chee Dios quebe dxuluzé nague' cheedxu.

Cheę lę na' nezdxu nu benne' zúale Be' cheę xel-la' li lę', ne nu benne' zúale be' cheę da dxezí xę na lę'.

Tu dxúnzqueze Dios da naca cheę xel-la nazrí'i lazre'

⁷ Le'e, bi nazrí'iteę lazra', dxal-la' zri'idxu tudxu xetudxu lawe' da dxunna Dios dxi'u xel-la' nazrí'i lazre' na'. Xúgute benne' zaj naque' zri'i lazre' caní zaj naque' zri'ine Dios ne zaj núnbe'ę Dios. ⁸ Bénnea' quebe naque' zri'i lazre' caní quebe núnbe'ę Dios lawe' da tu dxúnzqueze Dios da naca cheę xel-la nazrí'i lázre'. ⁹ Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xęzr la xu nigá cheę zrué'edxu xel-la' nabán da naca na cheę Zrí'ine' na'. ¹⁰ Xel-la' zri'i lazre' li naca na caní: Quegá dxi'u na' bzri'idxu Dios. Le' bzri'ine' dxi'u, ne gusel-le' Zrí'ine' cheę guque' da gudúa na da nabágadxu lau Dios lawe' da nabágadxu dul-la.

¹¹ Le'e, bi nazrí'iteę lazra', che Dios bzri'ine' dxi'u caní, dxi'u dxal-la' zri'idxu tudxu xetudxu. ¹² Quebe nu ne le'e Dios, san che zri'idxu tudxu xetudxu, Dios zúaqueze' lu xichaj lázrdaudxu, na' xel-la' zri'i lazre' cheę dxun na li lazre' xel-la' zri'i lazre' cheędxu. ¹³ Nezdxu nácadxu tuze nen Dios, na' Dios naque' tuze nen dxi'u lawe' da bzue' Be' cheę' lu lázrdaudxu. ¹⁴ Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' cheę bedajselé' bénneache cheę xęzr la xu nigá. ¹⁵ Bénnea' dxexechebe' naca Jesús Zri'ine Dios, Dios zúalequeze' bénnea', na' lę' zúalequeze' Dios.

¹⁶ Ba núnbeadxu ca nazrí'i Dios dxi'u, ne ba guxéajledxu nazri'ine' dxi'u. Tu dxúnzqueze Dios da naca cheę xel-la nazrí'i lazre', na' bénnea' naque' zri'i lazre' caní zúalequeze' Dios, na' Dios zúalequeze' lę'. ¹⁷ Caní dxaca li xel-la' zri'i lazre' cheędxu, cheę sua zrize lázrdaudxu lu zra guzrí'a xi' Dios bénneache, benne' ca' dxelune' da caleła, lawe' da nácadxu lu xęzr la xu nigá ca nácaqueze Jesucristo. ¹⁸ Bénnea' naque' zri'i lazre' caní quebe dxezrebe' da gaca na lu zra na'. Xel-la' zri'i lazre' li dxebéaj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zri'i lazre' cheę'.

¹⁹ Dxi'u nazri'idxu Dios lawe' da bzri'i Dios dxi'u nédxudaute. ²⁰ Che nu benne' dxenné': Nazri'ida' Dios, ne che benne' nigá dxuzúe' chalá'ala le sa' ljwezre', dxun lazre'. Che quebe nazri'ine' le sa' ljwezre', bi dxelé'etene', ¿ájazra guné', zrí'ine' Dios, ne quebe dxelé'ene' Le'? ²¹ Dios ba bdxixruj be'ene' dxi'u caní, gunné': Bénnea' nazri'ine' Dios, zrí'iquezne' le sa' ljwezre'.

5

Ca bdxúajdxu chawe' lu xęzr la xu nigá

¹ Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezrí'iquezne' xúgute benne' zaj naque' bi chee Dios. ² NezdXu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u. ³ Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. ⁴ Xúgute benne' zaj naque' bi chee Dios dxedxúaje' chawe' lau da calela da dxaca na lu xezr la xu nigá. Dxedxúajdxu chawe' lau da calela da dxaca na lu xezr la xu nigá lawe' da dxéajledxu da naca na chee Jesucristo. ⁵ Benne' dxedxuaje' chawe' lau da calela da dxaca na lu xezr la xu nigá naque' bènea' dxéajle'e naca Jesús Zri'ine Dios.

Da dxenná Dios ca naca chee Zrí'ine'

⁶ Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'anqueze gulalaj dxen chee'. Be' chee Dios gudxixruj lie' da nigá, na' Le' dxuchálaje' da li. ⁷ Chunne' dxelixruj lie' chee da nigá xabáa, Xradxu Dios, ne Zrí'ine', ne Be' Lá'azxa, na' chunne' caní zaj naque' tuze. ⁸ Cá'anqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúa Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. ⁹ Dxéajledxu da dxelixruj li bèneache, san da nadxixruj li Dios zácadxa na, na' Le' nadxixruj lie' naca Jesús Zrí'inequeze'. ¹⁰ Bènea' dxéajle'e naca Jesús Zrí'ine Dios ba guzi'e xichaj lázrdawe' da ba gudxixruj li Dios, san bènea' quebe dxéajle'e chee Dios dxucá'ane' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zrí'ine'. ¹¹ Da nigá naca na da nadxixruj li Dios, dxenné' ba benne' dxi'u xel-la' nabán zeajlí canna, na' xel-la' nabán nigá za na lu na' Zrí'ine', Jesucristo. ¹² Bènea' zua Zrí'ine Dios na' lu xichaj lázrdawe' zúale xel-la nabán nigá le', san bènea' quebe zua Zrí'ine' lu xichaj lázrdawe' quebe zúale xel-la' nabán nigá le'.

Ca gaca nezdXu nápadxu xel-la' nabán zeajlí canna

¹³ Da nigá dxuzúaja' chee dxéajle chee Zrí'ine Dios chee nézele zúale xel-la' nabán zeajlí canna le'e.

¹⁴ Dxuxrén lázredxu Dios lawe' da nezdXu che bi nábadxu lau Le' ca naca da dxaca lazre' Le', Léqueze' wenne' cheedxu.

¹⁵ Lawe' da nezdXu Dios dxenne' cheedxu, cá'anqueze ba nezdXu gunna Le' da ba gunábadxu lau Le'.

¹⁶ Che tu benne' dxelé'ene' dxun bíchedxu dul-la da quebe nua na xel-la' gute, dxal-la' nabe' lau Dios ne chee bíchedxu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na'

quebe dxennía' nábale lau Dios ne chee bënnea' dxune' dul-la nigá. ¹⁷ Xúgute da calela naca na dul-la, na' de dul-la da quebe nua na xel-la' gute.

¹⁸ NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zri'ine Dios le', na' da xriwe' quebe bi dxezeque gune na le'.

¹⁹ NezdXu nácadXu bi chee Dios, na' xúgute benne' zaj naca chee xezr la xu nigá zaj xu'e lu na' da xriwe'.

²⁰ NezdXu ba bla' Zri'ine Dios, ne ba bzéajni'ine' dxi'u chee gúnbeadxu Dios li. NácadXu tuze nen Bénnea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u. ²¹ Le'e, zrí'ina'dau', le guxúe xanne' cuínale chee quebe gucá'ana szrenle bedau' xiaj xaga ca'.

DIZRA'DAU' GUDXUPE' DA BZUAJ SAN JUAN

Da naca li, ne xel-la' zri'i lazre'

¹ Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. ² Nazrí'ida' le'e lawe' da ba núnbeadxu da li, da súatequeze na xichaj lárdaudxu. ³ Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

⁴ Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. ⁵ Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudaute. ⁶ Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudaute, chee zri'idxu tudxu xetudxu.

Benne' dxelezi xe'e

⁷ Ba belelá' benne' zante, benne' dxelezi xe'e. Benne' caní quebe dxelexechebe' guca Jesús bela' dxen. Benne' caní zaj naque' benne' dxelezi xe'e, ne dxeledábague' Cristo. ⁸ Le guxúe xanne' cuínale chee quebe gunítele da dxal-la sile du naxá'.

⁹ Nu benne' dxedé' nagá xula chee da nigá quebe dxezílene' ca naca da bsede Cristo, ne quebe zúale Dios le'. Bénnea' dxezílene' ca naca da bsede Cristo, da li Dios zúalene' Le', na' cá'anquez zúale Cristo Le'. ¹⁰ Che nu benne' xide' naga zúale le'e, ne quebe dxusédené' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana. ¹¹ Nu benne' gape' bénnea' ba lá'ana, dxun benne' nigá tuze ca da calela da dxun bénnea'.

Dizra' bzēbe

¹² Da zante dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

¹³ Bidu ca' chee bi bilu', nu'ula ba gucá'a Dios le', dxu-lugápabe' lue' diuzre. Ca'an gaca na.

DIZRA'DAU' GUXUNNE' DA BZUAJ SAN JUAN

San Juan dxenné' da chawe' chee benne' le' Gayo

¹ Neda', benne' gula wen zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

² Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bénne'du xu'u.

³ Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li.

⁴ Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

⁵ Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula. ⁶ Lau benne' zaj nazrague' chee Dios nigá dxuluchalaj bi bíchedxu caní ca nazri'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dzezaca ba lazre' Dios. ⁷ Benne' caní zjaque' dxelune' zrin nigá lawe' da zaj nazri'ine' Cristo, ne quebe bi dxelezi'e da xelunna benne' quebe zaj núnbe'e Dios. ⁸ Chee le' na' dxal-la' gápadxu ba lá'ana benne' caní chee gúnledxu le' zrin chee da li.

Da calela da dxun benne' le' Diótrfes

⁹ Ba bzuaja' chee benne' zaj nazrague' chee Dios naga zu', na' bénnea' le' Diótrfes quebe dxape' netu' ba lá'ana lawe' da dxaca lazre' gaque' blau lávela benne' ca'. ¹⁰ Chee le' na', che xida' naga zu', guzéajni'ida' benne' ca' ca naca da dxun bénnea', dxezí tizre' netu', ne dxennéle'e cheentu'. Quegá da nigáze dxuné', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xezezí' lu ne'e benne' caní, ne dxexebéaje' le' ládujla benne' ca' zaj nazrague' chee Dios.

¹¹ Lue', bi nazrí'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bénnea' dxuné' da xrlátaje naque' chee Dios, san nu benne' dxuné' da calela, quebe ne gúnbeaqueze' Dios.

Da xrlátaje da dxun benne' le' Demetrio

¹² Xúgute benne' dxelenné' da chawe' ca naca da dxun Demetrio, na' da líqueze naca bea na ca dxuné'. Cá'anqueze netu' dxixruj beantu' ca naca da dxuné', na' lue' nézqueznu' dxuchálajntu' da li.

Dizra' bzebe

¹³ Dēle'e da dxal-la' guchálajlena' lue', san quebe dxaca lazra' guzúaja' na lu xícheze, ¹⁴ lawe' da dxebeza lazra' lé'etequezda' lue'. Nadxa guchálajdxu caníqueze.

¹⁵ Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.

XTIZRA DIOS DA BZUAJ SAN JUDAS

Dizra' da gusel-la San Judas chee bi ca' chee Dios

¹ Neda', Judas, wen zrin chee Jesucristo, naca' benne' biche Jacobo, na' dxesel-la' dizra' nigá chee le'e, nácale benne' ca' ba gunné Xradxu Dios, ne ba guqué'e le'e chee gácale bi chee', ne dxuxúe' le'e lawe' da nácale tuze nen Jesucristo. ² Dxenaba' lau Dios xache lázrele'e le'e, ne gúnna le'e chee xel-la' dxebeza zri lazre', ne xel-la' zri'i lazre'.

Ca naca chee benne' ca' dxulusédené' da wen lazre' (2 Pedro 2.1-17)

³ Benne' bícha'dau' nazri'ite lazra', ba guca lázreli'a guchálajlena' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajlena' le'e, ne gata' xueda' le'e gapa típale da naca chee xel-la' dxeajlí lazre' da ba benna Dios chalásaze chee bi chee' ca'. ⁴ Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dxelune' da sban, na' lawe' da dxunite lau Dios chee benne' dul-la, dxeléque ne zaj nápaqueze' lataj xelune' cáteze da dxelaca lazre', ne dxuluzúe' chalá'ala Dios tu licha', Bénnea' dxenná bea, ne Xránadxu Jesucristo.

⁵ Lácala ba nézqueze le'e da nigá, dxaca lazra' gusá'a lázrele ca ben Xradxu Dios gate bebéaje' benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. ⁶ Cá'anqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaje' gubáz ca' chalásaze nen du xia, chee guzría xi'e le' lu zra bzebe ni'. ⁷ Cá'anqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'anqueze belún benneache chee xezre caní. Buluzúa cuine' lu da sban, ne belune' cáteze da gulaca lazre', ne buluzúe' chalá'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bdee' le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdXu ca'.

⁸ Láqueze gulaca caní chee benne' ca', cá'anqueze dxelún benne' caní, zjácane' xel-la' bchigala, ne dxuluca'ane' sban belá' dxen chee', ne dxuluzúe' chalá'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios. ⁹ Léqueze Miguel, gubáz blau chee xabáa chee Dios gate gudíl-lalene' da xriwe', ne btil-le' dizra'

nen le na chee guca bexu'e bel-la' dxen chee Moisés, quebe bexájrjē' nnabē' da ba xa', san guzrē' na: "Xránadxu Dios tíl-laqueze' lue'." ¹⁰ Na'a benne' caní dxelenné' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchínē' chee xuluzría xi' cuine'.

¹¹ Edxugua benne' caní lawe' da dxelunē' ca da ben Caín, chee gulezí' lu ne'e dumí, buluzúe' chalá'ala da dxenná Dios ca ben Balaam, na' welexenite' ca guca chee Coré, bēnea' bzria xi' Dios lawe' da gudábage' xrtizra Dios. ¹² Benne' caní, gate dxelágulē' le'e lu laní chee dxelunē' cheajlechaze bēneache. Dxelé'aj dxelawē' nen le'e, ne quebe dxelape' ba lá'ana Dios. Dxelún cuine' ca benne' dxuluxúe' zrila', san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da zixre chee na, ne zaj nabizre na du lue na, ne ba zaj zua na chee lepe na. ¹³ Zaj naque' ca xejxruza chee nísadau' da dxedxú'u na bzrina' sgute, da dxulé'e na ca da sban da dxelunē'. Zaj naque' ca belaj ca' dxelecuasa na lu xrneze na, ne zaj nabía xi na chee cheajsúa na chadía chacanna lu da chul-la.

¹⁴ Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' ¹⁵ chee guchi'e ca da zaj nun xúgute bēneache. Gulezría xi' xúgute benne' wen da sban ne chee da calela da belunē' lu xella' calela chee', nen benne' dul-la ca' ne chee xúgute dizra' schanni' da gulenné chee Dios." ¹⁶ Zaj naque' benne' wagu zria, ne benne' wezí tizra', benne' dxelunze' cáteze dxelezaca ba lazre'. Dxuluchálaje' dizra' da dxucá'ana szren na le', ne dxelennáze' da chawe' chee bēneache chee xelezí'e da zaj de chee benne' ca'.

San Judas dxenné xuene' bi ca' chee Xránadxu

¹⁷ Le'e, benne' bícha'dau' nazri'ite lazra', le gusá lázrele ca zánete iza gulenná benne' gubáz chee Xránadxu Jesucristo, ¹⁸ gulé'e le'e: Lu zra bzebe welezrá' benne' xelún le' chee da ca' zaj naca lá'azxa, ne xelunē' cáteze zaj naca da sban da dxelezá lazre'. ¹⁹ Benne' caní dxelunē' chupa la'a bēneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.

²⁰ Le'e, benne' nazri'ite lazra', le se chacha ca naca lu xel-la' dxeajlí lazre' lá'azxa da nápale. Le guchálajle Dios, zúale xel-la' waca chee Be' Lá'azxa le'e. ²¹ Le cha' lu xel-la' zri'i lazre' chee Dios, ne le cueza zra gate gunna Xránadxu Jesucristo dxi'u xella' nabán da zeajlí canna lu xel-la' zri'i lazre' chee'.

²² Le gácale benne' ca' dxelaca chupa lazre' ca naca chee Cristo. ²³ Le gun xeledá benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

San Judas dxue lá'ane' Dios

²⁴⁻²⁵ Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebe le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

DIZRA' DA BLE'E JESUCRISTO JUAN

Da ble'e Jesucristo Juan

¹ Da nigá naca tu da bnezruj Dios Jesucristo da gulé'ene' wen zrin chee' ca' ca naca da dxal-la' gácate. Jesucristo gusel-le' gubáz chee' xabáa chee', na' le' bzéajni'ine' neda', Juan, naca' wen zrin chee' Jesús. ² Neda' dxulé'eda' le'e da li ca naca xúgute da ble'eda', ne dxexecheba' ca naca dizra' chee' Dios, ne ca naca da gunná Jesucristo.

³ Ba neza zrente' naca na chee' benne' gulabe', ne cá'anqueze ba neza zrente' naca na chee' benne' ca' dxuluzé' nague' chee' bénnea' gulabe' dizra' nigá da benna Dios, ne xeluné' ca naca da naxúaj nigá, lawe' da ba za gáguze zra gaca na.

Juan dxuzuaje' chee' gazre cue' benne' dxeléajle'e chee' Jesús

⁴ Neda', Juan, dxuzúaja' chee' gazre cue' benne' dxeléajle'e chee' Jesús, zaj zre'e naga nababa Asia. Dxenaba' lau Dios gaca chawe' cheele, ne gunne' le'e xel-la' dxebeza zri lazre'. Le' guzúaqueze' nédxudaute, ne zúaqueze' na'a, ne tu súazqueze' chadía chacanna. Gazre Be' ca' zaj zra' ca li naga dxe' Dios zaj naca Le' tuze, ⁵ ne cá'anqueze Jesucristo naque' Le' tuze ca naca da chawe' da dxun Dios cheele. Jesucristo naque' benne' li lazre' dxexechebe' ca da zaj naca chee' Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lówela xúgute wenná bea zaj zre'e xezr la xu nigá. Cristo nazri'ine' dxi'u, ne ba gudibe' xichaj lázrdaudxu. Begüe' dul-la cheedxu gate blálaje' dxen cheéqueze' le'e xaga begúaj. ⁶ Bene' dxi'u ca benne' wenná bea ca', ne bxruze ca' chee' gundxu zrin chee' Dios chee', Bénnea' naque' Xre'. ¡Gaca ba Le', ne gape' xel-la' dxenná bea chadía chacanna! ¡Ca'an gaca na!

⁷ Le na' xque. Cristo ze'e lu beuj bza. Xúgute bénneache xeelé'ene' Le', ne cá'anqueze benne' ca' beluné' Le' we', na' ca naca bénneache zaj zra' lu xezr la xu xelebezre xache'e ca xeelé'ene' Le'. ¡Awe', ca'an gaca na!

⁸ Le' dxenné': "Neda' zúaqueza' nédxudaute, ne zúaqueza' bzébedxa. Dxuna' su lau sua xúgute ne guna' xexuzre na." Caní dxenná Xránadxu, nape' duté' xel-la' dxenná bea, naque' Bénnea' guzúaqueze', ne zúaqueze', ne tu súazqueze'.

Juan dxelé'ene' tu da ble'e Dios le' da naca na da xabáa chee' Cristo

⁹ Neda', Juan, naca' benne' bíchele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga

lau da dxunna Jesucristo dxi'u. Ca tu benne' xu'e lizre xia guzúa' lu xezr la xu Patmos da naxechaj nísadau', lawe' da bchálaja' dízra' chee Dios ne dxuna' ba nalí ca naca chee Jesucristo. ¹⁰ Guzúale Be' Lá'azxa neda' lu zra chee Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucuezre'. ¹¹ Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzujaj tu lu xiche da dxelé'enu', na' gusel-la na chee gazre cue' bènneache dxeléajle'e chia', zaj zre'e naga nababa Asia, benne' ca' zaj zre'e xezre Efeso, ne xezre Esmirna, ne xezre Pérgamo, ne xezre Tiatira, ne xezre Sardis, ne xezre Filadelfia, ne xezre Laodicea.

¹² Bexéchaja' chee le'eda' nu chi'i na' gunné neda', na' ca bexéchaja' na', ble'eda' gazre da zua na xi' da' zaj naca na oro. ¹³ Laduj da zaj zua na xi' ca' ble'eda' tu benne' naque' ca Bénnea' gulje' bènneache, nácue' zra lané' da dxezrinte lu ni'e dxe'ela, na' xu'u tu bazxu oro lachu'e. ¹⁴ Xicha xíchaje' zaj naca na chiche ca zrila' chiche, u ca bezxe', na' xiaj lawe' dxelácatite legala na ca xi'. ¹⁵ Ni'e dxelácatite na ca xia da gudete bea guxú'u na lu xi', na' chi'e naca na zizraj ca naca chi'i zane' xegu zri'a ca'. ¹⁶ Lu ne'e da zua xabēla nuxre' da ca' zaj naca ca gazre belaj xabáa, na' dxu'e dxedxuaj da naca na ca tu xia da nalá dxupa la'ate. Dxu'a lawe' dxácatite na ca gubizra gate dxennále'e na.

¹⁷ Ca blé'eda' Le', xeajchazia' zran ni'e ca tu benne' gate. Na' Le' guxrúa ne'e xabēla neda', na' gunné':

—Quebe zrebu'. Neda' zúaqueza' nédxudaute, ne zúaqueza' bzébedxa. ¹⁸ Naca bánqueza'. Gutia', na' na'a nabánqueza' chadía chacanna. Neda' nuxra' zren xia chee xel-la' gute, ne chee lataj ba xa'. ¹⁹ Bzujaj da ba blé'enu' ne da dxaca na'a, ne da gaca te nigá. ²⁰ Caní naca da zéaje ca gazre belaj ca' blé'enu' nuxra' na'a xabēla, ne ca naca chee gazre da zua na xi' da' zaj naca na oro. Gazre da zaj naca ca belaj ca' zéaje na gubáz ca' nasel-la' chee gazre cue' bènneache chia' ca', na' gazre da zua na xi' zéaje na gazre cue' bènneache chia' ca'.

2

Dizra' gusel-la Cristo chee gazre cue' bènneache chee'

Dizra' gusel-le' chee bi chee' zaj zre'e xezre Efeso

¹ Guzre Jesús neda':

—Bzujaj chee gubáz chia' zúalene' bi chia' zaj zre'e xezre Efeso. Bzujaj da nigá: Caní dxenná Jesús, Bénnea' nuxre' gazre belaj ne'e xabēla, ne dxedé' laduj gazre da zua na xi' da zaj naca na oro. ² Neda' nezda' xúgute da dxunle. Nezda' dxúnle'ele zrin ne nácale zren lazre', ne quebe dxuele lataj

benne' wɛn da zrinnaj ca'. Neda' nezda' ba bxue xánnel
 benne' ca' dxelenné' zaj naque' gubáz chia' ne quebe zaj
 naque', na' ba ble'ele zaj naque' benne' wɛn lazre'. ³ Gúcale
 zren lazre', ne gudele xel-la' zi', na' bɛnlɛ'ele zrin chia', ne
 quebe gute ni'a na'le. ⁴ Na'a zua tu da dxagu na zria chee,le,
 québedxa nazri'ile neda' ca bzri'ile neda' nédxute. ⁵ Chee le na',
 le gusá lazre' ca bzri'ile neda' nédxute, ne le xexíaje lazre', na'
 le gun ca da bɛnle nédxute. Che quebe gunle caní xídaqueza'
 naga zúale, na' xecá'a xrlátajle lu da naca chia' chee québedxa
 gácale ca da zua na xi' chia'. Caní guna' che quebe xexíaje
 lázrele. ⁶ Zua tu da dxexecá'a na le'e, dxecuídele da dxelún
 benne' ca' zaj nazí le' nicolaíta ca', benne' ca' dxulucá'ana
 szrené' bedau' xiaj xaga ca', da na' dxecuídequeza' neda'.
⁷ Benne' zua nague' dxal-la' xenne' da nigá dxɛ Be' Lá'azxa
 bi chia' ca'. Benne' ca' xeledxúaje' xrlátaje lawe' da zrinnaj,
 neda' gunézruja' da xelawɛ' da dxebía xaga da dxunna na xel-
 la' nabán, ne zua na lu lataj xrlátaje chee Dios.

Dizra' gusel-le' chee bi chee' zaj zre'e xezre Esmirna

⁸ Guzre Jesús neda':

—Bzuaj chee gubáz chia' zúalɛnɛ' bi chia' zaj zre'e xezre
 Esmirna. Bzuaj da nigá: Caní dxenná Jesús, Bénnea'
 zúaqueze' nédxudaute, ne zúaqueze' bzébedxa, Bénnea' gutie', ne
 bebánqueze'. ⁹ Neda' nezda' xúgute da dxunu'. Nezda' gudele
 xel-la' zi', ne nácale benne' xache'. Da li nácale benne' gunní'a.
 Nezda' ca dxelenné schanni' chee,le benne' ca' dxelenné' zaj
 naque' judío, san zaj naque' tu cue' benne' dxulucá'ana szrené'
 da xriwe'. ¹⁰ Quebe zrɛbele ca naca xel-l a' zi' da tele, lawe' da
 guzrá' da xriwe' bál-lale le'e lizre xia chee gulé'e lau da nácale,
 na' tele xel-la' zi' lawe' chi zra. Le gaca li lazre' lácala xelutie'
 le'e, na' neda' gunna' le'e xel-la' nabán ca tu da dxunna bea
 na bɛdxuajle chawe'. ¹¹ Benne' zua nague' dxal-la' xenne' da
 nigá dxɛ Be' Lá'azxa bi chia' ca'. Benne' ca' xeledxúaje' chawe'
 lawe' da zrinnaj, quebe bi gune da zi' da xa' da zeajlí canna
 chee benne' ca'.

Dizra' gusel-le' chee bi chee' zaj zre'e xezre Pérgamo

¹² Guzre Jesús neda':

—Bzuaj chee gubáz chia' zúalɛnɛ' bi chia' zaj zre'e xezre
 Pérgamo. Bzuaj da nigá: Caní dxenná Jesús, Bénnea' nuxre'
 xia da nalá dxupa la'a. ¹³ Neda' nezda' xúgute da dxunle.
 Nezda' zúale naga dxenná bea da xriwe'. Quebe nusanle da
 naca chia'. Quebe bsanle dxexechébele chia', ne lu zra ca'
 gate belutie' Antipas, benne' bechebe' du lazre' da naca chia'
 ládujla le'e, naga zua da xriwe'. ¹⁴ Na'a, zua tu da dxagu na zria
 chee,le, dxuele lataj zaj zra' ládujla le'e benne' ca' ne zjácálɛnɛ'

da bseḁe Balaam, bēnnea' gulú'u xel-le' Balac, bennen' bene' belún benne' Israel ca' dul-la, na' gulawe' da buluzríe' lau bedau' xiaj xaga ca', ne belune' da sban. ¹⁵ Cá'anqueze zaj zra' ládujla le'e bal-la benne' ne zjácalene' da dxuluseḁe benne' zaj nazí le' nicolaíta, da na' dxecuídequeza' neda'. ¹⁶ Chee le' na' le xexíaje lázrele lawe' da che quebe xexíaje lázrele xida' naga zúale, na' tíl-lalena' benne' ca' nen xia nalá da dxedxuaj na dxu'a. ¹⁷ Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuaje' chawe' lawe' da zrinnaj, neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'e xiaj na' naxúaj tu la cube chee bēnnea', da quebe nu neze, san tuze bēnnea' si'e na.

Dizra' gusel-le' chee bi chee' zaj zre'e xezre Tiatira

¹⁸ Guzre Jesús neda':

—Bzuaj chee gubáz chia' zúalene' bi chia' zaj zre'e xezre Tiatira. Bzuaj da nigá: Caní dxenná Jesús, Bēnnea' zaj zra xiaj lawe' da dxelácatite na ca xi', na' ni'e zaj naca na ca xia gache da nabá'ale'e na. ¹⁹ Neda' nezda' xúgute da dxunle. Nezda' ca nazri'ile neda', ne ca dxéajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da benle nédxute. ²⁰ Na'a, zua tu da dxagu na zria chee, dxuele lataj nu'ula na' le' Jezabel, nu'ula na' dxenné' dxuchálaje' waláz chee Dios, na' dxezí xę'e benne' wen zrin chia' ca' ca naca da dxusédenę' chee xelune' da sban, ne xelawe' da dxuluzríe' lau bedau' xiaj xaga ca'. ²¹ Neda' ba be'a nu'ula na' lataj xexíaje lazre', na' quebe guca lazre'. Quebe dxusanę' ca naca da sban da dxunę'. ²² Na'a, che benne' ca' quebe xulusanę' ca da dxelune' ca dxun nu'ula na', neda' cu'a le' xel-la' we' da quixruj na le', na' weledéle'e xel-la' zi' benne' ca' dxelune' dul-la nen nu'ula na', ²³ na' gútequeza' benne' ca' zaj de'e nu'ula na'. Caní gaca, xúgute cue' bi chia' ca' xeque be'ene' neda' nezda' ca naca dutę da zua lu xichaj lázrdau bēnneache, na' tu tule le'e gunna' le'e cáteze naca da benle. ²⁴ Xezícadxale le'e zrале xezre Tiatira, quebe zéajlele da na' dxuseḁe nu'ula na', ne quebe ne sile da dxenné' naca na da nagache chee da xriwe', neda' dxapa' le'e, quebe bi xetú da gucha' le'e gunle. ²⁵ Le gapa chi'i xel-la' dxixruj be'e da ba gucha' le'e gunle ca zrindxa zra xelá'a neda'. ²⁶ Benne' ca' xeledxúaje' chawe' lawe' da zrinnaj, ne xelune' ca dxaca lazra' neda' ca zrindxa zra bzebe ni', neda' gunézruja' chee benne' ca' xel-la' dxenná bea lawe' xezre ca', ²⁷ ca ben Xra', bēnne' neda' xel-la' dxenná bea, na' xelenná be'ene' benne' xezre ca' nen tu var xia, na' xuluzría xi'e xezre ca' ca dxun tu benne' dxelę'e tu xesu' xu. ²⁸ Cá'anqueze gu'a benne' ca' lataj

xelezúalene' neda', naca' ca belaj zila. ²⁹ Benne' zua nague' dxal-la' xenne' da nigá dxę Be' Lá'azxa bi chia' ca'.

3

Dizra' gusel-le' cheę bi cheę' ca' zaj zře'e xęzre Sardis

¹ Guzre Jesús neda':

—Bzuj cheę gubáz chia' zúalene' bi chia' zaj zře'e xęzre Sardis. Bzuj da nigá: Caní dxenná Jesús, Bénnea' zaj zúale gazre Be' cheę Dios Le', ne nuxre' da gazre ca' zaj naca ca belaj ca'. Neda' nezda' xúgute da dxunle. Nezda' ba nácale ca benne' gate ca' lau Dios lácala dxeleque bénneache naca banle. ² Le guxúe, ne le sua chacha cheę québedxa gácale ca benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. ³ Le gusá lazre' ca naca da ba nazédele. Le chéajle na, ne le xexíaje lazre'. Che quebe guxúe cuínale wida' naga zúale ca za tu gubán, ne quebe nézele bi zra xida'. ⁴ Zaj zra' ládujla le'e bábaze benne' quebe ne xelune' da sban, na' benne' caní xeledálene' neda', ne xelácue' zra lane' chiche lawe' da caní dxal-la' gaca cheę'. ⁵ Benne' ca' xeledxúaje' chawe' lawe' da zrinnaj xelácue' zra lane' chiche ne quebe xusula' la benne' ca' lu xiche naga zaj naxúaj la benne' ca' zúale xel-la' nabán le', na' xecheba' cheę benne' ca' lau Xra' ne lau gubáz cheę xabáa cheę' ca'. ⁶ Benne' zua nague' dxal-la' xenne' da nigá dxę Be' Lá'azxa bi chia' ca'.

Dizra' gusel-le' cheę bi cheę' zaj zře'e xęzre Filadelfia

⁷ Guzre Jesús neda':

—Bzuj cheę gubáz chia' zúalene' bi chia' zaj zře'e xęzre Filadelfia. Bzuj da nigá: Caní dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca da gudapa wenná bea David, na' gate salje', netú quebe nu gaca xusezxuj, na' gate xusézxuje' netú quebe nu gaca salaj. ⁸ Neda' nezda' xúgute da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nadípatęcale, zéajlele dizra' chia', ne quebe ne gusán lázrele da naca chia'. ⁹ Benne' ca' dxulucá'ana szrene' da xriwe', benne' wen lazre' ca', benne' dxelenné' zaj naque' judío ne quebe zaj naque', neda' guna' xuluzú zribe' zran ní'ale cheę xelenézene' neda' nazrí'ida' le'e. ¹⁰ Ba benle ca da gucha' le'e gunle cheę gácale zren lazre', na' cheę le' na' guxúqueza' le'e lawe' xel-la' zi' da xeledé xúgute bénneache zaj zře'e lu xęzr la xu, cheę gulé'e lau da zaj naque'. ¹¹ Wídazequeza'. Le gapa chi'i da nápaie cheę quebe nu ca'a ca da dxal-la' si'le. ¹² Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca ze'e xiaj ca' zaj zua na lizre Xra', ne cabátaquezdxa xeledxúaje' na',

na' lu lázrdawē' guzúaja' La Xra', ne la xēzre chee Dios chia' da naca na Jerusalén cube da za' xabáa, ne La' cube. ¹³ Benne' zua nague' dxal-la' xenne' da nigá dxē Be' Lá'azxa bi chia' ca'.

Dizra' gusel-le' chee bi chee' zaj zre'e xezre Laodicea

¹⁴ Guzre Jesús neda':

—Bzuaj chee gubáz chia' zúalene' bi chia' zaj zre'e xezre Laodicea. Bzuaj da nigá: Caní dxenná Jesús, Bénnea' naque' li lazre', Bénnea' dxexechebe' da li, Bénnea' naque' naga guzú lau xúgutē da bēn Dios. ¹⁵ Neda' nezda' xúgutē da dxunle. Nezda' quebe nácale zaga ca dxunle da naca chia', ne quebe nácale látēla. Dxaca lazra' la gácale zaga u la. ¹⁶ Nácale ca nisa bate, ne quebe nácale zaga, ne quebe nácale la, na' chu'una' le'e ca tu benne' dxexebe' nisa bate. ¹⁷ Le'e dxennale nácale gunní'a, ne dxaca chawe' chee ne quebe bi dxexázrjele, na' quebe dxéquebe'ele' dxaca ba xa' chee ne dxezaca zi'le, ne nácale xache', ne nácale la chul-la, ne nácale gala xide. ¹⁸ Chee le na' dxuzéajni'ida' le'e si'le lu na' neda' da naca ca oro da nabá'a na lu xi', chee gápale xel-la' gunní'a li lazre', ne si'le zra lánale chiche chee gáculē, da gunna' le'e, na' xenite xel-la' stu' chee da gúcale gala xide, ne si'le da cu'ule xiaj laule chee xelé'ele. ¹⁹ Neda' dxusízreda', ne dxudéa' xel-la' zi' xúgutē benne' ca' nazrí'ida'. Chee le na' dxal-la' xexíaje lázrele ne gunle zrin chia' du lázrele. ²⁰ Le na' xque. Neda' zea' dxa xu'u dxennia'. Che nu benne' xenne' chí'a, ne salje' xu'u, na' chu'a gágulēna' le', na' le' gágulēne' neda'. ²¹ Benne' ca' xeledxúaje' chawe' lawe' da zrinnaj, neda' gunézruja' le' lataj xelebé'leñe' neda' naga dxenná be'a, ca neda' bedxúaja' chawe', ne dxé'leña' Xra' naga dxenná bea Le'. ²² Benne' zua nague' dxal-la' xenne' da nigá dxē Be' Lá'azxa bi chia' ca'.

4

Dxulucá'ana szrene' Dios lu xabáa

¹ Ca gudé na' gunná'a, na' ble'eda' tu dxa xu'u da naxalaj na xabáa, na' benda' chí'i Bénnea' benda' chee' nédxutē da naca na ca chí'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te chee da nigá.

² Ca gunné' ca' guzúalē Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxē'e lataj blau na'. ³ Bénnea' dxē'e lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda.

⁴ Dxu'a lataj blau na' zaj zua tape dxua lataj naga zaj dxē' tape dxua benne' gula ca', zaj nacue' zra lanē' chiche, ne zaj zria xíchaje' da zaj naca na oro. ⁵ Lu lataj blau na' dxeledxúaj xesa,

ne dxaca nine, ne dxelenné guziu', na' lau lataj blau na' zaj zua gazre xi' dxelala na, da zaj naca na gazre Be' chee Dios. ⁶ Le na' lau lataj blau na' de ca tu nísadau' da naca na ca xiaj esa' xaní'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. ⁷ Benne' nedxu nalé'e ca tu bezre xixre', na' benne' gudxupe' nalé'e ca tu bezre, na' benne' guxunne' naca lawe' ca lau bénneache, na' benne' gudape' nalé'e ca tu bsia nachiluj xílaba'. ⁸ Dápatē benne' caní zaj zua xrupa xrile' tu tue', na' dxupa la'a le'e xrila benne' caní zaj zria zane' xiaj lawe'. Te zra ne chizrela quebe dxulusane' dxelenné':

Lá'azxa, lá'azxa, lá'azxa naca

Xránadxu Dios nape' dute xel-la' dxenná bea,

Bénnea' guzúaqueze', ne zúaqueze', ne tu súaqueze'.

⁹ Tu tu lasa gate dápatē benne' ban caní dxelegú'e ba Dios, ne dxulucá'ana szrené' Le', ne dxelé'e Le': Xcalenu', Bénnea' zúaqueze' chadía chacanna, ¹⁰ na' dape dxuate benne' gula ca' dxuluzú zribe' lau Le', ne dxulucá'ana szrené' Bénnea' zúaqueze' chadía chacanna, ne dxuluzúe' da ca' zaj zría xíchaje' ca' lau lataj blau na', dxelenné':

¹¹ Xránantu' Dios, Lue' naca chiu' si' lu na'u xel-la' szren, ne xel-la' ba lá'ana, ne xel-la' dxenná bea,

lawe' da benu' Lue' xúgute da de,

na' ca dxaca lazru' Lue' zaj zua na, ne gulá gulebinna na.

5

Tu xiche nadube, ne Bénnea' naque' Zríla'dau'

¹ Lu na' xabēla chee Dios, Bénnea' dxe'e lataj blau na', ble'eda' tu xiche nadube, da naxúaj dxupa la'ate na, na' nazriche na gazre da dxelunna bea na. ² Ble'eda' tu gubáz chee xabáa nápalé'e xel-la' waca, na' gunné' zizraj:

—¿Nuzra naca chee' chíluje' xiche na', ne cheze' da ca' dxelunna bea na?

³ Queba nu chilá' xabáa, ne lu xezr la xu, ne zranla xezr la xu naca chee' chíluje' xiche na', ne quebe nu gaca nne'e na chee' lé'ené' ca naca na. ⁴ Neda' gudxézreli'a lawe' da quebe nu chilá' benne' naca chee' chíluje' xiche na', ne gulabe' na, ne quebe gaca nne'e na. ⁵ Nadxa tu benne' ládujla benne' gula ca' guzre' neda':

—Québedxa cuezru' lawe' da ba bzrué'e Jesús, Bénnea' nazi' le' Bezre Xixre' chee xrtia Judá lawe' da nape' xel-la' dxenná bea zrente, ne naque' zri'ine zre sua David, na' Le' naca chee' chíluje' xiche na', ne cheze' da gazre ca' dxelunna bea na.

⁶ Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús,

Bénnea' naque' Zríla'dau' chee Dios. Ze'e na', lácala zrie' we' lawe' da belutie' Le'. Zria gazre lúzuba' ne gazre xiaj lauba', na' xiaj lauba' ca' zaj naca na gazre Be' chee Dios da ca' nase-la Dios du ca naca xezr la xu. ⁷ Bénnea' naque' Zríla'dau' guxíaje' guqué'e xiche na' lu na' xabela Bénnea' dxe'e lataj blau na'. ⁸ Ca guqué'e xiche na', na' tapa benne' ban ca', ne tape dxua benne' gula ca' buluzú zribe' lau Bénnea' naque' Zríla'dau'. Tu tu benne' gula ca' zaj nuxre' tu da dxelúl-lalene' da can zriadi'i na du, nazí le na árpa, ne zaj nu'e xé'ena bzri da naca na oro zaj xu'u na xala zixre, da zéaje na xel-la' dxuláwizra Dios da dxelún bi ca' chee Dios. ⁹ Dxelul-le' tu da cube caní:

Lue' naca chiu' ca'u xiche na',
 ne chezu' da ca' dxelunna bea na,
 lawe' da belutie' Lue', na' nen dxen chiu'
 bexa'u bénneache chee xelaque' chee Dios,
 Zaj naque' benne' xúgute cue' bénneache,
 ne dxelenné' xúgute dizra' walazre',
 ne zaj naque' benne' xúgute xezre
 ne xúgute cue' xezr la xu.

¹⁰ Benu' le' benne' wenná bea ca',
 ne bxruze ca' lau Dios cheedxu,
 na' xelenná be'e lu xezr la xu.

¹¹ Nadxa gunná'a, na' benda' chi'i zane' gubáz ca' chee xabáa zaj naxéchaje' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', ¹² na' dxelenné' zizraj:

Bénnea' naque' Zríla'dau' belutie',
 naca chee' si'e xel-la' dxenná bea, ne xel-la' gunnía,
 ne xel-la' sina, ne xel-la' waca,
 ne xel-la' ba lánana, ne xel-la' szren,
 ne xel-la' dxue lánana.

¹³ Cá'aqueze benda' dxelenná xúgute da ca' ben Dios, da ca' zaj zra' xabáa, ne da ca' zaj zra' xezr la xu, ne da ca' zaj zra' lu nísadau', ne xúgute da ca' zaj nita xúgute lataj ca', dxelenná na: Xel-la' dxue lánana, ne xel-la' ba lánana, ne xel-la' szren, ne xel-la' dxenná bea zaj naca na chee Bénnea' dxe'e lataj blau na', ne chee bénnea' naque' Zríla'dau', gaxúane gaxúane iza.

¹⁴ Dápaté benne' ban ca' gulenné':

—¡Ca'an gaca na!

Na' dape dxuate benne' gula ca' buluzú zribe', ne bulucá'ana szrene' Bénnea' naca bane' gaxúane gaxúane iza.

6

Dxecheze' xrupa da gazre ca' da dxelunna bea na

¹ Nadxa ble'eda' gate Bénnea' naque' Zríla'dau' gucheze' da nedxu da gazre ca' dxelunna bea na. Na' benda' dxenná tu benne' tapa ca' zaj naca bane', na' chi'e ben na ca guziu', dxenné':

—Gudá, le'enu'.

² Gunná'a, na' ble'eda' tu bzrina' chiche, na' benne' zrie'-ba' nuxre' tu da dxedxú'una na xágadau' nalá xéche'ze. Bulunézruje' le' tu da naquen oro da guzúe' xíchaje', na' nen dute xel-la' dxenná bea bdxuaje' chee zrué'ene' lu wedil-la.

³ Gate Bénnea' naque' Zríla'dau' gucheze' da gudxupe' da dxunna bea na, na' benda' benne' gudxupe' chee benne' tapa ca' zaj naca bane', dxenné':

—Gudá, le'enu'.

⁴ Na' bdxuaj xetú bzrina', nácaba' be xrna, na' bénnea' zrie'-ba' guzi'e xel-la' dxenná bea chee cue' xel-la' dxebeza zri lazre' lu xezr la xu, ne chee guné' xelute bénneache ljwezre' ca', na' bulunézruje' le' tu xia tunna da nalá.

⁵ Gate Bénnea' naque' Zríla'dau' gucheze' da guxunne' da dxunna bea na, na' benda' benne' guxunne' chee benne' tapa ca' zaj naca bane', gunné':

—Gudá, le'enu'.

Gunná'a, ne ble'eda' tu bzrina' gasaj, na' benne' zrie'-ba' nuxre' zrgú'unsá. ⁶ Benda' tu chi'i dxenné na ládujla tapa benne' ban ca', gunná na:

—Chupa xia zrua' xtila saca na lazruj chee tu zra, ne xrupa xia zrua' cebada saca na lazruj chee tu zra, san quebe cu' za xel-la' wagu, ne quebe cu' xrise uva wal-la.

⁷ Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee benne' ban ca', gunné':

—Gudá, le'enu'.

⁸ Gunná'a, ne ble'eda' tu bzrina' gache, na' benne' zrie'-ba' le' Xel-la' Gute, na' cuzru bénnea' za tu benne' ze'e waláz chee lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee gutie' tu cue' chee tapa cue' ca naca bénneache zaj zre'e xezr la xu. Gutie' benne' ca' lu wedil-la, ne lu xel-la' dxedún, ne lu xízrawe' ca', ne lu na' be snia zaj zraba' lu xezr la xu.

⁹ Gate Bénnea' naque' Zríla'dau' gucheze' da gázxue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da buluchálaje' dizra' chee Dios, ne belexechebe' ca naca chee'. ¹⁰ Bénne'du ca' gulú'u benne' ca' gulenné' zizraj:

—Xran lá'azxa, ne li lazre', ¿xeajáté chenu' chee guchi'u cheentu', ne xebéaj lazru' benne' ca' belutie' netu', benne' ca' zaj zre'e lu xezr la xu?

¹¹ Nadxa bénne'du ca' gulú'u benne' ca' gulezí'e zra lané' chiche, na' guzre' le' xebeze' xetú chí'idau', cadxa cha benne' biche' ca' dxeluné' zrin chee Cristo, xelute bénneache le' ca' belutie' benne' ca'.

¹² Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le'e lu xezr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, ¹³ na' belaj zaj zria xabáa belexruij na lu xezr la xu, ca dxelexruij higo dxe'ene ca' gate dxácale'e be' dxunibe na xaga higo na'. ¹⁴ Xabáa benite na ca tu xiche da dxexedube, na' xúgute xi'a ca', ne xezr la xu ca' da zaj naxechaj nísadau' gulecuasa na naga zaj zua na. ¹⁵ Benne' wenná bea ca' zaj zre'e lu xezr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunnía ca', ne benne' xíchaje ca' chee benne' dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúaje' lu na' xrane' ca', ¹⁶ na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

¹⁷ Ba bzrin zra chee xel-la' zi' zren. ¿Núzraqueze sue le na?

7

Benne' Israel ca' gucá'a Dios

¹ Ca gudé chee da nigá, ble'eda' tapa gubáz chee xabáa zaj ze' dapa saca chee xezr la xu, na' zaj nuzague' be' da zá'aca na dapa saca, chee quebe bi be' gaca lu xezr la xu, ne lawe' nísadau', ne lawe' xaga ca'. ² Cá'aqueze ble'eda' xetú gubáz chee xabáa ze'e naga dxalaj gubizra, na' nuxre' da gunna bea na nu benne' naque' chee Dios ban. Gubáz nigá gunné' zizraj, dxe'e dápaté gubáz chee xabáa ca' bache zaj nazi'e xel-la' dxenná bea xuluzría xi'e xezr la xu, ne nísadau', gunné':

³ —Quebe guzría xile xezr la xu, ne nísadau', ne xaga ca', dxácaté quebe ne guchíchent'u luzrgá benne' ca' tu da gunna bea na zaj naque' chee Dios cheedxu.

⁴ Benda' cáтите zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lávela xúgute cue' benne' Israel.

⁵ Gulezriche luzrgue' da na':

Chazrinnu cue' benne' xrtia Judá, ne chazrinnu cue' benne' xrtia Rubén, ne chazrinnu cue' benne' xrtia Gad, ne

⁶ chazrinnu cue' benne' xrtia Aser, ne chazrinnu cue' benne' xrtia Neftalí, ne chazrinnu cue' benne' xrtia Manasés, ne

7 chazrinnu cue' benne' xrtia Simeón, ne
 chazrinnu cue' benne' xrtia Leví, ne
 chazrinnu cue' benne' xrtia Isacar, ne
 8 chazrinnu cue' benne' xrtia Zabulón, ne
 chazrinnu cue' benne' xrtia José, ne
 chazrinnu cue' benne' xrtia Benjamín.

Benne' zan zaj nacu zra lanë' chiche

9 Gudé na' gunná'a ne ble'eda' benne' zan cheë xúgutë cue'
 bénneache:

Benne' xúgutë cue' xëzr la xu,

ne benne' dxelenné' xúgutë dizra' walazre' cha cheë',

ne benne' xúgutë xëzre ca'.

Zaj zë' le na' naga zua lataj blau na', ne naga zë Bénnea' naque'
 Zríla'dau'. Benne' caní zaj nacue' zra lanë' chiche, ne zaj
 nuxrë' zina'. 10 Xúgutë' dxelenné' zizraj:

Xel-la' weselá za na lu na' Dios cheëdxu,

Bénnea' dxe'e' lataj blau,

ne lu na' Bénnea' naque' Zríla'dau'.

11 Xúgutë gubáz cheë xabáa ca' zaj zë' zaj naxéchajë' lataj blau
 na', ne naga zaj zra' benne' gula ca', ne tapa benne' ban ca', na'
 buluzú zribë' belíxrujtë lawë' zran ni'e, na' bulucá'ana szrenë'
 Dios. 12 Dxelenné':

¡Ca'an gaca na!

¡Xel-la' dxue lá'ana, ne da xabáa,

ne xel-la' sina, ne xel-la' dxezaca ba lazre',

ne xel-la' ba lá'ana, ne xel-la' dxenná bea,

ne xel-la' szren,

zaj naca na cheë Dios cheëdxu chadía chacanna!

¡Ca'an gaca na!

13 Nadxa tu benne' gula ca' bchëbë' neda':

—¿Nuzra benne' caní zaj nacue' zra lanë' chiche, ne gazra
 zesí'aque'?

14 Neda' gucha' lë':

—Xran, lue' nézqueznu'.

Lë' guzrë' neda':

—Benne' caní ba guledéë' lu xel-la' zi' zren na', na' benne'
 caní ba zaj nacue' zra lanë' chiche lawë' da Bénnea' naque'
 Zríla'dau' ba gudibë' xichaj lázrdawë' nen dxen cheë'. 15 Cheë lë'
 na' zaj zrë'e dxu'a lataj blau naga dxe' Dios, ne dxelúe lá'anë'
 Lë' te zra ne chizrela lu xudau' cheë', na' Bénnea' dxe'e' lataj
 blau na' guxúequeze' benne' ca', ne súaletecaze' lë'. 16 Québedxa
 xeledunë' ne québedxa xelebilenë', ne québedxa guzezze gu-
 bizra benne' ca', ne québedxa xeléquene' da la, 17 lawë' da zua
 Bénnea' naque' Zríla'dau' cuita lataj blau na', na' guxúë' benne'
 ca' ca dxun benne' dxuxúë' zríla' ca', ne chë'e benne' ca' naga

dxelalaj nisa da dxunna na xel-la' nabán, na' Diósqueze tu súalezqueze' benne' ca' chee québedxa xelebezre'.

8

Dxecheze' da gazre da ca' dxelunna bea na

¹ Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxé' zri xabáa tu chi'i zréneze. ²Nadxa ble'eda' gazre gubáz chee xabáa ca' zaj ze' lau Dios, na' bulunézruje' gubáz chee xabáa ca' gazre luzu da xulucuezre'. ³Gudé na' bla' xetú gubáz chee xabáa nuxre' tu xé'ena bzri da naca na oro ne guzé' dxu'a cugu, na' bulunézruje' e le' xala zixre chee guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' chee Dios. Bzue' na lu cugu naca na oro, da zua na lau lataj blau na'. ⁴Zren chee xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' chee Dios. ⁵Nadxa tu gubáz chee xabáa guqué'e xé'ena bzri na', na' bzre'e na xi' da guqué'e lu cugu na', na' gudxú'ne' xi' na' lu xezr la xu, na' gulenné guziu', ne gulénínele'e, ne gulépele'e xesa, ne guzrú' xezr la xu.

Dxuluchine gubáz ca' da dxulucuezre'

⁶Nadxa gázrete gubáz chee xabáa ca' zaj nuxre' gazre luzu da dxulucuezre' gulezé chawe' xuluchínene' na.

⁷Gubáz nedxu na' bchínene' da dxucuezre', na' gulinnaj xiaj bezxe', ne xi' da zaj nachixre na dxen da belexruj na lu xezr la xu. Xáteze quebe bedú gachaj xezr la xu guzezxe na late weaj du ca naca lu xezr la xu. Xáteze quebe gudache gáchajte xaga ca' zaj ze' lu xezr la xu gulezxe na, ne cá'anqueze guca chee xixre' xa'a ca'.

⁸Gubáz chee xabáa gudxupe' bchínene' da dxucuezre', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajte nísadau' na' bexaca na dxen. ⁹Xáteze quebe guca gáchajte bea zaj zraba' lu nísadau' guláteba', na' xáteze quebe guca gáchajte da ca' dxeledán lawe' nísadau' gulebía xi na.

¹⁰Gubáz chee xabáa guxunne' bchínene' da dxucuezre', na' bexruj tu belaj zrente zran xabáa, da dxala na ca tu xi' xedxe. Naga bexruj na, xáteze quebe gudache gáchajte xegu ca', ne beaj ca' gulebía xi na. ¹¹Belaj na' le' na Ajenjo, da zéaje na da naca na sla', na' xáteze quebe guca gáchajte nisa da de' lu xezr la xu bexaca na ajenjo, na' benne' zante gulatíe' ne chee nisa na' lawe' da bexaca na sla'.

¹²Gubáz chee xabáa gudape' bchínene' da dxucuezre', na' xáteze quebe bedú gachaj xel-la' naxaní' chee gubizra, ne xel-la' naxaní' chee beu', ne xel-la' naxaní' chee belaj ca' belexaca

na chul-la, na' quebe bulusení na du lazre' xáteze quebe guca gachaj zra, ne cá'anqueze che zrela.

¹³ Nadxa gunná'a, ne benda' chi'i tu gubáz chee xabáa dxedé' lu be', dxenné' zizraj:

—Edxugua bénneache zaj zra' xezr la xu gate xebebre luzu da xuluchine xechunna gubáz chee xabáa ca'.

9

¹ Gubáz chee xabáa gázxue bchínene' da dxucuezre', na' ble'eda' tu benne' naque' ca tu belaj bexruj na lu xezr la xu, na' bulunézruje' le' zren xia chee lataj chul-la chee benne' gate ca'.

² Gusálaje' lataj chul-la na', na' lu'u'le na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. ³ Lu zren na' beledxúaj biche zu.

Guledaba' du ca naca xezr la xu, na' biche zu ca' guleziba' lataj xeláduba' bénneache ca da dxelún bexrujni. ⁴ Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bénneache quebe nazriche luzrgue' da dxunna bea na benne' ca' zaj naque' chee Dios. ⁵ Quebe zaj naziba' lataj xelúteba' bénneache, san xuludézeba' bénneache ba xa' lawe' gazxu' beu', na' xel-la' dxelá chee naga dxeláduba' naca na ca naca da dxun bexrujni, be dxelúteba' bénneache.

⁶ Lu zra ca' xelaca lazre' bénneache xelexute cuine', ne quebe xelezéqueñe'. Xelaca lazre' xelatie' ne quebe xelatie'.

⁷ Biche zu ca' zaj nácaba' ca bzrina' ca' ba zaj nabézaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bénneache. ⁸ Xicha xíchajba' zaj naca na ca xicha xichaj nu'ula ca', na' lázxabá' zaj naca na ca lazxa bezre xixre'. ⁹ Lachu'uba' xu'u na ca zraba' xia, na' xrílabá' dxeleninne na ca dxeleninne da dxelecá'a bzrina' ca' zjaca chéguba' lu wedil-la. ¹⁰ Zaj zua xrbánba' ca xrbán bexrujni, zaj zua na liba'. Zaj nazi'ba' lataj xeláduba' bénneache lawe' gazxu' beu'. ¹¹ Zua tu xrane biche zu ca' naca gubáz chee lataj chul-la, ne le na Abadón nen dizra' hebreo, ne nen dizra' griego le na Apolión, da zéaje na da dxuzría xi na.

¹² Caní guca da nedxu da ba xa' da xeledé bénneache, na' da' zí'aca xechupan ca'.

¹³ Nadxa gubáz chee xabáa xrupe bchínene' da dxucuezre', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. ¹⁴ Chi'i na' guzre na gubáz chee xabáa xrupe na' nuxre' luzu da dxucuezre':

—Bsan dápaté gubáz ca' zaj nadxéaje' dxu'a xegu zren le na Eufrates.

¹⁵ Ca' guca na, na' gulelá gubáz ca' chee xelutie' xáteze ca gaca gáchajte bénneache lawe' da ba zaj nabeza gubáz ca' chee

zra na', ne beu' na', ne iza na'. ¹⁶ Benda' cáтите zaj naca benne' dxjaca wedil-la ca' zaj zrie' bzrina' zralene' gubáz ca'. Zaj naque' chupa cue' gaxua da zaj naca gaxúane gaxúane.

¹⁷ Lu da ble'e Dios neda' ble'eda' ca' zaj naca bzrina' ca', ne ca' zaj naca benne' dxjaca wedil-la ca' zaj zrie'-ba'. Zaj xu' u lachu'e zre' xrna da naca na xia, ne da nalá' ca' zran xabáa, ne da gache. Xichaj bzrina' ca' zaj naca na ca' xichaj bezre xixre', na' dxú'aba' ca' beledxúaj xi', ne zren, ne tu da gache da dxuzézxelē'e na. ¹⁸ Xáteze quebe gudache gáchajte bēneache gulatīe' lu da ca' beledxúaj na dxu'a bzrina' ca', xi', ne zren, ne da gache na'. ¹⁹ Xel-la' snia chee bzrina' ca' zua na dxú'aba', ne xrbamba' lawe' da zaj naca xrbamba' ca' bela' ca' zaj zua xíchajba', na' nen da ca' dxuluzría xiba' bēneache.

²⁰ Benne' ca' xezica, benne' quebe belúteba', belúnqueze' da zrinnaj ca' da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xelélé'e na, ne quebe dxaca xelén na, ne quebe dxaca si'aca na. ²¹ Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

10

Tu gubáz chee xabáa nuxre' tu xíchedau' nazriluj na

¹ Nadxa ble'eda' xetú gubáz chee xabáa nápalē'e xel-la' dxenná bea. Bétaje' xabáa, xu'e tu lu beuj, ne zua tu bchita' xíchajē'. Dxu'a lawe' dxácátite na ca' gubizra, na' ni'e zaj naca na ca' xi'. ² Nuxre' tu xíchedau' da nazriluj na, na' bzue' ni'e zua xabēla lawe' nísadau', ne ni'e zua xéglala lawe' xēzr la xu bizre. ³ Nadxa gudxezre xē'e ca' dxun bezre xixre' dxebezre xa'aba', na' ca' gudxezre xē'e gulenné gazre guziu'. ⁴ Ca' gudé gulenné gazre guziu' ca', ba zúate guzúaja', na' benda' tu chí'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

⁵ Nadxa gubáz chee xabáa na' ble'eda' ze' lawe' nísadau', ne lawe' xēzr la xu bizre guchisa ne'e da zua xabēla zran xabáa, ⁶ na' bzétaje' La Bénnea' zue' chadía chacanna, ne bēne' xabáa, ne xēzr la xu, ne nísadau', ne xúgutē da zaj de' lawe' da ca' bēne', na' gunné':

—Québedxa che na, ⁷ lawe' da gate su lau gubáz chee xabáa gazre guchínene' luzu da xulucuezre', ba guca li ca' naca da nun Dios dxal-la' gaca ca' bzenne' benne' wen zrin chee' ca', benne' gulenné waláz chee'.

⁸ Ca' naca chí'e da benda', da za xabáa, bchálajlene' neda' xetú, gunné':

—Guxíaj xeajcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

⁹Nadxa guxá'a lau gubáz chee xabáa na', na' gunaba' gunne' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzrína'dau', na' lu le'u xexaca na da sla'.

¹⁰Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzrína'dau'. Ca gudé gudawa' na, bexaca na sla' lu le'a. ¹¹Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

11

Chupa benne' dxelexechebe'

¹Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee Dios ne lu cugu, na' blaba bal-la benne' zaj zre'e na' dxulucá'ana szrene' Dios. ²Quebe gudxixru' chale'aj chee xudau' na' lawe' da ba gudé na lu na' benne' zitu' ca', na' benne' ca' xululájaje' xezre lá'azxa lawe' chupe xun beu'. ³Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa ga xun zra.

⁴Benne' chupa caní zaj naque' ca chupa xaga olivo ca', ne ca zaj naca chupa da zaj zuan xi', da ca' zaj zua na lau Dios, Xrane xezr la xu. ⁵Che nu benne' dxaca lazre' guzría xi'e benne' caní, na' le' xululube' xi' da dxuaj lu dxu'e ca', na' guzézxete na benne' ca' dxeledábague' le'. Caní gate núteteze benne' tábague' benne' chupa caní. ⁶Benne' chupa caní zaj nape' xel-la' dxenná bea xeluné' ga quebe gaca xiuj dxácaté na' dxelenné' waláz chee Dios. Cá'anqueze zaj nape' xel-la' dxenná bea xeluné' xaca nisa dxen, ne chee xulusaca zi'e bènneache nen xúguté xízrawe' ca', bátatezla dxelaca lazre'. ⁷Gate bache belexuzre beluné' zrin chee', na' be' xixre' snia, be' dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. ⁸Bela' dxen gate chee benne' caní xelexegá'ana na la neza chee xezre zrentau' naga gudá' Xránadxu xaga begúaj, ne ca dxutil-la Dios lebe, le na Sodoma, ne Egipto. ⁹Lawe' chunna zra xugachaj, bènneache chee xúguté cue' benne', ne benne' xezre ca', ne benne' zra du gabí'i xezr la xu, ne benne' dxelenné' dizra' walazre' cha chee' xelexé'ene' bela' dxen gate chee benne' caní, ne quebe xelu'e lataj nu benne' gucache' le'. ¹⁰Benne' zaj zre'e lu xezr la xu xelexe' lawe'

da zaj nate benne' caní, na' xelexezaca ba lázrele'e, ne xelesel-le' da xulunezruj ljwezre' tuę' xetuę' lawe' da bulusaca zi' benne' caní gulenné' waláz cheę Dios bėnneache ca'. ¹¹ Gate guca chunna zra xugachaj, na' Dios bsebanę' benne' caní, na' belexase', na' xúgute benne' ca' belelé'ene' le' belezrébele'e. ¹² Nadxa dxúpatę benne' ca' dxelexechebe belennę' chi'i tu benne' dxenné' zizraj xabáa, dxę'e benne' ca':

—Le xegüén nigá.

Na' belexegüene', na' belelé'e benne' ca' dxeledábague' le' ca' guca. ¹³ Ca'an gúcate guzrú'le'e xęzr la xu, na' xu'u zaj nita na lu xęzre na' gulebía xi na, na' gulate gazre cue' da nacan chi gaxúa bėnneache weaj ne cheę da guzrú'. Benne' ca', benne' quebe gulate lu xęzre na', nen dutę xel-la' dxelezrebe belúe lá'ane' Dios zuę' xabáa.

¹⁴ Ba gudé da gudxupe' da ba xa' da xeledé bėnneache, na' la za'tę da guxunne'.

Gubáz gazre dxuchínene' da dxucuezre'

¹⁵ Gubáz gazre bchínene' da dxucuezre', na' ben chi'i benne' zan xabáa dxelenné' zizraj:

Naga dxelenná bea bėnneache lu xęzr la xu ba guledé na lu na' Xránadxu Dios, ne lu na' Cristo cheę', na' Le' nna be'ene' lataj ca' chadía chacanna.

¹⁶ Nadxa tape dxua benne' gula ca' zaj dxę'e dxu'a lataj blau naga dxę' Dios buluzú zribe' zaj nuzuate lawe' zran ni'e, dxulucá'ana szrene' Dios, ¹⁷ dxelenné': Xcalenu', Xran.

Dios, napu' dutę xel-la' dxenná bea.

Guzúaquezu', ne zúaquezu', ne tu súazquezu', lawe' da ba guzi'u xel-la' dxenná bea zrentę chiu', ne ba guzú lau' dxenná be'u.

¹⁸ Bėnneache xúgute xęzre ca' dxelezré'e san ba bzrin zra gudéu' benne' ca' ba xa', zra na' guchi'u cheę benne' gate ca'.

Xunézruju' da naca cheę benne' ca' gulenné' waláz chiu', ne da naca cheę benne' ca' zaj naque' chiu', ne da naca cheę benne' ca' belunę' Lue' ba lá'ana, benne' blau ca', ne benne' quebe nu zaj naca.

Ba bzrin zra guzría xi'u benne' ca' buluzría xi'e xęzr la xu.

¹⁹ Nadxa bxfalaj xudau' cheę Dios da zua xabáa, na' ble'e lau xi'ina naga xu'u xel-la' wezría xrlátaje cheę', da zua na lu xudau' na'. Gulepe xesa, ne guleninne na, ne gulenné guziu', ne guzrú' xęzr la xu, na' bxínnajle'e xiaj bezxe'.

12

Tu nu'ula ne bę snia schanni' zrentę

¹ Nadxa ble'e lau tu da zrentę xabáa. Zua tu nu'ula naca zra lanę' ca gubizra, na' zran ni'e zua da naca ca beu', na' xíchaję' zria tu da zaca zaj zria na chazrinnu belaj. ² Nu'ula nigá zuę' zi'i, ne dxebezre xę'e xel-la' dxudi'a sanę' tu bidau', dxedęle'e xel-la' zi' cheę galaj bidu na'. ³ Nadxa ble'e lau xabáa xetú da zrentę, zua tu bę snia schanni', bę xrna, zua gazre xíchajba' ne chi lúzuba', na' zria tu da zaca tu tu xíchajba' ca'. ⁴ Nen xrbanba' gucá'a dxęguba' xáteze quebe guca gáchajte belaj zaj zria zran xabáa, na' bzálaba' na lu xęzr la xu. Bę snia schanni' na' guzęba' lau nu'ula na' sanę' bidau' cheę gáguba' bidu na' gate ze gálajbe'. ⁵ Nu'ula na' guzane' tu bi biudau', bi na' nna be'ebe' dute xęzr la xu nen tu var xia. Nadxa bi biu cheę nu'ula na' gucá'a Dios lębe', na' bexu'e-be' lataj blau cheę' naga dxe'e. ⁶ Na' nu'ula na' bzurúnnuję' zéaję' lę'e xixre' lawe' lataj naga nucueza Dios tu lataj naga sua nu'ula na', naga xulugawę' lę' lawe' chazrinnu gaxúa ga xun zra.

⁷ Gudę na' guxú'u wedil-la xabáa gate gubáz cheę xabáa blau lę' Miguel nen gubáz cheę xabáa zaj da' lę' guledíl-lalene' bę snia schanni' zrentę. Bę snia schanni' na', ne gubáz zaj dę'e-ba' belunę' wedil-la. ⁸ Quebe bi gulezéquene' lu wedil-la na', na' québedxa guta' lataj cheę gubáz ca' lu xabáa. ⁹ Ca'an guca gulebéaję' bę snia schanni' na' xabáa, bę snia na' zúaba' nédxute, na' nazí laba' da xriwę', ne Satanás, da na' dxezi xę na xúgute bénneache. Da xriwę' na', ne gubáz ca' zaj dę'e na guledxú'une' na lu xęzr la xu.

¹⁰ Nadxa benda' tu chi'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea cheę Dios cheędxu, ne xel-la' dxenná bea cheę Cristo cheę', lawe' da ba guledxú'une' da na' gudagu zria na cheę benne' bíchedxu, da na' dxagu zria na cheę benne' ca' te zra, ne chizrela lau Dios cheędxu. ¹¹ Benne' bíchedxu ca' beledxúaję' chawe' ne cheę dxen cheę Bénnea' naque' Zríla'dau', ne ne cheę da belexechebe' ca naca cheę dizra' cheę Cristo, ne quebe belezrebe' nu benne' gutię' lę'. ¹² Cheę lę na' gata' xel-la' dxebé xabáa.

¡Le be le'e zrale xabáa!

¡Edxugua benne' ca' zaj zre'e xęzr la xu, ne lawe' nísadau' lawe' da ba bla' da xriwę' naga zúale, dute xel-la' dxezrá'a cheę na, lawe' da neze na xáte'ga ne dę cheę na!

¹³ Gate guque be'e da xriwę' ba buluzalę' na lu xęzr la xu, na' gudxé' nau na nu'ula na' guzane' bi biudu na'. ¹⁴ Nu'ula na' bulunézruję' lę' chupa xriľę' zren ca xrila bsia cheę gaca xexiaję' xezue' lę'e xixre' lawe' lataj, zitu' naga zua bę snia schanni' na', na' bulugawę' lę' lawe' chun iza xugachaj. ¹⁵ Bę snia schanni' na' bexébeba' nisa cheę benba' tu xęgu cheę gua

na nu'ula na'. ¹⁶ Gúcalę xęzr la xu nu'ula na'. Bzra xęzr la xu, na' gudębe na xęgu na' bexębe bę snia schanni' na'. ¹⁷ Cheę lę na' bzrá'lę'e da xriwę' nu'ula na', na' guxíaj na xeajtíl-lalę na xrtia nu'ula na' zaj zrę'e xęzr la xu, benne' ca' dxuluzúe' dizra' da bdxixruj be'e Dios, ne dxelexechebę' ca naca cheę Jesucristo.

13

Chupa bę xixre' snia ca'

¹ Nadxa guzėja' dxu'a nísadau', ne ble'eda' bdxuaj tu bę xixre' snia lu nísadau' na', zua gazre xíchajba', ne chi lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. ² Bę xixre' snia nigá nácaba' ca tu bęzrtau', na' ní'aba' zaj naca na wal-la ca ni'a oso, na' dxú'aba' naca na ca dxu'a bęzre xixre'. Bę snia schanni' bnézrujba' xel-la' dxenná bea cheęba', ne lataj blau cheęba', ne xel-la' waca cheęba' lu na' bę snia na' nácaba' ca bęzrtau'. ³ Zua tu wę' tu xichaj bę xixre' snia na' nácaba' ca bęzrtau' da gute na lęba', na' wę' na' bexaca na, na' ca naca bęnneache ca' zaj zrę'e lu xęzr la xu belexebánele'ęne', ne zjácáleęe' bę xixre' snia na'. ⁴ Bulucá'ana szrenę' bę snia schanni' na' lawe' da bnézrujba' xel-la' dxenná bea cheę bę xixre' na' nácaba' ca bęzrtau', ne cá'anqueze bulucá'ana szrenę' bę xixre' snia na', dxelenné':

—¿Núzraqeze naca ca bę xixre' nigá, ne nu seque' tíl-lalę lęba'?

⁵ Nadxa da xriwę' bę na lęba' lataj gunnęba' dizra' zri'a, na' gunnęba' da calęla cheę Dios, ne gudápaba' xel-la' dxenná bea lawe' chupe xun beu'. ⁶ Gunnęba' da calęla cheę Dios, ne cheę La Dios, ne cheę lataj lá'azxa cheę', ne cheę benne' ca' zaj zrę'e xabáa. ⁷ Cá'anqueze guziba' xel-la' dxenná bea tíl-lalęba' benne' ca' zaj naque' cheę Dios, ne gútetęba' benne' ca', na' guziba' xel-la' dxenná bea lu xúgute cue' bęnneache, ne benne' zaj zrę'e xúgute xęzre ca', ne xúgute cue' xęzr la xu ca', ne benne' dxelenné' dizra' walazre' cha cheę'. ⁸ Xúgute benne' zaj zrę'e xęzr la xu bulucá'ana szrenę' bę xixre' snia na', benne' ca' quebe zaj naxúaj lę' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bęnnea' naque' Zríla'dau' belutię'-ba'.

⁹ Che nu benne' zua nague', dxal-la' xenne' dizra' nigá. ¹⁰ Benne' ca' dxelegú'e bęnneache lizre xia, cá'anqueze xelú'u benne' ca' lizre xia, na' benne' ca' dxelutię' benne' nen xia nalá, cá'anqueze xelatię' lu xia nalá. Cheę lę na' benne' zaj naque' cheę Dios dxal-la' xelaque' zren lazre', ne xelėjle'e cheę Dios.

¹¹ Gudé na' ble'eda' xetú be xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zrila'. Bea nigá gunneba' ca be snia schanni' na'. ¹² Bea nigá nápaba' dute xel-la' dxenná bea da napa be nedxu na', gate zúaba' lau be nedxu na', na' gunná be'eba' ca naca bènneache zaj zre'e dute xezr la xu xulucá'ana szrene' be nedxu na', bea na' bexaca we' cheeba' da na' naca gute leba'. ¹³ Be gudxupe' na' benba' xel-la' waca zri'a ca', ne benba' bexruj xi' zran xabáa lu xezr la xu lau bènneache ca'. ¹⁴ Ne chee xel-la' waca ca' da benba' lau be nedxu na', guzı xeba' benne' zaj zre'e xezr la xu, na' gunná be'eba' benne' ca' xelune' tu bedau' ca naca be nedxu na', bea na' guzúa we' chee xia nalá, na' naca bánquezeba'. ¹⁵ Be gudxupe' na' guziba' xel-la' dxenná bea gunézrujba' xel-la' nabán bedau' na' naca na ca be nedxu na', chee nne bedau' na', ne gute na xúgute benne' quebe xulucá'ana szrene' na. ¹⁶ Cá'anqueze bedau' na' gunná be'e na zriche tu da gunna bea na luzrgá u lu na' zua xabela chee xúgute bènneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zre'e cá'aze. ¹⁷ Netú benne' quebe gaca ga'uwe' ne gutie' che quebe zriche da na' dxunna bea na le', u la be xixre' snia na', u xrbaba ca naca laba'. ¹⁸ Nu benne' gulabe' da nigá dxal-la' gaque' sina. Benne' dxéajni'ine' waca gulabe' ca naca xrbaba chee laba'. Naca na tuze ca naca xrbaba chee bènneache, na' xrbaba nigá naca na xrupa gaxúa ga xun xrupa.

14

Da dxelul-la tu gaxúa tape xun cue' chi gaxúa weaj benne'

¹ Gudé na' gunná'a, na' ble'eda' Bénnea' naque' Zríla'dau' ze' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bénnea' naque' Zríla'dau', ne La Xre'. ² Nadxa benda' tu da dxeninne na da za' xabáa, da dxeninne na ca schaga' da dxelún zánete xegu ca', ne ca schaga' da dxun guziu' gate dxennéle'e na, ne ca dxeninne naga zaj zra' zánete benne' dxelínnie' da ca' cun zríadi'i na du. ³ Belul-le' tu da cube dxu'a lataj blau naga dxe' Dios, ne lau tapa benne' ca' zaj zua nabancze', ne lau tape dxua benne' gula ca'. Netú benne' xezica quebe guca gul-le' ca naca da na' belul-le'. Dxaca dxelul-le na benne' tu gaxúa tape xun cue' chi gaxúa weaj, benne' ca' gulelé' lávela benne' zaj zre'e xezr la xu. ⁴ Benne' canı quebe gulezúalene' nu'ula chee benne' xula, san belexegá'ana chawe', na' zjácálene' Bénnea' naque' Zríla'dau' gáteteze zéaje'. Benne' canı gulelé' lávela bènneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'. ⁵ Cabata'

dxelún lazre', na' zaj naque' du lazre' dxu'a lataj blau naga dxe' Dios.

Dizra' da dxuluzén chunna gubáz chee xabáa bénneache

⁶ Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bénneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'. ⁷ Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzin zra guchi'a Le' chee bénneache. Le gucá'ana szren Bénnea' bene' xabáa, ne xezr la xu, ne nísadau', ne beaj ca'.

⁸ Xetú gubáz chee xabáa zéaje' cuzru gubáz chee xabáa nedxu na', dxenné':

—¡Ba guzría xi! ¡Ba guzría xi' xezre Babilonia, xezre zren na', lawe' da buluszre' benne' xezre ca', ne benne' dute xezr la xu nen da naca ca xrise uva wal-la chee da sban da dxelune'!

⁹ Xetú gubáz chee xabáa zéaje' cuzru gubáz chupa ca', dxenné' zizraj:

—¡Che nu benne' dxucá'ana szrene' be snia na', ne bedau' cheeba', ne gu'e lataj zriche luzrgue' u ne'e laba', ¹⁰ benne' nigá téé' lu da ba xa' da nucueza Dios lu xel-la' dxezra'a chee', na' saca zi'e lu xi' chee da dxuzéxze'e na lau gubáz chee xabáa ca' chee Dios, ne lau Bénnea' naque' Zríla'dau'! ¹¹ ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrene' be snia na', ne bedau' cheeba', ne dxelu'e lataj zriche laba' luzrgue'! ¹² ¡Chee le na', benne' ca' zaj naque' chee Dios, ne dxuluzúe' dizra' ca nadxixruj be'ene', ne zjácálene' da naca chee Jesús, dxal-la' xelaque' zren lazre'!

¹³ Nadxa benda' chi'i tu benne' da za xabáa. Dxe'e neda':

—Bzuaj da nigá: Na'a, ne lu da za za' ba neza zrente naca na chee benne' gate ca' xelute bénneache le' lawe' da dxelájlé'e chee Xránadxu. Be' Lá'azxa dxenné': “¡Ca' naca na, lawe' da xelexezi' lazre' ca naca lu zrin da belune', na' da xrlátaje da belune' zeajle na benne' ca'!”

Lina chee xezr la xu

¹⁴ Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bénneache. Zria tu da naca na oro xíchaje', ne nuxre' tu xia nalá. ¹⁵ Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bénnea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzin zra, na' lina chee xezr la xu ba guca na!

16 Nadxa b́ennea' dxe'e lawe' beuj na' gudine' xia nalá chee' na', na' bequ'e'e lina chee xezr la xu.

17 Nadxa xetú gubáz chee xabáa bdxuaje' xudau' da zua xabáa, nuxre' tu xia nalá. 18 Xetú gubáz chee xabáa bdxuaje' lu cugu, gubáz chee xabáa na' nape' xel-la' dxenná bea lu xi', na' gunné' zizraj. Dxe'e gubáz chee xabáa na' nuxre' xia nalá:

—¡Bchine xia nalá chiu' na', ne becá'a uva ca' da zaj den lu xezr la xu lawe' da ba güe na!

19 Na' gubáz chee xabáa na' gudine' xia nalá chee' lawe' xezr la xu, ne bequ'e'e uva ca' da zaj de lu xezr la xu da zéaje na benne' ca' dxeluné' da zrinnaj, na' bzre'e na naga xelesie' na, da na' zéaje na da ba xa' da nucueza Dios chee benne' ca' dxeluné' da zrinnaj. 20 Uva ca' gulesie' na naga dxedxuaj xezre, na' naga dxelesie' na bdxuaj dxen chee benne' ca' dxeluné' da zrinnaj da gulén na cáтите sibe zua dxu'a bzrina', na' guzá' dxen na' cáтите sadxu du gazre zra.

15

Gubáz chee xabáa ca' zaj nuxre' gazre da ba xa' da xuluzále' xezr la xu

1 Ble'eda' xabáa xetú da zrente da xebánedxu, belelá' gazre gubáz chee xabáa zaj nuxre' gazre da ba xa' bzebe, da zaj naca na naga cheajsete xel-la' dxezrá'a chee Dios.

2 Cá'aqueze ble'eda' tu da naca na ca nísadau' da naca na ca xiaj esa', ne nachixre na xi', na' benne' ca' quebe gulezí lu ne'e da naca na chee be snia na', ne da nacan chee bedau' cheeba', ne xrbaba chee laba', zaj ze' lu nísadau' na' da naca na ca xiaj esa', zaj nuxre' da ca' con zriadi'i na du da ba bnezruj Dios le'.

3 Dxelul-le' da bil-la Moisés, benne' wen zrin chee Dios, ne da dxul-la B́ennea' naque' Zríla'dau', da dxenná na:

Da zrente, ne da dxebánedxu zaj naca xúgute da ba benu' Lue'. Xran, nacu' Dios napu' dute xel-la' dxenná bea.

Xrlátaje, ne li lazre' zaj naca xrba chiu' Lue'.

Nacu' Wenná Bea chee dute xezr la xu.

4 ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelelá' benne' dute xezr la xu, na' xulucá'ana szrene' Lue', lawe' da ba belelé'ene' da xrlátaje da nunu'.

5 Gudé na' gunná'a ne ble'eda' bxfalaj xudau' da zua na xabáa, naga zua lataj naga zaj naxúaj da ca' bdxixruj be'e Dios. 6 Lu xudau' na' beledxúaj gazre gubáz chee xabáa ca' zaj nuxre' gazre da ba xa'. Zra lane' zaj nacie' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro. 7 Nadxa tu benne' laduj tapa benne'

zaj naca bánqueze' bnézruje' tu tu gubáz gazre ca' tu xé'ena bzri da naca na oro, ne zaj nazrate' na da ba xa' da nucueza Dios, Bénnea' zue' chadía chacanna. ⁸ Guzrate' xudau' na' nen zren chee' xi' da dxulé'e na ca zaj naca xel-la' szren, ne xel-la' dxenná bea chee' Dios, na' netú benne' quebe guca chu'e ga na' cadxa gudé chee' da gazre da ba xa' ca' da zaj nuxru gazre gubáz chee' xabáa ca'.

16

Da gazre da ba xa' ca'

¹ Nadxa benda' chi'i tu benne' gunné' zizraj lu xudau'. Dxe'e gazre gubáz chee' xabáa ca':

—Le chjaca, le cheajzala da ba xa' ca' lu xezr la xu, da ca' nucueza Dios.

² Na' guxéaj gubáz chee' xabáa nedxu, xeajlatje' xé'ena bzri chee' lawe' xezr la xu, na' xúgute' bénneache, benne' zaj nazriche luzrgue' la be snia na', ne dxulucá'ana szrene' bedau' cheeba', gulebía we' lu be'la' dxen chee' benne' ca' da gulále'e na.

³ Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee' benne' gate, na' gulate xúgute' bea zaj naca banba' lu nísadau' na'.

⁴ Gubáz guxunne' xeajlatje' xé'ena bzri chee' lu xegu nisa ca', ne lu beaj ca', na' belexaca na dxen. ⁵ Na' benda' chi'i tu gubáz chee' xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee' benne' ca' guca caní, ⁶ lawe' da bululalje' dxen chee' benne' chiu' ca', ne chee' benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

⁷ Cá'anqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' duté xel-la' dxenná bea. Ba bchi'u chee' bénneache ca' ca naca da li, ne da xrlátaje.

⁸ Gubáz gudape' xeajlatje' xé'ena bzri chee' lau gubizra, na' gubizra guzí na lataj guzezxe na bénneache ca' nen xi' chee' na.

⁹ Xúgute' bénneache gulézxelé'e, ne quebe belexebi'i lazre', ne quebe belúe lá'ane' Dios, san gulenné' da cale'la chee' Bénnea' nucueze' da ba xa' na'.

¹⁰ Gubáz gázxue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', ¹¹ ne quebe bulusane' da zrinnaj da dxelune'. Gulenné' da cale'la chee' Dios zue' xabáa, lawe' da dxelezaque' caní ne chee' we' da zaj zria be'la' dxen chee' ca'.

¹² Gubáz xrupe xeajlatje' xé'ena bzri chee' lawe' xegu zren le na Eufrates, na' nisa xegu na' bebizre na, chee' xalaj tu neza

naga xeledé benne' dxjaca wedil-la chee benne' wenná bea ca' zá'aque' naga dxalaj gubizra.

¹³ Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'. ¹⁴ Be' xriwe' caní belún na xel-la' waca zri'a ca', na' beledxúaj na chee xulutupa na xúgute benne' wenná bea chee xezr la xu, chee chjaque' lu wedil-la chee zra zren chee Dios, Bénnea' nape' duté xel-la' dxenná bea.

¹⁵ Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrente naca na chee bénnea' zue' ban lazre' ne nupé'e lázrdawe' ca tu benne' dxuxúe' zra lané' chee quebe te' gala xídeze, ne quebe xedué'ene' lau bénneache.

¹⁶ Nadxa beledube' benne' wenná bea ca' lu lataj naga le na Armagedón nen dizra' hebreo.

¹⁷ Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi'i benne' dxenné' zizraj, da za na lataj blau naga dxe' Dios, dxenné':

—Bache naca na.

¹⁸ Nadxa gulepe xesa, ne guleninne na, ne gulenné guziu', na' lu xezr la xu guzrú'le'e ca netú lasa quebe ne xru', na' gulálate zaj zra' bénneache lu xezr la xu. ¹⁹ Xezre zrentau' na' guzrá na chunna cue', na' xezre ca' zaj nita lu xezr la xu gulebía xi na, na' xeajsá lazre' Dios benne' ca' chee xezre zrentau' na' le na Babilonia chee xeledé' lu da ba xa' zren da nucueza Dios lu xel-la' dxezrá'a chee'. ²⁰ Xúgute xezr la xu ca' da naxechaj nísadau', ne xúgute xi'a ca' belexenite na. ²¹ Cá'anqueze belexruj zran xabáa xiaj bezxe' zri'a lawe' bénneache ca', da dxelá'a na ca tu gaxúa xia weaj, na' bénneache ca' gulenné' da calela chee Dios ne chee da ba xa' da gulezaque', lawe' da guca na tu da ba xa' zrente.

17

Dios dxuzría xi'e nu'ula dxúnle'e da sban

¹ Nadxa bla' tu gubáz chee gazre gubáz chee xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e lawe' nísadau' ca'.

² Benne' wenná bea ca' zaj zre'e xezr la xu dxelune' da sban nen nu'ula na', na' benne' zaj zre'e xezr la xu zaj naque' ca benne' dxelezuzre' lawe' da dxelune' da sban nen nu'ula na'.

³ Nadxa, lu da ble'e Be' Lá'azxa neda', gubáz chee xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrie' cuzru tu be xixre' schanni' xrna, na' zaj naxúaj lu be'la' dxen cheeba' laba' schanni' ca', da ca' dxecuide Dios, na'

zaj naca gazre xíchajba', ne chi lúzuba'. ⁴ Nu'ula nigá nacue' zra lané' bzawe, ne da xrna, na' lechítaję cheę' zaj naca na oro, ne xiaj xrtante, ne bga ca'. Nuxre' tu xé'ena bzri da naca na oro da nazrate na da sgute ca', ne da sban da dxune'. ⁵ Naxúaj luzrgue' ca le', da dxenná na: Babilonia, Xezre Szrentau', Xrna' Xúgute Nu'ula Ca' Dxelune' Da Sban, ne Xúgute Da Sgute Da De Xezr La Xu. ⁶ Nadxa ble'eda' nu'ula na' dxezúzrene' nen dxen cheę benne' ca' zaj naque' cheę Dios, ne cheę benne' ca' belute bėnneache le' lawe' da belexechebe' cheę Jesús. Gate ble'eda' da na', bebánele'ęda'. ⁷ Nadxa gubáz cheę xabáa na' guzre' neda':

—¿Bizr cheę na' dxebánenu'? Gulé'eda' lue' ca naca da nache cheę nu'ula nigá, ne cheę be xixre' schanni' na' núaba' le', bea na' zaj napa gazre xíchajba', ne chi lúzuba'. ⁸ Be xixre' schanni' na' blé'enu', nácaba' tu be zúaba' nédxute, na na'a québedxa zúaba'. Wagüenba' lu lataj chul-la nédxudxa ca za gáteba' tu chí'izqueze. Benne' zaj zra' xezr la xu, ne quebe zaj naxúaj le' lu xiche cheę xel-la' nabán ca bente Dios xezr la xu, xelexebánele'ęne' gate xeelé'ęne' bea nigá, be zúaqueze nédxute, na' na'a québedxa zúaba', na' wela'ba'.

⁹ 'Nigá de late' da gulé'eda' benne' xelėjni'ine' na. Gazre xíchajba' caní zaj zėję na gazre xi'a naga dxenná bea nu'ula na'. ¹⁰ Cá'anqueze xíchajba' ca' zaj zėję na gazre benne' wenná bea. Gazxu' benne' wenná bea caní ba gulate'. Tu benne' ca' dxenná be'ę na'a, na' xetue' quebe ne xide'. Gate la' benne' bzebe nigá, québedxa súateque' scha'. ¹¹ Be xixre' schanni' na', be zúaba' nédxute, na' na'a québedxa zúaba', zėję na benne' xrunu' naque' benne' wenná bea. Naque' tu benne' ládujla benne' gazre ca', na' te na' gatie' tu chí'izqueze.

¹² 'Chi lúzu be xixre' snia na' da blé'enu' zaj naca na chi benne' wenná bea ca', benne' quebe ne xelezú lawe' xelenná be'ę, na' xelezí'ę xel-la' dxenná bea xelaque' wenná bea tu chí'idau'ze tu zren nen be xixre' schanni' na'. ¹³ Benne' chi wenná bea caní zaj nune' tuze dizra', na' xulunézruje' xel-la' szren cheę', ne xel-la' dxenná bea cheę' lu na' bėnnea' naque' be xixre' schanni' na'. ¹⁴ Benne' caní xeledíl-lalęne' Bėnnea' naque' Zríla'dau', na' Benne' nigá guzría xi'ę benne' wenná bea ca', lawe' da naca Le' Benne' Wenná Bea cheę benne' wenná bea ca', ne Xrane benne' zaj naque' xrane bėnneache, na' benne' ca' zrálęne' Le', gunné Dios le', ne guqué'ę le', na' zaj naque' li lazre'.

¹⁵ Cá'anqueze gubáz cheę xabáa na' guzre' neda':

—Nísadau' ca' blé'enu', naga dxe' nu'ula na' dxúnle'ę da sban, zaj naca na xezre bėnneache ca', ne benne' dxelenné' dizra' walazre' cha cheę', ne benne' zane cue' xezr la xu. ¹⁶ Chi

lúzuba' na' blé'enu' xichaj be xixre' schanni' na', da zaj naca na chi benne' wenná bea ca', xelexuídene' nu'ula na' dxúnle'e da sban, na' xelebéaj xíchajé' le', ne xulucá'ane' le' gala xídeze. Xelawe' bela' dxen chee', ne xuluzexe' le' lu xi'. ¹⁷ Dios bzue' lu lázrdau benne' wenná bea ca' xelune' ca da dxaca lazre' Le', gate belune' tuze dizra', ne bulunézruje' xel-la' dxenná bea chee' lu na' bénnea' naque' be xixre' schanni' na', cadxa gaca ca da ba gunná Dios. ¹⁸ Nu'ula na' blé'enu' naque' Babilonia, xezre zrentau' na' dxenná be'e na benne' wenná bea ca' zaj zre'e xezr la xu.

18

Dxebía xi' xezre Babilonia

¹ Gudé na' ble'eda' betaj xetú gubáz chee xabáa, nápalé'e xel-la' dxenná bea, na' bsení' xel-la' szren chee' lu xezr la xu. ² Na' gunné' zizraj:

—Ba guzríá xi'. Ba guzríá xi' Babilonia, xezre zrentau' na', ne ba bexaca na lataj naga zaj zra' da xriwe' ca', ne lataj naga zaj zra' xúgutę cue' be' xriwe' ca', ne lataj naga zaj zra' be zua xrila, be schanni' ca', ne be sgate ca'. ³ Xúgutę bėnneache zaj zre'e tu tu cue' xezr la xu zaj naque' ca benne' dxelezuzre', lawe' da dxelune' da sban da dxaca xezre na', na' benne' wenná bea ca' zaj zre'e xezr la xu belune' da sban da dxaca xezre na', na' benne' ca' dxelúti'e gulaque' benne' gunní'a ne chee da zante da gulezá lazre' benne' ca' zaj zre'e xezre na'.

⁴ Nadxa benda' chi'i xetú benne' da za xabáa, dxenné':

—Le dxuaj xezre na', le'e, nácale chia', chee quebe gácale benne' ca' tuze lu dul-la da dxelune', ne chee quebe tele lu da ba xa' da xelezaca benne' ca'. ⁵ Dul-la chee benne' ca' ba guxán na, na' zaj naca na ca tu da ba bgula, da ba bzrintę na zran xabáa, na' Dios ba xeajsá lazre' ca naca da zrinnaj da dxelún benne' ca'. ⁶ Dios gunézruje' chee benne' ca' cáteze da bulunézruje' chee benne' xula, ne xunézruje' le' chupa cuenla ca da zrinnaj da belune'. Ba nucueze' da xezeaque' da nácale'edxa zi' ca da bulusaque' benne' xula. ⁷ Gudé' benne' ca' lu da ba xa', ne gudé' le' xel-la' zi' cáteze na' belune'. Buluzúa cuine' lu xel-la' szren, ne gulezúe' lu xel-la' dxelexezaca ba lazre' chee', lawe' da dxelenné' lu lázrdawe': Dxé'entu' nigá dxenná béantu'. Quebe nácantu' wezebe, ne quebe bi sácantu'. ⁸ Chee le' na', tuze zra xelezrín da ba xa' ca' da xezeaque', xel-la' gute, ne xel-la' zi', ne xel-la' dxedún, na' xelexe' lu xi', lawe' da napa Xránadxu Dios dute xel-la' dxenná bea, na' naque' Bénnea' guchugue' chee benne' ca' xezeaque' caní.

⁹ Benne' wenná bea ca' zaj zre'e xezr la xu, ne belúnle'ne' benne' ca' da sban ne da belexezaca ba lazre', xebezre

xache' gate xeledé'ene' ca naca zren chee xezre na', da dxezxe na. ¹⁰ Welezé' zítu'la lawe' da xelezrebe' xezezaque' ca da dxelezaca benne' ca', na' xelenné':

—Baxache' nácale le'e, benne' zaj zre'e xezre zrentau', Babilonia, lawe' da chadite bla' da ba xa' da dxezácale.

¹¹ Cá'anqueze benne' ca' dxelúti'e, benne' zaj zre'e xezr la xu, welebezre', ne welebezre xáchequeze' ca naca da dxaca chee xezre na', lawe' da québedxa nu chilá' benne' si'e da dxeluti'e,

¹² da zaj naca oro, ne plata,

ne xiaj xrtante ca', ne bga ca',

ne ladxe' zaca ca', ne ladxe' bzawe ne da xrna,

ne xúgute cue' xaga ca' dxelelále'e na zixre,

ne zrita xrtante, ne xaga xrtante,

ne xia gache, ne xia, ne xiaj esa',

¹³ ne lacu zixre, ne xíxre'dau' dxelále'e na zixre,

ne xala, ne da ca' dxelelále'e na zixre,

ne xrise uva wala, ne za xel-la' wagu,

ne xrte xezaj, ne zrúa' xtila,

ne be xixre', be dxelúa xua',

ne zrila' ca', ne bzrina' ca',

ne da ca' dxudé xua,

ne benne' ca' dxelúti'e le' lu na' benne' gunní'a ca'.

¹⁴ Benne' caní xelé'e benne' zaj zre'e xezre na':

—Na'a québedxa gápale da zixre ca' da zácale'e na da bdánnele'e, ne ba bnítele tu chí'izqueze xúgute xel-la' gunní'a chee, ne da xrtante chee.

¹⁵ Benne' ca' belúti'e da ca' xeledé' zítu'la lawe' da dxelezrebe' xezezaque' ca da dxelezaca benne' zaj zre'e xezre na', na' xebebezre', ne xebebezre xáchequeze', ¹⁶ na' xelenné':

—Baxache' zaj naca benne' ca' zaj zre'e xezre zrentau' na'. Gulaque' ca tu nu'ula nacue' ladxe' zácale'e da bzawe, ne da xrna, ne nazí'e lechítaje da naca na oro, ne xiaj xrtante, ne bga ca'. ¹⁷ Chadite benite xel-la' gunní'a na', ne guxezxe na.

Xúgute benne' xrane da ca' dxeledán lawe' nísadau', ne benne' zaj zre'e lu'ule na, ne benne' dxulusé'e da ca' dxeledán lawe' nísadau', ne benne' dxelune' zrin lu nísadau' belezé' zítu'la, ¹⁸ na' gate belelé'ene' zren chee xezre na' dxezxe na, na' gulenné' zizraj:

—¿Bízraqueze xetú xezre naca na da zren ca xezre zrentau' nigá?

¹⁹ Dute xel-la' dxelexewí'ine lazre' xuluzré'e xu xíchaje' ca', ne xebebezre', ne xebebezre xáchequeze', xelenné':

—Baxache' zaj naca benne' ca' zaj zre'e xezre zrentau' na'. Nen xel-la' gunní'a chee benne' ca' gulenni'a xúgute benne' ca' zaj nape' da ca' dxeledán lawe' nísadau'. Chadite guzría xi' xezre zrentau' na'.

²⁰ Ca guca chee xezre na', le be, le'e zrale xabáa, ne le'e, gubáz chee Cristo, ne le'e bchálajle waláz chee Dios, ne xúgutele le'e nácale bi chee Dios, lawe' da gate bzria xi' Dios xezre na', bebéaj lazre' da naca chee le'e.

²¹ Nadxa tu gubáz chee xabáa, gubáz nápale'e xel-la' dxenná bea guchise' tu xiaj zren da naca na ca xiaj xiche, na' bzale' na lu nísadau', gunné':

—Cá'ante cuía xi' Babilonia, xezre zrentau' na', na' québedxa nu lé'equezdxa le' na, ²² ne québedxa nu xen la neza chee xezre na' da ca' dxulugul-la bénneache, da can zríadi'i na du, ne bchiuj, ne luzu da dxulucuezre', ne québedxa nu chilá' gun zrin lu xezre na', ne québedxa xen schaga da dxun da dxutu na. ²³ Québedxa gusení' netú xi' lu xezre na', ne québedxa xen laní chee wechaga na' ga na', lácala benne' ca' belúti'e lu xezre na' gulenná be'e lawe' xúgute benne' zaj zre'e xezr la xu, ne gulezí xe'e xúgute cue' xezr la xu nen xel-la' wazrá' chee'.

²⁴ Caní guca lawe' da lu xezre na' gulalaj dxen chee benne' ca' gulenné' waláz chee Dios, ne dxen chee benne' ca' zaj naque' bi chee Dios, ne dxen chee benne' ca' belute bénneache le' du ca naca xezr la xu.

19

¹ Gudé na' benda' chi'i benne' zan zaj zre'e xabáa, dxeleonné' zizraj:

¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

² Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban, nu'ula na' bxrínnaje' bénneache zaj zre'e duté xezr la xu lu da sban da bene'!

¡Dios ba bebéaj lazre' nu'ula na' lawe' da betie' wen zrin ca' chee Dios!

³ Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

⁴ Nadxa tape dxua benne' gula ca' ne tapa benne' ban ca' buluzú zribe', na' bulucá'ana szrene' Dios, Bénnea' dxe'e lataj blau na', dxeleonné':

—¡Ca' naca na! ¡Gaca ba Dios!

⁵ Nadxa ben tu chi'i benne' lu lataj blau na', dxenné':

¡Le güe lá'ana Dios cheedxu, xúgutele le'e dxunle zrin chee', ne dxezrébele Le', le'e benne' blau, ne benne' quebe nu nácale!

Laní chee wechaga na' chee Bénnea' naque' Zríla'dau'

⁶ Cá'anqueze benda' tu da naca ca chi'i benne' zan, ca dxe-leninne zánete xegu, ne ca dxeleonné'e guziu' ca', dxeleonné':

¡Gaca ba Dios lawe' da ba guzú lau dxenná bea Xránadxu Dios,
Benne' nape' dutē xel-la' dxenná bea!

7 ¡Du be! ¡Béle'ēquezdxu, ne güe lá'anadxu Le'!

¡Ba bzin zra chee laní wechaga na' chee Bénnea' naque'
Zríla'dau'!

Nu'ula na' si'ē ba nupá'a cuínabe',

8 nu'ula na' nazi'ibe' lataj nácube' ladxe' zaca, da quebe
nadxén na, ne dxácatite na.

Ladxe' zaca na' zéaje na da xrlátaje da zaj nun benne' ca' zaj
naque' bi chee Dios.

9 Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné
Dios xeledé'ē laní wechaga na' chee Bénnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

10 Nadxa bzu zriba' lau gubáz chee xabáa na' chee gucá'ana
szrena' le', na' le' guzre' neda':

—Quebe gunu' caní lawe' da nácaqueza' neda' wēn zrin chee
Dios ca lue', ne ca benne' bichu' ca' zéajlele da li na' da ble'e
Jesús le'e. Bca'ana szren Dios. Da li na' da ble'e Jesús le'e naca
na da dxelenná benne' ca' dxuluchálaje' waláz chee Dios.

Benne' zriē' bzrina' chiche

11 Nadxa ble'eda' ba naxalaj xabáa, na' ble'e lau tu bzrina'
chiche, na' Benne' zriē'-ba' le' Du Lazre', ne Li Lazre', lawe'
da dxenná be'ē, ne dxunē' wedil-la lu da xrlátaje. 12 Xiaj
lawē' dxelácatite na ca xi' ca, na' xíchaje' zaj zria zánete da
zaca ca', na' naxúaj tu le' lawē', da nézene' tuze Le'. 13 Nacue'
tu zre' da nazaj na dxen, na' La Le' naca na Xrtizra Dios.

14 Xúgute benne' ca' zaj zre'ē xabáa zjácálene' Le', zaj nacue'
ladxe' zaca ca', ladxe' chiche zríladau', ne zaj zriē' bzrina'
chiche ca'. 15 Dxu'a Bénnea' zua tu da naca na ca tu xia nalále'ē
da quine' benne' xezre ca', na' nna be'ene' benne' ca' nen tu
bar xia. Le' guzrí xi'ē benne' ca' ca tu benne' dxesíē' uva
ca', ne dxuléaje' na, da zéaje na da ba xa' da nucueza Dios lu
xel-la' dxezra' chee', ca da xelezaca bénneache ca'. 16 Naxúaj
le'ē zre', ne zríchuje' da nazí Le' caní: Benne' Dxenná Be'ene'
Benne' Wenná Bea Ca', ne Xrane Benne' Ca' Zaj Naque' Xrane
Bénneache.

17 Nadxa ble'eda' tu gubáz chee xabáa ze' lu gubizra, na'
gunné' zizraj xúgute be' zua xrila, be' dxeledá zran xabáa,
dxenné':

—Le da. Le zraga gágule da dxúnnale'ē Dios le'e, 18 chee
gágule be'la dxen chee benne' wenná bea ca', ne chee benne'
dxelenná be'ē lu wedil-la, ne chee benne' wal-la ca', ne
chee bzrina' ca', ne chee benne' zaj zriē'-ba', ne chee xúgute

bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

¹⁹ Nadxa ble'eda' be xixre' schanni', ne ca naca benne' wenná bea zaj zre'e xezr la xu nen benne' dxjaca wedilla chee ' ca', ba nazrague' chee xeledíl-lalene' Bénnea' zrie' bzrina' chiche na', ne nen benne' ca' zaj de'e Le'. ²⁰ Guléle' be xixre' schanni' na' tu zren nen bénnea' gunné' waláz cheeba', bénnea' benle'e xel-la' waca zren lauba'. Ne chee xel-la' waca caní da bene', benne' nigá guzi xe'e benne' ca' belú'e lataj guzriche luzrgue' laba', ne bulucá'ana szrene' bedau' cheeba'. Nadxa beleché'e be xixre' schanni' na', ne bénnea' gunné' waláz cheeba', na' belegu'e le' zaj nabante' lu xi' chee da dxuzéxle'e na da dxe' ca tu nísadau'. ²¹ Nadxa Bénnea' zrie' bzrina' chiche betie' benne' ca' xezícala nen xia nalá na' zua dxu'e, na' xúgute' bea ca' zaj zua xrila gulélajba' bela dxen chee benne' ca'.

20

Chi gaxúa iza

¹ Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. ² Gubáz nigá gudél-le' be snia schanni', nácaba' bela' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza. ³ Na' gudxú'une'-ba' lataj chul-la na' naga bséxuje'-ba', na' bde'e le'e dxa xu'u na' tu da gunna bea na, chee québedxa si xe na bénneache chee xezr la xu ca' cadxa te chi gaxúa iza. Te chee chi gaxúa iza, dxal-la' xelá' na tu chí'idau'.

⁴ Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bénneache. Cá'anqueze ble'eda' benne'du ca' gulexú'u bénneache ca' gulechugu bénneache xíchaje' lawe' da belexechebe' chee Jesús, ne buluchálaje' xrtizra Dios. Benne' caní quebe bulucá'ana szrene' be xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. ⁵ Benne' gate ca' xezícala quebe xelexebane' ca tedxa chee chi gaxúa iza ca'. Da nigá guca naca na xel-la' dxexebán nedxu. ⁶ Ba neza zrente' naca na chee benne' ca' zaj naque' bi chee Dios, benne' ca' xelexebane' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze chee Dios, ne chee Cristo, na' xelenná be'e tu zren nen Le' chi gaxúa iza.

⁷ Ca te chee chi gaxúa iza ca', na' la' Satanás naga nadxéaj na, ⁸ na' xedxúaj na chee cheajxri' xe na bénneache zaj zre'e xúgute' cue' xezr la xu ca'. Si xe na bénneache xezre Gog, ne xezre Magog, na' guchaga na benne' dxjaque' wedil-la chee xúgute' cue' xezr la xu lu wedil-la, na' benne' dxjaque' wedil-la zaj naque' benne' zan ca naxán xuzre' da dxe' dxu'a tu xegu

zren. ⁹ Ca' guca, beledxúaje' du ca naca lu xezr la xu, na' guléchaje' naga zaj zra' benne' zaj naque' chee Dios, ne xezre na' da nazrí'i Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. ¹⁰ Nadxa gulel-le' da xriwe', da guzi xē na bénneache ca', na' guledxú'une' na lu xi' chee da dxuzézrele'e na da dxe' ca tu nísadau', naga zaj zra' be xixre' schanni', ne bénnea' gunné' waláz cheeba'. Lu xi' na' xeledée' lu da ba xa' te zra, ne chizrela chadía chacanna.

Dios dxe'e lataj blau chiche, dxuchi'e chee benne' ca' dxelune' da zrinnaj

¹¹ Nadxa ble'eda' tu lataj blau chiche, ne Bénnea' dxe'e lataj na'. Lau Le' belexenite xezr la xu, ne xabáa, na' québedxa nu benne' lé'ene' da ca'. ¹² Nadxa ble'eda' benne' gate ca', benne' blau, ne benne' quebe nu zaj naque', zaj ze' lau Dios, na' belexalaj xiche ca', ne cá'aqueze xetú xiche naga zaj naxúaj la benne' ca' zaj nape' xel-la' nabán. Dios bchi'e chee benne' ca' cáteze da belún tu tue', da ca' zaj naxúaj na lu xiche ca'. ¹³ Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la chee benne' gate, na' Dios bchi'e chee xúgute' cáteze da belún tu tue'. ¹⁴ Nadxa guledxú'une' benne' gate ca' gulezúe' lataj chul-la naga zra' benne' gate lu xi' chee da dxuzézrele'e na da dxe' ca tu nísadau'. Xi' nigá naca na da zi' da xa' da zeajlí canna, ¹⁵ na' lu xi' nigá guledxú'une' xúgute' benne' ca' quebe zaj naxúaj le' lu xiche chee xel-la' nabán.

21

Tu xabáa cube ne tu xezr la xu cube

¹ Ca gudé na' ble'eda' tu xabáa cube, ne tu xezr la xu cube, lawe' da belexenite xabáa nedxu, ne xezr la xu nedxu, na' québedxa de nísadau'. ² Neda', Juan, ble'eda' xezre lá'azxa, da naca na Jerusalén cube, dxetaj na xabáa, za na naga zua Dios. Xezre na' nabeza na ca tu nu'ula wechaga na' nupá'a cuínabe' chee gácabe' tuze nen benne' cheebe'. ³ Benda' chi'i tu benne' da za' xabáa, dxenné':

—Gunná'xque, Dios zue' ládujla bénneache, na' xelaque' xezre chee', na' Dios súaqueze' nen benne' ca', ne gaque' Dios chee'. ⁴ Dios tu súalezqueze' benne' ca' chee québedxa xelebezre', na' québedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee xúgute' da gulaca nédxute.

⁵ Nadxa Dios, Bénnea' dxe'e lataj blau na' gunné':

—Gunná'xque, neda' dxuna' cube xúgute' da ca'.

Cá'aqueze gunné':

—Bzuj dizra' caní lawe' da naca li lazre', na' waca guxrén lázrele le na.

⁶ Gudé na' guzre' neda':

—Ba bena' xúgute da ba gunnía' guna'. Neda' naca' Benne' zúaqueze' nédxudaute, ne Benne' zúaqueze' bzébedxa. Naca' Bénnea' dxuna' su lau sua xúgute, ne dxuna' xexuzre na. Nu benne' dxebilene', neda' gunézruja' nisa beaj xí'aje' da gunezruj na le' xel-la' nabán, ne quebe bi quízruje'. ⁷ Nu benne' zrue'ene' si'e xúgute da caní, neda' gaca' Dios chee', na' le' gaque' zri'ina'. ⁸ Benne' ca' zaj naque' zra' chebe, ne benne' ca' quebe dxeléajle'e chia', ne benne' ca' dxelune' da zrinnaj, ne benne' ca' dxelutie' benne', ne benne' dxelune' da sban, ne benne' wazrá' ca', ne benne' dxulucá'ana szrene' bedau' xiaj xaga ca', ne xúgute benne' dxelún lazre', gudéa' le' lu xi' chee' da dxuzézrele'e na da dxe' ca' nísadau', da naca na da zi' da xa' da zeajlí canna.

Jerusalén cube

⁹ Nadxa bla' tu gubáz chee gazre gubáz chee xabáa ca' belúxru'e gazre xé'ena bzri ca' naga zaj xu'u da gazre da ba xa' bzebe ca', na' guzre' neda':

—Gudá. Gulé'eda' lue' nu'ula wechaga na', zru'ula Bénnea' naque' Zríla'dau'.

¹⁰ Lu da ble'e Be' Lá'azxa neda', gubáz chee xabáa na' guché'e neda' tu xi'a zren, ne sibe, na' blé'ene' neda' ca naca xezre lá'azxa zren na', Jerusalén cube. Dxetaj na xabáa naga zua Dios. ¹¹ Xezre nigá dxácatite na nen da xabáa chee Dios, na' xel-la' dxácatite chee na naca na ca dxácatite tu xiaj xrtante, ca tu xiaj jaspe, da naca na ca xiaj esa' xrtante. ¹² Dxu'a xezre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj ze tu weaj gubáz chee xabáa, na' le'e dxa xu'u ca' zaj naxúaj la chazrinnu cue' benne' Israel. ¹³ Zaj zua chunna dxa xu'u weaj dapa sácate. ¹⁴ Lu lane ze'e da naxechaj na xezre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee Bénnea' naque' Zríla'dau'.

¹⁵ Gubáz chee xabáa na' dxuchálajlene' neda' nuxre' tu da naca na ca tu xia xtila da naca na oro chee gudxixre' xezre na', ne dxa xu'u chee na ca', ne ze'e da naxechaj na. ¹⁶ Xezre na' naca na lébete dapa saca. Lébete naca na xel-la' tunna, ne xel-la' laga chee na. Gubáz na' bdxixre' xezre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee na zaj naca na lébete. ¹⁷ Gudé na' bdxixre' xel-la' sibe chee ze'e na' naxechaj na. Naca na tu gaxúa tape xun zrita, na' chazrita chee gubáz chee xabáa na' naca na lébete ca chee bénneache.

18 Ze'e na' da naxechaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'. 19 Xiaj lane ze'e na' zaj naca na xiaj xrtante ca':

Xiaj nedxu naca na xiaj jaspe,
na' xiaj gudxupe' naca na xiaj zafiro,
na' xiaj guxunne' naca na xiaj ágata,
na' xiaj gudape' naca na xiaj esmeralda,
20 na' xiaj gázxue naca na xiaj ónice,
na' xiaj xrupe naca na xiaj cornalina,
na' xiaj gazre naca na xiaj crisólito,
na' xiaj xrunu' naca na xiaj berilo,
na' xiaj ga naca na xiaj topacio,
na' xiaj chi naca na xiaj crisoprasa,
na' xiaj chinéaj naca na xiaj jacinto,
na' xiaj chazrinnu naca na xiaj amatista.

21 Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau chee xezre na' naca na oro du lazre', ca xiaj esa' du lazre'.

22 Quebe ble'eda' netú xudau' xezre na', lawe' da Xránadxu Dios, Bénnea' nape' dute xel-la' dxenná bea, nácaqueze' xudau' chee xezre na', ne cá'anqueze naca Bénnea' naque' Zríla'dau'. 23 Xezre na' quebe nachine na gusení' gubizra na', ne beu', lawe' da dxusení'queze da xabáa chee Dios ga na', na' Bénnea' naque' Zríla'dau' naque' xel-la' naxaní' chee na. 24 Bénneache chee xúgute cue' xezr la xu, bénneache gulelé', xeledé' lu xel-la' naxaní' chee xezre na', na' benne' wenná bea ca' chee xezr la xu xelu'e da gunní'a chee' lu xezre na'. 25 Dxa xu'u chee xezre na' quebe xelexxuj na te zra, na' québedxa gata' chizrela. 26 Xelu'e xel-la' szren, ne xel-la' ba lá'ana chee xúgute cue' xezr la xu lu xezre na'. 27 Cabata' chu'u da sban ga na', ne netú benne' dxune' da zrinnaj, ne netú benne' dxun lazre'. Xelú'uze benne' ca' zaj naxúaj le' lu xiche chee xel-la' nabán da napa Bénnea' naque' Zríla'dau'.

22

1 Nadxa gubáz chee xabáa na' blé'ene' neda' tu xegu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bénnea' naque' Zríla'dau'. 2 Laduj neza blau chee xezre na' zaj naxaza xaga dxupa la'a dxu'a xegu na', na' da zixre chee xaga caní' zaj naca na da dxunna na xel-la' nabán, ne dxebía na da zixre chazrinnu lasa tu tu iza. Dxebía na da zixre chee na tu tu beu', na' xrlegue xaga na' naca na da dxexún na benne' zaj zre'e du gabí'i xezr la xu. 3 Québedxa bi gata' da xu'u de'. Lataj blau naga zaj dxe' Dios, ne Bénnea' naque' Zríla'dau' sua na lu xezre na', na' benne' wen zrin chee' ca' xulucá'ana szrene' Le'.

⁴Xelexé'ene' Le' caníqueze, na' La Dios zriche na luzrgá benne' ca'. ⁵Québedxa gata' chizrela ga na', na' benne' zaj zre'e na' quebe xelexinne' xi', ne xel-la' naxani' chee gubizra, lawe' da Xránadxu Dios guseni'e benne' ca', na' benne' ca' xelenná be'e chadía chacanna.

Ba zua gagu zra xelá' Cristo

⁶Nadxa gubáz chee xabáa na' guzre' neda':

—Dizra' caní zaj naca na li lazre', ne waca guxrén lázrele le na. Xránadxu Dios, Bénnea' dxuzúe' Be' chee' xichaj lázrdau benne' ca' dxelenné' waláz chee' ba gusel-le' gubáz chee xabáa chee' chee gulé'ene' benne' wen zrin chee' da ba zua gaca, ⁷dxenné': "La zátequeza'. Ba neza zrente naca na chee benne' zéajlene' dizra' chee Dios da naxúaj na lu xiche nigá."

⁸Neda', Juan, benda', ne ble'eda' da caní. Ca gudé benda' na, na' bzu zriba' zran ni'a gubáz chee xabáa na', gubáz blé'ene' neda' da caní chee gucá'ana szrena' le'. ⁹Na' le' guzre' neda':

—Quebe gunu' ca' lawe' da naca' wen zrin chee Dios ca nacu' lue', ne ca zaj naca benne' bichu' ca' dxelenné' waláz chee Dios, ne ca zaj naca xúgute benne' ca' zjácálene' ca da naxúaj na lu xiche nigá. Bca'ana szren Dios.

¹⁰Cá'anqueze guzre' neda':

—Quebe gucachu' ca naca dizra' chee Dios da naxúaj na lu xiche nigá lawe' da ba zua gaca da naxúaj na. ¹¹Dxácate na', be' lataj benne' dxelune' da zrinnaj xelúnqueze' da zrinnaj dxelune', ne benne' ca' dxelune' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi chee Dios chjácálequeze' da naca na chee'.

¹²Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tu'e. ¹³Neda' naca' benne' zúaqueza' nédxudaute, ne benne' zúaqueza' bzébedxa, bénnea' dxuna' su lau sua xúgute, ne dxuna' xexuzre na. ¹⁴Ba neza zrente naca na chee benne' ca' dxulupé'e xichaj lázrdawe' ca tu benne' dxibe' zra lane', chee xelape' lataj xelawe' da zixre chee xaga da dxunna na xel-la' nabán, na' caní xelexéquene' xelu'e lu dxa xu'u chee xezre na'. ¹⁵Benne' ca' dxelune' da zrinnaj quebe xelu'e ga na', ne québequeze xelú'u benne' wazrá' ca', ne benne' dxelune' da sban ca', ne benne' wete benne', ne benne' dxulucá'ana szrene' bedau' xiaj xaga ca', ne benne' zaj nazri'ine' da wen lazre', ne benne' dxelún lazre'. ¹⁶Neda', Jesús, ba gusel-la' gubáz chee xabáa chia' chee xuluzenne' tu tu cue' bènneache chia' ca naca da nigá. Neda' naca' ca xra xrtau David, benne' wenná bea, ne naca' zri'ine zre sua David na'. Neda' naca' ca belaj zila da dxácatitele'e na.

17 Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebílene', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

18 Xúgutele le'e dxulábale dizra' chee Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'e chee da caní, Dios gudé'e chee bénnea' da ba xa' ca' da zaj naxúaj na lu xiche nigá. 19 Cá'anqueze che nu benne' bi xeque'e chee da zaj naxúaj na lu xiche nigá, Dios wecá'aqueze' da naca chee bénnea' lu xiche chee xel-la' nabán, ne lu xezre lá'azxa chee', cáteze naxúaj na lu xiche nigá.

20 Xránadxu, Bénnea' dxulé'ene' da nigá, dxenné':

—Ca' naca na. La zátequeza'.

¡Ca' gaca na! ¡Gudá, Xrana' Jesús!

21 Dxenaba' Xránadxu Jesucristo guné' da chawe' chee le'e, xúgutele. ¡Ca'an gaca na!